


Mbia Cheẽ



New Testament in Sirionó (BL:srq;Sirionó)

Mbia Cheë

New Testament in Sirionó (BL:srq:Sirionó)

copyright © 1977 Wycliffe Bible Translators, Inc.

Language: Sirionó

Translation by: Wycliffe Bible Translators, Inc.

Sirionó [srq], Bolivia

Copyright Information

© 1977, Liga Bíblica Mundial del Hogar. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Sirionó

© 1977, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 11 Nov 2022 from source files dated 29 Jan 2022
eb2687f2-4654-5d43-8ec2-3ee35e8a435e

Contents

SAN MATEO	1
SAN MARCOS	52
SAN LUCAS	83
SAN JUAN	137
HECHOS	176
ROMANOS	229
1 CORINTIOS	253
2 CORINTIOS	275
GÁLATAS	289
EFESIOS	297
FILIPENSES	305
COLOSENSES	311
1 TESALONICENSES	316
1 TESALONICENSES	321
1 TIMOTEO	324
2 TIMOTEO	330
TITO	335
FILEMÓN	338
HEBREOS	340
SANTIAGO	357
1 PEDRO	363
2 PEDRO	370
1 JUAN	374
2 JUAN	380
3 JUAN	381
JUDAS	382
APOCALIPSIS	384

EL SANTO EVANGELIO SEGÚN SAN MATEO

Jesucristo i ñiinda ainei

¹ Ña ndei Jesucristo i ñiinda ã. David rei ei tuchi. Abraham abe no.

² Abraham ndei Isaac ndu. Isaac ndei Jacob ndu no. Jacob ndei Judá ru no. Judá nongue abe ru. ³ Judá rei Fares ndu. Zara ru abe no. (Tamar rei ũquiſi.) Fares ndei Esrom ndu. Esrom ndei Aram ndu. ⁴ Aram ndei Aminadab ndu. Aminadab ndei Naasón ndu. Naasón ndei Salmón ndu. ⁵ Salmón ndei Booz ndu. (Rahab ndei esi.) Booz ndei Obed ndu. (Rut rei esi.) Obed ndei Isai ru. ⁶ Isai rei David ndu. David ndei ererecua. David ndei Salomón ndu. (Urías ninisi rei esi.) ⁷ Salomón ndei Roboam ndu. Roboam ndei Abías ru. Abías rei Asa ru. ⁸ Asa rei Josafat ndu. Josafat ndei Joram ndu. Joram ndei Uzías ru. ⁹ Uzías rei Jotam ndu. Jotam ndei Acáz ru. Acáz rei Ezequías ru. ¹⁰ Ezequías rei Manasés ru. Manasés rei Amón ndu. Amón ndei Josías ru. ¹¹ Josías rei Jeconías ru. Jeconías nongue abe ru. Ũquí ngue siqui abae judíos rerao mose Babilóniaa nda.

¹² Jeconías rei Salatiel ndu no. Salatiel ndei Zorobabel ndu. ¹³ Zorobabel ndei Abiud ndu. Abiud ndei Eliaquim ndu. Eliaquim ndei Azor ndu. ¹⁴ Azor ndei Sadoc ndu. Sadoc ndei Aquim ndu. Aquim ndei Eliud ndu. ¹⁵ Eliud ndei Eleazar ndu. Eleazar ndei Matán ndu. Matán ndei Jacob ndu. ¹⁶ Jacob ndei José ru. José quia María quereco nguiã. María rei Jesús si. Cristo, i equia ee.

¹⁷ Nyebe cator ce generaciones jaaja. Sã Abraham nane siqui no. David siqui mose, catorce generaciones cote. Abae judíos rerao mose Babilóniaa, catorce que aque abe mose cote ra. Cristo nyaacuquia mose que catorce aque mose cot e no nda.

Jesucristo nyaacuquia mose

¹⁸ Jesucristo chaacuquia tasenei na jêje. María rei esi. María que siquichõ ndei quia José ninisirã nda. Nyucuaaque ru eã ngue siqui rei ra. Nguiirĩ ngue eteachõ nguie ye ra. Siquiã ndaque José rese. Espiritu Turã ae que eririĩ mondo erie ye ra. ¹⁹ José turãte que eriqui rei ra. Eireite que eriqui mae María rio rese ra. —Seninisirã eã nda cote reae. Ahui rei ra esi mbia mbiiranua ndeae, i rei que ndua ndua uchi angui re ra. María siqui rei nguia emo ndese ee reaẽ. ²⁰ José que ndua ndua quia erese ra. Ndua ndua mose que ángel mo ndu eque re cuu ra. Angel que ñee ee ra. —David ririĩ ño nde re. María eisi turã ño neninisirã. ¡Ndeireĩ ngúia ño jê! Emo ngue siqui áte quia erese ra. Espiritu Turã ae que eririĩ mondo erie ye ra. ²¹ Nguiirĩ nda etea. “Jesús” ere chõ eririĩ je. Ae quia ra mbia sirõ tuchi eicuã si, i que ángel ñee José je cuu ra. ²² Eĩ nda Dios cheẽ io cote. Ae Dios cheẽ mbuchecuaasa mbesa cose nae, ũquí nda io cote. Ña ndei embesa ji ã:

²³ ¡Sã jê! Nyucuaaque ruã nda nguiirĩ tea.

Emanuel, i ra eririĩ je.

Dios riqui nanderese co, i ñi Emanuel nde, i que embesa ji cose ra.

²⁴ José que ñumumba cote ra. Angel cheẽ ndui si que María rerequia turã cote ra. ²⁵ José que siqui eã mbei erese ra. Nguiirĩ ndea chee. Jesús i que José eririĩ je ra.

2

Mbia aquiatu nyo: Jesús itãquieĩ ndea

¹ Jesús que nyaacuquia Belén nda. Judea, i que hue ibi je ra. Herodes rei hue jenda mbia rerecua Jesús nyaacuquia mose. Mbia aquiatu mo ngue ngaẽ huee ra. Tenda semba si que ecuaẽ Jerusalén nda. ² Ûquĩ ngue ñee ngaẽ judíos je ra. —¿Mangue judíos rerecua mangue re? Ae nyaacuquia ramo nae ¿mangue mangue re? Uremae ngue nyasitata embae rese ra. Ureico mose ure récuua. Nyebe urechu nguiã erea co. Urecoi rã urenia ndese ñee ee. ¿Ma eriqui ma nde? i que mbia aquiatu ñee judíos je ra. ³ Herodes que jirandu erese ra. “Judíos rerecua nyaacuquia” i mose, Herodes que pare pare i tuchi quia ra. Siqui turã eã cote. Jerusalén jenda abe que ndua ndua jate quia erese ra. ⁴ Herodes que “jenyu” i sacerdote rerecua ja je ra. Embesasa ja je abe que “jenyu” i ra. —¿Mangue ra Cristo nyaacuquia mangue re? “Hue ra nyaacuquia” ¿i embesa ji re? i que Herodes ñee ee ra. ⁵ Ûquĩ ngue ñee Herodes je ra. —Nyaacuquia ra Belén de Judea. I que embesa ji ra:

⁶ Sucha ñetẽ tuchi rei Belén.

Belén de Judea.

Mbia chiicua tuchi ra Belén cote.

Hue jenda mo nda mbia rerecuarã tuchi cote.

Ae ra serimba Israel jenda teaquiato tuchi quia cote,

i que Dios cheẽ embesa ji ra, i que sacerdotes ñee Herodes je ra.

⁷ Nyebe Herodes “jenyu” i nguiã ùquĩ mbia aquiato je. Ñee ngue ùquĩ ísaa ra. —¿Manosete nyasitata embae rese jemaẽ nde? i que ñee ee ra. ⁸ Herodes que ùquĩ mbia aquiato mondochoi Belén cote ra. —Jẽso Belén. Nyaacuquia ramo je rese jẽirandu tuchi. Jẽ erea mose, sembiirandu se. I nda se abe aso mae erese. I nda acoi senia ndese se abe ñee ee, i rei que Herodes ñee ee ra. ⁹ Mbia aquiato que nyo: cote ra. Ae nyasitata rese eriqui mae nyii nae, aque nyasitata que oso bei quia mbia rãta ra. Tiba que ee Belén arõ cote ra. ¹⁰ Nyebe mbia aquiato ia tuchi nguiã mae mose nyasitata tiba rese cote.

¹¹ Mbia aquiato que ique tuchúaa cote ra. Huee que ãquẽ itãquieĩ ndiqui ee cote ra. Usi rese. María, i equia ee. Ngoi que ngũĩã ndese eitãquieĩ je cote ra. Ñee turã ngue ee ra. Mbae que esirõ mondo Jesús je cote ra. Oro. Mbae mbushimbua abe no. Mirra abe no. ¹² Dios que ñee mbia aquiato je cote ra. —Jẽsochĩ nda ñee Herodes mbiirandu jẽ, i que Dios ñee ee cuu ra. Nyebe echoi nguiã Herodes abi nguécuaa.

José nyo: uchã Egíptoo

¹³ Aquere que Dio s ángel mo mondo ñee José je ra. Ñee ngue ee cuu ra. —Herodes ra eitãquieĩ sequia sequia. Iquia serite equia co. Jẽso uchã. ãquẽ jendao sunuã Egíptoo. Esi rese. Huee jẽingochõ. Acheẽ jee ra ndeje huee, i que Dios ñee José je ra. ¹⁴ José que ñumumba juã cote ra. ãquẽ ngue ecuruchoi isa usi rese ra. Nyo: que Egípto quiti ra. ¹⁵ Chi arete que Egíptoo ra. Ererecua Herodes que mano cote ra. Dios cheẽ ngue ique cote ra. Eĩ ngue Dios cheẽ embesa ji ra:

Seriirĩ ngue aru Egípto si ra,

i que embesa ji ra.

Herodes ãquẽ itãquieĩ iquia ja

¹⁶ Herodes que paama i tuchi cote ra. —Mbia aquiatu sembiri iri ñochi. Nyebiã ñochi euaē ñee seje, i que ra. Nyebe que soldados mondo mbia ririñ nacuē iquia ja cote ra. Äquē itäquieñ ngu e eiquia iquia ja quia Belén jenda ra. Hue rurubinda ja abe no. Ngata ramo je abe iquia ja. Nyasitata nyecua quia mbia je nae, aque mosenda äquē itäquieñ iquia ja. ¹⁷ Herodes üqui iquia mose que Dios cheē ique cote ra. Ae Jeremías mbesa quia:

¹⁸ Mbia Ramá jenda nyeseo tuchi.

Eya eã tuchi nguiirñ ndese.

Emo embia aroneäte.

Eriirñ nguia mano jate nguã ee, i que embesa ji ra.

¹⁹ José chi mose Egipto que Herodes mano nyee ra. Nyebe Dios ángel mo mondo nguã ñe e José je. ²⁰ —José, echumumba rã. Jëso Israel cote. Äquē abe erao. Esi rese. Ae äquē iquia serite quia nae, üquiñ ngue mano cote ra, i que ángel ñee José je cuu ra. ²¹ José que ñumumba cote ra. Nyo: que nyebi Israel quiti cote ra. Äquē ngue equerao esi rese ra. ²² Herodes ririñ ngue siqui Judea jenda rerecuarã cote ra. Arquelao, i que ee ra. José jirandu mose erese que esiquiche cote ra. Oso sereäte que huee cote ra. Dios que ñee ee cuu ra. Nyebe esi nguã Galilea cote. ²³ Sucha tubiriã mo ngue chi Galiléaa ra. Nazaret, i que hue je ra. José que nyo: bei hue, hue jendarã cote ra. Nyebe Dios cheē mbesa ji ique nguã cote. I ngue Dios cheē nda: Nazaret jenda ra Jesús, i que Dios cheē nda.

3

Juan el Bautista Dios chë senei senei

¹ Emo mose que Juan el Bautista Dios cheē nenei nenei mbia je cote ra. Dios cheē ngue esenei senei nguia mbia je turúquiaa ra. ² —Jendua si jëicuã ndese. Jendua si Dios rese. Dios ra tu mbia rerecuarã tuchi cote, i beite que Juan nguia ñee nda. ³ Sã Isaías embesa nyii no: Emo ndiqui ñeemombo mombo turúquiaa huee.

“Sã emo ndiqui ñeenda mbuquiche no, eí jenyee si chõ nguia jë abe icoquiatu nandererecua je”, i equia turúquiaa huee,

i que Isaías embesa ra. Juan ñi si que embesa ra. ⁴ Quiicuã mbuaera chõ ngue Juan irao ra. Mbae ire chõ ngue enumbicuaa no nda. Tucu mbuae chõ ngue eu quia no nda. Irao quiaa riinda abe. ⁵ Jerusalén jenda que ngaë ngaë tuchi quia echeë andu ra. Judea jenda abe no. Ama Jordán nimia nduinda abe no.

⁶ Mbia huñicuã nenei nenei mose Dios je, üquiñ mose que Juan ndiqui bautizar i ee ra. Ama Jordán ye.

⁷ Fariseos tubiriã abe que ngaë ngaë tuchi quia Juan ndea ra. Saduceos tubiriã abe no. Juan ngue ñee asite üquiñ je ra. —Mbei rã ño jëingo nguã ä. Mbae icuã nda tu mbia je nae, ¿üquiñ ñiñ ño jenyu quia uchã serea co re? ⁸ Jë mbae icuã ndecha mose Dios je, mbae turã jësaã saã mbei quiatu quia ee cote. ⁹ “Abraham ndiirñ nducucha chõ nande re. Nyebe ra Dios nandemingo bei” jjenyechi nda jë! Dios Abraham ndiirñ nducucha chao arõte raque sita je. ¹⁰ Ira rã si chõ mbia riqui nguã ä. Sã ira mo ndiqui ia turã no. Sã emo ndiqui ia eã no. Aque quia ra mbia maña cote. Erei sacua. Eí serí serí ño Dios nguã mbia je co, mbia mbae turã naa eã mose.

¹¹ I je chõ aico nguã bautizar i mbia je co. Jë ndua ndua si mose Dios rese. Co chi emo ndu quia serui co. Ae quia equiracuã tuchi sesi re. Ae quia eturã tuchi sesi re. Ae quia ra bautizar i mbia je Espíritu Turã je. Mbia chiã mbitirõ

sacuã. Sã tata riqui mbae mbitirõ no. ¹² Ae ra mbia umbae mii icúe. Etura achõ ño embae re. Ae embae eã nae, ñquĩ nda eséi cote. Ñquĩ ndeisa ra ua eã mbei tata. Sã mbia quiata a chiqui chiqui no. Sã ea mii icúe no. Sã echuruique mombo tátaa no, i que Juan ñee mbia je ra.

Juan bautizar i Jesús je

¹³ Jesús que tu Galilea si cote ra. Tu que Juan ndea Ama Jordán nda. Juan bautizar i sacua ee. ¹⁴ Juan ngue teã teã ndei ee ra. —¿Mañi ae ra bautizar i ndeje re? Nde chõ bautizar ere seje ae, i rei que Juan ñee Jesús je ra. ¹⁵ Jesús que ñee ee ra. —Bautizar ere rei seje. Dios cheẽ ndui si mbae nandesaa turã ja quia, i que Jesús ee ra. Juan ngue eno i chee ee ra. ¹⁶ Juan ngue bautizar i ee ra. Jesús que usẽ oso ama si cote ra. Ibei que nyiequia ee cote ra. Espíritu Turã ngue nguichi nyurushi rã nda. Nguichi que eu Jesús rese ra. ¹⁷ Ibei jenda que ñee nda. —Seriri ño co re. Sechesequa chõ co re. Seyate erese, i que Dios ñee Jesús je ra.

4

Jesús tambicua, i raque Satanás

¹ Turúquiaa que Espíritu Turã Jesús rerao ra. “Tã tae Jesús je”, i sacua diablo Jesús je. ² Huee que Jesús riqui arete ra. Cuarenta días. Mbae mo ngue eu eã mbei aque mose ra. Eriãcuãte que cote ra. ³ Aque mose tuchi que diablo si ee ra. Embicua sacua. —Nde Dios riiri mose, mbichae esaã ã sitã je. I nda ereu, i rei que diablo ñee ee ra. ⁴ Jesús que ñee ee ra. —Tei. Sã embesa ji ñee no: “Mbia chiu achõ nda mbia mingo eã. Dios cheẽ nguia ra mbia mingo nguã”, i que embesa ji ra, i que Jesús ee ra. ⁵ Aquere que diablo ererao Jerusalén nda. Querao que suruchui ibate Dios chuchua arõ nda. ⁶ Ñee ngue Jesús je ibate ereco mose ra. —Nde Dios riiri mose, eo oso ibii no. Dios ra ndereaquiato. Sã embesa ji riqui i ñee no:

Dios ra ángeles mondo ndereaquiato sacua.

Oje ra ndeisi. Nembuquichi mingue rae.

Sita ra cua iã ndei je,

i que embesa ji ra, i rei que diablo ñee Jesús je ra. ⁷ Jesús que ñee diablo je ra. —Sã embesa ji ñee no: “ ‘Ma Dios sereaquiato. Tã tae ee no’, jenyechi nda Dios je”, i ñi Dios cheẽ nde, i que Jesús ñee diablo je ra. ⁸ Aquere que diablo ererao ibi ibate mo nda. Ibaté tuchi ererao cote. Diablo que ibi teacuquia ja ee ra. Ishonda abe reaquiata ja ee. ⁹ Diablo que ñee ee ra. —Sembae ja chõ ibi re. Ibi turã ja. Ndeico mose serese, tamondo ja ndeje. Serimbarã mose nde, tamondo ja ndeje, i rei que diablo ñee Jesús je ra. ¹⁰ Jesús que ñee ee ra. —Quiatúae sesi ae, Satanás. ¿Mañi nda se nderimbarã nde? “Dios ae rese chõ jeingo”, i que embesa ji ñee ndesẽ, i que Jesús ee ra. ¹¹ Diablo que oso erecha cote ra. Angeles que ngaẽ Jesús reaquiato cote ra.

Jesús mbia mbaaquiato quiato ramo

¹²⁻¹³ Aque mose que mbia rerecua Juan tarõ cárcel nda. Jesús jirandu mose etarõ ndese que esi Galilea cote ra. Nazaret, i que sucha tubiriã je ra. Aquere que esi siri Capernaum cote ra. Ama ndisha ji. Zabolón abe ji. Neftalí abe ji. Huee que Jesús si siri ra. ¹⁴ Isaías chimbasa Dios cheẽ ngue ique cote ra. Jesús siqui mose huee. Eĩ ngue Isaías embesa cose ra:

¹⁵⁻¹⁶ Mbia hue jenda ja que siqui itondáruu nyii ra.

Zabolón jenda. Neftalí jenda.

Ama ndisha ji jenda.

Ama Jordán ndobeinda.

Ae judíos eã Galilea jenda nae, ũquĩ abe no.

Ũquĩ mbia que siqui ja rei itondáruu nyii ra.

Nyaashĩ ngue tu ee cote ra,

i que Isaías embesa ra. ¹⁷ Aque mose bei chõ ngue Jesús riqui ñee mbia je cote ra. —Jendua si Dios rese. Mbia rerecuarã tuchi ra Dios namo jiri, i que Jesús quia ñee mbei mbia je cote ra.

Jëingo serui, i Jesús uchimbaaquiaturã je

¹⁸ Emo mose que Jesús si quia ama nimia ndui ra. Ama Ndisha Galilea. Huee que mae Simón Pedro rese ra. Enongue rese abe que mae nda. Andrés, i equia ee. I que eu sira mbuasa mondo mondo ii ra. Sira resenda bei rei ũquĩ.

¹⁹ Jesús que ñee ee ra. —i Serui bei chõ jëingo jë! Taembaaquiatu quiatu. Mbia teendu endu bei quia seje cote, i que Jesús ee ra. ²⁰ Nyoj ja que erui ra. Sira mbuasa si que echoi hui ra. ²¹ Pe jiri que mae Jacobo rese ra. Enongue rese abe. Juan, i equia ee. Eru abe que siqui erese ra. Zebedeo, i equia ee. Huee que echi ja canoa ye sira mbuasa mbítirõ tirõ nda. —Jëingo serui, i que Jesús Jacobo je ra. Juan je abe. ²² Jesús cheẽ nduibe tuchi que echoi erui ra. Canoa ndecha. Ngu abe recha.

Jesús mbia tubiriã mbaaquiatu

²³ Jesús que ngata tuchi quia Galilea rĩ nda. Mbia que embaaquiatu quiatu quia mbia chumunua nuásaa ra. Dios cheẽ turã ngue esenei senei nguia ee ra. Mbia rasi chumumbara que embucherõ cherõ nguia ra. ²⁴ Mbia Siri a jenda que jirandu tuchite chee erese ra. Nyebe eriqui nguia erasi rurucuaẽ cuaẽ jate ee. Erasi chumumbara. Mbia aba checuayã nyireco abe no. Mbia quiachã quiachã je abe no. Mbia umi sayã je abe no. Jesús que embucherõ cherõ ja quia ra. ²⁵ Mbia tubiriã tuchi que siqui Jesús rui cote ra. Galilea jenda. Decápolis jenda abe no. Jerusalén jenda abe no. Judea jenda abe no. Ama Jordán ndobeinda abe no. Uquĩ jenda siqui ja Jesús rui.

5

Jesús mbia mbaaquiatu quiatu ibi ibate

¹ Mbia tubiriã ngu e chi Jesús rese ra. Nyebe Jesús nyui nguia ibi ibate mo ndese ra. Ngoi que huee ra. Echimbaaquiatu que esichã ngaẽ nda. ² Jesús que embaaquiatu quiatu ra.

Ae eyate riqui

³ Eĩ ngue ñee ee ra:

—Ae siqui mingue quia nae, eya chõ ũquĩ nde. Ũquĩ nda siqui Dios rese.

⁴ Ae nyeseo quia nae, eya chõ ũquĩ nde. Dios ra embia tuchi.

⁵ Ae eseteãte riqui nae, eya chõ ũquĩ nde. Ibi ja ra embae cote.

⁶ Ae siqui turã sete quia nae, eya chõ ũquĩ nde. Dios ra embucuata turã nguia.

⁷ Ae eya eãte riqui mbia rese nae, eya chõ ũquĩ nde. Dios ia eãte ra ũquĩ ndese.

⁸ Ae echiã turãte riqui nae, eya chõ ũquĩ nde. Ũquĩ nda mae Dios rese.

⁹ Ae mbia mingo turã nguia nyiese nae, eya chõ ũquĩ nde. “Seriirĩ” i ra Dios ũquĩ je.

¹⁰ Mbia icuã icuã mose jêturã je, jêya tuchi rae. Jenderecua tuchi chõ Dios riqui nguia co.

¹¹ Mbia ñee icuã mose jêje serĩ, jêya tuchi rae. Mbia icuã icuã mose jêje serĩ. Mbia ñee ñooño mose jeni, jêya tuchi rae. ¹² Jeñimbua chõ nguia ũqui mose. Dios quia ra mbae turã tuchi mondo jêje ibate. Mbia icuã icuande jêje nyii. Eĩ ngue mbia icuã icuã nguia Dios rimba je nyii no nda.

Tata rendi rã ndei Dios quiato

¹³ Embiquesa rã ño jêingo nguia mbia je ã. Sã embiquesa turãte no. Eise quiachamba mose, eicuã tuchi ra cote. Mbia ra emombo chõ cote. Mbia ra irõ ño erese. ¹⁴ Tata rã ño jêingo nguia mbia Dios quiatoã je ã. Mbia sucha cuasu raã mose ibi ibátee, mbia ra mae ja erese. ¹⁵ Sã nandeico lámpara mendi no. Sã nandeico eati eã no. Sã nandeico emii eã mbaequi re no. Erendi checua chõ nda nandemii nguia. Mbia resae ja sacua. ¹⁶ Eĩ jenyee si chõ nguia tata turã na. Mbae resae turã mbia je. Eĩ jenyee mose ra mbia mae jêturã ndese. Ñee turã nda jendu ibatenda je cote.

Jesús mbia mbaaquiato quiato Moisés chimbesa rĩ

¹⁷ Dios cheẽ ique ja sacua ño achu nguia co. Moisés cheẽ mbutiã sacua eã ño ngue achu nguia. Dios cheẽ mbuchecuasa cheẽ mbutiã sacua eã ño ngue achu nguia. ¹⁸ Tacheẽ nyecua jêje. Moisés cheẽ nda ique ja. Ibei ra ua. Ibi abe ra ua no. Moisés cheẽ nguia ra ua eã mbei. Ique ja chee rae. ¹⁹ Dios cheẽ tubiriãte raque mbia je, mbiã echeẽ mumbayã sacua. Emo echeẽ mii mumba mose, Dios biãte ra ũqui, Dios siqui mose ererecuarã tuchi cote. “Dios cheẽ mii emumba”, i mose emo, Dios biãte ũqui. Ae echeẽ mumbayãte quia nae, Diosbi tuchi chõ ũqui nde. Ae ñee nguia mbia je nae, “Dios cheẽ jemumbayã ja” i quia mbia je nae, Diosbi tuchi chõ ũqui nde. ²⁰ Tacheẽ nyecua jêje. Fariseos uturã saã saã tuchi raque. Embesasa abe uturã saã saã tuchi raque. jê nguia jêingo turã tuchi ũqui si jê! Jê jêingo turã eã mose ũqui si, jêingo eã nda Dios rese, Dios siqui mose mbia rerecuarã.

Paama jenyechĩ nda emo je, i Jesús

²¹ Amei ñee ngue jeñandu rei ra. “Mbia mo nda ereiquiachĩ. Nde mbia mo iquia mose, nde abe ra mbia ndeiquia arõte”, i rei que ameĩ nda. ²² Se quia tacheẽ nyecua jêje. Jê paama i chooño mose jenongue je, mbia ra jêiquia arõte. “Ndeaquiatuã nde” jenyee mose jenongue je, mbia ra jêiquia arõte. “Ndearacuayã nde” jenyee mose jenongue je, jeso arõte ra tata cuasu. ²³⁻²⁴ Nembae ofrenda rerao mose Dios je, endua rã nyii, emondo nonde ee. Ndenongue mo paama i mose ndeje, ofrenda esecha rã oso ñee ndenongue je. Jeñimbuturã na nguia nyii. Aquere quiato eso nyebi ofrenda mee Dios je cote. ²⁵ Emo mbia rerecua mbuqueta queta mose nderĩ, ndeturã ño ee. Echeẽ turã ño ee. Jê ae chõ jeñimbuturã jenyue. † nda ndererao icuã eã. Ndererao mose ra ndetarõ mbei cárcel. ²⁶ Huee ra ereico bei. Nembae mondo ja tuchi chee ra.

Emo mae mose cuña mo oseĩ oseĩ, adulterio i ũqui je

²⁷ Amei ñee ngue jeñandu rei ra. “Emo ninisi rese ra jêingochĩ”, i rei que ra. ²⁸ Se quia tacheẽ nyecua jêje. Emo mae icuã mose cuña mo ndese, “aque rese nda aico raã ña” i mose, ũqui abe eicuãte. Siqui raanguia erese chõ ũqui nde. ²⁹ Nderesa mae mose mbae icuã ndese, echoo mombo. Nderesa nemingo serĩ mose mbae icuã nde se, echoo mombo. Coche nderesa mii eremombo

nguiã. † nda nderete osoã tata cuásuu. ³⁰ Ndeo nemingo mose mbae icuã ndese, echisia mombo. Coche ndeo mombo nguiã. Ndequiato cutinda raque. † nda nderete osoã tata cuásuu.

Jeninisi ra jemombochĩ jẽ, i Jesús

³¹ Amei ñee ngue jeñandu rei ra. “Emo ngũinisi mombose mose, sã emombo chõ. Papel mbesa ji emondo ee”, i rei que amei nda. ³² Se quia tacheẽ nyecua jẽje. ¡Jeninisi ra jemombochĩ jẽ! Jeninisi siqui mose emo ndese, ũquí mose miĩ ño jeninisi jemombo arõte raque. Jẽ emombo chooño mose, jẽingo jeninisi mingo adulterio rese ũquí. Ae emombo ji quereco cote nae, ũquí abe eicuãte no. Adulterio, i chõ ũquí je re.

Jurar jenyẽ jirichĩ nda jẽ

³³ Amei ñee ngue jeñandu rei ra. “Jurar jenyẽ mose Dios je, jeñee nda jembuchebichĩ ee”, i rei que amei nda. ³⁴ Se quia tacheẽ nyecua jẽje. ¡Jurar jenyẽ eã mbei tuchi jẽ! Ibei riĩ abe jurar jenyẽ eã jẽ. Dios recua chõ ibei re. ³⁵ Ibi riĩ abe jurar jenyẽ eã jẽ. Dios ironguia chõ ibi re. Jerusalén niĩ abe jurar jenyẽ eã jẽ. Dios mbae tuchi chõ Jerusalén nde. ³⁶ Jeãquí niĩ abe jurar jenyẽ eã jẽ. Jẽa miĩ mo jembushĩ aroneate. Co miĩ jemondei aroneate no. ³⁷ ¡Jurar jenyẽ eã jẽ! “Ae” jenyẽ chõ. “Tei” jenyẽ chõ. Ũquí miĩ ño jeñee. Jurar jenyẽ mose, eicuãte ũquí.

Emo icuã mose jẽje, jẽturã ño ee

³⁸ Amei ñee ngue jeñandu rei ra. “Emo nderesa mungue mose, nde abe aque resa emungue. Emo nderẽi siquio mose, nde abe ereĩ esiquio”, i rei que amei nda. ³⁹ Se quia tacheẽ nyecua jẽje. Mbae icuã nda jẽsaãchĩ mbia icuã je. Emo ucua mose nderitii rese, nderitii ribisho abe eteacuquia ee. ⁴⁰ Emo demandar i mose ndeje, “nembae camisa emondo seje” i mose, emondo chõ ee. Ndeirao nongue abe emondo ee. ⁴¹ “Sembae mbae usi erao jiri seje”, i mose emo ndeje, peebe jiri erao ee. ⁴² Emo ache ache i mose ndeje, emondo ee. “Mbae mo prestar ere seje” i mose emo, emondo ee.

⁴³ Amei ñee ngue jeñandu rei ra. “Ae eturãte riqui ndeje nae, echesecua erese. Ae ndeucuãyã nguia nae, nde abe eucuãyã” i rei que amei nda. ⁴⁴ Se quia tacheẽ nyecua jẽje. Echesequa chõ ndeucuãyãsa rese. Mbae turã esaã ño nguia ee. Ae ñee icuã nguia nderiĩ nae, echeẽ turã ño nguia nde ee. Ae eicuãte riqui ndeje nae, ũquí niĩ eico ñee turã Dios je. ⁴⁵ Eĩ jenyẽ mose ra Ibatenda riiriĩ turã tuchi jẽ. Dios quiarei eturã mbia ja je. Mbia turã je. Mbia icuã je abe no. Dios quiarei tenda mbusẽ turã mbei mbia turã je. Eicuã je abe no. Dios quiarei ama mbuchaaqui turã mbei mbia turã je. Eicuã je abe. ⁴⁶ Ae eturãte riqui mbia jẽje nae, ũquí achõ je jẽturã mose, eicuãte ũquí. Mbia icuã abe mbae turã saãte uquiato achõ je. Eĩ jenyechĩ nda jẽ. ⁴⁷ Jẽquiato achõ je jeñee turã mose, aba biãte ũquí. Eĩ ño Dios quiatoã abe nguiã ñee turã uquiato je. ⁴⁸ Jẽ nguia jẽingo turã mbei mbia ja je. Sã jendu Ibatenda turã mbei riqui no.

6

Mbae turã jẽsaã nyecuayã ño nguia

¹ “Sã mbia mae ja sechiao turã ndese”, jenyechĩ nda mbae turã naa mose. Mbia résaa achõ nda mbae turã jẽsaã saãchĩ jẽ. Ũquí jẽsaã saã mose ra jendu Ibatenda mbae turã mee eã jẽje. ² Jẽingo mose mbae mee mee mbaecha reã

je, jemondo checuayã ño nguia ee. Mbia mbiirandu randu eã. Ae uturã saã saã nguia nae, ùquí na nda jëingochĩ. Dios ra mbae turã mee eã ùquí je. “Sã mbia mae ja sechiao turã ndese”, jenyechĩ nda jë. ³ Mbae turã jësaã mose, jësaã mingue chõ. ⁴ Mbae turã jësaã nyecuayã ño. Jëingo mose mbae turã naa naa nyecuayã, Dios ae ra mae jëturã ndese. Ae quia ra mbae turã mee nyecua jëje cote.

Eĩ jenyechõ ñee Dios je, i Jesús

⁵ Jeñee mose Dios je, jeñee mingue chõ nguia ee. Uturã naa naasa rã nda jëingochĩ. Ùquí ndiqui nyoĩ choi mbiãsaa ñee sacua Dios je ùquí. “Sã mbia mae ja serese secheẽ mose Dios je”, i equia ùquí. Mbia riqui mae jate raque erese. Dios quia ra mbae turã mee eã ee. ⁶ Nde ñeese mose Dios je, nde ae chõ echeẽ nguia ee ndechuchúaa. “Sa mbia mae ja serese”, erechĩ nda jë. Nde a e chõ echeẽ nguia ee. Dios ae ra siqui nderese. Dios ae mbae icua ja nguia. Ae quia ra mbae turã mee ndeje cote.

⁷ Nde ñee mose Dios je, hue rĩ beite ra ereicochĩ ñee ee. Eĩ ño Dios icuasa reã nguia ñee ndaque Dios je. “Hue rĩ urecheẽ mbei mose ra Dios ureandu”, i rei nguia. ⁸ Ùquí na nda jëingochĩ. Ae mbae ãte riqui jëje nae, ùquí Dios icuate quia co. Jeñee nonde ee. “Mbae embu ure je”, jë i nonde ee. ⁹ Eĩ jenyechõ nguia ñee Dios je:

Paba Ibatenda, sã mbia ñee turã mbei quia nderĩ.

¹⁰ Mbia rere cuarã ja sacua echu jei íbii.

Sã mbia ibatenda riqui siqui beite ndebi rese no.

Sã mbia ibi jenda abe riqui ndebi rese.

¹¹ Ae ra ureu namo, ùquí embu rã urechiurã.

¹² Ae uresaã icua icua ndeje nae, ùquí embutiã ná uresi. Sã ureico tesarei mbia icua icua mose ure je no.

¹³ “Mbae icua jësaã” jichĩ nda emo ure je jë!

Ureraquiatu bei quia mbae icua si.

Nde mii ño mbia rerecuarã nde.

Nde mii ño ndequirãcuã nde.

Nde mii je mbia ñee turã sacua mbei. Amén.

Eĩ jenyechõ ñee Dios je. ¹⁴ Mbia icua icua mose jëje, jëtesarei chõ esi. Eĩ jenyechõ mose ra Dios Ibatenda abe jëicua mbutiã jësi. ¹⁵ Jëtesarei eã mose mbia icua si, Dios abe ra jëicua mbutiã eã jësi.

“Sã mbia mae ja serese” jenyechĩ nda hui mose jenyiu si

¹⁶ Jenyiu si jëhui mose Dios je, “sã mbia mae jate seyayã ndese”, jenyechĩ nda ñee. Jendesa ia eã techĩ nda aque mose jë. Eĩ ño uturã naa naasa nguia. Mbia nda mae ja rei nguia erese. Dios quia ra mbae turã mee eã ee. ¹⁷ Ndehui mose ndechiu si Dios je, ndeya chõ eico. ¹⁸ Sã mbia jiranua nderiãcuã ndese. Sã Dios ae jirandu nderiãcuã ndese. Dios quia mbae icua jate nguia. Ae quia ra mbae mee ndeje cote.

Jembaerã ibatenda rese quia jëingo ndua ndua

¹⁹ “Mbae turã tamunua nu a sembaerã aa íbii”, jenyechĩ nda jë. Chicuaquiareĩ nda eu arõte. Emo embuquiachã arõte jësi. Eichoi arõ ndete no. ²⁰ Ibate quia mbae jemunua nua jembaerã. Ibate quia ra chicuaquiareĩ eu eã. Ibate quia ra jembaerã ichoi eã mbei. Ibate quia ra emo embuquiachã eã jësi. ²¹ Jembaerã chi mose ibate, Dios rese ra jëingo ndua turã. Jembaerã chi mose íbii, ibi jenda mii ndese ra jëingo ndua.

Nanderesa mbae resae nanderete je

²² Nanderesa quiarei mbae resae nanderete je. Nanderesa turā mose, nanderete abe ra oso turā. ²³ Nanderesa icuā mose, nanderete abe ra oso icuā icuā no. Tat a rendi rā jëingo bei. Ūquĩ mose ra jëingo jiri jiriā itondáruu.

Mbae isiquia Dios quiato eã

²⁴ Erimba mi mo siqui aronea ererecua nyeremo ndese. Ererecua nyeremo mose, huee ra erimba ererecua nongue ucuayã. Ererecua nongue ra ebite. Eĩ si chõ mbia re. Ae ndua beite quia mbae isiquia rese nae, ũquĩ siqui aroneate Dios rui. Ae siqui beite quia Dios rese nae, ũquĩ nguiarei ndua eã jiri mbae isiquia rese.

Dios uquiato teaquiatu bei

²⁵ “¿Mbae ra nandeu re?” jenyechĩ nda quicoi coi jë. “¿Ma tiru ra nandemingue re?” jenyechĩ nda quicoi coi no jë. Mbia chiu ae ra mbia mingo eã. Mbia irao abe ra mbia mingo eã no. ²⁶ Sã nguireĩ no. Mbae tiquiayã ndaque. Mbae ishao eã ndaque no. Mbae ruacuã eãte raque embae no. Dios ae quiarei embuquiari quiaru bei. Jë nguiarei Dios queteamba tuchi nguireĩ si. Dios ae jembuquiari nguĩã jë no. ²⁷ Mbi a ae ra tiarõ eã. “Se ra atiarombe”, i raque ndua ndua uchiangui re. Dios ae mbia mbutiarõ nguĩã. ²⁸ “¿Ma tiru ra nandemingue re?” jenyechĩ nda pare pare i jë. Sã mbae uti no. Sã mbae uti turãte riqui no. Mbae ao ao eã ndaque. Ninyu mburirã ndirã eã ndaque. ²⁹ Dios ae chõ mbae uti mbuturã nguĩã. Mbae uti quiarei eturã jiri Salomón si. Salomón turãte raque. ³⁰ Sã Dios quiata mbuturã no. Quiata mano jeite raque. ¿Mañi nda Dios jemburaõ eã jë nde no? ¿Mbaerã jëingo Dios icuayãte re? ³¹ “¿Mbae ra nandeu re?” jenyechĩ nda pare pare i jë. “¿Mbae ra nandembei re?” jenyechĩ nda pare pare i jë. “¿Ma tiru ra nandemingue re?” jenyechĩ nda eno jë. ³² Eĩ ño Dios quiatoã nguĩã. Jë nguia jendu Ibatenda tesareĩã mbeite nguĩã jësi. ³³ Jë nguia jëingo tuchi Dios rese jenderecuarã. Sã Dios turãte no. Ūquĩ na ño jëingo. Ūquĩ mose ra Dios mbae mee mee mbei jëje. Jenyirurã. Jeñimbeirã abe no. Jëiraorã abe no. ³⁴ “Mbae tiã ñochĩ nda seje isamami nde”, jenyechĩ nda pare pare i jë. Isamaminda rese ra jendua nduachĩ namo jë. Namonda mi ndese jendua namo no. Isamami nguiatu jendua isamaminda rese.

7*“Eicuãte que co ra”, jenyechĩ nda emo niĩ*

¹ “Co que eicuãte ra”, jenyechĩ nda emo niĩ. “Jëicuãte” iã nda Dios jëje chã. ² Mbia icuã mose, jeñeechĩ nda ee. Jëturã mose ee, Dios abe ra eturã jëje. Mbae jemee mee turã mbia je. Dios abe quia ra mbae mee tuchi jëje cote. Jë embisẽ mee mose emo je, Dios abe ra embisẽ mee jëje no. ³ ¿Mbaerã jëingo “eicuã” i emo je re? Jë jëicuã tuchi mose esi. “Mbae ñetẽ ndiqui nderésaa aque”, jenyechĩ nda emo je, jë mbae cuasu rerequia mose jendésaa jë nguiatu. ⁴⁻⁵ “Mbae turã ndese chõ jëingo”, jenyechĩ nda jë jëicuã mose jë. “Mbae ñetẽ tasirõ nderesa si”, jenyechĩ nda mbae cuasu siqui mose jendésaa jë. Jë nguia jëturã jësaã saã ñote nguĩã aque. Jë nane nguia jëturã ndiqui. Aquere quia jeñee emo mingo turã cote. ⁶ Sã mbia mo ndiqui perro rã si no. Teasu socioi quia rã abe no. Ūquĩ nguiarei mbia icuã mbei Dios cheẽ andure. Dios cheẽ isi teã teã. Dios cheẽ jësenei eã ũquĩ je cote. Emo je quia jësenei cote.

Jeñee mose Dios je, mbae ra emondo jêje

⁷ Jeñee mbei mose Dios je, mbae ra emondo jêje. Jê mbae mo ndequia mose, jêtea rae. Jê eiquesa mbuu mbuu mose, ûqui mose ra embuquiata jêje no. ⁸ Ae ñee mbeite quia Dios je nae, mbae ra Dios mondo ee. Ae mbae mo sequia beite quia nae, tea rae. Ae eiquesa mbuu mbuu quia no nae, equia ra ee no. ⁹ Jendiirî “mbichae embu seje” i mose, ¿sita ra eru mee ee re? ¹⁰ Jendiirî “sira embu seje” i mose, ¿mbei ra eru mondo ee re? ¹¹ Mbia icuã nyee mbae turã mondo mondo quia nguiirî je ã. Jendu Ibatenda quia ra mbae turã tuchi mee jêje, jeñee mose ee. ¹² Sã jêyate riqui mbia siqui turã mose jêje no. Eĩ jenyee si chõ nguia siqui turã mbia je no. Moisés chimbese tuchi chõ ûqui nde. Dios quiato cose ndare chimbese ja chõ ûqui nde.

Eiquesa chumumbi

¹³ Eiquesa chumumbi rî ño jêso ique jê. Aque ñeenda oso quia tata cuasu nae, eicoi chõ aque re. Ae eiquesa ngasê nguia tat a cuasu nae, eicoi chõ aque no nde. Hue rî mbia tubiriã ndiqui nguia ûqui. ¹⁴ Ñeenda nongue rui quiatu ngasê nguia Dios je. Aque ñeenda quiarei echumumbi. Echumumbi chõ aque ñeenda iquesa re. Mbia mii mii ño siqui nguia aque ñeenda rui. Ûqui nguia ra Dios mingo bei.

Sã ira ae ia ae ae no

¹⁵ Ae Dios cheê senei ñooño nguia nae, aba mbirî irisa chõ ûqui nde. Ûqui ndei Dios quiato raã ñooño. Mbia mbirî irisa Dios rî. ¹⁶ Sã ira ae e a ae ae no. Uva a rã eã nda nyu a ia no. Ea ae eno nde. Higo a rã eã nda isio rashî a no. Ea ae eno nde. ¹⁷ Eĩ si chõ mbia no nde. Mbia turã nda siqui mbae turã ndese. Mbia icuã nda siqui mbae icuã ndese no. ¹⁸ Ira turã mose, ea abe ra eturã. Nyiabi aronea. Ira icuã mose, ea abe r a eicuã no. Ei rã si ra ea. ¹⁹ Ira mo ia turã eã mose, nyisia rae. Mendi rae. ²⁰ Dios cheê nenei neneisa chõ jêicua rã. Dios cheê ndui si eriqui turã mose, Dios quiato chõ ûqui nde. Dios cheê ndui eã mose, Dios quiato eã ño ûqui no nde.

Mbia ra ique ja eã

²¹ “Sererecua” i rei mbia tubiriã nguia seje ã. Ûqui nguia nda ique ja eã nguia serécuaa. Ae siqui Seru Ibatenda cheê ndui nae, ûqui mii ño nda ique serécuaa. ²² Aque mose ra mbia ñee tuchi seje. “Jesús, ndecheê ngue urembuchecua checua tuchi quia mbia je resê. Aba checuayã ngue urejea jea tuchi quia mbia si nderiã ndesê. Mbia mae sayã ngue uresaã saã tuchi quia nderiã ndesê”, i tuch i rei ra mbia seje. ²³ Ûqui je ra acheê. “Co aico jêicua yã mbeite co resê. Jêso serecha. Mbae icuã aosa chõ jê nde”, ae ra ee.

Tuchua nyeremo

²⁴ Ae siqui serese, ae secheê mumbayã nguia nae, ûqui quiarei eturã tuchi. Tuchua ãtã aosa rã ño ûqui nde. Sã eaquiato mo tuchua ao sita turã arõ no. ²⁵ Ama nyaaquí mose, amandi cuasu raque. Quiririã abe ichu ichu raque tuchu a je. Tuchua mbuquiata aroneate. Sita turã arõ nguia ngue uchuchu a ao nguia. Eĩ si chõ secheê mumbasa rã a nde. Tuchu a ãtã aosa rã si. ²⁶ Ae secheê mumba quia eandu mose nae, eaquiato na ño ûqui nde. Sã eaquiatoã mo uchucharã ao no. Aque quiarei ibi ribicoi tuchiã. Sita quiishî arõchi chõ uchuchua ao nguia. ²⁷ Ama nyaaquí mose, amandi cuasu ee cote. Quiririã abe ichu ichu tuchua je. Aque quiarei iãcuã mbucoi asi mondo. Eĩ si chõ secheê mumbasa re, i que Jesús ra.

²⁸ Jesús que hui ucheẽ si cote ra. Mbia que nyuruira tuchi echeẽ andu ra.
²⁹ Ererecua rã ño ngue eriqui nguiã mbia mbaaquiatsu quiatu.

8

Jesús mbia leproso mbucherõ

¹ Jesús que nguichi ibi ibate si cote ra. Mbia cuabẽte que siqui erui ra. ² Emo ndasi que tu ee ra. Leproso, i que aque erasi je ra. Tu que ngoi ngũã ndese ñee Jesús je ra. —Sererecua, nde sembucherõse mose, sembucherõ se, i que ñee Jesús je ra. ³ Jesús que oco erese cote ra. —Echerõ cote, i que ee ra. Echeẽ mosebe que nyerõ nda. ⁴ Jesús que ñee ee ra. —¡Erecheẽchĩ nda mbia mo je jê! Eso nderasiã ndeacuquia sacerdote je cote. Moisés cheẽ ndui si chõ mbae mo emondo Dios je. Eĩ nda mbi a jirandu nderasiã ndese cote, i que Jesús ñee ee ra.

Jesús soldado rerecua rimba mbucherõ

⁵ Jesús que oso sucha tubiriã Capernaum cote ra. Soldado rerecu a mo ngue tu ñee ee ra. Capitán ngue ae ra. ⁶ —Sererecua, serimba rasite riqui sechuchua huee. Erasi tuchi. Umi umi sayã tuchi, i que capitán ñee Jesús je ra. ⁷ —Taso embucherõ, i que Jesús echeẽ mose ra. ⁸ Capitán ngue ñee Jesús je ra. —Seicuãte aico co, Jesús. Sechuchua ra ereiquechĩ. Echeeño. Ndecheẽ achõ ño emondo serimba mbucherõ sacua. ⁹ Se abe sererecua riqui co. Echeẽ amumba aroneate quia co. Se abe soldados rerecua aico nguiã co no. Secheẽ abe emumbayãte quia co no. Eso, i mose, secheẽ mumbayãte no. Echu, i mose, secheẽ mumbayãte no. Se neẽ mose serimba je, secheẽ mumbayãte no. Ndequirãcuã na eãte raque se, i que capitán ñee Jesús je ra. ¹⁰ Echeẽ andu mose que Jesús nyuruirate ra. Ñee ngue nguesenda je ra. —Tacheẽ nyecua jêje. Capitán ndiqui seicua tuchite co. Seicua tuchite equia judíos mo si co. ¹¹ Tacheẽ nyecua jêje. Ae judíos eã emo jenda ja nae, ũquĩ tubiriã nda siqui Dios rese. Dios siqui mose mbi a rerecuarã. Ũquĩ tubiriãte ra quiaru turã Abraham ndese. Isaac rese. Jacob rese no. Judíos eã ndaque ũquĩ. ¹² Dios quia ra judíos mombo itaicue. Itondáruu. Huee ra nyeseo tuchi cote. Erasite ra huee cote, i que Jesús ñee judíos rĩ nda. ¹³ Jesús que ñee capitán je cote ra. —Eso chõ ndechuchúaa cote. Ereico seicuate co. Nyebe ndecheẽ amumba eã nguiã nderimba mbucherõ, i que Jesús ee ra. Jesús cheẽ mosebe que erimba nyerõ nda.

Jesús Pedro ninisi si mbucherõ

¹⁴ Jesús que oso Pedro chuchua cote ra. I que Pedro chari rasi u nyaara ee ra. Eracu tuchi que ra. ¹⁵ Jesús que oco ari o rese ra. Eracu que ti i cote ra. Ari que juã cote ra. Mbae que echao chao quia mbia chiurã cote ra.

Jesús mbia rasi chumumbara mbucherõ

¹⁶ Itondaru ramo mose que mbia erasi rurucuaẽ cuaẽ tuchi Jesús je ra. Ae aba checuayã quereco qui a nae, ũquĩ ndurucuaẽ tuchi Jesús je. Aba checuayã ngue usẽ usẽ nguiã mbia si Jesús cheẽ mose ra. Erasi chumumbara que embucherõ cherõ tuchi quia ra. ¹⁷ Ũquĩ mose que Isaías cheẽ io cote ra. Eĩ ño ngue Isaías embesa cose ra: “Dios rucucha que nandeicuã sirõ nandesira. Dios rucucha que nanderasi sirõ nandesira no nda”, i que Isaías embesa ra. Ũquĩ ngue io cote ra.

Jesús rui taico, i raque emo

18 Mbia cuabête que Jesús mamate ra. Nyebe Jesús ñee nguiã uchimbaaquiatu je. —Nyao rã sobei, i rei que ee ra. 19 Aque mosete que embesasa mo ñee ee ra. —Taico bei nderese. Ndeso mose manguiti, se abe ra aso bei quia nderese, i rei que ñee Jesús je ra. 20 Jesús que ñee ee ra. —¿Mbae rasi ra eresaã saã serese re? Eoita quia ecua jiri re. Nguireĩ nguia equisa jiri no nde. Se quia sequisayã mbei re, i que Jesús ee ra. 21 Echimbaaquiatu mo ngue ñee ee ra. —Sererecua, sã paba mano na. Aquere quia ra aico bei nderui cote, i rei que Jesús je ra. 22 Jesús que ñee ee ra. —Sã mbia ataque chõ nderu chati. Eico chõ serui nde, i que Jesús ñee ee ra.

Jesús quiririã icuã icuã mbutiba; ama ndebera abe

23 Jesús que ua canoa ye cote ra. Uchimbaaquiatu rese. 24 Ama ndiit e re mose que quiririã icuã icuã ndu ee ra. I rebera que ique iche tuchi quia canoa ye ra. Jesús que uque oso quia canoa ye ra. 25 Nyebe echimbaaquiatu Jesús mumba nguiã. —Urembaaquiatusa, echumumba. Ureraaro nã. Nandemanochĩ nda re, i que ñee Jesús je ra. 26 Jesús que ñee uchimbaaquiatu u je ra. —¿Mbaerã jēsiquichete riqui re? ¿Seicuayãte equia ã nde? i que Jesús ñee ee ra. Nyuruã ngue ñee asite quiririã je cote ra. Ama je abe no. Quiririã ngue ti i echeẽ mose cote ra. Ama abe. 27 Echimbaaquiatu que nyuruira tuchi mae Jesús quirãcuã ndese ra. —Quiririã echeẽ mumbayã ñochĩ. Ama abe echeẽ mumbayã ñochĩ, i que ñee ñee nyue cote ra.

Jesús aba checuayã icuã jea

28 Jesús que ngasẽ ama ndobei cote ra. Gadara, i que hue ibi je ra. Amei mo nyeremo ngue ngaẽ ngasẽ Jesús je ra. Mbia raaque tãsa si chõ ngue ecuaẽ ngasẽ Jesús je ra. Aba checuayã icuã ño ngue siqui tuchi nguiã ũqui ñiangui re ra. Aba checuayã ño ũqui mbiacuã tuchi nguiã. Nyebe mbia mo hue rurubiã mbei nguiã. 29 Ũqui ngue ñee asite cuaẽ Jesús je ra. —¿Mañi ere ra equia ure je re, Jesús? Dios rucucha chõ nde re. ¿Urembasi jei sacua ño erechu aa re? i que ñee tuchi Jesús je ra. 30 Chiasu socoi tubiriã ngue chi quiaru huee rurubi ra. 31 Nyebe aba checuayã icuã ñee jate nguiã Jesús je. —Nde urejea mose mbia si, chiasu chiangui re ureso rã, i que aba checuayã ñee Jesús je ra. 32 —Eno, i que Jesús ee ra. Nyebe aba checuayã usẽ ja nguiã amei ñia si cote. Chiasu chiangui re que echoi ja ra. Chiasu que uchã ja choi nyiichere ama nimia mbucu rĩ nda. Ama ndisha ye que echoi ja mano nda. 33 Chiasu raarõsa mundite que ra. Mae mose erese. Nyoĩ que mbia mbiirandu jate chiasu rese ra. —Jesús que amei mbucherõ nda. Aba checuayã ngue ejea esi ra, i que maesa erese ñee mbia ataque je ra. 34 Nyebe hue jenda nyoi ja nguiã ñee Jesús je. —Eso rã urerecha urerecua si, i jate que hue such a jenda ñee Jesús je ra.

9

Jesús emi sayã mo mbucherõ

1 Jesús que ua canoa ye cote ra. Nyoĩ que sobei ra. Ngasẽ ngue uchuchúaa cote ra. 2 Mbia que erasi mo curucuaẽ quisa ye ee ra. Emi sayãte que ae ra. —Erurucuaẽsa riqui seicua ũqui, i que Jesús ñee uchiangui re ra. Nyebe ñee nguiã emi sayã je. —Echimbã chõ, Echo. Ndechisaã mbae icuã ambutiã nguia ndesi a, i que Jesús ñee umi sayã je ra. 3 Embesasa que ñee nyue ra. —Jesús riqui Dios ibatenda raã naa ñochĩ co, i que ñee nyue ra. 4 Jesús que ũqui ndua ndua icuate quia ra. Nyebe ñee nguiã ee cote. —¿Mbaerã jëingo ndua ndua icuã nde? 5 ¿Ma mbaranguiatuã eã jiri jëje re? ¿Mbia icuã mbutiã

esi ere? ¿Mbia rasi mbucherō ere no? ¿Ma mbaranguiatuā eā jiri jēje re? ⁶ Dios rucucha rei se. Mbia chiao icuā mbutiā aquiatu chō se re. Sequirācuā tateacuquia jēje, i que Jesús ñee ee ra. Ñee ngue erasi je cote ra. —Ehuā na. Ndechuchua eso cote. Ndequisa abe erao, i que Jesús emi sayā je ra. ⁷ Emi sayā ngue juā asi oso ra. ⁸ Mbia que nyuruira ja u mae emi sayā ngata rese ra. Mbia que ñee turā ja Dios quirācuā ñi cot e ra.

—*Serui bei eico, i Jesús Mateo je*

⁹ Mateo, i que emo je ra. Ae que impuestos isi isi bei quia mbia rerecua mbaerā nda. Jesús que ngasē ee cote ra. Ngoi que huī plata isi isi impuestorā nda. —Serui bei eico, i que Jesús ñee ee ra. Ae Mateo juā oso nguiā erui. ¹⁰ Emo mose que Jesús nyoī quiaru erese ra. Impuestos isi isiquia ata que chi quiaru erese huee ra. Echimbaaquiatu abe rese. Mbia icuā mo abe que chi quiaru erese no nda. ¹¹ Fariseos que ñee icuāte Jesús chimbaaquiatu je ra. —¿Mbaerā Jesús riqui quiaru mbia icuāte rese re? i que ñee nda. ¹² Nyebe Jesús ñee nguiā ee. —Sā mbia rasiā ndiqui aba mbucherōsa requia eāte no. Sā erasi chō ndiqui erequia no. ¹³ ¿Ā embesa ji jēicuayāte re? “Mbae mo jemee seje”, ae eā nguiā jēje co. “Jēya eā ño mbia rese”, ae chō nguiā jēje co, i que embesa ji ra. Ūqui embesa ji jēicua jiri ae. “Jenyu seje”, aeā ngue u nguiā mbia turā je. Mbia icuā je chō ngue achu nguiā “jenyu seje” i, i que Jesús ñee ee ra.

Jesús chimbaaquiatu hui āte uchui si

¹⁴ Juan ñimbaaquiatu que ngasē ñee Jesús je ra. —Ure quia ureico nguiā hui hui urechiu si ā. Fariseos chimbaaquiatu abe hui hui quia uchui si no. ¿Mbaerā ndechimbaaquiatu riqui hui āte uchui si ā nde? i que ñee Jesús je ra. ¹⁵ Jesús que ñee ee ra. —Sā emo ndiqui ngūimisirā isi ramo no. Sā eresenda iate riqui quiaru erese no. Sā eriqui hui aroneate uchui si aque mose no. Sā eru riqui mano emo mose no. Aque mose quiatu ra equiatu hui uchui si cote. ¹⁶ Sā emo ndiqui tiru yasu mī aroneate tiru ima sorei rese no. Eyasu ra nyaacua quiata eima si. Soro icoi tuchi ra cote. ¹⁷ Sā emo mbaeri rasi ramo nderecoquiato eā eriru ima ye no. Mbae ire ima ye ererecoquiato aronea ño ñene. Eri rasi ra ñimatā ño mbae ire ndoro. Eri ra uchē ja. Mbae ire abe mbiicuāte ra cote. Mbaeri yasu quia nda equerecoquiato nguiā mbae ire yasu ye. Soroā sacuā, i que Jesús ñee ee ra.

Jesús Jairo riirī mbucherō; ari mo abe mbucherō

¹⁸ Jesús cheē mose que judío rerecua mo ngasē ee ra. Jesús jii que ngoi ñee ee ra. —Qui seriirī si mano namote qui. Nyao rā erea. Ndeoco mose erese, quera si rae, i que ñee Jesús je ra. ¹⁹ Jesús que juā oso erese ra. Echimbaaquiuatū abe nyoī erese. ²⁰ Ari rasi mo abe que oso quia mbia ite rī nda. Eruqui nda uchē mbei quia ee ra. Doce años nyee. Eruqui nda tibayā mbei ee ra. Ari que tu Jesús quite quiti erīchā nda. Jesús irao ai rese que oco cote ra. ²¹ —Seoco mose Jesús irao rese ra acherō, i nda ra. ²² Jesús que uba ñee ari je ra. —Coche ñene, Echo. Seicuate que se ra. Nyebe arembucherō nguiā, i que Jesús ñee ari je ra. Aque mose tuchi que eruqui tiba ee cote ra. ²³ Jesús que ngasē nyee judío rerecua chuchua ra. Mbia que nyeseo seo quia āquē ndaaque rese ra. Mbia que irasei rasei eraaque tiquia nonde ra. ²⁴ Jesús que ñee ee ra. —¡Qui jē! Jēso ja itaicuee. Eriirī mano eā ño nguiā. Uque chō ñene, i que ñee mbia je ra. Mbia que iquia iquia echeē mose ra. ²⁵ Jesús que mbia mondo ja chee itaicuee ra. Oso que i que eraaque rea cote ra. Eraaque

o que eisi ra. Quera si que cote ra. Nyuruã ngue cote ra. ²⁶ Mbia hue jenda que jirandu jate erese ra. Jesús eraaque mbuquera rese.

Jesús eresayã nyeremo mbucherõ

²⁷ Jesús que oso hue si cote ra. Mbia resayã nyeremo ngue nyoï erui ra. Ñee mombo mombo que Jesús je ra. —¡Jesús! ¡David rucucha! ¡Ndeyayã ño urerese jê! i que ñee Jesús je ra. ²⁸ Jesús que oso ique tuchúaa cote ra. Ae eresayã nyoï nguiã erurubi. Jesús que ñee ee ra. —¿Sequirãcuã jembucherõ arõte rei nguiã jêje re? i que Jesús ñee ee ra. —Ae, i que eresayã ñee ja ee ra. ²⁹ Ae Jesús oco nguiã eresa rese cote. —Seicua mose ra jaembucherõ, i que ra. ³⁰ Eresa que nyerõ ja ee cote ra. —Sã mbia jiranua serese, i tuchi rei que Jesús ñee ee ra. ³¹ Eresayã ngue Jesús cheë mumba tuchi ra. Nyoï que mbia mbiirandu tuchi Jesús rese hue rí ja ra.

Jesús echeë nguiã mbucherõ

³² Jesús so mose que mbia echeë nguiã mo curucuaë ee ra. Aba checuayã icuã ngue siqui aque chiangui re ra. ³³ Jesús que aba checuayã icuã jea esi ra. Echeë nguiã ngue ñee turã cote ra. Nyebe mbia tubiriãte chi nguiã nyuruira mae erese. —Emo ngue ñiquí saã eã mbeite quia aa Israel ra, i que nyuruira jate ra. ³⁴ Fariseos quiatu que ñee icuãte Jesús ríi nda. —Satanás quirãcuã je chõ Jesús riqui nguiã aba checuayã jea jea mbia si co, i rei que fariseos ñee nda.

Jesús ia eã tuchi mbia tubiriã ndese

³⁵ Jesús que nyoï sucha mbuchesea sea ja ra. Mbia mbaaquiato quiatu ja ra. Mbia chumunua nuásaa jate. Dios cheë ngue esenei senei tuchi quia ee ra. Mbia rasi chumumbara que embucherõ cherõ nguia ra. ³⁶ Mbia rasi rasi tuchi que ee ra. Mbia ia eã tuchi que ee ra. Mbia quiachã je rá ngue ee ra. Sã oveja riqui quiachã jate eraarõ iriã no. Eí si chõ mbia nguiã Jesús je. Nyebe Jesús ia eã tuchi riqui nguiã erese. ³⁷ Jesús que ñee uchimbaaquiato je ra. —Secheë andusa reã ndei etubiriã jiri. Secheë nenei neneisa quia rei co mñi jiri. ³⁸ Jeñee nguia Dios je. “Dios, ndecheë nenei neneisa mo emondo tuchi. Mbia mbiirandu randu sacua”, jentye chõ nguia Dios je. Sã mbaecha mbia mo mondo mbae a irei ishao shao equiche mose no, i que Jesús ñee ee ra.

10

Jesús mbia doce irabo uchimbaaquiaturã

¹ Jesús que “jenyu” i uchimbaaquiato doce je ra. Uquirãcuã ngue emee uchimbaaquiato je cote ra. Aba checuayã icuã jea jea sacua mbia si. Mbia rasi chumumbara mbucherõ cherõ sacua abe no. ² Ñ ño echimbaaquiato ñ nde:

Simón (Pedro, i abe que mbia quia ee ra.)

Andrés (Simón nongue rei Andrés.)

Jacobo (Zebedeo riirí ndei Jacobo.)

Juan (Jacobo nongue rei Juan.)

³ Felipe

Bartolomé

Tomás

Mateo (Impuestos isi isiquia rei Mateo.)

Jacobo (Alfeo riirí ndei Jacobo.)

Lebeo (Tadeo, i abe que ee ra.)

⁴ Simón el Cananista

Judas Iscariote (Aque que Jesús mondo mbia icuã je ra.)

Ũquĩ ja que Jesús irabo ra.

Jesús uchimbaaquiatu doce mondo ucheẽ nenei nenei sacua

⁵ Jesús que ũquĩ mondo ja ucheẽ nenei nenei sacua nda. Emondo nonde que ñee ee ra. —Judíos achõ jembaaquiatu quiatu quia. Jẽsochĩ nda judíos eã je. Samaria jenda chuchua abe ra jẽsochĩ. ⁶ Israel jenda chõ jembuchesea sea oso. Ovejas quiachã je rã ño Israel jenda re. ⁷ Jẽso mose, secheẽ jẽsenei senei mbei quia ee. “Mbia rerecuarã tuchi ra Dios cote”, jenyee oso secheẽ nenei nenei judíos je. ⁸ Mbia ire rasi jembucherõ cherõ nguia. Mbia rasi chumubarã jembucherõ cherõ nguia. Mbia raaque abe jembuquera quera quia. Aba checuayã icuã abe jẽjea jea quia mbia si. Sequirãcuã ngue amee ñooño jẽje. “Mbae mo jemee na seje eribishorõ”, ae eã tuchi se quia jẽje co. Nyebe jẽ abe mbae turã jẽsaã ñooño mbia je. “Mbae embu se”, iã mbia je. ⁹ Mbae mo nda jendaochĩ icua jẽso mose. Mbae isiquia mo nda jendaochĩ icua. Mbae isiquia ñete mo nda jendaochĩ icua. ¹⁰ Mbae riru mo abe ra jendaochĩ no. Jẽirao nongue abe ra jendaochĩ no. Jẽiyao nongue abe ra jendaochĩ no. Jenyitochoquia abe ra jendaochĩ. Ae je ra mbae turã jẽsaã saã nae, sã ũquĩ ae riqui jembuquiaru quiaru turã mingo. ¹¹ Jengasẽ mose sucha tubiriã mo, mbia turã mo jẽtea huee. Aque chuchua mĩ ño jẽingo uque. Tuchua ra jembuchesea seate chĩ jẽingo mose huee. Ae ra jengue nyii nae, hue tuchia bei chõ jẽingo uque. ¹² Jẽique mose emo nyuchúaa, hue jenda je jeñee turã no. Saludar jenyee turã ee no. ¹³ Hue jenda siqui turã mose, Dios quirãcuã jemee ee. Siqui turã eã mose, Dios quirãcuã jẽisibe esi. ¹⁴ Hue jenda jẽisi sereã nea mose, jẽhui chõ esi. Hue jenda jeñee andu sereã mose, jẽso chõ hue si. Jẽi tubi jembutomo tomo ee. ¹⁵ Tacheẽ nyecua jẽje. Ae ra jeñee isi sereã nae, ũquĩ nda Dios mbasi tuchi. Uquiatoã nda embasi ja aque mose. Sodoma jenda ra Dios mbasi raque. Gomorra jenda abe no. Ae jeñee isi sereã nae, ũquĩ nguia ra embasi tuchi Sodoma jenda si. Gomorra jenda abe si.

Mbia icuã icuã tuchi ra jẽje, i Jesús

¹⁶ A aico jemondo secheẽ nenei nenei sacua mbia je a. Sã nyacua icuãte riqui oveja je no. Eĩ si ra mbia icuã icuãte jẽje. Oveja seteã na ño jẽingo. Jẽaracua chõ nguia jẽ! Sã mbei aracuate riqui no. Mbae icuã mo nda jẽsaãchĩ jẽ. Sã nyurushi riqui mbae icuã naa eã mbeite no. ¹⁷ Jẽsã jẽ! Mbia icuã icuãte ra jẽje. Jembũrĩ irĩ ndae. Jemee mee icuã nda mbia rerecua je. Jẽiruã nua nda mbia chumunuãsa. ¹⁸ Mbia icuã icuãte ra jẽje serĩ. Mbia rerecua je ra jenderao icuã. Eĩ jenyee mbia rerecua mbiirandu randu serĩ. Judíos eã abe mbiirandu randu serĩ. ¹⁹ Jemee mose mbia rerecua je, pare pare jenyechĩ nda jẽ. “¿Manyae ra ũquĩ ñee ndibishorõ nde?” jenyechĩ nda pare pare i jẽ. Dios ae chõ nda jembucheẽ turã nuiã nguia mbia je aque mose. ²⁰ Jẽ ae ra jeñee eã. Espíritu Turã ae nda jembucheẽ nguia mbia je. ²¹ Jenongue ra jemondo chee mbia icuã je. Jẽiquia sacua. Jendu abe ra jemondo chee mbia icuã je. Jendiirĩ abe ra jemondo chee mbia icuã je. Mbia icuã nda jemo iquia iquia chee. ²² Mbia ra jẽcuayã jate serĩ. Ae ra siqui bei serese, ũquĩ nda Dios mingo bei. ²³ Mbia icuã icuã mose jẽje sucha moo, jẽso chõ sucha tubiriã nonguee. Tacheẽ nyecua jẽje. Achu jeibe ra se. Sucha Israel jenda jembuchesea sea ja eã mose chõ nda achu jei.

²⁴ Jengasu ra jěsaã saãchĩ sesi jě. Se chõ jembaaquiatusa re. Embaaquiatusa quia ecuasú jiri echĩmbaaquiatusa si re. Ererecua quia ecuasú jiri erimba si re. ²⁵ Coche jěingo nguiã se rã si. Sã mbia icuã icuãte riqui seje no. Eĩ si ra eicuã icuã jěje no. Sã mbia “Satanás” i ñee icuã seje no. Eĩ si ra ñee icuã icuã jěje no. Serimba je no.

Dios riqui jendeaquiatusa bei co

²⁶ Jěsiquiche quichechĩ nda ñee icuã icuã je si jě. Ae mbia saã nyecuayã cuayã nguia nae, ũquĩ nda nyecua ja cote. Ũquĩ nda mbia icua ja cote. ²⁷ Ae rĩ aico ñee nyecuayã cuayã jěje nae, ũquĩ jěsenei senei turã mbuchecua mbia je cote. Ae asenei senei nguia jěísaa nae, ũquĩ jěsenei senei turã mbuchecua mbia je cote. ²⁸ Ae “taiquia” i quia jeni nae, jũquĩ si ra jěsiquichechĩ jě! Ae aba mombo serĩte quia tata cuasu nae, aque si quiatusa jěsiquiche. Aque si quiatusa jěsiquiche tuchi jě. ²⁹ Aba queteamba eã jiri raque nguireĩ. Mbae isiquia mumba eãte raque nguireĩ. Dios quia ra tesareĩã nguireĩ mo si. Nguireĩ mo ngoi mose ibii, Dios riqui eicua jate ã. ³⁰ Dios riqui jě mĩ mĩ icua jate co. Jěa mĩ mĩ abe eicua jate quia co. ³¹ Jěsiquichechĩ nda jě. Dios quiatusa queteã tuchi nguiã jendese nguireĩ mo si.

Jesús quiatusa chõ se re, jenyechecua chõ nguia mbia je

³² “Jesucristo quiatusa chõ se re”, ae i quia mbia je nae, ũquĩ nĩ nda acheẽ turã se abe. “Sequiatusa chõ ã nde”, ae ra Paba Ibatenda je. ³³ “Jesucristo quiatusa chõ se re”, ae i ãte quia mbia je nae, ũquĩ nĩ nda acheẽ turã eã se abe. “Sequiatusa eã ño ũquĩ nde”, ae ra Paba Ibatenda je.

Achu chõ ngue mbia mbuchao chao nyesi resẽ, i Jesús

³⁴ ¿Achu reĩ mbia mbuturã turã sacua serimba je jěje re? Tei. Achu chõ ngue mbia mbuchao chao nyesi resẽ. Mbia icuã icuã nda uchue serĩ. Emo emo nda siqui serui. Emo emo nda siqui icuã icuãte ee. ³⁵ Emo nda eicuãte ngu je serĩ. Cuña mo nda eicuãte usi je no. Acuanĩ mo nda eicuãte uchari je serĩ no. ³⁶ Tuchua jenda ra nyao nyao nyesi. Emo nda siqui serese serimbarã. Eataque ra nyao nyao esi. ³⁷ Ae nyesequa tuchi quia ngu rese sesi nae, ũquĩ nda serimbarã eã. Ae nyesequa tuchi quia usi rese sesi nae, ũquĩ nda serimbarã eã no. Ae nyesequa tuchi quia nguĩrĩ ndese sesi nae, ũquĩ abe ra serimbarã eã no. ³⁸ Ae ra siquiã serui, ũquĩ nda serimbarã eã. Æe mano sereãte serĩ, ũquĩ nda serimbarã eã. ³⁹ Sã mbia nduate quia serese. Ae nduate quia nyiese nae, ũquĩ nda nyoĩ eãte ibate. Ae ndua eãte quia nyiese nae, ũquĩ nguia ra nyoĩ ibate.

Dios ra mbae turã mondo mbia turã je

⁴⁰ Ae ra eturã ndiqui jěje nae, seje abe chõ nda eturã ndiqui. Ae eturã ndiqui seje nae, semondosa je abe chõ eturã ndiqui nguiã. ⁴¹ Ae eturã ndiqui Dios chee mbuchecua je nae, Dios ra mbae turã mondo ee. Sã mbae turã mee ucheẽ mbuchecua je no. Ae eturã ndiqui echĩ mbuquishĩ ji je nae, ũquĩ je abe ra Dios mbae turã mondo no. ⁴² Tacheẽ nyecua jěje. Emo sechĩmbaaquiatusa iseĩ mbiu turã mose serĩ, mbae turã abe ra Dios mondo aque je no, i que Jesús ñee uchĩmbaaquiatusa je ra.

11

Juan el Bautista mbia mondo ñee Jesús je

¹ Jesús que hui ñee uchimbaaquiatu doce je cote ra. Aquere que esi Dios cheë nenei nenei hue rurubinda je cote ra.

² Juan ngue chí cárcel nda. Hue eñi mose que jirandu Cristo chisaã ndese ra. Uchimbaaquiatu nyeremo ngue emondo Jesús rea ra. Ñee sacua ee. ³—Jêso ñee Jesús je. “Cristo ra tu”, i beite equia ã nae, ¿ae nde re? ¿Cristo ra uresaarõ arõ mbei quia re?” jenyee oso Jesús je, i que Juan uchimbaaquiatu mondo eraa ra. ⁴Jesús que ñee Juan nimba je ra. —Ae rese jemaee nae, ùquí jêseneyi oso Juan je. Ae jeñandu nae, ùquí abe no. ⁵Ei jenyee chõ ñee Juan je: “Jesús que eresayã mbucherõ nyerõ nguia ra. Ecuatayã abe mbucuat a cuata. Eire rasi abe mbucherõ nyerõ. Eraaque abe mbuquera quera. Ucheë turã ngue esenei senei tuchi quia mbaecha reã je ra”, jenyee oso Juan mbiirandu. ⁶Emo hui eã mbei mose sesi, aque ia tuchi ra siqui cote, i que Jesús ucheë mondo Juan je ra.

⁷ Juan ñimondo que nyebi nyo: Juan ndea cote ra. Jesús que ñee mbia ja je Juan ñi cote ra. —¿Mbae rese mae jêso turúquiaa re? ¿Quiririã idioi ichu ichu rese chõ jêso mae nde? Quiririã ndese mae eã ngue jêso resê. ⁸¿Emo irao turã ndese jêso mae nde? Ûquí ndese eã ngue jêso mae ndesê. Eirao turã siquiã nguiaã turuquia ñi. Ae siqui quia mbia rerecua chuchua nae, ùquí nguia eirao turã ndiqui nguiaã. ⁹Juan ndese mae ño ngue jêso turúquiaa resê. Dios cheë nenei neneia tuchi chõ ae mbia mo si re. Ae chõ mbia mingoquiatu quiatu nguiaã se ñee sacua mbia je. ¹⁰Sã embesa ji riqui ñee no: Secheë nderaosa tamondo ndenonde.

Ae ra mbia mingoquiatu ndeje, nde ñee sacua ee, i que embesa ji ñee nda. Juan ñi ño embesa ji riqui nguiaã ñee. Nyebe Juan ndu nguiaã senonde. ¹¹Tacheë nyecua jêje. Juan el Bautista quiarei i tuchi raque mbia ñiinda ja si. Ae ra siqui tuchi Dios rese erimbarã cote nae, ùquí nguia ra i tuchi Juan si cote. ¹²Juan Dios cheë nenei nenei namo mosenda bei chõ mbia riqui nguiaã ngaë ngaë Dios cheë andu ã. Mbiam bite Dios siqui mose mbia rerecuarã. ¹³Juan tu nonde chõ embesa ji riqui nguiaã ñee ja serí. “Dios rucucha ra tu emo mose”, i serí. Sechu eã mose. Juan nane ngue “co eru quia co” i ñee nda. ¹⁴Sã embesa ji riqui ñee nyii no. “Elías raanguia ra tu mbae mbuquiche ja Cristo tu nonde”, sã i embesa ji no. Juan ñi ño eriqui nguiaã ñee. ¹⁵Jêisa mose, ¡secheë jeñandu turã na!

¹⁶Mbia namonda siqui turã eãte quia aba cheë ndui ã. Mbiam riirí na ño eriqui nguiaã ã. Sã mbiam riirí ndiqui ñumbusarei sarei no. ¹⁷Sã eriqui ñee ñee nyue no. “Flauta que ambucheë ñee ndei jêje ra. ¿Mbaerã jenyuruqui sereã nea nde?” sã i chõ nyue no. “Mbae aba mbiam eã ngue ambucheë ñee ndei jêje resê. ¿Mbaerã jêyate erese re?” sã i chõ mbiam riirí nyue no. Ûquí na si chõ mbiam riqui nguiaã aba cheë mumba ã. ¹⁸Juan el Bautista que tu rei mbiam je ra. Mbiam que eisi turã e a nda. “Co eriqui quiaru sereãte nanderese co. Co eriqui mbae mbei sereãte nanderese co”, i chõ mbiam quia ee ã. “Aba checuayã ndesenda”, i chõchí equia ee ã. ¹⁹Aquere que achu se abe ra. Aquiaru rei nguiaã jendese co. Mbae abe ambei rei nguiaã jendese co. Se abe que seisi turãvã nda. “Quiaru tuchi je”, i chõchí seje. “Mbae mbeisa”, i abe que seje no nda. “Mbiam icuã quiato chõ ñene”, i chõ ngue seje no nda. Ae earacuate nae, Dios aracua abe ra eicua.

Jesús ia eã mbiam sucha tubiriã jenda rese

²⁰ Ae mbia je Jesús uquirãcuã ndeacuquia cuquia tuchi nae, ùquiŋgue Jesús isi eã mbei ra. Nyebe Jesús riqui nguiã ñee asi asi mbia hue jenda je. ²¹—Seya eãte jendese, Corazín jenda. Seya eãte jendese, Betsaida jenda. Jendasi tuchi rae. Mbia mae sayã ngue asaã saã jêje nae, ùquiŋ naa mose Sidón jenda je, eĩ nda Sidón jenda huũcuã secha rei. Eĩ nda Tiro jenda abe huũcuã secha rei. Eĩ nda eya eãte rei huũcuã ndese. ²²Jê nguia jêicuã jêsecha sereãte rei. Nyebe ra Dios jembasi mbasi tuchi ùquiŋ si quiatu. Dios mbia icuã mbasi mbasi mose. ²³Jêcuasu jêsaã saã tuchi techiŋ nguia re, Capernaum jenda. Nyebe ra Dios jemondo tuchi tata cuasu. Mbia mae sayã ngue asaã saã jêje nae, ùquiŋ naa mose Sodoma jenda je, eĩ nda Sodoma jenda huũcuã secha rei. Eĩ nda Dios hue sucha cuasu mbutiã eã ndei. ²⁴Jê nguia jêicuã jêsecha sereãte rei. Nyebe ra Dios jembasi mbasi tuchi Sodoma jenda si. Dios mbia icuã mbasi mbasi mose, i que Jesús ñee nda.

Jesús aba quenea mboseĩ

²⁵ Jesús que ñee Dios je cote ra. —Seyate aico nderese co, Paba. Ibi jenda rerecua ja chõ nde re. Ibei jenda abe rerecua ja chõ nde no nde. Ndecheẽ ngue erembuchecu a eã mbia aquiatu je ra. Mbia ririŋ naanguia je chõ ngue ndecheẽ erembuchecu nguiã. ²⁶ Ùquiŋ ño ngue eturã ndeje ra, Paba, i que Jesús ra. ²⁷—Seru que mbae mondo ja seje ra. Paba miŋ ño seicua tuchi nguiã. Paba ririŋ miŋ tuchi chõ se re. Se miŋ ño Paba aicua tuchi nguiã no. Ae je ra Paba atecuquia nae, ùquiŋ miŋ ño nda Paba icua tuchi nguiã serese. ²⁸ Jenguenea mose, jenyu chõ seje. Jenguenea tamboseĩ na jêsi. Taambia mingo. ²⁹ Seseteã ño aico nguiã se. Aico mingue chõ nguiã se co. Jeñimbaaquiatu jiri serĩ. Jeñimbucha chõ serese. Eĩ jenyu mose ra jeñia pare pare i eã cote. Jêya bei ra jêingo cote. ³⁰ Ae siqui serimbarã nae, ùquiŋ iate riqui ã. Secheẽ mbaranguiatuã eãte aba je, i que Jesús ñee nda.

12

Jesús chimbaaquiatu mbae a ishao shao sábadu mose

¹ Sábado mose que Jesús si quia mbiaco ite ite riŋ emo mose ra. Echimbaaquiatu riãcuãte que eriqui ra. Nyebe que quiata a ucua miŋ miŋ nyoi quia ecuã mose ra. Equiti quitire oo je que echoi quia eachãaña cote ra. ² Fariseos mo ngue ñee ee ra. —¿Mbaerã ndechimbaaquiatu riqui mbae ishao shao sábadu mose re? Co mose chõ mbia riqui quenea ucua resẽ, i que fariseos ñee Jesús je ra. ³ Jesús que ñee ee ra. —¿Embesa ji rese jemae eã David riŋ nyii re? David riãcuãte que aque mose ra. Eresenda abe riãcuãte que eriqui aque mose no nda. ⁴ David que ique Dios chuchúaa aque mose ra. Mbichae Dios chuchua jenda que eu ra. Mee mee ngue nguesenda abe je ra. Eriãcuãte quiatu ngue re. Sacerdote achõ mbaerã ndaque mbichae. ⁵ ¿Moisés chimbesa rese jemae ãte sacerdote riŋ nde? Sábado mose que quiei quiei rei Dios chuchua ra. “Dios cheẽ mumbasa”, i ãte quia mbia nguiã ñee ee. ⁶ Tacheẽ nyecua jêje. Secheẽ nguia i tuchi jiri nguiã Dios chuchua si co. ⁷ Co embesa ji jêicuayãte quia ã. “Sebite jêya eã jêingo mose mbia rese. Sebiãte ofrenda jemee ñooño mose”, i Dios quia co. Jêingo ùquiŋ icuayãte ã. Eĩ nda jeñee icuã eãte rei mbia turã je. ⁸ Sábado rerecua bei chõ se re, i que Jesús ñee fariseos je ra.

Jesús emo o tomei mbucherõ

⁹ Jesús que oso mbia chumunuásaa cote ra. ¹⁰ Huee que eo tomei mo ndiqui ee ra. Mbia que Jesús mbucheẽ icuã sete ra. Nyebe ñee nguiã ee. —¿Eicuãte erasi mbucherõ sábadu mose re? ¿I ere? Echeẽ ure je jẽ, i que mbia ñee Jesús je ra. ¹¹ Jesús que ñee ee ra. —Sã jenimba oveja mo ndiqui jaã no. Ngoi oso ibicua mo ye no. ¿Sábadu mose ra jenosẽ ibicua si re? Ae. Jenosẽ jei rae. Sábadu mose raque. ¹² Dios queteamba tuchi chõ mbia riqui nguiã oveja si ã. Coche nandeico nguiã mbae turã naa naa sábadu mose, i que Jesús ñee mbia je ra. ¹³ Ñee ngue eo tomei je cote ra. —Ndeo emee secuti, i que ee ra. O que emee Jesús cheẽ mose ra. Aque mosechi que eo nyerõ cote ra. ¹⁴ Nyebe fariseos paama i nguiã Jesús je. Mbia mbucherõ mose sábadu mose. —¿Mañi nande ra Jesús je re? Nandeiquia rei ra reae, i tuchi que eu ñee nyue ra.

Isaiás chimbese ique Jesús rĩ

¹⁵ Jesús que jirandu ũquí ñee ndese ra. Nyebe esi nguiã hue si. Mbia tubiriã ngue nyoĩ erui ra. Jesús que mbia rasi mbucherõ cherõ ja quia ra. ¹⁶ —¡Mbia ra jembiiiranduchi serese jẽ! i que Jesús ñee ee ra. ¹⁷ Aque mose que Isaiás chimbese ique cote ra. Eĩ ngue Isaiás embesa mii Jesús rĩ nda:

¹⁸ Serimba chõ co re. Co que airabo ra. Sechesequa chõ ae re. Seyate aico erese co. Espíritu Turã tamondo tuchi ee.

Ae ra secheẽ turã senei senei ja mbia je.

¹⁹ Eicuã icuã eã nda emo je. Ñee icuã eã ndae. Ucuasu ra esaã saã eã mbia je.

²⁰ Siqui turãte ra equia equirãcuã nea je.

Siqui turãte ra equia equiatuã je no.

Mbia ra siqui turã nyee erui ererecuarã.

²¹ Mbia ja ra ndua turã mbei erese cote, i que Isaiás embesa cose ra. Ũquí ngue ique cote ra.

Aba checuayã quirãcuã Jesús quereco co, i raque mbia

²² Mbia que eresayã mo curucuaẽ Jesús je ra. Echeẽ aquiatuãte abe que ra. Aba checuayã icuã nguiatu ngue siqui nguiã echiangui re. Jesús que embucherõ nda. Nyebe mae turã nguiã cote. Ñee turã abe cote no. ²³ Mbia que nyuruira ja mae erese ra. —David rucucha chõ Jesús riqui re, i chõ ngue mbia quia ndua ndua ra. ²⁴ Fariseos que ehandu ja ra. Nyebe ñee icuã icuã nguiã Jesús je. —Ab a checuayã icuã nderecu tuchi chõ Satanás nde. Satanás quirãcuã je chõ Jesús riqui nguiã aba checuayã icuã jea jea mbia si co, i rei que fariseos ñee icuã Jesús je ra. ²⁵ Jesús que ũquí ndua ndua icuate ra. Nyebe ñee nguiã ee. —Gobierno icuã icuã mose nyue, ua rae. Tuchuamo jenda icuã icuã mose nyue, ua ra eno. ²⁶ ¿Mañi nda Satanás aba checuayã jea mbia si re? Erimba chõ nyeresẽ. Satanás icuã icuã mose nyue, equirãcuã nda ua no. ²⁷ “Satanás quirãcuã je chõ Jesús riqui nguiã aba checuayã jea jea mbia si”, jenze chõchĩ nguia seje ã. ¿Aba uquirãcuã mee jenimba je jẽ nde? Aba checuayã icuã jea nonde re. ¿Satanás uquirãcuã mee jenimba je serese re? ²⁸ Dios quirãcuã je quiatu aico nguiã aba checuayã jea jea mbia si co. “Dios quirãcuã ndese chõ ureico nguiã mae”, jenze eã ñochĩ equia ã. ²⁹ Satanás quirãcuã tuchite raque. Umbae rese ngueteãte raque. “Sembae chi turãte a”, i raque. Dios quiarei equirãcuã tuchi Satanás si. Dios Satanás mbae sirõ ja arõte quia esi co. Dios Satanás mbae mbutiã ja arõte quia co. ³⁰ Ae siqui ãte quia serese nae, eicuã ño ũquí ndiqui nguiã seje. Ae secheẽ senei senei eãte quia mbia je nae, ũquí icuã ño eriqui nguiã seje. ³¹ Tacheẽ nyecua jẽje. Emo

siqui icuã mose, Dios eicuã mbutiã arõte esi. Emo ñee icuã mose, Dios echeẽ icuã mbutiã arõte no. Emo ñee icuã mose Espiritu Turã ñii, ùqui icuã nguia tu ra Dios mbutiã eã mbei esi. ³² Emo ñee icuã mose serii, Dios echeẽ icuã mbutiã arõte. Emo ñee icuã mose Espiritu Turã ñii, ùqui icuã nguia tu ra Dios mbutiã eã mbei. Mbae ua ja mose chee ra Dios ùqui ñee icuã mbutiã eã mbei.

Sã ira ae ea ae ae no

³³ Ira turã mose, ea abe ra eturã no. Ira icuã mose, ea abe ra eicuã no. Mbia ira icuã mose, ea abe ra eicuã. Nyiabiã ndae. Sã ira ae ea ae ae no. ³⁴ Mbei rã ño jẽingo nguia. Jẽicuã ño jẽingo nguia. Nyebe jeñee turã aquiatu ãte riqui ã. Ae rese mbia riqui ndua ndua uchiangui re nae, ùqui ñii sí ra ñee. ³⁵ Mbia turã nda ñee turã. Echiangui renda quia eturãte re. Nyebe eriqui nguia ñee turã. Mbia icuã nguia ñee icuã nguia. Echiangui renda quia eicuãte riqui nguia. Nyebe eriqui nguia ñee icuã. ³⁶ Tacheẽ nyecua jẽje. Emo ñee ñooño mose, Dios ra ñee asite aque je. Dios mbia icuã ndea rea mose. ³⁷ Emo ñee turã mose, echiangui renda turã ño ñene. Nyebe ra Dios ñee asiã ee. Emo ñee ñooño mose, echiangui renda icuã ño ñene. Nyebe ra Dios ñee asi ùqui je, i que Jesús ñee nda.

Mbia mae sayã esaã ure je, i bei mbia Jesús je

³⁸ Fariseos mo ngue ngaẽ Jesús rea ra. Embesasa abe que ngaẽ erea ra. Ñee ngue ee ra. —Mbia mae sayã esaã na ure je, i rei que ñee Jesús je ra. ³⁹ Jesús que ñee ee ra. —Jẽicuãte riqui co mosenda jẽ ja ã. “Mbia mae sayã esaã ure je”, jenje beite equia ã. Mbia mae sayã mii ño nda asaã jẽje. Jonás na si. ⁴⁰ Sã Jonás ndiqui raque tres días sira rie ye no nae. Jonás na sí ra asaã mbia je. Tres días ra aico ibicua rie. ⁴¹ Nínive jenda quia eturã jiri co mosenda si re. Dios ra co mosenda mbasi tuchi Nínive jenda si. Sã Nínive jenda huicua ndecha Jonás ñee mose ee no. Aico raque ñee jẽje co mosenda je co. Jẽ secheẽ jemumbate chõ chĩ nguia ã. Se quia raque ererecua tuchi Jonás si. Nyebe ra Dios jembasi tuchi mbia icuã ndea rea mose. ⁴² La reina de Seba quia eturã jiri mbia co mosenda si re. Dios ra co mosenda mbasi tuchi la reina de Seba si. Sã la reina de Seba tu isho si tuchi Salomón ñee andu no. Se quia acheẽ ndaque quia jẽje. Searacua tuchi raque se quiatu Salomón si. Secheẽ jemumbate chõchĩ nguia ã. Nyebe ra Dios jembasi tuchi mbia icuã ndea rea mose.

Aba checuayã icuã nyebi u mbia chiangui re

⁴³ Aba checuayã icuã usẽ mose emo ñia si, ngata bei chõ nguia. “¿Mangue ra sequenea aucua que re?” i chõ nguia. Uquenea ucua sacua mo etea eate. ⁴⁴ “Tasobe rei nyebi. Ae si achu usẽ, aque chiã ye sí taso”, i que aba checuayã nda. Nyebi si mose u, mbia chiã oreãte que ee ra. Echiã ndecoteẽ eãte que ee ra. Tuchua tii ji raãte que ee ra. ⁴⁵ Aba checuayã icuã ngue ngeusenda siete queru cote ra. Ique ja que echoi aque chiangui re cote ra. Ae chiangui re aba checuayã icuã siete riqui nae, aque icuã i i tuchi que eriqui cote ra. Aba checuayã mii ngue siqui eye nyii ra. Ètubiriãte cote. Aque icuã tuchi cote nyii si, i que Jesús mbia je ra.

Jesús nongue ngae erea usi resẽ

⁴⁶ Jesús ñee mbei mose que esi ngaẽ ndei ee huee ra. Jesús nongue ja rese. Chichõ ja chõ ngue taicuee ra. Ñee serete que ee ra. ⁴⁷ —Hue ndesi riqui nderequia taicuee huee. Ndenongue rese, i que emo Jesús mbiirandu ra. ⁴⁸ Jesús que ñee umbiirandusa je ra. —¿Aba je chõ aico “tai” i chã? ¿Aba je chõ aico “senongue” i no ña? i que Jesús ñee nda. ⁴⁹ Jesús que o mee

uchimbaaquiatu cuti ra. —Ñ je chõ aico nguiã “taĩ” i. Ñ je chõ aico nguiã “senongue” i no. ⁵⁰ Ae Paba Ibatenda cheẽ mumbayã nguia nae, ùqui je chõ aico nguiã “senongue” i. Ûqui je chõ aico nguiã “taĩ” i no, i que Jesús ñee ee ra.

13

Emo mbae eĩ mombiquia mbiqúia

¹ Aque mose sí que Jesús sí usẽ tuchia sí ra. Tuchia sí que esi ngoi ama ndish a nimíaa nda. ² Mbia que ngaẽ ngaẽ ja quia Jesús rea ra. Nyebe Jesús ua oso nguiã ngoi canoa ye. Mbia quiatu que chichõ ama nimíaa ndese ra. ³ Jesús que embaaquiatu quiatu tuchi quia ra. Ejemplos que esaã saã tuchi ee ra. —Sã emo sí rei mbae eĩ mombiquia mbiqúia no. ⁴ Sã emo ndiqui uqui uqui ñeenda rui no. Sã nguireĩ ndiqui ngaẽ eu no. ⁵ Sã emo emo ndiqui uqui sita arõ no. Sita aronda suri jei raque. Ibi ererate quia ñene. ⁶ Tenda ibate mose que eriqui ñimama mano nda. Erao eãte quia ñene. Nyebe mano jei nguiã. ⁷ Sã emo ndiqui uqui uqui nyu réndaa no. Sã nyu abe riqui suri erese no. Nyu ruri que echati asi u eriquisã nda. ⁸ Sã emo ndiqui uqui uqui ibi túraã no. Ûqui nguiatu que ia turã nda. Sã emo ia cien no. Sã emo ia sesenta no. Sã emo ia treinta no. ⁹ Jëisa mose, jsecheẽ jeñandu turã na!

Dios riqui ucheẽ mbiasa jaaja jêje co, i uchimbaaquiatu je

¹⁰ Jesús chimbaaquiatu que ñee nyecuayã Jesús ísaa ra. —¿Mbaerã ejemplos achõ eresenei senei mbia je re? i que echimbaaquiatu ñee ee ra. ¹¹ Jesús que ñee ee ra. —Mbia rerecua tuchi quiarei Ibatenda. Ae riqui nguiã ucheẽ mbiasa asa ja jêje co. Mbia ataque quia siqui sereã erese co. Mbia ataque je quia eriqui nguiã ucheẽ mbiasa eã jiri. ¹² Emo umbae rerequia mose, Dios ra emo mondobe ee. Emo embae eã mose, Dios ra embae sirõ ja esi. ¹³ Nyebe aico nguiã ejemplos achõ nenei nenei mbia je co. Eanduchõ sacua. Eicua turã ndocõ. ¹⁴ Mbia eanduchõ mose que Isaías chimbese ique cote ra: Mbia ra secheẽ ñandu raque.

Icuayã nguiatu rae.

¹⁵ Eãquĩ ãtãte riqui ã.

Secheẽ andu sereãte equia ã.

Mae sereãte equia sechiao rese ã.

Ndua eã mbei equia serese ã.

Nyebe ra ambitirõ eã mbei,

i que Dios cheẽ Isaías chimbese rese ra. ¹⁶ Jẽ nguiatu Dios cheẽ jeñandu turãte nguiã ã. Jẽ nguiatu jemaie serete nguiã Dios chiao rese ã. Nyebe jeyate jëingo nguiã ã. ¹⁷ Tacheẽ nyecua jêje. Ae jeñandu quia secheẽ ã nae, Dios cheẽ mbuchecua ñiinda ã ñandu serete raque. Mbia turã ñiinda abe ã andu serete raque. Ñandu eã mbeite equia ã. Jẽ ae chõ jëingo nguiã eandu ã cote. Jẽ ae je chõ echecua riqui nguiã.

Jesús ucheẽ mbiasa uchimbaaquiatu je mbae eĩ nñi

¹⁸ Secheẽ tambiasa jêje cote. Mbae eĩ mombiquia mbiqúia jiri. ¹⁹ Ae uqui uqui ñeenda rui nae, Dios cheẽ andu choõosa rá ño ùqui nde. Icu eãte quia ñene. Nyebe diablo ru nguiã Dios cheẽ ndirõ echangui si. ²⁰ Ae uqui uqui sita arõ nae, mbia mo na ño ùqui no nde. Dios cheẽ andu mose, isi turã ndaque. Eyate raque erese. ²¹ Mbia icua icua mose ee Dios cheẽ nñi, hui jei chõ nguiã esi. Mbae rao eã naanguia chõ ùqui nde. ²² Ae uqui uqui nyu réndaa nae, mbia

mo na ño ũquí no nde. Dios cheẽ andu turã ndaque. Siqui bei eã ño nguiã erui. Umbaerã achõ ndese chõ eriquichĩ nguiã ndua. “Mbaecha tuchite ra se”, i bei chõ nguiã ndua ndua. Nyebe hui chõ nguiã Dios cheẽ si. Nyebe Dios cheẽ ndiqui nguiã ia eã mbeite ee. ²³ Ae uqui uqui ibi túraã nae, mbia mo na ño ũquí no nde. Ũquí nguiatu Dios cheẽ ñandu turã nguiã. Icuã icua turã ño nguiã. Nyebe eriqui bei nguiã erese. Ia ia bei raanguia cote. Emo emo ia cien. Emo ia sesenta no. Emo ia treinta no, i que Jesús ucheẽ mbiasa ñee nda.

Mbae icuã suri trigo turã ndese

²⁴ Jesús que ejemplo nongue senei ee ra. —Sã emo trigo eĩ mombiquia mbiquia úcoo no. Ũquí na ño Dios rimba riqui nguiã ã. ²⁵ Sã trigo eĩ mombiquiasa uque cote no. Sã emo tu nyu eĩ mombiquia mbiquia trigo eĩ mumbara mbara no. ²⁶ Trigo eĩ ngue obo cote ra. Nyu abe que suri erese ra. ²⁷ Nyebe erimba ñee nguiã echa je. “Trigo eĩ achõ eremombiquia mbiquia reĩ nguiã seje. ¿Mbaerã nyu abe riqui suri suri erese re?” i que ererecua je ra. ²⁸ Ererecua que ñee ee ra. “Seucuãyãsa chõ ũquí nde. Nyu eĩ mombiquia mbiquia chõchĩ trigo eĩ mumbara mbara”, i que ererecua ñee nda. —¿Ureso ra eriqui riqui re? i rei que erimba ñee nguerecua je ra. ²⁹ Ererecua que ñee nda. “Tei. Nyu riqui riqui mose ra trigo abe riqui riquichĩ nde. ³⁰ Sã echichõ ja. Eucua mose ja chee. Ea ireĩ mose quiatu ra acheẽ serimba je cote. Serimba ra nyu rane siqui siqui aque mose cote. Nyu ra esei cote. Aquere quia ra trigo a ishao shao ererecõ quiatu sacua sechuchua cote”, i que echa ñee nda, i que Jesús ñee nda.

Mbae eĩ na ño Dios rimba re

³¹ Jesús que ejemplo mo senei mbia je ra. —Mbae eĩ na ño Dios rimba re. Sã mbia mostaza eĩ tiquia no. ³² Eñetẽ tuchite raque mbae eĩ mo si. Suri oso quia cote. Ecuasu tuchite chee cote. Ira rã ño cote re. Nguireĩ nguichi quichi chee erãquiã ndese. Eĩ si chõ Dios rimba re. Ũquí mi ndaque nyii. Ñimbeta tuchi cote. Mbae eĩ na, i que Jesús ñee nda.

Levadura rã ño Dios rimba re

³³ Jesús que ejemplo mo senei mbia je ra. —Levadura rã ño Dios rimba re. Sã mbia levadura ñetẽ mondo mbichae ao ramo mose no. Sã levadura riqui oso mbichae mbuchimatã ja no. Eĩ si chõ Dios rimba re, i que Jesús ñee nda.

Jesús ejemplos senei tuchi mbia je

³⁴ Eĩ ño ngue Jesús quia mbia tubiriã mbaaquiato quiato ejemplos je ra. Ejemplos achõ ngue esenei senei mbia mbaaquiato sacua nda. ³⁵ Nyebe Dios cheẽ mbuchecuasa chimbese ique cote. Eĩ ño echimbese re: Ejemplos je mbia tambaaquiato quiato. Ae mbia icuayã mbeite quia nae, ũquí tambuchecua mbia je, i que embesa ji ra, i que Jesús ñee nda.

Jesús ejemplo mbuchecua nyu eĩ nã

³⁶ Jesús que mbia mondo ja cote ra. Aquere que esi ique tuchu a mo nda. Echimbaaquiato que ecurubite ñee ee ra. —Ae ejemplo eresenei mbia je nyu eĩ nã nae, ũquí embiasa jiri ure je, i que ñee ee ra. ³⁷ Jesús que ñee ee ra. —Ae trigo eĩ mombiquia mbiquia nae, se rã ño ae re. ³⁸ Ae íbii emombiquia mbiquia nae, mbia ja rã ño ũquí ibi re. Trigo eĩ turã na ño Dios quiato re. Nyu eĩ icuã na ño diablo quiato no nde. ³⁹ Ae mbae eĩ icuã mombiquia mbiquia

nae, aba checuayã nderecua rã ño ñiquĩ nde. Mbae a ishao shao raanguia ra ibi ua mose cote. Mbae a ishao shaosa rã ño angeles re. ⁴⁰ Sã mbia riqui nyu mombo mombo tátaa nae, eĩ si ra Dios uquiatoã mombo tátaa ibi ua ja mose no. ⁴¹ Serimba ángeles ra amondo mbi a rea rea ja. Ae mbae icuã saã uquia quia mbia je nae, serimba ra ñiquĩ sirõ ja. ⁴² Serimba ra ñiquĩ mombo mondo tata cuásuu. Nyeseo seo tuchi ra tátaa. Huee ra ureĩ quiti quiti tuchi. ⁴³ Ae Dios mbuturã nae, ñiquĩ nininya tuchi ra tenda rã si cote. Eru ibatenda siqui mose mbia rerecuarã tuchi.

Tesoro rã ndei Dios cheẽ

⁴⁴ Dios cheẽ nguiirĩ ñi ndei eturã tuchi mbae ja si. Eturã tuchi tesoro si no. Sã amei mo tesoro ati ji rea ibii no. Tesoro turã tuchi que ee ra. Amei ia tuchi que erea mose ra. Sã amei vender i ja umbae je no. Aque ibi isi sacuã. Tesoro mii ndese ndua.

Dios cheẽ ndei perla turã na

⁴⁵ Dios cheẽ nguiirĩ ñi ndei eturã tuchi mbae ja si. Sã comerciante mo perlas turã ndequia requia no. ⁴⁶ Perla turã tuchite mo ndea mose, aque mii ndese chõ eriqui nguiã ndua ndua cote. Sã vender i ja umbae je aque perla ribishorõ no.

Dios ra mbia icuã quirirõ

⁴⁷ Sira mbua mbua ji rã ño Dios rimba re. Sã emo tarafa mondo ii no. Sira chumumarate que embua ra. ⁴⁸ Sã sira mbuasa mbisẽ tuchi riqui no. Sã echa econosẽ serao usẽ cote no. Echa que ngoi sira turã irabo rabo cote ra. Sira icuã ndirirõ ndirõ emombo sacuã. ⁴⁹ Eĩ si ra Dios mbae ua ja mose. Dios ra ángeles mbu mbia icuã mombo sacuã mbia turã si. ⁵⁰ Eicuã nda emombo tata cuásuu. Nyeseo seo tuchi ra tátaa. Huee ra ureĩ quiti quiti tuchi. ⁵¹ ¿Secheẽ jëicuate rei quia ã nde? i que Jesús ñee mbia je ra. —Ae, i que ñee Jesús je ra. ⁵² Jesús que ñee ee ra. —Embesasa mo siqui mose serese, mbaecha rã ño aque re. Sã mbaecha riqui umbae ima ndirõ mbia je emo mose no. Umbae yasu abe rirõ emo mose no, i que Jesús ñee mbia je ra.

Mbia Nazaret jenda Jesús isiteã

⁵³ Jesús que ñiquĩ ejemplos senei ja mbia je ra. Hue si que esi cote ra. ⁵⁴ Oso que ngasẽ ngueta Nazaret cote ra. Oso que mbia mbaaquiato judíos chumunuásaa ra. Nyebe mbia nyuruira tuchi nguiã ñee nyue. —¿Mangu e riqui ñimbaaquiato tuchite re? Nandemae sayã esaã saã tuchichĩ nguia re. ⁵⁵ Ira mbitirõ tirõsa ririĩ ño ndaque. María abe ririĩ ño ndaque no. Jacobo nongue chõ ndaque. José abe no. Simón abe no. Judas abe no. ⁵⁶ ã echari abe riqui ja raque nãnderese ã. ¿Mañi equia mbae i cua ja tuchite re? i que mbia Jesús recu a jenda ñee nyue ra. ⁵⁷ Nyebe mbia hue jenda riqui Jesús isiteã nde. Jesús que ñee ee ra. —Dios cheẽ mbuchecuasa ishonda cheẽ nguia ra mbia isi turã mbei. Ngueta jenda cheẽ achõ nguia ra eisi turã eã. Ngõngue cheẽ achõ nguia ra eisi turã eã no, i que Jesús ñee ngueta jenda je ra. ⁵⁸ Hue jenda mbia que Jesús icua eãte ra. Isiteã ño ngue ra. Nyebe Jesús mbia mae sayã naa eã jiri nguiã ee huee.

14

Mbia Juan el Bautista iquia

¹ Mbia que jirandu ja Jesús rese cote ra. Herodes abe que jirandu erese ra. Ererecua que ae ra. ² Juan el Bautista Jesús riqui rei ee reaẽ. Ae que

ñee ngũimba je Jesús rĩĩ nda. —Sechi#quia quera si chõchĩ. Juan el Bautista quera si chõchĩ. Nyebe eriqui nguiã mbia mae sayã naa naa co, i que Herodes ñee Jesús rĩĩ nda. ³⁻⁴ Herodes que Juan isi icuã nyii ra. Nyucua que mondo tarõ nda. Paama i nda Juan je ra. —iNde ndenongue ninisi erereco aroneate jê! i quiatu que Juan ñee ee nyii ra. Herodes siqui mose nõngue ninisi rese. Herodías, i que enongue ninisi je ra. Felipe, i que enongue je ra. ⁵ —Juan taiquia, i rei que Herodes ñee nda. Mbia ataque quiarei siqui tuchi Juan ndese. Dios cheẽ mbuchecuaasa, i chõ mbia nguiã Juan je. Nyebe Herodes siquiche jiri nguiã Juan iquiayã aque mose. ⁶ Herodes mbae cumpleaños mose, Herodías ririĩ ngue nyuruqui ruqui mbia ja je aque mose ra. Nyucuaaque que ae ra. Herodes ia tuchi que mae nyucuaaque nyuruqui rese ra. ⁷ —¿Mbae ra amee ndeje re? Echeẽ ño seje. “Sebite co” nde i mose, aque tamondo ndeje. Acheẽ ñooño eã ño nguiã ndeje a, i que Herodes ñee nyucuaaque je ra. ⁸ Esi quia ñee ñee nguia nyucuaaque je nyii reaẽ. Nyebe nyucuaaque ñee nguiã Herodes je. —Juan el Bautista ãqui emee na seje mbia chiuru yu, i que nyucuaaque ñee erereca Herodes je. ⁹ Erereca chosoi que oso serĩ tuchi echeẽ andu mose ra. —Acheẽchi se quia ee. A seresenda chi ja quiaru serese a resẽ. ã seandu ja chõchĩ. Nyebe ra secheẽ ambuchebi eã ee, i que erereca uchiangui re ra. —Juan ãqui emee ee, i que ngũimba je cote ra. ¹⁰ —Juan ãqui jendoso oso cárcel. Jemondo nyucuaaque je, i que ra. ¹¹ —Juan ãqui ngue ecurucuaẽ mbia chiuru yu cote ra. Mee ngue nyucuaaque je cote ra. Nyucuaaque que emee usi je cote ra. ¹² Juan ñimbaaquiatu que ngaẽ Juan ndaaque rea ra. Nyati que suruchoi ra. Nyoĩ que Jesús mbiirandu erese cote ra.

Jesús mbichae tubiriã saã mbichae mũje

¹³ Jesús jirandu mose Juan ndese que esi turúquiaa ra. Ama ndui que esi canoa ye ra. Mbia que jirandu randu erese ra. Nyebe nyoĩ ja nguiã eruĩ ibi rĩ. Sucha ja ja jenda. ¹⁴ Jesús que usẽ canoa si cote ra. Mbia tubiriã ndese que mae nda. Eya eã tuchiite que erese ra. Erasi que embucherõ cherõ nda. ¹⁵ Tenda nyesece mose que echimbaaquiatu ñee ndei ee ra. —Mbae ãte a turúquiaa. Tenda abe nyesece. Mbia emondo rã sucha tubiriã nia. Sã echoi bei uchiurã isi, i rei que echimbaaquiatu ñee Jesús je ra. ¹⁶ —Sã echoi eã. Jeño mbae jemondo ee echiurã, i que Jesús ñee ee ra. ¹⁷ —Tei. Mbae quia ra aba mondo ee. Cinco chõ ngue mbichae ra. Sira abe nyeremoñote nyeresẽ, i que echimbaaquiatu ñee Jesús je ra. ¹⁸ —Jembu rã seje, i que Jesús ra. ¹⁹ Ñee ngue mbia tubiriã je cote ra. —Jengoi ja quiata tose, i que ra. Jesús que mbichae cinco sirõ cote ra. Sira nyeremo abe no. Mae ngue ibate ra. Gracias, i que ñee Dios je ra. Mbichae que esiquio quio cote ra. Mee ngue uchimbaaquiatu je ra. Echimbaaquiatu que emee mee mbia ja je cote ra. ²⁰ Mbia que embuquiaru ja tuchi cote ra. Miãtã tuchi que ra. Mbia huisa tubiriã ngue cote ra. Sira rire. Mbichae rire abe no. Doce iru que mbia mombisẽ esique sique je ra. ²¹ Ae mbichae u sira rese nae, etubiriã tuchiite que ra. Cinco mil ndobei. Cuña abe etubiriã. Mbia ririĩ abe etubiriã no.

Jesús ngata i arõ

²² Aquere que Jesús uchimbaaquiatu mondo ja canoa ye ra. —Jẽ nane jẽso sobei. Mbia tambui turã na mondo uchuchúaa se nyii, i que ra. ²³ Jesús que mbia tubiriã mbui turã mondo uchuchúaa cote ra. Ae ae que oso sita ibate rĩ cote ra. Ñee sacuã Dios je. Huee que ae ae riqui itondaru chee ra. ²⁴ Canoa yenda que chi bei quia ama ite rĩ nda. Quiriã ngue tu icuã icuã ee ra. I rebera

que tu asi asi tuchi ee ra. ²⁵ Nguira cheẽ mose que Jesús ngasẽ ee ra. I arõ ngue esi quia ngata ra. ²⁶ Echimbaaquiatu que mae erese ra. Echiã ngue cuaãcuã i tuchi ra. Ngata mose i arõ. —Aba checuayã ño tu nguiã aque, i rei que tasẽ tasẽ nda. Siquiche tuchi que ra. ²⁷ —Jësiquichechĩ nguiã. Se chõ nyeresẽ, i jeite que Jesús ñee ee ra.

²⁸ Pedro que ñee ee ra. —Nde mose, echeẽ seje. “Echu ngata i arõ”, ere seje, i que Pedro ñee Jesús je ra. ²⁹ —Quiatuchu, i que Jesús ñee ee ra. Ae Pedro nguichi nguiã canoa si i rese irõ. Oso nda ngata i arõ Jesús rea chã nde. ³⁰ Pedro mae mose quiririã icuã ndese que esiquichete ra. I que oso quia ñiimi nda. —¡Sererecual ¡Senonosẽ na se! i que ñee Jesús je ra. ³¹ Ae Jesús o mondo nguiã eo isi. —Seicuayã ñochĩ. ¿Mbaerã ereico seicuayãte re? i que Jesús ñee ee ra. ³² Ua mose canoa ye que quiririã tiba cote ra. ³³ Canoa yenda que ñee turãte Jesús je cote ra. —Dios rucucha tuchi chõ nde riqui re. ¡Ae bei jê! i que ee ra.

Jesús mbia Genesaret jenda mbucherõ cherõ

³⁴ Ngasẽ nyee que sobei cote ra. Genesaret, i que hue ibi je ra. ³⁵ Hue jenda que jirandu ja erese ra. Hue rurubinda abe que mbia mbiirandu erese ra. Mbia que er asi curucuaẽ cuaẽ ja Jesús je cote ra. ³⁶ —Sã mbia rasi oco oco rã ndeirao ai rese, i tuchi que mbia Jesús je ra. Ae oco erese nae, ùqui ngue nyerõ nyerõ ja ra.

15

Mbia chiangui renda ae chõ embiãcuã nguiã

¹ Aquere que fariseos mo ngaẽ ñee Jesús je ra. Embesasa mo abe que ra. Jerusalén jenda chõ ùqui ja re. ² Ùqui ngue ñee Jesús je ra. —¿Mbaerã ndechimbaaquiatu riqui nanderamei ñee mumba mumba beite re? Echoi quiiriã mbei chõ quiaru nguiã, i que ñee asite Jesús je ra. ³ Jesús que ñee ee ra. —¿Mbaerã jëingo Dios cheẽ mumba jê nde? Jenamei ñee ndese chõte jëingochĩ nguiã ã. Siqui rocoĩ Dios cheẽ ndese. ⁴ Dios que ñee mbia je cose ra. “Jeturã ño jëingo jendu je. Jësi je abe no. Emo ñee icuã mose ngu riĩ, ùqui jëiquia. Emo ñee icuã mose usi abe riĩ no, ùqui abe jëiquia no”, i quia que Dios ñee mbia mbaaquiatu cose ra. ⁵⁻⁶ Dios cheẽ jenyabi tuchi chõchĩ nguia mbia mbaaquiatu quiatu ã. “Ae nda amee neĩ jêje, ùqui ngue amee ja Dios je ra”, i mose emo ñee ngu je, “coche ñene” jenyê chõchĩ nguiã ee. Mbae mee eã mose ngu je. Usi abe je. Nyêbe jëingo nguiã mbia mbaaquiatu icuã icuã ùqui. Jenamei ñee achõ ño jësenei senei nguiã mbia je ùqui. Dios cheẽ nenei nenei ndocoĩ ee. ⁷ Jeturã jësaã ñooño ño nguiã ùqui. Jeni tuchi chõ ngue Isaías embesa nguiã cose. Eĩ ngue Isaías embesa cose ra:

⁸ ã mbia ñee turã ndaque quia seje ã.
Uchiangui re quia eriquiãte nguiã serese ã.

⁹ Ñee turãte raque equia seje ã.

Amei ñee achõ ño esenei seneichĩ nguiã mbia je.

Dios cheẽ mii nenei nenei ndocoĩ ee,

i que Isaías embesa jeni nda, i que Jesús ñee ucuasu raã naasa je ra.

¹⁰ —Jenyu rã secheẽ andu, i que Jesús ñee mbia tubiriã je ra. —Secheẽ jëicua rã jeñiangui re. ¹¹ Mbia chiã embiãcuã eã nguiã. Echiangui renda chõ embiãcuã nguiã. Echiangui renda chõ usẽ nguiã echuru rĩ echeẽ mose. Ùqui ño embiãcuã nguiã, i que Jesús mbia mbaaquiatu ra. ¹² Echimbaaquiatu

que ngaë ñee Jesús ísaa cote ra. —¿Ereicuayâte ere? Ndecheë ngue fariseos mbupaama ite ra, i que echimbaaquiatsu ñee nyecuayã ee ra. ¹³ Jesús que ñee ee ra. —Ae ira Paba Ibatenda chutã eã nae, ùquĩ nda esiqui ja erao resebe. Ûquĩ ira rã ño fariseos riqui nguiã ã. ¹⁴ Eresayã na ño fariseos riqui nguiã. Sã eresayã mo “ñeenda tateacuquia jêje” i raque emo je no. Quiachã ja chõ ndae, i que Jesús ñee ee ra. ¹⁵ Pedro que ñee ee cote ra. —Erecheë ngue namo, “ùquĩ nda mbia mbicuã” ere que, ùquĩ embuchecua rã ndecheë ure je, i que Pedro ee ra. ¹⁶ Jesús que ñee ee ra. —¿Jê abe jêicuayâte quia re? ¹⁷ Ae mbia u quia nae, oso chõ nguiã erie ye. Echiique rui chõ eriqui nguiã oso oso. Usë nyee. ¹⁸ Mbia chiangui renda chõ embicuã nguiã usë mose echuru rĩ. ¹⁹ Aba chiangui renda quia aba mundua icuã icuãte nguiã. Nyebe mbia riqui nguiã emo iquia. Siqui siqui emo ninisi rese. Emo ndu rese abe no. Siqui siqui eruã ndese no. Mbae mbuquiachã quiachã no. Ñee ñooño abe no. Ñee icuã icuã no. ²⁰ Mbia chiangui renda ja chõ ùquĩ nde. Ûquĩ ño mbia mbicuã icuã nguiã ùquĩ ao ao mose. Uchoi quiiriã mose quiaru, ùquĩ nguia ra mbia mbicuã eã, i que Jesús ñee nda.

Ari mo Jesús icua

²¹ Jesús que nyoĩ hue recha cote ra. Ngasë ngue Tiro jii cote ra. Sidón jii abe no. ²² Ari mo Canaán jenda que siqui huee ra. Ae que tu ñee Jesús je ra. —David nducucha chõ nde re, Jesús. ¡Ndeyayã ño serese jê! Aba checuayã icuã ndiqui seriirĩ mbasi mbasi co, i tuchi que ari ñee Jesús je ra. ²³ Jesús que ñee ãte ee ra. Echimbaaquiatsu que ngaë ñee Jesús je ra. —Ari emondo chõ uchuchúaa. Eñi mbeichĩ ñee nande je a, i que echimbaaquiatsu ñee Jesús je ra. ²⁴ Jesús que ñee ee ra. —Sã ovejas mo quiachã no. Ûquĩ na ño judíos riqui nguiã ã. Judíos achõ je chõ ngue Dios sembu nguiã, i que Jesús ee ra. ²⁵ Ari que tu ngoi nguiã ndese ñee Jesús je ra. —Sererecua, seriirĩ embucherõ na seje, i que ari ñee Jesús je ra. ²⁶ Jesús que ñee ee ra. —Judíos rese rane taico mbae raã naa. Ahui aronea judíos si, mbae raã naa mbiamo je, i que Jesús ee ra. ²⁷ Ari que ñee ee ra. —Aicuate raque se, Sererecua. Mbiamo ndaque ure. Judíos eã ndaque ure. Ure abe je chõ mbae esaã ae. Seriirĩ embucherõ seje ae, i que ari ñee ee ra. ²⁸ —Seicuate equia co, Ari. Nderiirĩ tambucherõ ndeje, i que Jesús ñee ari je ra. Aque mosechi tuchi que eriirĩ nyerõ nda.

Jesús mbia rasi chumumbara mbucherõ

²⁹ Jesús que oso hue recha cote ra. Oso que equia ama nimia nduĩ ra. Ama Ndisha Galilea nimia nduĩ. Hue si que esi sita ibate cote ra. Huee que ngoi huee ra. ³⁰ Mbia que ngaë ngaë tuchi quia ee huee ra. Erasi chumumbara rurucuaë cuaë tuchi ee. Ecuatayã. Eresayã. Echeë nguiã. Eo icuã. Mbia que ùquĩ ndasi chono ja Jesús i jii ra. Jesús que ùquĩ mbucherõ ja ra. ³¹ Nyebe mbia riqui nguiã nyuruirã tuchi mae erese. Echeë nguiã ñee turã mose. Eo icuã mbuturã mose. Ecuatayã ngata turã mose. Eresayã mae turã mose. Nyebe mbia ñee turã ja nguiã Dios rĩ.

Jesús mbichae tubiriã saã mbichae mĩ je

³² Jesús que ñee uchimbaaquiatsu ísaa cote ra. —Seyayãte aico ã mbia tubiriã ndese co. A echi arete serese tres días a. Embae mo eãte echirurã aa. Eriãcuã amondo sereãte echuchúaa. Eriãcuã nda eiquia ñeenda cúa, i que Jesús ra. ³³ Echimbaaquiatsu que ñee ee ra. —Turúquiaa chõ nandeico a resë. ¿Mañi nda aba ã mbuquiaru ja re? Mbae eã tuchite a resë, i que echimbaaquiatsu ñee

Jesús je ra. ³⁴—¿Manyá mbichae jembae re? i que Jesús ee ra. —Siete mbichae. Sira ñetê mo ndese, i que ee ra. ³⁵Jesús que mbia mbucoi ja íbii ra. ³⁶Mbichae que eisi ja o je ra. Sira ñetê abe no. Gracias, i que Dios je ra. Mbichae que esiquio quio mbia je cote ra. Sir a rese. Mee ja que uchimbacuaquiatu je cote ra. Ūquí ngue emee mee mbia ja je cote ra. ³⁷Mbia que eu ja ñimbio chee ra. Mbichae sique sique que emunua nua ja ra. Sira sique rese. Siete iru que emombisê nyee ra. ³⁸Mbichaecua rei mbia cuatro mil. Cuña abe abe. Mbia riirĩ abe abe no. ³⁹Jesús que mbia mondochoi ja cote ra. Jesús que ua canoa ye cote ra. Oso que Magdala quiti cote ra.

16

Mbia mae sayã eteacuquia ure je, i fariseos

1—Tã nande rá Jesús je, i que fariseos ñee nyue ra. Saduceos rese. Nyebe ūquí ngaẽ nguiã ñee Jesús je. —Mbia mae sayã esaã na ure je. I nda “Dios chimbu” ure tuchi ndeje, i rei que ñee Jesús je ra. ²Jesús que ñee ee ra. —Ibei jêicuate raque ūquí. Ibei ireĩ ndese jemae mose eresaitõ, “ama nda nyaaquiã” jenyê chõ nguiã eicua. ³Ibei ireĩ ndese jemae mose eresaitõ ndabe, “nyaaqui rae”, jenyê chõ nguiã eicua ūquí no. Ibei jêicuate raque quia ã. Ae Dios teacuquia jêje nae, ūquí jêicuayã mbei chõchĩ nguiã ã. Ae ra tu icuãte mbia je nae, ¿mbaerã jêingo ūquí nguiatu icuayãte re? ¿Mbaerã jêingo jëaracua raã naa nde? ⁴Mbia icuã ja chõ ã nde. Ae siqui ibi rĩ namo nae. Hui jate equia Dios si ã. “Mbia mae sayã esaã ure je”, i chõchĩ equia seje ã. Aque miĩ nda asaã jêje. Jonás na si ra asaã jêje, i que Jesús ñee nda. Oso que erecha cote ra.

Fariseos mbia mbaaquiatu icuã, i Jesús

5 Jesús chimbaaquiatu que uchĩurã curuchoi eã nda. Tesarei que esi nyoi mose sobei ra. ⁶Jesús que ñee ee ra. —Mbichae mbuchimatãsa rá ndei fariseos cheẽ. Saduceos cheẽ abe no. Ūquí ñee ndese ra jêingochĩ jê, i que Jesús ee ra. ⁷—Mbichae quiatu ngue nanderuã nguiã. Nyebe eriqui nguiã ñee nande je ūquí, i rei que echimbacuaquiatu ñee nyue ra. ⁸Jesús que echeẽ ñee icuate ra. Nyebe ñee nguiã ee. —¿Mbaerã jêingo “mbichae nanderuãchĩ” i re? ¿Mbaerã jêingo seicuayãte re? ⁹Ae riĩ aico ñee jêje nae, ¿ūquí jêicuayã mbeite quia re? Se mbichae mbeta mose ¿ūquí si jêtesarei chõ nde? Cinco mbichae mbeta mose mbia cinco mil je, ¿manyá iru jemombisê mbichae sique sique je re? ¹⁰Siete mbichae mbeta mose mbia cuatro mil je ¿manyá iru jemombisê mbichae sique sique je no? ¹¹Secheẽ mose jêje nyii, “mbichae mbuchimatãsa rá ndei fariseos cheẽ”, i mose jêje, secheẽ jêicua rá. Mbichae riĩ aico ñee ãte jêje co. Fariseos cheẽ ndese jêingo eã sacuã ño aico nguiã ñee jêje. Saduceos cheẽ ndese abe jêingo eã sacuã, i que Jesús ra. ¹²Echimbacuaquiatu que eicua chee ra. —Mbi chae mbuchimatãsa riĩ eã ño eriqui ñee nande je re. Ae fariseos senei senei icuã nguiã mbia mbaaquiatu nae, ūquí ñiĩ ño eriqui ñee nde. Saduceo ñee ñiĩ abe no, i que echimbacuaquiatu eicua ramo cote ra.

Cristo chõ nde resê, i Pedro Jesús je

13 Jesús que nyoi Cesarea de Filípoo cote ra. Huee que ñee uchimbacuaquiatu je cote ra. —Mbiarã ngue achu íbii ra. ¿Aba aico reĩ se mbia je re? i que Jesús ñee ee ra. ¹⁴Echimbacuaquiatu que ñee ee ra. —Juan el Bautista ereico reĩ nguiã mbia je co. Elías ereico reĩ nguiã emo je no. Jeremías ereico reĩ nguiã emo je no. Dios cheẽ nenei neneisa mo ereico reĩ nguiã emo je no, i

que echimbaaquiato ñee Jesús je ra. ¹⁵—¿Aba aico rei jėje co re? i que Jesús ee ra. ¹⁶—Cristo chō nde resē. Dios riiri ño nde resē, i que Pedro ee ra. ¹⁷⁻¹⁸ Jesús que ñee Pedro je cote ra. —Ndeyate ereico co, Simón. Mbia mo nemiirandu eãte quia serese co. Paba Ibatenda mui ño nemiirandu nguiã serese. Jonás ndiiri ndei nde. Tacheẽ tuchi ndeje. “Pedro” i chō equia ndeje co. “Sita” i ñi Pedro je re. Aque sita arō ño nda sembae iglesia achao. Satanás nda esiquisã eãte. Satanás quirãcuãte raque. Mbia iquiasa raque ae no. Ae ra sembae iglesia siquisã eã mbei. ¹⁹ Mbae tamee ndeje. Llave tamee ndeje. Aque je ra Dios recua iquesa erembuquiata quiata mbia je. Mbia ique sacua. Ae je ra erembuqui ata, ũqui nda ique. Ae je ra erembuquiata eã, ũqui nda ique eã, i que Jesús ra. ²⁰ Jesús que ñee uchimbaaquiato ja je cote ra. —“Jesús rei Dios chimondo” jenyechi nda emo mbiirandu jē, i que ee ra.

Mbia ra seiquia, i Jesús

²¹ Aque mose bei que Jesús umano nonde senei senei uchimbaaquiato je ra. —Paba ra sererao Jerusalén. Huee ra ame; seiruã nu a tuchi. Sacerdotes rerecua abe ra sembasĩ mbasi tuchi no. Embesasa abe no. Seiquia rae. Tres días mose ra aquera si, i que Jesús ñee ee ra. ²² Pedro que Jesús querao pe jiri ñee sacua ee ra. —Mbia ra jei jeichi ndeje jē. Mbia ra ndei quiachi jē, i rei que Pedro ñee asi ee ra. ²³ Jesús que uba ñee Pedro je ra. —Ehui chō sesi, Satanás. ¿Mbaerã ereico seriquisã quisã nde? Mbia ndua rã ño ereico nguiã ndua. Dios ndua rã eã, i que ñee Pedro je ra.

²⁴ Jesús que ñee uchimbaaquiato je cote ra. —Emo siquise mose serui, sã hui ja mbae ubi si. Sã cruz umbaerã ndui se rã si. Sã eriqui serui bei cote. ²⁵ Emo ndua bei mose nguero rese, ereco ra ua esi. Emo hui mose nguero si seje, ũqui nda siqui bei. ²⁶ Emo nguero mumba chooño mose, eya eã mbei rae. Mbaecha rete raque. Emo nguero mumba chooño mose, mbae mo eãte ereco ribishorō sacua. ²⁷ Dios ra sembu si ibii uquirãcuã je. Ibatenda rese ra achu ángeles. Ae mbae turã saã saã nguia nae, ũqui je ra mbae turã amondo se tu mose. Ae mbae icua saã saã nguia nae, ũqui je ra mbae icua amondo no. ²⁸ Tacheẽ nyecua jėje. A jengu a nae, jemo nda jema; sechu rese. Achu ra mbia rerecuarã tuchi cote. Jemo jemano eã mose r a achu mbia rerecuarã tuchi cote, i que Jesús ra.

17

Jesús nyicuabo uchimbaaquiato resaa

¹ Tenda seis uare que Jesús uchimbaaquiato mo nderao sita ibátee ra. Pedro. Jacobo. Juan abe no. Jacobo nongue rei Juan. Ũqui ngue equerao ja mbia tiãsa ra. ² Jesús que nyicuabo erésaa ra. Eruba que ñimbiasu ra. Tenda nininya rã tuchi que eruba ra. Eirao abe nininya tuchi que ra. Eiraoshi nininya tuchi que ee ra. ³ Mbia nyeremo ngue nyecua u ibate si ra. Jesús nininya mose que echi ñee ñee erese ra. Moisés que enongue ra. Elías que enongue ra. ⁴ Pedro que ñee Jesús je ra. —Sembaaquiatusa, nandecu turãte a. Sucha ñetē ursaã saã na, ndebi mose. Enongue nembraerã. Enongue Moisés mbaerã no. Enongue Elías mbaerã no, i rei que Pedro ñee Jesús je ra. ⁵ Pedro cheẽ mosete que ibeishĩ ndu eite ñi nda. Abamo ñee mo ngue echandu ibeishĩ qui re ra. —Co rei sebi tuchi seriiri co. Seya tuchite aico erese co. Echeẽ jeñandu bei quia, i que Dios ñee ee ibeishĩ qui re ra. ⁶ Echimbaaquiato que siquichete eandu mose ra. Echeẽ mose que echoi nyaara ngué quti ra.

7 Jesús que esiichã oco oco erese ra. —Jêhuã na. Jêsiquichechĩ nda jê, i que ñee ee ra. 8 Echĩmbaaquiatsu soboiba mose que mae Jesús mĩ ndese cote ra.

9 I ecuaẽ nguia nguichi mose sita ibate si que Jesús ñee ee ra. —Ae rese jemaẽ namo nae, ùquĩ nda jêseni seneichĩ emo je jê. Seraaque quera si mose, aque mose ramo ño jêseni senei mbia je cote, i que Jesús ñee ee ra.

10 Echĩmbaaquiatsu que ñee ee cote ra. —¿Mbaerã “Elías rane nda tu Cristo si” i embesasa re? i que ñee Jesús je ra. 11 Jesús que ñee ee ra. —Ae bei. Coche Elías rane tu nguia mbae mbitirõ ja. 12 Elías que tu ra. Mbiam que eicuayãte ra. Mbiam icuã icuã jate que eriqui ee ra. Eĩ si ra mbiam icuã icuã seje no, i que Jesús ee ra. 13 Echĩmbaaquiatsu que Jesús cheẽ icua ramo cote ra. —Juan el Bautista rĩ ño eriqui ñee nde, i que Jesús cheẽ icua ramo cote ra.

Jesús aba checuayã jea mbiam riirĩ mo si

14 Ngasẽ nguẽ mbiam ja je cote ra. Emo nguẽ ngoi nguĩã ndese ñee Jesús je ra. 15 —Seriirĩ embucherõ na, Sererecua. Tẽ i beite que equia ra. Titi titi i beite que equia no nda. Erasi tuchite. Ngoi coi beite tátaa. Ama ye abe ngoi coi beite. 16 “Seriirĩ embucherõ na”, ae rei nguẽ nguia ndechĩmbaaquiatsu je. Mbiam mbucherõ aquiatsu ño eriqui re, i que eru ñee Jesús je ra. 17 Jesús que ñee cote ra. —¿Mañi jenyẽ quia seicuayãte re? ¿Secheẽ jemumba tuchi chõ nguia re? ¿Ñimbirãcuã mbeite ra aba quia jêje re? i que Jesús ra. —Eriirĩ jendu rã seje, i que cote ra. 18 Jesús que ñee asite aba checuayã je cote ra. Aba checuayã nguẽ usẽ eriirĩ si cote ra. Aque mose tuchi que eriirĩ nyerõ cote ra. 19 Aquere que echĩmbaaquiatsu ñee Jesús ísaa ra. —¿Mbaerã ureico aba checuayã jea aroneate mbiam si re? i que ñee Jesús je ra. 20 Jesús que ñee ee ra. —Seicuayãte jiri quiatsu nguia ã. Tacheẽ nyecua jêje. Sã mostaza eĩ ñetẽte riqui raque no. Jê seicua ñetẽ mose, mbae ra asaã ja jêje. “Eso pe jiri”, jenyẽ mose co sita ibate je, sira ra oso pe jiri jeñee nguire. Jê seicua mose, mbae jê saã ja arondete. 21 Aba checuayã nguẽ ajea namo, ùquĩ nda jêjea eã jeñee eã mose Dios je. Ûquĩ nda jêjea eã, jêhui eã mose jenyũ si, i que Jesús ñee ee ra.

Mbiam ra seiquia, i si Jesús

22 Galilea rĩ nguẽ Jesús riqui ngata uchĩmbaaquiatsu rese ra. Jesús que embaaquiatsu quiatsu quia ra. —Mbiarã nguẽ achũ ra. Mbiam ra semee mbiam icuã je. 23 Mbiam icuã nda seiquia. Tres nyaashĩ mose r a aquera si, i que Jesús ra. Echĩmbaaquiatsu ia eã tuchi que echeẽ mose ra.

Jesús mbae isiquia mondo impuestos pagar i sacua

24 Ngasẽ ja que Capernaum cote ra. Ae impuestos isi isi quia Dios chuchua jenda nae, ùquĩ nguẽ nyoi ñee Pedro je ra. —¿Jenderecua impuestos mee eã nguia Dios chuchua jenda je re? i que ñee Pedro je ra. 25 —Impuestos emee mee mbeite quia co, i que Pedro ee ra. Pedro que oso ique tuchúaa cote ra. Jesús rane nguẽ ñee ee ra. —I ere, Pedro. ¿Aba je mbiam rerecua riqui “impuestos jemee na seje” i re? I eã nda nguiri je. Mbiam je chõ nda ñee nguia, i que Jesús ee ra. 26 —Ae. Mbiam si ra eisi, i que Pedro ñee ee ra. Jesús que ñee ee cote ra. —Eriirĩ nda impuestos mee eã ee resẽ. 27 Dios riirĩ ndaque se. Impuestos nandemee ndei Dios chuchua jenda je. Sã mbiam ndua icuã eã nande rese. Quiatsu ama ndíshaa. Sira mbabasa emondo ii. Ae rane nda sira erembua nae, aque churu ye ra mbae isiquia mo erete. Aque emee serao impuestos isi isiquia je. Sembae impuestos sacua. Nembae sacua abe no, i que Jesús ñee Pedro je ra.

18

Ererecua tuchi ra se, i jaaja Jesús chimbaaquiatu nyue

¹ Aque mose que echimbaaquiatu ñee jate Jesús je ra. —¿Aba ra ererecua tuchi ure nderese re? i que ñee Jesús je ra. ² Jesús que ãquẽ mo mbucoi mii eite re ra. ³ Ñee ngue mbia je cote ra. —Tacheẽ nyecua jêje. Dios quiti jemba eã mose ra jenderecua eã mbei Dios. Mbia ririĩ na jẽingoã mose ra jenderecua eã mbei Dios no. ⁴ Ae siqui quia cocheete nae, ũquí nda mbia rerecuarã nyee Dios rese. Ae siqui quia mbia ririĩ n a nae, ũquí nda mbia rerecuarã nyee Dios rese. ⁵ Ae eturã ndiqui mbia ririĩ je serĩ nae, seje abe chõ eturã ndiqui nguiã.

Mbae icuã nda nandesã uquiachã emo je

⁶ Ae ra mbae icuã saã uquia seicua mo je nae, ũquí nda mbae rasi saã tuchi cote. Ũquí nda aba mombo chõ ama ndisha ye nyii re chã. Sita resebe ecua ji mondo. I nda mbae icuã naa uquia eãte rei seicua je. ⁷ Mbae icuã nguiarei siqui bei tuchi mbia mbiãcuã nonde. Ae ñee nguia mbia je nae, “mbae icuã esaã” i nae, eicuã tuchi chõ ũquí nde. Ae “mbae icuã esaã” i nae, ũquí nda mbae rasi saã tuchi cote. ⁸ Ndeo nemingo mose mbae icuã ndese, ndeo echisia mombo. Coche rei ra ereso ibate ndeo mii nderequia, siqui bei sacua huee. Ndei nemingo mose mbae i cuã ndese, ndei echisia mombo no. Coche rei ra ereso ibate ndei mii nderequia, siqui bei sacua huee. Oso rocoĩ tata cuásuu, ndeo nyeremo nderao. Ndei nyeremo nderao. Tata ra uqueã mbei huee no. ⁹ Nderesa nemingo mose mbae icuã ndese, nderesa echoo. Coche rei ra ereso ibate nderesa mii nderequia. Nemombo rocoĩ tata cuásuu, nderesa nyeremo nderao.

Oveja quiachã je

¹⁰ Seririĩ ñetẽ mo nda jẽucuãyãchĩ jẽ. Angeles riqui eraarõte ã. Angeles riqui Paba rese ibate pe. ¹¹ Se que achu quiachã je rea ra. ¹² Sã emo nimba quiachã oveja no. Cien ndei ngue erimba re. Co mii ngue quiachã ee ra. Aque esi quia quiachã je requia aque. Eataque recha. Noventa y nueve recha. ¹³ Tacheẽ nyecua jêje. Echa quiachã je rea mose, eyate que erese ra. Eya tuchi que erese ovejas ataque si ra. Quiachã eã je si. ¹⁴ Sã jendu ibatenda abe no. —Sã aque mii quiachã eã seririĩ ñetẽ mo, i chõ Dios nguiã co.

Emo mbae icuã naa mbei mose ndeje, etesarei sarei bei chõ

¹⁵ Nderesenda icuã mose ndeje, eso ñee ee. “Á ngue eresaã mbae icuã nda”, ere chõ ñee eĩsaa. Ndecheẽ andu turã mose, nderesenda que eremitirõ turã nda. ¹⁶ Ndecheẽ andu sereã mose, emo abe erao ñee sacua ee. Aque mii nda reae. Nyeremo nda re no ae. Ũquí abe ñee sacua ee. Jeñee ja mose ee hue rĩ ja, jẽandu turã arõte. ¹⁷ Ũquí andu sereã mose, jeñee mbia chumunuásaa cote. Sã mbia ñumunua je ñee ja ee. Ũquí ñee andu sereã mose, jemombo chõ cote. Dios quiatoã naanguia jẽsaã ño ee cote. Mbia icuã naanguia jẽsaã ño nguia ee cote. ¹⁸ Tacheẽ nyecua jêje. Jẽ mbae mo ndiquisã mose, Dios abe ra esiquisã. Jẽ mbae mo ndiquisã eã mose, Dios abe ra esiquisã eã no. ¹⁹ Tacheẽ nyecua jêje. Jẽ nyeremo ndua turã mose hue rĩ sí, “co embu ure je” jenye turã ja mose Dios je, Paba Ibatenda ra emondo jêje. ²⁰ Jẽ nyeremo ñumunua mose serĩ, aico chee nguiã jendese jẽite re huee, i que Jesús uchimbaaquiatu je ra.

²¹ Pedro que ñee Jesús je ra. —Seresenda icuã mbei mose seje ¿manya veces ra atesarei eicuã si re? ¿Siete veces ra re? i que Pedro ra. ²² Jesús que ñee ee

ra. —Tei. Siete veces eã. Eata tuchi quia ñene. Setenta veces siete quia ñene, i que Jesús ee ra.

Jendesenda icuã si chõ jêtesarei

²³ Sã ererecua mo ndiqui no. Dios rã si chõ ererecua re. Sã ererecu a cuenta raã naa ja ngũimba je no. ²⁴ Cuenta raã naa mose que erimba mo ndurucuaẽ ee ra. Aque que deber i tuchi quia ee ra. ²⁵ Mbae åte que erimba mbae pagar i sacuaã nda. Nyebe ererecua ñee nguiã. “Embae je vender nande ja rã. Eriiri abe je vender nande. Eninisi abe no. Ae abe je vender nande. I nda cuenta ua jiri”, i rei que ererecua ñee nda. ²⁶ Erimba ia eã tuchi que echeẽ andu ra. Ngoi que ngũiã ndese ñee nguerecua je ra. “Sererecua, eico tochi chõ seje ae. Mbae tamondo ja chee ndeje”, i que erimba ra. ²⁷ Ererecua ia eã tuchi que erese ra. “Mbae emondo eã ndei seje pagar i sacuaã”, i chõ nyee que ee ra. Hui chõ nyee que esi ra. ²⁸ Erimba que usẽ ndei oso quia ra. Aque mosechi que ngasẽ ngesenda mo je ra. Deber i miite rei ee reaẽ. “Pagar ere rã seje”, i que echosoi isi ra. ²⁹ Eresenda que ngoi ngũiã ndese ñee ee ra. “Eico tochi chõ seje ae. Mbae tamondo ja chee ndeje”, i que eresenda ñee ee ra. ³⁰ “Nya” i chõ ngue enongue echeẽ mose ra. Cárcel chõ ngue ererao chee matã nda. Mbae mondo ja chee sacuaã ee. ³¹ Eresenda ataque ia eã tuchi que mae erese ra. Nyebe echoi nguiã ñee ererecua je. ³² Nyebe ererecua “echu” i nguiã ee. “Serimba icuãte chõ ereicochi nde re. Ae deber ere seje, ùqui nã ngue acheẽ eãte ndeje. Seya eãte que nderese nde ñee mose seje nyii. ³³ ¿Mbaerã ndeya eã eã ño ndenongue rese nde re? Sã ñi seya eãte nderese nyii no”, i que ererecua ñee ee ra. ³⁴ Ererecua que paama i tuchi ee ra. “Jêiruã nua tuchi, pagar i ja chee”, i que ererecua ñee mbia je ra, i que Jesús mbia mbaaquiato quiatu ra. ³⁵ —Ei sí ra Paba Ibatenda paama i jêje, jêtesareiã mose jendesenda icuã si, i que Jesús mbi a je ra.

19

Jesús ñee mbia ngũinisi mombo je ri

¹ Jesús cheẽ uare que esi Galilea si cote ra. Ama Jordán ndobei que esi sobei cote ra. Judea bei chõ hue ja ibi re. ² Mbia que nyoï ja tuchi quia erui ra. Huee que mbia rasi mbucherõ cherõ tuchi ra. ³ Fariseos mo ngue nyoï Jesús riichã nda. —Tã nande Jesús je no. Ma ñee Dios cheẽ abi, i que ñee nyue ra. —¿Coche mbia ngũinisi jea ubiã mose re? i que ñee Jesús je cote ra. ⁴ Jesús que ñee ee ra. —¿Embesa ji rese jêingo mae åte re? “Dios mbia ao mose, nyeremo ngue echao ra. Erãcuẽ ngue echao ra. Eninisirã abe que echao no nda. ⁵ Nyebe ra emo ndiqui ngũinisi rese bei. Ngu si isho. Usi si abe no. Ngũinisi rese siqui bei sacuaã. Cõ mi na siqui sacuaã nyiese”, i ñi embesa ji re. ⁶ Nyeremo siqui rã eã ño cote re. Cõ mi siqui rã ño ùqui cote re. Ae Dios mbucha nyiese nae, sã ùqui huï eã mbei nyesi, i que Jesús ñee ee ra ⁷ Fariseos que ñee ee cote ra. —¿Mbaerã Moisés ñee ùqui nde? “Jeninisi jea nonde, papel mbesa je jemondo ee”, i ee re, i que ra. ⁸ Jesús que ñee ee ra. —Jëaquẽ åtãte quiatu ngue re. Nyebe Moisés embesa nguiã jêje ùqui. Ùqui i åte que Dios mbia ao ramo mose nyii ra. ⁹ Ae ngũinisi jea nae, eninisi siquiã ndaque emo ndese, eicuã tuchi chõ ùqui nde. Ae ngũinisirã mo ndeabe mose, adulterio i que ùqui je ra, i que Jesús ñee ee ra. ¹⁰ Echimbaaquiato que ñee ee ra. —Mbaeiaie mose ngũinisi jea mose ¿mbaerã nguiatu ra ngũinisirã ndea re? i rei que echimbaaquiato ñee nda. ¹¹ Jesús que ñee ee ra. —Mbia ja riqui ùqui icua eãte ã. Ae Dios mbaaquiato

quiatsu nae, ũquĩ m̃i ño siqui nguiã eicua ã. ¹² Ae eninisi sereã mbeite nae, ũquĩ nda siqui turã, eninisiã ndaque rae. Emo nyia o ji mose, ũquĩ abe ra siqui turã, eninisiã ndaque rae. Emo ngünisirã nderequia eã mose Dios riĩ, ũquĩ abe ra siqui turã, eninisiã ndaque ra eno. Ae ra “coche seninisiã aico nguiã co” i mose, sã eriqui bei eninisiã, i que Jesús ñee ee ra.

Jesús mbia ririĩ isi turã turã

¹³ Mbia que nguiĩrĩ ngurucuaẽ cuaẽ nguia Jesús je ra. Jesús o noono sacuaã eãquĩ arõ. Jesús ñee sacuaã Dios je eriĩ. —¿Mbaerã jendiĩrĩ jendu quia co re? i rei que Jesús chimbaaquiatu ñee mbia je ra. ¹⁴ Jesús que ñee nda. —Tei. Jêhui chõ esi. Sã nguiĩrĩ ndurucuaẽ cuaẽ seje. Eĩ ño Dios rimba nguiã. Ucuasu raã naa eã. Mbia ririĩ na, i que Jesús ñee ee ra. ¹⁵ Jesús que o chono ñono mbia ririĩ arõ nda. Aquere que esi ngata cote ra.

Acuanĩndu mbaecha mo ñee Jesús je

¹⁶ Acuanĩndu mo ngue tu ñee Jesús je ra. —Mbia mbaaquiatusa turãte nde. ¿Mbae turã mo nda asaã Dios je semingo bei sacuaã nde? i que ñee Jesús je ra. ¹⁷ Jesús que ñee ee ra. —¿Mbaerã ereico eturã i seje re? Dios m̃i ño eturã ndesẽ. Nde ndeico beise mose, Dios cheẽ emumbayã ja, i que Jesús ñee e e ra. ¹⁸ —¿Mbae ra amumbayã Dios cheẽ nde? i que acuanĩndu ee ra. Jesús que ñee ee ra. —“Mbia mo nda ereiquiachĩ. Emo ninisi rese ra ereicohĩ. Mbae mo nda erembuquiachãchĩ. Erecheẽ ñooñochĩ nda emo ñi. ¹⁹ Ndeturã ño nderu je. Ndeturã ño ndesi abe je. Sã erchesecua ndechiese no nae, eĩ ere si chõ nyesecua nde ji jenda rese”. Dios cheẽ ja chõ ũquĩ nde. Mbia echeẽ mumbayã sacuaã, i que Jesús ñee acuanĩndu je ra. ²⁰ Acuanĩndu que ñee ndei ee ra. —Ũquĩ ngue amumbayã ja bei quia ra. Señetẽ mosenda bei. ¿Mbae mo abe ra asaã nde? i que acuanĩndu ñee Jesús je ra. ²¹ Jesús que ñee ee ra. —“Taico turã tuchi”, nde i mose, ã abe esaã. Nembae emondõ mondo ja mbia mbaecha reã je. Nde ũquĩ naa mose, mbae tubiriã nda nembae, ndeico mose ibate. Nembae mondo ja mose mbaecha reã je, serui eico cote, i que Jesús ee ra. ²² Acuanĩndu Jesús cheẽ andu mose que echosoi oso serĩte cote ra. Eyayãte que oso ra. Mbaecha tuchite quiatu ngue ae re.

²³ Jesús que ñee uchimbaaquiatu je cote ra. —Tacheẽ nyecua jêje. Mbaranguiatu ãte mbaecha je ngasẽ sacuaã ibate siqui bei sacuaã huee. ²⁴ Sã ticuas mo ndiqui oso aroneate ique aguja sorei rĩ no nae. Eĩ si chõ mbaecha no nde. Oso aronea ibate Dios rese, i que Jesús ra. ²⁵ Echimbaaquiatu que nyuruira tuchi echeẽ andu ra. —¿Aba quia ra oso Dios rea ibate rẽ no? i que echimbaaquiatu Jesús je cote ra. ²⁶ Jesús que mae erese ñee ee ra. —Ae mbia saã aroneate quia nae, Dios m̃i ño nda esaã, i que Jesús ee ra. ²⁷ Pedro que ñee Jesús je ra. —Ure que urembae uresech a ja ra. Siqui sacuaã nderui. ¿Mbae ra ereme ure je re? i que Pedro ñee nda. ²⁸ Jesús que ñee ee ra. —Tacheẽ nyecua jêje. Dios mbae mbiasu ja mose ra ererecua tuchi rei se cote. Mbia ra mae ja serese aque mose. Aque mose ra jê abe ererecua. Jê doce. Trono jaaja ra jembraerã cote. Judíos rerecua ja ra jê. ²⁹ Emo umbae secha ja mose siqui sacuaã serui, embae ra asibishorõ tuchi ee cote. Ae uchuchua secha. Ae ngõngue secha. Ae ngu secha. Ae usi secha. Ae ngünisi secha. Ae nguiĩrĩ secha. Ae umbae ibi secha no. Ũquĩ mbae ja ra asibishorõ tuchi cien veces. Aquere ra siqui bei tuchi Dios rese ibate cote. ³⁰ Ae rane eriqui nyii nae, ũquĩ nda siqui mbia rui tuchi cote. Ae siqui quia mbia rui tuchi nyii nae, ũquĩ nane nda cote, i que Jesús ra.

20

Ae rane eriqui nyii nae, ũquí nda siqui mbia rui tuchi cote

¹ Jesús que mbia mbaaquiato quiatube no nda. —Dios rei mbia rerecua tuchi. Sã mbaecha mo ndíqui no. Sã mbaecha uva tubiriãte riqui embae no. Sã mbaecha mbia mo ndea rea umbae ishao shao sacua no. Nyaashĩ namo mose. ² “Denario mii tamondo mondo ja jêje. Sembae ishao shao sacua tenda mondo chee”, i que emondochoi úcoo cote ra. ³ Tenda chui mose que mae emo ndecoteã eã ndese ra. ⁴ —Jê abe jêso sembae ishao shao. Mbae mo tamee jêje, i que ee ra. Nyoi que echeẽ mose ra. ⁵ Tenda nandeite re mose que echa emo mondo choi cote ra. Umbae ishao shao sacua. Eĩ si que echa tenda chaara ramo mose no nda. ⁶ Tenda ireĩ mose abe que mae emo ndecoteã eã ndese no nda. “¿Mbaerã jêingo tenda mondochooño siqui rocoĩ mbae mo ndese a re?” i que echa ñee ee ra. ⁷ “Emo ngue ‘mbae mo esaã seje’ i ãte ure je ra”, i que ee ra. “Jêso jê abe sembae ishao shao. Mbae mo tamee jêje”, i que echa ee ra. ⁸ Itondaru ramo mose que echa ñee mbia reaquiatusa je ra. “ ‘Jenyu’ ere sembae ishao shaosa je. Pagar ere rã ũquí ja je. Ae ique ramo eresaitõ nae, ũquí nane je pagar ere. Ae rane ique nyii nae, ũquí je pagar ere hui bei cote”, i que echa ñee nda. ⁹ Ae ique eresaitõ nae, ũquí nane je que denario mii mee mee nda. ¹⁰ Ae rane ique nyii nae, ũquí ngue ñee ñee u nyue ra. “Eata jiri ra emee nande je reae. Nande rane ngue uva a nandeishao shao”, i rei que eu ñee ñee nyue ra. ũquí je abe que denario mii mee mee nda. ¹¹ Pagar i mose ee que ñee asi asi echa je ra. ¹² “Ae ique ramo eresaitõ nae, ũquí ngue mbae ishao shao eã jiri resẽ. Eresaitõte que ique. Ure quiatu que tenda uremumba rei uva a ishao shao ndeje. ¿Mbaerã mbae isiquia eremeẽ ee ure rã si chõ nde?” i que ñee echa je ra. ¹³ Echa que ñee ũquí mo je ra. “Mbae icua mo asaã eãte ndeje resẽ. ‘Denario mii’, nande que ñee nyii resẽ. ¹⁴ Quiatu nembae denario rerao cote. Ae ique ramo nae, ũquí je abe denario tamee mee nde rã si. ¹⁵ Sembae ae rese aico nguiã. Sembae amondose mose emo je, ¿amondo aroneate se re? Se sembae mee mose emo je, ¿ndebiãte ũquí nde?” i que echa ñee ee ra. ¹⁶ Ae rane eriqui nyii nae, ũquí nda siqui mbia rui tuchi cote. Ae siqui quia mbia rui tuchi nyii nae, ũquí nane nda cote. “Jenyu serui” i tuchi Dios quia mbia ja je co. Mbia mii mii ño eisirõ sirõ nguiã co, i que Jesús ñee nda.

Mbia ra seiquia, i si Jesús

¹⁷ Jesús que ngata oso quia Jerusalén quiti ra. Uchimbaaquiato que equerao mbia tiãsa ñee sacua ee ra. ¹⁸ —Co nyao quia Jeursalén co. Huee ra mbia semee sacerdotes rerecua je. Embesasa abe je. “Jesús jêiquia”, i ra serĩ. ¹⁹ Semee nda judíos eã je cote. Seiquia sacua. Mbia ra secheẽ saã saã. Seiruã nua abe ra eno. Sembucha chee ra iquia ira rese. Tres nyaashĩ mose ra aquera si, i que Jesús ñee ee ra.

Ererecuarã ure, i raque Jacobo, Juan ndese

²⁰ Ari mo ngue oso Jesús riichã nda. Jacobo si. Juan si. Zebedeo riirĩ ngue ũquí nda. Ari que oso Jesús riichã nguiirĩ ndese ra. Ngoi que nguiã ndese ñee Jesús je ra. —Mbae mo esaã na seje, i que ee ra. ²¹ —¿Mbae ra aba saã ndeje re? i que Jesús ñee ari je ra. Ari que ñee ee ra. —Ndeico mose ererecua tuchi, sã seriirĩ abe riqui ererecuarã nderese. Sã seriirĩ ngoi ja u ndejii. Enongue chĩ ngoi ndequito cuti. Enongue ndequiato cutiã no, i rei que ari ñee Jesús je

ra. ²² Jesús que ñee ee ra. —Ae riĩ jëingo ñee seje nae, jëirandu turã eãte ùquĩ ndese. Ae rasi ra asaã tuchi nae, çũquĩ ndasi ra jësaã jë abe re? i que Jesús ee ra. “Ae”, i que ari riirĩ ñee ee ra. ²³ Jesús que ñee ee ra. —Ae bei. Ae rasi ra asaã tuchi nae, ùquĩ ndasi ra jësaã tuchi raque jë abe. “Ererecuarã ure”, jenyee que seje, ùquĩ asaã aroneate se jëje. Paba ae quiatu ra ùquĩ saã. Ae ebite, ùquĩ nda emũ ererecuarã, i que Jesús ra. ²⁴ Echimbaaquiату атаке que jirandu erese ra. Echimbaaquiату diez. Paama i que Juan je ra. Jacobo je abe. ²⁵ Jesús que “jenyu” i ñee uchimbaaquiату ja je cote ra. —Mbia атаке rerecu riqui ucuasú raã naa tuchi ngũimba je ùquĩ. ²⁶ Ùquĩ nda jësaãchĩ jë. “Ererecu ra se”, i mose jemo, sã aque riquichõ uataque rimbarã. ²⁷ Jemo “se rane jë” i mose, sã ùquĩ ndiqui bei mbae turã naa naa uataque je. ²⁸ “Sã mbia mbae turã naa naa seje”, ae eã ngue u ra. “Se quiatu mbae turã tasaã saã mbia je”, ae u nguiã. Co achu quia mano mbia tubiriã ndiquicharõ sacua co, i que Jesús ñee nda.

Jesús mbia nyeremo ndesayã mbucherõ

²⁹ Jesús que ngata oso quia Jericó si ra. Uchimbaaquiату rese. Mbia tubiriã ngue nyoĩ quia eruĩ ra. ³⁰ Eresayã nyeremo ngue chi ñeenda jie ee ra. Eresayã ngue jirandu Jesús ucu rese ra. Ñeemombo mombo que Jesús je ra. —¡Sererecu! ¡David rucucha! ¡Ndeya eã ño urerese jë! i que eresayã ñee Jesús je ra. ³¹ —¡jëquiriri chõ jë! i tuchi rei que mbia ñee ee ra. —¡Sererecu! ¡David rucucha! ¡Ndeya eã ño urerese jë! ibe que eresayã ñee Jesús je ra. ³² Jesús que tiba ñee ee cote ra. —Jenyu rã. çMañi ae ra jëje re? i que Jesús ñee eresayã je ra. ³³ —Urerese embuturã na, Urererecu, i que eresayã ñee ee ra. ³⁴ Jesús ia eã tuchi que erese ra. Oco ja que eresa rese ra. Aque mose tuchi que eresayã ndesa turã ja cote ra. Mae turã ngue cote ra. Jesús rui que echoi quia cote ra.

21

Jesús ngasẽ Jerusalén

¹ Jesús que Jerusalén curubite nyoĩ quia ra. Betfagé, i que hue sucha je ra. Ibi ibate mo abe que chi huee ra. Monte de los Olivos, i que hue je ra. Hue si que Jesús uchimbaaquiату nyeremo mondo ra. ² Ñee ngue ee ra. —Achi súchaa chõ jëso rã. Burro cuasa ra chĩ nguiirĩ ndese jëje huee. Ùquĩ jenyura seru seje. ³ Emo ñee mose jëje, “çimbaerã nda jenyura re?” i mose jëje, jeñee ee. “Nandererecu que ‘jendu’ i ra. Mondo jeibe ra jëje”, jenyee ee, i que Jesús ñee ùquĩ nyeremo mondo ra. ⁴ Embesa ji cheẽ io sacua ño ngue ùquĩ nda. I embesa ji huĩ a:

⁵ Jeñee Jerusalén jenda je.
“¡Sã jë! Jenderecu ru quia jëje burro ato co.
Ucuasu esaã saã eãte u quia co.

Burro riirĩ átoo eru quia co”, jenyee ee,
i que embesa ji huĩ nyii ra. ⁶ Ùquĩ nyeremo ngue Jesús mondo cote ra. Ae riĩ Jesús ñee ee nae, ùquĩ ngue nyecua ja ee cote ra. ⁷ Burro que ecuruchoi Jesús je ra. Huĩrao que echono ñono burro quite arõ nda. Burro riirĩ quite arõ abe. Jesús que nyui eato cote ra. ⁸ Jesús que ngata rei oso quia burro átoo ra. Mbia tubiriã ngue huĩrao mbiitee tee nyoĩ quia ibi riĩ enonde ra. Emo emo ngue sindo mbiitee tee ee no nda. Jesús oso sacua hue rĩ. ⁹ Mbia ia tuchi que tasẽ tasẽ nda. —Co nandererecu ru quia ngasẽte co. Co Dios chimbu ru quia ngasẽte nande je co. David rucucha ru quia co. Dios turã tuchi riqui nande

je co, i tuchi que mbia quia ñee nda. Ae nyoï quia Jesús nonde nae, ùquí. Ae nyoï quia erui nae, ùquí abe no. ¹⁰ Jesús que ngasē Jerusalén cote ra. Mbia hue jenda ia tuchi que o o ja erese ra. —¿Aba co re? i tuchi que equia Jesús ríi nda. ¹¹ Mbia ataque que echeē sibishorō nda. —Dios chimondo chō co re. Jesús i equia ee. Nazaret de Galilea jenda chō ae re, i que ñee nda.

Jesús mbia mbusē Dios chuchua si

¹² Jesús que oso Dios chuchúaa ra. Huee que mbia riqui mbae isi isi bei ra. Mbae mondo mondo abe mbae isiquia ribishorō. Ùquí ja que Jesús mombo hue si ra. Ae mbae isiquia sibishorō shorō nguia, ùquí mbae abe que embuchiichere chere ja mesa ra. Mesa aronda resebe. Ae nyurushi cuasu mondo mondo mbia je mbae ribishorō nae, ùquí nenda abe que embuchiichere chere ra. ¹³ Jesús que ñee ùquí ja je ra. —“ ‘Mbia cheēsa Dios je’, i ra mbia Dios chuchua je”, i rei que embesa ji huí nda. Jē nguia jēicua tuchite Dios chuchu a je re. Mbae mbuquiachāsa chuchua jēsaāte chí nguia ee, i que Jesús ñee asite ùquí je ra.

¹⁴ Jesús siqui mose Dios chuchúaa, mbia resayā ngue nyoï nyoï erea huee ra. Mbia cuatayā abe no. Jesús que ùquí mbucherō ja ra. ¹⁵ Ererecua cuabēte que chí mae icuā icuā erese ra. Sacerdote rerecua abe no. Embesasa abe no. Jesús chisaā turā ndese mae mose que paama ite ee no ra. —David rucucha turāte riqui co, i mose mbia ririí Jesús ríi, ùquí mose que ererecua paama i ja Jesús je ra. ¹⁶ —¿Mbia ririí ñee erechandu quia re? i que ùquí ñee Jesús je ra. Jesús que ñee ee cote ra. —Ae. ¿Embesa ji rese jemae eāte re? “Dios ra mbia ririí mbucheē turā uturā ñi”, i que embesa ji ra, i que Jesús ñee ererecua je ra. ¹⁷ Jesús que oso mbia rerecua recha ja cote ra. Sucha tubiriā abe recha. Oso que Betániaa nda. Huee que itō nda.

Jesús ñee icuā higo i je

¹⁸ Isamamimbe que Jesús choi sí quia sucha tubiriā nda. Eriācuāte abe que nyoï quia ra. ¹⁹ Higo i mo ndese que mae ñeenda jie ra. Siichā ndei que oso ra. Ea eāte que ee ra. Ero achōte chō ngue ee ra. Nyebe Jesús ñee nguia higo i je. —Ndea eā mbei r a cote, i que Jesús ñee ee ra. Aque mosebe tuchi que esi quia ñimama mano nda. ²⁰ Echimbaaquiatu que nyuruira tuchi mae erese ra. —¿Mañi higo i quia ñimama asite mano nde? i que ñee Jesús je ra. ²¹ Jesús que ñee ee ra. —Tacheē nyecua jēje. Ae asaā higo i je nae, jē abe ra ùquí jēsaā serā sí, jē Dios jēicua tuchi mose. Jeñee nyee ra sita ibate mo je. “Esiri rá oso am a ndisha ye”, jenyee chee ra sita ibate mo je. Sita ibate ra jeñee mumbayā jē Dios jēicua tuchi mose. ²² “Á emondo seje”, jenyee mose Dios je, mondo r a jēje. “Dios ra emondo seje”, jenyee mose jeñiangui re, Dios ra emondo jēje, i que Jesús ra.

¿Aba nembu re? i mbia ñee Jesús je

²³ Jesús que oso Dios chuchúaa ra. Huee que eriqui mbia mbaaquiatu quiatu ra. Sacerdote rerecua que nyoï ñee ee ameí ndese ra. —¿Mbaerā ereico mbia mbaaquiatu quiatu Dios chuchúaa re? ¿Aba “ùquí esaā saā” i ndeje re? i que ererecua ñee ja Jesús je ra. ²⁴ Jesús que ñee ee ra. —Se rane tacheē jēje. Se rane preguntar tae jēje. Secheē jēsibishorō turā mose, ùquí mose quiatu ra jeñee asibishorō turā se abe. ²⁵ ¿Aba ñee Juan je re? “Eso bautizar i mbia je” i ee re. ¿Dios eā ño ere? Jeñee seje, i que Jesús ee ra. Ererecua que ndua

ndua ja u cote ra. Ñee ñee ngue u nyue ra. —¿Mañi nande ra echeẽ ndobeishĩ nde? “Dios que Juan mbu ra”, nande aroneate ñee ee. Nyebe ra ñee nande je. “¿Mbaerã jëingo eãte erui re no?” i quiarei ra nande je. ²⁶ “Dios eã ngue embu ra”, nande aroneate ñee ee no. Mbã ataque ra paama i tuchi nande je. Juan quiatu tuchi quiarei mbia, i que ererecua u ñee ñee nyue ra. ²⁷ Ererecua que ñee nyee Jesús je cote ra. —Ureicuayãte. Aba chõ Juan mbu bautizar i sacua mbia je, i que ererecua ñee ja Jesús je ra. Jesús abe que ñee ee cote ra. —Se abe tacheẽ eã ndei jêje no. Ae “ã esaã” i seje nae, aque riĩ nda acheẽ eã jêje no, i que Jesús ererecua je ra.

Acuanĩndu ndua ndua si

²⁸ Jesús que ñeembe ee ra. —I ra ã jêje reae. Sã amei mo ndiirĩ nyeremo no. “Quiatu rã uvas ishao shao seje”, i que amei nguiirĩ ndiqui je ra. ²⁹ “Nya” i rei que eriirĩ ndiqui ñee ngu je ra. Aquere que ndua si chõ oso uvas ishao shao ra. ³⁰ “Quiatu rã uvas ishao shao seje”, i rei que amei ñee nguiirĩ nduinda je cote ra. “Se quiatu taso, Paba”, i rei que ee ra. Osoã ño ngue ra. ³¹ ¿Ma ngu cheẽ mumbayã ùqui mo nde? i que Jesús ñee judíos rerecua je ra. —Eriqui chõ ngue ngu cheẽ mumbayã ndesẽ, i que ñee ee ra. Jesús que ñee ee ra. —Tacheẽ nyecua jêje. Cuñandu ata ata riqui Dios cheẽ andu turã jësi ã. Impuestos isi isiquia abe riqui Dios cheẽ andu turã jësi ã. Ûqui nda siqui tuchi Dios rese jësi. ³² “Ei jenyê chõ siqui turã Dios je”, i rei que Juan el Bautista jembraaquiatu quiatu ra. Jê nguiatu que echeẽ jemumbate ra. Cuñandu ata ata quiatu que echeẽ isi turã nda. Impuestos isi isiqui a rese. Ûqui ndese mae mose abe que jêya eã eã jëicuã ndese no nda. Jê echeẽ isi turã sacua.

Uva raarõsa icuã icuã nguerecua je

³³ ã abe jeñandu. Sã mbia ibicha mo ndiqui no. Sã eriqui uva i tiquia tiquia no. Sã etarõ no. Uva rique rirurã abe que echao ra. Sucha ibate mo abe que echao ra. Uco raarõ turã ja sacua. “Sembae uvas jësaarõ”, i que emo je cote ra. Ae que oso isho itõte cote ra. ³⁴ Uva quiche mose que ngũimba mo mondo rei umbaerã ndea ra. ³⁵ Uva raarõsa que erimba mbucuasẽ icuã ño nda. Iruã nua ño ngue ra. Echa que ngũimba nongue mo abe mondo rei erea ra. Eraarõsa que aque iquia ra. Enongue que echei chei tuchi mbuqui sita je ra. ³⁶ Eĩ eĩ mbei que eraarõsa quia echa rimba ja je ra. ³⁷ Aquere que echa nguiirĩ mondo erea cote ra. “Ireĩ ireĩ jiri ra seriirĩ si”, i rei que ra. ³⁸ Uva raarõsa mae mose erese que ñee nyue ra. “iCo eriirĩ ndu quia co cote jê! iNandëiquia rei jê! I nda uvas nandembaerã ae tuchi cote”, i que ñee nyue ra. ³⁹ Eraarõsa que eriirĩ isi icuã cote ra. Curuchoi que pe jiri iquia ra. Mano ngue cote ra. ⁴⁰ ¿Mañi nda echa quia eraarõsa je cote re? i que Jesús ñee mbia je ra. ⁴¹ Mbã que ñee ee ra. —Echa ra eraarõsa icuã iquia ja cote. Uva i ra emondo emo je eraarõ sacua cote. Ûqui nguia ra embaerã mee turã turã ee equiche mose, i que mbia ñee Jesús je ra.

⁴² Jesús que ñee mbia je ra. —¿ã embesa ji rese jemae ãte re? Sã emo ndiqui tuchua ao sita je no. Sita mo ngue equirirõ mombo ra. Eicuãte eriqui rei nguã ee. Aquere Dios emundua si erese. “Earonda sacua turambi chõ eriqui re”, i ndua si uchimombo rese. Uchimombo que esirõ si cote ra. Dios chiao chõ ùqui nde. Dios chiao turã tuchi riqui nande je ã,

i ñi embesa ji re. ⁴³ Tacheẽ nyecua jêje. Jenderecua eã nyee ra Dios cote. Ae mbiama nda Dios icua nae, ùquĩ nderecua quia ra Dios cote. ⁴⁴ Ae ra ngoi aque sita arõ nae, ùquĩ nda huẽ. Aque sita ngoi mose emo arõ, ùquĩ nda mano no, i que Jesús ra. —Aque sita rã ndei se, i chõ ngue re.

⁴⁵ Sacerdote rerecua que Jesús cheẽ ñandu ja ejemplos ra. Fariseos abe echandu ja. —Urerĩ ño eriqui nguiã ñee co, i que ndua ndua ra. ⁴⁶ Paama i tuchi que Jesús je ra. Jesús nda eisi icuã nguiã ña. Siquiche quiatu que mbia si ra. —Dios cheẽ na si tuchi chõ Jesús riqui nguiã ñee co, i jate quiatu que mbia ataque quia ra.

22

Jenyu quiaru serese, i raque emo uquiato je

¹ Jesús que ejemplo mo senei mbia je ra. ² —“Jenyu serese”, i raque Dios quia emo emo je co. Sã ererecua mo ndiqui ñee mbia je no. “Jenyu quiaru serese”, i rei que uquiato je ra. Eriirĩ ngüinisi rea ramo mose. ³ Mbae quiche ja mose que ngüimba mo mondo rei mbia mbiirandu ra. Mbua que ngaẽ sereã nea ja chõ erea ra. ⁴ Ngüimba mo ngue emondobe rei erea ra. “Mbae quiche jate que ra. Ticuasú quira tuchi que equishĩ nda. Eriirĩ ngüinisirã isi ramo ndese jêso mae. Jêso quiaru erese”, i rei que erimba mbia je ra. ⁵ Ae je “jenyu” i nae, ùquĩ ngue echeẽ mumba ja chõ nda. “Co aso quia seco co”, i que emo nda. “Co aso quia mbae mo naa naa se co no”, i que emo no nda. ⁶ Mbua que teã teã ja ra. Ererecua rimba iruã nua ño ngue ra. Eiquia chee. ⁷ Ùquĩ mose que ererecua paama i tuchi ra. Soldados que emondo ngüimba iquiasa iquia iquia ra. Echuchua abe rei rei. ⁸ Ererecua que ñee ngüimba je cote ra. “Mbae quiche chi ja raque a. Ae je ‘jenyu’ ae rei nyii nae, sã ùquĩ ngaẽ eã. Eicuãte quia ñene. ⁹ Jêso ñee mbia ja je. Ishonda ja je. ‘Jenyu ja ererecua riirĩ ngüinisi rerequia ramo ndese mae’, jenyu oso quia mbia mbuchesea sea”, i que ererecua ñee nda. ¹⁰ Erimba que nyoĩ mbia mbiirandu randu ja ra. Mbua turã mbiirandu. Mbua icuã abe mbiirandu randu no. Mbua que ngaẽ tuchi cote ra. Tuchua itãyã nyee que ra.

¹¹ Ererecua que ique mbia tubiriã ndese mae cote ra. Emo irao icuãte que chi ee huee ra. Tiru ererecua chimondo emingue eã ñochĩ nguia reaẽ.

¹² Ererecua que ñee ee ra. “Seriirĩ ndiqui ngüinisirã isi a resẽ. ¿Mbaerã ndeirao turã eremingue eã nde?” i que ererecua ñee ee ra. Ñee eãte que ererecua cheẽ mose ra. ¹³ Ererecua que ñee ngüimba je cote ra. “Co jêisi jê. Eo jenyucua. Ei abe jenyucua. Jenosẽ serao mombo itaicuee itondaruqui re. Huee ra nyeseo tuchi. Huee ra ureĩ quiti quiti tuchi”, i que ererecua ñee nda. ¹⁴ “Jenyu serui” i tuchi Dios quia mbia ja je co. Mbua mĩ mĩ ño eisirõ sirõ nguiã co, i que Jesús ñee nda.

¿Impuestos ra uremee ererecua je re? i mbia ñee Jesús je

¹⁵ —Jesús nandembucheẽ icuã na. fnda mbia paama i ee, i que fariseos ñee ñee nyue ra. ¹⁶ Nyebe fariseos uchimbaaquiato mo mondochoĩ nguiã Jesús rea. Herodes chimbaaquiato rese. Jesús mbucheẽ icuã sacua ño ùquĩ nde. Uturã ngue esaã ñooño Jesús je ra. —Jesús, co ereico mbia mbaaquiato quiatu turãte co. Ndeturãte ereico mbia ja je co. Co ereico turãte e mbia mbuchiabiã co. Mbua erembaaquiato quiatu turãte quia Dios icha riĩ co. ¹⁷ Nyebe urechu nguiã ñee ndeje a. ¿Coche mbia mbae isiqui a mee mee Romano nderecua je re? ¿Uremee nda ee re? ¿Uremee eã nda ee re no? i que ñee Jesús je ra. ¹⁸ Jesús

que ũquí icuã icuate ra. Nyebe ñee nguiã ee. —¿Mbaerã jëingo “ĩ nda Jesús ucheẽ nyabi”, i serĩ nde? ¹⁹ Mbae isiquia mo jëteacuquia imbu seje, i que ee ra. Mbia que eteacuquia ee ra. ²⁰ —¿Aba mbae nombre ñi mbae isiqui a rese a re? ¿Aba aqũ aingue abe ñi a re? i que Jesús ee ra. ²¹ —Romano nderecua, i que ñee Jesús je ra. Jesús que ñee ee cote ra. —Romano nderecua mbaerã jemee ño ee. Dios mbaerã jemee ño ee no, i que Jesús ee ra. ²² Mbia que nyuruira jate u Jesús cheẽ andu ra. Nyoĩ ja que erecha cote ra.

Mbia raaque ra quera si, i Jesús

²³ —Mbia raaque ra quera eã mbei, i que mbiamo nguia ñee nda. Saduceos i que ũquí je ra. Ũquí mo ngue nyoĩ ñee Jesús je ra. ²⁴ —Sererecua, ã ngue Moisés mbesa nande je ra: “Emo mano mose eriiriã, sã enongue mano je ninisi rerequia erendaque re. Sã tiirĩ ngõngue raaque riĩ”, i que Moisés embesa nande je ra. ²⁵ Eriquii mo ngue siqui urerese ra. Seis que eribi ra. Eriquii que ngüinirã quereco rei ra. Mano ño ngue tiirĩ ndocoĩ ngüinisi recha ra. Enongue que nguiquii checha quereco rei cote ra. ²⁶ Ae abe que mano ño tiirĩ ndocoĩ no nda. Ũquí seis que ngõngue checha quereco ja rei ra. Mano ja chõ ngue tiirĩ ndocoĩ no nda. ²⁷ Eninisi eru checha que mano nyee chõ cote no nda. ²⁸ Siete rei que eru nyii ra. Mbia raaque quera si ja mose, ¿abate ra equereco cote re? i que saduceos ñee Jesús je ra. —Ma Jesús ñee icuã, i chõ ngue re. ²⁹ Jesús que ñee ee ra. —¿Mbaerã jëingo Dios cheẽ icua eãte ã nde? Jëingo Dios cheẽ abi tuchi ã. Jëingo Dios quirãcuã icua eãte ã. ³⁰ Ae raaque ra Dios mbuquera si nae, ũquí nda ngüinisi quereco eã mbei huee cote. Ũquí nda ngu quereco eã mbei huee cote no. Angeles rã mbei ra mbia riqui huee ibate cote. ³¹ Mbia raaque quera si riĩ ño ngue Dios jembiiirandu rei ra. ¿Embesa ji rese jemaẽ ãte re? ³² ã ño Dios cheẽ embesa ji re: Abraham nderecua chõ aico nguiã se co. Isaac nderecua abe. Jacob rerecua abe no,

i que embesa ji ra. ã ngue mano ndei nyii ra. Ereco siqui bei chõ nguiã namo ã. Mbia raaque rerecua eã ño Dios re. Mbia reco rerecua chõ ae re, i que Jesús ñee mbia je ra. ³³ Mbia tubiriã ngue chi nyuruira tuchi eandu ra. Jesús mbae icua ja mose.

Echesequa tuchi quia Dios rese

³⁴ Jesús cheẽ aquiatu tuchi que ra. Nyebe saduceos cheẽ mbutiba nguiã. Fariseos jirandu mose erese que ñumunua ñee nyue ra. ³⁵ —Se chõ tacheẽ Jesús je. Ma Jesús ñee icuã, i rei que fariseo mo nda. Embesasa que ae ra. ³⁶ —Jesús, Dios cheẽ tubiriãte riqui ã ndesẽ. Mbia echeẽ mumbayã sacuã. ¿Ma Dios cheẽ ndiita tuchi ma nde? i que fariseo ñee Jesús je ra. ³⁷ Jesús que ñee ee ra. —ã ño Dios cheẽ ndiita ã nde: “Echesequa tuchi quia Dios rese. Ndechiã je. Neaĩ je abe. Nendua ndua je abe”. ³⁸ Ũquí ño Dios cheẽ ndiita ũquí nde. Ũquí ño Dios cheẽ ñiinda ũquí nde. ³⁹ ã abe rei ũquí nduinda ã no: “Sã ereico nyesequa ndechiese no. Eĩ ere si chõ nyesequa mbia rese”. ⁴⁰ Moisés chimbasa tuchi chõ ũquí nde. Dios quiato cose ndare chimbasa ja chõ ũquí nde, i que Jesús ra.

¿Aba rucucha Cristo re?

⁴¹ Fariseos chichõ mose ñumunua ngue Jesús ñee ee ra. ⁴² —¿Aba rucucha Cristo re? ¿Aba jenyẽ equia ee re? i que Jesús ñee ee ra. —David nducucha

chõ ñene, i que fariseos ñee nda. ⁴³ Jesús que ñee ee cote ra. —¿Mbaerã David “sererecua” i ee re no? Espíritu turã embucheẽ mose. ⁴⁴ ã ngue David ñee nda:

Dios que ñee Cristo sererecua je ra:

“Ecoi sejii. Nde abe ra ererecua serese.

Ae ndeucuayãte quia nae, ùquĩ je ra ndequirãcuã atecuquia tuchi.

Ndequirãcuã tuchi chee ra ùquĩ si”, i que Dios ñee sererecua je ra, i que David ra. ⁴⁵ David sí chõ “sererecua” i nguiã Cristo je. Cristo David rucucha mose, ¿mbaerã David “sererecua” i ee re? i que Jesús fariseos je ra.

⁴⁶ Ùquĩ ngue ñee aquiatuãte Jesús cheẽ ndibishorõ nda. Aque mose bei que mbia preguntar i eã mbei Jesús je cote ra.

23

Jesús ñee asi fariseos je

¹ Jesús que ñee uchĩmbaaquiату je ra. Mbia tubiriã je abe no. ²—Fariseos rã nda jẽingochĩ jẽ. Embesasa rã abe ra jẽingochĩ jẽ. “Ure quia Moisés chĩmbesa ureicuate nguiã ure ã”, i chõ nguiã. ³ Coche jẽingo nguiã echeẽ mumbayã ndaque. Erã sí quia nda jẽingoã nguiã. Echeẽ turã turãte raque. Siqui turã eãte quiatu nguiã. ⁴ Dios cheẽ embeta mbeta tuchi chĩ nguiã mbia je ã. Mbia echeẽ mumbayã aroneate chee quia ã. Eya eã eãte eriqui mbia rese ã. ⁵ Mbae turã naa mose, mbia mae sacua erese chõ ùquĩ nde. Tiru huiirao ibi quitinda ai mbiicoi tuchi equia ã. Dios cheẽ mbesa ji echucua bei quia uchiba cúa rese ã. Mbia mae sacua erese chõ eriqui nguiã ùquĩ naa naa ã. ⁶ Aba mbia eã tuchi fariseos. “Serendarã turã nguiatu se jẽ”, i tuchi equia mbia chumunua nua mose ã. ⁷ “Sã mbia ererecua i nande je”, i beite equia ã. Ebi tuchi “mbia mbaaquiatusa” i mose ee. ⁸ “Mbia mbaaquiatusa rei se”, jenyechĩ nda jẽ. Se mii ño jembaaquiatusa re. Nyiesenda chõ jẽ nde. ⁹ “Paba” jenyechĩ nda mbia mo je jẽ. Jendu mii ño siqui nguiã ibate pe. ¹⁰ “Ererercuarã se”, jenyechĩ nda eno. Se mii ño jenderecua re. ¹¹ Jemo siqui mingue mose, mbae raã naa mose uataque je, aque quia ra ererercuarã. ¹² Ae ucuasu raã naa nguiã nae, mbia ñetẽ nda Dios saã ño ùquĩ je. Ae siqui mingue quia nae, mbia rercuarã ño nda Dios saã ùquĩ je.

¹³ Aba mbia eã tuchite jẽ, Embesasa. Aba mbia eã tuchite jẽ abe no, Fariseos. Jẽcuasu jẽsaã saãte quia ã. Jẽingo sereãte quia Dios rese ã. Mbia siquise mose Dios rese, jẽingo emingo eãte erese ã no. ¹⁴ Aba mbia eã tuchite jẽ. Eru checha mbae jembutiã tiã ñochĩ nguiã ã. Ùquinde jẽingo chõchĩ ñee oco oco Dios je ã no. “I nda mbia mae nanderese” jenye chõchĩ equia ã. Nyebe ra Dios jembasi tuchi cote. ¹⁵ Aba mbia eã tuchite jẽ, Embesasa. Aba mbia eã tuchite jẽ abe no, Fariseos. Jẽcuasu jẽsaã saãte quia ã. “Jẽingo ure rui” jenye bei chõchĩ equia mbia je ã. Ùquĩ mo siqui mose jendui, eicuã tuchi chõ ùquĩ abe cote re.

¹⁶ Aba mbia eã tuchite jẽ. Sã eresayã mo ndiqui emo ndesayã mbuti echiba rese no. Ùquĩ na ño jẽ nde. Jẽaquiutuã ño mbia mbaaquiату quiatuchi nguiã. “Jurar jenye mose Dios chuchua rii, coche jeñee jembuchebi nguiã”, jenye chõchĩ nguiã mbia je ã. “Jurar jenye mose oro Dios chuchua jenda rii, ùquĩ mose quiatu jeñee jembuchebi aroneate nguiã”, jenye chõchĩ nguiã mbia je ã. ¹⁷ ¿Oro quiatu i tuchi jiri Dios chuchua si re? ¿Mbaerã jẽaquiutuãte riqui re?

18 “Jurar jenyé mose altar rií, coche jeñee jembuchebi nguiã”, jenyé chõchĩ nguia mbia je ã. “Jurar jenyé mose ofrenda altar jenda rií, ùquí mose quiatu jeñee jembuchebi aroneate nguiã”, jenyé chõchĩ nguia mbia je ã. 19 Eresayã na tuchi chõ jëingochĩ nguiã. ¿Mbaerã jëaquiatuãte riqui re? ¿Ofrenda quiatu i tuchi jiri altar si re? 20 Jurar jenyé mose altar rií, earonda abe rií ño jëingo nguiã jurar i ofrenda. 21 Jurar jenyé mose Dios chuchua rií, Dios abe rií ño jëingo nguiã jurar i. Dios abe quia siqui nguiã uchuchua huee. 22 Jurar jenyé mose ibei rií, Dios renda abe rií ño jëingo nguiã jurar i. Dios sí rií abe no.

23 Aba mbia eã tuchite jë, Embesasa. Aba mbia eã tuchite jë abe no, Fariseos. Jëcuasu jësaã saãte quia ã. Décimo jemeé mee ndaque quia Dios je mbae ñetë nii. Comino. Menta. Anís. Dios cheë ndiita quiatu jemumba mumbate nguiã. Dios jëicua rá nyii. Jëingo turã na nyii. Jëya eã na mbia rese nyii. Aquere quiatu mbae ñetë jësaã cote. 24 Sã eresayã mo ndiqui emo ndesayã mbuti echiba rese no. Ûquí na ño jë nde. Mbae ñetë jësaã turã turãte raque quia ã. Dios cheë ndiita quiatu jemumba mumbate nguiã. 25 Aba mbia eã tuchite jë, Embesasa. Aba mbia eã tuchite jë abe no, Fariseos. Jëcuasu jësaã saãte quia ã. Sã emo ndiqui i riru irei irei earonda no. Eimi nguiatu eirei quiiriãte re. Eí ño jë no nde. Jëturã aba reã ño jëaronda no nde. Jeñiangui renda quiatu eicuã icuãte re. Mbae quia jembuquiachã quiachãte nguiã. Mbae abe quia jenyosei icuã icuãte nguiã. 26 Eresayã na tuchi chõ jëingochĩ jë nde, Fariseos. Jeñiangui renda rane nguiatu jëirei. Jëaronda abe ra equishĩ cote.

27 Aba mbia eã tuchite jë, Embesasa. Aba mbia eã tuchite jë abe no, Fariseos. Jëcuasu jësaã saãte quia ã. Mbia raaque tãsa rá ño jëingo nguiã. Eati ji turãte raque. Eimi ye quiatu mbia raaque quiangue chi nguiã hue. Eroo cuí abe no. 28 Eí si chõ jë nde. Jëaronda turãte aba reã ndiqui raque mbia je. Jeñiangui rend a quiatu eicuãte re.

29 Aba mbia eã tuchite jë, Embesasa. Aba mbia eã tuchite jë abe no, Fariseos. Jëcuasu jësaã saãte quia ã. Ae mbia turã mano cose nae, ùquí tãsa jemiitã turã mbeite raque quia ã. Dios cheë mbuchecuasa tãsa abe no. 30 “Cose ureico mose, ñ nda ureicuã eãte rei Dios quiato je. Ureramei na eã”, jenyé raque equia ã. 31 “Mbia iquia iquiasa riirĩ ño ure re”, jenyete equia ùquí. Jendu rá si tuchi jë. Mbia i quiasa. 32 Jenamei icuã na si chõ jëingo no. 33 Mbei tãsie rá tuchi chõ jë nde. Eí jenyé bei oso quia aque ngasë nyee tata cuasu. 34 Nyebe ra Dios cheë mbuchecuasa amondo mondo quia jëje. Mbia mbaaquiatusa ra amondo jëje. Mbia aracua abe no. Jë nda sechimondo emo emo jëiquia. Emo emo nda jëiruã nua mbia chumunuásaa no. Jëico ico ra equia erese eiquia chee. 35 Ae Dios quiato iquia iquia quia cose nae, ùquí nii nda Dios jembasi cote. Sã mbia Abel iquia cose no. Sã mbia Zacarías abe iquia Dios chuchua jii no. Berequías riirĩ ndei aque. Sã mbia Dios quiato iquia iquia bei cose no. 36 Ûquí ja rií nda Dios jembasi cote. Acheë nyecua quia jëje a.

Jesús ia eã tuchi Jerusalén jenda rese

37 Tacheë na jëje, Jerusalén jenda. Seya eãte aicochĩ jendese co. Hue jëingo mbia iquia iquia beite hue. Dios cheë mbuchecuasa iquia iquia. Dios chimondo abe iquia iquia no. Sã nguira riqui nguiire reaquiato mondo ujeoqui re no. “Eí tae jendeaquiato”, ae beite rei nguiã jëje co. Secheë jëisi sereã mbei chõchĩ nguia ã. 38 ¡Aico jendecha a cote jël! 39 Jemae mae eã nda

serese cote. Sechube mose ibate si, aque ramo mose ra jemae serese cote. “¡Co chi Dios rucucha ru quia co cote jê!” i ra mbia seisi turã aque mose cote, i que Jesús ñee nda.

24

Mbia ra Dios chuchua mbucoi ja, i Jesús

¹ Jesús que oso usê Dios chuchua si cote ra. Ecuata mose que echimbaaquiato ñee ee ra. —Sã Dios chuchua turã tuchite jê, i que ñee ee ra. ² Jesús que ñee ee ra. —Tacheê nyecua rã jêje. Ae rese jêingo mae ã nae, ùquĩ nda mbia mbucoi ja cote. Sita mo nda chi eã nyichuarõ Dios chuchua cote. Mbia ra Dios chuchua mbucoi ja tuchi cote, i que Jesús ñee nda.

Mbae ua ja nonde chõ ã nde

³ Jesús que chĩ ngoi huee ibi ibátee mo nda. Monte de los Olivos i que hue je ra. Echimbaaquiato que ngasê ñee eísaa ra. —¿Manosete ra ùquĩ nde? ¿Mbae ra urembiirandu nderese ndechu serĩ mose re? ¿Mbae ra urembiirandu mbae ua ja serĩ mose re no? i que echimbaaquiato ñee Jesús je ra. ⁴ Jesús que ñee ee ra. —Jêtesa jiri quia jê. Mbia mo nda jembiirĩ irichĩ ñee jêje jê. ⁵ “Cristo chõ se re”, i ra mbia ñee ata atate jêje. Ùquĩ ñee nda jeñanduchĩ jê. Ùquĩ nda mbia mbĩrĩ irĩ jate. Ñee ñooño je chõ ùquĩ nde. ⁶ Mbia ra guerras saã saã tuchi. Mbia ra ñee ñee tuchi quia nyĩquia iquia je riĩ. Ùquĩ mose ra jësiquichechĩ jê. Ùquĩ ja rane nda nyecua raque. Aque mose ra mbae ja ua eã ná. ⁷ Mbia ra guerras saã tuchi chee. Nyĩquia iquia tuchi rae. Mbia riãcuã tuchi ra aque mose no. Emo ñooñoa tuchi rã mbiã rasi. Mangue chooñoa tuchi ra ibi nyere nyere. ⁸ Jembasi ramo mose chõ nda ùquĩ nde. Aquere ra jembasi tuchi cote.

⁹ Mbia icuã icuã tuchi r a jêje serĩ. Nguerecua je ra mbia jenderao rao tuchi. Jëiquia chee rae. Mbia mangue chooñoa jenda ra jëucua yã tuchi serĩ. ¹⁰ Ae siqui quia serui nae, ùquĩ tubiriã nda hui sesi ùquĩ mose cote. Ùquĩ nda nyiucua yã. Ùquĩ nda nguerecua mbuqueta queta tuchi ngõngue riĩ. ¹¹ “Dios cheê mbuchecua sa chõ se re”, i ra mbia ñee ata atate jêje. Ùquĩ nda mbia mbĩrĩ irĩ tuchi. ¹² Mbia icuã icuã tuchi ra cote. Aba cheê mumba mumba beite ra cote. Mbia ra nyesequa eã tuchi nyiese cote. ¹³ Ae ra siqui bei serese, ùquĩ nda Dios mingo bei. ¹⁴ Sequiato r a Dios cheê turã senei senei ná mbia ja je nyii. Mangue chooñoã jenda ja je. Aquere ra mbae ua ja cote.

¹⁵ Dios cheê mbuchecua sa rei Daniel. Ae que embesa Mbae Mbutiãsa Icuã nĩ nda. “Dios rendaque re taico se quiatu”, i ra equia huee. (Ae ra mae nguia sechimbesa rese nae, sã ùquĩ eicua.) ¹⁶ Jemae mose Mbae Mbutiãsa Icuã ndese, jeña esi. Ae siqui quia Judéaa, sã ùquĩ uchã jei choi ibi ibátee mo. ¹⁷ Ae ra siqui tuchia quite rese, sã ùquĩ iqueã nyoĩ uchuchua uquichi mose. Sã echoi chõ uchã hue si bei, umbae rirõ ndocoĩ. ¹⁸ Ae ra siqui úcoo, sã ùquĩ nyebiã ngaê huĩrao rea. Sã hue si bei chõ echoi uchã. ¹⁹ Aba mbia eã tuchi ra emo áquẽ ndiru rerequia mose aque mose. Nguiĩrĩ mbuquiambu je abe no. ²⁰ “Nyii seĩ mose eã urechã” jenyê Dios je. “Sábado mose eã abe urechã”, jenyê abe Dios je no. ²¹ Mbia ra mbae rasi saã tuchi aque mose. Mbae rasi que mbia saã eã jiri nyii ra. Aque ramo mose ra mbae rasi raã tuchi cote. Mbae ua bei sacua ño ùquĩ nde. ²² Ae rasi ra mbia saã tuchi nae, ùquĩ nda Dios mbujua jiri uquiato riĩ. I nda emo ñĩmbirãcuã eã tuchi rei ùquĩ ndasi je. ²³ “A Cristo riqui a jê” i mose emo jêje, “nyia” jenyechĩ nda ùquĩ ñee mose jê. “Hue

Cristo riqi hue jē” i mose emo jēje, “nyia” jenyechĩ nda eno jē. ²⁴ “Cristo chō se re”, ichōiño nda mbia ñee ata atate jēje. “Dios cheē mbuchecuasa chō se re”, ichōiño nda mbia ñee ata atate jēje no. Mbia mae sayā nda esaā saā tuchi mbia mbĩrĩ irĩ sacuā. Ūquĩ Dios quiato abe chee mbĩrĩ irĩ arōte. ²⁵ Ūquĩ nonde chō aico nguiā jembĩirandu randu co. ²⁶ “Hue Cristo riqi turuquia hue”, ichōiño nda mbia jēje serĩ. “A Cristo riqi tuchia a”, ichōiño nda emo jēje serĩ no. Ūquĩ mose ra “nyia” jenyechĩ jē. ²⁷ Sā ama ndiqui pirirā i ibei resae ja no, eĩ nda sechu mose. Mbia ra mae ja serese. ²⁸ Sā urubu riqi mae ja mbae raaque rese no. Eĩ si ra secuasa mae ja sechu rese no.

Dios riirĩ nda tube ibate sĩ

²⁹ Mbia ūquĩ ndasi raā ja mose r a tenda checuayā mbei cote. Nyasi abe no. Nyasitata ra ngoi ngoi. Ibei jenda abe ra quiata quiata chee cote no. ³⁰ Aque mose ra achu ibei rese. Senininya tuchi ra sechu mose. Sequirācuā tuchi ra sechu mose no. Mbia ra mae ja tuchi sechu rese mangue chooñoa jenda ja. Mbia ia eā tuchi ra nyeseo mae mose serese. ³¹ Angeles serimba ra amondo corneta mbucheē sacuā. Ūquĩ nda mbia sechiisirō munua nua ja seje cote. Ishonda ja. Mangue chooñoa jenda ja.

³² Sā higuera riqi no. Sā ira mo ndiqui no. Ero quira usē j a mose, “iraro itō ndacu ra cote”, i chō mbia nguiā aque mose. ³³ Eĩ sí ra mbae ua ja nonde. Ae riĩ aico ñee jēje nae, ūquĩ ndese jemaē mose, “mbae ra ua ja cote” jenze ra cote. ³⁴ Tacheē nyecua jēje. Ā mbia riqi ngata ibi ā nae, ūquĩ emo emo nda manoā mbae ua ja nonde. ³⁵ Ibei ra ua. Ibi abe ra ua no. Secheē nguia ra ua eā mbei.

³⁶ Manosete chō nda mbae ua ja. Aico eicuayāte co. Mbia mo abe eicuayāte quia ā no. Angeles abe eicuayāte quia ā no. Paba mĩ ño eicua nguiā co. ³⁷ Sā Noé mosenda mbia siqui sereāte Dios rese cose no. Eĩ si ra mbia siqui sereā Dios rese sechu nonde no. ³⁸ Sā Noé mosenda mbia quiaru chooño no. Ndua rocoĩ Dios rese. Ngūinisirā ngue equereco chooño ndua rocoĩ Dios rese no nda. Noé que ique chee arca ye ra. Amandi cuasu nonde. ³⁹ Ama ngue uchi u quia mbia iquia ja nonde cote ra. Mbia mbua tuchi que ra. Eĩ ae ra u mbia mbua tuchi sechu mose. ⁴⁰ Sechu mose ra mbia nyeremo siqui ūco. Co mĩ nda arao. Enongue ra siquichō. ⁴¹ Cuña nyeremo nd a chi raque mbua tocho no. Co mĩ nda arao. Enongue ra siquichō. ⁴² Jētesa bei quiatu quia serese. Ae mose ra achu, aque tenda rese jēiranuate riqi ā. ⁴³ Mbaecha mo jirandu mose mbae mbuquiachāsa rese, “co isa ra eru” i mose, ūquĩ mose nda uqueā nde chaē. f nda mbae mbuquiachāsa mbae sirō eā ndei. ⁴⁴ Jēingoquiato bei quiatu quia seraarō arō. Jendua eā mose serese ra achu jembuate.

Erimba echeē mumbayā mose, eya tuchi rae

⁴⁵ Dios rimba aba cheē mumbayā je aico ñee a. Dios rimba aquiato je aico ñee a. Sā ererecua mo ñee ngūimba turā je no. “Sembae esaarō turā ja quia secutiā. Serimba ataque embuquiari quiaru turā secutiā”, i que ererecua ee ra. ⁴⁶ Erimba echeē mumbayā mose, ererecua ia tuchi ra eru mose. Erimba abe ra eya tuchi no. ⁴⁷ Ererecua ra ngūimba mĩ umbae raarō mbei sacuā cote. ⁴⁸ Sā erimba ndua ndua uchiangui re no. “Sererecua ra tu jei āte” i ndua ndua. ⁴⁹ Hue ñee icuā icuā uataque je hue cote. Iruā nua cote. Quiaru chooño cote. Mbae mbei chooño abe cote. Quiacua quiacua mbia icuā ndese cote. ⁵⁰ Sā ererecua ruchĩ nguia ngūimba mbuate aque mose cote jē. ⁵¹ Ererecua ra eiruā nua tuchi. Mombo rae. Mbae rasi ra esaā tuchi. Ae ucuasu saā saā

nguia nae, ũquĩ ndese ra mbae rasi raã tuchi cote. Nyeseo seo tuchi ra equia. Ureĩ nda equiti quti tuchi.

25

Nyucuaaque icoquiату je

¹ Nyucuaaque icoquiату je rã si rei Dios rimba. Sã nyucuaaque diez nyoĩ quia emo ngũinisi nderequia ramo ndese maenno. Lamparina nendi que ecuruchoĩ ja quia ra. ² Cinco que icoquiату je ra. Cinco que icoquiатуã je no nda. ³ Ae icoquiатуã nae, ũquĩ ngue mbae quira curuchoĩ eã umbae lamparina mombisê sacuaã nda. ⁴ Ae icoquiату nae, ũquĩ ngue mbae quira curuchoĩ botella ye ra. Lamparina ye abe. ⁵ Ae ra ngũinisi isi reĩ nguia ee, aqwe que itôte ee ra. Nyucuaaque reesi esi chee que ra. Uque uque ja chee que ra. ⁶ Itondiite mose que to i andu cote ra. “Co erurã ndu quia co cote jê. Jêso mae erese cote”, i que mbia tasê tasê ee ra. ⁷ Nyucuaaque que nyuruã ja cote ra. “Nandembae lamparina nandemombisê mbisê ja”, i rei que ra. ⁸ Ae icoquiатуã nae, ũquĩ ngue ñee ndei icoquiату je ra. “Urembae uque uquete. Mbae quira ñetê jemee mee na ure je”, i rei que uataque je ra. ⁹ “Ateê. Nande ja chayãte ra resê. Emo jêisi chõ oso icua”, i que icoquiату je ñee ee ra. ¹⁰ Nyoĩ rei que equia eisi cote ra. Ecutiã ngue erurã ndu cote ra. Nyucuaaque icoquiату je que nyoĩ ique erese ra. Ngũinisirã isi ramo ndese mae. Quiaru abe que echoĩ erese ra. Eiquesa que ematã cote ra. ¹¹ Icoquiатуã je abe que ngaẽ nyee ra. I que eiquesa matã ji mi ee ra. “Embuquiata rã ure je”, i rei que ñee eru je ra. ¹² Eru que ñee ee ra. “Tei. Jaẽicuayã tuchite se”, i que eru ñee ee ra, i que Jesús ñee mbia je ra. ¹³ —Jẽingoquiату bei quia jê. Ae mose ra achu, ũquĩ jẽicuayãte quia ã.

Ererecu a mbae isiquia mbuchao chao ngũimba je

¹⁴ Sã ererecu mo mbae isiquia mee mee ngũimba je no. Eĩ si chõ Dios nguiã mbae mee mee ngũimba je. Ererecu oso serĩ mose que umbae mbae isiquia mee mee ngũimba je ra. Embaata ata sacuaã ño ngue emee nguiã ee. ¹⁵ Cinco mil que emee emo je ra. Dos mil enongue je no. Un mil que enongue je no nda. “Jenya chõ tamee mee jêje jê”, i que ñee ee ra. Secha que oso isho cote ra. ¹⁶ Ae je ererecu cinco mil mondo nae, aqwe que negocio saã saã mbae isiquia je ra. Mbae isiquia que embaata tuchi ra. ¹⁷ Ae je ererecu dos mil mondo nae, aqwe abe que negocio saã saã mbae isiquia je ra. Mbae isiquia que embaata tuchi no nda. ¹⁸ Ae je ererecu un mil mondo nae, aqwe que ibi sibicoĩ mbae isiquia rerecoquiату sacuaã nda. ¹⁹ Emo mose tuchi que ererecu ru cote ra. Ñee ngue ngũimba je cote ra. “Jenyu sembiirandu sembae mbae isiquia rese cote”, i que ñee ee ra. ²⁰ Ae je cinco mil mondo nae, aqwe rane ngue tu ñee nguerecu je ra. “Cinco mil que ereme ndei seje nae, ũquĩ ngue ambaata ra. Cinco mil que aisibe ra”, i que emee ja nguerecu je ra. ²¹ Ererecu que ñee ee ra. “Coche ñene. Nde quiarei serimba turã tuchi. Mbae ñetê ngue eresaã turãte nde ra. Nyebe ra mbae tubiriã ereteaquiату seje cote. Ndeya bei tuchi ra ereico serese cote”, i que ererecu ñee ee ra. ²² Ae je ererecu dos mil mondo nae, aqwe que tu ñee nguerecu je cote ra. “Dos mil que ereme ndei seje nae, ũquĩ ngue ambaata ra. Dos mil que aisibe ra”, i que emee ja nguerecu je ra. ²³ Ererecu que ñee ee ra. “Coche ñene. Nde quiarei serimba turã tuchi. Mbae ñetê ngue eresaã turãte nde ra. Nyebe ra mbae tubiriã ereteaquiату seje cote. Ndeya bei tuchi ra ereico serese cote”, i que ererecu ñee ee ra. ²⁴ Ae je ererecu un mil mondo nae, aqwe que tu

rei ñee nguerecua je cote ra. “Nde que ere queteãte quiatu nguiã mbae rese. Ndechitiquia eã abe ereishao shaote quia co. ²⁵ Nyebe asiquiche tuchi nguiã mbae isiquia mee mose seje. Nyebe achati nguiã ibi je. Co é co resê”, i que ñee nguerecua je ra. ²⁶ Ererecua que ñee ee ra. “Aba rimba biã tuchi quiarei nde. Ndetomei tuchi chõ eriqui re. Sequeteã mose mbae rese ndeje, ¿mbaerã secheê eremumba re? ²⁷ Sembae mbae isiquia eremonoã ñochi banco. I nda eata jiri sechu mose cote re chã”, i que ererecua ñee asite ee ra. ²⁸ Ererecua que ñee mbi a hue jenda je cote ra. “Mbae isiquia jêsirõ na esi un mil. Ae diez mil quereco nae, aque je jemondo. ²⁹ Ae embae tubiriãte nae, aque je mbae tamondobe. Ae embae ãte nae, embae ñetẽ tasirõ ja esi. ³⁰ Co que serimba icuã tuchi ra. Jemombo itondaruqui re. Mbae rasi ra esaã tuchi huee. Huee ra nyeseo tuchi. Urei nda equiti quiti tuchi”, i que ererecua ñee nda.

Jesús ra mbia emo emo mingo icúe umbaerã

³¹ Sechu mose íbii mbia rerecuarã, ángeles sembae ra semama tuchi aque mose. Serenda nininya tuchi ra aque mose. ³² Mbia manguue choõnoa jenda ja ra chi ñumunua huee aque mose. Mbia emo emo nda achono icúe sembaerã aque mose. Sã oveja raarõsa riqui ovejas no icúe chivos si no. ³³ Uquiato cuti ra ovejas no. Uquiato cutiã nda chivos no no. ³⁴ Eĩ ae ra se mbia rerecua tuchi mose. Acheê nda mbia sequiatio cutinda je. “Jenyu serese. Jenderecua turã tuchi ra aico jêje. Paba turãte riqui jêje co. Paba que jêirabo nyii mbae ao nonde ra. Jêingo sacuã serese. ³⁵ Seriãcuã mose que mbae jemee seje ra. Seisei mose que sembiu ra. Sechuchua eã mose que seisi turã no nda. ³⁶ Seirao eã mose que tiru jemee seje ra. Serasi mose que jêso mae serese ra. Seico mose cárcel que jêso mae serese no nda”, ae ra ñee sequiatio cutinda je. ³⁷ Sequiatio cutinda ra ñee seje cote. “¿Manose mbae uremee ndeje nderiãcuã mose re? ¿Manose ureso nembiu ndeisei mose re? ³⁸ ¿Manose ure ndeisi turã ndechuchua eã mose re? ¿Manose tiru uremee ndeje ndeirao eã mose re? ³⁹ ¿Manose ureso mae nderese nderasi mose re? ¿Manose ureso mae nderese ndeico mose cárcel re?” i tuchi ra ñee seje. ⁴⁰ Aque mose ra acheê ee. “Tacheê nyecua jêje. Senongue mo mbaech a reã ndaque. Ae turã jêsaã senongue mo je nae, seje eraã naanguia chõ ùqui nde”, ae ra ñee ee. ⁴¹ Acheê nda sequiatio cutiã quitinda je cote. “Jêso sesí. Mbae turã nda jêisiã seo jenda. Jêso tata cuásuu. Ae Dios chiao tata, diablo mbasi sacuã. Diablo rimb a abe mbasi sacuã. Ùqui tata ra uqueã mbei. ⁴² Seriãcuã mose que mbae mo jemee eãte seje ra. Seisei mose que sembiu eãte no nda. ⁴³ Sechuchua eã mose que seisi turã eã nda. Seirao eã mose que tiru jemee eãte seje ra. Serasi mose que jêso eãte mae serese ra. Seico mose cárcel que jêso eãte mae serese no nda”, ae ra sequiatio cutiã quitinda je. ⁴⁴ Sequiatio cutiã quitinda ra ñee seje cote. “¿Manose mbae mo uremee eã ndeje nderiãcuã mose re? Ndeisei mose abe no. Ndechuchua eã mose abe no. Ndeirao eã mose abe no. ¿Manose uresoã nderea nderasi mose re? ¿Manose uresoã nderea ndereco mose cárcel nde no?” i ra sequiatio cutiã ñee seje. ⁴⁵ Acheê nda ee. “Mbae turã jêsaã eã mose emo je, seje eraã eã naanguia chõ ùqui nde”, ae ra sequiatio cutiã quitinda je. ⁴⁶ Ùqui nda nyoi ja tata cuasu cote. Huee ra mbae rasi raã mbei tuchi cote. Sequiatio cutinda quia ra siqui turã mbei ibate cote, i que Jesús ñee nda.

¹ Aquere que Jesús ñee uchimbaaquiato je cote ra. ² —Dos días mose ra fiesta de la pascua cote. Aque mose ra mbia icuã semee ererecua je seiquia sacuã, i que Jesús ñee nda. ³ Sacerdote rerecua que ñumunua ja cote ra. Amei ja rese. Embesasa rese abe no. Ūquiŋgue ñumunua ja u Caifás itaicuee ra. Caifás rei sacerdote rerecua tuchi. ⁴ Caifás itaicuee que ūquiŋ nyi ñee ñee Jesús rñi nda. —Jesús nandembñiri iriŋ jē. Eisi sacuã. Etarō sacuã. Ei quia sacuã cote, i que u ñee ñee nyue ra. ⁵ —Fiesta mose eã ño nandeisi jē. Mbia ra paama i tuchi nande je, i que u ñee ñee nyue ra.

Cuñã mo aba mbusimbusa turã ichusē Jesús ãquĩ ndese

⁶ Jesús que siqui Simón Leproso chuchúaa ra. Betania, i que hue je ra. ⁷ Cuñã mo ngue tu erea hue ra. Aba mbusimbusa mo ngue equeru Jesús je ra. Embisē tuchi que equeru ra. Mbae isiquia mumbasa tuchi que ūquiŋ nda. Ichusē ja que Jesús ãquĩ ndese equiaru mose ra. ⁸ Echimbaaquiato que chi ja mae erese ra. Paama i que cuñã je ra. ⁹ —¿Mbaerã eichusē ñooño nde? Mbae isiquia ribishorō ño nda aba emondo re. Mbaecha reã je emee mee sacuã, i que echimbaaquiato ñee nyue ra. ¹⁰ Jesús que echeē ñandu ra. Ñee ngue ee ra. —¿Mbaerã jēingo ñee ūquiŋ nde? Sã cuñã ae riqui ae. Ae esaã seje nae, eturãte seje ūquiŋ. ¹¹ Mbaecha reã nguia ra chi arete íbii a. Se quia nda aico bei eã nguiaŋ jendese aa. ¹² Seati nonde chō ngue cuñã aba mbusimbusa ichusē nguiaŋ serese. ¹³ Tacheē nyecua jēje. Mbia Dios cheē turã nenei nenei mose mangue chooñoa jenda ja je, cuñã nyisaã abe ra esenei senei. Mbia ndua turã ja sacuã echisaã abe rese, i que Jesús ñee uchimbaaquiato je ra.

Jesús tamee jēje, i Judas mbia icuã je

¹⁴ Judas Iscariote, i rei que Jesús chimbaaquiato mo je ra. Aque que oso ñee sacerdote rerecua je ra. ¹⁵ —Jesús tamee jēje. ¿Mbae ra jemee seje eribishorō nde? i que Judas ñee sacerdote rerecua je ra. Sacerdote rerecua que mbae isiquia ata mee ee ra. Treinta que ra. ¹⁶ —Mbia eãsa quiato Jesús tamee jēje, i que Judas ñee ee ra.

Jesús quiaru uchimbaaquiato rese

¹⁷ Fiesta que tu cote ra. Aque fiesta mose bei que mbia riqui oveja iquia iquia querabe ra. Mbichae mbuchimatã iriã ngue eu eu quia aque mose querabe no nda. Fiesta nonde que echimbaaquiato ñee Jesús je ra. —¿Mangue ra oveja urembuchi mangue ndechiurã nde? i que ñee Jesús je ra. ¹⁸ Jesús que ñee ee ra. —Jēso sucha cuasu. Jeñee aque je. “Jesús que urembu ñee ndeje ra. ‘Ndechuchua oveja tau sequiarto rese semana nonde’, i que Jesús ucheē mbu ndeje ra”, jenyee aque je, i que Jesús ñee nda. ¹⁹ Echimbaaquiato que nyoŋ erea Jesús cheē nguire ra. Oveja que embuchi huee cote ra.

²⁰ Itondaru ramo mose que Jesús chi quiaru uchimbaaquiato rese huee cote ra. ²¹ Quiaru mose que Jesús ñee ee cote ra. —Tacheē nyecua jēje. Jemo nda semondo mbia icuã je, i que ñee uchimbaaquiato je ra. ²² Echimbaaquiato ia eã tuchi que echeē mose ra. —¿Se ra aremondo ee re? i ja jate que ñee Jesús je ra. ²³ Jesús que ñee ee ra. —Ae chí quiaru serese aque plato ye sí a nae, aque tuchi ra semondo mbia icuã je. ²⁴ Dios cheē ndui sí tuchi ra amano ndaque. Ae ra semee mbia icuã je, aque ra mbae rasi saã tuchi quia. Aba mbia eã tuchi ra aque. “Taĩ sembuchecua jirichĩ nguia curĩ”, i chee ra aque, i que Jesús ra. ²⁵ —¿Se ra aremondo mbia icuã je re? i que Judas

ñee Jesús je ra. Jesús rĩĩ ñeende mbia icuã je nyii. “Ae” i que Jesús echeẽ mose ra.

²⁶ Quiaru que u ra. Jesús que mbichae sirõ nda. Gracias i que Dios je ra. Siquio que mbuchao chao ee cote ra. —Ã mbichae jẽu. Serete chõ ã nde, i que Jesús ñee ee ra. ²⁷ Vno mbeisa que esirõ cote no nda. Gracias i que Dios je ra. Mondo que uchĩmbaa quiatu oo cote ra. —Jembeĩ mbei ja. ²⁸ Seruqui chõ ã nde. Mbĩa icuã mbutiã sacuã ño seruqui re. Dios cheẽ yasu rui si chõ seruqui riqui nguiã mbia icuã mbutiã co. ²⁹ Tacheẽ nyecua tuchi jẽje. Vno mo nda ambei eã mbei cote. Paba mbia rerecua tuchi mose, aque mose ramo nguia nda ambei nguiã jendese cote, i que Jesús ñee nda.

Jesús aicuayãte resẽ, ichõĩño nda Pedro serĩ, i Jesús

³⁰ Irasei rasei que cote ra. Nyoi que Monte de los Olivos ra. ³¹ Jesús que ñee uchĩmbaaquiato je ra. —Jẽireĩ ireĩte ra serĩ co isa. Jeĩmboseĩ mboseĩ nda oso serecha co isa. Sã embesa ji riqui ñee no: “Dios ra oveja raarõsa iquia. Oveja ra ñĩmboseĩ nyoi cote”, sã embesa ji riqui i no. ³² Seraaque quera sire ra aso se rane jendaarõ Galilea, i que Jesús ra. ³³ Pedro que ñee ee ra. —Seataque ra ireĩ ireĩte raque ndesi. Se quia ra aireĩ ireiã mbei ndesi, i rei que Pedro ñee ee ra. ³⁴ Jesús que ñee ee ra. —Tacheẽ nyecua ndeje, Pedro. Ngaira cheẽ nonde ra erecheẽ ñooño tres veces serĩ namo, Pedro. “Jesús aicuayãte resẽ”, ere chooño ño nda serĩ, i que Jesús ñee ee ra. ³⁵ Pedro que ñee ee ra. —Mbĩa sei quia arõte raque nderĩ, acheẽ ñooño eã nda nderĩ, i rei que Pedro ra. Eĩ ja que ñee nda.

Jesús ñee ngu je

³⁶ Jesús que oso Getsemani cote ra. Uchĩmbaaquiato rese. —Jengoi rã u aa. Taso rã ñee Paba je pe jiri se, i que Jesús ee ra. ³⁷ Pe quiti jiri que Pedro rerao ra. Zebedeo riĩ nyeremo ndese. Eya eã ndasi tuchi que tu ee aque mose ra. ³⁸ Ñee ngue ũquĩ je ra. —Seya eã ndasi tuchi aico co. Seya eã ndasi ra sei quia chee. Jenguchõ na jẽ aa. Jẽtesa tesa bei u aa, i que Jesús ñee ee ra. ³⁹ Jesús que oso pe quiti jiri cot e ra. Nyibi que u ngũiã ndese ñee Dios je ra. —Paba, ũquĩ ndasi asaã sereãte raque quia co. Ae sebite riqui nae, ũquĩ ndese semingo eã. Ae ndebite riqui nae, ũquĩ ndese quiatu semingo, i que Jesús ñee Dios je ra. ⁴⁰ Nyebi que u uchĩmbaaquiato je cote ra. I que eu uque ja ee cote ra. Ñee ngue Pedro je ra. —Jẽingo areã ñochĩ tesa serese se ñee mose Dios je. ⁴¹ Jẽtesa tesa u. Jengue eã u ñee Dios je. Mbae icuã tã i eã sacuã jẽje. Jẽingo serete raque serese. Mbae icuã nguiato jembuti mbutite nguiã, i que Jesús ee ra. ⁴² Osobe que ñee Dios je pe jiri cote ra. —Paba, nde ñee mose seje, “mbae rasi ra eresaã” nde i mose seje, asaã nda se, i que ñee Dios je ra. ⁴³ Nyebi que u uchĩmbaaquiato je cote ra. I sí que u uque ee no nda. Eresa quiatu ngue eshiu shiute nguiã. ⁴⁴ Jesús que osobe erecha ñee Dios je ra. Tres veces que aque cote ra. Hue rĩ si que ñee Dios je ra. ⁴⁵ Uchĩmbaaquiato jii que esi ñee ee cote ra. —Jengue cote. Jenguenea jẽucua cote. Semondo ra mbĩa icuã je cote. Sei quia sacuã. ⁴⁶ Jẽhuã cote. Nyao cote. Ae ra semee mbĩa icuã je, co eru quia semee sacuã co cote, i que Jesús uchĩmbaaquiato je ra.

Mbĩa icuã Jesús isi suruchoi

⁴⁷ Jesús cheẽ mosebe tuchi que Judas ru erea ra. Jesús chĩmbaaquiato rei que ae ra. Aque rese que mbĩa cuaẽ tuchi quia ra. Tiquise abe que ecurucuaẽ nguia ra. Ira jua abe no. Sacerdote rerecua chõ ũquĩ mbucuaẽ nguia reaẽ.

Amei abe. ⁴⁸ Judas ñee nyecuayã nguia tu quia ñiqui je nyii reaẽ. —Ae ritii ra asiite, aque chõ ñene. Aque jëisi serao, i quia equia ee nyii reaẽ. ⁴⁹ Jesús rüichã ngue esi saluda i ee cote ra. Jesús ritii que esiite ee cote ra. ⁵⁰ —¿Mbaerã erechu serea re? i que Jesús ee ra. Mbia que ngaẽ Jesús isi ecua cote ra. ⁵¹ Ñiqui mose que Jesús rimba mo uchuuru sirõ tiquise ra. Sacerdote rerecua rimba rese que tiquise uru ra. Eisa que echisia ra. ⁵² Jesús que ñee ee ra. —Ndechuuru emingue chõ eriru ye. Nde emo nyiisha mose tiquise je, nde abe ra emo ndeisha. ⁵³ ¿Ndeiranuate ángeles rese re? Se ñee mose Paba je, ángeles tubiriã tuchi nda embu seje re chaẽ. Sereaquiato sacua. ⁵⁴ “Ángeles embu rã sereaquiato”, ae eã nda Paba je. Ñiqui mose ra embesa ji ique eã cote. Sã embesa ji riqui ñee no: “Mbae rasi ra esaã tuchi” i no, i que Jesús ñee Pedro je ra. ⁵⁵ Jesús que ñee mbia ja je cote ra. —¿Mbaerã jenyu quia tiquise rurucuaẽ serea co re? Ira jua abe no. Mbae mbuquiachãsa rea rocoi jenyuchi nguia serea co. Tenda que amumba mumba beite rei quia jendese Dios chuchua resẽ. Mbia que ambaaquiato quiato bei rei quia huee resẽ. ¿Mbaerã seisiã nyucua aque mose re? ⁵⁶ Embesa ji ique sacua ño jëicua icua ndiqui nguia seje ã, i que Jesús ra. Echimbaaquiato que nyoi ja chee uchã Jesús recha ra.

Jesús mbia curuchoi mbia rerecua je

⁵⁷ Ae Jesús isi nae, ñiqui ngue ecuruchoi sacerdote rerecua je ra. Huee que embesasa chi ja ñumunua nda. Amei ererecua ja abe. ⁵⁸ Pedro que embuchurucha rucha oso quia erui ra. Ngasẽ nyee que sacerdote rerecua itaicuee ra. Huee que ngoi sacerdote rimba mo ndese ra. —Mañi nda mbia Jesús je reae, i que huñi ngoi eraarõ arõ nda. ⁵⁹ Sacerdote rerecua que chi ja huee ra. Amei mbia rerecua ja abe no. Mbia rerecua ja tuchi. —Jesús nandequia, i rei que ñee ñee nyue ra. —¿Mbae i ra aba mbia je Jesús rüicharã nde? i rei que u ñee ñee nyue ra. ⁶⁰ Emo emo ngue ngaẽ ndei ñee icua icua Jesús rüi nda. Ñiquinde que mbia nyeremo ngaẽ ñee ñooño Jesús rüi nda. ⁶¹ —Jesús que ñee ñooño Dios chuchua rüi nda. “Dios chuchua ra ambucoi. Tres días mose ra achaobe”, i que urechandu Jesús cheẽ nda, i que ñiqui ñee ñooño Jesús rüi nda. ⁶² Sacerdote rerecua que juã ñee Jesús je ra. —¿Echeẽ nda eresibishorõ eã mbei re? ¿Mbae i equia nderüi nde? i que Jesús je ra. ⁶³ Jesús que ñee eã mbei echeẽ mose ra. Sacerdote rerecua que ñeembe ee ra. —¿Dios rucucha nde re? ¿Cristo nde re? Díosaa echeẽ ure je, i que sacerdote rerecua ñee ee ra. ⁶⁴ Jesús que ñee ee ra. —Ae. Dios rucucha chõ se re. Tacheẽ nyecua jëje. Jemae nda serese se coi mose Dios quirãcuã jii. Sechu mose abe ibeishü ndese, i que Jesús ee ra. ⁶⁵ Sacerdote rerecua que paama i tuchi Jesús cheẽ mose ra. Huñrao que endoro ndoro chee ra. Ñee ngue ererecua ataque je ra. —Jesús riqui Dios rucucha raã naa co. Jeñandu jate equia ã. Sã mbia mo nandembüirandube eã cote. Nandemae ndei ngue erese re. ⁶⁶ ¿I jëje re? ¿Mañi nande ra equia re? i que sacerdote rerecua ñee ererecua ataque je ra. —Eicua tuchi que ra jë. Sã mbia eiquia, i jate que ererecua ñee Jesús rüi nda. ⁶⁷ Mbia que ñinimbu nimbu Jesús ruba rese cote ra. Ucua ucua abe que erese ra. Emo emo ngue eritii mbeete ete o je ra. ⁶⁸ Ñee ngue ee ra. —“Cristo chõ se re”, ere ñi equia. Aba chõ ucua nderese chã. Ma eicua no, i que mbia ñee icua icua ee ra.

Jesús aicuayãte reseẽ, ichõiño Pedro

⁶⁹ Pedro que chi mbeite ngoi itaicuee ra. Nyucuaaque mo ngue tu ñee ee mbia rimba mo nda. —Jesús resenda que nde abe ra. Galilea jenda, i que

nyucuaaque ñee ee ra. ⁷⁰ Pedro que ñee ee ra. —Tei. Ndecheẽ aicuayãte, ichõĩño ngue Pedro mbia résaa ñee ee ra. ⁷¹ Pedro que oso quia eiquesa cuti cote ra. Nyucuaaque nongue que ñee mbia je erĩ nda. —Co abe que Jesús resenda ra. Nazaret jenda, i que ñee mbia je ra. ⁷²—Tei. Jesús aicuayãte, ibe que Pedro ñee icuã ee ra. ⁷³ Ae chi huee nae, ũquĩ mo ngue ñee Pedro je cote ra. —Jesús resenda chõ nde abe resẽ. Ndecheẽ aba chiucate resẽ, i que ñee ee ra. ⁷⁴ Pedro que jurar i tuchi ñee ee ra. —Aicuayã tuchite se resẽ, i que ñee ñooño nda. Aque mose tuchi que nguira ñee cote ra. ⁷⁵ Pedro que ndua Jesús cheẽ ndese cote ra. Sã Jesús ñee ee nyii no. —Nguira cheẽ nonde ra erecheẽ ñooño tres veces serĩ, sã Jesús i ee nyii no. Ũquĩ ndese que Pedro ndua cote ra. Nyebe esi nguiã usẽ nyeseo tuchi.

27

Mbia Jesús curuchoi Pilato je

¹ Nyaashĩ namo mose que sacerdote rerecua ndua hue rĩ ja ra. Amei mbia rerecua ja abe no. Hue rĩ ja ndua Jesús iquia sacua. ² Jesús que echucua suruchoi Pilato je ra. Pilato rei mbia rerecua, hue jenda ja rerecua.

Judas uchosoi mumbi nyiquia

³ Mbia ra Jesús iquia, i mose Judas je, eya eã tuchi que ũquĩ mose ra. — Jesús amee jirichĩ nguiã mbia je, i que ra. Nyebe mbae isiquia mondobe nguiã sacerdote rerecua je. Amei ererecua je abe no. ⁴—Mbae icuã tuchi asaãchĩ. Jesús seteã tuchi ameechĩ jẽje. Eiquia sacua, i que Judas ñee nda. — Nde quia rei. Ure eã ñene, i ja que ererecua ñee ee ra. ⁵ Judas que mbae isiquia mbaba asi mombo mondo íbii ra. Dios chuchúaa. Oso que uchosoi mumbi nyiquia cote ra. ⁶ Sacerdote rerecua que mbae isiquia sirõ ibi si cote ra. — Mbia ribishoronda chõ ã mbae isiquia re. Nyebe nandemondo eã ofrendarã, i que ñee ñee nyue ra. ⁷ Aquere que sacerdotes ibi mo isi aque mbae isiquia je ra. Ibi mo ngue eisi mbiamo tiquia tiquia sacua nda. Ñionga, i que hue ibi je ra. ⁸ Nyebe eriqui nguiã “mbia ruqui rua” i bei hue je. Namonyee. ⁹ Aque mose que Jeremías ñimbese ique cote ra. ã ndei Jeremías ñimbese ã:

Ũquĩ mbae isiquia treinta que eisi cote ra.

Ũquĩ ndei mbia ribishoronda ũquĩ.

¹⁰ Ũquĩ mbae isiquia que emondo hue ñionga ribishorõ cote ra.

Dios ñee nguia erĩ seje nyii nae, ũquĩ ndui si,

i que Jeremías embesa cose ra.

Pilato ñee Jesús je

¹¹ Mbia que Jesús curuchoi Pilato je cote ra. Pilato que ñee ee ra. —¿Judíos rerecua chõ nde re? i que ee ra. —Ae. Judíos rerecua chõ se re, i que Jesús ee ra. ¹² Sacerdote rerecua que ñee icuã ja Jesús je ra. Amei ererecua abe no. Jesús que ñee ãte echeẽ mose ra. ¹³—¿Erechanuãte equia ñee mose nderĩ nde? i que Pilato ñee Jesús je ra. ¹⁴ Jesús que ñee ãte echeẽ mose ra. Nyebe Pilato nyuruira tuchi nguiã echeẽ eã mose.

Jesús jẽiquia mbucha ira rese, i ererecua

¹⁵ Pilato que mbia tarõ ji mo mbusẽ mbei quia pascua mose ra. Co mii ngue embusẽ mbusẽ mbei quia pascua mose ra. Ae je mbia riqui ñee, “aque embusẽ mondo” i nae, aque chõ ngue embusẽ mbei quia ee ra. ¹⁶ Barrabás, i

que etarō ji mo je ra. Mbia chiicua tuchi que ae ra. ¹⁷ Mbia ñumunua ja mose que Pilato ñee ee ra. —¿Aba ra ambusē mondo jēje re? ¿Barrabás ra re? ¿Jesús ra re? i que Pilato ñee ee ra. ¹⁸ —Sacerdote rerecua riqui paama i choofote Jesús je ā, i quiatu que Pilato ndua ndua uchiangui re ra. ¹⁹ Pilato que chí ngoi ndua ndua nguēnda tose ra. Eninisi que ucheē mondo ñee ee ra. —Ehui chō Jesús si jē. Mbae icuā ngue esaā ēāte resē. Atea que seque re isa ra jē. Seque re icuā tuchi que aa ra jē, i que Pilato ninisi ñee ngu je ra. ²⁰ Sacerdote rerecua que ñee mbia ja je ra. Amei ndese. —Sā Pilato Barrabás mbusē mondo. Sā Jesús quiatu iquía, i que ererecua ñee ja mbia je ra. Nyebe mbia “eno” i chee ee. ²¹ Pilato que ñee si mbia je ra. —¿Aba ra ambusē mondo jēje re? ¿Jesús ra re? ¿Barrabás ra re? i que Pilato ra. —Barrabás embusē mondo i que mbia ee ra. ²² —¿Mañi ae quia ra Jesucristo je re no? i que Pilato ra. —Embucha ira rese, i ja que mbia ñee ee ra. ²³ —¿Mbae icuā esaā nde? i que Pilato ee ra. —Embucha ira rese jē, ibe que mbia tasē tasē ee ra.

²⁴ —Mbia riqui “Jesús eiquia” i i tuchi chĩ, i que Pilato ndua ndua ra. —I mo embu seje, i que mbia je cote ra. Nyoí que mbia résaa cote ra. —A aico nyoí a. Se ra Jesús aiquiayā. Eseteāte quiatu ngue re. Jē nguia tu jēingo erese, i rei que Pilato ñee mbia je ra. ²⁵ Mbia que ñee ja Pilato je ra. —¡Eiquia jē! Eicuāte que eriqui ra jē. Dios ra paama i eā eiquia mose. Dios paama i mose, sã ure je quiatu paama i. Ureiriĩ je abe no, i jate que mbia Pilato je ra. ²⁶ Pilato que Barrabás mbusē mondo cote ra. Jesús cuasa quiatu que chíño nda. Pilato que Jesús iruā nua cote ra. —Jembucha iquía ira rese, i que ñee soldados je cote ra.

²⁷ Soldados que Jesús cuasa curuchoi ererecua chuchúaa ra. Huee que soldados ataque abe ngaē ja Jesús mama nda. ²⁸ Jesús irao que embui esi ra. Tiru ireĩ nguia tu ngue emingue nguiā ee cote. ²⁹ Nyu ritiméi uma ji que emii eāquĩ ndese corona nda. Ira ñetē mo abe que emondo éoo ra. Ngoi ja que u nguĩā ndese Jesús nonde ra. Ñee icuā icuā ngue u eriĩ nda. —Judíos rerecua tuchi chō nde re, ichōiño ngue soldados Jesús je ra. ³⁰ Nĩmbu nĩmbu abe que erese ra. Ira abe que euru uru eāquĩ ndese no nda. ³¹ Jesús rimba que esaā saā ee no nda. Iquía iquía que ee no nda. Aquere que tiru ireĩ mbui esi cote ra. Eiraote que emingue ee cote ra. Curuchoi que embucha nonde ira rese cote ra.

Mbia Jesús mbucha ira rese

³² I rei que echoi quia ra. Mbia mo ngue esobeishĩ nda. Simón, i eiquia ee. Cirene jenda que ae ra. —Cruz echa rā Jesús mbucha sacua pe, i que soldados ee ra. Nguerao que ee cote ra. ³³ Ngasē ngue pee cote ra. Gólgota, i que hue je ra. Eresa cuare, i chō nguiā hue je. ³⁴ Huee que vino ñimocondo tuchi mo mondo Jesús je ra. Ubi rei que erese ra. Aquere que embei eā cote ra. ³⁵ Soldados que Jesús mbucha ira rese ra. Aquere que sita ñetē mbaba mbaba o je cote ra. —Aba ra Jesús irao querao ñi ja, i que nyue ra. Aque mose que embesa ji cheē ique cote ra. Seirao que embuchao chao nyue ra. Sita ñetē mbaba mbabare o je,

i que embesa ji ra. ³⁶ Aquere que soldados chí ngoi Jesús raarō cote ra. ³⁷ Mbia que letrero mii Jesús āquĩ nguiti ibate ra. JESUS REI JUDIOS RERECUA, i que embesa mii nda. Ūquĩ nii ño eriqui nguiā eiquia hue. ³⁸ Mbia nyeremo abe que embucha ira rese Jesús chabe ra. Jesús rereco chobei que emii ira rese ra. Mbae mbuquiachāsa tuchi que ũquĩ nda. ³⁹ Mbia que iquía iquía chō nguia

echeẽ naa naa ecuã nda. Ñee icuã icuã ee. ⁴⁰—“Dios chuchua ra ambucoi. Tres días mose ra ambuchuruambe” ere que equia. Ndequirãcuã tuchi mose, equichi u hue si. Nde Dios rucucha mose, equichi u cruz si, i tuchi que mbia quia iquia iquia ee ecuã mose ra. ⁴¹ Sacerdote rerecua abe que iquia iquia chõ nguia ee ra. Embesasa abe no. Amei ererecua abe no. Ûquiõ ngue ñee icuã icuã ja quia eriõ nda. ⁴²—Mbia que embuquera quera rei nyii ra. Ae si quia quera aroneate nguia aque. Judío rerecua mose ae, sã ae ae nguichi ira si. ¶ nda ureicu a cote, i ja que ererecua ñee icuã icuã e eriõ nda. ⁴³—“Dios aicuate”, i que equia, sã Dios ae embuquichi eya mose erese. “Dios rucucha rei se” i que equia, i ja que ererecua ñee icuã icuã eriõ nda. ⁴⁴ Ae mbuchai chi ira rese mbae mbuquiachãsa nae, ùquiõ abe que ñee icuã icuã nyee ee ra.

Jesús mano cote

⁴⁵ Tenda nandeite re mose que itondaru ru ra. Itondaru bei que mbia ja je tres horas ra. ⁴⁶ Tenda cheseco mose que Jesús ñeemombo cote ra. —Elí, Elí, ¿lam a sabactani? i que ñeemombo ra. —Dios sererecua, ¿mbaerã ereico hui sesi re? i chõ ngue ñee nguia. ⁴⁷—Elías je eriqui “quiatchu” i reae, i rei que echeẽ andusa mo nda. ⁴⁸ Aque mose tuchi que emo esponja monde vinagre ye ra. Ira ai rese que embia ji mondo rei Jesús chúruu cote ra. ⁴⁹—Esecha rei. ¿Sã Elías ruãte quia erea! i que eataque ñee ee ra. ⁵⁰ Jesús que tasẽ mano mbei cote ra.

⁵¹ Aque mosechi tuchi que cortina nyisia Dios chuchua jenda ra. Ibate si que eru nyisia íbii ra. Ibi que nyere nyere cote ra. Sita abe que nyisia sia nyibite bite rĩ nda. ⁵² Mbia tãsa mo abe que nyeequia equia ra. Dios quiato raaque mo ngue quera quera ra. ⁵³ Jesús quera si mose que ùquiõ ndaaque usẽ nyoí cote ra. Nyoí que Jerusalén cote ra. Mbia tubiriã ngue mae u erese ra. ⁵⁴ Soldados rerecua que chĩ mae Jesús rese ra. Soldados abe no. Ûquiõ ngue siquichete Jesús mano mose ra. Ibi chere mose. Mae mose mbae ja rese. —Dios ririĩ ño eriqui re, i jate que soldados ñee eriõ cote ra.

⁵⁵⁻⁵⁶ Cuña ngue chi jate mae Jesús rese isho ra. María Magdalena abe que chĩ huee ra. María abe no. María rei Jacobo si. José abe si. Zebedeo ririĩ si abe que chĩ erese huee ra. Ûquiõ ngue siqui bei quia Jesús rui ra. Echĩurã ngue emiĩ miĩ mbei quia ee ra. Galiléaa eico mose bei.

Mbia Jesús raaque chati cote

⁵⁷ José, i que mbaecha mo je ra. Arimatea jenda rei ae. Jesús quiato que ae ra. Tenda ireĩ mose que esi ñee Pilato je ra. ⁵⁸—Jesús raaque emee na seje, i que oso ñee Pilato je ra. Pilato que “eno” i ee ra. ⁵⁹ José que eraaque curuchoi cote ra. Numa ngue tirushĩ mo je ra. ⁶⁰ Jesús raaque que eiti suruchoi sita ribicoi ji imi ye ra. José chisaã ye. Nyati rei que sita cuasu mo je cote ra. Nyoí que erecha cote ra. ⁶¹ María Magdalena ngue chi ngoi mae Jesús atisa rese ra. María rese.

Soldados Jesús raaque atiquia saarõ u

⁶² Isamami ngue sacerdote rerecua choi ñee Pilato je ra. Fariseos abe no. Sábado isamami ngue ra. ⁶³ Ûquiõ ngue nyoí ñee Pilato je Jesús rĩĩ nda. —Urendua nduachĩ nguia ñeeñoño je rese. “Tres días mose ra aquera si”, i que equia mano nonde ra. ⁶⁴ Soldados emondo rã eatiquia raarõ. Sã echĩ bei tres días eraarõ huee. ¶ nda echĩmbaquiatsu eraaque siroã suruchoi. “Quera si que ra” ¡chĩ nda ñee ñoño mbia je jẽ! Ûquiõ mose ra mbia mbiĩrĩ irĩ tuchi cote,

i que ñee Pilato je ra. ⁶⁵ Pilato que ñee ee ra. —Soldados jendao rã. Eraaque raarõ tuchi sacua, i que ee ra. ⁶⁶ Soldados que ecuruchoi Jesús atiquiaa cote ra. Eiquesa aronda que ematã tuchi cote ra. —Jësaarõ tuchi jë, i rei que soldados je cote ra.

28

Jesús raaque quera si

¹ Jesús raaque ati ji que chibe sábadó mose ra. I nyaashí oso quia domingo mose, aque mose que cuña mo nyoí mae eatisa rese ra. María Magdaalena, i que emo je ra. María, i que enongue je ra. ² Aque mose tuchi que ibi nyere nyere ee ra. Angel ibátenda mó nguia tu quia eatisa mbuquiata reaë. Síta eatiquia que ecuruba ra. Ngoi que etose ra. ³ Enininya tuchi que chí ngoi ra. Ama pirirã pirirã i rã tuchi que ra. Eiraoshí tuchi que chí nda. ⁴ Soldados que titi titi i tuchi chõ mae ùquĩ ndese ra. Emundi tuchi que ra. ⁵ Angel que ñee cuña je ra. —Jësiquiche quichechí nguia. Jëingo raque Jesús raaque requia ã. ⁶ Emoate aa resë. Eraaque que quera si no. Ucheë ndui si que quera resë. Jenyu rei mae eatisa rese ae. ⁷ Jëso asi rã echimbaaquiato mbiirandu equera si rese. “Jenonde ra esi Galilea. Jemae nda erese huee”, jenyé embiirandu. Ûquĩ ae chõ ngue u nguia jëje, i que ángel cuña je ra. ⁸ Cuña ngue siquichete echeë andu ra. Eyate abe que ra. Uchã ndei que echoi quia Jesús chimbaaquiato mbiirandu ra. ⁹ Ñeenda cúa chõ ngue Jesús nyecua saludar i ee ra. Cuña ngue nyoí oo erese ra. Jesús i que equiaama ama nda. ¹⁰ Jesús que ñee ee ra. —Jësiquichechí nguia sesi. Jëso ñee seresenda je. “Jëso rã Galilea. Hue ra jemae Jesús rese”, jenyé oso ee, i que Jesús ñee cuña je ra.

Soldados ñee ñooño Jesús raaque rí

¹¹ Soldados eraaque raarõsa que nyoí sacerdotes rerecua mbiirandu Jesús quera rese ra. Ae rese mae nae, ùquĩ ngue esenei ja ee ra. ¹² Sacerdotes rerecua que nyoí ja ñee amei ererecua je cote ra. —¿Mañi nandé ra equia mbia jiranuã sacua Jesús quera rese re? i que ererecua ndua ndua hue rí ja ra. Nyebe mbae isiquia mee nguia soldados je, ñee ñooño sacua mbia je. ¹³ —Jeñee ñooño mbia je jë. “Ureque mose Jesús resendá eraaque suruchoi rei sirõ”, jenyé chooño mbia je jë. ¹⁴ Pilato jirandu mose jendese, urecheë nda ee. Paama iã nda jëje chã, i que ererecua ñee ja soldados je ra. ¹⁵ Soldados que mbae isiquia isi cote ra. Ñee ñooño tuchi que mbia je cote ra. Nyebe judíos riqui nguia ñee mbei ã cote. —Jesús chimbaaquiato que eraaque sirõ cose ra, nyebe eriqui nguia i bei ã cote.

Jesús uchimbaaquiato mondo mbia mbiirandu

¹⁶ Jesús chimbaaquiato once que nyoí ja Galilea ra. Ibi ibate mo ngue echoi Jesús cheë nguire ra. ¹⁷ Jesús que nyecu a ee huee ra. Jesús rese mae mose que ngoi nguia ndese ñee ee ra. —Jesús eã ño co reae, i rei que emo emo ñee uchiangui re ra. ¹⁸ Aquere que Jesús si eriichã ñee ee cote ra. —Sequiracuã tuchi chõ se re. Se rei ibi jenda rerecua ja. Ibatenda abe rerecua ja. ¹⁹ Jëso mbia mbaaquiato quiato ja serí. Mbía mangue chooñoa jenda ja. Bautizar jenyé ee Paba rí. Serí abe. Espíritu Turã nñi abe no. ²⁰ Jembaaquiato quiato tuchi secheë nñi. Ae asenei senei nguia jëje nae, ùquĩ jësenei senei ja ee. Secheë mumbayã sacua. Aico bei ra se quia jendese. Mbae ua j a chee, i que Jesús ñee ee ra. Amén.

EL SANTO EVANGELIO SEGÚN SAN MARCOS

Juan el Bautista Dios cheë senei senei

¹ Æ tasenei na jêje. Dios cheë turã Jesucristo riĩ. Jesucristo rei Dios riiri. ² Sã Isaias Dios cheë mbesa cose no:

Secheë nderaosa amondo quia nderëta aque.
 Ae ra ñeenda mbuquiche nembraerã, i que Dios ra.

³ Emo ndiqui ñeemombo mombo turúquiaa hue.

“Sã emo ndiqui ñeenda mbuquiche no, eĩ jenye si chõ nguia jê abe iico quiatu nanderereca raarõ arõ”, i equia turúquiaa hue,

i que Isaias embesa ra. ⁴ Juan el Bautista que tu ùquí ñee nguire cote ra. Dios cheë ngue esenei senei nguia turúquiaa cote ra. —Jendua si Dios rese. Jêhui chõ jêicuã si. Dios jêicuã mbutiã sacua. Ûquí mose nda bautizar ae jêje chã,

i beite que Juan nguia ñee nda. ⁵ Jerusalén jenda que ngaë ngaë tuchi quia echeë andu ra. Judea jenda abe no. Mbia huicua nenei nenei mose Dios

je, ùquí mose que Juan ndiqui bautizar i ee ra. Ama Jordán ye. ⁶ Quiicua mbuaera chõ ngue Juan irao ra. Camello. Mbae ire chõ ngue enumbicuaa

no nda. Tucu mbuae chõ ngue eu eu quia ra. Irao quiaa riinda abe. ⁷⁻⁸ Dios cheë ngue esenei senei nguia ra: —I achõ je chõ aico nguiã bautizar i mbia je

co. Co chi emo ndu quia serui co. Dios riiri tuchi chõ ae re. Ae quia equiracuã tuchi sesi re. Ae quia eturã tuchi sesi no nde. Ae quia tura bautizar i mbia je Espiritu Turã je. Mbia chiã mbitirõ sacua, i beite que Juan nguia ra.

Juan bautizar i Jesús je

⁹ Aque mose que Jesús ru sucha tubiriã Nazaret si ra. Galilea jenda rei Nazaret. Juan ngue bautizar i Jesús je ra. Ama Jordán ye. ¹⁰ Jesús que usë oso ama si cote ra. Ibei que nyeequia ee cote ra. Espiritu Turã ngue nguichi u erese cote ra. Nyurushi rá ngue eru nguichi erese ra. ¹¹ Ibei jenda que ñee ee ra. —Seriiri ño nde re. Sechesequa chõ nde re. Seyate nderese, i que Dios ñee ee ra.

Jesús tambii cuã, i raque Satanás

¹² Espiritu Turã ngue Jesús querao turúquiaa cote ra. ¹³ Huee que Jesús riqui arete ra. Cuarenta días. Nyacua risha ite re. Mbia riichare ja ite re. Satanás que tu rei tã i ee cote ra. Angeles que ngaë ngaë nguia ereaquiatu ra.

Jesús mbia mbaaquiatu quiatu ramo

¹⁴ Mbia rereca que Juan tarõ cárcel cote ra. Aquere que Jesús si Galiléaa ra. Dios cheë turã ngue esenei senei nguia huee ra. ¹⁵ —Achite Dios ñi tu mbia rerecarã a. Jendua sí Dios rese. Jêhui chõ jêicuã si. Dios cheë turã jêicua. I nda Dios jemingo bei, i que Jesús quia ñee mbia je ra.

Jêingo serui, i Jesús uchimbaaquiaturã je

¹⁶ Jesús que ngata oso quia ama nimia ndui ra. Galilea, i que aque ama ndisha je ra. Huee que mae Simón ndese ra. Enongue abe rese mae. Andrés, i equia ee. I que u sira mbua mbuasa mondo mondo ii ra. Sira resenda bei rei ùquí. ¹⁷ Jesús que ñee ee ra. —Serui bei chõ jêingo jê. Taembaaquiatu quiatu. Mbia teendu endu bei quia seje cote, i que ee ra. ¹⁸ Nyoj ja que erui ra. Sira mbuasa si que echoi hui ra. ¹⁹ Pe jiri que mae Jacobo rese ra. Enongue rese

abe. Juan, i equia ee. Zebedeo ririĩ ja rei ũquiĩ. Huee que echi ja canoa ye sira mbuasa mbitirō tirō nda. ²⁰—Jēingo serui, i que Jesús ñee ee ra. Echeē nduibe tuchi que echoi erui ra. Ngu que esecha choi ra. Eru que siquichō canoa ye ngũimba rese ra.

Jesús aba checuayā icuā jea mbia mo si

²¹ Nyoĩ que sucha tubiriã Capernaum nda. Sábado mose que Jesús si judíos chumunua nuásaa ra. Mbia mbaaquiātu quiātu sacuã. ²² Mbia rerecua rã ño ngue eriqui mbia mbaaquiātu quiātu ra. Embesasa rã eã. Nyebe mbia riqui nguiã nyuruira tuchi echeē andu. ²³ Huee que amei mo ndiqui mbia chumunuásaa ra. Aba checuayā icuã nyireco rei ae. Ñee asite que Jesús je ra. ²⁴ —¿Mbaerã erachu urerea co re, Jesús? Quiatúae urerecha ae. ¿Urericharã ño erachu quia co re? Dios rucucha chō nde re. Areicuate se, i rei que aba checuayā ñee asite ee ra. ²⁵ Jesús que ñee asi ee cote ra. —¡Equiriri chō jē! Esē oso amei ñiangui si, i que ee ra. ²⁶ Jesús cheē mose que aba checuayā amei mburirite cote ra. Tasē ngue oso usē amei si cote ra. ²⁷ Mbia que nyuruira tuchi mae Jesús rese ra. Ñee ñee ja que nyue cote ra. —Jesús riquichĩ mbia mbaaquiātu quiātu ucheē namondã je co. Equiracuã ae ñee nguiã. Mbia rerecua rã ño eriqui nguiã ñee aba checuayā icuã je co. Sã aba checuayā echeē mumbayãte jē, i que mbia ra. ²⁸ Mbia que jirandu jei Jesús rese Galilea jenda ja cote ra.

Jesús Simón ninisi si mbucherō

²⁹ Jesús que usē nyoĩ mbia chumunuasa si cote ra. Nyoĩ que Simón nyuchua ra. Andrés abe que siqui rei huee tuchia ra. Jesús que ique nyoĩ huee ra. Jacobo rese. Juan ndese abe no. ³⁰ I que Pedro chari rasi u nyaara ee ra. Eracu tuchi que ra. ³¹ Jesús que eo isi embuchuruã nda. Aque mosebe que eracu ti i esi cote ra. Mbae que echao chao quia mbia chiurã cote ra.

Jesús mbia rasi chumumbara mbucherō

³² Itondaru ramo mose que mbia erasi rurucuaē cuaē tuchi Jesús je ra. Ae aba checuayā quereco quia nae, ũquiĩ abe que ecurucuaē cuaē tuchi quia ee ra. ³³ Sucha tubiriã jenda ja que chi ñumunua eiquésaa ra. ³⁴ Mbia rasi chumumbara que embucherō cherō ja ra. Aba checuayā icuã tubiriã ngue ejea jea quia mbia si ra. Aba checuayā ngue Jesús icuate rei ra. Nyebe Jesús riqui nguiã echeē ndiquisã quisãte.

Jesús mbia Galilea jenda mbuchesea sea

³⁵ I nyaashĩ oso quia, aque mose que Jesús juã oso mbia tiásaa ra. Ñee sacuã Dios je itondaru bei mose. ³⁶ Simón ngue oso erui emuña nda. Nguesenda rese. ³⁷ Ngasē ngue ee ra. —Pe mbia chi nderequia jate pe, i que ee ra. ³⁸ Jesús que ñee ee ra. —Nyao sucha tubiriã mbuchesea sea achĩ jenda. Dios cheē nda asenei senei ee chã. Nyebe achu nguiã, i que ee ra. ³⁹ Galilea jenda que embuchesea sea ja cote ra. Dios cheē nenei nenei judíos chumunua nuásaa. Aba checuayā abe jea jea mbia si.

Jesús mbia leproso mbucherō

⁴⁰ Emo ndasi que ngasē Jesús je ra. Leproso, i que ũquiĩ erasi je ra. Tu que ngoi ngũĩã ndese ñee Jesús je ra. —Nde sembucherōse mose, sembucherō se, i tuchi que ñee ee ra. ⁴¹ Jesús ia eã tuchi que erese ra. Ñomee ngue oco erese cote ra. —Eno. Tarembucherō, i que ee ra. ⁴² Echeē nduibe tuchi que nyerō cote ra. ⁴³⁻⁴⁴ Jesús que ñee ee ra. —Sã jē. Erechechĩ nda emo je jē. Eso

nderasiã ndeacuquia sacerdote je cote. Moisés cheẽ ndui si chõ mbae mo emondo Dios je. Eĩ nda mbia jirandu nderasiã ndese cote, i rei que Jesús ñee emondo ra. ⁴⁵ Mbia que embiirandu ja tuchi chõ oso ra. Nyebe Jesús nyecua aroneate nguĩã sucha tubiriã mo. Siquiibi ibi chõ ngue eriqui cote ra. Icuenda ja que ngaẽ ngaẽ nguia erea ra.

2

Jesús emi sayã mo mbucherõ

¹ Emo mose jiri que Jesús nyebi Capernaum nda. Echuchua ereco mose que mbia jirandu erese ra. ² Mbia tubiriã ngue ñumunua ee ra. Mbia chayã tuchi que ra. Ei quesa abe itâyã tuchi que ra. Dios cheẽ ngue esenei senei tuchi quia ee ra. ³ Mbia cuatro que erasi mo curucuaẽ ee ra. Emi sayã. ⁴ Mbia tubiriã ngue tuchia mbiitâyãte eriquisã nda. Nyebe erasi ruruchoi nguĩã sui tei quite arõ. Tei que endoro cote ra. Erasi que embuquichi imbu quisa ye Jesús je cote ra. ⁵ —Erurucuaẽsa riqui seicuate ñquĩ, i que Jesús ñee uchiangui re ra. Nyebe ñee nguĩã emi sayã je. —Echo, ndechisaa mbae icuã ambutiã nguia ndesi a, i que ee ra. ⁶ Embesasa mo abe que chi echeẽ andu ra. Mae icuã icuãte que equia Jesús res e ra. ⁷ —¿Mbaerã Jesús riqui ñee ñquĩ nde? Ñee icuã icuã ñochi equia Dios rĩ co. Dios ibatenda ae mbi a chiao icuã mbutiã tiã nguia esi resẽ, i rei que ñee icuã icuã Jesús rĩ nda. ⁸ Jesús que ñquĩ ndua ndua icuate quia ra. Nyebe ñee nguĩã ee cote. —¿Mbaerã jẽingo ndua ndua icuã nde? ⁹ ¿Ma mbaranguiatuã eã jiri jẽje re? ¿Mbia icuã mbutiã esi ere? Mbia rasi mbucherõ ere no ae. ¿Ma mbaranquiatuã eã jiri jẽje re? ¹⁰ Dios rucucha rei se. Mbia chiao icuã mbutiã aqiatu chõ se re. Sequirãcuã tateacuquia jẽje, i que Jesús ñee ee ra. Ñee ngue erasi je cote ra. ¹¹ —Ehuã na. Ndechuchua eso cote. Ndequisa abe erao, i que Jesús emi sayã je ra. ¹² Emi sayã ngue juã asi Jesús cheẽ nduibe cote ra. Ngua que esirõ asite serao cote ra. Mbia resa rae ja. —Ã ndese que ureico mae eã tuchi emo mose ra, i tuchi que mbia u mae nyuruira erese ra. Mbia que ñee turã jate Dios quirãcuã ñi cote ra.

Serui bei eico, i Jesús Leví je

¹³ Jesús que oso si ama ndisha rimíaa nda. Mbia que ngaẽ ngaẽ jate erea ra. Jesús que embaaquiato quiato ra. ¹⁴ I que Jesús oso quia ra. Mae ngue Leví rese ra. Alfeo ririã ngue Leví ra. Ngoi que huĩ plata isi isi impuestorã nda. —Serui bei eico, i que Jesús ñee ee ra. Ae Leví juã oso nguĩã erui.

¹⁵ Jesús que nyoĩ quiaru erese ra. Impuestos isi isiquia ata que chi quiaru erese huee ra. Echimbaaquiato abe rese. Mbia icuã mo abe que chi quiaru erese no nda. Ñquĩ tubiriãte que siqui erui ra. ¹⁶ Fariseos que ñee icuãte Jesús chimbaaquiato je ra. Embesasa abe que ñee icuãte ee ra. —¿Mbaerã Jesús riqui quiaru mbia icuãte rese re? i que ñee nda. ¹⁷ Nyebe Jesús ñee nguĩã ee. —Sã mbia rasiã ndiqui aba mbucherõsa requia eãte no. Sã erasi chõ ndiqui erequia no. “Jenyu seje” ae eã ngue u nguĩã mbia turã je. Mbia icuã je chõ ngue achu nguĩã “jenyu seje” i, i que Jesús ra.

Jesús chimbaaquiato hui ãte uchüu si

¹⁸ Juan ñimbaaquiato que hui uchüu si aque mose ra. Fariseos chimbaaquiato abe no. Nyebe mbia ngaẽ nguĩã ñee Jesús je. —¿Mbaerã ndechimbaaquiato abe riqui hui ãte uchüu si re? i que ñee Jesús je ra. ¹⁹ Jesús que ñee ee ra. —Sã emo ndiqui ngüinisirã isi ramo no. Sã eresenda iate riqui quiaru erese no. Sã eriqui hui aroneate uchüu si aque mose no. ²⁰ Sã eru

riqui mano emo mose no. Aque mose ramo nguiatu ra equiatio hui uchiu si cote. ²¹ Sã emo ndiqui tiru yasu mii aroneate tiru ima sorei rese no. Eyasu ra nyaacua quiata eima si. Soro icoi tuchi chõ nda cote. ²² Sã emo mbaeri rasi ramo nderecoquiato eã eriru ima ye no. Mbae ire ima ye ererecoquiato aronea ño ñene. Eri rasi ra ñimatã ño mbae ire ndoro. Eri ra uchẽ ja. Mbae ire abe mbicuaete ra cote. Mbaeri yasu quia nda equerecoquiato nguiã mbae ire yasu ye. Soroã sacua, i que Jesús ñee ee ra.

Jesús chimbbaaquiato mbae a ishao shao sábado mose

²³ Sábado mose que Jesús si quia mbiaco ite ite rĩ emo mose ra. Echimbbaaquiato que quiata a nyiqui nyiqui choi quia erui ra. ²⁴ Fariseos mo ngue ñee ee ra. —¿Mbaerã ndechimbbaaquiato riqui mbae ishao shao sábado mose re? Co mose chõ mbia riqui uquenea ucua resẽ, i que fariseos ñee Jesús je ra. ²⁵ Jesús que ñee ee ra. —¿Embesa ji rese jemae eã David rĩ nyii re? David riãcuãte que aque mose ra. Eresenda abe riãcuãte que eriqui aque mose no nda. ²⁶ David que ique Dios chuchua aque mose ra. Abiatar que sacerdote rere cua aque mosẽ ra. Mbichae Dios chuchua jenda que David u ra. Mee mee ngue nguesenda abe je ra. Eriãcuãte quiatu ngue re. Sacerdote mbaerã ja chõ ndaque mbichae, i que Jesús fariseos je ra. ²⁷—Sábado que Dios chao mbia mbaerã nda. Sábado mbaerã eã ño Dios mbia ao nguiã. ²⁸ Sábado rerecua bei chõ se re, i que Jesús ñee fariseos je ra.

3

Jesús emo o tomei mo mbucherõ

¹ Jesús que oso mbia chumunuásaa cote ra. Huee que eo tomei mo ndiqui ee ra. ² Mbia que mae nguiatute quia Jesús rese ra. —Ma Jesús eo tomei mbucherõ. Sábado mose raque co. Sã embucherõ. Nandechẽ icuã icuã nda ee chã, i que eu mae nguiatute Jesús rese ra. ³ Jesús que ñee eo tomei je cote ra. —Ehuã na u aa mbia ite re, i que ee ra. ⁴ Jesús que ñee mbia je ra. —¿Mbae eturãte jẽje co tenda sábado mose re? ¿Coche nandeco mbae turã naa naa sábado mose re? ¿Coche nandeco mbae icuã naa naa co mose re no? ¿Coche mbia mbucherõ co mose re no? ¿Coche mbia iquia co mose re no? i que Jesús ñee mbia ja je ra. Mbia que ñee ãte echeẽ mose ra. ⁵ Jesús que paama i mae mbia rese ra. Eya eãte que eriqui mbia chiã ãtã ndese ra. Ñee ngue eo tomei je cote ra. —Ndeo emeẽ secuti, i que ee ra. O que emee Jesús cheẽ mose ra. Aque mosechi que eo nyerõ cote ra. ⁶ Nyebe fariseos paama i nguiã Jesús je. Mbia mbucherõ mose sábado mose. Ndua ndua ja que Jesús i quia nonde ra. —Jesús nandeco quia rei, i tuchi que equia Herodes resenda ja je ra.

Mbia tubirã nyoĩ Jesús rui

⁷ Jesús que oso ama ndisha quti ra. Uchimbbaaquiato rese. Mbia tubirã Galilea jenda que nyoĩ quia erui ra. ⁸ Mbia que jirandu ja tuchi Jesús chisãã turã ndese ra. Nyebe eriqui nguiã ngaẽ ngaẽ erea. Judea jenda. Jerusalén jenda. Idumea jenda. Ama Jordán ndobeinda abe. Tiro rurubinda abe no. Sidón ndurubinda abe no. Ũquí ja que ngaẽ ngaẽ nguia erea ra. ⁹ Nyebe Jesús ñee nguiã uchimbbaaquiato je. —Canoa mo jendu rã ñno mbuquiche co rĩ, i que ee ra. Mbia quiatu ngue emumbite nguiã. ¹⁰ Mbia que embucherõ cherõ tuchi quia nyii ra. Nyebe erasi ataque riqui nguiã “faoco erese” i raque. Nyebe eriqui nguiã ñimaña maña tuchi. “Nandeco Jesús rese” i. ¹¹ Aba checuayã icuã mae mose Jesús rese que ngoi ngoi quia nguiã ndese ñee ee

ra. —Dios ririĩ ndei nde, i que equia ñeemombo mombo ee ra. ¹² Jesús que ñee asite ee ra. —“Co rei Dios ririĩ co” jenyechĩ nda jē, i que ee ra.

Jesús mbia doce irabo uchimbaaquiatuṛã

¹³ Jesús que nyui oso sita ibate mo ndese ra. “Jenyu” i que uchiirabobi je ra. Nyoĩ que erea ra. ¹⁴ Ũquiĩ doce que eirabo nguesendacuã nda. Embuchao chao sacua mondo Dios cheē nenei nenei. ¹⁵ Uquirãcuã ngue emondo ee ra. Aba checuayã jea jea sacua mbia si. Mbia rasi chumumbara mbucherō cherō sacua. ¹⁶ ã ndei mbia echiirabo ã:

Simón (Pedro, i abe que ee ra.)

¹⁷ Jacobo (Zebedeo ririĩ ndei Jacobo.)

Juan (Jacobo nongue rei Juan. Boanerges, i que ũquiĩ ja je ra. “Ama sieu je ririĩ” i chō nguã ee.)

¹⁸ Andrés

Felipe

Bartolomé

Mateo

Tomás

Jacobo (Jacobo rei Alfeo ririĩ.)

Tadeo

Simón el Cananista

¹⁹ Judas Iscariote (Aque que Jesús mondo mbia icuã je ra.)

Ũquiĩ ja que Jesús irabo ra.

Aba checuayã quirãcuã Jesús quereco co, i raque mbia

Nyoĩ que ique tuchúaa cote ra. Uchimbaaquiatu rese. ²⁰ Mbia que ngaē ngaē tuchi quia erea no nda. Equiaru mose rocoĩ. Echimbaaquiatu abe quiaru mose rocoĩ. ²¹ Jesús nongue jirandu mose que echoĩ erea ra. Equiachã eriqui reĩ nguã ee. Nyebe eriqui rei nguã “nanderao” i raque. ²² Embesasa ngaē nguã Jerusalén si nae, ũquiĩ ngue ñee ñee mbia je ra. Mbia mbuteta queta Jesús rii. —Satanás quirãcuã je chō Jesús riqui nguã aba checuayã icuã jea jea mbia si co, i rei que ñee icuã Jesús je ra. ²³ —Jenyu rã tacheē jēje, i que Jesús ee ra. —¿Mañi nda Satanás aba checuayã icuã jea mbia si re? Erimba chō nyeresē. ²⁴ Gobierno icuã icuã mose nyue, ua rae. ²⁵ Tuchuamo jenda icuã icuã mose nyue, ua ra eno. ²⁶ Satanás icuã icuã mose nyue, equirãcuã nda ua no. ²⁷ Satanás quirãcuã tuchite raque. Umbae rese ngueteãte raque. “Sembae chi turãte a”, i raque. Dios quiarei equirãcuã tuchi Satanás si. Dios Satanás mbae sirō ja arōte e quia esi co. Dios Satanás quirãcuã mbutiã ja arōte quia co.

²⁸ Tacheē nyecua jēje. Emo siqui icuã mose, Dios eicuã mbutiã arōte esi. Emo ñee icuã mose, Dios echeē icuã mbutiã arōte no. ²⁹ Emo ñee icuã mose Espíritu Turã ñh, ũquiĩ icuã nguiatu ra Dios mbutiã eã mbei esi, i que Jesús ee ra. ³⁰ —Jesús chianguĩ re aba checuayã icuã ndiqui co, i quiatu ngue mbia nguã. Nyebe Jesús ñee nguã ũquiĩ.

Jesús nongue ngaē erea usi rese

³¹ Jesús nongue que ngaē ndei erea ra. Usi rese. Chichō ja chō ngue itaicuee ra. —“Quiatuchu” ere Jesús je, i que emo mondo ra. ³² Mbia que chi jate ngoi Jesús jii ra. Ũquiĩ ngue ñee ee ra. —Hue ndesi riqui nderequia itaicuee hue. Ndenongue rese, i que ee ra. ³³ —¿Aba je chō aico “taĩ” i chã? ¿Aba je chō aico “senongue” i no ña? i que Jesús mbia je ra. ³⁴ Jesús que mae ucheē andusa

rese ra. —*Ā* je chō aico nguiā “*taī*” i. *Ā* je chō aico nguiā “*senongue*” i no. ³⁵ Ae Dios cheē mumbayā nguia nae, ūquĩ je chō aico nguiā “*senongue*” i. Ūquĩ je chō aico nguiā “*taī*” i no, i que Jesús ñee ee ra.

4

Emo mbae eĩ mombiquia mbiquia

¹ Jesús que mbia mbaaquiatsu quiatu si ama nimia ndese ra. Mbia que ñumunua tuchi u erese huee ra. Nyebe Jesús si nguiā ua canoa mo ye. Ngoi que huĩ huee mbia mbaaquiatsu quiatu ra. Mbia que chi jate ama nimia ndese ra. ² Jesús que mbia mbaaquiatsu quiatu tuchi quia ra. Ejemplos que esaã saã tuchi ee ra. ³—Jenyisaquia rã serese. Sã emo si rei mbae eĩ mombiquia mbiquia no. ⁴Sã emo ndiqui uqui uqui ñeenda rui no. Sã nguireĩ ndiqui ngaē eu no. ⁵ Sã emo emo ndiqui uqui sita arō no. Sita aronda suri jei raque. Ibi ererate quia ñene. ⁶ Tenda ibate mose que eriqui ñimama mano nda. Erao eãte quia ñene. Nyebe mano jei nguiā. ⁷ Sã emo ndiqui uqui uqui nyu réndaa no. Sã nyu abe riqui suri erese no. Nyu ruri que echãti asĩ cuaē eriquisã nda. Nyebe ia eã ño nguiā. ⁸ Sã emo ndiqui uqui uqui ibi turã no. Ūquĩ nguiatu que suri turã nda. *Ī* a turã ngue ra. Sã emo ia treinta no. Sã emo ia sesenta no. Sã emo ia cien no. ⁹ Jēisa mose, secheē jeñandu turã na, i que Jesús ra.

Jesús ucheē mbiasa uchimbaaquiatsu je mbae eĩ ñi

¹⁰ Mbia ataque nyoĩ mose que Jesús ji jenda ñee ee ra. Echimbaaquiatsu doce rese. —Ndecheē embiasa tuchi rã ure je mbae eĩ ñi, i que ñee Jesús je ra. ¹¹ Jesús que ñee ee ra. —Mbia rerecua tuchi quiarei Ibatenda. Ae chō aseneĩ senei nguiā jēje ã. Secheē ambiasa asa bei tuchi quia jēje co. Mbia ataque quia siqui serea erese co. Mbia ataque je aico ejemplos achō naa naa mbei co. ¹² Eanduchō sacua eicua turã nonde rocoĩ. Sã eriqui uba eãte Dios icha rui no. Dios eicua mbutiã eã sacua esi, i que Jesús ñee nda. ¹³ Jesús que ñee ee ra. —¿Secheē jēicuayãte mbae eĩ ñi ñee mose jēje re? ¿Mañi jenyete quiatu ra ejemplos ataque icua re no? ¹⁴ Ae mbae eĩ mombiquia mbiquia nae, Dios cheē nenei neneisa rã ño aque re. ¹⁵ Ae uqui uqui ñeenda rui nae, mbia Dios cheē andu chooñosa rã ño ūquĩ nde. Ae Dios cheē andu chooñote quia nae, ūquĩ ñiangui si chō Satanás ndiqui nguiā Dios cheē ndirō. ¹⁶ Ae uqui uqui sita arō nae, mbia mo na ño ūquĩ no nde. Dios cheē andu mose, isi turã ndaque. Eyate raque erese nyii. ¹⁷ Mbia icua icua mose ee Dios cheē ñi, hui jei chō nguiā esi. Mbae rao eã naanguia chō ūquĩ nde. ¹⁸ Ae uqui uqui nyu réndaa nae, mbia mo na ño ūquĩ no nde. Dios cheē andu turã ndaque. Siqui bei eã ño nguiā erui. ¹⁹ Umbaerã achō ndese chō eriquichĩ nguiā ndua. “Mbaecha tuchite ra se”, i bei chō nguiā ndua ndua. Nyebe hui chō nguiā Dios cheē si. Nyebe Dios cheē ndiqui nguiā ia eã mbeite ee. ²⁰ Ae uqui uqui ibi túraã nae, mbia mo na ño ūquĩ no nde. Ūquĩ nguiatu Dios cheē ñandu turã nguiā. Nyebe eriqui nguiā siqui beite erese. *Ī* a ia bei raanguia cote. Emo emo ia treinta. Emo emo ia sesenta no. Emo emo ia cien no, i que Jesús ra.

Tata rendi mbia resae ja

²¹ Jesús que ñeembe ee ra. —Sã nandeico lamparina ati eã no. Sã nandeico emi eã mbaequi re no. Erendi checua chō nda nandemi. Mbia resae ja sacua. ²² Mbae checuayã nda nyecua ja emo mose. Mbia chiangui renda checuayã nda nyecua emo mose no. ²³ Jēisa mose secheē jeñandu

turã na. ²⁴ Secheẽ nda jeñandu chooñochĩ jẽ. Jẽ secheẽ mumbayã mose, taembaaquiatu i i tuchi. ²⁵ Emo umbae rerequia mose, Dios ra embaerã mo mondoobe ee. Emo embae eã mose, Dios ra embae sirõ ja esi.

Dios rimba ñimbeta chõ nguiã mbae eĩ na

²⁶ Dios rimba ñimbeta chõ nguiã mbae eĩ na. Sã emo mbae eĩ tiquia tiquia no. ²⁷ Suri ra itõ mocoinde cote. Eruri cuasu tuchi ra cote. Echa embusuriã ndaque. ²⁸ Dios ae chõ embusuri nguiã. Eracói rane. Ia chee. Ea ñetẽ nane. Ea cuasute cote. Ea ireĩ cote. ²⁹ Ea ireĩ tuchi mose ra eishao shao cote.

Mbae eĩ na ño Dios rimba re

³⁰ Mbae rã ño Dios rimba chã. Ejemplo mo tasenei jẽje. ³¹ Mbae eĩ na ño Dios rimba re. Sã mbia mo mostaza eĩ tiquia no. Eñetẽ tuchi raque mbae eĩ mo si. ³² Suri oso quia cote. Ecuasu tuchi chee. Ira rã ño cote re. Nguireĩ nguichi quichi chee erãquiã ndese. Eĩ si chõ Dios rimba re. Ñquĩ mii ndaque nyii. Ñimbeta tuchi cote. Mbae eĩ na, i que Jesús ñee mbia mbaaquiatu ra.

Jesús ejemplos senei senei tuchi mbia je

³³ Eĩ ño ngue Jesús quia mbia tubiriã mbaaquiatu quiatu ejemplos je ra. Mbia quenea tuchi chee que ra. ³⁴ Ejemplos achõ ngue esenei senei mbia mbaaquiatu sacuã nda. Uchimbaaquiatu je quiatu que embiasa turã turã nda.

Jesús quiririã icuã icuã mbutiba; ama ndebera abe

³⁵ Itondaru ramo mose que ñee uchimbaaquiatu je ra. —Nyao ama ndisha robei, i que ee ra. ³⁶ Ae canoa ye Jesús ñi mbia mbaaquiatu quiatu nae, aque ye sí que echimbaaquiatu Jesús rerao ra. Mbia tubiriã ndecha. Canoa mo abe que nyoi quia erese ra. ³⁷ Ama ndiite re mose que quiririã icuã icuã ndu ee ra. I rebera que ique ique tuchi quia canoa ye ra. Nyebe canoa ndiqui nguiã ñimi serĩ tuchi ee. ³⁸ Jesús que uque rei oso quia canoa ndiita qiti ra. Uãquĩ ndua arõ ngue esi rei quia ra. Echimbaaquiatu que emumba ra. —Urembaaquiatusa, echumumba. Nandemanochĩ nda re, i que Jesús je ra. ³⁹ Jesús que nyuruã ñee asite quiririã je ra. —Ti ere cote, ama, i que ama ndebera je no nda. Quiririã ngue tiba echeẽ mose cote ra. Ama ndebera abe que tiba ra. ⁴⁰ Ñee ngue uchimbaaquiatu je cote ra. —¿Mbaerã jẽsiquichete riqui re? ¿Seicuayãte equia ã nde? i que Jesús ñee ee ra. ⁴¹ Siquiche bei que equia ra. Nyuruira tuchi que mae Jesús quirãcuã ndese ra. —Quiririã Jesús cheẽ mumbayã ñochĩ. Ama abe echeẽ mumbayã ñochĩ no, i que ñee nyue ra.

5

Jesús aba checuayã icuã jea

¹ Ngasẽ ngue ama ndobei cote ra. Gadara, i que hue ib je ra. ² Canoa si Jesús nguichi mose que hue jenda mo tu erea ra. Aba checuayã icuã ngue siqui echiangui re ra. Mbia raaque tãsa si chõ ngue eru ngasẽ Jesús je ra. ³ Mbia raaque tãsa bei que eriqui ra. Emo ngue echucua aroneate quia ra. Cadenas je abe que emo ndiqui ecua aroneate ra. ⁴ Nyucua mocoĩte rei nda cadenas je raẽ. Eĩ nda echucua rei raẽ. O abe. Ucuasa nda endoso ndoso bei quia ra. Emo nda embutiba aronea tuchi quia ra. ⁵ Ngata bei nda equia itondaru ra. Nyaashĩ mose abe. Tasẽ tasẽ mbei nda equia mbia raaque tãsa ra. Sita ibátee abe no. Sita je nda eriqui ñimbasi mbasite ra. ⁶ Isho que mae Jesús rese ra. Uchã asi que eu ngoi nguiã ndese enonde ra. ⁷⁻⁸ Jesús que ñee ee ra. —Esẽ

u aque chiã si, aba checuayã, i que Jesús ñee ee ra. Aba checuayã ngue tasẽ tuchi ñee Jesús je ra. —¿Mañi ere ra equia seje re, Jesús? Dios riirĩ ño nde re. ¡Sembasichĩ nda se jẽ! i tuchi que ee ra. ⁹—¿Mañi ndeje re? i que Jesús ee ra. —Etubiriã, i chõ nguiã seje. Ure cuabete quia ñene, i que ñee Jesús je ra. ¹⁰—fsho ra uremondochĩ, i tuchi que aba checuayã ñee Jesús je ra. ¹¹Chiasu socoi tubiriã ngue chi quiaru huee ibi ibátee ra. ¹²Nyebe aba checuayã icuã ñee ja nguiã Jesús je. —Uremondo ja rã chiasu socoi chianguĩ re, i tuchi que equia Jesús je ra. ¹³Eno, i que Jesús ee ra. Nyebe aba checuayã usẽ ja nguiã amei ñia si cote. Chiasu chianguĩ re que echoi ja cote ra. Dos mil rei chiasu. Chiasu que uchã ja choi nyiichere ama nimia mbucu rĩ nda. Ama ndisha ye que echoi ja mano nda.

¹⁴Chiasu raarõsa mundite que ra. Uchã ngue echoi mbia mbiirandu randu ja ra. Sucha tubiriã jenda mbiirandu. Ishonda abe mbiirandu no. Mbia que ngaẽ ngaẽ nguia jirandu turã cote ra. ¹⁵Ngasẽ ngue ecuaẽ Jesús je ra. Ae aba checuayã icuã nguereco uchianguĩ re nyii nae, aque abe que siqui huee ee ra. Huĩrao resebe que eñi ngoi ra. Earacuate que ee cote ra. Nyebe mbia riqui nguiã siquichete. ¹⁶Ae mae erese nae, ùquĩ ngue ñee ñee mbia je ra. Mbia mbiirandu chiasu socoi rese. Ae aba checuayã quereco quia nyii nae, aque rese abe no. ¹⁷—Eso rã urerecha urerecua si, i jate que hue jenda ñee Jesús je ra. ¹⁸Ae aba checuayã quereco quia nyii nae, aque que ñee Jesús je ra. Jesús ua mose canoa ye. —Nderese bei chõ taso se jẽ, i rei que ñee Jesús je ra. ¹⁹Jesús que ñee ee ra. —Tei. Quiatu rei ndechuchúaa. Quiatu ñee nderesenda je. “Dios chõ sembucherõ nguiã. Eya eã tuchite que eriqui resere ra”, ere oso nderesenda mbiirandu, i que Jesús ee ra. ²⁰Amei ngue oso sucha mbuchesea sea cote ra. Mbia Decápolis jenda mbiirandu randu ja. —Jesús chõ sembucherõ nguiã, i ja jate que equia mbia je ra. Mbia que nyuruirate quia mae erese ra.

Jesús Jairo riirĩ mbucherõ; ari mo abe mbucherõ

²¹Jesús que tu si iasa sobei si canoa ye ra. Mbia tubiriã ngue ngaẽ ngaẽ nguia erea ra. Ama nimiaa eriquibe mose. ²²Judíos rerecua mo ngue tu erea ra. Jairo, i que ee ra. Judíos munua nuasa que ae ra. Jesús nonde que eru ngoi nguiã ndese ñee ee ra. ²³—Qui seriirĩ si quia mano qui. Nyao rã ndeo terechono earõ. Embucherõ sacua, i tuchi que equia Jesús je ra. ²⁴Jesús que oso erese cote ra. Mbia tubiriã abe que nyoĩ quia ñimajaã tuchi erui ra. ²⁵Ari rasi mo abe que oso quia erui ra. Eruqui nda uchẽ mbei quia ee ra. Doce años nyee. ²⁶Ngasi nda esaã tuchi quia ra. Erasi rea reasa nda etea tea jate rei quia raẽ. Umbae nda emondo mondo ja chee ngasi rea reasa je ra. Nyerõ jiri jiriã tuchi que ra. Erasi i i tuchi chõ ngue ra. ²⁷Jirandu chee que Jesús rese ra. Equite quiti que esi mbia joã nda. Oco que oso eirao rese ra. ²⁸—Eirao achõ ndese se oco mose, acherõ nda se, i nda ra. ²⁹Aque mose tuchi que eruqui ti i ee cote ra. Ngasiã ngue eicua uchianguĩ re cote ra. ³⁰—Sequiracuã ngue mbia mo mbucherõ nda, i que Jesús uchianguĩ re ra. —¿Aba oco seirao rese re? i que mae uquite quiti ra. ³¹Echimbaaquiutu que ñee ee ra. —Mbia tubiriãte nyeresẽ. Ñimajaãte nyeresẽ. ¿Mbaerã ereico “¿aba oco serese re?” i re? i que ee ra. ³²Jesús que nyuruba ruba mae nda. —¿Aba oco serese re? i. ³³Ari que jirandu tuchi ucherõ ndese ra. Eireite que titi titi i huĩ ee ra. Ngoi que nguiã ndese Jesús resa quiti ra. Mbae que esenei ja ee cote ra. ³⁴Jesús que ñee ee ra. —Seicuate que se ra. Nyebe arembucherõ nguiã. Ndeya chõ eso cote. Nderasi ra tu si eã ndeje, i que Jesús ñee ee ra.

³⁵ Echeẽ mose chite que emo ngaẽ Jairo chuchua si ra. —Nderiirĩ ngue mano cote ra. ¿Mbaerã nda Jesús ererao ndechuchua cote re? i que ñee ee ra. ³⁶ Jesús que echeẽ ñandu ra. Ñee ngue Jairo je cote ra. —Ndeya eã techĩ nda jẽ. Seicua chõ se jẽ, i que Jesús ee ra. ³⁷ Jesús que oso eraaque rea cot e ra. Uchimbaaquiatu tres que equerao ra. Pedro. Jacobo abe. Juan abe no. Jacobo nongue que Juan nda. Ûqui mii ño ngue equerao era ra. ³⁸ Ngasẽ ngue Jairo chuchua cote ra. Mbia que chi ja nyeseo ãquẽ ndaaque rese ee ra. Nyiibu tuchi que eu ra. ³⁹ Ique que oso ñee mbia je ra. —¿Mbaerã jẽingo nyiibute re? ¿Mbaerã jẽingo nyeseo re? Ìquẽ manoãte resẽ. Uque chõ u co resẽ, i que Jesús ñee mbia je ra. ⁴⁰ Mbia que iquia iquia chõ ee ra. Jesús que mbia mondo ja chee itaicuee ra. Eru rese que esi ique eriirĩ ndaaque rea ra. Esi abe rese. Nguesenda abe rese. ⁴¹ Eraaque o que eisi ñee ee ra. —Echuruã, Ìquẽ, i que ee ra. ⁴² Echeẽ mose tuchi que ãquẽ juã ngata cote ra. Etiarõte que ra. Doce años que ra. Mbia que nyuruira tuchi mae erese ra. ⁴³ —“Jesús que co raaque mbuquera ra”, jenyechĩ nda emo je jẽ, i que Jesús mbia je ra. —Nderiirĩ embuquiuru cote, i que ee cote ra.

6

Mbia Nazaret jenda Jesús isiteã

¹ Hue si que esi nguẽcuua ra. Echimbaaquiatu abe que nyoĩ erese ra. ² Sábado mose que mbia mbaaquiatu quiatu judíos chumunuásaa ra. Mbia que nyuruira ja tuchi u echeẽ andu ra. Ñee ñee ngue u nyue ra. —¿Mangue eriqui ñimbaaquiatu tuchite re? ¿Mañi equia mbae icua ja tuchite re? Nandemae sayã naa naa tuchichĩ. ³ Ira mbitirõ tirõsa chõ ndaque. María ririĩ ño ndaque. Jacobo nongue chõ ndaque. José abe no. Judas abe no. Simón abe no. Ì echari enongue riqui ja raque nanderese ã, i que mbia ra. Nyebe mbia Jesús cheẽ andu sereã nea nguiã. ⁴ Jesús que ñee ee ra. —Dios cheẽ mbuchecuasa ishonda cheẽ nguia ra mbia isi turã mbei. Nguẽcua jenda cheẽ achõ nguia ra eisi turã eã. Ngõngue cheẽ achõ nguia ra eisi turã eã no, i que Jesús ñee nguẽcua jenda je ra. ⁵ Jesús que mbia mae sayã saã saã aroneate quia huee ra. O que echono mbia rasi mii mii arõ embucherõ nda. ⁶ Hue jenda mbia que chi Jesús icua eãte ra. Nyebe Jesús nyuruira tuchi nguiã mae erese. Sucha tubiriã mbuchesea sea que equia mbia mbaaquiatu quiatu ra.

Jesús uchimbaaquiatu doce mondo ucheẽ nenei nenei sacua

⁷ “Jenyu” i que uchimbaaquiatu doce je ra. Nyeremo nemo ngue embuchao chao mondo ra. Uquirãcuã ngue emee mee ee ra. Aba checuayã icuã jea jea sacua mbia chiangui si. ⁸⁻⁹ —Mbae mo nda jendaochĩ icua. Mbae riru mo abe ra jendaochĩ. Jenyiturã mo abe ra jendaochĩ no. Mbae isiquia abe ra jendaochĩ. Jëiyao nongue mo nda jendaochĩ. Jëirao nongue mo abe ra jendaochĩ no. Jenyitochiquia mii ño jendaõ. ¹⁰ Jengasẽ mose sucha tubiriã mo, aque tuchua mii ño jẽingo uque. Tuchua ra jembuchesea seate chĩ jẽingo mose huee. Ae ra jengue nyii nae, hue tuchua bei chõ jẽingo uque. ¹¹ Sucha tubiriã jenda mo jëisi sereã nea mose, jëhui chõ esi. Hue jenda jeñee andu sereã mose, jëso chõ hue si. Jëi tubi jembutomoto mo ee. Hue jenda huicua icua sacua. Tacheẽ nyecua jëje. Ae ra jeñee isi sereã nae, ùqui nda Dios mbasi tuchi. Uquiatoã nda embasi ja aque mose. Sodoma jenda ra Dios mbasi raque. Gomorra jenda abe no. Ae jeñee isi sereã nae, ùqui nguia ra embasi tuchi Sodoma jenda si. Gomorra jenda abe si, i que Jesús ñee uchimondobi

je ra. ¹² Nyoĩ nyoĩ ja que equia Dios cheẽ nenei nenei mbia je ra. —Jendua si Dios rese, i ite que equia mbia ja je ra. ¹³ Aba checuayã icuã ngue ejea jea tuchi quia mbia chianguĩ si ra. Mbae eĩ quira que equiti quiti quia mbia rasi rese ra. Mbucherõ ja que ra.

Mbia Juan el Bautista iquia

¹⁴ Mbia que jirandu ja Jesús rese cote ra. Herodes abe que jirandu erese ra. Ererecua que ae ra. Juan el Bautista Jesús riqui reĩ Herodes je reaẽ. —Juan ndaaque que quera si ra. Nyebe eriqui nguiã mbae raã jate, i rei que Herodes ra. ¹⁵ Elías Jesús riqui reĩ emo je reaẽ. Dios cheẽ mbuchecuaasa ñiinda Jesús riqui reĩ emo je re no aẽ. ¹⁶ Herodes que jirandu Jesús rese ra. Juan el Bautista eriqui reĩ nguiã ee. —Juan ño eriqui re. Ae ãquĩ achisia. Quera si chõchĩ ere, i rei que Herodes ra. ¹⁷⁻¹⁸ Herodes Juan mondo quiatu quia carcel nyii reaẽ. Nyucua nda cadena je ra. Paama i nda Juan je ra. —Ñde ndenongue ninisi erereco aroneate jẽ! i quiatu que Juan ñee ee nyii ra. Herodes siqui mose nõngue ninisi rese. Herodías, i que enongue ninisi je ra. Felipe, i que enongue je ra. ¹⁹ Herodías que Juan ucuayãte quia ra. —Taiquia, i rei que equia ra. ²⁰ Herodes bite rei que Juan ñee andu ra. Icuayã jiri rei que ra. —Juan turãte que ra jẽ, i que equia Juan ñi nda. Nyebe eriqui nguiã ireĩ ireĩte esi. Nyebe Herodías Juan iquia aroneate nguiã. ²¹ —Co mose chõ jẽ, i que Herodías Herodes mbae cumpleaños mose cote ra. —Jenyu quiaru serese, i que Herodes mbia rerecua ja je ra. Ererecua Galilea jenda ja je. ²² Aque mose que Herodías riirĩ nyuruqui ruqui mbia je ra. Nyucuaaque que ae ra. Herodes ia tuchi que mae nyucuaaque nyuruqui rese ra. Ñee ngue nyucuaaque je ra. —¿Mbae ra amee ndeje re? Echeẽ ño seje. ²³ “Sebite co” nde i mose, aque tamondo ndeje. Sembae ataque tamondo ja ndeje ndebi mose. Acheẽ ñooñoa ño nguiã ndeje a, i que Herodes ñee nyucuaaque je ra. ²⁴ Nyucuaaque que oso ñee usi je ra. —¿Mbae “embu seje” ae ra ee re? i que ñee usi je ra. —“Juan el Bautista ãquĩ ño embu seje”, ere chõ ee, i que esi ra. ²⁵ Nyebe que esi ñee Herodes je cote ra. —Juan el Bautista ãquĩ emee na seje plato ye, i que ñee ee ra. ²⁶ Herodes chosoi que oso serĩ tuchi echeẽ andu mose ra. —Acheẽchĩ se quia ee. A seresenda chi ja quiaru serese a resẽ. ã seandu ja chõchĩ. Nyebe ra secheẽ ambuchebi eã ee, i que Herodes uchianguĩ re ra. ²⁷ Soldado mo ngue emondo cote ra. —Quiatu Juan iquia. Eãquĩ eru seje, i que ñee soldado je ra. ²⁸ Cárcel que esi Juan ãquĩ sia cote ra. Eãquĩ ngue equeru plato ye nyucuaaque je cote ra. Nyucuaaque que emee usi je cote ra. ²⁹ Juan ñimbaaquiatu jirandu mose que echoi eraaque rea cote ra. Ñono ngue sita ndoro ji ye ra.

Jesús mbichae tubiriã saã mbichae mui je

³⁰ Ae Jesús mondo quia uchimbaaquiatu, ùquĩ ngue ngaẽ si ee cote ra. Uchisaã ngue esenei senei cuaẽ ee ra. —Eĩ ure que mbia mbaaquiatu quiatu ra, i que ecuaẽ Jesús mbiirandu ra. ³¹ Mbia tubiriãte que ngaẽ ngaẽ nguia ñindecua ndecua erea ra. Equiaru mose rocoĩ abe. Nyebe ñee nguiã uchimbaaquiatu je. —Nyao rã mbia eãsaa, jenguenea ucua mbiri, i que ra. ³² Ae ae que nyoĩ canoa ye mbia eãsaa ra. ³³ Mbia tubiriã tuchi ngue mae ñochĩ nguiã echoi rese. Jesús icua chõ ngue ra. Mbia que nyoĩ uchã ibi rĩ nda. Sucha jenda ja. Ûquĩ nane ngue nyoĩ ngasẽ Jesús raarõ ama nimia nda. ³⁴ Jesús que usẽ canoa si cote ra. Mbia tubiriã ndese que mae nda. Eya eã

tuchite que erese ra. Oveja raarõ iriã na nguiatu que mbia chi ee ra. Mbia que embaaquiату quiatu tuchi cote ra. ³⁵ Tenda oso mose que echimbaaquiату ñee ndei ee ra. —Tenda osote resê. Mbia chuchua mo âte a resê. ³⁶ Mbia chiurã eã abete a resê. Mbia embui mondo uchurã ndequia requia sacua sucha achi jenda rea rea, i que ñee Jesús je ra. ³⁷ —Jeño mbae jemondo ee echurã, i chõ ngue Jesús ñee ee ra. —Tei. Mbae quia ra aba mondo ee. Mbia tubiriã tuchite quia ñene. Mbae isiquia tubiriã tuchi je quia nda aba mbae isi rei nguiã ña. Mbia chayãte chõ eno nde, i que ñee Jesús je ra. ³⁸ —¿Manya mbichae jendeco ùqui nde? Jêso mae erese no, i que Jesús ee ra. Emo ngue oso mae erese eicua ra. —Cinco mbichae riqu i cõ. Sira nyeremo abe, i que echimbaaquiату mo ñee ee ra. ³⁹ —Sã mbia ngoi ngoi ja quiata tose. Echesea sea, i que Jesús ra. ⁴⁰ Mbia que ngoi ngoi ja nyesea sea cote ra. Cincuenta jaaja. Cien abe no. ⁴¹ Jesús que mbichae cinco sirõ cote ra. Sira nyeremo abe no. Ibei rese que mae gracias i Dios je ra. Mbichae que esiquio quio cote ra. Mee mee ngue uchimbaaquiату je ra. —Jemee mee mbia je, i que uchimbaaquiату je ra. Sira nyeremo abe que esiquio quio mbia ja je ra. ⁴² Mbia ja que eu tuchi ra. Ñimbio chee que ra. ⁴³ Mbia chiu sique tubiriã tuchi que ra. Mbichae rire. Sira rire abe no. Doce iru que mbia mombisê esique sique je ra. ⁴⁴ Cinco mil hombres que mbia mbichaecua ra.

Jesús ngata i arõ

⁴⁵ Aquere que Jesús uchimbaaquiату mondo ja canoa ye ra. —Jê nane jêso Betsaida sobei. Mbia tambui turã na mondo uchuchúaa se nyii, i que ra. ⁴⁶ Jesús que mbia mbui turã mondo cote ra. Ae ae que oso sita ibátee cote ra. Ñee sacua Dios je. ⁴⁷ Huee que ae ae riqui itondaru chee ra. Canoa yenda que chi bei ama ndiite rĩ nda. ⁴⁸ Echimbaaquiату que pare pare i canoa ibu ra. Quiririã ngue eichu ichute eruba quiti ra. Jesús que mae erese ishote ra. Nguira ñee mose que esi eriichã nda. I arõ ngue esi quia ngata ra. Nyucuaño nda eña nde. ⁴⁹ Mbia aingue eriqui rei nguiã echimbaaquiату je. Ngata mose i arõ. Nyebe tasê tasê nguiã. ⁵⁰ Echimbaaquiату chiã ngue cuãacuã i tuchi mae erese ra. —Jêsiquichechĩ nguiã. Jêya chõ ae. Se chõ nyeresê, i que Jesús ñee ee ra. ⁵¹ Ua que canoa ye embirõ cote ra. Quiririã ngue tiba cote ra. Echimbaaquiату que nyuruira tuchi u mae erese ra. ⁵² Jesús mbichae mbeta quia nae, ùqui ngue echimbaaquiату icuayãte uchiangui re ra. —Dios riiri ño eriqui reaê, i âte que eicuayã nda. Eãquĩ âtate chõ ngue ra.

Jesús mbia Genesaret jenda mbucherõ cherõ

⁵³ Ngasê nyee que sobei cote ra. Genesaret, i que hue ibi je ra. ⁵⁴ Jesús usê mose canoa si que mbia eicua jei ra. ⁵⁵ Mbia que nyoi ja uchã tuchua mbuchesea sea ra. Erasi rurucuaê cuaê sacua Jesús je, erua resebe. ⁵⁶ Jesús cuatásaa que mbia riqui erasi rurucuaê cuaê ee ra. Sucha tubiriã jenda jaaja. Sucha mü mü jenda jaaja abe no. Turuquia jenda abe no. Ùqui ja que erasi curucuaê cuaê nguia ñono Jesús jii ra. —Sã erasi oco oco ja rã ndeirao ai rese, i jaaja que ñee Jesús je ra. Ae oco erese nae, ùqui ngue nyerõ ja ra.

7

Mbia chiangui renda ae chõ embicua nguiã

¹ Aquere que fariseos mo ngaê ñee Jesús je ra. Embesasa mo abe, ae ngaê Jerusalén si. ² Jesús chimbaaquiату mo ngue quiaru quiaru echoi quiiriã ee ra. —¿Mbaerã jêingo quiaru jenyoi quiiriã nde? Nanderamei ñee ndui si eã ño

jëingochĩ nde, i que ñee asite ee ra. ³ Fariseos quiarei nyoĩ bei quiaru nonde. Judíos ja abe no. —Nandechoĩ eã mose ra nandechiã mondeite, i rei equia ã. Ngãmei ñee nguire eriqui ũqui naa naa mbei ã. ⁴ Echoĩ quiiriã mose eriqui quiaruã ã. Ngaẽ mose plaza si eriqui nyoĩ nyoĩ tuchi quiaru nonde ã. Ngãmei ñee nguire chõ eriqui nguiã mbae raã ja ã. Sã eriqui uyuquia irei irei no. Nio abe no. Irachaẽ abe no. Uquisa abe no. ⁵ Nyebe fariseos ñee nguiã Jesús je. —¿Mbaerã ndechimbaaquiatu riqui eĩ eã nanderamei ñee nguire re? ¿Mbaerã eriqui quiaru uchoĩ quiiriã nde? i que fariseos ñee Jesús je ra. Embesasa abe no. ⁶ Jesús que ñee ee ra. —Isaías que embesa jenĩ cose ra. Eĩ ngue embesa ra:

Ã mbia riqui ñee turãte raque seje ã.

Uchiangui re quia eriquiãte nguiã serese ã.

⁷ Ñee turãte raque equia seje ã. Amei ñee achõ ño esenei seneichĩ nguiã mbia je.

Dios cheẽ mi nenei nenei ndocoĩ ee, i que Isaías embesa jenĩ nda. ⁸ Jenamei ñee achõ ño jesenei seneichĩ nguiã mbia je ũqui. Dios cheẽ nenei nenei ndocoĩ ee.

⁹ Dios cheẽ jemumba mumba chõ chĩ nguiã ã. Nanderamei ñee ndese chõ jëingochĩ oote ã. ¹⁰ Moisés cheẽ ndui turã eã ño jëingochĩ ã. Sã Moisés ñee mbia je no: “Jeturã ño nguia jendu je jẽ. Jẽsi je abe no. Emo ñee icuã mose ngu je, ũqui jëiquia chõ. Emo ñee icuã mose usi abe je, ũqui abe jëiquia no”, sã i Moisés no. ¹¹ Jẽ nguia jëingo nguiã Moisés cheẽ abi abite ã. Sã jëingo ñee no. “Ae nda amee nei jẽje, ũqui ngue amondo ja Dios je ra”, i mose emo ñee ngu je, “coche ñene” jenyẽ chõchĩ nguiã ee. Mbae mee eã mose ngu je. Usi abe je. Nyebe jëingo nguiã mbia mbaaquiatu icuã icuã ũqui. ¹² ¿Mbaerã jëingo mbia riquisã quisãte mbae meese mose usi je re? Ngu je abe no. ¹³ Nanderamei ñee achõte jësenei seneichĩ nguiã jendiĩri je ã. Nyebe jëingo nguiã Dios cheẽ mbuquiachãte jendiĩri si ã. Mbae icuã atate jësaã saã nguia ã, i que Jesús fariseos je ra. Embesasa abe je. ¹⁴ —Jenyu secheẽ andu, i que Jesús mbia ja je ra. —Secheẽ jëicua rã. ¹⁵ Mbã chũ embũcuã eã nguiã. Echiangui renda chõ embũcuã nguiã. Echiangui renda chõ usẽ nguiã echuru rĩ echeẽ mose. ũqui ño embũcuã nguiã. ¹⁶ Jëisa mose, secheẽ jeñandu turã na, i que Jesús ra. ¹⁷ Jesús que mbã secha oso ique tuchúaa ra. Echimbaaquiatu que ñee ee cote ra. —Erecheẽ ngue namo, “ũqui nda mbã mbũcuã” ere que, ũqui embuchecua rã ndecheẽ ure je, i que ñee Jesús je ra. ¹⁸ Jesús que ñee ee ra. —¿Jẽ abe jëicuayãte quia re? Ae mbã u quia nae, ũqui mbã mbũcuã eã nguiã. ¹⁹ Iqueã nda oso echiangui re. Erie ye chõ eriqui nguiã oso. Echiquere rui chõ eriqui nguiã oso. Usẽ nyee, i que Jesús ñee uchimbaaquiatu je ra. —Mbã chũ turã ja, i chõ nguiã. ²⁰ —Mbã chiangui renda chõ embũcuã nguiã usẽ mose echuru rĩ. ²¹ Aba chiangui renda quia aba mundua icuã icuãte nguiã. Nyebe eriqui nguiã siqui emo ninisi resẽ. Emo ndu rese abe no. Siqui siqui eruã ndese abe no. Mbã abe iguia iguia. ²² Mbae abe mbuquiachã quia chã no. “Aque raã nda sembaerã ña”, i emo mbae je no. Mbae icuã ñumumbara raã naa ja. Mbã abe mbũrĩ rĩ no. Mbae icuã oseĩ oseĩ bei. “Se quiatu ae”, i mbae je. Ñee icuã icuã no. Ucuasu abe raã naa no. Mbae icuã naa ja chooño. ²³ Mbã chiangui renda icuã ja chõ ũqui nde. ũqui ño mbã mbũcuã icuã nguiã ũqui ao ao mose, i que Jesús ra.

Ari mo Jesús icua

²⁴ Jesús que nyoï hue recha cote ra. Ngasē ngue Tiro jii cote ra. Sidón jii abe no. Ique que oso tuchia mo nda. —Sā mbia jiranua serese, i rei que ra. Mbia qu e jirandu chō erese ra. ²⁵ Ari mo abe que jirandu erese ra. Eriirī ngue aba checuayā ngueroco uchiangui re ra. Ari que tu Jesús rea ra. Ngūiā ndese que ngoï ejii ra. ²⁶ Sirofenisia jenda que ae ra. Judío eā tuchi que ae ra. Griego cheē ño ngue echeē nde. —Aba checuayā icuā ejea rā seriirī si, i tuchi que Jesús je ra. ²⁷ Jesús que ñee ee ra. —Judíos rese rane taico mbae raā naa. Ahui aronea judíos si, mbae raā naa mbiamo je, i que Jesús ee ra. ²⁸ Ari que ñee ee ra. —Aicuate raque se, Sererecua. Mbiamo ndaque ure. Judíos eā ndaque ure. Ure je abe chō mbae esaā ae. Seriirī embucherō seje ae, i que ari ñee ee ra. ²⁹ Jesús que ñee ee ra. —Erecheē turāte. Quiatu rei. Nderiirī ngue nyerō no, i que ee ra. ³⁰ Ari que oso uchuchúaa cote ra. I que eriirī u ngua ye ee cote ra. Aba checuayā icuā usē ño ngui a esi reaē.

Jesús eisayā mbucherō

³¹ Jesús que nyebi Tiro rurubi si ra. Sidón ngue etasamo nda. Ama ndisha Galiléaa que esi ra. Decápolis rī ngue esi ra. ³² Eisayā mo ngue mbia curucuaē ee ra. Echeē aquiatuāte abe que ra. —Ndeo echono earō embucherō, i tuchi que mbia Jesús je ra. ³³ Jesús que eisayā nguerao pe jiri mbia recha ra. O que emingue mondo eisacia rereco chobei ra. O que embia ngūendi je ra. Mondo que echuru rī cote ra. ³⁴ Soboiba que ibate cote ra. Jiabute que ñee ee ra. —Esoro, eisacia, i que ee ra. ³⁵ Eisacia que soro cote ra. Echuru abe que nyerō cote ra. Ñee ngue cote ra. ³⁶ —Emo nda jembiiRANDUCHĪ jē, i rei que Jesús ñee mbia je ra. Mbia que ñmbiirandu i i tuchi ra. ³⁷ Mbia que ñee ñee nyue Jesús rīi nda. —Mbae raā turā turā ja tuchichī equi a co. Eisayā abe isa ndoro chee no. Echeē ngūiā abe mbucheē nyee no, i ja tuchi que mbia quia nyuruira mae erese ra.

8

Jesús mbichae tubiriā saā mbichae mii je

¹ Mbia que ñmunua tuchi Jesús je aque mose ra. Ñee ngue uchimbaaquiātu je ra. ² —Seya eāte aico ā mbia tubiriā ndese co. A echi arete serese tres días a. Echirurā mo eāte mbae mo aa. ³ Eriācuā amondo sereāte echuchúaa. Ngasē āte chō ndae. Ishote si ecuāē aa resē. Nandembuquiaru chō aa, i que Jesús ra. ⁴ Echimbaaquiātu que ñee ee ra. —Turuquia re chō nandeico a resē. ¿Mañi nda aba ā mbuquiaru ja re? i que ñee Jesús je ra. ⁵ —¿Manya mbichae jendeco re? i que Jesús ee ra. —Siete, i que ee ra. ⁶ Jesús que mbia mbucoi ja ibii ra. Mbichae siete que eisi ja o je cote ra. Gracias i que Dios je cote ra. Mbichae qu e esiquio quio mee uchimbaaquiātu je cote ra. Ūquī ngue embuchao chao mbia tubiriā je cote ra. ⁷ Sira ñetē mii abe que equereco ra. Gracias i que Jesús Dios je cote ra. —Sira abe jembuchao chao mbia je, i abe que ee ra. ⁸ Mbia que eu ja ñimbio chee ra. Echiu sique que emunua nua ja ra. Siete iru que emombisē nyee ra. ⁹ Mbichaecua rei mbia cuatro mil. Jesús que embui turā mondo cote ra. ¹⁰ Canoa ye que Jesús ua uchimbaaquiātu rese cote ra. Nyoï que Dalmanútaa ra.

Mbia mae sayā eteacuquia ure je, i fariseos

¹¹ —Tā nande rā Jesús je, i que fariseos cuaē ñee ñee ee ra. —Mbia mae sayā esaā na ure je. I nda “Dios chĩmbu” ure tuchi ndeje, i rei que ñee Jesús je ra.

¹² Jesús que iabu tuchi ñee nda. —¿Mbaerã mbia riqui “mbia mae sayã esaã ure je” i tuchi re? Tacheẽ nyecua jêje. Mbia mae sayã mo nda ateacuquia eã tuchi jêje, i que Jesús ñee ee ra. ¹³ Oso que mbia recha cote ra. Iasa que echoi sobei cote ra.

Fariseos mbia mbaaquiato icuã, i Jesús

¹⁴ Jesús chimbbaaquiato que uchuurã curuchoi eã nda. Tesarei que esi ra. Mbichae mii tuchi que equeru huee ra. ¹⁵ Jesús que ñee ee ra. —Mbichae mbuchimatãsa rã ndei fariseos cheẽ. Herodes chimbbaaquiato cheẽ abe no. Ūquí ñee ndese ra jêingochĩ jê, i que Jesús ee ra. ¹⁶ —Mbichae quiato ngue nanderuã nguiã. Nyebe eriqui nguiã ñee nande je ũquí, i rei que echimbbaaquiato ñee nyue ra. ¹⁷ Jesús que echeẽ ñee icuate ra. Nyebe ñee nguiã ee. —¿Mbaerã jêingo “mbichae nanderuãchĩ” i re? ¿Ae rii aico ñee jêje nae, ũquí jêicuayã mbeite quia re? ¿Jeñia ãtã mbeite eriqui re? ¹⁸ Jêisate raque. ¿Secheẽ jeñanua mbeite quia re? Jendesate raque. ¿Sechisaã jêicuayã mbeite quia re? ¹⁹ Se mbichae cinco mbeta mose mbia cinco mil je, ¿manyã iru jemombisẽ mbichae sique sique je re? i que Jesús ee ra. Doce, i que ee ra. ²⁰ —Mbichae siete mbeta mose mbia cuatro mil je, ¿manyã iru jemombisẽ esique sique je re no? i que Jesús ee ra. Siete, i que ee ra. ²¹ —¿Jêingo secheẽ icuayã i ite ã nde? i que Jesús ee ra.

Jesús eresayã mo mbucherõ

²² Nyoï que Betsaida cote ra. Mbia que amei ndesayã mo ngurucuaẽ Jesús je ra. Oco sacuaã erese embucherõ. ²³ Jesús que eo isi serao pe jiri sucha si cote ra. Ngüendi que equiti eresa rese ra. O que echono earõ nda. —¿Eremaete mbae rese cote re? i que ee ra. ²⁴ Eresayã ngue mae cote ra. —Mbia rese amaete cote. Ecuata rese amaete. Ira raãte mbia seje, i que eresayã nda. ²⁵ Jesús que o chonombe eresa rese ra. Mae turã ngue cote ra. Nyerõ tuchi que cote ra. ²⁶ Jesús que embui mondo uchuchúaa ra. —Eresochĩ nda sucha ite rĩ jê, i que ee ra.

Cristo chõ nde resẽ, i Pedro Jesús je

²⁷ Jesús que nyoï Cesarea de Filípoo cote ra. Huee que ñee uchimbbaaquiato je cote ra. —¿Aba aico reĩ mbia je re? i que ee ra. ²⁸ Echimbbaaquiato que ñee ee ra. —Juan el Bautista ereico reĩ nguiã mbia je co. Elías ereico reĩ nguiã emo je no. Dios cheẽ nenei neneisa mo ereico reĩ nguiã emo je no, i que echimbbaaquiato ñee Jesús je ra. ²⁹ —¿Aba aico reĩ jêje co re? i que Jesús ee ra. —Cristo chõ nde resẽ, i que Pedro ñee ee ra. ³⁰ —Jeñeechĩ nda mbia mo je ũquí jê, i que Jesús ee ra.

Mbia ra seiquia, i Jesús

³¹ Jesús que umano nonde senei senei uchimbbaaquiato je ra. —Mbae rasi ra asaã tuchi. Judíos ramei icuã icuã tuchi ra seje. Sacerdotes rerecua abe no. Embesasa abe no. Seiquia rae. Tres días mose ra aquera si, i que ñee uchimbbaaquiato je ra. ³² Jesús que ñee nyecua tuchi ee ra. Nyebe Pedro Jesús rerao nguiã suruicha. —¿Mbaerã erecheẽ ũquí nde? Mbia ra ndeiquiayã, i rei que Pedro ñee asite Jesús je ra. ³³ Jesús que uba mae uchimbbaaquiato rese ra. Ñee ngue Pedro je ra. —Ehui chõ sesi, Satanás. Mbia ndua ndua rã ño ereico nguiã ndua. Dios ndua ndua rã eã, i que ñee Pedro je ra.

³⁴ Jesús que ñee uchimbbaaquiato ja je cote ra. Mbia abe je. —Emo siquise mose seruí, sã hui ja mbae ubi si. Sã cruz rui umbaerã se rã si. Sã eriqui seruí

bei cote. ³⁵ Emo ndua bei mose nguenco rese, ereco ra ua esi. Emo hui mose nguenco si seje, ũquí nda siqui bei. ³⁶ Emo nguenco mumba chooño mose, eya eã mbei rae. Mbaecha rete raque. ³⁷ Emo nguenco mumba chooño mose, mbae mo eãte ereco ribishorõ sacua. ³⁸ Emo ireĩ ireĩ mose sesi mbia icua ndesaa, se abe ra aireĩ ireĩ esi. Emo ireĩ ireĩ mose secheẽ si, se abe ra aireĩ ireĩ esi, sechu mose mbia rerecuarã. Dios ra sembu si ibii uquirãcuã je aque mose. Ibatenda rese ra achu ángeles, i que Jesús ee ra.

9

¹ —Tacheẽ nyecua jêje. A jengu a nae, jemo nda jemaẽ sechu rese. Achu ra mbia rerecuarã tuchi cote. Jemo jemano eã mose ra achu mbia rerecuarã tuchi cote, i que Jesús ee ra.

Jesús nyicuabo uchimbaaquiato résaa

² Tenda seis uare que Jesús uchimbaaquiato mo nderao sita ibátee ra. Pedro. Jacobo. Juan abe no. ũquí ngue equerao ja mbia tiãsa ra. Jesús que nyicuabo erésaa huee ra. Enininya tuchi que ee ra. ³ Eirao abe nininya tuchi que ra. Eiraoshĩ nininya tuchi que ee ra. ⁴ Mbua nyeremo ngue ngaẽ ibate si ra. Ñee ñee ngue ecuaẽ Jesús nininya rese ra. Moisés que ũquí nda. Elías rese. ⁵ Pedro que ñee Jesús je ra. —Sererecuã, nandecu turãte a. Sucha ñetẽ uresaã saã na. Enongue nembraẽ. Enongue Moisés mbaerã. Enongue Elías mbaerã no, i rei que Pedro ñee Jesús je ra. ⁶ Echimbaaquiato siquichete quiatu ngue re. Nyebe Pedro riqui nguiã “mañi nda aba re” ite. ⁷ Ibeishĩ ngue tu nguichi eite re cote ra. Moisés mbuchecuaỹa ee. Elías abe no. Echeẽ mo ngue echandu ibeishĩ qui re ra. —Co rei sebi tuchi seriirĩ co. Echeẽ jeñandu bei quia, i que Dios ñee ee ibeishĩ qui re ra. ⁸ Echimbaaquiato mae mose que Jesús maĩ ndiqui ee cote ra. Moisés que nyecuaỹa asi ee ra. Elías abe.

⁹ Ecuaẽ mose nguichi sita ibate si que Jesús ñee ee ra. —Ae rese jemaẽ namo nae, ũquí je jenyecuachõ jê. Sequera si mose quiato teñee ñee mbia je cote. Semano nonde eã, i que Jesús ñee uchimbaaquiato je ra. ¹⁰ Nyebe ñee eã nguiã emo je. —¿Mbaerã eriqui “se quera si mose” i re? i que ndua ndua ñee nyue ra. ¹¹ Ñee ngue Jesús je cote ra. —¿Mbaerã embesasa ñee nde? “Elías rane nda tu Cristo si” i re, i que ñee Jesús je ra. ¹² Jesús que ñee ee ra. —Ae bei. Coche Elías rane tu nguiã mbae mbitorõ ja. ¿Mbae i chõ embesa ji quia Cristo rĩ ña? “Mbae rasi ra esaã tuchi”, i chõ nguiã. “Mbua ra eucuaỹa tuchi”, i chõ nguiã no. ¹³ Elías que tu no. Mbua icua icua tuchi que ee ra. Sã embesa ji ñee nyii no. Eĩ si tuchi que ra, i que Jesús ñee ee ra.

Jesús aba checuayã jea mbia ririĩ mo si

¹⁴ Ngasẽ ngue ehoi echimbaaquiato ataque je cote ra. Mbua tubiriã tuchi que chi echimbaaquiato mama huee ra. I que embesasa u ñee icua icua echimbaaquiato je huee ra. ¹⁵ Jesús ngasẽ mose que mbua nyuruira tuchi mae erese ra. Oo tuchi que erese ra. ¹⁶ —¿Mbae rĩ jẽingo ñee icua icua te jenyue re? i que Jesús ñee mbia je ra. ¹⁷ Emo ngue ñee Jesús je ra. —Sererecuã, seriirĩ aru quia ndeje co. Nde embucherõ sacua. Aba checuayã icua equereco uchiangui re co. Nyebe eriqui nguiã ñee eãte co. ¹⁸ Aba checuayã icua ndiqui seriirĩ isi isi beite co. Mbucoi coi beite equia ibi co. Echuru abe mbichoite. Urei abe quitu quitite. Nyebe equirãcuã neate riqui nguiã co. “Aba checuayã jêjea seriirĩ si”, ae rei que ndechimbaaquiato je ra. Eaquiatoate chõ ngue ra, i que eru ñee Jesús je ra. ¹⁹ Jesús que ñee cote ra. —¿Mañi jenyue quia seicuaỹate

re? ¿Ñimbirācuā mbeite ra aba quia jēje re? i que Jesús ra. —Eriirī jendu rā seje, i que cote ra. ²⁰ Eriirī ngue ecurucuaē ee cote ra. Aba checuayā ngue eriirī mburirite Jesús rese mae mose ra. Mbucoi que íbii ra. Mbuchishao shao tuchi que ra. Echuru mbichoí tuchi que ra. ²¹ —¿Manosete aba checuayā ndiqui ererequia re? i que Jesús eru je ra. —Eñetē mosebe bei, i que eru ra. ²² —Tátaa eriqui emondo mondo beite co. Ama ye abe. Eriichará. Nde ejea aquiatu mose, ejea rā esi ure je, i que eru ñee Jesús je ra. ²³ Jesús que ñee ee ra. —¿Mbaerā ereico “nde aquiatu mose” i seje re? Ae seicua quia nae, ũquĩ je aico mbae rā aquiatu jate co resē, i que Jesús ee ra. ²⁴ Eru que ñee ee ra. —Areicuate se resē. Semingo uquiabe jiri nderese ae, i que eru ucheē mumbebote ñee Jesús je ra. ²⁵ I que mbia cuaē nguia ñumunua nua tuchi huee ra. Nyebe Jesús ñee asi nguia aba checuayā icuā je. —Aba cheuayā, mbia isa erembiataote quia hue. Erembucheē nguia te abe equia hue. Esē oso esi. Eriique sichĩ nda oso echiangui re jē, i que Jesús ee ra. ²⁶ Aba checuayā ngue tasēte eriirī mburiri cote ra. Usē oso cote. Eraaque rā ngue eriirī nyi cote ra. Mano nei nguia mbia je. ²⁷ Jesús que emua eo rese ra. Juā turā ngue cote ra. ²⁸ Jesús que oso ique tuchúaa cote ra. Echimbaaquiatu que ñee ee mbia tiámbaa cote ra. —¿Mbaerā aba checuayā useā oso urecheē mose ure re? i que ñee ee ra. ²⁹ Jesús que ñee ee ra. —Jeñee eā mose Dios je, ā jējea aroneate. Jēhui eā mose jenyi si, ā jējea aroneate no, i que Jesús ee ra.

Mbia ra sei quia, i si Jesús

³⁰ Galilea rĩ ngue ehoi hue si ra. —Sā mbia jiranua nanderese, nandeso mose hue rĩ, i que Jesús ñee uchimbaaquiatu je ra. ³¹ Uchimbaaquiatu ae que embaaquiatu quiatu oso quia ñeenda rui ra. —Emo nda semee mbia icuā je sei quia sacuā. Sei quia ji ra aquera si tres días mose, i que equia embaaquiatu quiatu ñeenda rui ra. ³² Echimbaaquiatu que echeē icuayāte quia ra. —Ndecheē embiasa asa tuchi rā ure je, i āte que equia ee ra. Ireĩ ireite quiatu que equia esi ra.

Ererecua tuchi ra se, i jaaja Jesús chimbaaquiatu nyue

³³ Ngasē ngue Capernaum nda. Tuchúaa ique mose que ñee uchimbaaquiatu je ra. —¿Mbae rĩ jenyu quia ñee icuā icuāte jenyue ñeenda rui re? i que ee ra. ³⁴ Quiriri ja chō ngue u ñee ndocoi ee ra. —Ererecuarā nda se cote, i jaaja chō equia nyue ñeenda rui reaē. Nyebe eriqui ireĩ ireite Jesús si re. ³⁵ Jesús que ngoi cote ra. —Jenyu ja rā. Tacheē jē ja je, i que uchimbaaquiatu doce je ra. —“Ererecuarā se” i mose emo, sā uataque rimbarā ño eriqui, i que Jesús ee ra. ³⁶ Äquē mo ngue emii eite re cote ra. Sui que ñee uchimbaaquiatu je ra. ³⁷ —Ae siqui turā nguia mbi a ririĩ je seriĩ nae, seje abe chō eriqui nguia siqui turā. Ae eturā ndiqui seje nae, semondosa abe je chō eturā ndiqui nguia, i que Jesús ee ra.

Emo icuā eā mose nande je, nanderesenda chō ũquĩ nde

³⁸ Juan ngue ñee Jesús je ra. —Pe emo nyi aba checuayā ndirō ndirō mbia si nderĩ pe. Uremae ngue erese ra. Aque eriqui āte nanderese aque. Nyebe uresiquisā nguia, i que Juan Jesús je ra. ³⁹ Jesús que ñee ee ra. —Tei. ¡Ñesiquisā quisāchĩ nda jē! Emo mbia mae sayā naa mose seriĩ, ñee icuā eā nda seje aquere. ⁴⁰ Emo icuā eā mose nande je, nanderesenda chō ũquĩ nde. ⁴¹ Emo sechimbaaquiatu isei mbiu turā mose seriĩ, Dios abe ra mbae turā mondo aque je.

Mbae icuã nda nandesã uquiachĩ emo je

⁴² Ae ra mbae icuã saã uquia seicuasa mo je nae, ũquĩ nda mbae rasi saã tuchi cote. Ũquĩ nda aba mombo chõ ama ndisha ye nyii re chã. Sita resebe ecua ji mondo. † nda mbae icuã naa uquia eãte rei seicuasa je. ⁴³ Ndeo nemingo mose mbae icuã ndese, ndeo echisia mombo. Coche rei ra ereso ibate ndeo m̃i Nderequia, siqui bei sacua huee. Oso rocoĩ tata cuásuu, ndeo nyeremo nderao. Tata mungue aronea tuchi chõ hue jenda re. ⁴⁴ Mbae rosei ra manoa mbei huee. Tata ra uqueã mbei huee no. ⁴⁵ Ndei nemingo mose mbae icuã ndese, ndei echisia mombo. Coche rei ra ereso ibate ndei m̃i nderequia, siqui bei sacua huee. Nemombo rocoĩ tata cuásuu, ndei nyeremo nderao. Tata mungue aronea tuchi chõ hue jenda re. ⁴⁶ Mbae rosei ra manoa mbei huee. Tata ra uqueã mbei huee no. ⁴⁷ Nderesa nemingo mose mbae icuã ndese, nderesa echoo. Coche rei ra ereso Dios recua nderesa m̃i nderequia. Nemombo rocoĩ tata cuásuu, nderesa nyeremo nderao. ⁴⁸ Mbae rosei ra manoa mbei huee. Tata ra uqueã mbei huee no. ⁴⁹ Tata ra mbia sei bei huee. ⁵⁰ Embiquesa rã ño jëingo nguiã mbia je ã. Sã embiquesa turãte no. Eise quiachamba mose, eicuã tuchi ra cote. Embiquesa rã tuchi chõ jëingo mbia je. Jëingo turã ño nguia jenyiese, i que Jesús ee ra.

10

Jesús ñee mbia ngüinisi mombo je r̃i

¹ Jesús que ngata si oso cote ra. Judéaa que esi ra. Ama Jordán ndobei que esi sobei cote ra. Mbia que ñumunua nua tuchi quia ee ra. Mbaaquiato quiatu que equia ra. Sã eriqui mbia mbaaquiato quiatu beite no. ² Fariseos mo abe que ngaẽ erea ra. —Tã nande Jesús je no. Ma ñee Dios cheẽ abi, i que ñee nyue ra. —¿Coche mbia ngüinisi jea ubiã mose re? i que ñee Jesús je cote ra. ³ —¿Mbae i Moisés embesa re? i que Jesús ee ra. ⁴ Fariseos que ñee ee ra. —“Jeninisi jea nonde, papel mbesa ji jemondo ee”, i que Moisés ra, i que ra. ⁵ Jesús que ñee ee ra. —Jeãquĩ átãte quiatu ngue re. Nyebe Moisés ũquĩ mbesa nguiã jëje. ⁶ Ũquĩ i ãte que Dios quia mbia ao ramo mose nyii ra. Dios mbia ao mose, nyeremo ngue echao ra. Erãcuẽ ngue echao ra. Eninisirã abe que echao no nda. ⁷ Nyebe ra emo ndiqui ngüinisi rese bei. Ngu si isho. Usi si abe no. Ngüinisi m̃i ndese siqui bei sacua. ⁸ Co m̃i na siqui sacua nyiese cote. Nyeremo siqui rã eã ño cote re. Co m̃i siqui rã ño ũquĩ cote re. ⁹ Ae Dios mbucha nyiese nae, sã ũquĩ hui eã mbei nyesi, i que Jesús ñee fariseos je ra.

¹⁰ Ngasẽ mose tuchúaa que echimbaaquiato ñeembe ee ra. —Ndecheẽ embiasa turã na ure je, i que ee ra. ¹¹ Jesús que ñee ee ra. —Ae ngüinisi jea nae, emo ndese siqui sacua nae, eicuã tuchi chõ ũquĩ nde. Adulterio i que ũquĩ je ra. ¹² Cuña mo ngu jea mose siqui sacua emo ndese, eicuã tuchi chõ ũquĩ no nde, i que Jesús ee ra.

Jesús mbia riirĩ isi turã turã

¹³ Mbia que ngüirĩ ngurucuaẽ cuaẽ nguia Jesús je ra. Jesús oco oco sacua erese. —¿Mbaerã jendiirĩ jendu quia co re? i rei que echimbaaquiato ñee mbia je ra. ¹⁴ Jesús que paama i ñee uchimbaaquiato je ra. —Jeñeechĩ nguiã ee. Sã ae ae riqui ngüirĩ ndurucuaẽ cuaẽ seje. Eĩ ño Dios rimba nguiã. Ucuasu raã naa eã. Mbia riirĩ na. ¹⁵ Mbia riirĩ na ño jëingo Dios isi turã. †

mose ra Dios rimba tuchi jê cote, i que Jesús ra. ¹⁶ Mbia riirĩ ngue esui sui ra. O que echono ñono earõ nda. Ñee turã ngue Dios je erĩ nda.

Acuanĩndu mbaecha mo ñee Jesús je

¹⁷ Acuanĩndu mo ngue tu Jesús je ra. —Mbia mbaaquiatusa turãte nde. ¿Mbae turã mo nda asaã Dios je semingo bei sacua nde? i que ñee Jesús je ra. ¹⁸ Jesús que ñee ee ra. —¿Mbaerã ereico “eturã” i seje re? Dios mii ño eturã ndesê. ¹⁹ Dios cheẽ emumbayã. Echeẽ ereicuate quia co resê: “Emo ninisi rese ra ereicochĩ. Mbia ra ereiquiachĩ. Mbae ra erembuquiachãchĩ. Erecehẽ ñooñoohĩ nda emo nã. Emo nda erembĩrĩ irĩchĩ. Ndeturã ño nderu je. Ndesi abe je”, i que Dios cheẽ nda, i que Jesús ñee ee ra. ²⁰ Acuanĩndu que ñee ndei ee ra. —Ūquĩ ngue amumbayã ja bei quia ra. Señetê mosenda bei, i rei que ñee Jesús je ra. ²¹ Jesús que nyeseuca tuchi mae mose erese ra. —Ã mii mo abe eresaã eãte. Nembae emondo mondo ja mbia mbaecha reã je. Nde ũquĩ naa mose, mbae tubiriã nda nembae ndeico mose ibate. Nembae mondo ja mose mbaecha reã je, serui eico cote, i que Jesús ee ra. ²² Acuanĩndu Jesús cheẽ andu mose que echĩã ndoso tuchi cote ra. Eya eã tuchi que oso Jesús recha ra. Mbaecha tuchite quiatu ngue ae re.

²³ Jesús que mae mbia rese ra. —Mbaranguiatu ãte mbaecha je ngasê sacua ibate, siqui bei sacua huee, i que ñee uchĩmbaquiatu je ra. ²⁴ Echĩmbaquiatu que nyuruira tuchi eandu ra. Jesús que ñeembe ee ra. —Ae ndua ndua beite quia umbae tubiriã ndese, mbaranguiatu ãte ũquĩ je oso sacua ibate Dios rese. ²⁵ Sã ticuasú mo ndiqui oso aroneate ique aguja sorei rĩ no. Eĩ si chõ mbaecha no nde. Oso aronea ibate Dios rese, i que Jesús ee ra. ²⁶ Echĩmbaquiatu que nyuruira tuchibe u eandu no nda. —¿Aba quiatu ra oso Dios rea ibate re no? i que ñee nyue ra. ²⁷ Jesús que mae erese ñee ee ra. —Ae mbia saã aroneate quia nae, Dios mii ño nda esaã, i que Jesús ee ra. ²⁸ Pedro que ñee Jesús je ra. —Ure que urembae uresecha ja ra. Siqui sacua nderui, i que Pedro ñee nda. ²⁹ Jesús que ñee ee ra. —Tacheẽ nyecua jêje. Emo umbae secha ja mose siqui sacua serui, embae ra asibishorõ tuchi ee cote. Ae uchuchua secha. Ae ngõngue secha. Ae ngu secha. Ae usi secha. Ae nguĩrĩ secha. Ae umbae ibi secha no. ³⁰ Ūquĩ mbae ja ra asibishorõ tuchi cien veces ereco mose íbii. Echuchua ata. Enongue ata. Esi ata. Eriirĩ ata. Ibi ata abe no. Ūquĩ ja ra asibishorõ tuchi ee. Mbia icua icua tuchi ra ee serĩ. Aquere ra siqui bei tuchi Dios rese ibate cote. ³¹ Ae ererecua saã saã nguia namo nae, ererecua eã tuchi ra ũquĩ m o cote. Ae ererecua eã namo nae, ũquĩ mo nda ererecua cote, i que Jesús ra.

Mbia ra seiquia, i si Jesús

³² Jerusalén ngue echoi quia ra. Jesús que oso quia enonde ra. Echĩmbaquiatu que siquichete nyoi quia ra. Nyebe Jesús ererao nguĩã mbia tiãsa ñee sacua ee. ³³ —Co nyao quia Jerusalén co. Huee ra mbia semee sacerdotes rerecua je. Embesaa abe je. “Jesús jêiquia”, i ra serĩ. Semee nda judíos eã je cote. Seiquia sacua. ³⁴ Mbia ra secheẽ saã saã. Seiruã nua abe ra eno. Sembucha chee ra iquia ira rese. Tres nyaashĩ mose ra aquera si, i que Jesús ñee ee ra.

Ererecuarã se, i raque Jacobo, Juan ndese

³⁵ Jacobo que oso Jesús riichã ngõngue rese ra. Juan, i equia ee. Zebedeo riirĩ ndei ũquĩ. —Urechu ñee ndeje aa, Urembaaquiatusa. Ae rĩ nda urecheẽ

ndeje nae, ũquí je “eno” ere rã ure je, i rei que ee ra. ³⁶—¿Mbae ra aba saã jêje re? i que Jesús ee ra. ³⁷—Ndeico mose ererecua tuchi, sã ure abe ureico ererecuarã nderese. Sã urecoi ja u ndejii. Co mii chí ndequiatio cuti. Enonge chí ndequiatio cutiã no, i rei que ñee Jesús je ra. ³⁸ Jesús que ñee ee ra. —Ae rii jêingo ñee seje nae, jêirandu turã eãte ũquí ndese. Ae rasi ra asaã tuchi nae, çũquí ndasi ra jêsaã jê abe re? Bautizar i ra seje, çẽi nda bautizar i jê abe je re? i que Jesús ee ra. ³⁹ “Ae” i que ñee ee ra. Jesús que ñee ee cote ra. —Ae bei. Ae rasi ra asaã tuchi nae, ũquí ndasi ra jêsaã tuchi rei jê abe. Bautizar i ra seje, eĩ si rei ra bautizar i jêje no. ⁴⁰ “Ererecuarã ure”, jenyere rei que seje, ũquí asaã aroneate se jêje. Paba ae quiatu ra ũquí saã. A e ebite, ũquí nda emii ererecuarã, i que Jesús ra. ⁴¹ Echimbaaquiato ataque que jirandu erese ra. Echimbaaquiato diez. Paama i que Jacobo je ra. Juan je abe. ⁴² Jesús que “jenyu” i ñee uchimbaaquiato ja je cote ra. —Mbia ataque rerecua riqui ucuaasu raã naa tuchi ngũimba je ũquí. ⁴³ Ũquí nda jêsaã eã jê. “Ererecua ra se”, i mose jemo, sã ũquí siquichõ uataque rimbarã. ⁴⁴ Jemo “se rane jê” i mose, sã ũquí ndiqui bei mbae turã naa uataque je no. ⁴⁵ “Sã mbia mbae turã naa naa seje”, ae eã ngue u ra. “Se quiatu mbae turã tasaã saã oso mbia je”, ae u nguiã. Co achu quia mano mbia tubiriã ndiquicharõ sacua co, i que Jesús ñee nda.

Jesús Bartimeo ndesayã mbucherõ

⁴⁶ Jesús que ngasẽ Jericoo ra. Uchimbaaquiato rese. Jesús ngata mose huee si, mbia tubiriãte que nyoĩ quia erui ra. Eresayã mo ngue chí ñeenda jie huee ra. Ache ache i que huĩ nda. Bartimeo, i equia ee. Timeo ndiiri ngue ae ra. ⁴⁷ Jirandu mose Jesús rese que ñeemombo mombo ee ra. —¡Jesús! ¡David nducucha! ¡Ndeya eã ño serese jê! i que ee ra. ⁴⁸ —¡Equiriri chõ jê! i tuchi rei que mbia ñee ee ra. —¡Sererecua! ¡David nducucha! ¡Ndeya eã ño serese jê! ibe que eresayã ñee Jesús je ra. ⁴⁹ Jesús que tiba ra. —Eresayã jendu rã, i que ra. Mbia que ñee eresayã je ra. —Ndeya chõ jê. Ehuã. Jesús riqui ñee ndeje a, i que ee ra. ⁵⁰ Juã asi que oso oo Jesús rese ra. Uchiatiquia recha. ⁵¹ —¿Mañi ae ra ndeje re? i que Jesús ñee ee ra. —Serese embuturã na, Sererecua, i que ra. ⁵² Jesús que ñee ee ra. —Eso cote. Seicuate que se ra. Nyebe nderesa nyerõ nguiã cote, i que ee ra. Aque mose tuchi que eresayã ndesa turã ja cote ra. Jesús rui que esi quia cote ra.

11

Jesús ngasẽ Jerusalén

¹ Jesús que Jerusalén curubite nyoĩ quia ra. Betfagé, i que huee sucha je ra. Ibi ibate mo abe que chí huee ra. Monte de los Olivos, i que ee ra. Huee si que Jesús uchimbaaquiato nyeremo mo mondo ra. ² Ñee ngue ee ra. —Achi sucha chõ jêso rã. Jengasẽ namo mose ra burro riri cuasa mo ñi jêje huee. Emo ngue nyui eãte eátoo ra. Jenyura seru seje. ³ Emo ñee mose jêje, “¿mbaerã nda jenyura re?” i mose jêje, jeñee ee. “Nandererecua que ‘jendu’ i ra. Mondo jeibe ra jêje”, jenyere ee, i que Jesús ñee ũquí nyeremo mondo ra. ⁴ Nyoĩ que erea cote ra. Burro riri ngue etea Jesús cheẽ ngueire cote ra. Ecuasa que chí taicueve eiquesa jii ra. Nyura que cote ra. ⁵ Ae mbia chí huee nae, ũquí mo ngue ñee ee ra. —¿Mbae rese jêingo huee re? ¿Mbaerã jêingo era era re? i que ee ra. ⁶ Jesús cheẽ ndui si que ũquí ñee ee ra. “Eno” i que mbia ee cote ra.

7 Burro riirĩ ngue ecuruchoi Jesús je cote ra. Huĩrao que echono ñono earõ nda. Jesús que nyui eátoo cote ra. 8 Jesús que ngata oso quia burro átoo cote ra. Mbia tubiriã ngue huĩrao mbiitee tee nyoi quia ibi rĩ enonde ra. Emo ngue sindo mbiitee tee choi quia enonde no nda. Jesús oso sacua hue rĩ. 9 Mbia ia tuchi que tasẽ tasẽ nyoi quia enonde ra. Eruĩ abe no. —Co nandererecua ru quia ngasẽte co. Co Dios chĩmbu ru quia ngasẽte nande je co. 10 David nducucha ru quia co. Nandererecua turã sacua. Dios turã tuchi riqui nande je co, i tuchi que mbia quia ñee nda. 11 Jesús que ngasẽ Jerusalén cote ra. I que que oso Dios chuchua cote ra. Mae ja mose mbae rese que esi Betania uchĩmbaquiату rese cote ra. Tenda quiату ngue osote nguiã ee.

Jesús ñee icuã higo i je

12 I que Jesús choi quia Betania si isamami nda. Eriãcuãte que oso quia ra. 13 Isho que mae higo i mo ndese ra. Ero rerecua que ra. —Ea mo tau, i rei que oso erea ra. Ero achõte chõ ngue ee ra. Aque mose que eriqui ia eã nda. 14 Jesús que ñee higo i je cote ra. —Mbia ra ndea u eã mbei cote, i que ee ra. Echĩmbaquiату abe que echeẽ ñandu ra.

Jesús mbia mbusẽ Dios chuchua si

15 Ngasẽ ngue Jerusalén cote ra. Jesús que oso Dios chuchúaa ra. Huee que mbia riqui mbae isi isi bei ra. Mbae mondo mondo abe mbae isiquia ribishorõ. Ũquĩ ja que Jesús mbusẽ mondo ra. Ae mbae isiquia sibishorõ shorõ nguia, ũquĩ mbae abe que embuchiichere chere ja mesa ra. Mbae ja resebe. Ae nyurushi cuasu mondo mondo mbia je mbae ribishorõ nae, ũquĩ nenda abe que embuchiichere chere ja ra. 16 Jesús que ñee ũquĩ je ra. —Dios chuchua ite rĩ jẽnguchõ nguĩã mbae rerao rao. 17 “ ‘Mbia cheẽsa Dios je’, i ra mbia Dios chuchua je”, i rei que embesa ji huĩ nda. Jẽ nguia jẽicuã tuchite Dios chuchua je re. Mbae mbuquiachãsa chuchua jẽsaãte chĩ nguĩã ee, i que Jesús ñee asite ũquĩ je ra. 18 Sacerdote rerecua que chĩ Jesús cheẽ andu ra. Embesasa abe no. —¿Mañi nda aba Jesús iquia re? i que eu ndua ndua ra. Mbia quiату que oote Jesús cheẽ ndese ee ra. Nyebe eriqui nguĩã Jesús ucuayãte. 19 Hue sucha qu e Jesús secha oso eresaitõ cote ra.

Higo i mano cote

20 I que Jesús nyoi quia isamami nda. Higo i cutite que echoi quia ra. Higo i ñimama ño nguia reaẽ. Erao abe mano ño nguia re no aẽ. 21 Pedro que ndua ñee Jesús je ra. ¡—Sã Sererecua! Higo i je que erecheẽ asi nae, mano ño equia cote reaẽ, i que ñee Jesús je ra. 22 Jesús que ñee ee ra. —Dios jẽicua tuchi. 23 Tacheẽ nyecua jẽje. Jemo ñee mose sita ibate mo je, “esiri rã oso ama ndisha ye” i mose sita ibate mo je, sã Dios icua tuchi rã nyii. “Dios ra secheẽ mumbayã” i tuchi mose uchiangui re, Dios ra echeẽ mumbayã. Sita ra siri ee. 24 “A emondo seje”, jenyẽ mose Dios je, mondo ra jẽje. “Dios ra emondo seje”, jenyẽ mose jeñiangui re, mondo ra jẽje. 25 Emo mbae icuã naa mose jẽje, ũquĩ ñee chĩ mose jendese, jẽtesarei chõ ũquĩ si. Jẽtesarei chõ esi ñee nonde Dios je. Ũquĩ mose ra jendu ibatenda abe jẽicuã mbutiã no. 26 Jẽtesareiã mose emo icuã si, Dios abe ra jẽicuã mbutiã eã mbei jẽsi, i que Jesús ee ra.

¿Aba nembu re? i mbia ñee Jesús je

27 Nyebibẽ que echoi Jerusalén nda. Dios chuchuaqui rĩ ngue Jesús riqui ngata ra. Sacerdote rerecua que nyoi ñee ee ra. Embesasa rese. Amei ndese. 28 —¿Mbaerã ereico mbia mbaaquiату quiату Dios chuchúaa re? ¿Aba “ũquĩ

esaã saã” i quia ndeje re? i que ũquĩ ererecua ñee ja Jesús je ra. ²⁹ Jesús que ñee ee ra. —Se rane tacheẽ jêje. Se rane preguntar tae jêje. Secheẽ jêsibishorõ na nyii. Aquere quiatu ra jeñee asibishorõ cote. ³⁰ ¿Aba ñee Juan je re? “Eso bautizar i mbia je” i ee re. ¿Dios eã ño ere? Jeñee seje, i que Jesús ee ra. ³¹ Ererecua que ndua ndua ja u cote ra. Ñee ñee ngue u nyue ra. —¿Mañi nande ra echeẽ ndibishorõ nde? “Dios que Juan mbu ra”, nande aroneate ee. Nyebe ra ñee nande je. “¿Mbaerã jêingo eãte eruĩ re no?” i quiarei ra nande je. ³² “Dios que embu eã nda”, nande aroneate ee no. Mbia ataque ra paama i tuchi nande je. Juan quiatote quia mbia re, i que ererecua ñee ñee nyue ra. ³³ Ñee nyee que Jesús je cote ra. —Ureicuayãte. Aba chõ Juan mbu bautizar i sacua mbia je, i que ee ra. Nyebe Jesús ñee nguiã ee. —Se abe quiatu tacheẽ eã jêje no. Ae “ã esaã” i seje nae, erii nda acheẽ eã jêje no, i que Jesús ũquĩ ererecua je ra.

12

Uva raarõsa icuã icuã nguerecua je

¹ Jesús que ejemplos saã saã mbia je ra. —Sã mbia ibicha mo ndiqui no. Sã eriqui uva i tiquia tiquia no. Sã etarõ no. Uva rique rirurã abe que echao ra. Sucha ibate mo abe que echao no nda. Uco raarõ turã ja sacua. Ibicha que “sembae uvas jêsarõ” i emo je cote ra. Al partido. Ae que oso isho itõte cote ra. ² Uva quiche mose que ngũimba mo mondo rei umbaerã ndea ra. ³ Uva raarõsa que erimba mbucuasẽ icuã ño nda. Iruã nua ño ngue ra. Eochi chõ ngue emondo mbuchebi ra. ⁴ Echa que ngũimba mo mondobe rei ereabe no nda. Aque abe que embucuasẽ icuã no nda. Sita que emombo mombo erese no nda. Eãquĩ nduqui tuchi que ra. ⁵ Ngũimba mo ngue emondobe aquere no nda. Aque quiatu que eiquia tuchi cot e ra. Eĩ eĩ mbei que eraarõsa quia echa rimba je ra. Emo emo ngue eiruã nua nda. Emo emo ngue eiquia no nda. ⁶ Aque mii tuchi que siquichõ echa rese cote ra. Eriirĩ tuchi chõ ngue aque re. Nyesequa tuchi que equia aque rese ra. Aque que emondo chee uva rea cote ra. “Ireĩ ireĩ jiri ra seriirĩ si”, i rei que ra. ⁷ Eriirĩ ngasẽ mose que uva raarõsa ñee nyue ra. —¿Co eriirĩ ndu quia co cote jê! ¡Nandeiquia rei jê! † nda uvas nandembaerã ae tuchi cote, i que ñee nyue ra. ⁸ Eraarõsa que eriirĩ isi icuã cote ra. Curuchoi que iquia pe jiri ra. Mano ngue cote ra. ⁹ ¿Mañi nda echa quia eraarõsa je cote re? Echa ra eraarõsa icuã iquia ja cote. Uva i ra emondo ja emo je eraarõ sacua cote. ¹⁰ ¿Ã mbesa ji rese jemaẽ ate re?

Sã emo ndiqui tuchia ao sita je no.

Sita mo ngue equirirõ mombo ra.

Eicuãte eriqui rei nguiã ee.

Aquere ndua si erese.

“Earonda sacua turambi chõ eriqui re”, i ndua si uchimombo rese.

Uchimombo que esirõ si cote ra.

¹¹ Dios chiao chõ ũquĩ nde.

Dios chiao turã tuchi riqui nande je ã,

i ñi embesa ji re, i que Jesús ee ra.

¹² —Nanderii ño eriqui nguiã ñee, i que ũquĩ ererecua ra. —Nandeisi rei serao jê, i rei que nyue ra. Jesús isi aronea tuchi que mbia résaa ra. Eireite quiatu ngue mbia tubiriã si re.

¿Impuestos ra uremee ererecua je re? i mbia ñee Jesús je

13 Ûquí ererecua que fariseos mo mondochoi ñee Jesús je ra. Herodes chimbaaquiatu abe mondochoi erea. —Jesús nandembucheẽ icuã na. †nda mbia paama i ee, i rei que ra. 14 Uturã ngue esaã ñooño Jesús je ra. —Jesús, co ereico mbia mbaaquiatu turãte co. Mbía jaje ndeturãte riqui co. Co ereico turãte mbia mbuchiabiã co. Mbía erembaaquiatu quiatu turãte quia Dios icha rĩ co. Nyebe urechu nguiã ñee ndeje a. ¿Coche mbia mbae isiquia mee mee Romanos nderecua je re? Impuestos. 15 ¿Uremee mee nda ee re? ¿Uremee eã nda ee re no? i que ñee Jesús je ra. Jesús que ùquí icuã icuate ra. Nyebe ñee nguiã ee. —¿Mbaerã jëingo “†nda Jesús ucheẽ nyabi”, i seriĩ nde? Mbae isiquia jëteacuquia imbu seje. Tamae erese, i que ee ra. 16 Mbía que eteacuquia ee ra. —¿Aba mbae nombre ñi mbae isiquia rese a re? ¿Aba ãquí aingue abe ñi a re? i que Jesús ee ra. Romanos nderecua, i que mbía ee ra. 17 Jesús que ñee ee cote ra. —Romano s nderecua mbaerã jemondo chõ ee. Dios mbaerã jemondo chõ ee no, i que Jesús ee ra. Mbía que nyuruira jate u Jesús cheẽ andu ra.

Mbía raaque ra quera si, i Jesús

18 —Mbía raaque ra quera eã mbei, i que mbiamo nguia ñee nda. Saduceos i que ùquí mbía je ra. Ûquí mo ngue nyoi ñee Jesús je ra. Tã i sacua ee. 19 —Sererecua, ã ngue Moisés mbesa nande je ra: “Emo ndiiriã i mano mose, sã enongue mano je ninisi rerequia erendaque re. Sã tiirĩ ngõngue raaque rĩ”, i que Moisés embesa nande je ra. 20 Eriqui mo ngue siqui urerese ra. Seis que eribi ra. Eriqui que ngüinisiã quereco rei ra. Mano ño ngue tiirĩ ndocoĩ ngüinisi recha ra. 21 Enongue que nguiqui checha quereco rei cote ra. Ae abe que mano ño tiirĩ ndocoĩ no nda. Enongue que equereco no nda. 22 Ûquí seis que ngõngue checha quereco ja rei ra. Mano ja chõ ngue erecha tiirĩ ndocoĩ no nda. Eninisi eru checha que mano nyee chõ cote no nda. 23 Siete rei que eru nyii ra. Mbía raaque quera si ja mose, ¿abate ra equereco cote re? i que saduceos ñee Jesús je ra. —Ma Jesús ñee icuã, i chõ ngue re.

24 Jesús que ñee ee ra. —Jëingo Dios cheẽ icuayãte ã. Jëingo Dios cheẽ abi tuchi ã. Jëingo Dios quirãcuã icuayãte ã. 25 Ae raaque ra Dios mbuquera si nae, ùquí nda ngüinisi quereco eã mbei huee cote. Ûquí nda ngu quereco eã mbei huee cote no. Angeles rã mbei ra mbía riqui huee ibate cote. 26 ¿Moisés chimbesa rese jemaẽ ãte re? Mbía raaque quera si rĩ ño ngue embesa nguiã. Ira ruri sendi quia, aque mose que Dios Moisés mbiirandu ùquí ndese ra. “Abraham nderecua chõ aico nguiã se co. Isaac nderecua abe. Jacob nderecua abe no”, i que Dios Moisés je aque mose ra. 27 ã ngue mano ndei nyii ra. Ereco siqui bei chõ nguiã namo ã. Mbía raaque rerecua eã ño Dios re. Mbía reco rerecua chõ ae re. ¿Ûquí jëicia eãte quia ã nde? i que Jesús ñee mbía je ra.

Echesequa tuchi quia Dios rese

28 Embesasa mo ngue chí echeẽ andu ra. —Jesús ñee turã tuchichĩ saduceos je, i que uchiangui re ra. Nyebe esi nguiã ñee ee. —Jesús, Dios cheẽ tubiriãte riqui ã ndesẽ. Mbía echeẽ mumbayã sacua. ¿Ma Dios cheẽ ndiita tuchi ma nde? i que embesasa ñee Jesús je ra. 29 Jesús que ñee ee ra. —ã ño Dios cheẽ ndiita ã nde: “Secheẽ jeñandu rã, Israelitas. Dios mĩ tuchi chõ nandererecua re. 30 Echesequa tuchi quia Dios rese. Ndechiã je. Neaĩ je. Nendua ndua abe je. Ndequirãcuã abe je”, i chõ Dios cheẽ ndiita nguiã. 31 ã abe rei ùquí nduinda ã no: “Sã ereico nyesequa ndechiese no. Eĩ ere si chõ nyesequa mbía rese”, i.

Ūquĩ nyeremo ndei Dios cheẽ i tuchi ũquĩ, i que Jesús ee ra. ³² Embesasa que ñee Jesús je cote ra. —Ae bei, Sererecua. Dios mii tuchi chõ nandererecua re. Emo abe mo eãte. ³³ Nandechesecua tuchi mose Dios rese, ũquĩ eturãte ee. Nandechesecua tuchi mose nandechiã je. Nandendua ndua je. Nandeaĩ je. Nandequirãcuã je abe no. Nandechesecua tuchi mose mbia rese, ũquĩ eturãte Dios je mbae mo si. Sacrificio mo si. Ofrenda mo si, i que embesasa ñee Jesús je ra. ³⁴ —Ñee aquiatute equia seje co, i que Jesús uchiangui re ra. —Dio s rimbarã tuchi chee ra nde, i que ee cote ra.

¿Aba rucucha Cristo re?

³⁵ Jesús que mbia mbaaquiato quiato quia Dios chuchúaa ra. —¿Mbaerã embesasa riqui ñee nde? “David rucucha chõ Cristo re” i re. ³⁶ David abe que “sererecua” i Jesús je ra. Sã embesa ji ñee no:

Dios que ñee Cristo sererecua je ra:

“Ecoi sejii. Nde abe ra ererecua serese.

Ae ndeucuyãte quia nae, ũquĩ je ra ndequirãcuã atecuquia tuchi.

Ndequirãcuã tuchi chee ra ũquĩ si”, i que Dios ñee sererecua je ra,

i que Espíritu Turã David mbucheẽ nda. ³⁷ David sí chõ “sererecua” i nguiã Cristo je. Cristo David rucucha mose, ¿mbaerã David “sererecua” i ee re? i que Jesús embesasa je ra. Mbia tubiriã ngue Jesús cheẽ chandu turã jate ra.

Jesús ñee asi embesasa je

³⁸ Jesús que uchimbaaquiato mbaaquiato quiato ra. —Embesasa rã nda jëingochĩ jë. Ūquĩ ucuasu saã saã mbeite quia ã. Huiirao turã equereco beite quia ã. “Sã mbia ererecua i nande je”, i beite equia ã. ³⁹ Mbia renda turã abe eirabo rabo beite quia mbia si ã. “Fiestacha jii quia taĩ jë”, i abe beite equia ã no. ⁴⁰ Ari eru cheecha mbae abe embutiã tiãte quia ã no. Ucheẽ oco abe esaã saã mbeite quia Dios je ã no. “I nda mbia mae nanderese”, i chõ nguiã. Ūquĩ nda Dios mbasi tuchi cote, i que Jesús mbia je ra.

Eru cheecha mbaecha reã mo mbae mee Dios je

⁴¹ Emo mose que Jesús ñi Dios chuchúaa ra. Ofrenda riru nonde que eñi ngoi ra. Mae ngue mii mbia mbae isiquia mondo mondo mose eriru ye rese ra. Mbaecha atate que mbae isiquia tubiriã mondo mondo quia eriru ye ra. ⁴² Eru cheecha mo ngue ngasẽ u cote ra. Nyeremoño tuchi que ae mbae isiquia mondo ra. Centavo mii mbuchecha tuchi que ra. ⁴³ Jesús que ñee uchimbaaquiato je ra. —Jenyu. Tacheẽ nyecua jëje. Eru cheecha mbaecha reã ngue mbae isiquia mondo tuchi mbia ataque si ra. ⁴⁴ Mbaecha quiato que umbae rire ñetẽ mondo mondo ra. Eru cheecha quiato que umbae mii mondo ja ra, i que Jesús ra.

13

Mbia ra Dios chuchua mbucoi ja, i Jesús

¹ Jesús que oso usẽ Dios chuchua si cote ra. Echimbaaquiato mo ngue ñee ee ra. —Sã Dios chuchua turã tuchite jë. Eao ji turã tuchi sita je, i que echimbaaquiato mo ñee ee ra. ² Jesús que ñee ee ra. —Ã ndese jëingo mae ã nae, ũquĩ nda mbia mbucoi ja cote. Sita mo nda chi eã nyuchuarõ Dios chuchua cote. Mbia ra Dios chuchua mbucoi ja tuchi cote, i que Jesús ñee nda.

Mbae ua ja nonde chõ ã nde

³ Jesús que chí ngoi huee ibi ibate mo nda. Monte de los Olivos, i que hue je ra. Dios chuchua checuate que ee hue si ra. Echimbaaquiatu que ngasē ñee ee ra. Pedro. Jacobo. Juan. Andrés. Ūquí ja que ñee eisa ra. ⁴—¿Manosete ra ūquí nde? ¿Mañi ure ra equia jirandu mbae ua nonde re? i que ñee Jesús je ra. ⁵ Jesús que ñee ee ra. —Jētesa jiri quia jē. Mbia mo nda jembĩĩĩ irĩchĩ ñee jēje jē. ⁶“Cristo chō se re” i ra mbia ñee ata atate jēje. Ūquí nda jeñanduchĩ jē. Ūquí nda mbia mbĩĩĩ irĩ jate. Ñee ñooño je chō ūquí nde. ⁷ Mbia ra guerras saã saã tuchi. Mbia ra ñee ñee tuchi quia nyĩiquia iquia je riĩ. Ūquí mose ra jēsiquichechĩ jē. Ūquí ja rane nda nyecua raque. Aque mose r a mbae ja ua eã ná. ⁸ Mbia ra guerras saã tuchi chee. Nyĩiquia iquia tuchi rae. Mbia riãcuã tuchi ra aque mose no. Emo ñooñoa tuchi ra mbia rasi. Mangu chooñoa tuchi ra ibi nyere nyere. Jembasi ramo mose chō nda ūquí nde. Aquere ra jembasi tuchi cote.

⁹ ¡sã jē! Mbia icuã icuãte ra jēje. Jembĩĩĩ irĩ ndae. Jemee mee icuã nda mbia rerecua je. Jēiruã nua nda mbia chumunuãsa. Nguerecua je ra mbia jenderao rao tuchi. Ererecua abe je chee ra secheē jēsenei senei. ¹⁰ Sequiato ra Dios cheē turã senei senei ná mbia ja je nyii. Mangu chooñoa jenda ja je. Aquere ra mbae ua ja cote. ¹¹ Jemee mose mbia rerecua je, pare pare jenyechĩ nda jē. “¿Manyae ra ūquí ñee ndibishorō nde?” jenyechĩ nda pare pare i jē. Espiritu Turã ae chō nda jembucheē turã nguãĩ mbia je aque mose. Jē ae ra jeñee eã. Espiritu Turã ae chō nda jembucheē nguãĩ. ¹² Jenongue ra jemondo chee mbia icuã je. Jēiquia sacuã. Jendu abe ra jemondo chee mbia icuã je. Jendiirĩ abe ra jemondo chee mbia icuã je. Mbia icuã nda jemo iquia iquia chee. ¹³ Mbia mangu chooñoa jenda ra jēucuyã tuchi serĩ. Ae ra siqui bei serese, ūquí nda Dios mingo bei.

¹⁴ Daniel que embesa Mbae Mbutiãsa Icuã ñii nda. Mbae Mbutiãsa Icuã nda siqui nguecuãyaã. “Dios rendaque re taico se quiatu”, i ra equia huee. (Ae ra mae nguia sechimbese rese nae, sã ūquí eicua.) Jemee mose Mbae Mbutiãsa Icuã ndese, jeña esi. Ae siqui quia Judéaa, sã ūquí uchã jei choi ibi ibátee mo. ¹⁵ Ae ra siqui tuchia quite rese, sã ūquí iqueã nyoĩ uchuchua uquichi mose. Sã echoi chō uchã hue si bei, umbae rirō ndocoĩ. ¹⁶ Ae ra siqui úcoo, sã ūquí nyebiã ngaē huĩrao rea. Sã hue si bei chō echoi uchã. ¹⁷ Aba mbia eã tuchi ra emo ãquē ndiru rerequia mose aque mose. Nguirĩ mbuquiambu je abe no. ¹⁸ “Nyiiiseĩ mose eã urechã” jenyé Dios je. ¹⁹ Mbia ra mbae rasi saã tuchi aque mose. Mbae rasi que mbia saã eã jiri nyii ra. Aque ramo mose ra mbae rasi raã tuchi cote. Mbae ua bei sacuã ño ūquí nde. ²⁰ Ae rasi ra mbia saã tuchi nae, ūquí nda Dios mbujua jiri uquiato riĩ. † nda emo ñimbirãcuã eã tuchi rei ūquí ndasi je. ²¹ “A Cristo riqui a jē” i mose emo jēje, “nyia” jenyechĩ nda ūquí ñee mose jē. “Hue Cristo riqui hue jē” i mose emo jēje, “nyia” jenyechĩ nda eno jē. ²² “Cristo chō se re” ichōĩño nda mbia ñee ata atate jēje. “Dios cheē mbuchecua chō se re” ichōĩño nda mbia ñee ata atate jēje no. Mbia mae sayã nda esaã saã tuchi mbia mbĩĩĩ irĩ sacuã. Ūquí Dios quiato abe chee mbĩĩĩ irĩ arōte. ²³ Ūquí nonde chō aico nguãĩ jembĩirandu randu co.

Dios riirĩ nda tube ibate si

²⁴ Mbia ūquí ndasi raã ja mose ra tenda checuayã mbei cote. Nyasi abe no. ²⁵ Nyasitata ra ngoi ngoi. Ibei jenda abe ra quiata quiata chee cote no. ²⁶ Aque mose ra achu ibei rese. Senininya tuchi ra sechu mose. Sequirãcuã tuchi ra sechu mose no. ²⁷ Angeles serimba ra amondo mbia sechiisirō munua nua

sacuã. Ishonda ja. Mangue chooñoa jenda ja. Mbia sechiisirõ nda emunua nua ja seje cote.

²⁸ Sã higuera riqui no. Sã ira mo ndiqui no. Ero quira usẽ ja mose, “iraro itõ ndacu ra cote”, i chõ mbia nguiã aque mose. ²⁹ Eĩ sí ra mbae ua ja nonde. Ae rĩ aico ñee jêje nae, ùqui ndese jemaie mose, “mbae ra ua ja cote” jenye ra cote. ³⁰ Tacheẽ nyecua jêje. Æ mbia riqui ngata ibi ã nae, ùqui emo emo nda manoa mbae ua ja nonde. ³¹ Ibei ra ua. Ibi abe ra ua no. Secheẽ nguia ra ua eã mbei.

³² Manosete chõ nda mbae ua ja. Aico eicuayãte co. Mbia mo abe eicuayãte quia ã no. Angeles abe eicuayãte quia ã no. Paba mii ño eicua nguiã co. ³³ Nyebe jëingo quiatu quia eraarõ arõ mbei. Jëtesa tesa bei quia. Ma nyaashĩ ño nda equeru. Jëicuayãte equia ã. ³⁴ Sã ererecua mo oso isho itõte no. Sã ñee ngũimba je oso nonde no. —Sembae jësaarõ ja. Æ ndese jëingo. Co rese eico nde. Qui rese eico nde no, i que ñee ngũimba mii mii je ra. —Etesa tesa bei quia, i que eiquesa raarõsa je ra. ³⁵ Manosete chõ nda tuchuacha ru. Jëicuayãte equia ã. Itondaru ramo mose eru arondete. Itondii mose eru arondete. Ngaira cheẽ mose eru arondete no. Eresaitõ ndabe mose eru arondete no. Nyebe jëtesa tesa bei quiatu quia. ³⁶ Jengue mose ra eruchĩ jembuate jê. ³⁷ “Jëtesa tesa bei quia” ae chõ nguiã mbia ja je co. Jê mii je eã, i que Jesús ra.

14

Jesús nandeisi tarõ, i ja ererecua nyue

¹ Sacerdote rerecua que ñee ja nyue ra. Embesasa abe no. —¿Mañi nande ra equia Jesús isi nonde re? Eiquia sacuaã. ¿Mañi nande ra embiirĩ irĩ nde? i que equia ñee ñee nyue ra. Achite que fiesta de la pascua ñi tu ee cote ra. Dos días. ² —Fiesta mose eã nandeisi jê. Mbia ra paama ichĩ nande je jê, i que u ñee ñee nyue ra.

Cuña mo aba mbusimbusa turã ichusẽ Jesús ãquĩ ndese

³ Jesús que siqui Simón Leproso chuchúaa ra. Betania, i que hue je ra. Cuña mo ngue tu erea huee ra. Aba mbusimbusa mo ngue equeru ee ra. Sita ao ji ye que ereru ra. Embisẽ tuchi que equeru ra. Mbae isiquia mumbasa tuchi que ùqui nda. Eriru churu que esiquio eichusẽ nonde Jesús ãquĩ ndese equiaru mose ra. ⁴ Mbia que chi ja mae erese ra. Paama i que cuña je ra. —¿Mbaerã eichusẽ ñooño nde? ⁵ Mbae isiquia ribishorõ ño nda aba emondo re. Mbaecha reã je emee mee sacuaã, i que ñee icuaã icuaã cuña je ra. ⁶ Jesús que ñee cote ra. —¿Mbaerã jëingo ñee ùqui nde? Sã cuña ae riqui ae. Ae esaã seje nae, eturãte seje ùqui. ⁷ Mbaecha reã nguia ra chi arete ibii a. Jê mbae raãse mose ee, mbae jësaã turã mbei ee ae. Se quia nda aico bei eã nguiã jendese aa. ⁸ Seati nonde chõ ngue cuña aba mbusimbusa ichusẽ ja nguiã serese. ⁹ Tacheẽ nyecua jêje. Mbia Dios cheẽ tura nenei nenei mose mbia ja je, cuña nyisaã abe ra esenei senei mangue chooñoa jenda ja je. Mbia ndua turã ja sacuaã echisaã abe rese, i que Jesús ñee mbia je ra.

Jesús tamee jêje, i Judas mbia icuaã je

¹⁰ Judas Iscariote, i rei que Jesús chimbaaquiato mo je ra. Aque que oso ñee sacerdote rerecua je ra. Jesús mee nonde ee. ¹¹ Sacerdote rerecua ia ja que ùqui andu ra. —Mbae isiquia uremee tuchi ndeje jê, i que ee ra. Nyebe Judas riqui nguiã ndua ndua. —Mbia eãsa quiatu Jesús tamee ee, i.

Jesús quiaru uchimbaaquiatu rese

¹² Fiesta que tu cote ra. Aque fiesta mose bei que mbia riqui oveja iquia iquia querabe ra. Mbichae mbuchimatã iriã ngue eu eu quia aque mose querabe no nda. —¿Mangue ra oveja urembuchi mangue ndechiurã nde? i que echimbaaquiatu ñee Jesús je ra. ¹³ Ñee ngue uchimbaaquiatu nyeremo je ra. —Jêso sucha cuasu. Huee ra jemaee emo i rerao rese. I ra equaero quia irasa mo ye. Aque rui jêso. ¹⁴ Eique mose, aque tuchuacha je jênee. “Jesús que urembu ñee sacua ndeje ra. ‘¿Ma cuarto ra urecu quiaru oveja u que re? Sechimbaaquiatu rese’, i que Jesús ñee ndeje ra”, jenyé tuchuacha je. ¹⁵ Tuchuacha ra cuarto cuasu mee jêje. Mbía quesa ibatenda ra emee jêje. Embuquiche ji. Huee chõ oveja jembuchi nandequiaru sacua, i que Jesús ñee ee ra. ¹⁶ Nyebe echimbaaquiatu nyoĩ nguiã sucha cuasu. Jesús cheẽ ndui si tuchi que mbae chi ja ee huee ra. Huee que oveja mbuchi huee cote ra.

¹⁷ Itondaru ramo mose que Jesús ru uchimbaa quiatu ataque rese ra. ¹⁸ Quiaru mose que Jesús ñee ee cote ra. —Tacheẽ nyecua jêje. A jêingo quiaru serese a nae, jemo nda semondo mbia icua je, i que ñee uchimbaaquiatu je ra. ¹⁹ Echimbaaquiatu ia eã tuchi que echeẽ mose ra. —¿Se ra aremondo ee re? i ja jate que ñee Jesús je ra. ²⁰ Jesús que ñee ee ra. —Doce jêingo quiaru serese a nae, jemo ño ñene. Ae chĩ quiaru serese aque plato ye sí a nae, aque chõ ñene. ²¹ Dios cheẽ ndui si tuchi ra amano ndaque. Ae ra semee mbia icua je, aque ra mbae rasi saã tuchi quia. Aba mbia eã tuchi ra aque. “Taĩ sembuchecua jirichĩ nguia curi”, i chee ra aque, i que Jesús ra.

²² Quiaru que u ra. Jesús que mbichae sirõ nda. Gracias i que Dios je ra. Siquio que mbuchao chao ee cote ra. —Á mbichae jêu. Serete chõ ã nde, i que Jesús ñee ee ra. ²³ Vino mbeisa que esirõ cote no nda. Gracias i que Dios je ra. Mondo que uchimbaaquiatu oo cote ra. Mbei mbei ja que cote ra. ²⁴ Jesús que ñee ee ra. —Seruqui chõ ã nde. Mbía icua mbutiã sacua ño seruqui re. Dios cheẽ yasu rui si chõ seruqui riqui nguiã mbia icua mbutiã ã. ²⁵ Tacheẽ nyecua jêje. Vino mo nda ambei eã mbei cote. Paba mbia rerecua tuchi mose, aque mose ramo nguia nda ambei nguiã cote, i que Jesús ñee nda.

Jesús aicuayãte resẽ, ichõño nda Pedro serĩ, i Jesús

²⁶ Irasei rasei que cote ra. Nyoĩ que ibi ibate mo cote ra. Monte de los Olivos, i que hue ibi je ra. ²⁷ Jesús que ñee uchimbaaquiatu je huee ra. —Jêireĩte ra eriqui serĩ. Jeñimboseĩ mboseĩ nda oso serecha. Sã embesa ji riqui ñee no: “Mbía ra oveja raarõsa iquia. Ovejas ra ñimboseĩ nyoĩ cote”, sã embesa ji riqui i no. ²⁸ Seraaque quera sire ra aso se rane jendaarõ Galilea, i que Jesús ee ra. ²⁹ Pedro que ñee ee ra. —Seataque ra ireĩ ireĩte raque ndesi. Se quia ra aireĩ ireĩã mbei ndesi, i rei que Pedro ñee ee ra. ³⁰ Jesús que ñee ee ra. —Tacheẽ nyecua ndeje. Ngaira cheẽ nyeremo nonde ra erecheẽ ñoño tres veces serĩ namo, Pedro. “Jesús aicuayãte resẽ”, ere chooño ño nda serĩ, i que Jesús ñee ee ra. ³¹ Pedro que ñee ee ra. —Mbía ra seiquia arõte raque nderĩ, acheẽ ñoño eã nda se nderĩ, i rei que Pedro ra. Eĩ ja que ñee nda.

Jesús ñee ngu je

³² Jesús que oso Getsemaní cote ra. Uchi mbaaquiatu rese. —Jengoi rã u aa. Tacheẽ na oso Paba je pe jiri se, i que Jesús ee ra. ³³ Pe quiti jiri que Pedro rerao ra. Jacobo rese. Juan abe no. Eya eã ndasi tuchi que tu ee aque mose ra. ³⁴ Ñee ngue ñuĩ je ra. —Seya eã ndasi tuchi aico co. Seya eã ndasi ra seiquia

chee. Jenguchõ na jẽ aa. Jẽtesa tesa bei u aa, i que Jesús ñee ee ra. ³⁵ Jesús que oso pe quiti jiri cote ra. Nyibi que u ngoi ngũã ndese ñee Dios je ra. —Mbae rasi asaã sereãte, i rei que ñee Dios je ra. ³⁶ —Paba, mbae eresaã ja arõte nde. Ûquĩ ndasi asaã sereãte raque quia co. Ae sebi riqui nae, ùquĩ ndese semingo eã. Ae ndebite riqui nae, ùquĩ ndese quiatu semingo, i que Jesús ñee Dios je ra. ³⁷ Nyebi que u uchĩmbaaquiatu je cote ra. I que eu uque ja ee cote ra. Ñee ngue Pedro je ra. —Simón, ¿ereque huĩ a re? Ereico areã ñochĩ tesa tesa s e ñee mose Dios je. ³⁸ Jẽtesa tesa u. Jengue eã u ñee Dios je. Mbae icuã tã i eã sacuaã jẽje. Jẽingo serete raque serese. Mbae icuã nguiatu jembuti mbutite nguiã, i que Jesús ee ra. ³⁹ Nyebi si que oso ñee Dios je ra. Hue rĩ si que ñee ee ra. ⁴⁰ Nyebi que u uchĩmbaaquiatu je cote ra. I si que u uque ee no nda. Eresa quiatu ngue eshiu shiute nguiã. —¿Mañi nda aba ñee nde? i ja tuchi que echĩmbaaquiatu ra. ⁴¹ Osobe que ñee Dios je pe jiri cote ra. Tres veces que aque cote ra. Uba rei que u ñee uchĩmbaaquiatu je ra. —Jengue tuchi cote. Jenguenea jẽucua cote. Semondo ra mbia icuã je cote. Seiquia sacuaã. ⁴² Jẽhuã cote. Nyao cote. Ae ra semee mbia icuã je, co eru quia semee sacuaã co cote, i que Jesús uchĩmbaaquiatu je ra.

Mbia icuã Jesús isi suruchoi

⁴³ Jesús cheẽ mosebe tuchi que Judas ru erea ra. Jesús chĩmbaaquiatu rei que ae ra. Aque rese que mbia cuaẽ tuchi quia ra. Tiquise abe que ecurucuaẽ nguia ra. Ira jua abe no. Sacerdote rerecua chõ ùquĩ mbucuaẽ nguia reaẽ. Embesasa abe. Amei abe. ⁴⁴ Judas ñee nyecuayã nguiatu quia ùquĩ je nyii reaẽ. —Ae ritii ra asiite nae, aque chõ ñene. Aque jẽisi quiatu tuchi serao, i quia equia ee nyii reaẽ. ⁴⁵ Jesús riichã ngue esi saludar i ee cote ra. Jesús ritii que esiite ee cote ra. ⁴⁶ Mbia que Jesús isi cuaẽ ecua cote ra. ⁴⁷ Ûquĩ mose que Jesús rimba mo uchuuru sirõ tiquise ra. Sacerdote rerecua rimba rese que tiquise uru ra. Eisa que echisia ra. ⁴⁸ Jesús que ñee mbia ja je cote ra. —¿Mbaerã jenyu quia tiquise rurucuaẽ serea cõ re? Ira jua abe no. Mbae mbuquiachãsa rea rocoĩ jenyuchĩ nguia serea co. ⁴⁹ Tenda que amumba mumba beite rei quia jendese Dios chuchua resẽ. Mbia que ambaaquiatu quiatu bei rei quia huee resẽ. ¿Mbaerã seisiã nyucua aque mose re? Embesa ji ique sacuaã ño jẽicuã icuã ndiqui nguiã seje ã, i que Jesús ñee ee ra. ⁵⁰ Echĩmbaaquiatu que nyoi ja chee uchã Jesús recha ra. ⁵¹ Acuanĩndu mii mo ngue oso erui ra. Tiru mii ngue equereco nyiati ra. Mbia que acuanĩndu abe isi rei ra. ⁵² Huiirao que esecha oso uchã nda. Eirao eã tuchi que oso uchã nda.

Jesús mbia curuchoi mbia rerecua je

⁵³ Mbia que Jesús curuchoi sacerdote rerecua je cote ra. Huee que sacerdote rerecua ja chi ñumunua nda. Embesasa abe. Amei ererecua ja abe no. ⁵⁴ Pedro que embuchurucha rucha oso quia erui ra. Ngasẽ nyee que sacerdote rerecua itaicuee ra. Hue que ngoi sacerdote rimba mo ndese ra. Nyee que huĩ huee ra. ⁵⁵ Sacerdote rerecua que chi ja huee ra. Amei mbia rerecua ja abe no. Mbia rerecua ja tuchi. —Jesús nandeiquia, i rei que ñee ñee nyue ra. —¿Mbae i ra aba mbia je Jesús riicharã nde? i rei que u ñee ñee nyue ra. ⁵⁶ Emo emo ngue ñee icuã icuã ndei Jesús rĩ nda. Ucheẽ ngue etasa tasa tuchi chõ nda. ⁵⁷ Mbia mo abe que juã ñee ñooño erĩ nda. ⁵⁸ —Jesús cheẽ ngue urechandu ra. Ñee icuãte que Dios chuchua rĩ nda. “Dios chuchua tambocoi mbia chiao. Tres días mose ra Dios chucharã asaã no. Mbia chiao eã nda

ũquí cote”, i que urechandu Jesús cheẽ nda, i que ũquí ñee ñooño Jesús rĩ nda. ⁵⁹ Ucheẽ ngue etasa tasa bei chõ nda. ⁶⁰ Sacerdote rerecua que juã ñee Jesús je ra. —¿Echeẽ nda eresibishorõ eã mbei re? ¿Mbae i equia nderĩ nde? i que ñee Jesús je ra. ⁶¹ Jesús que ñee eã mbei echeẽ mose ra. Sacerdote rerecua que ñembe ee ra. —¿Dios rucucha nde re? ¿Cristo nde re? i que ñee Jesús je ra. ⁶² Jesús que ñee ee ra. —Ae. Dios rucucha chõ se re. Jemae nda serese s e coi mose Dios quirãcuã jii. Sechu mose abe ibeishĩ ndese, i que Jesús ee ra. ⁶³⁻⁶⁴ Sacerdote rerecua que paama i tuchi Jesús cheẽ mose ra. Huiirao que endoro ndoro chee ra. Ñee ngue ererecua ataque je ra. —Jesús riqui Dios rucucha raã naa co. Jeñandu jate equia ã. Sã mbia mo nandembiirandube eã cote. Nandemae ndei ngue erese re. ¿jẽje re? ¿Mañĩ nande ra equia re? i que sacerdote rerecua ñee mbia rerecua ataque je ra. —Eicua tuchi que ra jẽ. Sã mbia eiquia, i jate que ererecua ñee Jesús rĩ nda. ⁶⁵ Mbiam que ñimbu nimbua Jesús ruba rese cote ra. Eresa que echati mbae mo je ra. Ucuu ucuu tuchi que erese cote ra. —¿Aba ucuu ucuu u nderese a re? Eicua no, i que equia eresa ati ji je ra. Soldados abe que ucuu ucuu tuchi eresa rese ra.

Jesús aicuayãte resẽ, ichõĩño Pedro

⁶⁶ Pedro que chĩmbeite ngoi itaicuee ra. Nyucuaaque mo ngue tu huee sacerdote rerecua rimba ra. ⁶⁷ Pedro que chĩ nyee tata jii ee huee ra. —Jesús resenda que nde abe ra, i que nyucuaaque ñee mae mose Pedro rese ra. ⁶⁸ —Tei. Ndecheẽ aicuayãte, ichõĩño ngue Pedro ñee ee ra. Hue si que esi eiquesa quiti cote ra. Usẽ mose que nguira ñee cote ra. ⁶⁹ Nyucuaaque que maembe erese ra. —Co abe que Jesús resenda ra, i que mbiam ataque je ra. ⁷⁰ —Tei. Aicuayãte se, ichõĩño ngue Pedro ee no nda. Ae chi huee nae, ũquí mo ngue ñee ee cote ra. —Jesús resenda chõ nde abe resẽ. Galilea jenda chõ nde resẽ, i que ñee Pedro je ra. ⁷¹ Pedro que jurar i tuchi ñee ee ra. —Aicuayã tuchite se resẽ, i que ñee ñooño si no nda. ⁷² Aque mose tuchi que nguira ñee sí cote ra. Pedro que ndua Jesús cheẽ ndese cote ra. Sã Jesús ñee ee nyii no. —Nguira cheẽ nyeremo nonde ra erecheẽ ñooño tres veces serĩ, sã Jesús i ee nyii no. Ũquí ndese que Pedro ndua cote ra. Nyebe nyeseo tuchi nguia cote.

15

Mbiam Jesús curuchoi Pilato je

¹ Nyaashĩ namo mose que sacerdote rerecua ñumunua ja ra. Amei ererecua abe no. Embesasa abe no. Mbiam rerecua jate que ñumunua nda. Jesús que echucua suruchoi Pilato je ra. Pilato rei mbiam rerecua hue jenda ja. ² —¿Judios rerecua chõ nde re? i que Pilato ñee ee ra. —Ae. Judios rerecua chõ se re, i que Jesús ee ra. ³ Sacerdote rerecua que ñee ñooño tuchi Jesús rĩ nda. Ñee icuã tuchi que erĩ nda. ⁴ —Sã ñee icuã icuãte nderĩ jẽ. ¿Echeẽ nda eresibishorõ eã nde? i que Pilato ñee Jesús je ra. ⁵ Jesús que ñee ãte echeẽ mose ra. Nyebe Pilato nyuruira tuchi nguia echeẽ eã mose.

Jesús jẽiquia mbucha ira rese, i ererecua

⁶ Pilato que mbiam tarõ ji mo mbusẽ mbei quia pascua mose ra. Co mii ngue embusẽ mbusẽ mbei quia pascua mose ra. Ae je mbiam riqui ñee, “aque embusẽ mondo” i nae, aque chõ ngue embusẽ mbei quia ee ra. ⁷ Barrabás, i que etarõ ji mo je ra. Emo abe que chi huee erese ra. Mbiam iquiasa que ũquí nda. ⁸ Mbiam que ñee ngaẽ Pilato je ra. —Mbiam mii tarõ ji que erembusẽ mbeite

quia, einyere si emo mbusẽ namo, i ja que mbia ñee Pilato je ra. ⁹ —¿Judío rerecua ra ambusẽ mondo jêje Jesús re? i rei que Pilato ra. ¹⁰ —Sacerdote rerecua riqui paama i chooñote Jesús je ã, i quiatu que Pilato ndua ndua uchiangui re ra. ¹¹ —Sã Pilato Barrabás mbusẽ mondo Jesús rendaque re, i tuchi que sacerdotes ñee ja mbia je ra. Nyebe que mbia “Barrabás embusẽ mondo” i chee Pilato je ra. ¹² —¿Mañi ae quia ra Jesucristo je re no? i que Pilato ñee ee ra. ¹³ —Embucha ira rese, i ja que mbia ñee ee ra. ¹⁴ —¿Mbae icuã esaã nde? i que Pilato ñee ee ra. —¡Embucha ira rese jê! i bei bei que mbia ra. ¹⁵ —Mbia turã jiri nda seje chã, i chee que Pilato ra. Nyebe Barrabás mbusẽ mondo nguã. Jesús quiatu que eiruã nua cote ra. —Jembucha iquia ira rese, i que mbia je cote ra.

¹⁶ Soldados que Jesús cuasa curuchoi ererecua chuchúaa ra. Huee que soldados ataque abe ngaẽ ja Jesús mama no nda. ¹⁷ Tiru ireĩ ngue emingue ee cote ra. —Ererecua chõ nde re, ichõ:ño iquia iquia ee. Nyu ritimeĩ uma ji que emi eãquĩ ndese corona nda. ¹⁸ —Judío rerecua tuchi chõ nde re, ichõ:ño ngue iquia iquia ee ra. ¹⁹ Ira que euru uru eãquĩ ndese ra. Ñinimbu nimbu abe que erese no nda. Ngoi ngoi que ngũfã ndese erimba raã naa ee ra. ²⁰ I quia iquia tuchi que eu ee ra. Aquere que tiru ireĩ mbuti esi cote ra. Eiraote que emingue ee cote ra. Curuchoi que embucha nonde ira rese cote ra.

Mbia Jesús mbucha ira rese

²¹ I rei que emo u quia uco si ra. Simón, i que ee ra. Cirene jenda mo ngue ae ra. Alejandro ru que ra. Rufo ru abe no. Aque que soldados isi ira mbuchicuandasa ji rerao sacua ee ra. Cruz, i equia ee. Nguerao que cote ra. ²² Ngasẽ ngue pee cote ra. Gólgota, i que hue je ra. Eresa cuare, i chõ nguã hue je. ²³ Huee que vino mondo rei Jesús je ra. Mirra je emumbarai. Mbei eã ngue ra. ²⁴ Soldados que Jesús mbucha ira rese ra. Aquere que sita ñetẽ mbaba mbaba o je cote ra. —Aba ra Jesús irao querao ñi ja, i que nyue ra. ²⁵ Tenda chui ite ramo mose que embucha ira rese ra. ²⁶ Mbia que letrero mii Jesús ãquĩ nguĩtĩ ibate ra. JESUS REI JUDIO RERECUA i que embesa mii nda. Ûquĩ ñii ño eriqui nguã eiquia hue. ²⁷ Mbia nyeremo abe que embucha ira rese Jesús chabe ra. Jesús rereco chobei que emi ira rese ra. Mbae mbuquiachãsa tuchi que Ûquĩ nda. ²⁸ Embesa ji cheẽ nguire que Jesús iquia mbia icuã ndese cote ra. Sã embesa ji riqui ñee no: “Mbia icuã ndese ra eiquia, sã embesa ji i ñee nyii no. ²⁹ Mbia que iquia iquia quia Jesús cheẽ naa naa ecuã mose ra. Ñee icuã icuã ee. —“Dios chuchua ra ambucoi. Tres días mose ra ambuchuruambe” ere que equia. ³⁰ Equiche u nde ae hue si no, i tuchi que mbia quia iquia iquia ee ecuã mose ra. ³¹ Sacerdote rerecua abe que iquia iquia chõ nguia ee ra. Embesasa abe no. Ûquĩ ngue ñee icuã icuã ja quia erii nda. —Mbia que embuquera quera rei nyii ra. Ae sí quera aroneate nguã aque. ³² Judío rerecua mose ae, sã ae ae nguichi ira si. Cristo mose ae, sã ae ae nguichi no. f nda uremae erese. f nda ureicua cote, i ja que ererecua ñee icuã icuã erii nda.

Jesús mano mose cote

³³ Tenda nandeite re mose que itondaru tu ra. Itondaru bei que mbia ja je tres horas ra. ³⁴ Tenda cheseco mose que Jesús ñeemombo cote ra. —Eloi, Eloi, ¿lama sabactani? i que ñee mombo ra. —Dios sererecua, ¿mbaerã ereico hui sesi re? i chõ ngue ñee nguã. ³⁵ —Elías je eriqui “quiatuchu” i reae, i rei que echeẽ andusa mo nda. ³⁶ Emo ngue esponja monde vinagre ye ra.

Ira ai rese que embia ji mondo rei Jesús chúruu cote ra. —Esecha rei. Sã Elías ruãt e quia erea, i que emo ñee ee ra. ³⁷ Jesús que tasẽ mano mbei cote ra. ³⁸ Aque mosechi tuchi que cortina nyisia Dios chuchua jenda ra. Ibate si que eru nyisia íbii ra. ³⁹ Soldado rerecua que chĩ Jesús nonde mae erese ra. Emano ndese que eñi mae nda. —Dios riiri ño eriqui re, i que cote ra.

⁴⁰ Cuña ngue chi jate ma e Jesús rese isho ra. María Magdalena abe que chĩ huee ra. Salomé abe no. María abe no. María rei José si. Jacobo Ñetẽ si abe no. ⁴¹ Ũqui ngu e siqui bei quia Jesús rui ra. Echurã ngue emii mii mbei quia ee ra. Galiléaa eico mose bei. Cuña tubiriãte abe que chi mae Jesús mbuchai rese huee ra. Ae nyoĩ Jesús rese Jerusalén, ũqui.

Mbia Jesús raaque chati cote

⁴² Tenda que oso cote ra. Sábado nonde. Aque mose bei que mbia riqui mbae mbuquiche ja sábado sacua nda. ⁴³ Aque eresaitõ mose que José si ñee Pilato je ra. Judío turã ngue ae ra. Arimatea jenda que ae ra. Judío rerecua que ae no nda. —Dios ra ererecua, i beite que equia eraarõ arõ nda. Aque que ireĩ ireĩ ãte oso ñee Pilato je ra. —Jesús raaque emee na seje, i que oso ñee ee ra. ⁴⁴ —¿Mano jei tuchi ere? i tuchi que Pilato uchiangui re ra. —Quiatuchu rã sembiirandu. ¿Jesús mano cote re? i que Pilato ñee soldado rerecua je ra. ⁴⁵ —Mano ngue cote ra, i que soldado rerecua ñee ee ra. Nyebe Pilato eraaque mondonguiã José je cote. ⁴⁶ José que Jesús raaque mbuquichi cote ra. Tirushĩ turã mo ngue eisi ra. Eraaque que echuma aque je cote ra. Iti que echoi sita ribicoi ji imi ye ra. Nyati que sita cuasu mo je cote ra. ⁴⁷ María Magdalena ngu e mae mi eati rese ra. María rese. José si que ae ra.

16

Jesús raaque quera si

¹ Jesús raaque ati ji que chibe sábado mose ra. I nyaashĩ oso quia domingo mose, aque mose que cuña mo nyoĩ mae eatisa rese ra. María Magdalena. Salomé abe no. María abe no. Jacobo si rei ae. Ũqui ja que aba mbushimbua isi rei eichusẽ chusẽ sacua Jesús raaque rese ra. ² Tenda nyui ramo mose que echoi eatisaa ra. ³ —¿Aba ra sita curuba nande je eatiquia re? i rei que echoi quia ñee ñee nyue ra. ⁴ I que sita rurubai u ee cote ra. Sita cuasute quiatu ngue re. ⁵ Ique rei que echoi sita imi ye ra. Acuanindu mo ngue chĩ ngoi huee equiatocuti quti ra. Huiiraoshĩ oco tuchi que ecunui huee ra. Cuña ngue siquiche tuchi ra. ⁶ Acuanindu que ñee ee ra. —¿Mbaerã jëngo siquiche re? Jesús raaque jësequia raque quia ã. Emoate a resẽ. Eraaque que quera si no. Jemae eatisa rese ae. ⁷ Jëso asi rã echimbaaquiatu mbiirandu erese. Pedro abe jembiirandu. “Jenonde ra esi Galilea. Jemae nda erese huee. Sã ñee jëje nyii no”, jenyẽ embiirandu, i que acuanindu ee ra. ⁸ Cuña ngue siquichete echeẽ andu ra. Uchã ngue echoi eatisa si ra. Ñee eã tuchi que mbia mo je ra. Esiquichete quiatu ngue re.

Jesús nyecua María Magdalena je

⁹ Jesús que quera si nyaashĩ namo mose domingo mose ra. María Magdalena nane jẽ que nyecua ra. Aque si chõ eriqui siete aba checuayã icuã jea nyii reaẽ. ¹⁰ Ae que oso Jesús quiato mbiirandu ja cote ra. Ngasẽ mose ee que echi nyeseo jate eya eã ee ra. ¹¹ —Jesús que quera si ra. Amae ngue erese ra, i rei que embiirandu ra. Quera aroneate que ũqui je ra.

Jesús nyecua uquiato nyeremo je

¹² Aquere que nyecua uquiato nyeremo je ra. Ishote que sucha tubiriã si ra. Emo na tuchi que ee ra. ¹³ —Jesús que quera si nyecua ure je ra, i rei que echoi uataque mbiirandu ra. Quera aroneate que ee no nda.

Jesús uchimbaaquiato mondo mbia mbiirandu

¹⁴ Aquere que Jesús nyecua uchimbaaquiato ja je no nda. Once je. Ũquĩ quiaru mose que nyecua ee ra. Ñee asi asi que ee ra. —¿Mbaerã jeñia ãtãte riqui re? ¿Mbaerã “nyia” jenyẽ eã jembiirandu mose sequera rese re? i que ñee ee ra. ¹⁵ —Jẽso secheẽ nenei nenei mbia ja je. Mbã mangue choõõoa jenda ja je. ¹⁶ Mbã mo nda seicua icua. Ũquĩ je bautizar jenyẽ. Ũquĩ nda siqui bei cote. Ae ra seicuayã, ũquĩ nda mbae rasi saã mbei. ¹⁷ Seicuada ra mbã mae sayã saã saã tuchi. Aba checuayã icuã nda eja jea mbã si serĩ. Mbã cheemo nda esaã. ¹⁸ Mbei ra eisi isi o je. Aba iquiãsa mbei mose ra erasiã. O ra echono ñono erasi arõ embucherõ sacuã, i que Jesús uchimbaaquiato mondo ra.

Jesús nyui oso ibate

¹⁹ Jesús ñee ja mose que Dios equerao ibate cote ra. Siqui bei sacuã Dios jii cote. ²⁰ Echimbaaquiato que nyoĩ Dios cheẽ nenei nenei mbã ja je ra. Mangue choõõoa jenda ja je. Dios que siqui tuchi quia erese ra. Mbã mae sayã tuchi que esaã saã nguia ra. Mbã Dios cheẽ icua sacuã. Amẽn.

EL SANTO EVANGELIO SEGÚN SAN LUCAS

Lucas ucheẽ mbesa Teófilo je

¹ Jesucristo que mbae saã saã tuchi quia huico mose ìbii ra. Mbia atate que echisaã mbesa mbesa rei ra. ² Mae ndei equia erese nyii. Dios cheẽ esenei senei mbei rei quia nyii. Jesucristo chisaã ndese que urembiirandu cote ra. ³ Se abe que airandu tuchi cote ra. Ae esaã saã nguia nyii nae, aque mosenda bei rese que airandu cote ra. Se abe ùquĩ tambesa ja ndeje, Teófilo. Tasenei turã ja embuchiabiã ndeje. ⁴ Ae rese ereirandu randu nae, ùquĩ ereicua tuchi sacua ño aico nguia embesa mbesa ndeje. Eĩ nda “ae bei” ere chõ nguia Jesucristo chisaã saã je.

“Juan el Bautista ra nyecua u mbia je”, i que ángel mo nda

⁵ Zacarías, i que emo je ra. Sacerdote que ae ra. Herodes que siqui Judea mbia rerecuarã aque mose ra. Abías resenda rei Zacarías. Aarón ndiirĩ nducucha rei Zacarías. Eninisi abe rei Aarón ndiirĩ nducucha no. Elisabet, i que eninisi je ra. ⁶ Zacarías turãte que eriqui Dios je ra. Ngūinisi rese. Ùquĩ ngue Dios cheẽ mumbayã mbei quia ra. Eĩcuãte, i aroneãte que mbia mo nguia eri nda. ⁷ Eriiriã mbei que eriqui ra. Tiiriã je rei Elisabet. Ari chee. Zacarías abe que ameite chee ra.

⁸⁻⁹ Sacerdotes que nyuuru uru beite quia querabe mbae raã naa Dios chuchúaa ra. Nyebe que Zacarías abe riqui mbae raã naa Dios chuchúaa emo mose ra. Zacarías que oso ique tuchi Dios chuchua ra. Mbae mo ndei sacua embushimbu. ¹⁰ Zacarías que mbae shimbu sei cote ra. Mbia cuabẽ ngue chi ja taicuee ñee ñee Dios je ra. ¹¹ Angel ibatenda mo ngue tu nyecua Zacarías je cote ra. Chĩ ngue juã mbae shimbu reisa ji ee ra. ¹² Zacarías mae mose ángel rese, siquiche tuchi que ra. ¹³ Angel que ñee Zacarías je cote ra. —¿Mbaerã ereico siquiche re? Dios que ndecheẽ ñandu ra. Elisabet nda tiirĩ ndeje cote. Juan, ere nderiirĩ je nyaacuquia mose. ¹⁴ Ndeyate ra cote. Nderiirĩ nyaacuquia mose ra mbia ia tuchi cote. ¹⁵ Nderiirĩ nda mbae turã saã saã tuchi quia Dios je. Mbaeri rasi mo nda embei eã tuchi. Espíritu Turã nda siqui tuchi erese. Esi rie ye eremo mose bei. ¹⁶ Nderiirĩ nda mbia Israel jenda mbuchebe ja Dios je. Dios ra ùquĩ nderecuarã. ¹⁷ Nderiirĩ nda mbae mbuquiche ja Cristo tu nonde. Sã Dios Elías mbuquirãcuã no, eĩ si ra Dios uquirãcuã mee nderiirĩ je. Nderiirĩ nda mbia mbuturã turã nyiese. Erũ mbuturã turã nguiirĩ ndese. Eriirĩ mbuturã turã ngu rese no. Nderiirĩ nda aba cheẽ mumbasa mbaaquiatsu quiatu. Aba cheẽ mumbayã sacua cote. Nderiirĩ nda mbia mbuquiche ja Cristo tu nonde, i que ibatenda ñee Zacarías je ra. ¹⁸ Zacarías que ñee ángel je ra. —¿Mañi nda ùqui nde? ¿Ndecheẽ nda ique seje re? ¿Manyae ra eicua re? Ameite se. Seninisi abe arite, i que Zacarías ee ra. ¹⁹ Angel que ñee Zacarías je ra. —Se rei Gabriel. Dios rimba chõ aico co. Dios quia semondo rei nguia ñee turã sacua ndeje. ²⁰ “Nya” ere eã ñochĩ secheẽ je. Nyebe ra ndeisyã. Ndecheẽ ngũã nda eno. Nderiirĩ nda nyaacuquia chee. Nderiirĩ nyaacuquia mose ra erecheẽ nyecua cote. Secheẽ nda io ja ndeje cote, i que ángel Zacarías je ra. ²¹ Mbia que chi bei taicuee huee ra. Zacarías raarõ arõ. —¿Mbaerã Zacarías riqui itõ tuchite Dios chuchúaa re? i que mbia

ñee jate ra. ²² Zacarías que useñ nyee ra. Echeẽ ngũĩã. O que emumbate mbate chõ nguia mbia je ra. —Zacarías mbae mo tea cuu Dios chuchua reae, i que mbia ñee ñee nyue ra. ²³ Zacarías que umbae tarea saã ja Dios chuchúaa ra. Tenda nongue mose. Emo ngue tu euru cote ra. Zacarías que oso uchuchua cote ra.

²⁴ Aquere qu Eya uchi que cote ra. Eninisi que useã mbei tuchua si cinco meses ra. ²⁵ —Dios seriirina meeñi seje cote. Mbia ra iquia iquia eã seje cote, i que Elisabet ra.

“Dios riirĩ nda nyecua u mbia je”, i que ángel mo nda

²⁶ Nyasi nongue mose que Dios ibatenda mondo mbia mo je ra. Gabriel, i que aque ángel je ra. Aque que emondo sucha Nazaret ra. Galilea, i que aque ibi je ra. ²⁷ —Eso rã ñee nyucuaaque María je, i que Dios ángel mondo ra. Emo ngue siquĩã tuchi María rese ra. Eruã mbei. José ninisibi rei María. José siquĩã ndaque erese. David riirĩ nducucha rei José. ²⁸ Angel que ique María ch María chuchua cote ra. —Acheẽ ngue u ndeje ra. Dios turã tuchi riqui ndeje co. Ndua bei nderese. Dios ia tuchite nderese acuanĩ mo si, i que ángel María je ra. ²⁹ María mae mose ibatenda rese que ñee uchiangui re ra. —¿Mbaerã eru quia serea co re? ¿Mbaerã eru quia ñee seje co re? i que María uchiangui re ra. ³⁰ Angel que ñeembe ee ra. —María, siquichechĩ nda sesi re. Dios turã tuchi riqui ndeje co. ³¹ Dios cheẽ turã ngue asenei u ndeje ra. Nanĩmbae ra nde cote. Nderiirina nda eretea cote. Jesús, ere nderiirĩ je. ³² Nderiirĩ quirãcuã tuchi rae. Dios quirãcuã ndiirĩ nda erereco. Mbia rerecua tuchi ra ae. Sã David riqui mbia rerecua nyii no, eĩ nda nderiirĩ mbia rerecua tuchi cote. ³³ Nderiirĩ nda judíos rerecua bei cote. Ua eã mbei rae, i que ángel ñee María je ra.

³⁴ María que ñee ángel je ra. —¿Mañi nda serío re? Seru eãte nyeresẽ, i que María ee ra. ³⁵ Angel que ñee María je ra. —Espíritu Turã ae ra Dios riirĩ mondo nderie ye. Espiritu Turã nda ndereaquiato bei quia. Dios quirãcuã nda siqui bei nderese. Nyebe ra Dios mbaerã tuchi nderiirĩ. Dios rucucha, i ra nderiirĩ je. ³⁶ Ndesi nongue ndiirĩ abe ra tiirĩ cote. Elisabet, i equia ee nae, aque abe ra tiirĩ. Arite raque. Erie cuasu cote. Tiirĩ mbae, i mbia quia ee nyii nae, aque ra tiirĩ cote. ³⁷ Dios quiarei mbae ao ja, i que ángel ñee María je ra. ³⁸ María que ñee ee ra. —Dios rimba chõ aico nguĩã co. Sã ndecheẽ ique quia seje, i que María ra. Angel que oso erecha cote ra.

María oso Elisabet ndea

³⁹ María que oso Elisabet ndea cote ra. Ñeenda ishote que ee ra. Sita ibate bate rĩ ngue esi quia ra. Judea, i hue ibi je. ⁴⁰ María que ngasẽ Elisabet ndu chuchúaa ra. Zacarías, i equia eru je. Ique que ñee Elisabet je ra. ⁴¹ Elisabet María cheẽ andu mose, erie yenda que umĩ nda. Espiritu Turã ngue ique tuchi Elisabet chiangui re cote ra. ⁴² Elisabet que ñee nyecua tuchi María je ra. —Nde rese chõ Dios ia tuchi acuanĩ mo si re. Dios ia tuchi nderie yenda rese abe no. ⁴³ ¿Mbaerã Cristo si ru serea se re? Mbia rerecua eã ño se resẽ. ⁴⁴ Se ndecheẽ andu mose que serie yenda ia tuchi umĩ nda. ⁴⁵ Dios cheẽ ngue ereisi turã nda. Nyebe Dios iate riqui nderese co. Nyebe ra Dios cheẽ ique tuchi ndeje cote, i que Elisabet ñee María je ra. ⁴⁶ María que ñee cote ra. Acheẽ turã mbei quia Dios rĩĩ co.

⁴⁷ Seya bei riqui Dios rese co.

Ae que serirõ mbae icuã si ra.

⁴⁸ Dios que nduate quia serese ra.

Seaquiatuã ndaque.

Nyebe ra mbia ia jate serese cote. ⁴⁹ Dios quirãcuã ngue mbae turã saã tuchi seje ra.

Ae mii ño eturã tuchi emo si re.

⁵⁰ Ae ndua turã nguia Dios rese nae, ùquĩ ndese chõ Dios ia eã tuchi riqui nguia.

Eĩ mbei chõ Dios nguia mbia je co.

⁵¹ Dios quirãcuã ngue mbae saã ja ra.

Ucuasu raã naasa chõ Dios mboseĩ nguia.

⁵² Siqui mingue je chõ Dios mii mii nguia mbia rerecuarã.

Ae ererecu uaquiatu saã saã nguia nae, ùquĩ ño Dios sirõ nguia.

Ererecu eã ño ùquĩ cote re.

⁵³ Dios que mbae mee mee nguia mbaecha reã je ra.

Mbaecha quia emboochi nguia.

⁵⁴ Dios que siqui tuchi judíos rese ra.

Tesareia mbei esi.

Eyayã mbei erese no. ⁵⁵ Sã Dios ñee Abraham je no, ùquĩ ngue embuchebiã mbei ra.

Ae ucheẽ mondo judíos jaje nae, ùquĩ ngue embuchebiã mbei no nda, i que María ñee turã Dios riĩ nda. ⁵⁶ María que siqui arete Elisabet rese ra. Tres meses. Aquere que eru nyebi uchuchúaa cote ra.

Juan el Bautista nyaacuquia

⁵⁷ Elisabet rasi rasite que cote ra. Nyaa cuquia que cote ra. ⁵⁸ Mbia que nyoĩ ja Elisabet ndea cote ra. Eji jenda. Eresenda ja. —Dios turã tuchi riqui ndeje co. Æquẽ mondo ndeje, i ja que ee ra. Eya ja tuchi que erese ra. ⁵⁹ Ocho días mose que circuncisión naa eriirĩ je ra. Zacarías, i nda mbia eriirĩ je chã nde. Eru rã si. ⁶⁰ Esi quia que ñee nda. —Tei. Juan nande chõ ee, i que esi ra. ⁶¹ Mbia que ñee esi je ra. —¿Mbaerã nda “Juan” ere nderiirĩ je re? Juan mo eã nderesenda mo aa resẽ, i rei que mbia esi je ra. ⁶² Mbia que o mbaaba aba Zacarías je ra. —¿Mañi nda nderiirĩ je re? i ee. ⁶³ Zacarías que ñomee mbia je ra. Nyebe mbia embesa sacua mee nguia ee. —Juan, i chõ seriirĩ je, i que Zacarías embesa ra. Mbia que nyuruira ja u mae erese ra. ⁶⁴ Aque ruibe que Zacarías ñee aquiatu cote ra. Ñee turã tuchi que equia Dios riĩ cote ra. ⁶⁵ Zacarías cheẽ andure que mbia nyuruira jate ndua ndua hue jenda ra. Nyebe mbia ñimbiirandu ja nguia sita ibate bate jenda. Judea, i que hue ibi je ra. ⁶⁶ Ae jirandu quia erese, ùquĩ ngue ndua tuchi quia erese ra. —Mañi nda Zacarías riirĩ nguia reae. Nandemae nguia erese no, i que mbia quia ndua ndua ra. Dios que siqui tuchi Zacarías ndiirĩ ndese ra.

Zacarías ia tuchi ñee Dios je

⁶⁷ Espíritu Turã ngue siqui tuchi Zacarías rese ra. Nyebe Zacarías Dios cheẽ nenei nguia.

⁶⁸ Sã mbia ñee turã Dios riĩ judíos rerecu rii.

Uturã ngue eteacuquia nande je ra.

Nanderirõ ngue mbae icuã si ra.

⁶⁹ Nanderirõ sacua nandecuã si que Dios mondo nande je ra.

David riirĩ nducucha que nanderirõ sacua nda.

⁷⁰ Sã Dios ñee cose no.

“Mbia rirõ sacua nda ambu íbii”, i cose no.

Ucheẽ nenei neneisa que embuchecua mbia je cote ra.

71 “Jêucuâyâsa si ra jendirôsa jendeaquiato bei”, i que Dios nande je ra.

72-73 Dios turâte que eriqui nandei ñiinda je ra.

Abraham je abe que eturâte riqui ra.

Ae Dios ñee Abraham je nyii nae, echeẽ ngue io cote ra.

74 Dios que ñee Abraham je nanderi nyii ra.

“Taendeaquiato jêucuâyâsa si, jêsiquicheã sacua ico mose serese”, i que Dios nanderi cose ra.

75 Nyebe ra nandeico turã mbei Dios je.

Ae ra nandemingo bei icúe umbaerã.

76 Nde ra Ibatenda cheẽ esenei senei nguia mbia je, Ñquẽ.

Dios riiri ndetã nda Dios cheẽ eresenei senei nguia mbia je, Ñquẽ.

Mbia icoquiato sacua Dios riiri je. 77 Eĩ mose ra Dios mbia rirõ eicuã si.

Eĩ mose ra Dios mbia icua mbutiã esi.

78 Dios turâte quia eriqui nguiã nande je.

Eriiri nda tu ibate si mbae mbuchecua nande je.

79 Nandaquiato mbaaquiato sacua ño eru nguiã aque.

Nandemingo sacua nyaashĩ naanguia chõ eru nguiã aque,

i que Zacarías ñee aquẽ je ra. 80 Ñquẽ ngue tiarõ i i oso quia cote ra. Dios rese que eriqui i i cote ra. Siqui bei que equia turúquiaa ra. Dios cheẽ ngue esenei senei nyee mbia je cote ra.

2

Jesús nyaacuquia

1 Aque mose que ererecua ñee nda. Augusto, i que ee ra. —Censo nandesaã na mbia ja je, i que ra. Mbia mbae nombre mbesa mbesa ja mose, “censo” i que uqui je ra. 2 Censo raã namo mose rei uqui. Cirenio ngue Siria jenda rerecua aque mose ra. 3 —Jenyusua sua jêso ja pueblo. Nombre mbesa mbesa ja sacua jembae, i que ererecua mbia ja je ra. 4 Nyebe José choi nguiã Judea. Belén, i que sucha je ra. Belén ño David chusua re. José i chõ David re. Nyebe José choi nguiã Belén. Umbae ibi recha. Nazaret recha. Galilea abe recha no. 5 José que nyoĩ Belén umbae nombre mi sacua nda. María rese. María que eninisibi ra. María riote que ra. 6 Siqui mose Belén ngue aquẽ ndasi rasite María je ra. 7 Aque ramo ngue María nguiiri mbua ra. Ñuma ngue tiru je ra. Ticuas quiarusa ye que eno nda. Mbia chuchua quiato que eitãyãte ee ra.

Oveja raarõsa ngaẽ mae Jesús itãqueĩ ndese

8 Hue jii que oveja raarõsa mo nyi isa ra. Ovejas que esaarõ arõ nguia turuquia rĩ nda. 9 Angel ibatenda mo ngue tu embua tuchi ra. Dios nininya tuchi que tu overja raarõsa resae ra. Nyebe siquiche tuchi nguiã esi. 10 Angel que ñee ee ra. —¿Mbaerã jêsiquichete riqui re? Mbae turã ñi ño achu nguiã ñee jêje co. Ae ra asenei jêje, mbia mbia sacua tuchi chõ uqui nde. 11 Dios riiri ngue nyaacuquia namo Belén nda. Cristo, i equia ee. Mbia rirõsa mbae icua si chõ ae re. 12 Aque echi ticuas quiarusa ye aque. Ema ji tiru je. Jemae nda erese huee. Jemae mose sechienei ndese, “Cristo chõ eriqui re”, jenyera cote, i que ángel ñee oveja raarõsa je ra. 13 Angeles tubiriãte que nyecua oveja raarõsa je cote ra. Angel ñiinda ndese. Ñee turã ja que Dios rĩ nda. 14 Sã mbia ñee turã ja Dios ibatenda rĩ.

Sã Dios uquiato mbia ja ibi jenda, i que ángeles ñee nyecha ee ra. ¹⁵ Angeles que nyoibe ibate cote ra. Oveja raarõsa que ñee ñee nyue cote ra. — Nyaso rã Belén. Ae Dios senei senei nguia nande je nae, nyaso rã mae erese. Ae nyaacuia namo nae, nyaso rã mae erese, i que oveja raarõsa ñee nyue ra. ¹⁶ Nyoĩ asi tuchi que mae erese ra. Ngasẽ ngue María je ra. José abe je. Áquẽ abe je. I que áquẽ u ticuas quiarusa ye ee ra. ¹⁷ Oveja raarõsa que mbia mbiirandu ja erese ra. Ae ángel senei senei nguia ee María riirĩ ñĩ, ũquí ngue oveja raarõsa senei senei tuchi mbia je cote ra. ¹⁸ Eandusa que nyuruira ja tuchi eandu ra. ¹⁹ María que ndua ndua tuchi quia ũquí ja rese uchiangui re ra. ²⁰ Oveja raarõsa ia tuchi que nyoĩ nyebi ovejas je ra. Ñee turã turã tuchi que echoi quia Dios riĩ nda. —Angel que ñee nande je, echeẽ ndui si tuchi chõchĩ mbae eĩ ja, i que ñee ñee nyue ra.

Jesús ruruchoi Dios chuchúaa

²¹ Ocho días mose que circuncisión naa áquẽ je cote ra. Jesús, i que áquẽ je cote ra. Angel cheẽ ndui si tuchi chõ “Jesús” ichĩ áquẽ je. Ae ángel ñee María je erio nonde nae, echeẽ ndui si tuchi chõ “Jesús” ichĩ María riirĩ je. ²² Aquere que María ñimbitirõ Moisés cheẽ ndui si cote ra. Aquere que áquẽ nduruchoi Jerusalén cote ra. Áquẽ mee sacua Dios je. ²³ Embesa ji cheẽ ndui si que áquẽ mee Dios je ra. —Ae eriirĩ i erãcuẽ nae, ũquí jemondo tuchi Dios je, i quiatu ngue embesa ji rese re. ²⁴ Jerusalén José riqui mose que sacrificio mee Dios je ra. Embesa ji cheẽ ndui si. Sã embesa ji riqui ñee no: —Nyurusĩ nyeremo jemee Dios je. ũquí eã mose, nyurusĩ ñetẽ jemee ee no ae, i que embesa ji cheẽ nda. ²⁵ Amei mo ngue siqui hue Jerusalén nda. Simeón, i que ee ra. Ae que eturã tuchi ra. Ñee mbei que equia Dios je ra. Ae que Dios riirĩ saarõ arõ tuchi quia ra. Judíos mbui sacua mbae icua si. Espiritu Turã abe que siqui Simeón ndese ra. ²⁶ Espiritu Turã nguia ñee ndei Simeón je nyii. —Eremae nda Dios riirĩ ndese. Ndemano nonde ra eretea. Dios ra embu ibii, i que Espiritu Turã ñee Simeón je nyii ra. ²⁷ Espiritu Turã ngue Simeón querao Dios chuchúaa ra. Embesa ji cheẽ ndui si que José áquẽ nduruchoi Dios chuchúaa aque mose si ra. María reses. ²⁸ Simeón ngue áquẽ sui ra. Eya tuchi que erese ra. —¡Co chõ jẽ! i que Simeón ñee turã Dios je ra.

²⁹ Dios, ndecheẽ ngue io seje cote ra.

Seyate aico co cote Sererao se cote.

³⁰ Nderiirĩ ndese que amae cote ra.

³¹ Ae erembu mbia riirõ sacua mbae icua si nae, aque rese aico mae co cote.

³² Mbia resae sacua tuchi chõ nderiirĩ ndiqui re.

Judíos eã abe ra etesae tuchi.

Judíos abe je ra eturã tuchi no,

i que Simeón ñee Dios je ra. ³³ Simeón ñee mose María riirĩ ñĩ, José que nyuruira tuchi echeẽ andu ra. María rese. ³⁴ Simeón ngue ñee turã María je ra. —Nderiirĩ nda judíos tubiriã mingo turã. Ae siqui sereãte quia erese, ũquí nguia ra emingo icua. Mbia ra ñee icua icua nguia nderiirĩ turã je. Eicua je rocoĩ. ³⁵ Ae ndua turãte quia nderiirĩ ñĩ nae, ũquí ndua ndua turã nda nyecua mbia je cote. Ae ndua ndua icua nguia, ũquí ndua ndua abe ra nyecua mbia je cote no. Mbia icua nda nemundite nderiirĩ ndese, i que Simeón María je ra. ³⁶ Huee que arite mo ndiqui ra. Dios cheẽ nenei neneisa que ae ra. Ana,

i equia ee. Fanuel, i que eru eiruã siasa je ra. Aser, i que ei ñiinda je ra. Ana yasu mose que ngurã ndea nyii ra. Siete años que eriqui ngu rese nyii ra. ³⁷Eru eã ngue cote ra. Eru cheecha que siqui beite ra. Ochenta y cuatro años. Dios chuchúaa que eriqui beite ra. Ñee ñee mbei Dios je. Quiaru rocoi. Isa abe. ³⁸Ana ngue mae ãquē Jesús rese Dios chuchua cote ra. —¡Co chõ jê! i tuchi que Dios je ra. Ñee turã tuchi que ãquē n# mbia jaje cote ra. Ae Dios riirĩ saarõ arõ nguia nae, ùquĩ jaje que Ana ñee turã turã ãquē n# nda.

José nyebi Jesús rerao Nazaret

³⁹José que mbae saã ja embesa ji cheë nguire ra. Aquere que echoi nyebi Galiléaa ra. Nazaret, i equia echuchua je. ⁴⁰María riirĩ ngue tiarõ cote ra. Ñimbaaquiatsu quiatu que equia cote ra. Ñimbirãcuã nacuate que equia cote ra. Dios turã ngue siqui tuchi quia erese ra.

Jesús ñimbaaquiatsu quiatu Dios chuchúaa

⁴¹Aque tenda bei que José riqui nyoĩ choi Jerusalén nda. Fiesta de la pascua mose bei. María rese. ⁴²Jesús tiarõ namo mose, doce años mose que echoi si fiesta de la pascua mose no nda. Jerusalén. ⁴³Fiesta ua mose que ecuaë ndei quia nyebi ra. Jesús que siquichõ Jerusalén nda. Jesús abe oso reĩ nguiã usi je. Ngu abe je. ⁴⁴Jerusalén ño eriquichõ neaë. Mbia ataque rese eru reĩ nguiã esi je. Mbia que ngaë ngaë bei quia tenda mumba chee ra. —Ma Jesús ñi, i rei que nguesenda je ra. ⁴⁵Tea eã mbei que ra. Erea eã mose que eru si chee nyebi Jerusalén nda. María rese. Erequia sacua huee cote. ⁴⁶Tres días mose que erea huee cote ra. Dios chuchúaa que eriqui ee ra. Ñimbaaquiatsu quiatu. Mbia mbaaquiatusa cheë andu andu que Jesús riqui ngoi huee ra. —¿Mañi equia re? Tachandu tuchi rã, i i que equia ee ra. ⁴⁷Jesús cheë aracua tuchi que eriqui mbia je ra. Nyebe mbia nyuruira nguiã echeë aracua andu. ⁴⁸Eru erea mose huee, ae abe que nyuruira ra. Esi abe nyuruira no. Esi que ñee ee ra. —¿Mbaerã eresoa urerese re, Echo? Ureya eã tuchi que eriqui nderequia asi asi ra, i que María nguiirĩ je ra. ⁴⁹Jesús que ñee ee ra. —¿Mbaerã serequia mámbii re? Paba chuchua chõ ngue aico resë, i que Jesús usi je ra. ⁵⁰María que Jesús cheë icuayate ra. José abe echeë icuayã no. ⁵¹Jesús que oso uchuchua erese cote ra. Nazaret, i equia sucha je. Usi cheë ngue emumbayã mbei quia ra. Ngu cheë ngue emumbayã mbei quia no nda. Esi que ndua ndua bei quia ùquĩ Jesús chisaã ndese ra. ⁵²Jesús rete que siri siri oso quia cote ra. Ñimbaaracua racua que equia no nda. Dios iate que eriqui erese ra. Mbia abe iate que eriqui erese no nda.

3

Juan Dios cheë senei senei mbia je

¹⁻²Aquere que Dios ñee Juan je ra. Zacarías riirĩ je. Tiberio siqui bei mose mbia ja rerecuarã. Quince años ereco mose mbia rerecuarã. Poncio Pilato que Judea jenda rerecu a que mose ra. Herodes que Galilea jenda rerecu ra. Felipe que Herodes nongue ra. Felipe que Iturea jenda rerecu ra. Traconite jenda rerecu abe que Felipe no nda. Lisania que Abilinia jenda rerecu ra. Anás que sacerdote rerecu ra. Caifás abe que sacerdote rerecu ra. Ùquĩ ererecu si que mose que Dios ñee Juan je turuquia re ra. ³Nyebe que Juan Dios cheë senei senei nguia mbia je ra. Ama Jordán ndurubinda jaje. Eĩ ño ngue Juan nguia ñee mbia je ra. —Jêhui chõ jêcuã si. Dios jêcuã mbutiã sacua. Ùquĩ mose nda bautizar ae jêje chã, i que Juan nguia ñee mbia ja je ra.

⁴ Isaías chimbesa io sacuã ño ngue Juan Dios cheẽ nenei nenei nguiã. Isaías chimbesa chõ ã nde:

Emo nda ñeemombo mombo quia mbia je turúquiaa.

“Ñeenda nandererecua mbaerã jembuquiche.

Jẽingo quiatu nandererecua tu nonde.

⁵ Ñeenda jembuturã turã nandererecua mbaerã.

Ibi cuaacua jembato mbato.

Ibi ati ati jẽsimiambo ambo.

Ñeenda chaa chaa jeñeengo.

Ibi rashĩ ndashĩ jẽiti iti.

⁶ ‘Mbia mingo beisa’, i ja ra mbia ñee Dios je cote”, i ra emo nguia turúquiaa, i que Isaías embesa cose ra. ⁷ Mbia que nyoĩ nyoĩ ja quia Juan ndea ra. Juan bautizar i sacuã ee. Juan ngue ñee ee ra. —Mbei rá ño jẽingo nguiã. Mbae icuã nda jẽi jẽi mbia je, ¿ũquĩ si jenyu quia seje co re? ⁸ Jẽ mbae icuã ndecha mose Dios je, mbae turã jẽsaã saã mbei quia ee cote. “Abraham ndiirĩ nducucha chõ nande re. Nyebe ra Dios nandemingo bei” jjenyechĩ nda jẽ! Dios Abraham ndiirĩ nducucha chao arondete raque sita je. ⁹ Ira rá si chõ mbia re. Sã ira mo ia eã no. Sã ea eã maña ño no. Sã eréi chõ no. Eĩ serĩ serĩ ño Dios mbia je, mbia mbae turã naa eã mose, i que Juan ñee mbia je ra. ¹⁰ —¿Mbae rese ra ureico Dios je re? i que mbia Juan je ra. ¹¹ Juan ngue ñee ee ra. —Ndeirao nyeremo mose, enongue emondo eirao eã je. Ndechiurã mose, emo emondo mbaecha reã je, i que Juan mbia mbaaquiату quiatu ra. ¹² Impuestos isi isiquia mo abe que nyoĩ Juan je ra. Juan bautizar i sacuã ee. —¿Mbae rese ra ureico ure re? i que ñee Juan je ra. ¹³ —¿Mbae ra jembatachĩ jẽ! ¡Cobrar jenyete turã ño jẽ! Jẽicua quiatu chõ, i que Juan ee ra. ¹⁴ Soldados mo abe que ñee Juan je ra. —¿Mbae rese ra ureico ure re no? i que soldados ñee Juan je ra. Juan ngue ñee ee ra. —¿Mbia mbae ra jẽisi chooñochĩ jẽ! “Co que mbae icuã saã nda” jjenye chooñochĩ nda emo je jẽ! Jembae ae chõ jendeco, i que Juan ñee soldados je ra. ¹⁵ Mbia que mae quiatu quiatu quia Juan ndese ra. —Cristo chõ co reae, i raque mae quiatu quiatu erese. ¹⁶ Juan ngue ñee mbia jaje ra. —I achõ je chõ aico nguiã bautizar i mbia je co. Co chi emo ndu quia serui co. Ae quia equirãcuã tuchi sesi re. Ae quia eturã tuchi sesi re. Ae quia ra bautizar i mbia je Espiritu Turã je. Mbia chiã mbitirõ sacuã. Sã tata riqui mbae mbitirõ no. ¹⁷ Ae ra mbia umbae mi icúe. Eturã achõ ño embae re. Ae embae eã nae, ũquĩ nda esei cote. Ũquĩ ndeisa ra ua eã mbei tata. Sã mbia quiata a chiqui chiqui no. Sã ea mi icúe no. Sã echuruique mombo tátaa no, i que Juan ñee mbia je ra. ¹⁸ Eĩ ngue Juan nguia Dios cheẽ turã nenei nenei mbia je ra. Mbia mbaaquiату tuchi. ¹⁹ Ererecua Herodes je que Juan ñee nyee ra. Felipe ninisi rese siqui mose. —¿Mbaerã ereico ndenongue ninisi rese re? i que Juan ererecua je ra. —Mbae icuã eresaã saã ja techĩ nguia re, i tuchi que Juan ee ra. ²⁰ Ererecua que Juan ñee mumba bei chõ nda. Ererecua que Juan tarõ nyee cárcel nda.

Juan bautizar i Jesús je

²¹ Juan bautizar i mose mbia jaje, Jesús je abe que bautizar i ra. Jesús que ñee ñee nguia ngu je ra. Ibei que obo ee ra. ²² Espiritu Turã ngue nguichi Jesús rese ra. Nyurusĩ rá ño nguichi checua erese. Ibatenda que ñee ee ra. —Seriirĩ ño nde re. Sechesequa chõ nde re. Seyate nderese, i que Ibatenda Jesús je ra.

Mbia ñiinda Jesús i

²³ Jesús treinta años mose que mbia mbaaquiatsu quiatu ramo nda. —José riirĩ, i ja que mbia Jesús je ra. Elĩ riirĩ nguia José re. ²⁴ Elĩ rei Matat ndiirĩ. Matat ndei Levĩ riirĩ. Levĩ rei Melqui riirĩ. Melqui rei Jana ndiirĩ. Jana ndei José riirĩ. ²⁵ José rei Matatĩas riirĩ. Matatĩas rei Amós ndiirĩ. Amós ndei Nahum ndiirĩ. Nahum ndei Esli riirĩ. Esli rei Nagai riirĩ. ²⁶ Nagai rei Maat ndiirĩ. Maat ndei Matatĩas riirĩ. Matatĩas rei Semei ndiirĩ. Semei ndei José riirĩ. José rei Judá riirĩ. ²⁷ Judá rei Joana ndiirĩ. Joana ndei Resa riirĩ. Resa rei Zorobabel riirĩ. Zorobabel rei Salatiel riirĩ. Salatiel rei Neri riirĩ. ²⁸ Neri rei Melqui riirĩ. Melqui rei Adi riirĩ. Adi rei Cosam ndiirĩ. Cosam ndei Elmodam ndiirĩ. Elmodam ndei Er riirĩ. ²⁹ Er rei Josué riirĩ. Josué rei Eliezer riirĩ. Eliezer rei Jorim ndiirĩ. Jorim ndei Matat riirĩ. ³⁰ Matat rei Levĩ riirĩ. Levĩ rei Simeón ndiirĩ. Simeón ndei Judá riirĩ. Judá rei José riirĩ. José rei Jonán ndiirĩ. Jonán ndei Eliaquim ndiirĩ. ³¹ Eliaquim ndei Melea riirĩ. Melea rei Mainán ndiirĩ. Mainán ndei Matata riirĩ. Matata rei Natán ndiirĩ. ³² Natán ndei David riirĩ. David rei Isaĩ riirĩ. Isaĩ rei Obed riirĩ. Obed rei Booz riirĩ. Booz rei Salmón ndiirĩ. Salmón ndei Naasón ndiirĩ. ³³ Naasón ndei Aminadab riirĩ. Aminadab rei Aram ndiirĩ. Aram ndei Esrom ndiirĩ. Esrom ndei Fares riirĩ. Fares rei Judá riirĩ. ³⁴ Judá rei Jacob riirĩ. Jacob rei Isaac riirĩ. Isaac rei Abraham ndiirĩ. Abraham ndei Taré riirĩ. Taré rei Nacor riirĩ. ³⁵ Nacor rei Serug riirĩ. Serug rei Ragau riirĩ. Ragau rei Peleg riirĩ. Peleg rei Heber riirĩ. Heber rei Sala riirĩ. ³⁶ Sala rei Cainán ndiirĩ. Cainán ndei Arfaxad riirĩ. Arfaxad rei Sem ndiirĩ. Sem ndei Noé riirĩ. Noé rei Lamec ndiirĩ. ³⁷ Lamec ndei Matusalén ndiirĩ. Matusalén ndei Enoc ndiirĩ. Enoc ndei Jared riirĩ. Jared rei Mahalaleel riirĩ. Mahalaleel rei Cainán ndiirĩ. ³⁸ Cainán ndei Enós ndiirĩ. Enós ndei Set riirĩ. Set rei Adán ndiirĩ. Adán ndei Dios riirĩ.

4

Satanás tã i Jesús je

¹ Jesús que nyebi Ama Jordán si ra. Espíritu Turã ngue siqui tuchi quia erese ra. Turúquiaa que Espíritu Turã Jesús rerao ra. ² Huee que eriqui arete ra. Cuarenta días. Mbae mo ngue eu eã mbei aque mose ra. Eriãcuâte que cote ra. —Tã tae rã Jesús je. Ma Jesús mbae icuã naa, i rei que diablo Jesús rĩ nda. ³ —Nde Dios riirĩ mose, mbichae esaã co sita je no, i rei que diablo Jesús je ra. ⁴ Jesús que ñee ee ra. —Tei. Eĩ ngue embesa ji ñee nda: “Mbia chiũ achõ nda mbia mingo eã. Dios cheẽ nguia ra mbia mingo nguia”, i que embesa ji ra, i que Jesús diablo je ra. ⁵ Aquere que diablo Jesús rerao ibi ibate mo nda. Ibate tuchi. Diablo que ibi teacuquia ja Jesús je ra. Ishonda abe reacuquia ja ee. Aque mose bei que ereacuquia ja ee ra. ⁶⁻⁷ Diablo que ñee Jesús je ra. —Sembæe ja chõ ibi re. Se emondose mose emo je, amondo ra ee. Tamondo tuchi ndeje. Mbia ja rerecurã nda aremũ. Ndeico mose serese, tamondo ja ndeje. Serimbarã mose nde, tamondo ja ndeje no, i rei que diablo ñee Jesús je ra. ⁸ Jesús que ñee diablo je ra. —Quiatúae sesi ae, Satanás. ¿Mañi nda nderimba se re? “Dios ae rese chõ jẽingo”, i que embesa ji ñee ndesẽ, i que Jesús diablo je ra. ⁹ Aquere que diablo Jesús rerao Jerusalén nda. Querao que suruchui ibate Dios chuchua arõ nda. Ibate tuchi echuchua. —Nde Dios riirĩ mose, eo oso ibii. Dios ra ndereaquiatsu. Eremanoã nda oso ngoi. ¹⁰ Sã embesa ji riqui ñee no:

Dios ra ángeles mondo ndereaquiatsu sacuaĩ.

¹¹ Oje ra ndeisi.

Nembuquichi mingue rae.

Sita ra cua iã ndei je, i que embesa ji ra, i rei que diablo Jesús je ra. ¹² Jesús que ñee diablo je ra. —Sã embesa ji ñee no: “Ma Dios sereaquiatu. Tã tae ee no’, jenyechĩ nda Dios je”, i ñi Dios cheẽ nde, i que Jesús ñee diablo je ra. ¹³ Diablo Jesús mbiicua aronea mose, secha chee que oso ra. —Emo mose jiri ra tã aebe ndeje jẽ, i rei que uchiangui re ra.

Jesús mbia mbaaquiatu quiatu ramo

¹⁴ Jesús que oso nyebi Galiléaa cote ra. Espíritu Turã quirãcuã ngue siqui tuchi quia erese ra. Mbía hue jenda ja que jirandu ja tuchi quia erese ra. ¹⁵ Judíos chumunuásaa que Jesús riqui mbía mbaaquiatu quiatu ra. Mbía que ñee turã ja quia eriĩ nda.

Nazaret jenda Jesús isiteã

¹⁶ Jesús que ngasẽ Nazaret cote ra. Hue rei etiarõsa hue. Sábado mose que esi judíos chumunuásaa ra. Sábado mose bei que eriqui oso oso huee ra. Juã ngue embesa ji renei nonde mbía je ra. ¹⁷ Mbía que Isaías chimbesea mundo Jesús oo ra. Isaías chimbesea que eequia cote ra. Á embesa ji que esaã saã mbía je ra:

¹⁸ Espíritu Turã ndiqui tuchi serese co.

Dios que sererecúe ra.

Echeẽ turã nenei nenei sacua mbaecha reã je.

Etarõi mbusẽ sacua ño ngue Dios sererecúe ra.

Eresayã ndesa ira sacua ño ngue sererecúe no nda.

Ae je ererecua icuãte riqui nae, ùqui mbusẽ sacua ño ngue Dios sererecúe nguiã no.

¹⁹ Mbía je ñee ñee sacua ngue Dios sererecúe no nda.

“Name ño Dios turã ndiqui nguiã”, i sacua mbía je,

i que Jesús embesa ji mbuchecua mbía je ra. ²⁰ Jesús que embesa ji mumbi cote ra. Mondo que emo oo cote ra. Ngoi que cote ra. Mbía que mae mbei quia erese ra. ²¹ Jesús que ñee mbía je ra. —Embesea ji que ambuchecua jẽje namo, aque io quia jẽje a cote, i que Jesús mbía je ra. ²² Mbía que ñee turã ja quia Jesús riĩ nda. —Jesús cheẽ turã tuchi quia eriqui re, i ja tuchi que mbía nyuruira ra. —¿José riirĩ ño co re? i que mbía quia ee ra. ²³ Jesús que ñee mbía je ra. —“Mbía mae sayã ngue eresaã saã Capernaum nae, ùqui mo esaã aa ndechuchúaa no”, jeny arõte seje sechuchúaa. ²⁴ Tacheẽ nyecua rã jẽje. Dios cheẽ mbuchecua isaishonda cheẽ nguia ra mbía isi turã mbei quia. Nguetua jenda cheẽ nguia ra eisi turã eã. ²⁵ Tacheẽ nyecua rã jẽje. Elías reco mose íbii, ama ngue nyaaquiã mbei ra. Tres años ndobei. Mbía riãcuã ja que aque mose ra. Eru cheecha tubiriãte que chi rei hue Israel jenda ra. ²⁶ “Ûquiã eru cheecha mo je mbae echao turã”, i ãte que Dios quia Elías je ra. “Sarepta jenda je quia mbae echao eru cheecha je”, i quiatu que Dios ee ra. Judío eã je quiatu que Dios Elías mondo ra. ²⁷ Eliseo reco mose íbii, leproso tubiriãte que chi rei hue Israel jenda ra. Eliseo que hue jenda mo mbucheroã no nda. Ishonda mo nguia quia que embucherõ Siria jenda ra. Naamán, i que ee ra, i que Jesús ñee mbía je ra. ²⁸ Judíos chumunuasa que Jesús riqui ñee mbía je ra. Mbía Jesús cheẽ andu mose que paama i ee ra. ²⁹ Mbía paama i je que Jesús mombo sucha tubiriã si ra. Sita ibate que sucha tubiriãte ra. Sita rimia mbucu que mbía Jesús rerao rei ra. Hue si nda emombo nguia ña. ³⁰ Jesús que oso chee mbía tubiriã ite re si ra.

Jesús aba checuayã icuã jea amei mo si

³¹ Jesús que oso Capernaum cote ra. Sucha tubiriã mo. Galilea jenda. Sábado mose que mbia mbaaquiato quiatu ra. ³² Ererecua rã ño ngue Jesús riqui mbia mbaaquiato quiatu ra. Nyebe mbia riqui nguiã nyuruira tuchi echeẽ andu. ³³ Huee que amei mo ndiqui mbia chumunuásaa ra. Aba checuayã icuã nyireco rei ae. Aque que ñee asite Jesús je ra. ³⁴ —¿Mbaerã erechu quia urerea co re, Jesús? Quiatúae urerecha ae. ¿Urericharã ño erechu quia co re? Dios rucucha chõ nde re. Areicuate se, i rei que aba checuayã icuã Jesús je ra. ³⁵ Jesús que ñee ee ra. —Equiriri chõ jẽ. Esẽ oso amei ñiangui si, i que Jesús ee ra. Jesús cheẽ mose que aba checuayã amei mombo lbii ra. Mbã tubiriã saa. Usẽ ngue u amei mbasiã cote ra. ³⁶ Mbã tuririã ngue nyuruira ja u erea ra. —Jesús quirãcuã ae ñee nguiã. Mbã rerecua rã ño eriqui nguiã ñee aba checuayã icuã je. ¡sã aba checuayã echeẽ mumbayã jẽ! i tuchi que mbia nyuruira erea ra. ³⁷ Mbã que ñimbiirandu randu ja Jesús rese ra. Erurubinda jenda abe jirandu ja erese.

Jesús Simón ninisi si mbucherõ

³⁸ Jesús que usẽ mbia chumunuasa si cote ra. Oso que ique Simón nyuchua cote ra. I que Simón nyari rasi u ee ra. Eracu tuchi que ee ra. —Embucherõ na, i tuchi que mbia Jesús je ra. ³⁹ Jesús que oso nyibi earõ nda. Ñee ngue eracu je ra. —Etiba, i que ee ra. Eracu que hui esi Jesús cheẽ nguire ra. Ari que juã cote ra. Mbae que echao chao mbia chiurã cote ra.

Jesús mbia rasi chumumbara mbucherõ

⁴⁰ Tenda ireĩ mose que mbia ngesenda rasi rurucuaẽ cuaẽ ja Jesús je ra. Erasi chumumbara tuchi que ra. Jesús que o chono ñono ja erasi arõ embucherõ cherõ ja ra. ⁴¹ Aba checuayã icuã ngue usẽ usẽ nguiã mbia si Jesús cheẽ mose cote ra. —Nde rei Cristo Dios riirĩ, i que usẽ usẽ mbia si ra. —¡jẽñee eã ño jẽ! i tuchi que Jesús quia aba checuayã icuã je ra. Ûqui ngue Cristo icua chõ nda.

Jesús mbia Galilea jenda mbuchesea sea

⁴² Nyaashĩ namo mose que Jesús si turuquia a. ra. —Se ae taico mbiriĩ na, i rei que ra. Mbã que nyoĩ eruĩ erea chee ra. —¡Eresochĩ nda urerecha jẽ! Ure rese bei chõ eico, i rei que mbia ñee Jesús je ra. ⁴³ Jesús que ñee ee ra. —Dios cheẽ tasenei senei pe quitinda je abe. Nyebe sembu nguiã, i que Jesús ra. ⁴⁴ Jesús que mbia mbuchesea sea quia Galilea jenda ra. Dios cheẽ nenei nenei judíos chumunuásaa.

5

Jesús sira tubiriã mbua uquia mbia je

¹ Emo mose que Jesús riqui ama ndisha rimia ndese ra. Genesaret, i que ama ndisha aque je ra. Mbã cuabẽ ngue ngaẽ ee huee ra. Dios cheẽ anduse rete que ra. Nyebe mbã tubiriã Jesús mumbi i i tuchi nguiã. ² Canoa nyeremo abe que chi hue erimia ndese ra. Eoreã ja que ra. Echa que chi sira mbuasa irei irei ra. ³ Jesús que ua canoa nongue ye ra. Simón mbae que aque canoa nda. —Ama nimia ndecha jiri sererao mingo, i que Jesús Simón je ra. Canoa ye que Jesús ñi erimia ndesenda mbaaquiato quiatu ra. ⁴ Mbã mbaaquiato jare que ñee Simón je ra. —Eriquiraa rĩ canoa jendao. Huee tarafa jemondo ii. Sira mbuasa jemondo ii, i que Jesús ee ra. ⁵ Simón ngue ñee ee ra. —Nyaashĩ nyee que ureico rei embuasa rerequia isa ra. Emo ngue

uresiroã mbei ra, Sererecua. Ma ndecheende tasaambe no, i que Simón Jesús je ra. ⁶ Mbia que tarafa mondo ii cote ra. Sira tubiriã mbua nonde. Tarafa soro serĩ sira usi je. ⁷ Nyueru eru que canoa nongue yenda je ra. —Sira usite ure je. Jenyu rã. Nandembua ja rã canoa ye, i que canoa nongue yenda je ñee nda. Canoa nyeremo puk i ja sira je. Aete ñĩmi sira usi je. ⁸ Sira tubiriãchĩ sira eande nyii. Nyebe Simón Pedro nyuruira tuchi nguiã mae Jesús chimondo rese. Ngoi que ngũã ndese ñee ee ra. —Seicuãte aico co, Sererecua. Serecha rei se ae, i rei que Simón Pedro ñee Jesús je ra. ⁹ Echiã nguia cuaãcuã i tare nguiã. Eresenda abe chiã cuaãcuã i ja. Sira tubiriã ndea. Sira mbua eande nyii. ¹⁰ Zebedeo riirĩ abe que chi ja Simón ndese huee ra. Jacobo, i que enongue je ra. Juan, i que enongue je no nda. Ũquí chiã abe que cuaãcuã i ra. Jesús que ñee Simón je ra. —¡Eresiquichechĩ nda jê! Sira rese ra ereicoã cote. Mbia ra ereru reru bei quia seje cote, i que Jesús ee ra. ¹¹ Canoa yenda ngasẽ mose ama nimiaa, umbae que esecha ja nyoi bei nonde Jesús rese cote ra.

Jesús mbia leproso mbucherõ

¹² Jesús que siqui tuchia mo nda. Hee que emo ndasi riqui ee ra. Leproso. Jesús rese mae mose que ngoi ngũã ndese ee ra. Nyibi que ñee Jesús je ra. —Sererecua, nde sembucherõse mose, sembucherõ se, i que leproso ñee Jesús je ra. ¹³ Jesús que oco erese ra. —Echerõ cote, i que ee ra. Echeẽ mosebe que nyerõ nda. ¹⁴ Jesús que ñee ee ra. —¡Erecheẽchĩ nda mbia mo je jê! Eso nderasiã ndeacuquia sacerdote je cote. Moisés cheẽ ndui si mbae mo emondo Dios je. Eĩ nda mbia jirandu nderasiã ndese cote, i que Jesús ñee ee ra. ¹⁵ Mbia que ñimbiirandu i i tuchi quia Jesús rese ra. Ngaẽ ngaẽ ja que equia echeẽ andu ra. Umbucherõ cherõ sacuaã abe que eriqui ngaẽ ngaẽ erea ra. ¹⁶ Jesús que oso oso quia mbia tiãmbaa ra. Ñee ñee Dios je.

Jesús emi sayã mo mbucherõ

¹⁷ Emo mose que Jesús riqui mbia mbaaquiату quiату ra. Huee que fariseos mo nyi echeẽ andu andu ra. Embesasa abe que chi ra. Galilea jenda chõ ũquí nde. Judea jenda abe no. Jerusalén jenda abe no. Huee que echi ja Jesús cheẽ andu ra. Dios quirãcuã ngue siqui tuchi Jesús rese ra. Erasi mbucherõ cherõ sacuaã. ¹⁸ Mbia que erasi mo curucuaẽ quisa ye ra. Emi sayã ngue ae ra. —Nandemingue serao Jesús je, i rei que ra. ¹⁹ Tuchua mbarangiatuãte que ee ra. Mbia tubiriã ngue tuchia mbiitãyã ee ra. Nyebe erasi ruruchoi nguiã sui tuchia arõ. Tei que endoro ra. Erasi que embuquichi imbu quisa ye Jesús rimbe ra. Mbia ite rĩ. ²⁰ —Ererucuaẽsa riqui seicua ũquí, i que Jesús ñee uchiangui re ra. Nyebe ñee nguiã emi sayã je. —Ndechisaã mbae icuã ambutiã nguiã ndesi co, i que Jesús ee ra. ²¹ Fariseos que ñee ñee nyue ra. Embesasa rese. —Jesús ñee icuã ñochĩ nguiã Dios rĩ co. Dios ibatenda ae mbia chiao icuã mbutiã nguiã esi. Jesús aquiатуã ño ñene, i rei que eu ñee ñee nda. ²² Jesús que ũquí ndua icuã icuate ra. Nyebe ñee nguiã ee cote. —¿Mbaerã jẽingo ndua icuã nde? ²³ ¿Ma mbarangiatuã eã jiri jêje re? ¿Mbia icuã mbutiã ere? ¿Mbia rasi mbucherõ ere no? ¿Ma mbarangiatuã eã jiri ũquí jêje re? ²⁴ Dios riirĩ ndei se. Mbia chiao icuã mbutiã aquiату chõ se re. Sequirãcuã tateacuquia jêje, i que Jesús ñee ee ra. Ñee ngue erasi je cote ra. —Ehuã na. Ndechuchua eso cote. Ndequisa abe erao, i que Jesús emi sayã je ra. ²⁵ Jesús cheẽ ndurucha reã ngue emi sayã juã nda. Mbia que mae

ja tuchi u erese ra. Uquisa abe que equerao ra. Eya tuchi que oso uchuchúaa ra. Ñee ñee turã ngue equia Dios riñ nda. ²⁶ Mbia que nyuruira ja u mae emi sayã ngata rese ra. —Emi sayãte rei nyii. Ngata chõchĩ cote, i ja que mbia u mae nguiatu erese ra. Mbia ñee turã ja Dios riñ cote.

Serui bei eico, i Jesús Leví je

²⁷ Leví, i que emo je ra. Ae que impuestos isi isi bei quia ererecua mbaerã nda. Jesús que ngasê ee emo mose ra. Huee que eñi ngoi plata isi isi ra. —Serui bei eico, i que Jesús ñee ee ra. ²⁸ Ae Leví juã oso nguiã Jesús rui. Mbae rechã ja umbae. ²⁹ Leví que fiesta saã tuchi Jesús je ra. Embuquiaru turã sacua uchuchua. Impuestos isi isiquia ata que chi quiaru erese huee ra. Mbiamo abe que chi no nda. ³⁰ Fariseos que ñee icuãte Jesús chimbacuaquiato je ra. Embesasa rese ñee icuã ee. —¿Mbaerã jëingo quiaru impuestos isi isiquia rese re? Mbia icuã ndese abe jëingochĩ nguiã quiaru, i que ñee nda. ³¹ Jesús que ñee ee ra. —Sã mbia rasiã ndiqui aba mbucherõsa requia eãte no. Sã erasi chõ ndiqui erequia no. ³² “Jenyu seje”, aeã ngue u nguiã mbia turã je. Mbia icuã je chõ ngue achu nguiã “jenyu seje” i. “Jëicuã si jëhuĩ”, ae chõ ngue u nguiã eicuã je, i que Jesús ee ra.

Jesús chimbacuaquiato hui ãte uchüu si

³³ Mbia que ñee Jesús je ra. —Juanñimbacuaquiato hui hui uchüu si. Ñee nonde Dios je. Fariseos chimbacuaquiato abe hui hui uchüu si no. ¿Mbaerã ndechimbacuaquiato riqui hui ãte uchüu si re? i que mbia Jesús je ra. ³⁴ Jesús que ñee ee ra. —Sã emo ngüinisirã isi ramo mose no. Sã eresenda iate riqui quiaru erese no. Sã hui aroneate uchüu si aque mose no. ³⁵ Sã eru riqui mano emo mose no. Aque mose quia ra equiatio hui uchüu si cote, i que Jesús ñee ee ra. ³⁶ Jesús que ejemplo saã mbia je ra. —Sã emo ndiqui tiru yasu mii aroneate tiru ima sorei rese no. Ñquĩ mose eicuãte cote. Eyasu ra quiata chõ esi. ³⁷ Sã emo eri rasi ramo nderecoquiato eã eriru ima ye no. Mbae ire ima ye erecoquiato aronea. Eri rasi ra ñimatã ño mbae ire ndoro. Eri ra uchẽ ja. Mbae ire abe mbiacuãte ra cote. ³⁸ Eri yasu quia nda equerecoquiato nguiã mbae ire yasu ye. Soroã sacua. ³⁹ Emo eri ima mbei mose, eyasu ra embei sereã cote. “Eima ño eturã nde”, i chõ nguiã cote. Nyebe mbia riqui nguiã secheẽ yasu isi sereãte, i que Jesús ñee mbia je ra.

6

Jesús chimbacuaquiato mbae a ishao shao sábado mose

¹ Sábado mo mose que Jesús si quia mbiaco ite riñ nda. Uchimbacuaquiato rese. Echimbacuaquiato que quiata a ucua mii mii nyoi quia ecuã mose ra. Equiti quitire oo je que echoi quia eachãña cote ra. ² Fariseos mo ngue ñee ee ra. —¿Mbaerã jëingo mbae ishao shao sábado mose re? Co mose chõ mbia uquenea ucua resẽ, i que fariseos ee ra. ³ Jesús que ñee ee ra. —¿Embesa ji rese jemaẽ eã David riñ nde? David riãcuãe que aque mose ra. Eresenda abe riãcuã ngue aque mose ra. ⁴ David que ique Dios chuchúaa ra. Mbichae Dios chuchua jenda que eu ra. Mee mee ngue nguesenda je ra. Eriãcuãte quia ñene. Sacerdote achõ mbaerã ndaque mbichae. ⁵ Sábado rerecua bei chõ se re, i que Jesús ñee fariseos je ra.

Jesús eo tomei mo mbucherõ

⁶ Sábado nongue mose que Jesús si judíos chumunuasa ra. Mbia que embacuaquiato quiato huee ra. Huee que eo tomei mo ndiqui ee ra. Equiatio

cutinda tomei ngue ra. ⁷ Fariseos que mae nguiatu quia Jesús rese ra. Embesasa abe que mae nguiatu quia erese ra. —Mañi nda Jesús quia eo tomei je reae. Co sábado mose reae. Sã embucherõ jê. Nandechêê icuã nda ee chã jê, i que eu mae nguiatu Jesús rese ra. ⁸ Ūqui ndua icuã ngue Jesús icua ra. Ñee ngue eo tomei je cote ra. —Ehuã na u mbia ite rĩ, i que Jesús ee ra. Eo tomei ngue juã uã cote ra. ⁹ Jesús que ñee mbia je ra. —¿Mbae eturãte jêje co tenda mose re? Sábado mose bei. ¿Coche mbae turã naa naa sábado mose re? ¿Coche mbae icuã naa naa co mose re no? ¿Coche mbia mbucherõ co mose re no? ¿Coche mbia iquia co mose re no? i que Jesús ñee mbia ja je ra. ¹⁰ Jesús que mae mbia ja rese cote ra. —Echomee secuti, i que eo tomei je cote ra. Eo tomei ngue ñomee Jesús cheê mose ra. Aque mosechi que eo nyerõ cote ra. ¹¹ Nyebe fariseos paama i tuchi nguiã Jesús je. Sábado mose mbia mbucherõ mose. —¿Mañi nande ra Jesús je re? Nandei quia chõ nda reae, i tuchi que eu ñee nyue ra.

Jesús mbia doce irabo uchimbaaquiaturã

¹² Jesús que oso mbia tiãmbaa ra. Sita ibátee. Huee que eñi ñee mbei Dios je nyaashĩ nyee ra. ¹³ Nyaashĩ mose que uchimbaaquiatu munua ja cote ra. Ūqui doce mo ngue eirabo ra. —Sechimondo sacuã jê. Jaemondo ra secheê nenei nenei sacuã mbia je, i que ũqui doce je ra. ¹⁴ Á mbia que eirabo ra:

Simón (Pedro, i abe que ee ra.)

Andrés (Simón nongue rei ae.)

Jacobo

Juan

Felipe

Bartolomé

¹⁵ Mateo

Tomás

Jacobo (Alfeo ririĩ ndei ae.)

Simón el Cananista

¹⁶ Judas (Jacobo nongue rei ae.)

Judas Iscariote (Aque que Jesús mondo mbia icuã je ra.)

Ūqui ja que Jesús irabo ra.

Jesús mbia tubiriã mbaaquiatu

¹⁷ Jesús que nguichi u sita si cote ra. Uchimbaaquiatu rese. Ibi túraã ngue ecuaê ngasê cote ra. Mbia tubiriãte abe que chi huee ra. Judea jenda. Jerusalén jenda abe no. Tiro jenda abe no. Sidón jenda abe no. Ama nimia jenda rei ũqui. Ūqui ngue ngaê nyiisaquia Jesús cheê ndese ra. Jesús embucherõ abe sacuã ngue ecuaê nda. ¹⁸ Ae rese aba checuayã icuã ndiqui nae, ũqui abe que Jesús mbucherõ nda. ¹⁹ Jesús quirãcuã ngue mbia mbucherõ ja quia ra. Nyebe mbia riqui nguiã ocese ja Jesús rese.

Ae eyate riqui

²⁰ Jesús que mae uchimbaaquiatu rese ñee nonde ee ra. —Jeyate riqui ã. Jê mbaecha reã ndaque. Dios quiatu ra jenderecuarã tuchi cote. ²¹ Jêyate riqui ã. Jeniãcuã ndaque. Jendio rete ra cote. Jêyate riqui ã. Jenyeseo seo raque. Jêyate riqui ã. Jemo mose cote. ²² Mbiam jemo ucuayã mose, jemo mombo mose, ñee icuã mose jêje serĩ, jêyate jêingo ũqui. ²³ Jêñimbia tuchi chõ aque mose. Mbiam icuã mose jêje. Dios quia ra mbae turã mondo jêje ibate. Mbiam icuande jêje nyii. Eĩ si que mbiam icuã nguia Dios rimba ñiinda je no nda.

Ae abam bia eãte quia

²⁴ Abam bia eã tuchichĩ jẽ, Mbaecha. Mbae icuã nda tu jẽje. Jẽyare nyii. ²⁵ Abam bia eã tuchichĩ jẽ, quiaru tuchi je. Jeniãcuã tuchi ra cote. Abam bia eã tuchichĩ jẽ, icuia icuia je. Jenyeseo ra cote. ²⁶ Abam bia eã tuchichĩ jẽ mbia ñee turã mbei mose jeni. Eĩ si rei que equia ñee turã turã dios abareã nimba je cose ra.

Jẽingo turã ño nguia jẽucuyãsa je

²⁷ Aico ñee jẽje a. Ae eicuãte riqui jẽje, ũqui ndese jenyesequa chõ. Jẽingo turã ño nguia jẽucuyãsa je. ²⁸ Emo ñee icuã mose jeje, jeñee turã ño ee. Jeñee turã ño Dios je eri. ²⁹ Emo ucua mose jenditii rese, “tasaã se abe”, jenyechĩ ndae. Jenditii ribisho abe jẽteacuquia ee. Emo jẽirao rirõ mose jẽsi, jẽirao nongue abe rese jengueteã eã ño ee. ³⁰ Emo ache ache i mose jẽje, jemondo chõ ee. Emo jembae reraochõ mose, “emondobe seje”, jenyechĩ nda ee. ³¹ Sã jẽyate riqui mbia siqui turã mose jẽje no. Eĩ jenyese si chõ nguia siqui turã mbia je no.

³² Ae eicuãte riqui jẽje nae, ũqui ndese jenyesequa chõ. Ae nyesequa quia jendese nae, ũqui mii ndese jenyesequa mose, eicuãte ũqui. Mbia ja rese quiatu jenyesequa. ³³ Jẽingo turã nguia quia mbia ja rese. Ae eturã ndiqui jẽje, ũqui mii ndese jẽingo turã mose, eicuãte ũqui. Jesús quiatoã abe chee siqui turã uquiato je. ³⁴ Emo prestar i mose jembae je, jemondo chõ ee. Ae mbae mondo aroneate eribishorõ nae, jemondo bei chõ ee. “Cobrar tae ee”, jenyechĩ ndae. Jesús quiatoã abe chee mbae mondo eribishorõsa je. “Mbae mo nda emondobe seje”, i. ³⁵ Eĩ jenyechĩ nda jẽ abe. “Mbae mo nda emondobe seje chã” jenyechĩ nda jẽ abe jẽ! Jemondochõ ño ee. Ae eicuãte riqui jẽje, ũqui ndese jenyesequa chõ. Ũqui mose ra Dios mbae mee tuchi jẽje. Dios rã tuchi ra jẽ cote. Dios ia eãte quia eriqui nguia eicuã ndese. Dios turãte quia eicuã je re. Eicuã ñee turã eã ndaque ee. ³⁶ Jẽyayã ño mbia rese. Sã Dios abe eya eãte nanderese no.

“Eicuãte que co ra”, jenyechĩ nda emo nii

³⁷ “Co que eicuãte ra”, jenyechĩ nda emo nii. “Jẽicuãte”, iã nda Dios jẽje chã. iCondenar jenyechĩ nda emo je jẽ! Dios nda condenar iã jẽje chã. Emo icuã mose jẽje, jẽtesarei chõ eicuã si. Dios nda tesarei jẽicuã si no ña. ³⁸ Mbae jeme mee ño mbia je. Dios quia ra mbae mee tuchi jẽje cote. Mee turã nda jẽje. Eñetẽ nda emee eã jẽje. Embisẽ ño nda emee jẽje. Jẽ embisẽ mee mose emo je, Dios ra embisẽ mee jẽje no, i que Jesús mbia mbaaquiato quiatu ra. ³⁹ Jesús que ejemplo saã mbia je ra. —Sã eresayã ja nyiruchoi aronea no. Ngoi ja chõ nda ehoi ibicua rie. ⁴⁰ Embaaquiatusa quiarei earacua tuchi uchimbaaquiato si. Embaaquiato ja ji mose, earacua tuchi cote. Umbaaquiatusa rã si cote. ⁴¹ ¿Mbaerã nda “eicuã” jenyese emo je re? Jẽ jẽicuã tuchi mose esi. “Mbae ñetẽ ndiqui nderesaa aque”, jenyechĩ nda emo je. Mbae cuasu siqui mose jendésaa jẽ quiatu. ⁴² “Mbae turã ndese chõ jẽingo”, jenyechĩ nda jẽingo icuã mose jẽ. Jẽturã nda jẽsaã ñoñoñchĩ jẽ. “Mbae ñetẽ tasirõ nderesa si”, jenyechĩ nda mbae cuasu siqui mose jendésaa jẽ. Jẽ nane nguia jẽturã ndiqui. Aquere quiatu jeñee emo mingo turã cote.

Sã ira ae ia ae ae no

⁴³ Ira turã mose, ea abe turã ndae. Ira icuã mose, ea abe icuã ño nda eno. ⁴⁴ Sã ira ae ea ae ae no. Higo a rã eã nda nyu a no. Ea ae eno nde. Uva a rã

eã nda isio rashĩ a no. Ea ae eno nde. ⁴⁵ Eĩ si chõ mbia no nde. Mbia turã nda ñee turã. Echiangui renda quia eturãte re. Nyebe eriqui nguiã ñee turã. Mbia icuã nda ñee icuã no. Echiangui renda quia eicuãte riqui nguiã. Nyebe eriqui nguiã ñee icuã. Nandechuru achõ ñee eã nguiã. Nandechiangui renda quia ñee nguiã.

Tuchua nyeremo

⁴⁶ “Sererecua” jentye chõchĩ seje secheẽ mumba mumbare. ⁴⁷ Ae siqui serese secheẽ mumbayã nae, eturã tuchi chõ ñquĩ nde. ⁴⁸ Sã emo uchucharã ao no. Sã ibi ribicoi tuchi no. Sita je ngasẽ nyee. Sita arõ tuchua ao cote. Nyebe echuchua ãtãte riqui nguiã. Ama ndicuasu mose, iãcuã irãtã ndaque echuchua ite rĩ. Tuchua mbuquiata aroneate iãcuã irãtãte raque. Sita arõ nguiã ngue uchuchua ao nguiã. Eĩ si chõ secheẽ mumbasa reã nde. Tuchua ãtã aosa rã si. ⁴⁹ Sã emo uchucharã ao no. Aque quiarei ibi ribicoi tuchiã. Ibi arõchi chõ uchuchua ao nguiã. Iãcuã ngasẽ mose aque chuchua, mbucoi asi que mondo ra. Eĩ si chõ secheẽ mumbasa re. Ae uchuchua saã ibi arõchi nae, aque rã si chõ ñene, i que Jesús ra.

7

Jesús soldados rerecua rimba mbucherõ

¹ Jesús cheẽ ngue tiba mbia je cote ra. Oso que Capernaum cote ra. ² Soldados rerecua mo ngue siqui hue ra. Capitán ngue ae ra. Roma jenda que ae ra. Aque rimba rasi que chi hue erese ra. Ebite que erimba ra. Erimba rasi tuchi. Mano serĩte que equia ee ra. ³ Capitán ngue jirandu Jesús rese cote ra. Ñee ngue judíos ramei je ra. —“Echu serimba mbucherõ”, i que capitán ñee ndeje ra”, jentye oso Jesús je, i que capitán nda. ⁴ Judíos ramei ngue ngasẽ Jesús je ra. —Capitán nimba embucherõ na oso ee. Capitán turãte quiatu ngue eriqui nguiã ure je. ⁵ Nandequiato turã tuchi que aque ra. Judíos quiato ja. Urechumunua nua sacua ngue ae chao tuchua ra, i que amei ñee Jesús je ra. ⁶ Jesús que oso amei ndese ra. Capitán nyuchua rurubi mose que capitán uquiato mo mondo Jesús robeishĩ nda. —Seicuãte se, Jesús. Sechuchua ra ereiquechĩ. ⁷ Nyebe se asoã nguiã nderea. Ndecheẽ achõ je chõ nda serimba erembucherõ. ⁸ Se abe sererecua no nde. Se echeẽ amumba aroneate. Soldados rerecua se no nde. Secheẽ abe emumbayã nguiã no. Eso, i mose, secheẽ mumbayã no. Echu, i mose, secheẽ mumbayã no. Se ñee mose serimba je, secheẽ mumbayãte no. Ndequirãcuã na eãte raque se, i que capitán ucheẽ mondo Jesús je ra. ⁹ Echeẽ andu mose que Jesús nyuruirate ra. Uba que ñee nguesenda je ra. —Tacheẽ nyecua jẽje. Capitán seicua tuchite quia co. Israel jenda mo embuchecha aroneate quia co, i que Jesús ra. ¹⁰ Capitán nyimondo que nyebi nyoĩ uchuchuaa cote ra. Erimba mbucherõ j je ee cote ra.

Jesús eru cheecha riirĩ ndaque mbuquera

¹¹ Isamami ngue Jesús choi quia Nain cote ra. Echimbuaquiato abe que nyoĩ quia erese ra. Mbia tubiriãte que nyoĩ quia erese ra. ¹² Sucha ata rurubi mose que ngasẽ mbia tubiriã je ra. I que eraque ruruchoi quia etã sacua nda. Aque mĩ tuchi rei ngue cuña ndiirĩ mo nde. Eru cheecha riirĩ. Aque que mano ño ee ra. Hue jenda mbia que nyoĩ jate quia esi rese ra. Eraaque rui. ¹³ Jesús que mae esi nyeseo rese ra. Jesús ia eãte que erese ra. —¡Echeseo eã ño jẽ! i que ee ra. ¹⁴ Jesús que oco eraaque rese ra. Eruruchoisa que tiba ee cote ra. —Echuruã, Acuanindu, i que ñee eraaque je ra. ¹⁵ Eraaque que

nyuruã ñee cote ra. Jesús que embuquera ji mondo esi je cote ra. ¹⁶ Mbia que nyuruira ja erea ra. Ñee turã ja Dios riñ. —Dios chimondo chõ co re, i que mbia quia ñee Jesús riñ nda. —Dios riqui tesareia nande si co, i que mbia quia nyue ra. ¹⁷ Jesús chumbucherõ ndese que mbia riqui ñimbiirandu jate ra. Judea jenda jirandu ja erese. Erobeinda ja abe que jirandu erese ra.

Juan el Bautista mbia mondo ñee Jesús je

¹⁸ Juan abe que jirandu Jesús chiaõ rese ra. Erimba quiatu ngue embiirandu nguiã erese. ¹⁹ Nyebe Juan ñee nguiã ngũimba nyeremo je. —Nyeremo jëso ñee Jesús je. “‘Cristo ra tu’, i bei equia nae, ¿ae chõ nde re?” jenyee oso ee. “¿Cristo ra uresaarõ arõ si quia re?” jenyee oso Jesús je, i que Juan ngũimba mondochoi ra. ²⁰ Juan ñimondo que nyoi ngasë Jesús je ra. —Juan el Bautista que urembu ñee ndeje ra. ¿Cristo chõ nde re? ¿Cristo ra uresaarõ arõ si quia re no? ¿Ae chõ nde re? i que Juan nimba ñee Jesús je ra. ²¹ Juan nimba ngasëte mose que Jesús riqui mbia rasi mbucherõ cherõ nda. Erasi chumumbara. Erasi cuabë. Aba checuayã icuã abe que embusë mbusë nguia mbia si ra. Eresayã abe que embu cherõ nyerõ nguia ra. Juan nimba que mae ja quia ùqui mbucherõ ndese ra. ²² Jesús que ñee Juan nimba je ra. —Ae rese jemae nae, ùqui jëseney oso Juan je. Ae jeñandu nae, ùquiabe no. “Jesús que eresayã mbucherõ nyerõ nguia ra. Ecuatayã abe mbucuata cuata. Èire ndasi abe mbucherõ nyerõ. Eisayã abe mbucherõ nyerõ. Eraaque abe mbuquera. Ucheë turã esenei senei tuchi mbaecha reã je”, jenyee oso Juan mbiirandu. ²³ Emo hui jei eã mose sesi, aqee iate ra siqui cote, i que Jesús ucheë mondo Juan je ra.

²⁴ Juan ñimondo que nyoi nyebi ee cote ra. Jesús que ñee mbia ja je Juan niñ cote ra. —¿Mbae rese mae jëso turúquiaa re? ¿Quiririã idioi ichu ichu rese jëso mae nde? ²⁵ ¿Mbae rese mae jëso re? ¿Emo irao turã ndese jëso mae nde? Tei. Èirao turã siquiã nguiã turuquia ñi. Ae siqui quia mbia rerecua chuchua nae, ùqui ño eirao turã ndiqui nguiã. ²⁶ Juan ndese mae ño ngue jëso turúquiaa resë. Dios cheë nenei neneisa tuchi chõ ae emo si re. Ae chõ mbia mingoquiato quiatu nguiã se ñee sacuã ee aqee. ²⁷ Sã embesa ji riqui ñee no: Secheë nderaosa tamondo nderëta.

Ae ra mbia mingoquiato ndeje,

i que embesa ji ñee nda. Juan niñ ño embesa ji ñee nguiã. ²⁸ Juan el Bautista quiarei i tuchi raque mbia ñiinda ja si. Dios cheë nenei neneisa ataque si. Ae ra siqui tuchi Dios rese erimbarã cote nae, ùqui nguia ra i tuchi Juan si cote, i que Jesús ñee nda. ²⁹ Mbia que Jesús cheë ñandu turã ja ra. Impuestos isi isiquia abe chee que echeë ñandu turã nda. —Dios turã tuchi, i ja que mbia ra. Juan ngue bautizar i ja ee nyii ra. ³⁰ Fariseos achõ ño ngue Jesús cheë isi sereã nda. Embesasa rese. Ùqui ngue siqui sereãte Dios cheë ndese ra. Nyebe Juan bautizar i eã nguiã ee.

³¹ Jesús que ñeembe ee ra. —Mbia namonda siqui turã eãte quia aba cheë nduã ã. Mbia riirĩ na ño eriqui nguiã. ³² Sã mbia riirĩ ndiqui ñimbusarei sarei no. Sã eriqui ñee ñee nyue no. “Flauta que asaã saã ndei jëje ra. ¿Mbaerã jenyuruqui sereã nea nde?” sã i chõ nyue no. “Mbae aba mbia eã ngue asaã ndei jëje resë. ¿Mbaerã jëyate erese re?” sã i chõ mbia riirĩ nyue no. Ùqui na si chõ jëingo nguiã aba cheë mumba ã. ³³ Juan el Bautista que tu rei jëje ra. Jëisi turã eã ngue ra. “Co eriqui quiaru sereãte nanderese co. Co eriqui mbae mbei sereãte nanderese co”, jenyee chõchĩ ee. “Aba checuayã ndesenda”, jenyee chõ ngue ee ra. ³⁴ Se abe que achu rei jëje ra. Aquiaru rei

quia jendese co. Mbae abe ambei rei quia jendese co. Se abe que jē seisi turāyā nda. “Quiaru tuchi je”, jenyē chōchī seje. “Mbae mbeisa”, jenyē chō ngue seje no nda. “Mbia icuā quiato chō ñene”, jenyē que seje resē. ³⁵ Ae earacuate nae, Dios aracua abe ra eicua, i que Jesús mbia je ra.

Jesús quiaru fariseo chuchua

³⁶—Nandequiaru sechuchua, i que fariseo mo ñee Jesús je ra. Jesús que oso erese ra. Ngoi que quiaru nonde ra. ³⁷ Cuña icuā mo ngue siqui hue jenda huee ra. Jirandu que Jesús rese ra. Oso que erea cote ra. Aba mbushimbusa que equerao erea ra. (Sita ao ji rei aba mbushimbusa riru.) ³⁸ Jesús quite quiti que eñi nyeseo ra. Nguesari je que Jesús i irei irei ra. Ua je que embiuru iru cote ra. Uchuru que embucha Jesús i rese eriite ra. Aba mbushimbusa que eicherē ei rese cote ra. ³⁹ Jesús mbuquiarusa que ñee nguia uchiangui re ra. —¿Mbaerā Jesús ñee asiā cuña icuā je re? Jesús Dios riiri mose, i nda ñee asi rei ee, i que fariseo uchiangui re ra. ⁴⁰ Jesús que ñee fariseo je ra. —Tacheē ndeje, Simón, i que ee ra. —Eno. Echeē seje no, Sererecua, i que fariseo ee ra. ⁴¹ Jesús que ñee ee ra. —Sā mbia nyeremo deber i ererecua mo je no. Sā enongue deber i ee quinientos no. Sā enongue deber i ee cincuenta no. ⁴² Ūqui ja que pagar i aronea ja. Nyebe ererecua ñee nguia ee. “Mbae jemondo eā ño seje”, sā i chō ererecua ee no. ¿Aba eya tuchi nguerecua rese re? i que Jesús ñee Simón je ra. ⁴³ Simón ngue ñee ee ra. —Ae deber i tuchi ee nae, aque eya tuchi erese cote reae, i que Simón ee ra. —Ae bei, i que Jesús ñee ee ra. ⁴⁴ Jesús que mae cuña ndese ñee Simón je ra. —Ndechuchúaa sei que mose que sei ereirei eā nda. Co cuña nguia tu que sei irei nguesari je ra. Ua je que sei mbiuru ra. ⁴⁵ Nde quiatu que seritii eresiite eā ndesē. Cuña nguia tu que sei siite nguia. ⁴⁶ Nde que aba mbushimbusa ereichereā sea rese resē. Cuña nguia tu ngue aba mbushimbusa icherē nguia sei rese. ⁴⁷ Tacheē nyecua ndeje, Simón. Cuña icuā tuchi raque. Eicuā ngue ambutiā ee namo nda. Nyebe eriqui nguia nyesequa tuchi serese a. Ae “seicuā eā jiri se”, i quia nae, ūqui nguia ra nyesequa eā jiri serese. Se eicuā ambutiā ndaque, i que Jesús Simón je ra. ⁴⁸ —Ndeicuā ngue ambutiā ndesi ra, i que Jesús ñee cuña je cote ra. ⁴⁹ Ae que chi quiaru erese nae, ūqui ngue ñee nyecuayā cuayā u nyue ra. —¿Mañi nda Jesús mbia icuā mbutiā esi re? i que eu ñee ñee nyue ra. ⁵⁰ Jesús que ñee cuña je ra. —Seicua cha chō nde re. Nyebe arerirō nguia ndeicuā si. Ereico bei ra cote. Ndeya eso cote, i que Jesús cuña je ra.

8

Cuña mo nyoi ngata Jesús rui mbae raā naa ee

¹ Jesús que sucha tubiriā mbuchesea sea quia ra. Dios cheē turā ngue esenei senei nguia mbia je ra. Echimbuaquiātu doce abe que ngata quia erese ra. ² Cuña echimbucherō mo abe que ngata quia erese ra. Ae si aba checuayā icuā ndirō nyii, ūqui mo abe que ngata quia erese ra. María Magdalena que ngata quia erese ra. Ae si aba checuayā siete rirō nyii nae. ³ Juana abe que ngata quia erese ra. Chuza ninisi que aque ra. Herodes resenda rei Chuza. Susana abe que ngata quia erese ra. Cuña ata que ngata quia erese ra. Ūqui ngue umbae mee mee mbei quia Jesús je ra.

Emo mbae eĩ mombiquia mbiqwi

⁴ Mbia que ngaē ngaē ja quia Jesús rea ra. Suchamo jenda abe. Mbia ñumunua ja mose que Jesús ejemplo raā ee ra. ⁵ —Sā emo si mbae eĩ

mombiquia mbiqúia no. Emombiquia mbiqúia mose sã emo uqui uqui ñeenda rui no. Sã mbia riqui irõ irõ erese no. Sã nguereĩ abe eu chee no. ⁶ Sã emo uqui uqui sita arõ no. Sita aronda suri raque. Ibi irute quia ee re. Nyebe ñimama nguiã mano. ⁷ Sã emo ndiqui uqui uqui nyu rëndaa no. Sã nyu abe suri erese no. Nyu ruri que echatí asi u eriquisã nda. ⁸ Sã emo uqui uqui ibi túraã no. Ûquĩ nguíatu que ia turã nda, i que Jesús mbia je ra. Aquere que ñee asite mbia je ra. —Jëisa mose ¡secheẽ jeñandu turã na! i que Jesús mbia je ra.

⁹ —Eresenei ngue mbae eĩ ñi, ùquĩ embiasa turã na ure je, i que echimbaaquiatu ñee ee ra. ¹⁰ Jesús que ñee ee ra. —Mbia rerecua tuchi quiarei Díos. Ae riqui nguiã ucheẽ mbiasa asa ja jëje co. Mbia ataque quia siqui sereã erese co. Mbia ataque je quia eriqui nguiã ucheẽ mbiasa eã jiri. Ejemplos achõ esenei senei nguiã ee co. Eanduchõ sacuã. Eicua turã ndocoĩ.

Jesús ucheẽ mbiasa uchimbaaquiatu je mbae eĩ ñi

¹¹ Secheẽ tambiasa jëje cote. Díos cheẽ na si chõ mbae eĩ nde. ¹² Ae uqui uqui ñeenda rui nae, ùquĩ ndei mbia Díos cheẽ andu chooñosa rá ùquĩ. Ae Díos cheẽ andu chooño nae, ùquĩ ñiangui si chõ diablo riqui nguiã Díos cheẽ ndirõ. Nyebe eriqui nguiã Díos ¡cuayã mbei. Nyebe Díos riqui nguiã emingo bei eã. ¹³ Ae uqui uqui sita arõ nae, mbia mo na ño ùquĩ no nde. Díos cheẽ andu mose, isi turã ndaque. Eyate raque erese. Mbae mo embiayã mose, hui jei chõ esi cote. Mbae rao eã naanguia chõ ùquĩ nde. ¹⁴ Ae uqui uqui nyu rëndaa nae, mbia mo na ño ùquĩ no nde. Díos cheẽ andu turã ndaque. Siqui bei eã ño nguiã erese. Umbaerã achõ ndese chõ eriquichĩ nguiã ndua. Ñimbusarei sarei bei chõchĩ nguiã. Nyebe hui chõ nguiã Díos cheẽ si. Nyebe Díos cheẽ ndiqui nguiã ia eã mbei ee. ¹⁵ Ae uqui uqui ibi túraã nae, mbia mo na ño ùquĩ no nde. Echĩã quishĩ ño ùquĩ nde. Díos cheẽ andu mose, siqui bei erese. Ia ia bei raanguia cote.

Tata rendi mbia resae ja

¹⁶ Sã nandeico lamparina mendi no. Sã nandeico eati eã no. Sã nandeico emii eã mbaequi re no. Erendi checua chõ nda nandemii nguiã. Mbia resae ja sacuã. ¹⁷ Mbae checuayã nda nyecua ja emo mose. Ñeminde ra nyecua ja. ¹⁸ Secheẽ jeñandu tuchi. Aba mo umbae rerequia mose, Díos ra emo mondobe ee. Emo embae eã mose, Díos ra embae sirõ ja esi.

Jesús nongue ngaẽ erea usi rese

¹⁹ Jesusi que ngaẽ ndei ee ra. Jesús nongue ja rese. Mbia tubiriãte que esiquisãte esi ra. ²⁰ —Hue ndesi riqui nderequia taicuee hue. Ndenongue rese, i que mbia Jesús mbiirandu ra. ²¹ Jesús que ñee mbia je ra. —Ae Díos cheẽ andu turã nae, ae Díos cheẽ mumbayã nguiã nae, ùquĩ je chõ aico nguiã “senongue” i. Ûquĩ je chõ aico nguiã “taĩ” i no, i que Jesús ñee nda.

Jesús quiririã ¡cuã ¡cuã mbutiba; ama ndebera abe

²² Emo mose que Jesús ua canoa ye ra. Uchimbaaquiatu ja rese. —Nyao ama ndisha robei, i que Jesús ee ra. Nyoĩ que cote ra. ²³ Ama ndisha rasa mose que Jesús si quia uque ra. Ama ndiite re mose que quiririã ¡cuã ¡cuã ndu ee ra. I rebera que ique ¡que tuchi quia canoa ye ra. Nyebe canoa ñimmi serĩ tuchi nguiã ee. ²⁴ Nyebe mbia Jesús mumba nguiã. —Urembaaquiatusa, echumumba. Nandemanochĩ nda re, i que ñee Jesús je ra. Jesús que nyuruã cote ra. Ñee quiririã je. Ama mbutiba. Quiririã ngue ti i ee cote ra. Ama abe

que ti i no nda. ²⁵—¿Mbaerã jëingo siquichete re? ¿Seicuayãte equia re? i que Jesús uchimbaaquiatu je ra. Siquiche bei que equia ra. Nyuruira tuchi Jesús quirãcuã ndese mae. —Quiririã Jesús cheë mumbayã ñochĩ. Ama abe echeë mumbayã ñochĩ, i que ñee ñee nyue cote ra.

Jesús aba checuayã icuã jea Gadara jenda mo si

²⁶ Ngasë nyee que sobei ra. Gadara, i que hue ibi je ra. Galilea mbuchecha tuchi que huee ra. Ama ndisha rasa. ²⁷ Canoa si Jesús nguichi mose, hue jenda amei mo ngue tu ee ra. Aba checuayã icuã ngue siqui quia echiangui re ra. Cosete ngue eriqui rei nguiã echiangui re. Eirao eã mbei que eriqui ra. Tuchuaqui re que eriqui uqueã nda. Mbia raaque tãsa bei chõ eriqui nguiã. ²⁸ Tu que ngoi ngũã ndese Jesús resa quiti ra. Ñee asite que eu ee ra. —¿Mañi ere ra seje re, Jesús? Dios ibatenda ririĩ ño nde re. ¡Sembasichĩ nda se jê! i que ñee tuchi Jesús je ra. ²⁹—Esë esi, i chõ Jesús aba checuayã icuã je reaë. Aba checuayã ño aque amei isi isi bei quia embicuã icuã neaë. Mbia eo cuaacua raque quia cadenas je. Ei abe cuaacua raque no. Ucuasa ndoso ndosochõ mbei que equia ra. Aba checuayã ño equerao rao quia turuquia ñi neaë. ³⁰—¿Mañi ndeje re? i que Jesús ñee ee ra. —E tubiriã, i que seje ra. Ure cuabëte quia ure re, i que aba checuayã ñee Jesús je ra. ³¹—Uremondochĩ nda tata cuasu, i que aba checuayã ñee tuchi Jesús je ra. ³² Chiasu socoli tubiriã ngue chi quiaru huee ra. Sita ibate rese. Nyebe aba checuayã ñee Jesús je. —Chiasu chiangui re ureso rã, i tuchi que equia ñee Jesús je ra. —Eno, i que Jesús ee ra. ³³ Aba checuayã icuã ngue usë ja amei ñia si cote ra. Chiasu chiangui re que echoi ra. Chiasu que uchã ja choi nyiichere ama nimia mbucu rĩ nda. Ama ndisha ye que echoi ja mano nda.

³⁴ Chiasu raarõsa que chi mae erese ra. Emundite que ra. Nyoĩ que uchã mbia mbiirandu ja chiasu rese ra. Sucha tubiriã jenda mbiirandu. Mbia ataque abe mbiirandu no. ³⁵ Mbia que ngaë ja mae erese ra. Huee que Jesús riqui beite ra. Ae rese aba checuayã ndiqui nyii amei nae, aque abe que chĩ ngoi Jesús i jii ra. Huiirao resebe cote. Earacuate que mbia je cote ra. Nyebe mbia nyuruira tuchi nguiã erea. ³⁶—Jesús que amei mbucherõ aba checuayã ndirõ esi ra, i que maesa erese ñee mbia ataque je ra. Maesa erese que esenei ja mbia je ra. ³⁷ Mbia hue jenda que siquiche ja Jesús si cote ra. —Eso rã urerecha urerecua si, i ja que hue jenda ñee Jesús je ra. Nyebe Jesús ua nguiã canoa ye. Oso que nyebi sobei cote ra. Gadara recha. ³⁸ Ae rese aba checuayã ndiqui nyii nae, aque que ñee Jesús je ra. —Nderese taso bei, Jesús, i rei que ee ra. Jesús que ñee ee ra. ³⁹—Eso chõ ndechuchúaa. Mbae esenei ja nderesenda je. “Dios que sembucherõ nda”, ere oso mbae renei nenei ja nderesenda je, i que Jesús ee ra. Umbucherõsa renei nenei ngue oso mbia ja je cote ra. Jesús renei nenei ja sucha jenda ja je.

Jesús Jairo ririĩ mbucherõ; ari mo abe mbucherõ

⁴⁰ Jesús chebi si mose sobei si, mbia que chi eraarõ arõ nda. Ũqui nguiatu que eisi turãte ra. ⁴¹ Emo ngue tu ñee Jesús je ra. Jairo, i que ee ra. Judio munua nuasa que ae ra. Jesús i jii que ngoi ñee ee ra. —Nyao rã sechuchúaa. ⁴² Seririĩ nguasu jiri si quia mano serite seje qui. Seririĩ mii tuchi se, i tuchi que Jesús je ra. Jesús que oso erese ra. Mbia cuabë ngue nyoĩ ja erui ra. Jesús mbiitãyãte que echoi quia ra. ⁴³ Ari mo abe que oso quia mbia ite rĩ nda. Eruqui nda uchë uñe mbei quia ee ra. Doce años nyee nda eruqui tibayã mbei ee ra. Aba mbucherõsa abe nda embucherõ aroneate quia ee ra. Ari umbae

mondo mondo ja raque quia ee. ⁴⁴ Ari que tu Jesús quite quiti eriichã nda. Eirao ai rese que oco ra. Aque mose tuchi que eruqui tiba ee cote ra. ⁴⁵ —¿Aba oco serese re? i que Jesús mbi je cote ra. —Tei. Aba âte, i ja rei que mbia ee ra. Pedro que ñee ee ra. —Mbia tubiriãte nyeresê. Mbia cuaê nguia ñimaña maña jate co resê. ¿Mbaerã ereico “¿aba oco serese re?” i re? i que echimbaaquiatu ñee ja ee ra. ⁴⁶ Jesús que ñee ee ra. —Tei. Emo ngue oco serese ra. Sequirãcuã ngue emo mbucherõ nda i que Jesús ra. ⁴⁷ —Jesús jiranduchĩ serese, i que ari uchiangui re cote ra. Nyebe ngoi nguia ngũã ndese Jesús resa quiti. Titi titi i ete que ra. Ñee nyecua que ee ra. —Sembucherõ sacua ño aoco nguia nderese. Aque mose tuchi chõ acherõchĩ, i que ari erenei ja Jesús je ra. Mbia que ehandu ja u ra. ⁴⁸ Jesús que ñee ee cote ra. —Seicuaa chõ nde re. Nyebe arembucherõ nguia. Ndeya tuchi eso cote, i que Jesús ee ra.

⁴⁹ Jesús cheê mose te que emo ndu Jairo chuchua si ra. —Nderiirĩ ngue mano cote ra. ¿Mbaerã nda Jesús ererao ndechuchua cote re? i que ñee Jairo je ra. ⁵⁰ Jesús que ehandu ra. Ñee ngue Jairo je ra. —iNdeya eã techĩ nda jê! Seicua chõ se. Nderiirĩ nda quera si, i que eru je ra. ⁵¹ Ngasê ngue echuchúaa cote ra. Jesús que ique eraaque rea cote ra. Pedro rese. Jacobo abe rese. Juan abe rese. Eraaque ru abe rese no. Esi abe rese. Ūquĩ achõ ngue emingue ra. ⁵² Mbia que chi ja nyeseo ãquẽ ndese ra. —Jenyeseochĩ nguia. Mano eã ño ñene. Uque chõ ñene, i que Jesús ñee mbia je ra. ⁵³ Mbia que iquia Jesús cheê mose ra. —Eraaque nyeresê. ¿Mañi nda nyuruã nde? i que mbia ra. ⁵⁴ Jesús que eraaque o isi ra. —Echuruã na, Echo, i que ñee asite ee ra. ⁵⁵ Quera si que nyuruã cote ra. —Nderiirĩ embuquiaru cote, i que Jesús ee ra. ⁵⁶ Eru que nyuruira tuchi mae erese ra. Esi abe nyuruira tuchi. —iEmo nda jemiiranduchĩ jê! i que Jesús ee ra.

9

Jesús uchimbaaquiatu doce mondo ucheẽ nenei nenei sacua

¹ —Jenyu, i que Jesús uchimbaaquiatu doce je ra. Uquirãcuã ngue emee mee ee ra. Aba checuayã icua jea jea sacua mbia si. Mbia rasi mbucherõ cherõ sacua. ² —Jêso Dios cheê nenei nenei mbia je. Jêso mbia rasi abe mbucherõ cherõ. “Mbia rerecuarã tuchi ra Dios cote”, jenyẽ oso secheê nenei nenei mbia je. ³ Mbae mo nda jendaochĩ icua. Jenyitochoquia ra jendaochĩ. Mbae riru mo abe ra jendaochĩ no. Jenyirũ mo nda jendaochĩ no. Mbae isiquia mo abe ra jendaochĩ no. Jêirao nongue abe ra jendaochĩ no. ⁴ Emo nyuchúaa jengue mose, hueechõ ño jêingo uque. Jemba jembatechĩ nda uque tuchia raamba amba. Hue si chõ jêso sucha tubiriã mo secheê nenei nenei cote. ⁵ Sucha tubiriã mo jenda jêisi sereã mose, jêsecha chõ. Jêi tubi jembutomo tomo ee. Hue jenda huicua icua sacua, i que Jesús uchimbaaquiatu je ra. ⁶ Echimbaaquiatu que nyo: choi bei quia sucha tubiriã mbuchesea sea ra. Dios cheê turã nenei nenei mbia ja je. Mbia rasi mbucherõ cherõ no.

Mbia Juan el Bautista iquia

⁷ Herodes abe que jirandu Jesús chiaõ rese ra. Embusiquichete que ra. Emo ngue ñee ndei ee ra. —Ae ereiquia nae, Juan i equia ee nae, aque que quera si ra, i rei que emo ñee Herodes je ra. Juan Jesús riqui reĩ nguia mbia je. ⁸ Elías Jesús riqui reĩ nguia emo je no. —Dios cheê nenei neneisa ima quera si je chõ ñene, i rei que emo emo Jesús rĩ no nda. ⁹ Herodes que ñee nda. —Juan

ãquĩ ngue achisiamo tuchi. ¿Mañi nda quera si re? ¿Aba Jesús re? Ae rese aico jirandu tuchi. Tamae erese no, i que ndua ndua uchiangui re ra.

Jesús mbichae mbeta tuchi mbia je

¹⁰ Jesús chimondo ucheẽ nenei neneisa que nyebi ngaẽ ee ra. —Ã ngue uresaã saã nda, i que mbae renei ja Jesús je ra. Mbia tiãmbaa que Jesús ùquĩ nderao ja rei ra. Betsaida rurubi jiri. ¹¹ Mbia ataque jirandu mose que nyoi erui ra. Jesús que eisi turã Dios cheẽ nenei nenei ee ra. Erasi abe mbucherõ cherõ ee. ¹² Tenda oso mose que echimbaaquiatu ñee ndei ee ra. —Mbia emondo rã sucha tubiriã nia. Sã echoi bei quiaru huee. Uque bei abe huee no. Mbae ãte nandecu a, i rei que echimbaaquiatu Jesús je ra. ¹³ —Jeño mbae jemondo ee echiurã, i que Jesús ee ra. —Tei. Mbae quia ra aba mondo ee. Cinco chõ ngue mbichae ra. Sira abe nyeremoñote nyeresẽ, i que echimbaaquiatu Jesús je ra. ¹⁴ Mbia tubiriã tuchi que chi ra. Cinco mil ndobei. —Mbia jembucoi ja ino íbii. Eata jaaja jeñono mbucoi. Sã echi ngoi icúe cúe cincuenta jaaja, i que Jesús uchimbaaquiatu je ra. ¹⁵ Jesús cheẽ nguire que ngoi ja cote ra. ¹⁶ Jesús que mbichae sirõ cote ra. Sira abe rirõ. Mae ngue ibate ra. —Gracias, i que ñee Dios je ra. Mbichae que esiquio quio ra. Sira abe no. Mondo mondo ja que uchimbaaquiatu je cote ra. —Jembuchao chao mbia tubiriã je cote, i que Jesús ra. ¹⁷ Mbia que embuquiaru ja tuchi ra. Miãtã tuchi que ra. Mbia huisa tubiriã ngue cote ra. Sira rire. Mbichae rire abe no. Doce iru que mbia mombisẽ esique sique je ra.

Cristo chõ nde resẽ, i Pedro Jesús je

¹⁸ Emo mose que Jesús ae riqui ñee ñee Dios je ra. Echimbaaquiatu abe que chi huee ra. —¿Aba aico reĩ mbia je re? i que Jesús ee ra. ¹⁹ Echimbaaquiatu que ñee ee ra. —Juan el Bautista ereico reĩ nguiã emo je co. Elías ereico reĩ nguiã emo je no. Dios cheẽ nenei neneisa quera si je ereico reĩ nguiã emo je no, i que echimbaaquiatu ee ra. ²⁰ —¿Aba aico reĩ jêje co re? i que Jesús ee ra. —Cristo chõ nde resẽ. Dios ririĩ ño nde resẽ, i que Pedro Jesús je ra.

Mbia ra seiquia, i Jesús uchimbaaquiatu je

²¹ —Ûquĩ nda jeñeechĩ emo je jê, i tuchi que Jesús ee ra. ²² Jesús que uchimbaaquiatu mbaaquiatu quiatu ra. —Mbiarã ngue Dios sembu ra. Mbia ra sembasĩ mbasi tuchi. Amei nda hui ja sesi. Sacerdotes rerecua abe ra hui ja sesi. Embesasa abe ra hui ja sesi. Mbia ra seiquia chee. Tres tenda mose ra aquera si, i que Jesús mbia eiquia nonde ra.

²³ —Emo siquise mose serui, sã hui ja mbae ubi si. Sã cruz umbaerã ndui bei se rã si. Sã eriqui serui cote. ²⁴ Emo ndua bei mose ngueco rese, ereco ra ua esi. Emo hui mose ngueco si seje, ùquĩ nda siqui bei. ²⁵ Emo ngueco mumba chooño mose, eya eã mbei rae. Mbaecha rete raque. ²⁶ Emo ireĩ ireĩ mose sesi, se abe chõ nda aireĩ ireĩ esi. Emo ireĩ ireĩ mose secheẽ si, se abe chõ nda aireĩ ireĩ esi, sechu mose mbia rerecuarã. Dios quirãcuã nda sembu. Angeles rese ra achu aque mose. ²⁷ Tacheẽ nyecua jêje. Á jêingo serese ã nae, jemo nda jemaẽ Dios quirãcuã ndese jemano nonde. Mbia rerecua tuchi ra Dios, jemo mano nonde, i que Jesús ee ra.

Jesús nyicabo uchimbaaquiatu je

²⁸ Ocho tendare que Jesús choi sita ibátee ra. Ñee sacua Dios je huee. Pedro que oso erese ra. Jacobo abe. Juan abe. ²⁹ Jesús ñee mose Dios je que eruba ñimbiasu ra. Eirao abe que enininya ra. Eiraoshĩ nininya tuchi que ra. ³⁰ Mbia

nyeremo ngue nyecua u ibate si ra. Jesús nininya mose que eriqui ñee ñee nyue erese ra. Moisés que enongue ra. Elías que enongue no nda. ³¹ Ūquĩ ja que enininya Jesús rese ra. —Mbia ra Jesús iquia mbucha ira rese Jerusalén, i que equia ñee nyue ra. ³² Pedro reesite raque. Eresenda abe reesi esite raque. Uqueã mbei quera. Jesús nininyate quiatu ngue ee re. Moisés abe nininyate quiatu ngue ee re. Elías abe nininya no. ³³ Ibatenda que nyoĩ quia Jesús rechta cote ra. —¿Manyae ra ñee Jesús je re? i que Pedro ra. Nyebe ñee iru chõ nguiã ee. —Nandecu turãte aa, Sembaaquiatusa. Sucha ñetẽ uresaã saã na. Enongue nembraerã. Enongue Moisés mbaerã no. Enongue Elías mbaerã no, i rei que Pedro ñee Jesús je ra. ³⁴ Pedro cheẽ mosete que ibeishĩ ndu eite ñi nda. Ibeishĩ ngue Moisés mbuchecuyã ee ra. Elías abe mbuchecuyã ee. Nyebe esiquiche nguiã. ³⁵ Echeẽ mo ngue echandu ibeishĩ qui re ra. —Co rei sebi tuchi seriirĩ co. Echeẽ jeñandu bei quia, i que Dios ee ibeishĩ qui re ra. ³⁶ Aquere que Jesús mi ndiqui uchimbbaaquiatusa rese ra. Umaesa que esenei eã ja emo je ra. Ñee ãte que emo je ra.

Jesús aba checuayã jea mbia riiri mo si

³⁷ Isamamimbe que ecuaẽ nguichi sita ibate si ra. Mbia tubirã ngue ngaẽ Jesús rea ra. ³⁸ Ūquĩ mo ngue ñee Jesús je ra. —Seriirĩ ndese emae, Urembaaquiatusa. Seriirĩ miite que se co ra. ³⁹ Aba checuayã icuã ndiqui eisi isi co. Embaasẽ asẽ mbei. Emburiri riri. Echuru mbichoĩ. Erete munumbi numbi. Aba checuayã hui sereã mbei seriirĩ si. ⁴⁰ “Aba checuayã embusẽ seriirĩ si”, ae rei ngue ndechimbbaaquiatusa je re. Embusẽ aroneate esi, i que eru ñee Jesús je ra. ⁴¹ —¿Mañi jenyee quia seicuayãte re? ¿Secheẽ jemumba tuchi chõ nguia re? ¿Ñimbirãcuã mbeite ra aba quia jẽje re? i que Jesús ñee ee ra. —Nderiirĩ eru rã seje, i que eru je cote ra. ⁴² Jesús rurubite mose que aba checuayã eriirĩ mbucoĩ mondo ra. Mburiri tuchi que ra. Jesús que ñee asite aba checuayã icuã je ra. Eriirĩ ngue embucherõ nda. Embucherõ ji que emondo eru je cote ra. ⁴³ Dios quirãcuã ndese mae ngue mbia nyuruira tuchi ra.

Mbia ra seiquia, i si Jesús

Jesús chiao rese mae ngue mbia nyuruira tuchi ra. Mbia nyuruira mose que Jesús ñee uchimbbaaquiatusa je cote ra. ⁴⁴ —Mbiarã ngue achu ra. Mbia ra semee mbia icuã je. Sericharã. Ūquĩ si ra jêtesareichĩ, i rei que Jesús uchimbbaaquiatusa je ra. ⁴⁵ Echimbbaaquiatusa que Jesús cheẽ icuayãte ra. Echecuayãte que ee ra. —Ndecheẽ embiasa ure je, iã ngue ñee ee ra. Ireĩ ireĩ ño ngue ñee ee ra.

Ererecua tuchi ra se, i jaaja Jesús chimbbaaquiatusa nyue

⁴⁶ —Se quia ra ererecuarã tuchi jẽsi, i jaaja que echimbbaaquiatusa ñee nyue ra. Ñee icuã icuã nyee nyue. ⁴⁷ Jesús que ūquĩ ndua ndua icuate ra. Nyebe àquẽ mo mbucoĩ mi nguiã ujii. ⁴⁸ Jesús que ñee ee ra. —Sã àquẽ mo ndiqui siqui mingue no jẽ. Ae eturã ndiqui mbia riiri je seriĩ nae, seje abe chõ eturã ndiqui nguiã. Ae eturã ndiqui seje nae, semondosa je abe chõ eturã ndiqui nguiã. Ae ererecua sereãte riqui jemo nae, ūquĩ nguia sebi re. ¿Mbaerã jẽingo “ererecuarã se” i nyue re? i que Jesús ee ra.

Emo icuã eã mose nande je, nanderesenda chõ ūquĩ nde

⁴⁹ Juan ngue ñee Jesús je ra. —Pe emo nyi aba checuayã ndirõ ndirõ mbia si nderiĩ pe. Uremae ngue erese ra. Aque eriqui ãte nanderese aque. Nyebe

uresiquisã nguia, i que Juan Jesús je ra. ⁵⁰ Jesús que ñee ee ra. —Tei. ¡Jësiquisã quisãchĩ nda jê! Emo icuã eã mose nande je, nanderesenda chõ ùquĩ nde, i que Jesús ñee ee ra.

Jesús ñee asi Jacobo je; Juan abe je

⁵¹ —Namo jiri ra aso ibate cote, i que Jesús ndua ndua cote ra. —Taso Jerusalén, i tuchi que equia ra. ⁵² Jesús que mbia mo mondo unonde ra. Ûquĩ ngue ngasê sucha tubiriã mo nda. Samaria jenda rei sucha. —Jesús ra uque aa jendese, i rei que hue jenda je ra. ⁵³ Hue jenda que Jesús isi turã sereãte ra. —Jerusalén Jesús si quia qui reae. Nyebe ureico nguia eisi sereã aa, i que hue jenda ñee icuã Jesús chimondo je ra. ⁵⁴ Jacobo jirandu mose que paama i hue jenda je ra. Juan abe que paama i hue jenda je ra. Ûquĩ ngue ñee Jesús je ra. —Sã Elías tata mbu ibate si mbia icuã je cose no. ¿Eĩ ure si ra tata mbu ã i quia sacuã nde? i que echimbaaquiatu ñee Jesús je ra. ⁵⁵ Jesús que uba ñee asite ee ra. —Jësecha chõ. Aba mingosa riiri ño jëingo ã ndesê. ¿Jëtesarei chõ nguia ùquĩ si re? ⁵⁶ Mbia i quia sacuã ngue achuã ndesê. Mbia mingo bei sacuã ño ngue achu nguia, i que Jesús ra. Sucha tubiriã mo ngue echoi cote ra.

Jesús rui taico, i raque emo

⁵⁷ Jesús ngata mose que mbia mo ñee ee ra. —Taico bei nderese. Ndeso mose manguiti, se abe ra aso bei quia nderese, i que ñee Jesús je ra. ⁵⁸ Jesús que ñee ee ra. —¿Mbae rasi ra eresaã saã serese re? Eoita quia ecua jiri re. Nguireĩ nguia equisa jiri no nde. Se quia sequisayã mbei re, i que Jesús ee ra. ⁵⁹ —Serui eico bei, i que Jesús emo je ra. —Sã seru mano na. Aquere quia ra aico bei nderui, i rei que aque ñee Jesús je ra. ⁶⁰ Jesús que ñee ee ra. —Sã mbia ataque chõ nderu chati. Nde quia eso Dios cheẽ nenei nenei mbia je, i que Jesús ee ra. ⁶¹ Emo ngue ñee Jesús je ra. —Aico jee ra nderui. “Co acua quia co”, tae rã oso sechuchua jenda je, i que ñee Jesús je ra. ⁶² Jesús que ñee ee ra. —“Achu jirichĩ nguia Jesús rui”, i mose sequiatio mo, aque ra ngaseã Dios je, i que ra.

10

Jesús mbia setenta mondo ucheẽ nenei nenei sacuã

¹ Aquere que Jesús mbia setenta irabo no nda. —Serêta chõ jëso jëso quia sucha mbuchesea sea, i que ee ra. Nyeremo nemo ngue embuchao chao quia mondo ra. ² —Secheẽ andusa reã ndei etubiriã. Secheẽ nenei neneisa rei co mii jiri. “Dios, ndecheẽ nenei neneisa mo emondo tuchi. Mbia mbiirandu randu sacuã”, jenyê chõ nguia Dios je. Sã echa mbae a ishao shaosa mondo ea ireĩ mose no. ³ Jëso cote. Sã nyacua icuã ndiqui oveja je no. Eĩ si ra mbia icuã icuã jêje. Nyacua rã si. ⁴ Jëochi chõ jëso. Mbae riru ra jendaochĩ. Mbae isiquia abe ra jendaochĩ no. Jëiyao abe ra jendaochĩ. Jëitõ itõchĩ nda ñeenda cúa ñee sacuã mbia je. ⁵ Jëique mose emo nyuchúaa, jeñee turã huee tuchua jenda je. “Dios nda jembia bei quia chã”, jenyê hue jenda je. ⁶ Hue jenda ia mose Dios rese, Dios ra siqui tuchi erese. Eya eã mose Dios rese, emo je quia jeñee. ⁷ Jemba jembatechĩ nda uque tuchua raamba amba. Jengue mocoĩ jiri quia huee. Ae hue jenda u u quia nae, jê abe jêu quia erese. Jëingo mose secheẽ nenei nenei mbia je, sã mbia mbae mondo mondo jêje. ⁸ Sucha tubiriã jenda jëisi turã mose, jëquiaru quiaru erese. ⁹ Hue jenda ndasi jembucherõ nyerõ ee. Hue jenda je secheẽ jësenei senei. “Namo jiri ra jenderecuarã Dios cote”, jenyê chõ hue jenda je. ¹⁰ Sucha tubiriã jenda mo jëisi sereã nea mose, jeñee

asi ee etaiçúee. ¹¹ “Urei tubi urembutomo nguia jendique jie a. Jêtesareiã sacua urecheê si. Jenderecuase rete raque Dios. Jêisiã ñochĩ”, jenyê chõ hue jenda mbiirandu. ¹² Se mbia icua mbasi mbasi mose, hue jenda ra ambasi mbasi tuchi Sodoma jenda si.

Jesús ia eã mbia sucha tubiriã jenda rese

¹³ Seya eãte jendese, Corazín jenda. Seya eãte jendese, Betsaida jenda. Jendasi tuchi chõ ndae. Mbia mae sayã ngue asaã saã jêje nae, ùqui naa mose Sidón jenda je, eĩ nda hue jenda huicua ndecha rei. Eĩ nda Tiro jenda abe huicua ndecha rei. Eĩ nda eya eãte rei huicua ndese. ¹⁴ Jê nguia jêicua jêsecha sereãte rei. Nyebe ra Dios jembase mbasi tuchi ùqui si quiatu. Dios mbia icua mbasi mbasi mose. ¹⁵ Jêcuasu jêsaã saã tuchi techĩ nguia re, Capernaum jenda. Nyebe ra Dios jemondo tuchi tata cuasu. ¹⁶ Secheê nenei neneisa chõ jê nde. Ae ra jeñee ñandu quia nae, secheê abe ra echandu. Ae ra jêucuãyãte quia nae, se abe ucuãyã ndae. Ae ra seucuãyãte quia nae, sembusa abe ucuãyã nda eno, i que Jesús ñee uchimondo setenta je ra.

Jesús chimondo mbia setenta nyebi ngaã ee

¹⁷ Ùqui setenta nyebi si mose que eyate ra. —Aba checuayã icua urecheê mumbayã ñochĩ nderĩ, Urererecua, i que ñee Jesús je ra. ¹⁸ Jesús que ñee ee ra. —Satanã que ngoi tuchi u ibei si ra. Sã ama piriã i asi no, eĩ si que eu ngoi ra. Amae tuchi que ecoi rese ra. ¹⁹ Sequirãcuã ngue amee tuchi jêje ra. Jendeaquiato sacua. Jêirõ sacua mbei tásie rese. Quiraã ndese. Seucuãyãsa riquisã sacua. Sequirãcuã nda jendea quiatu mingo. ²⁰ Ùqui ndesechĩ nda jêya. Serese quia jêya. Aba checuayã jeñee mumbayã mose i ùqui ndesechĩ nda jêya no jê! Paba que nombre jembae mbesa mbesa mii ibate ra. Ùqui ndese quia jêya, i que Jesús ee ra.

Jesús ia tuchi

²¹ Aque mosete que Espiritu Turã Jesús mbia tuchi ra. Ñee ngue ngu je ra. —Seyate aico nderese co, Paba. Ibi jenda rerecua ja chõ nde re. Ibei jenda abe rerecua ja chõ nde no nde. Ndecheê ngue erembuchecuayã mbia aquiato tuchi je ra. Mbia riirĩ naanguia je chõ ngue erembuchecua nguia. Ùqui ño ngue eturã ndeje ra, Paba, i que Jesús ra. ²² —Seru que mbae mondo ja seje ra. Paba mii ño seicua tuchi nguia. Paba riirĩ mii ño se re. Se mii ño Paba aicua tuchi nguia no. Ae je ra Paba ateacuquia nae, ùqui mii ño nda Paba icua tuchi nguia serese, i que Jesús ñee nda. ²³ Jesús que uba mae uchimbaaquiato rese ra. Eísaa que ñee nda. —Coche jemae nguia ã sechiao rese. ²⁴ Mbia rerecua ñiinda mae ja bite raque ã sechiao rese. Dios cheê nenei neneisa abe mae ja bite raque ã ndese. Mae eã mbei que equia sechiao rese ra. Secheê andu bite raque. Secheê ngue echanuate ra, i que Jesús ra.

Samaria jenda mo turã erasi je

²⁵ —Ma Jesús ucheê nyabi, i que embesasa mo ñee oso Jesús rea ra. —¿Mbae rese ra aico siqui bei nonde re? i que ñee Jesús je ra. ²⁶ —¿Mañi ño Voisés chimbasa re? i que Jesús ee ra. ²⁷ Embesasa que ñee ee ra. —Eĩ ño ngue Moisés embasa ra: “Echesecua tuchi quia Dios rese. Ndechiã ja je chõ eico nyeseccua erese. Neaã abe je. Ndequirãcuã abe je. Nendua ndua abe je. Sã erchesecua ndechiese no, eĩ ere si chõ nyeseccua nde ji jenda rese”, i que embasa ji ñee ndesê, i que embesasa ñee Jesús je ra. ²⁸ Jesús que ñee ke ra. —Erecheê turãte. Ndkico mose ùqui ndese, Paba ra nemingo bei, i que Jesús ee ra.

²⁹ Embesasa que uturã saã saã Jesús je ra. —¿Aba se ji jenda re? ¿Aba rese ra achesequa re? i que ñee Jesús je ra. ³⁰ Jesús que ñee ee ra. —Sã emo oso quia Jericó quiti no. Jerusaén si. Sã mbia icuã nyarõ erese ñeenda cúa no. Úcua ucua tuchi que erese ra. Embae que embuquiachã ja ra. Eirao abe rirõ ja esi no. Ecura curái que esecha ino ñeenda cúa rĩ nda. ³¹ Aque ñeenca aui que sacerdote mo si ra. Maeño ngue ecura curái rese ra. Nyucuaño ngue oso ra. ³² Levita mo abe que oso rei hue rĩ no nda. Aque abe que maeño si erese no nda. Ñeenda ibi chõ esi nguia kcuãño no. ³³ Aquere que Samaria jenda mo oso hue rĩ nda. Aque mae mose ecura curái rese, eya eã tuchi que aque quiatu ra. Aque quia echucuaño eã nguia cote. ³⁴ Aque que tiba erese ra. Mbae quira que equiti quiti eiruã nua ji rese ra. Vino abe quiti erese. Esia ji que echucua chucua ee ra. Caballo umbae rese que erasi mbuchui cote ra. Tuchua mo ngue ererao ra. Huee que eriqui eraarõ isa ra. ³⁵ Isamami ngue ñee tuchua je ra. —Taso cote. Ecura curái embucherõ nguia aa. Cõ mbae isiquia nyeremo tamondo ndeje. Embucherõ sacua eisi cõ je. Cõ nyeremo chayã mose, mbae isiquia mo nda amondobe ndeje sechube mose, i que Samaria jenda ñee tuchua je ra. ³⁶ ¿Aba nyesequa ecura curái rese re? ¿Sacerdote ere? ¿Levita ere? ¿Samaria jenda ere? i que Jesús embesasa je ra. ³⁷ Embesasa que ñee ee ra. —Samaria jenda chõ ngue nyesequa erese resẽ, i que embesasa ñee Jesús je ra. Jesús que ñee ee ra. —Ae rã si chõ eico nyesequa, i que ee ra.

Jesús oso Marta rea; María abe rea

³⁸ Jesús que ngasẽ sucha tubiriã mo nda. Cuña mo ngue eisi turã uchuchúaa ra. Marta, i equia ee. ³⁹ María, i que Marta nongue je ra. Jesús i ji bei que María riqui ngoi ra. Jesús cheẽ ndese nyiisaquia bei. ⁴⁰ Marta que mbae chao chao ja tuchi quia ra. Erecoteã tuchi que eriqui ra. Oso que ñee Jesús je ra. —Mbae mo ndese senongue riquiã ño co resẽ. Echeẽ na ee. Siqui sacua mbae mo ndese seje, i rei que Marta Jesús je ra. ⁴¹ Jesús que ñee Marta je ra. —¿Mbaerã ereico siqui jate mbae rese re, Marta? ⁴² Aque mii ndese chõ eico ndenongue rã si ae, Marta. María riqui secheẽ andu andu a resẽ. Emo nda embui eã secheẽ si, i que Jesús Marta je ra.

11

Jesús mbia mbaaquiato quiatu ñee tura sacua Dios je

¹ Emo mose que Jesús chi ñee ngu je ra. Hui mose que echimbaaquiato ñee ee cote ra. —Urererequa, urembaaquiato rã ñee Dios je. Sã Juan uchimbaaquiato mbaaquiato no, i que Jesús chimbaaquiato ñee ee ra. ² Jesús que ñee ee ra. —Ei jenye chõ nguia Dios je ñee mose:

Paba ibatenda, sã mbia ñee turã ja bei quia nderĩ.

Mbia rerecurã ja sacua echu jei ibii.

Sã mbia ibatenda siqui beite ndebi rese no.

Sã mbia ibi jenda abe riqui ndebi rese.

³ Ae ra ureu namo, ùqui embu rã urechiurã.

⁴ Ae uresaã icuã icuã ndeje nae, ùqui embutiã ná uresi.

Sã ureico tesarei mbia icuã icuã mose ure je no.

“Mbae icuã jësaã” jichĩ nda emo ure je jë!

Urereaquiato mbae icuã si.

Ei jenye chõ ñee mose Dios je, i que Jesús embaaquiato ra. ⁵ Jesús que ñeembe ee ra. —“Mbae embu seje”, jë i mose jëquiato je, ¿mee nda jëje re? Sã jëingo oso

jẽquiato rea itondiite rete mose no. “Mbichae prestar ere rã seje. ⁶ Sequiato mo ngue tu serea ra. ¿Mbae ra amee ee re?” jenyẽ chõ ee. ⁷ Ae je jẽingo ñee nae, ¿mee eã nda jẽje re? Sã ñee jẽje no. “Jẽso rei. Seiquesa atãte. Co achu seriirĩ ndese quisa ye co. Sehuã sereãte. Mbae mo amondo aronea tuchite ndeje”, ¿i ra jẽje re? ⁸ Mondo eã aroneate jẽje jeñee mbei bei mose ee. Nyuruã sereãte raque uquiato je. Ñee mbei mose ee, nyuruã nda mbae mondo turã ee. ⁹ Ei si chõ Dios no nde. Jeñee i i mose Dios je, mbae ra emondo jẽje no. Jẽ mbae mo ndequia i i mose, jẽtea rae. Jẽ eiquesa mbu i i mose, mbuquiata ra jẽje cote. ¹⁰ Ae ñee i ite quia Dios je nae, mbae ra Dios mondo ee. Ae mbae mo sequia i ite quia nae, tea rae. Ae eiquesa mbu i ite quia nae, equia ra ee. ¹¹ Jendiirĩ “mbichae embu seje” i mose, ¿sita ra eru mee ee re? Jendiirĩ “sira embu seje” i mose ¿mbei ra eru mondo ee re? ¹² Jendiirĩ “nguira chia embu seje” i mose, ¿quirãẽ nda eru mondo ee re? ¹³ Mbia icuã nyee mbae turã mondo mondo quia nguiriĩ je ã. Jendu Ibatenda quia ra mbae turã tuchi mee jẽje. Jendu ra Espíritu Turã mee jẽje, jeñee mose ee, i que Jesús ee ra.

Aba checuayã quirãcuã Jesús quereco co, i raque mbia

¹⁴ Emo mose que Jesús aba checuayã icuã mbusẽ emo ñia si ra. Aque aba checuayã nguia echeẽ mbaaquiatuãte nguiã. Jesús embusẽ mose que ñee cote ra. Ñee mose que mbia nyuruira tuchi mae erese ra. ¹⁵ Emo emo ngue ñee nda. —Aba checuayã icuã nderecua tuchi chõ Satanás nde. Satanás quirãcuã je chõ Jesús riqui nguiã aba checuayã icuã mbusẽ mbusẽ mbia si co, i rei que emo emo nda. ¹⁶ —Ma Jesús aquiature, i que mbia ñee nyue ra. —Jesús, mbia mae sayã mo esaã na ure je, i que mbia ñee Jesús je ra. ¹⁷ Jesús que ñquĩ ndua ndua icuate ra. Nyebe ñee nguiã ee. —Gobierno icuã icuã mose nyue, ua rae. Tuchuamo jenda icuã icuã mose nyue, ua ra eno. ¹⁸ Satanás icuã icuã mose nyue, Satanás quirãcuã nda ua no. Jeñee ñooño ño nguiã seje ã. “Satanás quirãcuã je chõ Jesús riqui nguiã aba checuayã mbusẽ mbusẽ mbia si”, jenyẽ chõchĩ nguiã seje ã. ¹⁹ ¿Aba jeñimbaaquiatu mbirãcuã jẽ nde? Aba checuayã icuã mbusẽ nonde re. ¿Satanás jeñimbaaquiatu mbirãcuã serese re? ²⁰ Dios quirãcuã je quiatu aico aba checuayã mbusẽ mbusẽ mbia si ã. “Dios quirãcuã ndese chõ ureico nguiã mae”, jenyẽ eã ñochĩ nguiã ã. ²¹ Satanás quirãcuã tuchite raque. Umbae raarõ tuchite raque. “Sembae chi turãte a”, i raque. ²² Dios quiarei equirãcuã tuchi Satanás si. Dios Satanás mbae sirõ ja arõte quia esi co. Dios Satanás mbae mbutiã ja arõte quia co. ²³ Ae siqui ãte quia serese nae, ñquĩ icuã ño eriqui nguiã seje. Ae mbae a ishao shao raanguia eãte quia seje nae, ñquĩ icuã ño eriqui nguiã seje.

Aba checuayã icuã nyebi u mbia chianguĩ re

²⁴ Aba checuayã icuã usẽ mose emo ñia si, ngata bei chõ nguiã. “¿Mangue ra sequenea aucua que re?” i chõ nguiã. Uquenea ucua sacua ngue etea eãte ra. “Tasobe rei nyebi. Ae si achu usẽ, aque chiã ye si taso”, i que aba checuayã nda. ²⁵ Aba checuayã nyebi si mose u, mbia chiã ndecoteã eãte que ee ra. Tuchua tii ji raãte que ee ra. ²⁶ Aba checuayã icuã ngue nguesenda siete queru cote ra. Ique ja que echoi aque chianguĩ re cote ra. Ae chianguĩ re aba checuayã icuã siete riqui nae, aque icuã i i tuchi que cote ra. Ñiinda si. Aba checuayã miĩ ngue siqui eye nyii ra. Etubiriãte cote, i que Jesús ee ra.

Dios cheẽ andusa je quiatu mbae roonde

²⁷ Jesús cheẽ mose que cuña mo tasẽ tuchi ñee mombo ra. —Mbae roonde tuchiñi ndesi je nye. Ae nambuquiambu quia, i que cuña mo ñee mombo Jesús je ra. ²⁸ Jesús que ñee ee ra. —Dios cheẽ andusa je quiatu mbae roonde riqui nguiã. Dios cheẽ mumbasa reã je quiatu mbae roonde riqui nguiã, i que Jesús ra.

Mbia mae sayã esaã ure je, i bei mbia Jesús je

²⁹ Mbia que ngaẽ tuchi Jesús riichã nda. Jesús que ñee mbia je ra. —Co mosenda mbia icuãte riqui ã. “Mbia mae sayã esaã ure je”, i beite equia seje ã. Mbia mae sayã mii ño nda asaã ee. Jonás na si. ³⁰ Sã Jonás ndiqui raque sira rie ye tres días nae, sã mbia Nínive jenda echeẽ andu cote nae. Jonás na si ra asaã mbia je. Mbia co mosenda je mae sayã tasaã. ³¹ La reina de Seba quia eturã jiri mbia co mosenda si re. Dios ra co mosenda mbasi tuchi la reina de Seba si. Sã la reina de Seba tu isho tuchi si Salomón ñee andu no. Se quia acheẽ ndaque quia jêje. Searacua tuchi raque se quiatu Salomón si. Secheẽ jemumbate chõchĩ NGUIA Ñ: Nyebe ra Dios jembasi tuchi mbia icuã ndea rea mose. ³² Nínive jenda quia eturã jiri co mosenda si re. Dios ra co mosenda mbasi tuchi Nínive jenda si. Sã Nínive jenda huicua ndecha Jonás ñee mose ee no. Aico raque ñee jêje, co mosenda je. Jê secheẽ jemumbate chõchĩ nguiã ã. Se quia raque ererecua tuchi Jonás si. Nyebe ra Dios jembasi tuchi mbia icuã ndea rea mose.

Nanderesa quiarei mbae resae nanderete je

³³ Nande lámpara mendi mose, nandemii aroneate mbaequi re. Nandemii aroneate mbae mo ye. Nandemingo quia ibate erenda rese. Mbia resae ja sacua. ³⁴ Nanderesa quiarei mbae resae nanderete je. Nanderesa turã mose, nanderete abe ra oso turã. Naneeresa icuã mose, nanderete abe ra oso icuã icuã no. ³⁵ Tata rendi rã jëingo bei. ³⁶ Tata rendi rã jëingo bei mose, jemae turã nda mbae ja rese cote. Sã tata rendi riqui nanderesae no, i que Jesús mbia mbaaquiatu ra.

Jesús ñee asi fariseos je

³⁷ Jesús ñee jare que fariseo mo ñee ee cote ra. —Nyao rã sechuchúaa. Terequiaru serese, i que ñee Jesús je ra. Jesús que oso erese ra. Ngoi que quiaru cote ra. ³⁸ Fariseo que ñee uchiangui re ra. —Jesús choi quiiriã ño quiaruchĩ, i que uchiangui re ra. ³⁹ Jesús que ñee asi ee cote ra. —Jêo achõ ño jëirei ireichĩ nguiã. Jeñiangui renda quia eicuãte re. Jeñiangui renda quia jëirei ãte nguiã. Abei chiãte chõ jëingochĩ jeñiangui re. ⁴⁰ Nandeo achõ eã ño ngue Dios saã nguiã. Nandechiangui renda abe chõ ngue Dios saã ndesẽ. ⁴¹ Abei chiãte chõ jëingochĩ jeñiangui re ã. Jeñiangui renda turã mose, eĩ nda jëturã ja rei. ⁴² Aba mbia eã tuchichĩ jê, Fariseos. Mbae a jemondo mondo tuchi raque Dios je. Jenyesequa eãte quia erese jeñiangui re re. Jëingo turã eãte quia mbia rese no nde. Uquĩ jësaã jiri ae. Mbae a abe jemondo Dios je. ⁴³ Aba mbia eã tuchichĩ jê, Fariseos. “¡Serendarã turã nguiatu se jê!” jenyete chĩ nguiã mbia ñumunua mose. “Sã mbia sererecua i nande je”, jenyete chĩ nguiã no. ⁴⁴ Aba mbia eã tuchichĩ jê, Fariseos. Embesasa abe no. Jenguasu jësaã saã techĩ nguiã mbia je. Mbia raaque tãsa rã ño jeñiangui renda re. Jeñiangui renda soõ ño nguiã. Erondeite. Sã eraaque tãsa yenda soõ no. Mbia jirandu eã ndaque jeñiangui renda soõ ndese, i que Jesús ñee fariseos je ra. Embesasa je abe no. ⁴⁵ Embesasa mo ngue ñee Jesús je cote ra. —¿Mbaerã ereico ñee ure abe je re? i que ra. ⁴⁶ Jesús que ñee uquĩ abe je ra. —Aba mbia

eã tuchichĩ jê abe. Jeñee tuchite quia mbia je ã. Dios cheẽ jembeta mbeta tuchichĩ nguia mbia je ã. Mbia echeẽ mumbayã aroneate chee quia ã. Jê si chõ jeñee jemumba mumba nguia ã. ⁴⁷⁻⁴⁸ Cose ndare rã si jêingo nguia ã. Jenamei na si. Sã ñi jenamei icuã icuã ndiqui Dios cheẽ mbuchecuasa je cose no. Eĩ jenyee si chõ nguia ã no. ⁴⁹ Dios quiarei earacua tuchi. Ae que ñee jêje ra. “Secheẽ mbuchecuasa emo emo nda amondo mbia je. Mbia icuã icuãte ra secheẽ mbuchecuasa je. Secheẽ mbuchecuasa mo iquia chee, i que Dios ñee nda. ⁵⁰⁻⁵¹ Ae Dios quiato iquia iquia quia cose nae, ùquĩ ñi nda Dios jembasi cote. Sã mbia Abel iquia cose no. Sã mbia Zacarías abe iquia altar jii no. Sã mbia Dios quiato iquia iquia bei cose no. Ûquĩ ja rii nda Dios jembasi cote. ⁵² Aba mbia eã tuchichĩ jê. “Ure mii ño Dios cheẽ ureicua nguia ã”, jenyee chooño ño nguia ã. Dios cheẽ jêisi turã eãte quia ã. Mbia siquise mose Dios rese, jêingo emingo eãte erese ã no. Jê abe chee jêingo eãte erese ã no, i que Jesús ñee embesasa je ra.

⁵³⁻⁵⁴ Jesús ñee jare que fariseos paama i tuchi ee ra. Embesasa abe paama i nguia ee no. Ûquĩ ngue ñee ñee tuchi Jesús je ra. —Sã Jesús ucheẽ tasa tasa nande je no. Ûquĩ mose nandeisi serao policiaa, i tuchi que ra. Nyebe eriqui nguia Jesús rea chemi ñemi.

12

Jêturã nda jêsaã ñooñochĩ je

¹ Mbia tubiriã ngue ngaẽ ngaẽ nguia Jesús rea cote ra. Cuaacua i tuchi que equia nyuera. Mbia tubiriã tuchi. Jesús que ñee uchimbaaquiato je cote ra. — iFariseos rã nda jêingochĩ jê! Uturã naa ñooño mbei. ² Ae mbia saã nyecuyã cuayã nguia nae, ùquĩ nda nyecua ja cote. Ûquĩ nda mbia icua ja cote. ³ Ae jeñee nguia itondaru jêingo mose, ùquĩ nda nyecua ja mbia je cote. Jeñee equia nyiisa isa nae, ùquĩ abe ra nyecua ja mbia je no.

Dios riqui jendeaquiato bei co

⁴ Tacheẽ nyecua jêje, Sequiatio. Ae “taiquia” i quia jeni nae, jũquĩ si ra jêsiquichechĩ jê! ⁵ Ae aba mombo serite quia tata cuasu nae, aque si quiato jêsiquiche. iAque si quiato jêsiquiche tuchi jê! ⁶ Nguireĩ ndei aba queteamba eã jiri. Mbae isiquia mumba eã jiri raque. Dios quia nguireĩ icua jate nguia. Dios ra tesareia nguireĩ mo si. ⁷ Dios riqui jê mii mii icua ja co. Dios riqui ngueteã jiri jendese nguireĩ si co. Nyebe jêsiquicheã mbae mo si.

Jesús quiato chõ se re, jenyee checua chõ nguia mbia je

⁸ “Jesucristo quiato chõ se re”, ae i quia mbia je nae, ùquĩ ñi nda acheẽ turã se abe. “Sequiato chõ ã nde”, ae ra se. Angeles ra ambiirandu ja ùquĩ ndese. ⁹ “Jesucristo quiato chõ se re”, ae ia nguia mbia je nae, ùquĩ ñi nda acheẽ turã eã. “Sequiato eã ño ùquĩ nde”, ae ra se. Angeles nda ambiirandu ja sequiatio eã ndese. ¹⁰ Emo ñee icuã mose serii, Dios ra echeẽ icuã mbutiã arôte. Emo ñee icuã mose Espiritu Turã ñi, ùquĩ icuã nguia ra Dios mbutiã eã mbei. ¹¹ Mbia icuã icuã nda jêje serii. Jenderao mose mbia rerecua je, jêquicoi coichĩ nda jê! “¿Mañi nande ra ñee ee re?” jjenyechĩ nda jê! ¹² Huee quia ra Espiritu Turã ñee nguia jêje jembucheẽ sacua, i que Jesús ñee uchimbaaquiato je ra.

Mbaecha aracuayã

¹³ Emo ngue ñee Jesús je ra. —Sererecua, senongue icuã icuãte seje. Echeẽ na senongueje. Ae ureru secha ure je nae, senongue embuchecha turã eãte seje, i que mbia mo ñee Jesús je ra. ¹⁴ Jesús que ñee ee ra. —¿Mbaerã nda re? “Mbia mbae embuchecha turã turã ee”, iã ngue Dios seje ra, i que Jesús ee ra. ¹⁵ —¡Emo mbae rese ra jema maechĩ eosei sacuaã jẽ! “Sembae tubiriã mose ra sebate cote”, jenyechĩ nda jẽ! i que Jesús ee ra. ¹⁶ Jesús que ñee ee ra. —Sã mbaecha mo ndiqui no. Ibicha. Sã embae ia tuchi no. ¹⁷ “¿Mañi ae ra se re? ¿Mangue ra aba ererecoquiato re?” i tuchi que mbaecha uchiangui re ra. ¹⁸ “Sembae ruacuã tambucuasú tuchi. Quiata a ruacuã. † nda sembae ique ja tuchi huee. Ae arecoquiato quia ã nae, ùqui nda tenda ata jiri tea seje chã. ¹⁹ Aquieĩ quieĩ eã mbei ra se quia cote. Aquiaru quiaru chõ nda se quia cote. Mbae ra ambei mbei chõ nguia cote. Achimbía mbia chõ nda se quia cote”, i raque mbaecha ñee uchiangui re. ²⁰ Dios que ñee ee ra. “Ndearacuayãte ereico co. Co isa chõ nda eremano. Ae ererecoquiato quia nae, aba je chio nda ùqui cote”, i que Dios ñee mbaecha je ra. ²¹ Ae mbae munua nua mbei quia nae, ererecoquiato sacuaã nae, earacuayã tuchi chõ ùqui nde. Dios quiato eã ño ùqui nde, i que Jesús mbia mbaaquiato quiato ra.

Dios uquiato reaquiato bei

²² Jesús que ñee uchimbbaaquiato je ra. —“¿Mbae ra nandeu re?” jenyechĩ nda quicoi coi jẽ! “¿Ma tiru ra nandemingue re?” jenyechĩ nda quicoi coi jẽ! ²³ Mbia chiu ae ra mbia mingo eã. Mbia irao abe ra mbia mingo eã no. ²⁴ Sã nguireĩ no. Mbae tiquiayã ndaque. Mbae ishao eã ndaque no. Mbae ruacuã eãte raque embae. Dios quiareĩ embuquiaru quiaru. Jẽ nguiaieĩ Dios queteamba tuchi nguireĩ si. Nguireĩ ja si. Jẽ abe Dios ae jembuquiaru nguiaã jẽ no. ²⁵ Mbia ae ra tiarõ eã. “Se ra atiarombe”, i raque ndua ndua uchiangui re. Dios ae mbia mbutiarõ arõ nguiaã. ²⁶ Jẽ mbae ñetẽ naa aquiatuã mose, ¿mbaerã jẽingo “mbae cuasu tasaã” i re? Dios quia ra mbae saã ja jẽje. ²⁷ Sã mbae uti turãte riqui no. Mbae ao ao eã ndaque. Ninyu mburirã eã ndaque. Mbae uti quiareĩ eturã jiri Salomón si. Salomón turãte raque. ²⁸ Sã Dios quiata mbuturã no. Quiata mano jeite raque. ¿Mañi nda Dios jemburao eã jẽ nde no? ¿Mbaerã jẽingo Dios icuayãte re? ²⁹ “¿Mbae ra nandeu re?” jenyechĩ nda pare i jẽ! “¿Mbae ra nandembei re?” jenyechĩ nda quicoi coi no jẽ. ³⁰ Eĩ ño Dios quiatoã nguiaã. Jẽ nguia jendu tesareia mbeite nguiaã jẽsi. ³¹ Jẽ nguia jẽingo tuchi Dios rese jenderecuarã. Ùqui mose ra Dios mbae mee mee mbei jẽje. Jenyiurã. Jẽnimbeirã abe no.

Jembae jemondo ja Dios je

³² Jẽsiquichechĩ nda mbae mo si, Seriirĩ. Jendu ra umbae mondo ja jẽje. Dios iate ra umbae mondo mose jẽje. ³³ Jembae jemondochõ ño mbaecha reã je. † nda jembae tubiriã jẽingo mose ibate cote. Mbae riru ra soro soroã mbei jembae ibate cote. Mbae ra ua eã mbei huee. Mbia ra mbae mbuquiachãyã huee. Chicuaquiareĩ eãte ra huee no. ³⁴ Jẽ jembae mondo mondo mose ibate, jendua ra ibatenda rese cote. Jẽ jembae monoã mose emo je, ibatenda rese ra jendua eãte.

Jẽingoquiato bei chõ nguia

³⁵ Jẽingoquiato bei quia jẽ! Itondaru abe jẽingoquiato quia. ³⁶ Sã ererecua mo no. Osõ ngüinisirá nderequia no. Huee erimba mo ndiqui echuchua raarõ huee. Aque ererecua ru quia eiquesa mbuu mbuu aque cote. Erimba

eequia asi ee cote. ³⁷ Erimba uqueã mose nguerecua tu mose, ererecua ia tuchi ra erese. Ererecua ra embuquiaru turã. Ae sí chõ echara chara nguiã ngũimba je hue no. ³⁸ Ererecua ra tu arõte itondáruu. Itondiite mose abe no. Erimba uqueã mose nguerecua tu mose, ererecua ia tuchi ra erese. ³⁹ Sã emo ñee ndeje no. “Co mose ra mbae mbuquiachãsa ru nembae rirõ”, i ndeje no. Ūquĩ mose ra erequeã. Nembae ra eresaarõ mbei esi. ⁴⁰ Eĩ jenyje jẽ abe icoquiatu. Eĩ ae ra u ibate sí. “Tu eãte rei rae”, i mose quia ra achu, i que Jesús ra.

Erimba echeẽ mumbayã mose, eya tuchi rae

⁴¹ Pedro que ñee Jesús je ra. —¿Aba je ereico ñee ũquĩ nde? ¿Ure mii je ere? ¿Mbia ja je ere? i que Pedro ee ra. ⁴² Jesús que ñee ee ra. —Dios rimba aba cheẽ mumbayã nii aico ñee co. Dios rimba aracua riiãico ñee co. Sã ererecua ñee ngũimba turã je no. “¿Sembae esaarõ ja jẽ!” i ee. “Serimba ataque embuquiaru quiaru ja quia no”, i ee. ⁴³ Erimba echeẽ mumbayã mose, ererecua ia tuchi ra tu mose. Erimba abe ra eya no. ⁴⁴ Ererecua ra ngũimba mii mbei cote, umbae raarõ sacua. ⁴⁵ Sã erimba ndua ndua uchiangui re no. “Sererecua ra tu jei ãte”, i ndua ndua. Hue ñee icuã icuã uataque je huee cote. Iruã nua cote. Quiaru chooño cote. Mbae mbei chooño abe cote. Quiacua quiacua cote. ⁴⁶ Sã ererecua ru quia ngũimba mbuate aque cote no. Ñee ee. “Mbae ra eresaarõ mbei seje cote”, i ngũimba je cote. Ngũimba iruã nua tuchi cote. Ae aba cheẽ mumbate quia, ũquĩ ndese ra mbae rasi raã naa cote. ⁴⁷ Ae nguerecua cheẽ icuate quia nae, ũquĩ nda ererecua mbasi mbasi bei ucheẽ mumba mose. ⁴⁸ Ae nguerecua cheẽ icua eãte quia nae, ũquĩ nguia ra ererecua mbasi mbasiã jiri ucheẽ mumba mose. Ae Dios cheẽ icua tuchi quia nae, ũquĩ je ra Dios “mbae esaã tuchi seje”, i. Ae je Dios mbae mondo tuchi nae, ũquĩ je ra Dios “mbae esaã tuchi seje”, i.

Achu chõ ngue mbia mbuchao chao nyesi resẽ, i Jesús

⁴⁹ Ibate sí que achu ibii ra. Mbia mae sacua sequirãcuã ndese. Mbia sequirãcuã icua eã ñochĩ namo nyee. ⁵⁰ Mbia ra sembasi tuchi cote. Pare pare aete se quia ndua erese co. ⁵¹ ¿Achu reĩ mbia mbuturã turã sacua serimba je jẽje re? Tei. Achu chõ ngue mbia mbuchao chao nyesi resẽ. ⁵² Mbia chuchua jenda ra ñimbuchao chao nyesi. Nyeremo nda siqui serese serimbarã. Eataque ra ñimbuchao esi. ⁵³ Emo nda eicuãte ngu je seriĩ. Emo nda eicuãte nguiirĩ je seriĩ no. Emo nda eicuãte usi je seriĩ no. Acuani abe ra eicuãte uchari je no. Ari mo abe ra eicuãte nguiirĩ ninisi je no. Eĩ sí ra mbia icuã icuã uchue seriĩ no, i que Jesús ra.

Ae ibatenda ra tu icuãte mbia je nae, aque jëicua eãte chõchi

⁵⁴ Jesús que ñeembe mbia je ra. —“Ama nda nyaaquĩ”, jenyje bei quia pã i mose ã. Ibei jëicuate raque quia ã. ⁵⁵ “Tenda rasite ra cote”, jenyje bei quia quiririã ichu ichu mose ã no. ⁵⁶ Ibei jëicuate raque quia ã. Tenda abe jëicuate raque quia ã no. Ama abe no. Dios rucucha ra tu mbia je, ¿mbaerã jëingo ũquĩ icuayãte quiatu re? ¿Mbaerã jëingo jëaracua raã naa nde?

Ae eicuãte riqui jëje nae, “nandeico turã ño nguia”, jenyje chõ nguia ee

⁵⁷ ¿Mbaerã jëingo mae sereãte mbae turã ndese re? ⁵⁸ Emo ñee icuã mose jeniĩ mbia rerecua je, jëturã ño ee. Jeñee turã ño ee. Jẽ ae chõ jeñimbuturã nguia erese. † nda jenderao icuã eã. Jenderao mose ra jëtarõ mbei cárcel. ⁵⁹ Huee ra jëingo bei. Jembae mondo ja tuchi chee ee, i que Jesús ra.

13

Jēhui chō jēicuā si

¹ Aque mose que mbia Jesús mbiirandu Pilato rĩ nda. Pilato nda mbia Galilea jenda mō iquia iquia ra. Mbia ticuas u iquia iquia mose Dios mbaerã. ² Jesús que ñee mbia je ra. —Ae Pilato iquia iquia quia nae, ¿ũquĩ icuâte riqui reĩ mbia ataque si re? Tei. Jēicuā ja chō jēingo nguiã ã no. ³ Jēhui eã mose jēicuā si, jemano ja chō nda jē abe. Ũquĩ na si. ⁴ Sã torre de Siloé ngoi mbia ati no. Dieciocho iquia. ¿Ũquĩ eicuâte riqui reĩ mbia ataque si re? Tei. ⁵ Eĩ ja chō ñene. Jēhui eã mose jēicuā si, jemano ja chō nda jē abe. Ũquĩ na si, i que Jesús ra.

Ira ia ea mbei

⁶ Jesús que ñee mbia je ra. —Sã amei mo ira tiquia rei no. Ia eã mbei chō ee no. “Ma taso erea no. Ia cote reae”, i rei que amei nda. Ei oreãte que ee ra. ⁷ Nyebe amei ñee nguiã ngũimba je cote. “Ira a rea ngue aso rei nguiã. Ia eã mbei chōchĩ seje tres años. ¡Echisia chō oso jē! Ibi riquisã ñooño uã aque”, i que amei ngũimba je ra. ⁸ Sã erimba ñee amei je no. “Co tenda mose nandechisia eã na. Equi tambuturã. Mbae ruusi tachono ñono erao rese. ⁹ Ma ia eãte co tenda. Ia eã mose, nandechisia chō cote”, i que erimba amei je ra, i que Jesús mbia mbaaquiātu ra.

Jesús ari rasi mbucherō

¹⁰ Sábado mose que Jesús chi mbia mbaaquiātu quiātu ra. Judíos chumunuásaa. ¹¹ Cuña ndasi mo ngue siqui hue ra. Nyiituquia bei dieciocho años nyee. Aba checuayã icuã nguia embasi nguiã. Ari que nguete isoã mbei quia ra. ¹² Jesús que mae ari rasi rese ra. —Echu rã aa, i que ee ra. —Cuña, nderasi ãte cote, i que Jesús ee ra. ¹³ Jesús que o chono erese ra. Aque mose tuchi que ari nguete iso turã cote ra. Ari que ñee turã turã Dios je cote ra. ¹⁴ Ererecua judíos munuasa que paama i tuchi Jesús je ra. Ari mbucherō mose sábado. —Sábado eã mose chō nandeico mbae rese ae. Sábado eã mose chō nandeico erasi mbucherō ae. Sábado mose chō Dios mbae resē. Erasi mbucherō aroneate co mose resē, i rei que ererecua mbia je ra. ¹⁵ Jesús que ñee ee ra. —¿Mbaerã ereico ndeturã naa ñooño nde? ¿Sábado mose jēingo ticuas mbui eã mbei embui sacuã nde? ¹⁶ ¿Mañi nande ra cuña ndasi mbucherõã co sábado mose re? Judía sí chō nyeresē. Jē na si. Satanás que embasi cosete ra. Dieciocho años chee. ¿Mañi ae ra erasi mbui eã esi sábado mose re? i que Jesús ñee nda. ¹⁷ Mbia ataque iate que Jesús chee mose ra. Jesús chiao rese abe eyate no. Ae Jesús ucuayãte quia, ũquĩ ngue eireĩ tuchi Jesús chee mose ra.

Mbae eĩ na ño Dios rimba re

¹⁸⁻¹⁹ Jesús que ñeembe mbia je cote ra. —¿Mbae rã ño Dios rimba chã? Mbae eĩ na ño Dios rimba re. Sã mbia mostaza eĩ tiquia no. Ieĩ ñetēte raque etiquia ramo mose. Suri oso quia cote. Ecuasu tuchi chee cote. Nguireĩ uquisa saã nyee erãquiã ndese. Eĩ si chō Dios rimba re. Ũquĩ mĩ ndaque nyii. Nimbeta tuchi cote. Mbae eĩ na.

Levadura rã ño Dios rimba re

²⁰⁻²¹ ¿Mbae rã ño Dios rimba chã? Levadura rã ño Dios rimba re. Sã mbia levadura ñetē mondo mbichae ao ramo mose no. Levadura oso quia mbichae mbuchimatã ja no. Eĩ si chō Dios rimba re, i que Jesús ra.

Eiquesa chumumbi

²² Jesús que oso quia Jerusalén nda. Tiba tiba que oso quia mbia chuchua mbuchesea sea ra. Mbia mbaaquiату quiату. ²³ Emo ngue ñee Jesús je ra. — Sererecua, ¿mbia mii mii ño nda siqui ibate nderese re? i que emo ñee Jesús je ra. ²⁴ Jesús que ñee ee ra. — ¡Eiquesa chumumbi rĩ ño jêso ique jê! “Hue rĩ nda aso se abe ique”, i ja jate raque rae. Tei. Ique ja eã nguia nda re. ²⁵ Emo mose ra eiquesa amatã mbei cote. Emo nda iqueã mbei cote. Eiquesa ra jembuu mbuu raque cote. “Sererecua, eiquesa embuquiata rã ure je”, jenyeraque ra seje cote. Acheẽ nda jêje. “¿Mangue jenda jê nde? Jaëicuayãte se”, ae ra jêje cote. Eiquesa ra ambuquiatayã mbei jêje cote. ²⁶ Jeñee tuchi raque ra seje cote. “Urequiaru que equia nderese. Nde que urembaquiату quia. ¿Mañi ere ra urechira re?” jenyeraque ra seje cote. ²⁷ Acheẽ nda jêje cote. “Jaëicuayãte se. Jêso serecha. Mbae icuã ngue jêsaã saãte quia resê”, ae ra se hue cote. ²⁸ Hue ra jenyeseo seo seje huee cote. Jeñee nda seje. “Abraham ño siquichĩ nderese hue. isaac abe no. Jacob abe no. Dios cheẽ mbuchecuaa ja abe no. Ure chõ urecuchi taicuee a”, jenyera nyeseo seo seje huee. ²⁹ Mangue jenda chooñoa nda ngaẽ ngaẽ Dios rĩchã aque mose. Quiaru quiaru ra equia Dios rese. ³⁰ Ae equiatuáte riqui raque namo nae, ùqui mo nda eñetê na pee cote. Ae equiatuáte riqui raque namo nae, ùqui mo nguia ra siqui ecuasurã tuchi pee cote, i que Jesús ñee nda.

Jesús ia eã tuchi Jerusalén jenda rese

³¹ Aque nyaashĩ mose que fariseos ngaẽ ñee Jesús je ra. — ¡Eso a si jê! Herodes ndeiquia serĩte quia co, i que Jesús mbiirandu ra. ³² Jesús que ñee ee ra. — Eoita rã ño Herodes re. Jêso ñee ee. “Jesús que ñee ndeje ra. ‘Taico mbirĩmbe rã aba checuayã icuã jea jea mbia si. Taico mbirĩmbe rã mbia rasi mbucherõ cherõ. Namó. Isamami abe. Isamami nongue ra ahui erecha cote’, i que Jesús ndeje ra”, jenyera oso Herodes je. ³³ Taicobe jiri namo. Isamami. Isamami nongue abe no. Jerusalén nguia nda sei quia nguia. Sã Dios cheẽ mbuchecuaa mano ja Jerusalén no. ³⁴ Tacheẽ na jêje, Jerusalén jenda. Seya eãte aicochĩ jendese co. Hue jêingo mbia iquia iquia beite hue. Dios cheẽ mbuchecuaa iquia iquia. Dios chimondo abe iquia iquia no. Sã nguira riqui nguire reaquiату mundo ujeoqui re no. “Eĩ tae jendeaquiату”, ae beite rei nguia jêje co. Secheẽ jêisi sereã mbei chõchĩ nguia ã. ³⁵ ¡Aico jendecha a cote jê! Jemae mae eã nda serese cote. “¡Co chi Dios rucucha ru quia co cote jê!” jenyera mose, hue ramo nguia ra jemae serese cote.

14*Jesús mbia rete ruru mbucherõ*

¹ Jesús que oso rei quiaru fariseo rerecua mo nyuchúaa ra. Sábado mose. Fariseos mo ngue chi erea chemi ñemi nda. ² Huee que emo ndasi riqui Jesús je ra. Erete ruru ja que ra. ³ Jesús que ñee fariseos je ra. Embesasa je abe. — ¿Eicuãte se erasi mbucherõ mose sábado mose re? I ere. Jeñee seje, i rei que Jesús ee ra. ⁴ Jesús cheẽ mose que mbia mo ñee eãte ee ra. Jesús que erasi mbucherõ mondo cote ra. ⁵ Jesús que ñee fariseos je ra. — Sã jenimba ticuasuru riqui jaã no, ngoi oso ibicua rie. ¿Sábado mose ra jêsiquã nde? i que Jesús ee ra. ⁶ Fariseos que ñee sereãte echeẽ mose ra.

Jêcuasu ra jêsaã saãchĩ, i Jesús mbia je

⁷ Mbia que erenda turā isirō sirō nguia ra. Ngoi sacuā ererecua ji. Ucuasu raā naa sacuā. Nyebe Jesús ñee nguia ee. ⁸—Jëingo mose fiesta, jerecua turā mo nda jëisirōchĩ jël Mbia chĩcuate mo nda tu arō ndeje cote. ⁹ Fiestacha ra ñee arōte ndeje. “Ehuā na nde. Erenda turā tamondo sequiato je”, i arōte ra ndeje. Ndeireite ra huee cote. Pe quiti jiri ra nembucoi cote. ¹⁰ Jëingo mose fiesta, pe quiti jiri chō jengoi. Erenda turā isirō nocoĩ. † nda fiesta ñee ndeje. “Quiatuchu a jiri, Sequiato. Erenda turā tose”, i sacuā ndeje. † nda mbia mae ja nderese. ¹¹ Ae ererecua saā saā nguia nae, ũquĩ nda siqui eñetē na cote. Ae siqui minguete quia nae, ũquĩ nda siqui ererecuarā cote, i que Jesús mbia je ra.

¹² Fiestacha abe je que ñee cote ra. —Nde fiesta raā mose, “jenyu quiaru serese”, jerechĩ nda mbaecha jiri je jël Erechĩ nda ndenongue je. Erechĩ nda ndequiato tuchi je. Ũquĩ mose ra embuchebi ndeje. Dios quia ra embuchebiā ndeje cote. ¹³ Nde fiesta raā mose, “jenyu quiaru serese”, ere chō mbaecha reā je. Ere chō mbia rasi rasi je. Mbia cuatayā je. Mbia resayā je. ¹⁴ Nde fiesta raā naa mose ũquĩ je, ũquĩ nda embuchebiā ndeje. Dios quia ra embuchebi ndeje, Dios quiato quera si mose. Ũquĩ mose ra ndeya tuchi, i que Jesús fiesta je ra.

Ererecua quiaru mbaecha reā ndese

¹⁵ Ũquĩ andu mose que emo ñee Jesús je ra. —Ababi tuchi siqui Dios rese ae ererecua tuchi mose, i que emo ñee Jesús je ra. ¹⁶ Jesús que ñee ee ra. —Sā emo fiesta raā no. “Jenyu quiaru serese”, i sacuā mbia tubiriā je. Mbia chiurā ngue esaā tuchi ra. ¹⁷ Echiurā quiche ja mose que ngũimba mo mondo cote ra. “Ae je acheē, sã ecuaē quiaru cote”, i que ngũimba je ra. ¹⁸ “Ateē. Aso eā nda se. Serecoteāte chōchĩ”, i ja ja que ra. “Ibi mo ngue aisi ramote ra. Taso rā erea”, i que emo ucheē mondo fiesta je ra. ¹⁹ “Ticusau mo ngue aisi ramote ra. Cinco yuntas. Taso rā erea”, i que emo ucheē mondo no nda. ²⁰ “Seninisirā mo areco ramote co. Nyebe ra asoā quiaru nderese huee”, i que emo ee no nda. ²¹ Erimba que tu nyebi ñee nguerecua je ra. “Erecoteā ja jate que ra. Quiaru eā nda nderese”, i que erimba embiirandu ja ra. Ererecua que paama i ra. Ngaē eā mose erea. Ae ñeembe nguia ngũimba je. “Eso ñee ũquĩ je quiatu no. Mbaecha reā je. Mbia rasi rasi je. Mbia cuatayā je. Mbia resayā je. Ũquĩ ja je echeē. Sã ecuaē quiaru serese”, i que ererecua ra. ²² Emo mose jiri que erimba ru ñee nyebi ee ra. “Acheē ñee ja que ee ra. Co ecuaē ndaque nguia co. Mbia maite que ra”, i que erimba ñee fiesta je ra. ²³ Ererecua que ñeembe ee ra. “Esobe ñee ñee emo je no. Eru ja sechuchua. Quiaru sacuā serese. † nda sechuchua mbitāyā jiri. ²⁴ Ae je acheē nyii, ũquĩ nda quiaruā tuchi serese cote”, i que ererecua ñee asi ra, i que Jesús ñee nda.

Jesús rui aba siqui jei aronea

²⁵ Mbia tubiriā ngue siqui quia Jesús rui ra. Jesús que uba ñee ee ra. ²⁶—Ae nyesecua tuchi quia ngu rese sesi, ũquĩ nda serimba eā. Ae nyesecua tuchi quia usi rese sesi, ũquĩ nda serimba eā no. Ak nyesecua tuchi quia ngũinisi rese sesi, ũquĩ nda serimba eā no. Ae nyesecua tuchi quia ngũirĩ ndese sesi, ũquĩ nda serimba eā no. Ae nyesecua tuchi quia ngōngue ndese sesi, ũquĩ nda serimba eā no. Ae nyesecua tuchi quia nguco rese sesi, ũquĩ nda serimba eā no. Ũquĩ ja ra serimba eā. ²⁷ Ae mano sereāte seriĩ, ũquĩ nda serimba eā no. Ae siqui sereāte quia serui, ũquĩ nda serimba eā no. ²⁸ Sã emo ñee no.

“Sechuchua tasaã na”, i. “¿Manya mbae isiquia ra amumba sechuchua raã sacua nde?” i nyii eao nonde. ²⁹ Sã uchuchua raã naa ndaque no. Hũaẽ tiquia tiquia raque. Hui bei chõ esi cote. Hue mbia iquia iquia ee cote. ³⁰ “Co uchuchua saã saã ndei cose. Saã ja eã mbei chõchĩ nae”, i ra mbia iquia iquia ee. ³¹ Sã soldados rerecua icuã icuã emo je no. Guerra raã serĩ ee. Guerra raã nonde ra ndua ndua. “Ae quiatu que soldados tubiriãte embae sesi ra”, i uchiangui re cote. ³² Nyebe guerra raã eã nguiã ee. Nyebe ucheẽ turã mondo nguiã ee. Isho mose. “¿Nandeico turã ño nyiese jẽ!” i ee. ³³ ¿Eĩ jenyẽ si chõ nguia jẽ! Jendua rã nguia nyii. Jẽ jembae recha ja eã mose, serimbarã eã nda jẽ.

Embiquesa ise quiachamba mose

³⁴ Embiquesa turãte raque. Embiquesa ise quiachamba mose, eicuã tuchi cote. ³⁵ Ñio ye echã aronea cote. Eicuãte cote. Emombo bei chõ cote. Ae eisate riqui, secheẽ jẽñandu, i que Jesús ra.

15

Oveja quiachã je

¹ Mbia icuã ngue Jesús siichã nguia ra. Ae impuestos isi isi quia, ùquĩ abe que Jesús siichã nguia ra. Echeẽ andu sacua. ² Nyebe fariseos ñee icuã icuã nguiã Jesús riĩ. Embesasa abe ñee icuã icuã nguiã erĩ no. —¿Mbaerã Jesús riqui mbia icuã isi turã turã nde? ¿Mbaerã eriqui quiaru erese re? i que equia ñee Jesús mbutereã tuchi ra. ³ Nyebe Jesús ñee nguiã ee. Embaquiato sacua.

⁴ —Sã emo nimba quiachã oveja no. Cien ndei erimba. Co miĩ ngue quiachã ee ra. Aque esi quia quiachã je requia aque. Eataque recha. Noventa y nueve recha. ⁵ Quiachã je rea mose, sui cote. Equiaama cote. Eya tuchi erese cote. ⁶ Tu uchuchua cote. “Quiatuchu rã”, i uquiato je cote. Nguesenda je abe no. “Quiachã je que atea cote ra. ¿Sã jẽ! Jẽya tuchi serese cote”, i que uquiato je ra. ⁷ Tacheẽ nyecua jẽje. Quiachã je mo nyebi mose, Dios iate riqui co. Mbia icuã tu mose ee, Dios iate riqui erese co. Ae uturã saã saã nguia nae, ae huũcuã secha sereãte quia nae, ùquĩ ndese quia Dios ia eãte re.

Mbae isiquia quiachã je

⁸ Sã cuña mo mbae isiquia diez quereco no. Sã aque miĩ quiachã ndaque ee no. Lamparina ngue emendi eresae sacua nda. Sã uchuchua tii no. Mbae isiquia rea chee. ⁹ Ereare que ñee uquiato ja je ra. “Quiachã je que atea cote ra. ¿Sã jẽ! Jẽya tuchi serese cote, i que uquiato je ra. ¹⁰ Aico ñee nyecua jẽje a. Mbia mo hui mose huũcuã si, ángeles ibatenda ia tuchi erese, i que Jesús ra.

Ae ngu secha

¹¹ Jesús que ñeembe ee ra. —Sã ameĩ mo eririĩ nyeremo no. ¹² Eriiriĩ ndiquiĩ que ñee ngu je ra. “Paba, mbae isiquia ataque embu rã se sembaerã. Ndemano nonde”, i que ñee ngu je ra. Ae eru mbae isiquia mbuchecha nguiã ee. Mondo eo cote. ¹³ Isamami nongue que eririĩ nduinda umbae rerecoquiato ra. Ae oso nguiã isho cote. Ngu recha. Huee que mbae isiquia umbae mumba chooño ja ra. Mbae icuã ndibishorõ. ¹⁴ Hue jenda mbia chiũ que uate cote ra. Ameĩ ndiriĩ abe riãcuã nyee que ra. Umbae mumba chooño jare. ¹⁵ “Taquiẽ quiẽ rã oso ererecua mo je”, i chee. “Teasu socoli esaarõ na serimba”, i chee ererecua mo ee. ¹⁶ “Teasu chiũ au chõ mbichĩ ira a. Seriãcuã tuchichĩ”, i chee ameĩ ndiriĩ. Emo ngue embuquiaruã mbei ra. ¹⁷ “Paba rimba chichĩ quiaru turãte sechuchua huee, seriãcuã mose aa. ¹⁸ Tasobe rei Paba rea. Tacheẽ ndei oso ee. ‘Seicuã tuchite que ndeje curi ra, Paba. Paba

ibatenda je abe no. ¹⁹ Seririĩ ere eã seje cote. Nderimbarã taico cote', tae rã oso Paba je", i que ndua ndua uchiangui re cote ra. ²⁰ Ngu rea que esi cote ra. Isho ereco mose que eru mae erese ra. Amei ia eã tuchi que eriqui erese ra. Amei ngue oso uchã nguiĩ ndese oo ra. Equiaama. Eritii riite no. ²¹ Ngu je que eririĩ ñee ndei cote ra. "Seicua tuchite que ndeje curi ra, Paba. Paba ibatenda je abe no. Seririĩ ere eã seje cote", i rei que ngu je ra. ²² Eru que ñee ngũimba je cote ra. "Eirao turã mo emondo seririĩ je. Eiyaorã abe mo emingue ee. Anillo mo abe emingue eo rese. ²³ Ticuasú quira mo jẽquishĩ echo je. Nandequiaru tuchi erese. Fiesta nandesaã ee. ²⁴ Seririĩ ngue mano naanguia oso curi resẽ. A eru quera si raanguia seje a. Quiachã tuchi que oso serecha ra. A erube seje a cote", i que amei ngũimba je ñee nda. Eya tuchi cote. Nyebe fiesta raã nguiã nguiĩ je.

²⁵ Amei ndiĩ nongue que siqui úcoo ra. Ngasẽ ndaque u quia uchuchúaa cote. Tõotõ i que ehandu ra. Mbia cheĩ cururi abe andu. ²⁶ Ñee ngue erimba mo je ra. "¿Mbaerã eriqui toõtõ i re? ¿Mbaerã mbia riqui nyuruqui re?" i que amei ndiĩ ndiqui ra. ²⁷ Erimba que ñee ee ra. "Ndenongue que tu ngasẽ nderu je ra. Nyebe ticuasú iquia nguiã ee", i que erimba ñee ee ra. ²⁸ Ae enongue paama i nguiã ngu je. Ique sereã nea ngu chuchúaa. Ae eru tu nguiã usẽ ñee ee taicuee. "Eique rã mae ndenongue rese", i rei que eru ee ra. ²⁹ Eriĩ ngue ñee ngu je ra. "Cosete que aico rei quiei quiei ndeje. Ndecheẽ ngue amumba mumba eãte quia emo mose. Mbae mo ngue ereiquia eã mbeite seje. Sembae fiesta raã sacua sequiato rese. ³⁰ Ae tu ramo nderiĩ, ¿mbaerã ticuasú mo ereiquia ee re? Umbae que emumba chooño oso curi resẽ. Siqui siqui cuña icua ndese. ¿Mbaerã ereico fiesta raã ee re?" i que eririĩ ngu je ra. ³¹ Eru que ñee echeẽ mose ra. "A ereico beite serese a resẽ, Echo. Sembae ja chõ nembraerã ndesẽ. ³² Ndenongue quiatu que quiachã nandesĩ resẽ. Mano naanguia oso nandesĩ. A eru si quera raanguia nande je a. Nyebe fiesta nandesaã ee. Nandeya tuchi rã erese", i que eru nguiĩ nongue je ra, i que Jesús mbia je ra.

16

Ererecua rimba mo icoquiātu

¹ Jesús que ñee uchimbacquiātu je ra. —Sã ererecua mo mbaechate riqui no. Erimba mo ngue embae saarõ ja quia ra. "Nderimba que nembae mbuquiachã quiachã nguia ra", i que mbia mo ererecua mbiirandu cote ra. ² Ererecua que ñee ee ra. "¿Mbaerã mbia riqui ñee nderĩ seje re? ¿Cuentas esaã saã mbia mbae ja jẽ! Sembae raarõsa eã nda nde cote", i que ererecua ngũimba je ra. ³ Erimba que ndua ndua uchiangui re cote ra. "¿Mañi ae ra sequia sererecua se mombo mose re? Sequirãcuã neate quiei quiei sacua ndesẽ. Seireite ache ache i mbia je. ⁴ Ūqui ño nda asaã ee nda. I nda mbia seisi turã uchuchúaa sembae eã mose", i que erimba uchiangui re ra. ⁵ Ae deber i quia ererecua je, ũqui je que erimba ñee nda. Co mii mii je. "¿Manya deber ere sererecua je re?" i que erimba emo je ra. ⁶ "Cien latas de aceite que deber ae ee ra", i que erimba je ra. Erimba que ñee ee ra. "Nembae cuenta nandemombo chõ. Emo nandesaã asi. Cien eã nda cote. Cincuenta achõ ño nda cote", i que erimba ee ra. ⁷ Ae deber i quia ererecua je, ũqui mo je que erimba ñee no nda. "¿Manya deber ere sererecua je re?" i ee. "Cien bolsas de trigo que deber ae ee ra", i que erimba je ra. Erimba que ñee ee ra. "Nembae cuenta nandemombo chõ. Emo nandesaã asi. Cien eã nda cote. Ochenta achõ ño nda cote", i que erimba ñee ee ra. ⁸ Ererecua que jirandu erese cote

ra. “Serimba aracua chõ eriquichĩ nde no”, i que ererecua ra. Mbia ibi jenda aracua tuchi chõchĩ Dios quiato si. ⁹ Acheẽ tuchi quia jẽje co. iMbae isiquia jemondo mondo quia ibatenda je jẽ! Eĩ nda jẽquiato jiri. Eĩ nda Dios jẽisi quiatu turã ibate jembae ua mose. Huee ra jẽingo bei cote.

¹⁰ Ae mbae ñetẽ saarõ turãte quia, mbae tubiriã abe ra esaarõ turã nguia. Ae mbae ñetẽ saarõ turã eãte quia, mbae tubiriã abe ra esaarõ turãya nguia no. ¹¹ Jẽ jembae mondo turã eã mose Dios je, Dios ra mbae turã mondo eã jẽje ibate. ¹² Jẽ Dios mbae raarõ turã eã mose, ¿aba quia ra mbae mondo jẽje jembaerã tuchi cote re? ¹³ Co mi erimba siqui aronea ererecua nyeremo ndese. Ererecua nyeremo mose, huee ra erimba nguerecua nongue ucuãya. Ererecua nongue ra ebite. Ae ndua beite quia mbae isiquia rese nae, ùquĩ siqui aroneate Dios rese. Ae siqui beite quia Dios rese nae, ùquĩ ndei ndua eã jiri mbae isiquia rese, i que Jesús ra.

¹⁴ Fariseos que chi Jesús cheẽ andu ja ra. Mbae isiquia quiato tuchi que ùquĩ nda. Nyebe ñee icuã nguã Jesús cheẽ mose. ¹⁵ Nyebe Jesús ñee asite nguã ùquĩ je. —Jẽ nguiarei jeturã jembuchecua tuchi mbia résaa. Dios quiarei jeñiangui renda icua tuchi quia co. Ae eturã abareãte riqui mbia je nae, ùquĩ Dios ucuãyate quia co.

Dios cheẽ nda io ja

¹⁶ Moisés chimbesa que mbia mbaaquiato quiatu nyii ra. Dios cheẽ mbuchecuaa chimbesa abe que mbia mbaaquiato quiatu nyii ra. Juan tu nonde. Juan ngue Dios cheẽ turã senei senei cote ra. “Mbia rerecuarã tuchi ra Dios cote”, i bei que Juan nguia ee cote ra. Nyebe mbia riqui nguã ñee. “Dios rimba ra se”, i tuchi mbia quia ã cote. ¹⁷ Ibei ua arõte quia co. Ibi abe ua arõte quia co no. Embesa ji Dios cheẽ nguia ra uayã mbei. Io ja ra.

Eicuãte ngũinisi mombo mose

¹⁸ Mbia ngũinisi mombo mose, ngũinisirã mo nderequia mose, eicuã tuchi ùquĩ. Adulterio, i que ùquĩ je ra. Ae eru mombo, emo aque rerequia mose, eicuãte ùquĩ abe no.

Mbaecha mo oso tata cuasu

¹⁹ Sã mbaecha tuchi mo ndiqui no. Huĩrao turã mingue mingue bei. Huĩrao nininya mingue mingue bei. Fiesta que esaã saã mbei quia ra. Umbae mbae isiquia mumba chooño mbae rese. ²⁰ Sã mbaecha reã mo abe riqui no. Lázaro, i que ee ra. Erete reechu echu que ra. Huee que Lázaro riqui chĩ mbei ngoi ra. Mbaecha chuchua taronda jii. ²¹ Lázaro riãcuã ngue ñee mbei quia ra. “Mbaecha chiu rire nda au rã ña”, i tuchi que equia uchiangui re ra. Ñooño ngue ngaẽ ngaẽ nguia erete reechu rere rere ra. ²² Lázaro mbaecha reã ngue mano cote ra. Angeles que equerao mbae turãsa Abraham ndea ra. Mbaecha abe que mano nda. Mbia que echati ra. ²³ Mbaecha que oso tata cuasu cote ra. Isho que mae Abraham ndese ra. Lázaro abe. ²⁴ Sã ñeemombo mombo Abraham je no. “Paba Abraham, ndeya eã jiri serese ae. Serasite aico tata rëndii a. Lázaro embu rã. Sã o mbia rã i je sechuru mbia sacuã”, i rei que mbaecha ñeemombo Abraham je ra. ²⁵ Abraham ngue ñee ee cote ra. “Mbae tubiriãte que nembae nyii resẽ. Lázaro quiatu que mbae rasi saã tuchi quia nyii ra. A eriqui turãte a cote, nde nderasi rasi mose cote. ²⁶ A jenda mo oso aroneate erasa ndeje hue. Hue jenda abe tu aroneate erasa ure je aa no”, i que Abraham mbaecha je ra. ²⁷ Mbaecha que ñeemombobe Abraham je ra. “Lázaro chõ emondo Paba chuchúaa no, Abraham. ²⁸ Hue

senongue cinco chi hue. Sã Lázaro si ñee ee. Embiirandu. †nda ecuaẽ eã mbae rasi raã a”, i rei que mbaecha ñee Abraham je ra. ²⁹ Abraham ngue ñee ee ra. “Ndenongue Moisés chimbesa rerequia hue. Dios cheẽ mbuchecuaa cheẽ abe rerequia hue no. Sã ũquí mumbayã”, i que Abraham ee ra. ³⁰ Mbaecha que ñeembe Abraham je ra. “Embesa ji rerequia raque. Mano je oso mose ñee ee, aque cheẽ nguia ra emumbayã cote. Huiĩcuã nda esecha cote”, i rei que mbaecha ñee Abraham je ra. ³¹ Abraham ngue ñee ee ra. “Ndenongue Moisés chimbesa mumba mumba mose, mano je cheẽ abe ra emumba no. Eraaque mo quera si je ñee mose ee, aque cheẽ abe ra emumba no”, i que Abraham ñee mbaecha je ra, i que Jesús ra.

17

Mbae icuã nda nandesã uquiachĩ emo je

¹ Jesús que ñee uchimbaaquiato je ra. —Mbae icuã nguiarei siqui bei tuchi mbia mbũcuã nonde. Ae ñee nguia mbia je nae, “mbae icuã esaã” i nae, eicuã tuchi chõ ũquí nde. Ae “mbae icuã esaã” i nae, ũquí nda mbae rasi saã tuchi cote. ² Ae ra mbae icuã saã uquia seicuasa mo je nae, ũquí nda mbae rasi saã tuchi cote. Ũquí nda aba mombo chõ ama ndisa ye nyii re chã. Sita resebe ecua ji mondo. †nda mbae icuã naa uquia eãte rei seicuasa je. ³ ¡jẽingo chooñoa ño nguia jẽ! Nderesenda icuã mose ndeje, echeẽ ño ee. “Nandeico turã ño”, ere ee. Hui mose huiĩcuã si, eicuã si etesarei chõ nde. ⁴ Sã nderesenda mbae icuã naa naa siete veces ndeje no. Sã ñee ndaque siete veces ndeje no. “Mbae icuã nda asaã eã ndeje cote”, sã i raque ndeje no. Eicuã si etesarei chõ, eicuã mbei bei raque, i que Jesús ñee ee ra.

Jẽ Dios icua jiri mose, eĩ nda mbae mo jeñee mumba eãte rei

⁵ Jesús chimbaaquiato que ñee ee ra. —Dios eicua tuchi rã ure je, i que ñee Jesús je ra. ⁶ Jesús que ñee ee ra. —Jẽ Dios icua jiri mose, i nda mbae mo jeñee mumbayãte rei. †nda jeñee ndei ira je. “Nde ae echisiqui. Nde ae si echitiquia ama ndisha ite re”, i ira je. †nda ira jeñee mumbayãte rei, jẽ Dios icua jiri mose.

Dios rimbachõ ño nande re, jenyẽ chõ nguia

⁷ Sã emo nimba mo ndiqui bei turuquia rĩ ticuasu raarõ arõ no. Ecuasẽ mose tuchúaa, ¿mañi nda ererecua ñee jei ee re? “Equiaru rã”, i jei ee re. ⁸ Tei. I jei eã nda ee. “Sechiurã esaã naa seje. Sequiaru eteaquiato rã nyii. Aquere quia terequiaru nde”, i chõ nda ererecua ee. ⁹ Ererecua ra gracias i eã ngũimba je. Erimbachõ ño ñene. ¹⁰ Eĩ si chõ jẽ no nde. Dios rimbachõ ño jẽ no nde. Ae rĩ Dios riqui ñee jẽje, ũquí naa ja mose, ¡jẽingo mingue chõ nguia ee jẽ! “Ae rĩ Dios ñee nande je nae, ũquí mii ño ngue nandesã nda. Erimbachõ ño nande re”, jenyẽ chõ nguia ico mingue, i que Jesús ra.

Jesús mbia leproso ata mbucherõ

¹¹ Jesús que ngata si Jerusalén icha rui ra. Galilea rĩ ngue ecoi quia ra. Samaria rĩ abe que ecoi quia ra. ¹² Jesús que ngasẽ sucha tubiriã moo nda. Hue que mbia rasi mo chi ee ra. Diez que ra. Eire rasi ja que ra. Lepra, i que ũquí mbia rasi je ra. Erasi que chi icúe isho jiri Jesús si ra. ¹³ ũquí mbia rasi que ñeemombo mombo Jesús je ra. —¡Jesús! ¡Mbia mbaaquiatusa! Urembucherõ na ae, i que ñeemombo mombo ee ra. ¹⁴ Jesús que mae erese cote ra. Ñee ngue ee ra. —Eno. Jẽso jendete reacquia sacerdotes je, i que Jesús ee ra. Ecuata mose chõ ngue nyerõ ja ra. ¹⁵ Ucherõ ndese mae mose que co mii ndu nyebi

ñee Jesús je ra. Eya tuchi que ñeemombo mombo Dios riñ nda. ¹⁶ Ngoi que ngũĩã ndese Jesús resa quitu ra. Nyibi que u ñee ee ra. Gracias i tuchi que Jesús je cote ra. Samaria jenda que ae ra. Judío eã ngue ra. ¹⁷ Jesús que ñee nda. — Eatate que ambucherõ. ¿Ma eataque ma nde? ¿Ma nueve mã nde? Nyebiã ñochĩ ecuaẽ gracias i seje. ¹⁸ Co miĩ tuchi chõ tuchi nyebi gracias i Dios je co. Judío eã ndaque, i que Jesús ra. ¹⁹ Jesús que ñee erasi je cote ra. —Ehuã. Eso cote. Nde que seicua ra. Nyebe arembucherõ nguiã, i que Jesús ee ra.

Mbia chiangui re quiatu Dios riqui nguiã mbia rerecurã

²⁰ —¿Manosete ra Dios ru íbii mbia rerecurã tuchi re? i que fariseos ñee Jesús je ra. Jesús que ñee ee ra. —Mbia ra mae eã erese. ²¹ “¡Aa chõ Dios riqui mbia rerecurã jê!” iã ndae. “¡Pee chõ Dios riqui mbia rerecurã jê!” iã nda eno. Mbia chiangui re quiatu Dios riqui nguiã mbia rerecurã, i que Jesús ra.

²² Jesús que ñee uchimbaaquiatu je cote ra. —Namo jiri ra jẽ seosei osei setiã mose cote. “Jesús nda siqui mbirĩ na nanderese chã”, jenyere rei nda re. ²³ “Hue Cristo riqui hue”, ichõĩño nda mbia jêje serĩ. “Pe eriqui pe”, ichõĩño nda jêje no. “Nya” jenyechĩ nda ee jê. Ñeeñoõno ndae. ²⁴ Sechecuayã nguiã ra achuã. Mbia ra mae ja quiatu senininya rese seru mose. Sã mbia riqui mae jate ama pirirã i rese no. Eĩ ae quia ra u mbia mumae ja. ²⁵ Sechube nonde ra mbia icuã tuchi seje. Mbae rasi ra asaã tuchi rã. Ae siqui namo ã mbia, ùquĩ nda seririrõ tuchi rã. ²⁶ Sã Noé mosenda mbia siqui sereã tuchi Dios rese no. Eĩ si ra mbia siqui sereã Dios rese sechu nonde no. ²⁷ Sã Noé mosenda mbia quiaru chooño no. Ndua rocoĩ Dios rese. Sã ngũinisirã nderequia chooño no. Sã mbae raã ñooño ndua rocoĩ Dios rese no. Sã Noé ique chee arca ye no. Sã ama ndicuas tu cote no. Sã mbia mano ja no. ²⁸ Sã Lot mosenda abe mbia no. Sã quiaru chooño no. Sã mbae isi isi chooño no. Sã mbae eĩ tiquia chooño no. Sã uchucharã naa ñooño no. Sã mbae raã ñooño no. Ndua rocoĩ Dios rese no. ²⁹ Sã Lot usẽ nyee hue si cote no. Sã Dios tata mbu ibate si cote no. Sã Sodoma jenda oquei ja aque mose no. ³⁰ Eĩ si ra mbia mbae raã ñooño. Seru mose chee. Ndua rocoĩ serese. ³¹ Emo siqui mose taicuee se tu mose, ique eã nda uchuchua umbae rerecoquiatu. Ae siqui úcoo, nyebiã nda u uchuchua no. ³² ¡Lot ninisi rã nda jẽngochĩ jê! ³³ Ae ngueteãte quia ngueco rese nae, ereco ra quiachã esi. Ae ngueteã eãte quia ngueco rese nae, aque reco quia ra quiachãesi. ³⁴ Sechu mose, aque isa ra nyeremo chi uque quisa ye. Co miĩ nda arao. Enongue ra siquichõ. ³⁵ Cuña nyeremo nda chi mbua tocho no. Co miĩ nda arao. Enongue ra siquichõ no. ³⁶ Mbia nyeremo nda chi úcoo no. Co miĩ nda arao. Enongue ra siquichõ no, i que Jesús ra. ³⁷ —¿Mangue ra ùquĩ mangue re, Jesús? i que echimbaaquiatu ra. Jesús que ñeembe ee ra. —Ae rĩ mbae raaque riqui chi nae, huee ra urubu choi ja tuchi, i que Jesús ra.

18

Eru cheecha ñee chũbe ibe ererecua mo je

¹ Jesús que ñee uchimbaaquiatu je ra. —Sã mbia riqui ñee mbei Dios je. Sã tesareĩã mbei ñee Dios je. ²⁻³ Sã eru cheecha mo ndiqui no. Oso chũbe ibe ñee ererecua je no. “Ae sembae queroco nae, sã aque sembae meembe seje”, i chũbe ibe ererecua je. Dios quiatoã ndaque ererecua. Mbia quiato biãte raque aque ererecua. ⁴⁻⁵ Ererecua que eru cheecha cheẽ ñanduchõ nyii ra. Eru cheecha que ñee i i tuchi ee ra. Ererecua que ndua chee uchiangui re ra. “Ari riqui ñee chũbe ibe tuchichĩ seje co. Echeẽ tamumbayã na”, i chee

que ererecua ra, i que Jesús ñee uchimbaaquiatu je ra. ⁶ Ñeembe que ee ra. —Sã ererecua ari cheẽ mumbayã nyee no. Ererecua icuãte raque. ⁷ Eĩ nda Dios uquiato cheẽ mumbayã nõ. Dios quiato riqui ñee ñee mbei Dios je co. Arõ mose. Isa abe. Dios riqui uquiato ucuãyãsa riisu isu raque co. ⁸ Dios ra uquiato cheẽ mumbayã nyee cote. Se tube mose íbii manya sequiatio ra chi bei ñee Dios je reae, i que Jesús ra.

Mbia nyeremo ñee Dios je

⁹ Ucuasu raã naasa mo ngue chi Jesús je ra. Mbia ataque ririrõte que equia ra. Mbia ataque isi teã teã mbei. Nyebe Jesús ñee nguiã ùquĩ je. ¹⁰ —Sã mbia nyeremo nyoĩ ique Dios chuchua no. Ñee Dios je no. Co mii ngue fariseo ra. Enongue que impuestos isi isi quia ererecua mbaerã nda. Mbia mbĩrĩ irĩsa que ae ra. ¹¹ Fariseo que ñee ndei Dios je ra. “Dios, seturãte se. Mbia icuã na eã ño se re. Co mbia mbĩrĩ irĩsa rã eã ño se re. Mbae mbuquiachãsa eã ño se no nde. Acheẽ ñooño eã ño se re. Emo ninisi rese aicoãte se. Mbia ambĩrĩ irĩrĩ ãte quia co. ¹² Aquiaruã mocoĩte quia ndua bei nderese co. Diezmos amee mee mbeĩte quia ndeje co”, i rei que fariseo ñee Dios je ra. ¹³ Aba mbĩrĩ irĩsa que chĩ isho ra. Uãquĩ ngue embucheseco ibi quiti ra. Uchiã ngue eisi ñee Dios je ra. “Ndeyayã ño serese, Dios. Mbae icuã asaã saã mbei chõchĩ nguia co. Seyayã tuchichĩ seicuã ndese”, i que ñee Dios je ra. ¹⁴ Tacheẽ nyecua rã jẽje. Dios que aba mbĩrĩ irĩsa cheẽ isi turã nda. Ico minguete quiatu nguiã ñee ñee Dios je. Fariseo quiatu ngue uturã saã saã mbeite nguiã ñee Dios je. Nyebe Dios echeẽ ñianuate nguiã. Ae ucuasu saã saã nguia nae, ùquĩ nda Dios isiãte. Ae ico tochei quia Dios je, ùquĩ nguiatu ra Dios isi, i que Jesús ra.

Jesús mbia riirĩ isi turã turã

¹⁵ Mbia que nguiirĩ ngurucuaẽ cuaẽ nguia Jesús je ra. Jesús oco oco sacuaẽ erese. —¿Mbaerã jendiirĩ jendu quia co re? i rei que Jesús chimbaaquiatu ñee mbia je ra. ¹⁶ Jesús quiatu que ñee nda. —Tei. Jẽsecha. Sã nguiirĩ ndurucuaẽ seje. Eĩ ño Dios rimba re. Mbia riirĩ na. Ucuasu raã naa eã. ¹⁷ Mbia riirĩ na ño jẽingo Dios isi turã. Eĩ jenyẽ mose, Dios rimba tuchi ra jẽ cote, i que Jesús ra.

Acuanĩndu mbaecha mo ñee Jesús je

¹⁸ Ererecua mo ngue ñee Jesús je ra. —Mbia mbaaquiatu turãte nde. ¿Mañi ae ra se siqui bei nonde ibate re? i que ererecua ñee Jesús je ra. ¹⁹ Jesús que ñee ee ra. —¿Mbaerã ereico eturã i seje re? Dios mii ño eturã ndesẽ. ²⁰ Dios cheẽ ereicuate resẽ: “Emo ninisi rese ra ereicochĩ. Mbia mo nda ereiquiachĩ no. Mbae ra erembuquiachãchĩ. Erecheẽ ñooño chĩ nda emo nii. Ndeturã ño nderu je. Ndeturã ño ndesi abe je”, i que Dios cheẽ nda, i que Jesús ñee ererecua je ra. ²¹ Ererecua que ñee ndei Jesús je ra. —Ùquĩ ngue amumbayã ja bei quia ra. Señetẽ mosenda bei, i rei que ererecua ra. ²² Jesús eandu mose que ñee ee ra. —Mbae mii mo abe eresaã eãte. ã abe esaã. Nembae emondo mondo ja mbia mbaecha reã je. Nde ùquĩ naa mose, mbae tubiriã nda nde, ndeico mose ibate. Nembae mondo ja mose mbaecha reã je, serui eico cote, i que Jesús ee ra. ²³ Ererecua Jesús cheẽ andu mose que echosoi oso serĩte cote ra. Mbaecha tuchite quiatu ngue ae re. ²⁴ Jesús que mae mbaecha ia eã ndese ra. Ñee ngue mbia je cote ra. —Mbaranguiatu ãte mbaecha je ngasẽ sacua ibate Dios rese. ²⁵ Sã ticuas mo ndiqui oso aroneate aguja sorei rĩ no

nae. Eĩ si chõ mbaecha no nde. Oso aronea ibate Dios rese, i que Jesús ra. ²⁶—¿Aba quia ra oso Dios rea re no? i que mbia Jesús je cote ra. ²⁷Jesús que ñee ee ra. —Ae mbia saã aroneãte quia nae, Dios mii ño nda esaã, i que Jesús ee ra. ²⁸Pedro que ñee Jesús je ra. —Ure que urembae uresecha ja ra. Siqúi sacua nderui, i que Pedro ee ra. ²⁹Jesús que ñee ee ra. —Emo umbae recha ja mose Dios rĩ, Dios ra esibishorõ tuchi ee. Ae uchuchua secha. Ae ngu secha. Ae usi secha. Ae ngõngue secha. Ae ngũinisi secha. Ae nguiĩ secha. ³⁰Ūquí mbae ja ra Dios sibishorõ tuchi. Ibiĩ mbia reco bei mose. Aquere ra Dios emingo bei ibate cote, i que Jesús ra.

Mbia ra seiquia, i si Jesús

³¹Jesús que ñee icúee uchimbaaquiatu doce je ra. —Co nandeso quia Jerusalén co. Ae Dios cheẽ mbuchecuaa mbesa mbesa quia serĩ nyii nae, ũquí nda io ja cote. ³²Mbia ra semee judíos eã je cote. Mbia ra secheẽ naa naa. Ñee icua tuchi ra seje. Ñinimbu nimbu ra serese. ³³Seiruã nua ndae. Seiquia ra cote. Tres nyaashĩ mose ra aquera si, i que ñee ee ra. ³⁴Echimbaaquiatu que echeẽ icuayãte ra. —¿Mbae rĩ eriqui ñee nande je re? i que nyue ra.

Jesús eresayã mo mbucherõ Jericoo

³⁵Jesús Jericó rurubi mose que eresayã mo ndiqui ee ra. Ñeenda jie que eñi ache ache i mbia je ra. ³⁶Eresayã ngue mbia tubiriã quicoi chandu ra. —¿Mbae ere? i que eresayã emo je ra. ³⁷—Co Jesús coi quia co. Nazaret jenda coi quia co, i que emo eresayã je ra. ³⁸Eresayã ngue ñee mombo ra. —¡Jesús! ¡David rucucha! ¡Ndeya eã ño serese jê! i que eresayã ñee Jesús je ra. ³⁹Ae rane nyoĩ quia, ũquí ngue ñee ndei eresayã je ra. —¡Equiriri chõ jê! i rei que ee ra. —Jesús, jndeya eã ño serese jê! i bei bei que Jesús je ra. ⁴⁰Jesús que tiba cote ra. —Eresayã jendu rã, i que mbia je ra. Eresayã ngue oso Jesús rĩchã cote ra. ⁴¹—¿Mañi ae ra ndeje re? i que Jesús ñee ee ra. —Seresa embuturã na, Sererecua, i que eresayã nda. ⁴²Jesús que ñee ee ra. —Nderesa que cote ra. Seicuate quiatu ngue se re. Nyebe arembucherõ nguiã, i que Jesús ee ra. ⁴³Aque mose tuchi que eresayã ndesa turã cote ra. Mae turã ngue cote ra. Jesús rui que esi quia cote ra. Ñee turã turã tuchi que equia Dios rĩ cote ra. Ae mae erese nae, ũquí abe que ñee turã ja quia Dios je cote ra.

19

Taico nderese, i Zaqueo Jesús je

¹Jesús que ngasẽ Jericoo cote ra. Sucha tubiriã ite rĩ ngue esi quia ra. ²Mbia mbaecha mo ngue siqúi ee huee ra. Zaqueo, i que ee ra. Aba mbiĩrĩ irĩsa que ae ra. Impuestos isi isiquia rerecua que ae ra. ³—Jesús rese tamae. Jesús taicua rã, i rei que Zaqueo ra. Mbia tubiriã ngue Jesús chatite esi ra. Zaqueo jua tuchi que ra. Nyebe mae aroneate nguiã Jesús rese. ⁴Zaqueo que oso uchã Jesús nonde ra. Nyui que oso ira mo ñi nda. Jesús ucua rese mae sacua. ⁵Jesús que ngasẽ Zaqueoqui re cote ra. Soboiba que mae erese ra. —Equichi, Zaqueo. Taso ndechuchua nderese, i que Jesús ee ra. ⁶Zaqueo que nguichi asi u cote ra. Eyate que Jesús rerao uchuchúaa ra. ⁷Mbia que ñee ñee tuchi Jesús rĩ cote ra. —¿Mbaerã Jesús si quia mbia icua nyuchúaa aque re? i tuchi que mbia ñee nda. ⁸Zaqueo que juã ñee Jesús je ra. —Sererecua, tacheẽ ndeje. Sembae tachisia nyibite rĩ mondo sacua mbia mbaecha reã je. Ae asirõ ñoõño

mbia si nae, ũquí tambuchebibe ee. Eata tambuchebibe ee, cuatro veces, i que Zaqueo Jesús je ra. ⁹ Jesús que ñee ee cote ra. —Arerirō ngue mbae icuã si namo nda. Judiotē quiatu nde re. ¹⁰ Quiachã je requia chō achu nguiã ibate si co. Quiachã je mingo bei sacuã abe chō achu nguiã ibate si co no, i que Jesús ra.

Mbae isiquia jembaata, i ererecua ngũimba je

¹¹ Mbia que Jesús cheẽ ñandu turã nguia ra. Jerusalén ndurubite que ehoi quia ra. —Mbia rerecuarã ja ra Jesús cote reae, i rei que mbia quia ndua ndua ra. Nyebe Jesús ñee nguiã ee. ¹² —Sã mbia mo ndiqui oso ibimo isho tuchi no. “Mbia rerecuarã eico nde cote”, i nonde mbia pe jenda ee. Aquere ra eru mbia rerecuarã cote. ¹³ Sã ñee ja ngũimba je oso nonde no. Diez rei erimba. Mbae isiquia atate que embuchao chao ngũimba je ra. “Ã mbae isiquia jembaata ata oso quia. Sechu mose chee”, i que ngũimba je ra. ¹⁴ Sã hue jenda mbia aque ucuãyãte no. Comisión ngue emondo ra. “Aque urebiãte urererecuarã”, i rei que comisión mondo ra. ¹⁵ Gobierno ngue emi mbei chō ererecuarã nda. Nyebe uba bei u nguiã uchuchua cote. Ngũimba je que ñee cote ra. Ũquí diez. Ae je eriqui mbae isiquia mondo nae, ũquí. “¿Sechimee mbae isiquia jembaata ata rei re?” i jaaja que ngũimba je ra. ¹⁶ Erimba mo ngue ñee ee ra. “Ae. Aque mi ngue ereme ndei seje nyii, ambaatate que se cote ra. Diez que cote ra”, i que nguerecua je ra. ¹⁷ Ererecua que ñee ee ra. “Coche ñene. Serimba turãte nde. Mbae ñetē ngue eresaã turãte quia secheẽ nguire ra. Nyebe mbae cuasu tamondo ndeje cote. Diez pueblos rerecuarã nda nde cote”, i que ererecua ngũimba ñiinda je ra. ¹⁸ Erimba nongue que tu ñee ee cote ra. “Aque mi ngue ereme ndei seje nyii, ambaatate que se cote ra. Cinco que cote ra”, i que nguerecua je cote ra. ¹⁹ Ererecua que ñee ae abe je no nda. “Eno. Cinco pueblos rerecuarã nda nde cote”, i que aque ngũimba je ra. ²⁰ Erimba nongue que tu ñee ee cote ra. “Co nembae mbae isiquia co. Tiru ye que areco bei ra. ²¹ Sesiquichete quiatu ngue ndesi re. Erequeteãte quiatu nguiã mbae rese. Ndechitiquia eã abe ereishao shaote quia co. Nyebe nembae mbae isiquia areco quiatuchō ño nguiã ndeje”, i que aque nguerecua je ra. ²² Ererecua que paama i tuchi ñee ee ra. “Serimba icuã tuchi chĩ nde re. Nde sí chō erecheẽ nguiã sembiirandu. ‘Nembae que ambaata eãte ra’, ere chōchĩ. ‘Areco quiatuchō ño nguiã’, ere chōchĩ. Se ngueteã mose mbae rese ndeje ¿mbaerã secheẽ eremumba re? ²³ ¿Mbaerã sembae mbae isiquia eremondo eã banco re? f nda ñimbaata jiri rei seje”, i que ererecua ñee asi aque ngũimba je ra. ²⁴ Ae chi huee, ũquí je que ererecua ñee nda. “Ae sembae quereco chooño nguia nae, jēsirō na esi. Ae diez quereco quia nae, aque je jemondo”, i que ererecua ra. ²⁵ Mbia que ñee ererecua je ra. “¿Mbaerã nda re? Eatate ae resē. Diez que ae resē. ¿Mbaerã nda emo abe eremondo ee re?” i que mbia ñee ererecua je ra. ²⁶ Ererecua que ñee ee ra. “Ae embaete nae, mbae tamondobe ee. Ae mbae quereco ãte quia nae, embae tasirō ja esi. ²⁷ Seucuãyãsa jendu ja rã. Ae ñee nguia seriĩ. ‘Aque urebiãte urererecuarã’, ae i quia seriĩ. Ũquí jendu ja. Ũquí jēiquia ja sésaa”, i que ererecua ra, i que Jesús ñee mbia mbaaquiatu ra.

Jesús ngasē Jerusalén

²⁸ Jesús cheẽ jare que ngata si Jerusalén icha rui ra. ²⁹ Jerusalén ndurubite que ehoi ngasē nda. Betfágé, i que hue sucha je ra. Betania, i que hue sucha erurubinda je no nda. Ibi ibate abe que chĩ huee ra. Monte de los Olivos, i que ee ra. Hue si que uchimbaaquiatu nyeremo mondo cote ra. ³⁰ —Aichi súchaa

chõ jẽso rã. Burro riirĩ cuasa ra chĩ jẽje hue. Ae ato emo nyui ãte. Jenyura seru seje. ³¹ “¿Mbaerã nda jenyura re?” i mose emo jẽje, jeñee ee. “Nandererecua que jendu i ra”, jenyee ee, i que Jesús ùquĩ nyeremo mondo ra. ³² Nyoĩ que sũchaa ra. Ae riĩ Jesús ñee ee nae, ùquĩ ngue nyecua ja ee cote ra. ³³ Burro riirĩ ngue etea ra. Era mose que echa ñee ee ra. —¿Mbaerã jẽingo era era re? i que ee ra. ³⁴ Jesús chimbaaquiatu que ñee ee ra. —Nandererecua que jendu i ra, i que echa je ra. ³⁵ Burro riirĩ ngue ecuruchoĩ Jesús je cote ra. Echimbaaquiatu que huĩrao chono ñono burro arõ nda. Mbia que Jesús mbuchui burro ato cote ra. ³⁶ Jesús ngata mose burro ato, mbia que huĩrao mbiitee ee ibi rĩ nda. Jesús nonde. Jesús oso sacua hue rĩ. ³⁷ Jesús quiato tubiriã tuchi que nyoi quia erese ra. Monte de los Olivos icha re ngasẽ mose, Jesús quiato que tasẽ tasẽ tuchi ra. Eya tuchi que ra. Ñee mombo mombo turã ngue Dios je cote ra. —Jesús riqui mbia mae sayã naa naa tuchi mbia je co, i que ñee mombo mombo turã Dios je ra. ³⁸ Mbia ia tuchi que tasẽ tasẽ nda. —Co nandererecua ru quia ngasẽte co. Co Dios chĩmbu ru quia ngasẽte nande je co. Dios turã tuchite nande je, i que mbia ia tuchi ra. ³⁹ Fariseos mo abe que chĩ huee ra. Ùquĩ ngue ñee ndei Jesús je ra. —Ndechimbaaquiatu embaasẽ asẽ eã jiri ae, i rei que Jesús je ra. ⁴⁰ Jesús que ñee ee ra. —Sequiato ñeemombo mombo eã mose serĩ, eĩ ndei ra sita ñeemombo mombo serĩ cote, i que ñee nda.

⁴¹ Jesús que ngasẽ serĩte oso quia Jerusalén cote ra. Sucha checuete que esi quia ee cote ra. Jesús ia eã tuchi que Jerusalén ndese ra. Nyeseo que erese cote ra. ⁴² Jesús que ñee sucha tubiriã je cote ra. Jerusalén je. —Seyayã tuchi aico nderese co, Jerusalén. Mbia mbiasa ereicuayã mbei chõchĩ nguia co. Echecuayã mbei chõ eriquichĩ ndeje co. ⁴³ Mbae rasi ra eresaã tuchi cote. Ndeucuayãsa ra nderiquisã tuchi cote. Nemama nda ecuaẽ. ⁴⁴ Sucha ra embucoi ja ndeyenda. Sita ra embucoi ja tuchi mbia chuchua si. Mbia ra mano ja ndeyenda cote. Dios quiatu ngue ereisiã mbeite nguia. Dios sembu mose nderea, aque mose abe que seisiãte no nda, i que Jesús ñee Jerusalén je ra.

Jesús mbia mbusẽ Dios chuchua si

⁴⁵ Jesús que oso Dios chuchúaa ra. Huee que mbia riqui mbae isi isi querabe ra. Mbae mondo mondo abe mbae isiquia ribishorõ. Jesús que ùquĩ mombo ja Dios chuchua si ra. ⁴⁶ Jesús que ñee mbia je ra. —“ ‘Mbia cheẽsa Dios je’, i ra mbia Dios chuchua je”, i que embesa ji ra. Jẽ nguia jẽicuã tuchite Dios chuchua je re. Mbae mbuquiachãsa chucharã ño jẽsaãte chĩ nguia Dios chuchua je, i que Jesús ùquĩ je ra. ⁴⁷ Jesús que mbia mbaaquiatu quiatu bei quia Dios chuchúaa ra. Ererecua cuabẽte que mae icua icua nguia erese ra. Sacerdote rerecua. Embesasa abe no. Mbia rerecua ja. Ùquĩ ererecua ja que ñee ñee nguia nyue ra. —¿Mañi nande ra equia Jesús iquia sacua nde? i que ererecua quia ñee ñee nyue ra. ⁴⁸ Ererecua que Jesús iquia aroneate ra. Mbia tubiriãte quiatu que Jesús chandu quia ra.

20

¿Aba nembu re? i mbia ñee Jesús je

¹ Emo mose que Jesús riqui mbia mbaaquiatu quiatu Dios chuchúaa ra. Ererecua que ngaẽ ja ñee ee ra. Sacerdote rerecua. Embesasa abe no. Amei abe no. ² Ùquĩ ngue ñee ja Jesús je ra. —¿Mbaerã ereico mbia mbaaquiatu quiatu re? ¿Aba “mbia embaaquiatu quiatu” i ndeje re? i que ererecua ja

Jesús je ra. ³ Jesús que ñee ee ra. —Se rane tacheẽ jêje. Se rane preguntar tae jêje. ⁴ ¿Aba ñee Juan je re? “Eso bautizar i mbia je” i ee re. ¿Dios eã ño ere no? Jeñee seje, i que Jesús ee ra. ⁵ Ererecua que ndua ndua ja u ra. Ñee ñee ngue u nyue ra. —¿Mañi nande ra echeẽ ndobeishĩ nde? “Dios que Juan mbu ra”, nande aroneate. Eĩ nda ñee nande je. “¿Mbaerã jêingoãte erui re no?” i quiarei ra nande je. ⁶ “Dios eã ngue embu ra”, nande aroneate no. Mbia атаque ra paama i tuchi nande je. Nandeĩ ei ra sita je. Juan quiato tuchi que mbia, i que ererecua ñee ñee nyue ra. ⁷ Ererecua que ñee nyee Jesús je ra. —Ureicuayãte. Aba chõ Juan mbu. Bautizar i sacua, i que ererecua ñee ja ee ra. ⁸ Jesús abe que ñee ee cote ra. —Se abe ra acheẽ eã jêje no. Aba chõ “ã esaã” i seje. Acheẽ eã nda jêje no, i que ererecua je ra.

Uva raarõsa icuã icuã nguerecua je

⁹ Jesús que mbia mbaaquiato quiato cote ra. —Sã mbia mo ndiqui no. Sã ibicha mo ndiqui no. Sã ibicha riqui uva i tiquia tiquia no. Sã ibicha riqui “sembae uvas jêsaarõ”, i emo je no. Sã eriqui oso itõte no. ¹⁰ Uva quiche mose que echa ngũimba mo mondo rei umbaerã ndea ra. Ae uva saarõ nguia nae, ùquĩ ngue eisi icuã tuchi ra. Ucuu ucuu que erese ra. Eochi que emondo mbuchebi ra. ¹¹ Echa que ngũimba mo mondo rei ereabe no nda. Aque abe que eraarõsa isi icuã no nda. Ucuu ucuu que aque abe rese no nda. Eochi que emondo mbuchebi ra. ¹² Echa que emo abe mondo rei ra. Aque abe que eiruã nua mondo mbuchebi no nda. ¹³ Echa ia eãte que ra. “¿Mañi ae ra se re? Seririĩ quiato tamondo erea cote. Ûquĩ nda ireĩ ireĩ jiri esi cote reae”, i rei que echa ra. ¹⁴ Uva raarõsa mae mose erese que ñee nyue ra. “¡Co eririĩ ndu quia co cote jê! ¡Nandeiquia rei jê! ¶ nda uvas nandembaerã ae cote”, i que ñee nyue ra. ¹⁵ Eraarõsa que eririĩ querao pe jiri eiquia ra. Eriiriĩ ngue mano cote ra. ¿Mañi nda echa quia eraarõsa je cote re? ¹⁶ Echa ra oso eraarõsa iquia ja cote. Ibi ra emondo emo je cote. Eraarõ sacua, i que Jesús mbia je ra. —¡Ûquĩ nda iquechĩ jê! i que mbia ra. ¹⁷ Jesús que mae erese ñee ee cote ra. —¿Ã embesa ji re se jemaẽ ãte re? Sã emo ndiqui tuchua ao sita je no. Sã sita mo ndirirõ mombo no. Eicuãte eriqui rei nguã ee. Aquere Dios emundua si erese. “Earonda sacua turambi chõ eriqui re”, i ndua si uchimombo rese. Sã uchimombo rirõ si cote no, i que embesa ji ra. ¹⁸ Ae ra nyoĩ ngoĩ aque sita arõ nae, ùquĩ nda huẽ. Aque sita ngoĩ mose emo arõ, ùquĩ nda mano, i que Jesús ra. —Aque sita rã ndei se, i chõ ngue re.

¿Impuestos ra uremee ererecua je re? i mbia ñee Jesús je

¹⁹ —Nanderĩ ño Jesús riqui nguã ñee a. Nandeisi rei serao jê, i rei que sacerdotes rerecua ñee nyue ra. Embesasa abe no. Ûquĩ ngue paama i ja Jesús je ra. Jesús isi aronea tuchite que mbia résaa ra. Eireite quiato ngue mbia tubiriã si re. ²⁰ Ererecua que mbia icuã mondo mondo quia Jesús cheẽ andu andu ra. —¡jêturã jêsaã saã oso Jesús je jê! ¡Echeẽ ndese jenyiisaquia quiato ure je jê! Mbae mo nã ñee icuã mose, ¡nandeisi rei jê! Ererecua tuchi je nandemondo cote, i ja que ererecua ñee nda. ²¹ Ae chi uturã naa naate Jesús je nae, ùquĩ ngue ñee ee ra. —Jesús, co ereico mbia mbaaquiato quiato turãte co. Mbia jaje ndeturãte riqui co. Mbia erembaaquiato quiato turãte quia Dios icha rĩĩ co. ²² Nyebe ureico nguã ñee ndeje a. ¿Coche mbia mbae

isiquia mee mee mose Romano nderecua je re? ¿Urenee nda ee re? ¿Urenee eã nda ee re no? i que ñee Jesús je ra. ²³ Jesús que ùquĩ icuã icuate ra. Nyebe ñee nguiã ee. —¿Mbaerã jëingo “Ï nda Jesús ucheë nyabi”, i seje re? ²⁴ Mbae isiquia mo jëteacuquia imbu seje. ¿Aba mbae nombre ñi mbae isiquia rese a re? ¿Aba ãquĩ aingue abe ñi a re? i que Jesús ee ra. —Romano nderecua, i que ñee Jesús je ra. ²⁵ Jesús que ñee ee cote ra. —Romano nderecua mbaerã jemee ño ee. Dios mbaerã jemee ño ee, i que Jesús ee ra. ²⁶ Jesús que ucheë nyabi aroneate ee ra. Ûquĩ ngue nyuruira jate u Jesús cheë andu ra. Nyebe eriqui ñee eã ee cote.

Mbia raaque ra quera si, i Jesús

²⁷ —Mbia raaque ra quera eã mbei, i que mbiamo nguia ñee nda. Saduceos i que ùquĩ je ra. Ûquĩ mo ngue nyoĩ ñee Jesús je ra. ²⁸ —À ngue Moisés mbesa nande je ra: “Emo eriiriã mano mose, ngüinisi recha mose, sã enongue mano je ninisi rerequia. Sã tiirĩ ngõngue raaque riĩ”, i que Moisés embesa nande je ra. ²⁹ Sã eriqui mo ndiqui no. Eribi que seis ra. Eriqui que ngüinisiã quereco rei ra. Mano ño ngue tiirĩ ndocoĩ ngüinisi recha ra. ³⁰ Enongue que nguiqui checha quereco rei cote ra. Ae abe que mano ño tiirĩ ndocoĩ no nda. ³¹ Enongue abe que equereco rei cote no nda. Ae abe que mano ño tiirĩ ndocoĩ no nda. Ûquĩ seis ja que ngõngue checha quereco ja rei ra. Mano ja tuchi chõ ngue tiirĩ ndocoĩ no nda. ³² Eninisi eru checha abe que mano ño nyee cote ra. ³³ Siete que eru nyii resë. Mbia raaque quera si mose, ¿abate ra equereco cote re? i que saduceos ñee Jesús je ra. —Ma Jesús ñee icuã no, i chõ ngue re.

³⁴ Jesús que ñee ee ra. —Aa chõ mbia riqui nguia ngüinisi rerequia querabe. Siqui mose íbii. ³⁵ Ae raaque ra Dios mbuquera si nae, ae ra Dios mingo bei nyiese nae, ùquĩ nda ngüinisi quereco eã mbei huee cote. Ûquĩ nda ngu quereco eã mbei huee cote no. ³⁶ Huee quiatu ra mbia manoã mbei. Angeles rã mbei ra mbia riqui huee cote. Dios riirĩ tuchi ra eriqui huee mose cote. Embuquerá quiatu ra cote. ³⁷ Moisés abe que mbia mbiirandu ra. “Mbia raaque quera bei quia co”, i que Moisés ra. “‘Se rei Dios. Abraham nderecua chõ aico nguia co. Isaac nderecua abe. Jacob nderecua abe no’, i que Dios ra”, i que Moisés embesa ra. Ira ruri rendi mose que Dios Moisés mbiirandu ùquĩ ndese ra. ³⁸ Ûquĩ mano ndaque nyii. Ûquĩ ndeco siqui bei chõ nguia ùquĩ. Mbia raaque rerecua eã ño Dios re. Mbia reco rerecua chõ ñene. Mbia reco ja chõ siqui nguia Dios je ã, i que Jesús ee ra. ³⁹ —Ndecheë turãte, i que embesasa mo ñee Jesús je ra. ⁴⁰ Ae “Jesús nandembicua” i rei quia, ùquĩ ngue ñee eã Jesús je cote ra.

¿Aba rucucha Cristo re?

⁴¹ Jesús que ñee mbia je ra. —Se abe tacheë jëje cote. ¿Mbaerã mbia riqui ñee nde? “David rucucha chõ Cristo re” i re. ⁴² David si que “sererecua” i Cristo je ra. Sã David chimbesa Salmos no: Dios que ñee Cristo sererecua je ra. “Ecoi seji.

Nde abe ra ererecua serese.

⁴³ Ae ndecuãyaete quia nae, ùquĩ je ra ndequirãcuã atecuquia tuchi.

Ndequirãcuã tuchi chee ra ùquĩ si”, i que Dios sererecua je ra, i que David embesa ra. ⁴⁴ David si chõ “sererecua” i nguia Cristo je. ¿Mañi nda David rucucha Cristo re? Jeñee ño seje, i que Jesús ùquĩ je ra.

Jesús ñee asi embesasa je

⁴⁵ Mbia ja résaa que Jesús ñee uchimbaaquiato je cote ra. ⁴⁶—¡Embesasa rã ño nda jëingochĩ je! Ũquí ucuasu saã saã mbeite quia ã. Huiirao turã equereco beite quia ã. “Sã mbia ererecua i nande je”, i beite equia ã. Mbia renda turã abe eirabo rabo beite quia mbia si ã. “Fiestacha jii quia taĩ jê”, i abe bei equia ã no. ⁴⁷ Ari eru cheecha mbae abe embutiã tiã nguia ã no. Ucheẽ oco abe esaã saã mbeite quia Dios je ã no. “I nda mbia mae nanderese”, i chõ nguia. Ũquí nda Dios mbasi tuchi cote, i que Jesús uchimbaaquiato je ra.

21

Eru cheecha mbaecha reã mo mbae mo mee Dios je

¹ Jesús que nyoi nyoi quia Dios chuchúaa ra. Hue que mbia mbaecha riqui ofrenda mondo mondo ofrenda riru ye ra. ² Eru cheecha abe que siqui ra. Ae que centavos nyeremoño mondo ofrendarã nda. Mbaecha reãte quiato ngue ae re. ³ Jesús que ñee nda. —Tacheẽ tuchi jêje. Eru cheecha mbaecha reã ngue mbae mondo tuchi mbia ataque si ra. ⁴ Mbaecha quiato que umbae rire ñetẽ mondo mondo ra. Eru cheecha quiato nbbbbknnnknnnnn gue umbae mii mondo ja nguia, i que Jesús ra.

Mbia ra Dios chuchua mbucoi ja, i Jesús

⁵ Mbia que ñee ñee Dios chuchua turã nii nda. Tuchua mbarõ ji sita turã nii. Mbae aba queteamba riĩ abe no, Dios chuchua jenda. Jesús que ñee mbia je cote ra. ⁶—Ae rese jëingo mae nae, ũquí nda mbiamo mbutiã ja cote. Sita mo nda chi eã nyuchuarõ cote. Mbia ra tuchua mbucoi ja tuchi. Dios chuchua ra chĩ eã juã cote, i que Jesús ra.

Mbae ua ja nonde

⁷—¿Manose ra ũquí nde? ¿Mañi ure ra equia irandu mbae ua nonde re? i que Jesús chimbaaquiato ee ra. ⁸ Jesús que ñee ee ra. —Jêtesa jiri quia jê. Mbia ra jembĩrĩ irĩchĩ jê. “Cristo chõ se re”, i ra mbia ñee ata atate jêje. “Co rei é co cote”, i ra mbia ñee ata atate jêje no. Ũquí nda jeñanduchĩ. Ñeeñoõno je chõ ũquí nde. ⁹ Mbia ra ñee ñee tuchi nyiiquia iquia je riĩ. Guerra riĩ abe no. Ũquí mose ra jësiquichechĩ jê. Ũquí ja rane nda nyecua raque. Aque mose ra mbae ja ua eã ná, i que Jesús mbia mbaaquiato ra.

¹⁰—Mbia ra guerra saã tuchi chee. Nyiiquia iquia tuchi rae. ¹¹ Ibi ra nyere nyere tuchi. Mbia mo abe riãcuã tuchi ra aque mose. Emo ñooñoa tuchi ra mbia rasi. Mbia mae sayã nda nyecua tuchi ibei rĩ cote. ¹² Ũquí nonde ra mbia icuã icuã tuchi jê je seriĩ. Nguerecua je ra mbia jenderao rao tuchi. Ererecua abe icuã icuã tuchi ra jêje. Jêtarõ tarõ tuchi ra seriĩ. ¹³ Ũquí mose nda secheẽ jêsenei senei tuchi mbia je chã. ¹⁴ ¿Manyae ra ũquí ñee ndibishorõ nde? jenyechĩ nda ñee ũquí nonde jê. ¹⁵ Se chõ nda jaeembucheẽ turã nguia aque mose. Nyebe ra jëucuyãsa jeñee ndibishorõ aronate aque mose. ¹⁶ Jendu ra jemondo chee mbia icuã je. Jenongue abe ra jemondo chee mbia icuã je no. Jendesenda abe ra jemondo chee mbia icuã je no. Jëquiato abe no. Ũquí nda jemo iquia chee no. ¹⁷ Mbia ra jëucuyã tuchi seriĩ. ¹⁸ Jësiquichechĩ nda esi. Jaendeaquiato tuchi ra aque mose. ¹⁹ Jeñimbirãcuã mose ra Dios jemingo turã mbei.

Jerusalén tiã tuchi rae, i Jesús

²⁰ Soldados Jerusalén mama mose, aque mose ra Jerusalén mbutiã cote. ²¹ Sã Judea jenda choi uchã ibi ibate riichã aque mose. Sã Jerusalén jenda abe choi uchã hue si. Ae chi isho isho Jerusalén si nae, sã ũqui nyebibe eã Jerusalén ndiichã aque mose. ²² Aque mose ra mbia mbae icuã ja irara tuchi huicuaã nã. Embesa ji cheẽ nda ique ja aque mose. ²³ Aba mbia eã tuchi ra emo aquẽ ndiru rerequia mose aque mose. Nguiriĩ mbuquiambu je abe no. Mbua ra mbae rasi saã tuchi aque mose. Mbae icuã nda irara tuchi huicuaã nã. ²⁴ Aque mose ra mbia guerra raã tuchi. Mbua ra nyiquia iquia aque mose. Jerusalén jenda ra sasẽ tuchi aque mose. Mbua ra ecuruchoi choi tuchi tarõ isho. Judios eã nda chi tuchi Jerusalén aque mose. Dios ra emondochoi chee hue si cote.

Dios riiriĩ nda tube ibate si

²⁵ Mbua mae sayã ndese ra mbia mae tuchi ibei riĩ cote. Tenda rese. Nyasi rese abe no. Nyasi tata rese abe no. Ama ndisha ra sieu tuchi quia aque mose cote. Mbua ra titi titi i tuchi aque mose. Quiachã tuchi rae. ²⁶ Mbua chiã nda cuaãcuã i tuchi aque mose. “Mbae rasi ra nandesaã tuchichĩ nde”, i tuchi ra titi titi i. Ibei jenda abe chee ra quiata quiata cote. ²⁷ Aque mose tuchi ra achube ibii cote. Ibeishĩ ndese ra achu. Senininya tuchi ra achu. Sequirãcuã tuchi ra achu. ²⁸ Ũqui ndese jemae mose, jẽo jẽo tuchi aque mose jẽ. Dios ra jendirõ jei mbae icuã si aque mose cote, i que Jesús ra. ²⁹ Jesús que ñeembe ee ra. —Sã higuera riqui no. Sã ira mo ndiqui no. ³⁰ Ero quira usẽ ja mose, “iraro itõ ndacu ra cote”, i chõ mbua nguiã aque mose cote. ³¹ Eĩ si chõ nda mbua mae mbae ja rese cote. Ũqui ndese mae mose, “achite Jesús ñi tu a cote”, jenye rae. “Mbua rerecua tuchi ra Dios cote”, jenye ra aque mose. ³² Ae siqui quia mbua aque mose nae, ũqui nda manoã mbae ua ja mose chee. ³³ Ibei ra ua. Ibi abe ra ua. Secheẽ nguia ra uayã mbei.

³⁴⁻³⁵ Mbua ndua eã mose serese ra achu cote. Ibi jenda ja ra ambua tuchi u. Jẽ nguia seraarõ arõ mbei quia. Mbae icuã ndese siqui rocoĩ. Quiacua siqui rocoĩ. Mbae rese ndua ata ata rocoĩ. Ũqui icuã ndese jẽingo mose, jaembuate ra u. ³⁶ Jẽtesa bei quiatu quia serese. Jẽnee mbei quiatu quia Dios je. ã mbae icuã jei eã sacuaã jẽje. Jẽingo turã sacuaã serese sechu mose, i que Jesús ra.

³⁷ Nyaashĩ mose que Jesús riqui mbua mbaaquiatu quiatu Dios chuchua ra. Isa que eriqui oso oso bei Monte de los Olivos ra. ³⁸ Isamamimbe que mbua riqui ngaẽ ngaẽ ja bei echeẽ andu ra. Dios chuchúaa.

22

Jesús nandeisi tarõ, i ja mbua rerecua ñee nyue

¹ Achite que fiesta de la pascua cote ra. Mbichae mbuchimatã iriã ngue mbua u u quia aque fiesta mose querabe ra. ² Sacerdotes rerecua que ñee ja nyue ra. Embesasa abe no. —Jesús nandeiquia. ¿Mañi nande ra equia eiquia nonde re? i que equia ñee ñee nyue ra. Eireĩte que eriqui mbua tubiriã si ra. ³ Judas Iscariote, i que Jesús chimbuaquiato mo je ra. Satanás que ique aque chiangui re cote ra. ⁴ Nyebe aque si nguiã ñee sacerdotis rerecua je. Dios chuchua raarõsa je abe no. —Jesús tamondo jẽje. ¿Mañi nande ra equia ee re? i que Judas ñee ee ra. ⁵ Ũqui iate que Judas ñee mose ee ra. —Mbae isiquia ra uremee ndeje, i que Judas je cote ra. ⁶ Judas que eno i mbua ñee mose ee ra. —Jesús tamondo rá jẽje mbua tiãsa, i que ñee nda.

Jesús quiaru uchimbaaquiatu rese

⁷ Fiesta que tu cote ra. Aque fiesta mose bei que mbia riqui oveja iquia iquia querabe ra. Mbichae mbuchimatã iriã ngue eu eu quia no nda. ⁸ Jesús que ñee Pedro je ra. Juan abe je. —Jẽso oveja mbuchi nande je, i que Jesús ee ra. ⁹ Ũquĩ ngue ñee echeẽ mose ra. —¿Mangue ra aba embuchi mangue re? i que Jesús cheẽ mose ra. ¹⁰ Jesús que ñee ee ra. —Jengasẽ mose sucha cuasu, emo i rerao rese ra jema. I ra equerao quia irasa mo ye. Aque rui jẽso bei quia ique chee echuchua. ¹¹ Tuchuacha je jeñee. “Jesús que urembu ñee ndeje ra. ‘¿Ma cuarto ra urecu quiaru oveja u que re? Sechimbaaquiatu rese’, i que Jesús ñee ndeje ra”, jenyetuchuacha je. ¹² Tuchuacha ra cuarto cuasu mee jẽje. Mbia quesa ibatenda ra emee jẽje. Embuquiche ji. Huee chõ oveja jembuchi nandequiaru sacua, i que Jesús ñee ee ra. ¹³ Pedro que nyoĩ cote ra. Juan abe. Jesús cheẽ ndui si tuchi que mbae eĩ ja cote ra. Huee que oveja mbuchi cote ra.

¹⁴ Mbae quiche ja mose que Jesús ngoi uchimbaaquiatu rese quiaru sacua cote ra. ¹⁵ Jesús que ñee ee ra. —Co oveja que ause tuchi quia jendese semana nonde ra. Co mose pascua mose. ¹⁶ Pascua mo nda au eã mbei jendese cote. Dios mbia rerecua tuchi mose chee, i que Jesús ee ra. ¹⁷ Jesús que vino mbeisa isi cote ra. Gracias i que Dios je ra. Ñee ngue uchimbaaquiatu je cote ra. —Co jẽisi. Jembe jaaja jẽ. ¹⁸ Vino mo nda ambei eã mbei cote. Dios mbia rerecua tuchi mose chee, i que Jesús ra. ¹⁹ Jesús que mbichae isi cote ra. Gracias i que Dios je ra. Siquio que mbuchao chao ee cote ra. Ñee ngue ee cote ra. —Ã ndei serete rã ã. Serete ra mano jẽje cote. Jendua serete riquio ji rese ã mbichae u mose, i que Jesús ñee ee ra. ²⁰ Eĩ si que Jesús vino mbeisa isi no nda. Quiaru jare. —Ã ndei seruqui rã ã. Mbia icua mbutiã sacua tuchi chõ seruqui re. Dios cheẽ yasu rui si chõ seruqui riqui nguiã mbia icua mbutiã co. ²¹ Ae ra semee mbia icua je nae, aque abe riqui quiaru serese a. ²² Co acua raque quia mano nonde co. Dios cheẽ ndui si co. Ae semee nguia mbia icua je a nae, aque ra mbae rasi saã tuchi. Aba mbia eã tuchi rae, i que Jesús ee ra. ²³ Echimbaaquiatu que mae jaaja nyiese ra. —Aba tuchi ra emee mbia icua je reae, i ja jate que nyue ra.

Jesús chimbaaquiatu mbia rerecua saã saã tuchi nyue

²⁴ Aquere que Jesús chimbaaquiatu ñee icua icua tuchi nyue ra. —Se quia ererecua tuchi ndesi re, i jaaja que nyue ra. ²⁵ Jesús que ñee ee ra. —Mbia ataque rerecua riqui ucuasu raã naa tuchi ngũimba je ũquĩ. ²⁶ Eĩ jenyechĩ nda jẽ jẽ. “Ererecuarã se”, jenyechĩ nda jẽ. Ae eaquiatu jiri jemo nae, sã ũquĩ ndiqui uñetẽ naa naa ño. Sã ũquĩ ndiqui tochei chõ nguia. Ae ererecua jemo nae, sã ũquĩ ndiqui ererecua rimba rã tuchi chõ. ²⁷ Ererecua ngoi chõ nguiã. Erimba mbae mee mee ño nguiã ee. Eĩ eã ño se re. Se quia mbae amee mee nguiã jẽje co.

²⁸ Jẽ nguiatu ngue jẽingo beite nguiã serese. Se mbae icua irara tuchi mose. ²⁹ Nyebe ra jaemii tuchi mbia rerecuarã. Sã seru semii tuchi mbia rerecuarã no. ³⁰ Jẽingo tuchi ra serese, se ererecua tuchi mose. Jẽquiaru ra serese. Mbae mo abe ra jembe serese no. Israel ndiirĩ nderecua ja ra jẽ. Judios rerecua ja ra jẽ, i que Jesús ee ra.

Jesús aicuayãte resẽ, i ra Pedro serũ, i Jesús

³¹ Jesús que ñee Pedro je cote ra. —Simón, Satanás que ñee jenii nda. “Ndechimbaaquiatu emee na seje. Tã tae rã ee. Ma siqui beite Dios rese”, i rei

ngue Satanás jeni nde. ³² Acheẽ tuchite que Dios je nderĩ nda. Nde Dios icua tuchi sacua. Nde ubabe mose serese, nderesenda abe je echeẽ emingo sacua serese, i que Jesús Pedro je ra. ³³ Pedro que ñee ee ra. —Sererecua chõ nde re. Aico bei ra se quia nderese. Mbia nda sematã ndei nguia. Mbia nda seiqua rei nguia nderese, i que Pedro ra. ³⁴ Jesús que ñee ee ra. —Tacheẽ nyecua ndeje, Pedro. Nguira cheẽ nonde ra erecheẽ ñooño tres veces serĩ namo, Pedro. “Jesús aicuayãte resẽ”, ere chooño ño nda serĩ, i que Jesús Pedro je ra.

Embesa ji chee nda ique ja serĩ cote, i Jesús

³⁵ Jesús que ñee uchimbaaquiatu je ra. —Jaemondo que mbia mbaaquiatu quiatu sacua nyii, jẽochi que jaemondo. Mbae isiquia mo ngue jendao eã tuchi icua. Mbae rirurã mo abe que jendao eãte. Jẽiyao eã abe no. ¿Aque mose mbae eãte jẽje re? i que Jesús ee ra. —Tei. Urembae tubiriãte que ra, i que echimbaaquiatu ñee Jesús je ra. ³⁶ Jesús que ñee ee ra. —Ae jemo embae rirurã mo nae, jendao cote ae. Ae mbae isiquia mo nae, jendao cote ae. Ae echuuru eãte tiquise mo nae, sã emo isi huĩrao ribishorõ ae. ³⁷ Sã embesa ji riqui ñee serĩ no. “Mbia icua ndese ra Dios riri mingo chee”, i. Uqui nda ique cote. Embesa ji cheẽ nda ique ja tuchi serĩ cote, i que Jesús ñee nda. ³⁸ —Co tiquise nyeremo ñi co resẽ, i que echimbaaquiatu echeẽ mose ra. —Coche ñene, i que Jesús ee ra.

Jesús ñee ngu je

³⁹ Jesús que oso usẽ taicuee cote ra. Oso que Monte de los Olivos cote ra. Eĩ mbei que ae quia oso oso huee ra. Echimbaaquiatu que nyoi erese ra. ⁴⁰ Ngasẽ mose que ñee uchimbaaquiatu je ra. —Jeñee tuchi Dios je. Satanás tã i eã sacua jẽje, i que Jesús ñee ee ra. ⁴¹ Jesús que oso pe quiti jiri esi ra. Ngoi que nguia ndese ñee Dios je ra. ⁴² —Paba, ndebi mose sereaquiatu se, mbae rasi raã eã sacua. Ae sebite nae, uqui esaã eã seje. Ae ndebite nae, uqui nguia esaã, i que Jesús Dios je ra. ⁴³ Aque mose que ángel mo tu ibate si ee ra. Embirãcuã sacua. ⁴⁴ Jesús ia eã tuchite que ra. —Mbae rasi ra asaã tuchichĩ nde, i tuchi que ndua ndua ra. Ñee tuchi que Dios je ra. Eiriei ruqui que tiqui tiqui tuchi quia ibii ra. ⁴⁵ Jesús ñee jare Dios je que juã cote ra. Uchimbaaquiatu rea que esi ra. I que u uque ee ra. Eya eãte quiatu ngue re. ⁴⁶ Ñee ngue ee ra. —¿Mbaerã jẽingo uque a re? Jenyuruã eae. Jeñee na Dios je. Satanás tã i eã sacua jẽje, i que Jesús ee ra.

Mbia Jesús nyecua serao

⁴⁷ Jesús cheẽ ua eã mose que mbia ngaẽ jate ee ra. Judas que tu quia mbia nonde ra. Jesús chimbaaquiatu raque que ae ra. Ae que Jesús siichã u eritii riite sacua nda. ⁴⁸ Jesús que ñee Judas je ra. —¿Ereico seritii riite mbia icua je sereacuquia sacua a re? i que Jesús ee ra. ⁴⁹ Jesús resenda que mae u erese ra. Ñee ngue Jesús je ra. —Urererecua, ¿tiquise ra ureuru uru mbia rese re? i que ñee Jesús je ra. ⁵⁰ Jesús resenda mo ngue tiquise uru sacerdote rerecua rimba rese ra. Eisa sia. Eisa equiatocuti quitinda. ⁵¹ —Jẽhui esi ae. Coche ñene, i que Jesús ee ra. Oco que eisa rese embucherõ nda. ⁵² Jesús rerao sacua ño mbia ngaẽ nguia reaẽ. Sacerdotes rerecua. Policia abe no. Judios rerecua abe no. Nyebe Jesús ñee nguia ee. —¿Mbaerã jenyu quia tiquise reru serea co re? Ira jua abe no. Mbae mbuquiachãsa isi rã ño jenyuchi nguia serea co. ⁵³ Tenda que amumba mumba beite rei quia jendese resẽ. Mbia mbaaquiatu

quiatu Dios chuchúaa resē. ¿Mbaerã jëingo seisiã secua aque mose re? Isa chõ jenyuchĩ serea co, mbia mae eã sacua jendese. Itondaru rĩnda chõ jë nde, i que Jesús ee ra.

Jesús aicuayãte resē, ichõĩño Pedro

⁵⁴ Mbia que Jesús isi nyucua cote ra. Sacerdotes rerecua chuchua que eruruchoi cote ra. Pedro que oso quia ishote erui ra. ⁵⁵ Itaicuee que mbia tata mbucha ra. Huee que echĩ ngoi tata jii ra. Pedro abe que ngoi embirõ nda. ⁵⁶ Nyucuaaque mo ngue chĩ mae nguiatu tuchi Pedro rese ra. Tata rendi que etesaete ee ra. —Aque abe que Jesús resenda, i que mae Pedro rese ra. ⁵⁷ Pedro que ñee ee ra. —Tei. Jesús aicuayãte resē, ichõĩño ngue Pedro nyucuaaque je ra. ⁵⁸ Emo jiri mose que mbia mo mae Pedro rese ra. —Nde abe que Jesús resenda ra, i que Pedro je ra. —Tei. Eresenda eã ño se resē, ichõĩño ngue Pedro ee ra. ⁵⁹ Emo mose jiri que emo ñee ee no nda. —Jesús resenda chõ nde resē. Galilea jenda chõ nde abe resē, i tuchi que Pedro je ra. ⁶⁰ Pedro que ñee ee ra. —Tei. Ndecheẽ aicuayãte resē, ichõĩño ngue Pedro ee ra. Pedro cheẽ mose tuchi que nguira ñee cote ra. ⁶¹ Jesús que uba mae Pedro rese nguira cheẽ mose cote ra. Pedro que ndua Jesús cheẽ ndese cote ra. —Nguira cheẽ nonde ra echeẽ ñooño tres veces serĩ, sã Jesús i Pedro je nyii no. ⁶² Pedro ndua mose ũqui ndese que esi nyeseo pe jiri ra.

Mbia iquia chooño Jesús je

⁶³ Ae Jesús isi miĩ nae, ũqui ngue iquia iquia tuchi u Jesús je ra. Ucuu ucua tuchi que u erese ra. ⁶⁴ Jesús resa abe que echati ra. Eruba rese que ucua ucua tuchi ra. —¿Aba ucua ucua quia nderuba rese a re? i abe que equia Jesús resa ati ji je ra. ⁶⁵ ũqui miĩ eã ngue eriqui ñee ee ra. Mbae ja rĩ ngue embuqueta ra.

Mbia Jesús ruruchoi ererecua chumunua mose

⁶⁶ I que nyaashĩ u quia ra. Aque mose que ererecua ñumunua ja ra. Judíos rerecua. Sacerdotes rerecua abe no. Embesasa abe no. ũqui ñumunua mose que Jesús ruruchoi ee cote ra. Ererecua que ñee ja Jesús je cote ra. ⁶⁷ —¿Cristo nde re? Echeẽ tuchi ure je no, i que ererecua ñee Jesús je ra. —“Cristo chõ se re”, ae raque ra jëje, “nyia”, jenyẽ ãte ra secheẽ mose. ⁶⁸ Se abe preguntar i mose jëje mbae mo niĩ, jeñee ãte chõ nda secheẽ ndibishorõ. Jëhui eã abe ra sesi no. ⁶⁹ Namu jiri ra acoi Dios quiatocuti cote. Hue bei ra aĩ cote. Dios quirãcuã na si ra aico mbia rerecua cote, i que Jesús ñee ererecua chumunua mose ra. ⁷⁰ Ñee ja que Jesús je cote ra. —¿Dios rucucha chõ nde re? i ja que ñee Jesús je ra. —Ae. Dios rucucha rei se, i que Jesús ee ra. ⁷¹ Ererecua que ñee ja nyue ra. —¿Mbaerã nda mbia Jesús icuã nenei i ite nande je re? Jesús cheẽ icuã ngue nandechandu rei nande abe resē. Sã mbia eiquia, i que ererecua ñee ja nyue ra.

23

Mbia Jesús ruruchoi Pilato je

¹ Judíos rerecua que juã ja cote ra. Jesús que ecuruchoi Pilato je cote ra. ² ũqui ngue ñee icuãte Pilato je Jesús rĩĩ nda. —Jesús que mbia mbaaquiату icuã icuãte quia ra jë. “Impuestos ra jemee meechĩ mbia rerecua je”, i chõ ngue equia mbia je ra jë. “Se chõ Cristo re. Mbia rerecuarã nda se”, i que equia ra, i que judíos rerecua ñee icuã Jesús rĩĩ nda. ³ —¿Judíos rerecua nde

re? i que Pilato ñee Jesús je ra. —Ae. Judíos rerecua chõ se re, i que Jesús ee ra. ⁴ Pilato que ñee mbia je cote ra. Sacerdotes rerecua je abe no. —“Mbae icuã mo ngue Jesús saã nda”, ae aroneate eri, i que Pilato ra. ⁵ Judíos que ñee asite ee ra. —Jesús riqui mbia mbaaquiato icuã icuã tuchi co. Mbia mbesa choño. Judíos mbaaquiato icuã icuã ja. Galilea jenda rane. A jenda abe chee cote, i que ñee asite Pilato je ra.

Mbia Jesús ruruchoi Herodes je

⁶ Galilea jenda, i mose que Pilato ñee ee ra. —¿Galilea jenda chõ Jesús re? i que mbia je ra. ⁷ —Ae. Galilea jenda chõ Jesús re, i que mbia Pilato je ra. Nyebe Pilato Jesús mondo nguiã Herodes je. Galilea jenda rerecua quiatu ngue Herodes re. Herodes que siqui Jerusalén aque mose ra. ⁸ Herodes que maese beite quia Jesús rese ra. Jesús rese que eriqui jirandu beite ra. —Jesús nda mbia mae sayã mo saã na serésaa chã, i beite que equia ra. Nyebe eya tuchi nguiã mae mose Jesús rese cote. ⁹ Herodes que ñee atate rei Jesús je ra. Jesús que ñeeã mbeite echeẽ ndibishorõ nda. ¹⁰ Sacerdotes rerecua abe que chi ra. Embesasa abe no. Uqui ngue ñee icuã icuãte quia Jesús rii nda. ¹¹ Herodes que iquia iquia chõ nguia Jesús rii nda. Erimba soldados abe no. Jesús ririrõ tuchi que equia ra. Tiru nininya tuchi que emingue Jesús je ra. Ererecua raã naa tuchi Jesús je. Aquere que Herodes embuchebi mundo Pilato je cote ra. ¹² Aque mose ramo ngue Herodes quiato Pilato cote ra. Eicuã icuã mbeite que eriqui nyue nyii ra.

Jesús jēiquia mbucha ira rese, i ererecua

¹³ Pilato que mbia rerecua munua ja ra. Sacerdote rerecua. Judíos rerecua abe no. Mbia ja abe no. ¹⁴ Ñee ngue mbia je cote ra. —Jē ngue Jesús jendu rei seje ra. “Mbia mbiirĩ irĩsa chõ Jesús re”, jenye rei que seje ra. Acheẽ ocote rei que ee jēsaa ra. Ae jeñee ndei seje nae, ũqui icuã mo eãte seje Jesús rii. ¹⁵ Herodes je abe mbae icuã mo eãte Jesús rii. Herodes que Jesús mbube chõ nande je ra. ¿Mbaerã nda nandequia re? Mbae icuã mo ngue esaã eãte resẽ. ¹⁶ Tairuã nua ño. Aquere tambui mundo, i rei que Pilato ñee mbia je ra. ¹⁷ Pascua mose bei que Pilato riqui mbia matã ji mii mbui bei ra.

¹⁸ Mbia que tasẽ tasẽte ñeemombo mombo Pilato je ra. —Jesús eiquia. Barrabás quia embui ure je, i tuchi que mbia quia Pilato je ra. ¹⁹ Barrabás tarõ ji que chĩ nda. Mbia iquiasa tuchi que ae ra. Romanos nderecua je abe que eicuã icuã tuchi riqui ra. ²⁰ —Jesús quia tambui, i rei que Pilato ñeembe mbia je ra. ²¹ —Jesús embucha ira rese, i tuchi que mbia quia tasẽ i i ra. ²² Pilato que ñee si ee ra. Tres veces cote. —¿Mbaerã nda Jesús aiquia re? ¿Mbae icuã esaã nde? Mbae icuã esaã eãte umano sacuã. Tairuã nua ño. Aquere tambui mundo, i rei que Pilato ra. ²³ Mbia que ñee mombo mombo tuchite ee ra. —¿Eiquia jē! ¡Ira rese embucha jē! i tuchi que mbia quia tasẽ tasẽ ee ra. Sacerdotes rerecua abe que tasẽ i ite ra. Eno i chee que Pilato cote ra. ²⁴ Pilato que mbia cheẽ mumbayã nyee ra. ²⁵ Pilato que Barrabás mbui mundo cote ra. Mbia iquia iquiasate raque ae. Ñee icuã icuãate raque ererecua je. Pilato que Jesús mee mbia je cote ra. Eiquia sacuã.

Mbia Jesús mbuchesecho ira rese

²⁶ Soldados que Jesús curuchoi eiquia sacuã cote ra. I rei que emo u quia uco si ra. Simón, i que ee ra. Cirene jenda mo ngue ae ra. Aque que soldados isi ra. Ira mbuchiandasa ji rerao sacuã Jesús rui. Cruz, i equia

ee. ²⁷ Mbia tubiriã ngue nyoĩ quia eruĩ ra. Cuña abe tubiriã. Ũquĩ ngue nyoĩ quia tasẽ tasẽ tuchi nyeseo erese ra. ²⁸ Jesús que uba mae ñee ee ra. — Cuña, jenyeseochĩ nguiã serese. Jenyiese quia jenyeseo. Jendiirĩ abe rese quia jenyeseo, Jerusalén jenda. ²⁹ Mbae icuã nda tuutu tuchi jêje cote. Ae eririĩ nderecua nae, ũquĩ nda mbae rasi saã tuchi aque mose cote. Aque mose quiatu bichĩ mbia riirĩ eã ja mbite re. Mbae icuã tuchite quia nda aque mose cote re. ³⁰ “Amano ño mbichĩ se”, i tuchi ra mbia aque mose cote. “Sita ibate tu chõ mbichĩ seati”, i tuchi ra mbia aque mose cote. ³¹ Se chee mbia riquichĩ sembasi mbasi a. Seicuã eã ndaque se. Mbia quiatu ra mbae rasi saã tuchi huĩcuã niĩ cote, i que Jesús ñee nda.

³² Soldados que mbia icuã nyeremo curuchoĩ Jesús rese eiquia sacuã nda. ³³ Ngasẽ ngue ibi ibate mo cote ra. Eresa cuare, i que hue je ra. Huee que Jesús mbucha ira rese cote ra. Ũquĩ mbia icuã abe que embucha ira rese ra. Enongue que emũ Jesús quiatocuti ra. Equiatocutiã ngue enongue miĩ no nda. ³⁴ Mbia Jesús mbucha mose ira rese que Jesús ñee Dios je ra. — Paba, ã icuã embutiã esi. Ñimbaaquiatuãte equia seiquia ã, i que Jesús Dios je ra. Soldados que sita ñetẽ mbaaba aba o je ra. —Aba ra ja. Aba mbaerã nda Jesús irao reae, i que nyue ra. ³⁵ Mbia que chi ja tuchi mae erese ra. Ererecua abe chee que chi iquia iquia Jesús je ra. —Ma ndequirãcuãte. Mbia que erembucherõ cherõ tuchi quia. ¿Mbaerã ereico eĩ ãte ndechue nde abe re? Dios riirĩ nde reaẽ, i que ererecua u iquia iquia Jesús je ra. ³⁶ Soldados abe que iquia iquia chõ nguiã ee ra. Vinagrẽ chiquino ngue emee ndei ee echimbei sacuã nda. ³⁷ —¿Mbaerã ereico nguichi ãte ira si nde ae re? Judíos rerecua rei nde reaẽ, i que soldados iquia iquia Jesús je ra. ³⁸ Mbia que embesa ji miĩ Jesús ãquĩ quti ibate ra. JUDIOS RERECUA CHÕ CO RE, i que embesa ji huĩ nda. Griego cheẽ. Latín ñee abe no. Hebreo cheẽ abe no.

³⁹ Ae mbia icuã mbucheseco ji chi Jesús rese nae, ũquĩ mo ngue ñee icuã Jesús je ra. —¿Mbaerã ereico nguichiã nde ae re? ¿Mbaerã ereico urembuquichiãte ure abe re? Dios riirĩ nde reaẽ, i que ũquĩ mo ñeemombo Jesús je ra. ⁴⁰ Enongue que ñee ee ra. —¿Mbaerã ereico ñee ũquĩ Jesús je re? ¿Ndesiquiche ãte eriqui Dios si re? Ereico mano Jesús rã si a resẽ. ⁴¹ Nandeico mano nandeicuã niĩ a resẽ. Jesús quiatu que mbae icuã saã eãte rei resẽ, i que enongue ñee ee ra. ⁴² Aque sí que ñee Jesús je cote ra. —Jesús, endua serese nde ererecuarã mose, i que ñee Jesús je ra. ⁴³ Jesús que ñee ee ra. —Tacheẽ nyecua ndeje. Ereico ra serese namo Dios rese seico mose, i que Jesús ee ra.

Jesús mano cote

⁴⁴ Tenda chĩ mose nandeite re que itondaru ru cote ra. Ibi ja que itondaru ra. Itondaru beite que ra. Tenda nyeseo chee. Tres horas que ra. ⁴⁵ Tenda cuute que aque mose ra. Tiru mbucheseco ji Dios chuchua jenda que nyisia turã nda. ⁴⁶ Jesús que ñee mombo ngu je ra. —Paba, aso quia nderea aque, i que ra. Mano ngue cote ra. ⁴⁷ Soldado rerecua que mae tuchi huĩ erese ra. Ae que ñee turã Dios riĩ cote ra. —Mbae icuã naasa eã tuchi chõ Jesús riqui re, i que maende erese ra. ⁴⁸ Mbia tubiriã chi quia mae ja erese nae, ũquĩ ia eã tuchi que nyoĩ quia uchiã isi cote ra. ⁴⁹ Mbia Jesús chiicua ja que chi isho mae erese ra. Ae cuña nyoĩ beite quia erese Galilea si nae, ũquĩ abe que chi isho mae erese ra.

Mbia Jesús raaque chati cote

⁵⁰ I que mbia turã mo nguia huee ra. José, i que ee ra. Judío mo ngue ae ra. Arimatea jenda que ae ra. Judíos rerecua mo ngue ae ra. ⁵¹ José ia eãte que ererecua ataque rese Jesús iquia mose ra. Ae que Dios quietote ra. —Dios ra ererecua, i beite que equia eraarõ arõ nda. ⁵² —Jesús raaque emee na seje, i que José oso ñee Pilato je ra. ⁵³ José que Jesús raaque mbuquichi cote ra. Tiru je que ema nda. Sita ribicoi ji imi ye que emondo ra. Mbia raaque mo ngue emondo eãte huee nyii ra. ⁵⁴ Viernes que aque mose ra. Mbia que icoquiatu ja quia sábado nonde ra. ⁵⁵ Ae cuña nyoï beite quia Jesús rese Galilea si nae, ùqui ngue nyoï sita imi ndese mae nda. Jesús raaque iti ji rese que mae tuchi ra. ⁵⁶ Nyebi que echoi uchuchua ra. Aba mbushimbusa que esaã nyoï ra. Sábado mose que ùqui uquenea ucua cote ra. Dios cheë si.

24

Jesús raaque quera si

¹ Isamamimbe tuchi que cuña nyoï domingo mose sita imi ndese mae nda. Aba mbushimbusa que ecuruchoi rei eichusë chusë sacua Jesús raaque rese ra. Cuña mo abe que nyoï quia erese ra. ² I que sita eraaque atiquia ruruba ji u ee ra. ³ Cuña ngue ique rei nyoï sita imi ye ra. Jesús raaque oreãte que ee ra. ⁴ Tiri i tuchi que ra. —¿Mañi nda aba re? i tuchi que ra. Aque mose que mbia nyeremo chi juã ee ra. Eirao nininya tuchi que chi ee ra. ⁵ Cuña ngue titi titi i tuchi u ra. Nyebe echi nguiã nyibi beite. Angeles que ñee ee ra. —¿Mbaerã jëingo Jesús raaque requia requia a re? Quera si que resë. ⁶ Emoate a resë. Quera si que resë. Sã ñee jëje siqui mose Galilea no. ⁷ “Mbia icua nda seisi iquia. Sembucha ra ira rese. Tres días mose ra aquera si”, i que jëje nyii resë, i que ángeles ñee cuña je ra. ⁸ Ùqui ndese que cuña ndua cote ra. ⁹ Cuña ngue nyebi cuaë mbia mbiirandu ja cote ra. Jesús chimbaaquiato once abe mbiirandu. ¹⁰ María Magdalena i que mbia mbiirandusa je ra. Juana i que emo je ra. María i que enongue je ra. Jacobo si que María ra. Cuña mo abe abe que ra. ¹¹ Nyia iã ñochi Jesús chimbaaquiato cuña ñee mose ee. Cuña ñee ñooño nei nguiã ee. ¹² Pedro que oso uchã sita imi ndese mae nda. Nyurucua que mae erese ra. Jesús umanda achõ ngue chi ee ra. Pedro que nyebi oso quia ndua ndua Jesús oreã ndese ra.

Jesús ngata querare uquiato rese

¹³ I que Jesús quieto nyeremo nyoï quia aque mose ra. Emaús quiti que echoi quia ra. Dos leguas que Jerusalén si ra. ¹⁴ Ùqui ngue nyoï quia ñee ñee nyue ra. Jesús mano nii. Jesús raaque oreã nii abe no. ¹⁵ Ùqui ñee ñee ndichã ngue Jesús si ra. Erese que Jesús si quia ngata cote ra. ¹⁶ Ùqui ngue mae ndei Jesús rese ra. Icuã eãte chõ ngue ra. Mbiamo nda eriqui rei ee raë. ¹⁷ Jesús que ñee nyee ee ra. —¿Mbae riñ jëingo ñee nyue ã nde? ¿Mbaerã jëya eãte riqui re? i que Jesús ñee ee ra. ¹⁸ Ùqui mo ngue ñee Jesús je cote ra. Cleofas, i equia ee. —¿Ereiranuate erese re? ¿Nde mii ño ereiranua erese ndeico mose Jerusalén nde? i que Cleofas ñee ee ra. ¹⁹ —¿Mbae rese? i que Jesús ee ra. Ùqui ngue ñeembe ee ra. —Jesús rese. Nazaret jenda rese. Dios cheë nenei neneisa tuchi rei que ae ra. Equirãcuã tuchi rei que ae ra. Mbia que mae ja tuchi rei equirãcuã ndese ra. ²⁰ Mbia rerecua que Jesús iquia cote ra. Sacerdotes rerecua abe chõ ngue Jesús iquia nguiã. Nyebe soldados equia nguiã mbucha ira rese cote. ²¹ Israel jenda rerecua rei nda ure je. Tres días chee namo cote emano mosenda bei.

²² Uresenda cuña mo ngue ñee uremundi tuchi ra. Ũquiñ ngue nyo: rei eatísaa nyaashĩ namo mose ra. ²³ Jesús raaque oreáte nda ee ra. Nyebe ecuaē nguiã urembiirandu cote. Angeles mo nda chi ee eatísaa ra. “Jesús que quera si ra”, i nda ángeles ñee ee ra. ²⁴ Aquere que ureresenda mo abe nyo: eatísaa ra. Cuña ñee ndui si que Jesús raaque oreáte ee ra. Jesús rese quiatu que mae eã nda, i que Cleofas ñee Jesús sí je ra. Jesús eã nda eriqui reĩ ee raē. ²⁵ Jesús que ñee ee cote ra. —¿Mbaerã jëaquiutuãte riqui re? ¿Mbaerã jëingo Dios cheē icuayãte re? ¿Mbaerã jëingo Dios cheē nenei neneisa chimbesa icuayãte re? ²⁶ Sã embesa ji ñee no. “Cristo ra mbae rasi saã ja oso nonde ibate”, i que embesa ji no, i que Jesús ee ra. ²⁷ Jesús que Dios cheē mbuchecua ja ee cote ra. Ngasi riĩ. Umano nĩ abe no. Uquera riĩ abe no. Moisés chimbesa que embuchecua ee ra. Aquere que Dios cheē nenei neneisa chimbesa abe mbuchecua ja ee ra.

²⁸ Ngasē ngue ũquiñ nyuchúaa cote ra. Jesús que ngata i abareã oso ra. ²⁹ Jesús ngata i abareã mose que ũquiñ eriquisã nda. —Eitō urerese aa ae. Tenda osote resē. Itondarute ra ndeje resē, i que ñee ee ra. Nyebe Jesús ique nguiã echuchúaa erese. ³⁰ Ngoi ja que quiaru nonde cote ra. Jesús abe que ngoi erese ra. Mbichae que esirō o je cote ra. Gracias i que Dios ibatendã je mbichae riĩ nda. Mbichae que esiquio mondo ee cote ra. ³¹ Ũquiñ mose tuchi que Dios mbia mumae turã tuchi Jesús icua sacua cote ra. Jesús icua ramo sacua cote. Jesús que quiachã asi esi cote ra. ³² Ũquiñ ngue ñee ñee nyue cote ra. —Jesús chō eriqui reaē. Nyebe nandeya tuchite riqui nguiã Dios cheē mbuchecua checua mose nande je ñeenda cúa, i que equia ñee ñee nyue ra. ³³ Nyebe echoi jei nguiã nyebi si Jerusalén. Huee que Jesús chimbaaquiату chi ñumunua ee ra. Eresenda mo abe rese. ³⁴ Ũquiñ ñumunua je que ñee ee ra. —Jesús que quera si ra. Ae bei. Simón ngue mae erese ra, i que ñumunua je ee ra. ³⁵ Aquere que ũquiñ nyeremo ñee mbia chumunua je cote ra. —Jesús rese que uremae ñeenda cúa ra. Urembaaquiату quiatu que umano nĩ nda. Uquera riĩ abe no. Mbichae riquio mose ure je, aque mose ramo ngue Jesús ureicua ra, i que mbia mbiirandu ja ra.

Jesús nyecua uchimbaaquiату je

³⁶ Ũquiñ ñee ua eã mose que Jesús nyecua ee ra. Mbia ite re. —Jëya chō serese, i que ñee ee ra. ³⁷ Mbia que titi titi i tuchi u mae erese ra. Aba checuayã nda Jesús riqui reĩ ee raē. ³⁸ Jesús que ñee ee ra. —¿Mbaerã jësiquichete riqui re? ¿Mbaerã “Jesús chō eriqui re” jenyee eã seje re? ³⁹ ¡Sã jël! Jemaee seo rese. Jemaee sei abe rese ae. Jëoco serese ae. ¡Sã se si chō jël! Aba checuayã nguia eroo eã nde. Equiangue eã abe no. Se rã eã, i que Jesús ee ra. ⁴⁰ O que eteacuquia ee cote ra. Hui abe que eteacuquia ee ra. ⁴¹ —Jesús chō eriqui re, i eã ngue ra. Ndua ndua chō erese. Eyate raque erese. Jesús que ñeembe ee ra. —¿Mbae mo ndei eu sacua aa re? i que ee ra. ⁴² Sira resi ji que emee ee ra. Irao abe que emee ee eretã ndesebe ra. ⁴³ Jesús que eisi eu bei ũquiñ ndésaa cote ra.

⁴⁴ Jesús que ñee ee cote ra. —Sã acheē jëje seico mose jendese nyii no. “Ae Moisés mbesa serĩ nae, ũquiñ nda ique ja serĩ cote. Dios cheē nenei neneisa chimbesa abe ra ique ja cote. Salmos ndesenda cheē abe ra ique ja serĩ cote”, ae que se quia jëje nyii. Ũquiñ ngue ique ja semana mose cote ra. Sequera mose abe no, i que Jesús ñee ee ra. ⁴⁵ Dios cheē ngue embuchecua checua ee cote ra. ⁴⁶ Jesús que ñeembe ee ra. —Sã embesa ji riqui ñee no: “Cristo ra mbae rasi saã tuchi mano nonde. Tres días mose ra quera si. ⁴⁷ Mbia ra echeē senei senei

tuchi cote. Jerusalén jenda je rane nda erenei nenei. Mbia ja je ra erenei nenei cote. ‘Jêicuã si jêhui rã. Cristo jêicuã mbutiã sacuã’, i tuchi ra mbia ja je Cristo rĩ cote”, i que embesa ji quia nae. ⁴⁸ Ũqui ique quia ã cote. Jemae nguia erese ã cote. ⁴⁹ Ae je Paba ñee jêje nae, “Espíritu Turã tamondo jêje”, i equia jêje nae, aque tamee jêje cote. A jenguchõ na Jerusalén. Paba ibatenda uquirãcuã mee nyee jêje, i que Jesús ñee uchimbaaquiату je ra.

Jesús nyui oso ibate

⁵⁰ Jesús que equerao ja pe jiri Jerusalén si cote ra. Betania i que hue sucha je ra. Jesús que o mumbate ñee uchimbaaquiату je cote ra. —Sã Dios jendeaquiату turã, i ee. ⁵¹ Aque mose tuchi que Jesús si nyui ibate erecha cote ra. ⁵² Ũqui ngue ñee turãte Jesús rĩ nda. Eya tuchi que nyebi nyoi Jerusalén nda. ⁵³ Dios chuchua que eriqui bei nyoi ñee turã Dios rĩ nda. Amén.

EL SANTO EVANGELIO SEGÚN SAN JUAN

Jesucristo rane ngue siqui nyii ra

¹ Dios cheẽ nane tuchi que nyii ra. Mbae ja si. Dios cheẽ ndei Jesús. Ae que siqui bei Dios rese ra. Dios si rei Jesús. ² Ae chõ ngue siqui bei Dios rese nyii ra. ³ Dios que mbae chao eã ae ae ra. Jesús rese ae mbae ao ja nguiã. ⁴ Jesús chõ mbia mingo nguiã ã. Nandemíngosa chõ nanderesae nguiã ã. ⁵ Nandemíngosa chõ mbae tesae tuchi nguiã itondaru. Itondaru quia ra emungue aroneãte. ⁶ Dios que emo mbu cote ra. Juan, i que ee ra. ⁷ Juan ngue tu aba resaesa renei nenei mbia je ra. Mbia mbiirandu randu ja. ⁸ Mbia aba resaesa icua ja, Juan ñee nguire. ⁹ Mbia aba resaesa eã ño Juan nde. Emo nii ño Juan ndiqui nguiã ñee. —Ae chõ nanderesae nguiã co, i que Juan nda. ¹⁰ Mbia aba resaesa que tu ibi cote ra. Mbia aba resaesa chooñoã tuchi que ra. Ae chõ aba resae ja nguiã ã. ¹¹ Mbia aba resaesa que siqui íbii cote ra. Mbia que eicua eãte chõ nda. Mbae aosa ja raque ae. ¹² Mbia aba resaesa que tu rei nguesenda mbirõ nda. Eresenda que eisiteã ñochí nguiã. ¹³ Mbia mii mii ño ngue eisi turã turã nguiã. Mbia mii mii ño ngue eicua icua nguiã. Ũquí je quia Dios riqui nguiã “seriirĩ” i. ¹⁴ Mbia riirĩ na eã ño Dios riirĩ ndiqui nguiã nyaacuquia cuquia ã. Áquẽ nyaacuquia rã eã ño Dios riirĩ ndiqui nguiã nyaacuquia cuquia ã cote. Sã emo ndiqui ngüinisi rese embiirĩ nae, ũquí na eã ño Dios riirĩ ndiqui nguiã nyaacuquia cuquia ã. Dios ae chõ “seriirĩ” i nguiã ee Dios icua mose. ¹⁵ Jesús rei Dios cheẽ. Jesús que tu mbiarã cote ra. Mbia tuchi que ae cote ra. Siqui que equia urerese cote ra. Echisaã turã ndese que ureico mae cote ra. Eaturã tuchi chõ ae re. Ngu rã si chõ ae re. Ichõiñosa reã tuchi chõ ae re. ¹⁶ Juan ngue Jesús senei senei nguia mbia je ra. —Co rĩ ngue acheẽ jêje resẽ. “Ae ra tu serui, aque quiarei ererecua tuchi sesi. Ae rane nguia siqui rei seã mose nyii”, ae rei que jêje resẽ. Ae siqui co cote, i que Juan mbia je ra. ¹⁷ Jesús turã tuchi que ra. Nyebe eriqui nguiã mbae turã mee mee mbei nande je. ¹⁸ Dios cheẽ mumbayã sacua ngue Moisés ñee ndei nguiã nande je. Jesús quiatu ngue tu nguiã cote. Dios turã nenei nenei nande je. Jesús quiatu ngue Dios cheẽ ñooñoa senei senei nguiã nande je no. ¹⁹ Emo maeãte Dios rese. Eriirĩ ae que nandembiirandu randu quia Dios rese ra. Eriirĩ nguiarei ngu rã si.

Juan el Bautista ñee turã Jesús rĩ

²⁰ Judíos Jerusalén jenda que mbia mondochoi ñee Juan je ra. Sacerdotes mondo eria. Levitas mo ndese. —¿Aba nde re? i sacua Juan je. ²¹ Juan ngue ñee nyecua tuchi ee ra. —Christo eã ño se re, i que ee ra. ²² —¿Abate nde re? ¿Elías chõ nde re? i que judíos chimondo ñeembe Juan je ra. —Tei. Elías eã ño se re, i que Juan ee ra. —Dios cheẽ mbuchecuasa ra tu, i equia nae, ¿ae chõ nde re? i que mbia ñee Juan je ra. —Tei, i que Juan ee ra. ²³ Judíos chimondo que ñeembe Juan je ra. —Ndecheẽ embuchecua ure je. ¿Abate nde re? i nda ndecheẽ uresenei ũquí je, ae urembu. ¿Mañi ure ra nderĩ nde? i que Juan je ra. ²⁴ Juan ngue ñee ee ra. —Tacheẽ jêje cote. Mbia chõ se chã. Mbia amingo quiatu quiatu quia co. Ae ñee mombo mombote quia mbia je turuquia ite re nae, ae chõ se re. —“Ñeenda jembuquiche nandererecua mbaerã”, ae i quia, aque chõ se re, i que Juan nda. (Isaías chimbesa rui si chõ Juan ñee nguiã.)

²⁴ Ae ñee ñee nguia Juan je nae, ùqui⁷ ndei fariseos chimondo ùqui⁷. ²⁵ Fariseos chimondo que ñee ee ra. —¿Mbaerã ereico bautizar i re? Cristo eã ño nde resê. Elías eã ño nde resê. Dios cheê mbuchecuasa eã ño nde resê, i que Juan je ra. ²⁶ Juan ngue ñee ee ra. —I je chõ aico nguiã bautizar i. Emo nguia siqui raque quia jêite re. Aque quia jêicuayãte nguiã co. ²⁷ Enonde aico co. Aque ra tu serui. Ae quia ererecua tuchi sesi re. Erã si eã ño se re, i que Juan fariseos chimondo je ra.

Jesús rei oveja rã

²⁸ Betábara, i que hue sucha je ra. Huee quia fariseos chimondo ñee nguiã Juan je. Ama Jordán ndobei. Ae Juan ndiqui bautizar i, huee. ²⁹ Isamami nongue que Juan mae Jesús rese ra. Jesús que tu quia Juan ndichã nda. —Co mbia icuã ndiquicharõ sacuã ndu quia co. Oveja riirĩ na eriqui Dios je. Ae ra nandëicuã mbutiã nandesi. ³⁰ Erĩ ngue aico ñee jêje. “Ae ra tu serui, aque quiarei ererecua tuchi sesi. Ae rane nguia siqui rei seã mose nyii”, ae que se quia jêje. Co chi eru quia co cote. ³¹ Se sí que aicuayãte nyii ra. I je que bautizar ae quia mbia je cote ra. † nda Israel jenda Cristo icua, i que Juan nda. ³² Juan ngue ñee mbei quia ra. —Espíritu Turã ndese que amae nda. Nguichi que u Jesús arõ nda. Nyurusĩ rã ngue eru nguichi earõ nda. Ibate si. ³³ “¿Aba ra Cristo re?” ae beite que se quia ra. Dios que ñee seje ra. “¡I je eico bautizar i mbia je jê! Ae arõ nda Espiritu Turã ndu nguichi bei nae, ae quiatu bautizar i sacuã mbia je Espiritu Turã je”, i que Dios seje ra. ³⁴ Atea que se cote ra. Ae rei Dios riirĩ. Aicuate se cote, i que Juan nda.

Jesús mbia irabo uchimbaaquaturã

³⁵ Isamami nongue que Juan ndiqui hue sí no nda. Nguesenda nyeremo ndese que eriqui ra. ³⁶ I que Jesús ucua quia ra. —Qui mbia icuã ndiquicharõ sacuã coi quia qui. Oveja riirĩ na eriqui Dios je, i que Juan Jesús riĩ nda. ³⁷ Juan ndesenda nyeremo ngue Juan ñee ñandu ra. Nyoĩ que Jesús rui cote ra. ³⁸ Jesús que mae nguique quti ra. —¿Mbae jêsequia quia re? i que mae erese ra. Ùqui⁷ ngue ñee Jesús je ra. —Mbia mbaaquiatusa, ¿ma ndechuchua ma nde? i que ee ra. ³⁹ —Jenyu mae erese, i que Jesús ee ra. Nyoĩ que mae echuchua rese ra. Tenda nyesecote mose que echoĩ erese ra. Tenda oso cheete que echĩ erese cote ra. ⁴⁰ Ùqui⁷ nyeremo ngue Juan ñee ñandu ra. Siqui que Jesús rui cote ra. Andrés, i que ùqui⁷ mo je ra. Simón Pedro nongue que ae ra. ⁴¹ Andrés que oso asite ngõngue requia ra. Simón ndequia. —Dios chimondo que uretea ra. Cristo que uretea ra, i que Andrés ngõngue je ra. ⁴² Andrés que ngõngue querao Jesús rea cote ra. Jesús que mae erese ra. Ñee ngue ee ra. —Simón ño nde re. Jonás ndiirĩ ño nde re. Cefas, i ra ndeje cote. Cefas, i chõ Pedro re, i que Jesús ee ra.

Jesús Felipe irabo; Natanael abe

⁴³ Isamami nongue que Jesús ñee nda. —Taso Galilea, i que ra. Ngasẽ ngue Felipe je ra. —Serui eico, i que ee ra. ⁴⁴ Betsaida jenda que Felipe ra. Hue jenda si chõ Andrés re. Pedro rese. ⁴⁵ Felipe que oso Natanael ndequia cote ra. —Ae riĩ Moisés riqui embesa mbesa cose, aque que uretea ra. Ae riĩ Dios cheê mbuchecuasa riqui embesa mbesa cose, aque que uretea cote ra. Jesús chõ eriqui re. Nazaret jenda chõ eriqui re. José riirĩ ño eriqui re, i que Felipe Natanael je ra. ⁴⁶ Natanael que ñee Felipe je ra. —¿Mbae turã mo nda tu Nazaret jenda re? i que ra. —Echu erea ae, i que Felipe ee ra. ⁴⁷ Natanael

que tu Jesús ríichã nda. Jesús que mae erese ra. —Co israelita turã tuchi mo ndu quia co. Aba mbíirí ríisa reã tuchi mo ndu quia co, i que Jesús Natanael nîi nda. ⁴⁸—¿Mañi ere quia seicuate re? i que Natanael Jesús je ra. —Amae ngue nderese ra. Felipe ‘quiatuchu’ i nonde ndeje. Iraqui re que amae nderese ra. Higo iqui re, i que Jesús ee ra. ⁴⁹ Natanael que ñeembe ee ra. —Mbia mbaaquiatusa, Dios ndiirí ño nde riqui re. Israel jenda rerecua tuchi chõ nde riqui re, i que Natanael Jesús je ra. ⁵⁰ Jesús que ñee ee ra. —¿Seicuate se re? “Iraqui re que amae nderese ra”, ae que ndeje, ¿aque bei bei seicua quia co re? Mbae turã tuchi rese ra eremae cote, aque si, i que Jesús Natanael je ra. ⁵¹ Jesús que ñee si ee ra. —Tacheẽ nyecua jêje. Ibei ra obo jêje. Angeles nda nguichi quichi quia seje. Nyoï nyoï si ra equia ibate. Angeles ibatenda. Dios rimba. Jemae nda erese, i que Jesús ee ra.

2

Emo ngüinisirã nguereco

¹ Tres días mose que emo ngüinisirã isi ra. Galilea. Caná, i que hue sucha tubiriã je ra. Mbia que ñumunua nua fiesta raã ngüinisirã isi mose ra. Jesús si abe que siqui huee ra. ² Jesús abe que siqui huee no nda. Uchimbaaquiatu rese. ³ Mbia que uva rique mbei u huee ra. Ua jei que mbia je ra. Jesús si que ñee nda. —Uva rique que ua jeite ra, i que ñee Jesús je ra. ⁴ Jesús que ñee ee ra. —¿Mbaerã ereico ñee seje ùquiñ nde, Taï? Achecua jei eã nda mbia je, i que Jesús usi je ra. ⁵ Esi que ñee mbia rimba je ra. —¡Jesús cheẽ ndui si chõ jéingo jê! i que ee ra. ⁶ Cántaro atate que chi ra. Seis que cántaro ra. Sita ao ji. Ûquiñ jie que judíos riqui nyoï nyoï querabe ra. Ûquiñ cántaro jie que cien litros jaaja ra. ⁷ Jesús que ñee mbia rimba je ra. —Cántaro jemombisẽ mbisẽ ja i je, i que Jesús ee ra. Nyebe emombisẽ ja nguiã. ⁸ Jesús que ñeembe ee ra. —Embisengue jenyarabe jiri mondo fiesta raã naasa je, i que ee ra. Erimba que echara serao ee cote ra. ⁹ Uva rique rã si chõ ngue i fiesta raã naasa je cote ra. Fiesta raã naasa que ubi erese ra. Eiranuã ngue ubi erese ra. Erimba achõ ño ngue jirandu ja nguiã. Ae ngüinisirã isi quia nae, aque je que fiesta raã naasa ñee nda. ¹⁰ —Mbia ja quiarei uva rique turã nane mee mee nguia mbia je querabe. Eturã mbei ja mose, ereã jiri mbei ruquia ruquia mbia je cote. Nde quia eturã tuchi ererecoquiatu nguiã. Hui bei sacua cote, i que ra. Jesús chisaã nîi ño eriqui nguiã ñee. ¹¹ Ûquiñ nane ngue Jesús saã mbia mae sayã nyii ra. Uva rique rã si tuchi que i raã nda. Ûquiñ ngue esaã Galiléaa eriqui mose ra. Caná, i que hue sucha tubiriã je ra. Hue rane ngue Jesús uquirãcuã ndeacuquia mbia je ra. Echimbaaquiatu que Jesús icua tuchi cote ra. ¹² Huesi que Jesús choi Capernaum nda. Usi rese. Ngõngue rese. Uchimbaaquiatu abe rese. Hue que echi itõ mocoïte ra.

Jesús oso Dios chuchúaa

¹³ Fiesta rurubite mose que Jesús si Jerusalén nda. Pascua, i que judíos aque fiesta je ra. ¹⁴ Jesús que oso Dios chuchúaa ra. Huee que mbia chi ticuasú mee mee nyue mbae isiquia ribishorõ nda. Ovejas abe no. Nyurusí cuasu abe no. Emo ngue chi ngoi ra. Mbae isiquia que esibishorõ shorõ u ra. ¹⁵ Mbia iruã nuãsa que Jesús saã nda. Esã nderecua. Aque je que Jesús mbia mbusẽ ja mondochoi Dios chuchua si ra. Ticuasú abe. Ovejas abe. Ae mbae isiquia sibishorõ shorõ nguia, ùquiñ mbae abe que embuchiichere chere ja mesa ra. Mbae isiquia mombo mombo íbii. ¹⁶ Ae nyurusí cuasu mee mee nguia mbia

je nae, ũquí je que Jesús ñee asite ra. —Ñ nyurusí cuasu jendao Dios chuchua sí. Mbae isí isisa jësaã saã ñochí u Paba chuchúaa, i que Jesús ñee ee ra. ¹⁷ Jesús chimbaaquiato que ndua ndua quia embesa jí rese ra. —Sebí tuchi ndechuchua, i que embesa jí huí nda. Ũquí ndese que echimbaaquiato ndua ndua ra. Jesús mbia icuã mbusë mondochoi mose Dios chuchua sí. ¹⁸ Judíos que ñee Jesús je ra. —¿Ma mbia mae sayã nda eresaã ure je re? Ure ndeíca sacuã. “Ererecua chõ eriquí re”, ure nda ndeje chã, i que judíos ñee Jesús je ra. ¹⁹ Jesús que ñee ee ra. —Jë Dios chuchua mbutiã mose, asiquicharõ nda se. Tres días mose ra asiquicharõ, i que Jesús ra. ²⁰ Judíos que ñeembe Jesús je ra. —Tenda atate que nanderu riquí itõte Dios chuchua ao ao resë. Cuarenta y seis años. ¿Mañi ere ra tres días eao ja nde re? i que judíos Jesús je ra. ²¹ Nguete ríí ngue Jesús riquí ñee nda. Mbia chumunuasa ríí eã ño ngue ñee nguiã. ²² Jesús quera sí mose ramo ngue echimbaaquiato ndua aque echeë ndese cote ra. Embesa jí rese ndua. —Í nguia equia re, i que echimbaaquiato ndua ndua cote ra. Jesús quera sí mose.

Jesús mbia chiã icuate

²³ Mbia tubiriã ngue Jesús icuate aque mose ra. Fiesta de la pascua mose. Siquí mose Jerusalén. Mbia mae sayã naa naa mose que mbia eicuate cote ra. ²⁴ Jesús que mbia ndua ndua icuate quia ra. Nyebe ñee tuchi eã nguiã mbia je. ²⁵ —Éi ño mbia nguiã ã, i aronea mbia mo Jesús mbiirandu. Jesús quiato que mbia chiã icuate quia ra.

3

Nicodemo oso ñee Jesús je

¹ Mbia mo ngue siqui ra. Nicodemo, i que ee ra. Fariseo que ae ra. Judíos rerecua que ae ra. ² Itondaru mo ngue esi Jesús rea ra. —Mbia mbaaquiatusa chõ nde re. Dios chimbu chõ nde re. Ureícate que ra. Mbia mae sayã nda mbia mo saã eã, Dios siquiã mose erese, i que Nicodemo Jesús je ra. ³ Jesús que ñee ee ra. —Tacheë nyecua ndeje. Ae nyaacuquia sí eã, ũquí nda siquiã Dios rese, i que Jesús ee ra. ⁴ Nicodemo que ñee Jesús je ra. —¿Mañi nda mbia cuasu nyaacuquia sí re? ¿Usí riequí rí nda esi sí re? ¿Nyaacuquia sí nonde re? i que Nicodemo Jesús je ra. ⁵ Jesús que ñee ee ra. —Tacheë nyecua ndeje. Ae nyaacuquia i achõ je nae, ũquí nda siquiã Dios rese. Ae nyaacuquia Espíritu Turã abe je nae, ũquí nguia ra siqui Dios rese cote. ⁶ Mbia nyaacuquia mose, mbia sí chõ eriirí nde. Emo nyaacuquia mose Dios ríirina, Dios rá sí chõ eno nde. ⁷ “Nducuã”, erechí nda secheë mose jë. “¡Jenyaacuquia sí ja chõ jë!” se i mose. ⁸ ¿Mbaranguiti sí quiririã ndiqui ichu re? ¿Mbaranguiti ra esi re? Ereicuayãte. Quiririã erechandu raque. Eremae ãte erese. Eí sí chõ Dios ríirí nde. Ae nyaacuquia Dios je nae, i que Jesús ee ra. ⁹ —¿Mañi ũquí nde? i que Nicodemo Jesús je ra. ¹⁰ Jesús que ñee ee ra. —¿Secheë ereicuayãte quia re? Mbia mbaaquiatusa raque nde. Judíos mbaaquiatusa raque nde. ¹¹ Tacheë nyecua ndeje. Ae ureíca, ũquí ño uresenei senei ndei nguiã jëje. Ae rese uremae, ũquí ño uresenei senei ndei nguiã jëje. “Ichõíño nguiã”, jenje chõchí nguiã urecheë mose. ¹² “Ichõíño nguiã”, jenje chõchí nguiã secheë mose. Ibi jenda renei nenei mose jëje. Secheë nda jemumba tuchi cote, ibatenda nenei nenei mose jëje. ¹³ Emo nguichiãte ibei sí. Se mii ño ngue achu nguiã nguichi ibei sí. Mbiarã ño ngue achu nguiã. Asobe ra ibei. Ibei jenda chõ se re. ¹⁴ Sã

Moisés mbei raanguia mbuchecua mbia je turuquia re cose no. Eĩ si ra mbia sembucha ira rese. ¹⁵ ƒ nda seicuasa quiachã eã mbei sesi. ƒ nda seicuasa siqui bei ibate serese.

Dios nyesequa ja mbia rese

¹⁶ Dios que nyesequa tuchite mbia ja rese ra. Nyebe nguiĩrĩ m̃iĩ mbu nguiã mbia je. Eriĩrĩ icua sa ra manoa. Siqui bei rae. ¹⁷ Mbia mbasi sacua eã ngue Dios nguiĩrĩ mbu ibii ra. Mbia rirõ sacua mbae icua si quia ñi ngue Dios nguiĩrĩ mbu nguiã. ¹⁸ “Eso tata cuasu”, i eã nda Dios nguiĩrĩ icuasa je. “Eso tata cuasu”, i Dios quia nguiĩrĩ icuasa reã je ã. Jesús icua eãte quia ñene. ¹⁹ “Eso tata cuasu”, i Dios quia nguiĩrĩ icuasa reã je. Ebite quia ñi itondaru nyaashĩ si re. Nyaashĩ tu mose ibii, isiteã ngue ra. Mbae icua ndese quia eriqui beite nguiã. ²⁰ Ae siqui beite quia mbae icua ndese, ũqui nguia siquichete nguiã nyaashĩ si. Nyaashĩ ndiichã sereãte quia ñene. “ƒ nda mbia mae eã nandechisaã ndese mbae icua ndese”, i ñene. ²¹ Ae mbae turã saã mbeite quia nae, ũqui nguiatu nyaashĩ siichã sete nguiã. ƒ nda echisaã saã nyecua mbia je. ƒ nda mbia ñee, “Dios quirãcuã nguia siquite nguiã erese”, i ra mbia ñee, i que Jesús ra.

Juan el Bautista ñee turã Jesús r̃iĩ

²² Jesús que nyoĩ Judéaa cote ra. Uchĩmbaaquiato rese. Huee que eriqui mocoĩte ũqui ndese ra. Huee que eriqui bautizar i mbia je ra. ²³ Juan abe que bautiza r i quia mbia je ra. Enón, i que sucha tubiriã je ra. Salim ndurubi que ra. Hue quiato ngue i tubiriãte re. Mbia que ngaẽ ngaẽ nguia erea ra. Juan ngue bautizar i quia ee ra. ²⁴ Mbia Juan tarõ nonde m̃iĩ ngue eriqui bautizar i huee nyii ra.

²⁵ Judío mo ngue ñee icua icua Juan ñĩmbaaquiato je ra. Bautizar i r̃iĩ. — ¿Aba quia ra bautizar i mbia mbitirõ sacua nde? i que ñee icua icua nyue ra. ²⁶ Nyebe Juan ñĩmbaaquiato nyoĩ nguiã ñee Juan je. —Ae rese ereico Ama Jordán ndobei, ae abe riqui bautizar i mbia je huee. Ae eresenei senei turã nguia ure je, aque. Mbia riqui tuchite erui ã, i que Juan ñĩmbaaquiato ñee ee ra. ²⁷ Juan ngue ñee ee ra. —Coche ñene. Dios ibatenda quiarei. Emo siqui aroneate mbia rerecuarã, Dios emingo sereã mose. ²⁸ Cristo tu nonde que Dios sembu resẽ. Mbae mbuquiche ja sacua Cristo tu nonde. “Cristo eã ño se resẽ”, ae checua rei que jẽje resẽ. ²⁹ Jesús rui ra mbia siqui ja. Sã emo ngũinisirã nguereco no nae. Sã eninisi riqui ngu rese no. Sã eru quiato abe eya erese no. Eru quiato rã ño seya riqui Jesús rese co, mbia siqui mose erui. ³⁰ Jesús quia ererecua tuchi riqui nguiã sesi co. Ererecua eã ño aico nguiã se co, i que Juan nda.

Jesús rei ibatenda

³¹ Jesús rei ibatenda. Nyebe equiatio riqui nguiã mbia si co. Ibi jenda chõ nande re. Ibi jenda rese achõ ño nandeaquiato nande re. Ae quiarei ibatenda. ³² Ibatenda umaesa senei senei nguia mbia je co. Ae ehandu ibate nae, ũquiĩ abe esenei senei nguia mbia je co. Mbia m̃iĩ jiri riqui echeẽ andu andu ã. ³³ ũquiĩ m̃iĩ m̃iĩ ño Jesús cheẽ isi turã nguiã ã. ũquiĩ m̃iĩ “Dios ichõĩnosa reã”, i tuchi nguiã ã. ³⁴ Dios quiato que Jesús mbu ra. Nyebe Jesús riqui Dios cheẽ nenei nenei co. Dios que Espiritu Turã mondo tuchite Jesús je ra. ³⁵ Jesús rese Paba riqui nyesequa tuchite co. Erucucha quia ae re. Nyebe Paba uquirãcuã mee tuchi nguiã ee. ƒ nda Jesús riqui mbae rerecuarã ja. ³⁶ Ae Dios rucucha icua nae, ũquiĩ nda siqui bei Dios rese. Ae Dios rucucha icuayã

nae, ũquĩ nda siquĩã tuchi erese. Nyoĩ eã mbei ra ibate. Dios ra ũquĩ mundo tata cuásuu.

4

Jesús ñee acuanĩ mo je

1-2 Mbia que siqui tuchite Jesús rui cote ra. Bautizar i sacua mbia je. Jesús sí que bautizar i eã nda. Echĩmbaaquiatsu quia ngue bautizar i nguiã ee. — Fariseos riqui ndeucuãyãte ã. Mbia siqui tuchi mose nderui, i que mbia mo Jesús mbiirandu ra. 3 Jesús jirandu mose que esi Judea recha cote ra. — Tasobe Galilea, i que ra. 4 Samaria ni ngue esi ra. 5 Ngasẽ ngue Samaria ra. Sucha tubĩriã mo ngue ngasẽ nda. Sicar, i que hue je ra. Jacob chĩmee ibi ndurubite que huee ra. Ae emee nguiĩrĩ José je. 6 Jacob chĩbicoĩ ibi que chĩ huee ra. Noria. Jesús que ngoi huĩ uquenea ucua huee ra. Noria ji. Tenda nandeite re mose. Ñeenda ishote que ee ra.

7-8 Jesús ae que tiba huee ra. Echĩmbaaquiatsu que nyoĩ sucha tubĩriã nda. Mbae mo isi uchĩurã. Acuanĩ mo ngue tu ngasẽ i rea huee ra. Samaria jenda que ae ra. —I embu rã. Tayu, i que Jesús ñee ee ra. 9 Judíos que ñee eã mbei quia mbia Samaria jenda je quẽrabe ra. Isho bei que eriquĩ nyesi ra. Nyebe acuanĩ ñee nguiã Jesús je. —Judiotẽ nde resẽ. ¿Mbaerã ereico ñee seje re? ¿Mbaerã ereico “i embu” i seje re? Samaria jenda chõ se resẽ, i que acuanĩ Jesús cheẽ ndibishorõ nda. 10 Jesús que ñee ee cote ra. —Dios chĩmee ereicuayãte quia co. Co ereico seicuayãte co. Eĩ nda “i raanguia embu seje” ere rei seje. Seicua mose. Eĩ nda i mbia mingõ beisa amee ndeje, i que Jesús acuanĩ je ra. 11 Acuanĩ ngue ñee si Jesús je ra. —Noria cuate nyeresẽ. I arasa ereru eãte quia a resẽ. Ma je quia ra i raanguia erchera seje. 12 Nanderu ñiinda abe nda íu íu quia a yenda ye resẽ. Jacob. Nguiĩrĩ ndese. Erimba abe nda íu íu quia a yenda ye resẽ. ¿Ndeaquiature ae si nde re? i que acuanĩ Jesús je ra. 13 Jesús que ñee acuanĩ je ra. —Mbia íu mose a yenda jie, eisei jei chõ nda eno. 14 Ae i raanguia mbei quia nae, ũquĩ nda eisei chiã mbei cote. I raanguia sechĩmee nguiã ra siqui bei echĩangui re. Uchi uchi bei ra equia echĩangui re. Emingõ bei sacua, i que Jesús acuanĩ je ra. 15 Acuanĩ ngue ñeembe Jesús je ra. —I raanguia embu nembae seje no. Eĩ nda seisei chiã mbei. Eĩ nda achu achu eã a jenda ara, i que acuanĩ ee ra.

16—Eso nderu rea. Eru seje a, i que Jesús ee ra. 17—Seru eãte nyeresẽ, i que acuanĩ nda. Jesús que ñee ee ra. —Ae beite. Nderu eãte que ereico namo co ra. 18 Nderurã ngue eretea mocoĩte rei resẽ. Cinco. Ae erereco co nae, nderu tuchi eã ño aque re. Erecheẽ ñooño ãte rei nguiã seje a, i que Jesús acuanĩ je ra. 19 Jesús cheẽ mose que acuanĩ ñeembe ee no nda. —Mbae mbuchecuaa nde reae. Dios resenda nde reae. 20 Ureramei nda ngaẽ ngaẽ nguiã a ibi ato ra. Ñee ñee sacua Dios je. “Jerusalén quiatsu mbia cheẽsa Dios je re” jenyẽ chõchĩ nguiã judíos, i que acuanĩ Jesús je ra. 21 Jesús que ñee acuanĩ je ra. —Tacheẽ nyecua ndeje. Mangue chooño ãte ra mbia ñee Dios je cote. Namõ jiri. Jerusalén mui eã. A ibi ato mui eã no. 22 Jeñee mbeite raque equia Dios je ã. Dios icuare rocoĩ. Ure quia ureico nguiã Dios icuate ã. Judíos chõ ure re. Judío rei mbia rirõsa mbae icua si. 23 Namõ jiri ra Dios quiatote ñee turã turã Dios rĩĩ uchĩangui re. Mangue chooñoa cote. Dios quiatote ra ñee turã bei quia Dios rĩĩ cote. Echeẽ nguire. 24 Dios rei espĩritu. Mae aronea erese. Nandechĩangui re chõ nandeico Dios andu ã. Nandechĩangui re nandechẽ turã turã Dios rĩĩ. Dios cheẽ nguire, i que Jesús ra. 25 Acuanĩ ngue ñee Jesús

je ra. —Mesías ra tu ibate si. “Cristo”, i equia ee nae, aque ra tu íbii cote. Tu mose ra mbae mbuchecua ja mbia je. Ūquí aicuate quia co, i que acuaní nda. ²⁶—Cristo chō se re. Ae je ereico ñee, i que Jesús acuaní je ra.

²⁷ Aque mose que Jesús chimbaaquiato ngaē ngasē cote ra. —Jesús riquichí ñee acuaní je a re, i que eu nyuruirate mae erese ra. —¿Mbae jenyé quia ñee nde? i eā ngue emo nda. Ireí ireíte quiato ngue ñee Jesús je re. ²⁸—Se rei Cristo, i mose que acuaní ía tuchi ra. Ñio ngue esecha oso ra. Mbia mbiirandu randu sucha tubiriã jenda. ²⁹—A emo ndiquí a. Semumbusē ja que ra. Cristo chō ae reae. Nyao rá mae erese, i que acuaní mbia je ra. ³⁰ Nyebe mbia nyoí ja nguiã ícuaa. Jirandu mae Jesús rese. Acuaní ñee nguire.

³¹—Mbae mo eu, i chiibe íbe que echimbaaquiato Jesús je ra. Acuaní oso mose sucha tubiriã. ³²—Tei. Sechiu jëicuayáte jë, i que Jesús ee ra. ³³—Emo mbae mo queru echirurã ndeae, i que echimbaaquiato ñee ñee nyue ra. ³⁴ Jesús que ñee ee ra. —Ae rí Paba ñee seje nae, ūquí tasaã mbei quia ee. Paba cheē mumbayã mose, ūquí ño sechiu riquí nguiã. ³⁵ “Pete mbae ishao shao ñi pe”, jenyé chōchí nguiã ã. Mbiaco yenda ea ireí ishao iriã na ño mbia riquí nguiã ã. Sã mbia riquí nyoí mbae a ishao shao no. Eí jenyé si chō nguiá nyoí mbia reru reru seje. Serese siqui sacuã. ³⁶⁻³⁸ Sã emo ndiquí mbae a ishao shao no. Sã mbae acha riquí mbae mondo mondo ee eishao shao ribishorō no. Sã emo ndiquí mbae eí tiquia tiquia no. Sã emo ndiquí eishao shao equiche mose no. Eí si chō secheē no nde. Sã emo ndiquí secheē nenei nenei nyii no. Aquer emo mbia reru reru seje no. Ae secheē nenei nenei quia nyii nae, ae mbia queru queru quia seje cote nae, ūquí ía jate nyiese cote. Ae emo ndiquí secheē nenei nenei nyii, huee jaemondo quia aque. Mbia reru reru sacuã seje. Se mbia mingo beí sacuã. Emo nane serenei nenei nguiã ee nyii. Jë jëingo ereru reru seje ã cote. Jëya jate riquí jenyiese ã cote. Ae secheē nenei nenei quia nyii, ūquí ndese jëya jate, i que Jesús ra.

³⁹—Jesús que semumbusē ja ra, i que acuaní ñee sucha tubiriã jenda je ra. Nyebe mbia tubiriã riquí nguiã Jesús rui hue jenda cote. ⁴⁰ Samaria jenda que nyoí Jesús rea cote ra. —Eico are jiri ure rese, i que mbia Jesús je ra. Nyebe Jesús itō nguiã nyeremo huee. ⁴¹ Jesús sí que mbia mbaaquiato quiato cote ra. Nyebe mbia tubiriã siqui tuchi nguiã erui cote. ⁴² Mbia que ñee acuaní je cote ra. —Nde chō ngue urembiirandu rei nyii ra. Uremae ngue erese cote ra. Echeē ngue urechandu cote ra. Nyebe ureico nguiã eicua tuchi ã cote. Erecheē ñooñoa ngue ra. Cristo tuchi chō ae re. Mbia rirōsa mbae icuã sí chō ae re, i que mbia ñee acuaní je ra.

Jesús ererecua mo ndiirĩ mbucherō

⁴³ Huee que Jesús itō nyeremo nda. Samáриа. Hue si que esi si nyuruã Galilea quti ra. ⁴⁴—Mbia ra Dios cheē nenei neneisa quereco turã eã hue jenda sí mose, i que Jesús nyii ra. Nyebe esi nguiã Galiléaa. ⁴⁵ Jesús que ngasē Galiléaa cote ra. Mbia hue jenda que embucasē turã nda. Mae nguiatu equia erese Jerusalén neaē. Pascua mose. Mbia mae sayã nguiatu ngue Jesús saã saã nguiã ee nyii. Nyebe eyate nguiã Jesús cuasē mose cote.

⁴⁶ Jesús que oso sí Caná de Galilea no nda. Ae eriquí i mbuchiicabo uva riqe rá mbia je nyii nae, huee que esi si ra. Hue rurubi que ererecua mo ndiirĩ ndasi riquí ra. Capernaum, i que hue je ra. ⁴⁷—Jesús ru Judea si a cote, i que mbia ererecua mbiirandu ra. Nyebe ererecua si nguiã Jesús rea cote. —Seriirĩ chí mano seríte qui. Nyao terembucherō seje, i que ererecua

ñee ee ra. ⁴⁸—Mbia mae sayã naa eã mose ra jê seicuayã ñochĩ nde, i que Jesús ee ra. ⁴⁹—Nyao jei rã. Seriiĩ nda mano nyee re, i que ererecua Jesús je ra. ⁵⁰—Esobe nyebi ndechuchúaa. Nderiĩrĩ ngue nyerõ nda, i que Jesús ee ra. —Jesús ñee ñooño aroneate, i que ererecua oso nyebi ra. ⁵¹ Echuchua rurubi que erimba ngaẽ erobeishĩ ñee nda. —Nderiĩrĩ ngue nyerõte ra, i que ñee embiirandu ra. ⁵²—¿Ma tenda seriiĩrĩ ngasi ucua re? i que ererecua ra. —Tenda nyiichere ramo mose que nderiĩrĩ ngacu ucua curi ra, i que mbia ñee ee ra. ⁵³—Hue tenda tuchi que Jesús ñee seje curi ra. “Nderiĩrĩ ngue nyerõ nda”, i seje curi, i que ererecua ra. Nyebe eriqui nguiã Jesús icua tuchi cote. Echuchua jenda abe que Jesús icua ja cote ra. ⁵⁴ Judea si que Jesús ru Galiléaa ra. Mbia mae sayã nyeremo ngue Jesús saã Galilea jenda je ra. I que esaã uva riquerã nyii ra. Ererecua riiĩrĩ ngue embucherõ namo no nda.

5

Jesús Amei mbucherõ

¹ Aquere que judíos mbae fiesta ra. Jesús que oso Jerusalén fiesta mose ra. ² Oveja iquesa que chĩ huee ra. Mbia icua abe que chĩ huee ra. Cinco tei que chĩ hue eicua mama nda. Betesda, i que judíos hue mbia icua je ra. ³ Mbia rasi que chi jate nyaara huee ra. Taiqui re. Eresayã. Ecuatayã. Echaacua. Mbia rasi chumbarã que chi huee ra. I rebera raarõ arõ. ⁴ Angel mo nda nguichi quichi quia ra. I mumbera sacua mbia rasi je. —Ae rane nda ua ama ndebera mose nae, aque rane nda nyerõ, i que mbia ra. ⁵ Amei ndasi ima mo ngue chi bei aque rĩ nda. Treinta y ocho años que amei ndasi ra. ⁶ Aque que chi nyaara Jesús je ra. —Aa chõ erasi riqui bei a cose re, i que Jesús uchiangui re ra. —¿Erecherõ sete ere? i que ee ra. ⁷ Amei ndasi que ñee ee ra. —Aba quia ra sembua i ye, i rebera mose. Mbia rane ngue secuã secuã nguia ra. I rebera mose, i que erasi Jesús je ra. ⁸ Jesús que ñee ee ra. —Ëhuã. Ndequisa erao. Eso, i que Jesús ee ra. ⁹ Echeẽ mose que nyerõ nda. Uquisa que esirõ serao ra. Erasiã ngue oso cote ra. Sábado mose que Jesús embucherõ nda. ¹⁰ Nyebe judíos paama i nguiã embucherõ mose sábado mose. —Co mose que mbia uquenea ucua ra. ¿Mbaerã nda ndequisa ererao re? i que judíos Jesús chimbucherõ je ra. ¹¹ —Ae sembucherõ, aque que ñee seje ra: “Ndequisa erao. Eso”, i que sembucherõsa seje ra, i que judíos cheẽ mose ra. ¹² Judíos que ñee ee ra. —¿Aba aque re? ¿Aba “ndequisa erao”, i ndeje re? i que ra. ¹³ —Áicua eãte se. Aba chõ sembucherõ. Mbia tubiriãte quiatu ngue re, i que erasi judíos je ra. Jesús oso rei. ¹⁴ Emo mose que Jesús ngasembe uchimbucherõ je ra. Dios chuchúaa. Ñee ngue ee ra. —¡sã jê! Arembucherõ ngue se resẽ. ¡Mbae icua nda eresaã sichĩ jê! Mbae mo nda jei tuchi ndeje cote, i que Jesús ee ra. ¹⁵ Amei ngue oso judíos mbiirandu cote ra. —Jesús chõ sembucherõ nguia reaẽ, i que judíos je ra. ¹⁶ Nyebe judíos paama i nguiã Jesús je. Nandeiquia, i. Sábado mose quia Jesús riqui nguiã mbia mbucherõ cherõ judíos je. Judíos uquenea ucua mose. Nyebe judíos paama i nguiã ee. ¹⁷ Jesús que ñee judíos je cote ra. —Paba recoteã mbeite riqui co. Namõ abe. Se abe Paba rã si serecoteã teã mbeite riqui co, i que Jesús ee ra. ¹⁸ Nyebe judíos riqui nguiã paama i tuchi Jesús je. Iquia serĩ serĩte que cote ra. Jesús que judíos cheẽ mumba mumba ra. Mbia rasi mbucherõ cherõ sábado mose. —Dios rã si aico co. Paba rei Dios, i que Jesús ra. Nyebe judíos paama i tuchi nguiã ee.

Jesús rei Dios rucucha

19 Jesús que ñeembe judíos je ra. —Dios rucucha rei se. Dios rucucha ae ra mbae saã eã. Se ae ra mbae asaã eã. Paba chisaã ndese maende ae aico nguiã mbae raã naa se abe co. Ae Paba saã saã nguia, ùqui asaã saã ja quia se abe co. 20 Dios rucucha rei se. Paba riqui nyesequa tuchi serese co. Paba riqui uchiao reaqua tuchi seje co. Uchiao ra eteaqua tuchi seje cote. Mbia mae sayã tuchi. Jenyuruira tuchi ra mae erese cote. 21 Paba mbia raaque mbuquera quera. Se abe ra mbia raaque ambuquera quera. Ae amingo bei sete, ùqui abe ra amingo bei. 22 Paba ra mbia mo mondo eã tata cuásuu. “Nde chõ mbia equirirõ ndirõ mondo tata cuásuu”, i que Paba seje ra. 23 ñnda mbia ñee turã serĩ. Sã mbia riqui ñee turã Paba rĩ no. Ae ñee turã eã nguia serĩ, ùqui ñee turã eãte Paba abe rĩ no. Dios rucucha rei se. Dios chimee ndei se. 24 Tacheẽ nyecua jêje. Secheẽ andusa ra siqui bei. Paba icuaa ra siqui bei. Nyoĩ eã mbei ra tata cuásuu. Paba ra emingo bei cote.

25 Tacheẽ nyecua jêje. Namo jiri ra mbia raaque secheẽ andu. Secheẽ mumbasa reã nda siqui bei. 26 Paba quiarei mbia mingo beisa. Se abe rei mbia mingo beisa Paba rui si. 27 Se abe ra mbia amondo tata cuásuu. “Nde chõ mbia equirirõ ndirõ mondo tata cuásuu”, i que Paba seje ra. Se chĩ erucucha. 28 jenyuruira techĩ nda secheẽ mose jê! Mbia raaque ra secheẽ ñandu ja chee. 29 Júa ja ra ngua si. Ae siqui turã, ùqui nda Dios mingo bei cote. Ae siqui icuã icuã nguia, ùqui nda nyoĩ tata cuásuu.

Serĩ ño embesa ji ñee, i Jesús

30 Se ae ra mbae asaã eã. Paba cheẽ ndui si chõ aico nguiã mbia mondo tata cuásuu. Paba cheẽ ndui si chõ aico nguiã mbia mingo bei no. Paba cheẽ nda achabiã. Paba cheẽ nguire chõ aico nguiã mbae raã naa co. Se ae eã ño ñene. 31 Se ae eã ño acheenei enei nguiã mbia je co. ñnda “ichõĩño” jenye rei seje. 32 Aque emo ndiqui serenei nenei mbia je aque. Aque eriqui ñee ñooño eã serĩ aque. 33 Jemo ngue jemondo Juan je. Jêirandu sacua serese. Juan ngue ñee ñooño eãte jêje ra. 34 Ae mbia ñee ñee serĩ, ùqui ñee ndeseã aico nguiã se. “Dios riri eã ño co re”, i mose mbia serĩ, Dios riri mbei chõ se re. Jêicuã mbutiã sacua ño aico rei nguiã ñee jêje. 35 Tata rendi rã ndei Juan. Mbae resae ja raque. Huee que jengu mbiri ndei erese ra. Jêhui jei chõchĩ esi. 36 Juan ñee ngue mbia mbiirandu rei serese ra. Sechisaã nguia mbia mbiirandu tuchi serese Juan ñee si. Dios cheẽ nguire ae aico nguiã mbae ao ao co. Sechisaã ndese mae jee mbia jirandu nguiã serese cote. “Dios chimondo quiarei Jesús”, i mbia cote. 37 Paba abe riqui serenei nenei mbia je co. Paba cheẽ jeñanuate raque. Jemae sayãte raque Paba no. 38 Jê nguia seicua yãte nguiã co. Paba chimondo chõ se re. Nyebe Paba cheẽ chĩ eãte jendese. 39 Embesa ji rese jêingo mae tuchite raque. “Embesa ji ra nandemingo beite”, jenyechĩ nguiã. Serese jembiirandu sacua ño embesa ji re. Se quiatu mbia mingosa tuchi re. 40 Jê nguia jêingo sereãte nguiã serese. ñnda se jaemingo beite rei. 41 Jêingo eã mose Dios rese, sebiãte jeñee turã turã mose serĩ. 42 Co aico jêicuate co resẽ. Jenyesequa eãte quia Dios rese co resẽ. 43 Paba que sembu resẽ. Jêo eã ñochĩ serese. Paba chimondo eã tu mose, aque rese quia ra jêo tuchite cote. 44 Mbia resa rae jêingochĩ nguiã jêturã naa naa. Dios je quiarei jêturã eãte. ¿Mañi jenye quiatu ra equia seicua re? 45 Se quia ra jêicuã ambuchecua eã Paba je. Moisés chimbesa quia jêicuã mbuchecua nguiã. “Moisés chimbesa rei mbia mingo beisa”, jenyechĩ nguiã. 46 Moisés chimbesa jêicua eãte quia ã. Nyebe jêingo nguiã seicua eãte ã. Serĩ ngue Moisés embesa ra. 47 “Nyia”

jenye eã mose Moisés chimbessa je, “nyia” jenye eã nda secheẽ mose abe no, i que Jesús judíos je ra.

6

Jesús mbichae mbeta tuchi

¹ Aquere que Jesús choi ama ndisa rasa ra. Galilea, i que ama ndisa je ra. Tiberias, i abe que ee ra. Hue robei que echoi ra. ² Mbia que nyoï tuchite Jesús rui ra. Mbia mae sayã ngue Jesús saã saã nguia ra. Echisaã ndese que mbia mae mae nda. Mbia rasi mbucherõ cherõ mose. ³ Sita ibate rĩ ngue Jesús choi ra. Huee que echĩ ngoi uchimbaaquiato rese ra. ⁴ Fiesta de pascua rurubi que ra. ⁵ Mbia tubiriã ngue ngaẽ nguia Jesús rui ra. Jesús que mae erese ra. Ñee ngue Felipe je ra. —Mbia tubiriã tuchi. ¿Mangue ra echĩurã nandeisi mangue re? i que Jesús ee ra. ⁶ Jesús eicuate raque. —Mañi nda Felipe quia secheẽ mose reae, i que Jesús ra. ⁷ Felipe que ñee ee ra. —Doscientos plata mbia chayãte mbia chiurã isi sacua. Echayã tuchite, i que Felipe ra. ⁸ Andrés abe que chi ra. Jesús chimbaaquiato. Simón Pedro nongue. Ae que ñee nda. ⁹ —Á ãquẽ mo ndiqui a. Cinco mbichae rerequia a. Sira nyeremo abe rerequia a. Echayãte quiato nda re. Mbia tubiriãte quia ñene, i que Andrés Jesús je ra. ¹⁰ —“Jengoi ja”, jenye mbia je, i que Jesús ra. Quiata turã ngue huee ra. Quiata tose que mbia ngoi ja ra. Mbia cuabẽ. Cinco mil que mbia ra. ¹¹ Jesús que mbichae isi cote ra. Ianye, i que ngu je cote ra. Mbichae rĩ. Mbichae que embuchao chao cote ra. Uchimbaaquiato je que emondo mondo ra. Echimbaaquiato que emondo mondo mbia je cote ra. Ae chi ngoi. Sira abe que embuchao chao mbia je ra. Mbia que eu ja ra. Mbia que echosei chiã chiã nyee ra. ¹² Mbia rio ja mose que Jesús ñee uchimbaaquiato je cote ra. —i Mbia chiũ sique jemunua nua jẽ! ¡jendecoquiato ja jẽ! i que ra. ¹³ Echĩu sique que emunua ja ra. Doce irairu que puk i ja ra. Mbichae sique sique. Cinco chõ ndei que mbichae nyii aẽ. ¹⁴ Mbia que mae tuchi Jesús rese ra. Mbichae mbeta rese ra. Ûquĩ ndese que mbia riqui mae eã tuchi nyii ra. —Dios cheẽ nenei neneisa chõ co riqui re. Ae uresaarõ arõ nguia, ae chõ eriqui re, i que mbia Jesús rĩ nda.

¹⁵ Jesús que mbia icua ra. —Mbia ra seisichĩ suruchoi ererecuarã nde, i que ra. Nyebe esi si nguã mbia recha. Sita ibate rĩ ngue esi erecha ra.

Jesús ngata i arõ

¹⁶ Itondaru ndaru que Jesús chimbaaquiato choi ama ndísaa ra. ¹⁷ Nyui nyui que canoa ye cote ra. Aque echoichĩ nguia iasa Capernaum aque. Jesús que nyebi eã mbeite u ee ra. Itondaru chee. Nyoï chee que erecha ra. ¹⁸ Quiririã ngue tu icuã icuã ee ra. Ama ndiite re mbia reco mose. I rebera que tu asi asi tuchi ra. ¹⁹ Mbia que nyoï choi bei canoa ye ra. Una legua. Jesús que canoa curubite cote ra. I arõ ngue esi quia ngata ra. Canoa yenda que mae erese ra. Echĩã ngue cuaãcuã i tuchi ra. ²⁰ —Se chõ nyeresẽ. ¿Mbaerã jẽingo siquiche sesi re? i que Jesús ee ra. ²¹ Canoa yenda que oote erese cote ra. Mbua que canoa ye ra. Ngasẽ asi que ecuaẽ íbii cote ra.

Mbia cuabẽ Jesús requia

²² Mbia cuabẽ ngue chi sobei ra. Isamami ngue Jesús tiãte ee ra. Nyebe ñee nguã nyue. —Canoa mĩ ño ngue chi resẽ. Canoa ye eã ño Jesús si iasa resẽ. Echimbaaquiato achõ ño ngue nyoï iasa canoa ye resẽ. ¿Mangue Jesús riqui mangue re? i que mbia cuabẽ u ñee Jesús requia ra. ²³ Aque mose que canoa

mo ngaẽ ngasẽ ee ra. Tiberias si que canoa cuaẽ nda. Mbia mbichae usa rurubi que ecuaẽ tiba ra. ²⁴ Jesús tiã mbei que mbia je huee ra. Mbichae úsaa ra. Echimbaaquiatsu abe tiã ngue mbia je ra. Nyebe mbia choi nguiã erequia canoa ye. Ngasẽ ngue coquimo cote ra. Capernaum, i que hue sucha je ra.

Mbichae rã ndei Jesús

²⁵ Mbia cuabẽ ngue ngaẽ ama ndasa coquimo ngote ra. Ngasẽ ngue Jesús je cote ra. —Mbia mbaaquiatusa, ¿manose erechu ngasẽ aa re? i que mbia cuabẽ Jesús je ra. ²⁶ Jesús que ñee ee ra. —Tacheẽ nyecua jêje. Se jembuquiarure chõ jêingo nguiã serese. Se jembiore chõ jêingo nguiã serese. Sechisaã icuare rocoi. Jemae sayã ngue asaã saã ndei quia resẽ. ²⁷ Jenyiuã ndese jêingochi nguiã ndua tuchite. Uqui nda ua jeite. Ae ua eã mbeite quia, uqui ndese quiatu jendua. Mbia mingo beisa rese quiatu jendua. Se rei mbia mingo beisa. Se rei Dios rucucha. Paba que uquirãcua mondo seje ra, i que Jesús ee ra. ²⁸ Mbia que ñeembe Jesús je ra. —¿Mañi ure ra equia re? ¿Mbae rese ra aba riqui Dios mbia re? i que mbia Jesús je ra. ²⁹ Jesús que ñeembe ee ra. —Dios que sembu ra. Seicua quia se. Seicua mose ra Dios ia tuchi jendese cote, i que Jesús mbia je ra. ³⁰ —¿Mbae mo nda eresaã na ure je re, uremae sayã nde? f nda uremae nderese. Eĩ ure ra ndeicua cote. ³¹ Cose nda nanderamei ndiqui maná u u turuquia rĩ nda. Sã embesa ji no: “Dios que mbichae mbu ibei si mbia je ra”, sã embesa ji riqui i no, i que mbia Jesús je ra. ³² Jesús que ñee ee ra. —Tacheẽ nyecua jêje. Moisés eã ño ngue mbichae mondo nguiã mbia je ibei si. Paba chõ ngue emondo nguiã ibei si mbia je. Aque mbichae ra mbia mingo bei eã. Paba ra mbia mingo beisa mondo mbia je cote. ³³ Dios riqui mbichae mbuae mondo mondo mbia je co. Ae Dios mondo mondo nguiã mbia je co nae, aque que tu ibei si ra. Aque rei mbia mingo beisa, i que Jesús ra. ³⁴ Mbia que ñee Jesús je ra. —Aquembichae mbichae emondo mondo bei quia ure je, Urererecua, i que mbia Jesús je ra.

³⁵ Jesús que ñee ee cote ra. —Mbichae rã ño se re. Mbia mingo beisa chõ se re. Serese siqui mose ra jeniãcua eã mbei. Serese siqui mose ra jêisei eã mbei. Jêya bei rae. ³⁶ Jemae ndei que equia serese resẽ. Seicuayã mbei chõchi nguiã ã. Acheẽ ndei que jêje nyii resẽ. ³⁷ Ae Paba mee seje mbia nae, uqui nda siqui bei serese. Uqui nda aisi teã eã mbei. ³⁸ Paba que sembu ibei si resẽ. Secheẽ nguire eã ño aico nguiã mbae raã naa. Paba cheẽ nguire ae chõ aico nguiã mbae raã naa co. ³⁹ “Ae amondo ndeje nae, uqui mo nda quiachãchi?”, i que Paba seje ra. Ambuquera ja ra se, se tube mose ibii. ⁴⁰ Se rei Dios rucucha. Paba que sembu ra. Ae seicuate nae, uqui nda siqui bei. “Uqui nda amingo bei”, i que Paba ra. Uqui nda ambuquera ja, se tube mose ibii, i que Jesús ra.

⁴¹ Judíos que paama i Jesús je ra. —Se rei mbichae rã. Ibei si que achu ra, i mose que judíos ñee icuã icuã Jesús je ra. ⁴² —Jesús chõ co re. José rii rĩ ño co re. Eru rese que nandemae ndesẽ. Esi abe rese que nandemae ndesẽ. ¿Mbaerã eriquiñee nande je re? “Ibei si que achu ra”, i nande je re, i que mbia ñee ñee nyue ra. ⁴³ Jesús que ñee ee cote ra. —¿Mbaerã jêingo ñee icuã icuã serii nde? ⁴⁴ Mbia ae ra siqui eã serese. Paba emingo mose serese, aque mose ra eriqui tuchi serese cote. Uqui nda ambuquera si mingo sechube mose ibii. ⁴⁵ “Dios ra mbia mbaaquiatsu ja”, sã embesa ji riqui i no. Nyebe ra Paba cheẽ andusa siqui bei serese. Nyebe ra Paba cheẽ mumbasa reã siqui bei serese. ⁴⁶ Emo ngue mae eãte Paba rese ra. Se mi ño ngue amae erese ra. Esi chõ ngue achu resẽ. ⁴⁷ Tacheẽ nyecua jêje. Ae seicuate quia nae, uqui nda siqui bei. ⁴⁸ Se

rei mbichae rã. Mbia mingo beisa rei se. ⁴⁹ Nanderamei ngue maná u u turã ndei quia turuquia re ra. Emo mose que mano mano ja ra. ⁵⁰ Mbichae mbuae chõ asenei senei nguiã jêje co. Mbia mingo beisa rei mbichae mbuae. Aque que tu ibei si ra. Ae mbichae mbuae u nae, ùquĩ nda siqui bei. Ûquĩ nda ua eã mbei. ⁵¹ Se rei mbichae. Ibei si que achu ra. Mbia mingo beisa rei se. Ae seu nae, ùquĩ nda siqui bei. Mbichae ra amee mbia mingo bei sacua. Aque mbichae rei serete sí. Seroo sí, i que Jesús judíos je ra.

⁵² Judíos que ñee icuã icuã nyue cote ra. —¿Mañi nda nguete mee nandechiurã nde? i que nyue ra. ⁵³ Jesús que ñee ee cote ra. —Tacheẽ nyecua jêje. Mbiarã ngue achu ra. Serete jêu eã mose, jêingo bei eã ndae. Seruqui jembei eã mose, jêingo bei eã ndae. ⁵⁴ Ae serete u quia nae, ùquĩ nda siqui bei. Ae seruqui mbei quia nae, ùquĩ nda siqui bei. Ûquĩ nda ambuquera si mingo, sechube mose íbii. ⁵⁵ Serete rei mbia chiurã. Seruqui rei mbia chimbei rã. ⁵⁶ Ae serete u quia nae, ae seruqui mbei quia nae, ùquĩ nda siqui bei sechianguí re. Se abe ra aico bei echianguí re. ⁵⁷ Paba riqui bei co. Paba riqui semingo se abe co. Eĩ nda serete usa abe siqui bei. Amingo bei ra se. ⁵⁸ Mbichae mbuae chõ asenei senei nguiã jêje co. Ae tu ibei si. Maná na eã ño aque mbichae re. Maná ngue nanderamei u u rei ra. Maná ngue mbia mingo bei eã nda. Emo mose que mano ja chõ nda. Ae sechimee u quia nae, ùquĩ nguia ra siqui bei, i que Jesús judíos je ra. ⁵⁹ Eĩ ngue Jesús quia judíos mbaaquiату quiату ra. Capernaum. Judíos chumunuãsaa.

Mbia tubiriã hui Jesús sí

⁶⁰ Jesús cheẽ andusa que ñee tuchi nyue ra. —Mbaranguiatuã tuchi chõ Jesús cheẽ ndiqui re. Echeẽ nandemumba eã aroneate quiату quia re, i que nyue ra. ⁶¹ —Mbia riqui ñee icuã icuã tuchi chõ secheẽ ñii, i que Jesús uchianguí re ra. Nyebe ucheẽ mbuchecua ee cote. —¿Mbaranguiatuã secheẽ jêje re? ⁶² ¿Mañi jenyre ra mae mose serese re? Seso sí mose ibate re. ⁶³ Nande rete nandemingo eã nguiã. Nande aĩ ño nandemingo nguiã. Secheẽ nguia ra mbia mingo bei ibátee. ⁶⁴ Seicua ja eãte quiату nguiã ã. Jemo seicua eãte quia ã, i que Jesús ee ra. Mbae ao ramo mosenda bei que Jesús mbia icua uchianguí re ra. —Ã nda seicua. Ã nda seicua eã. Co ra semondo mbia icuã je, i que Jesús mbia icua uchianguí re nyii ra. ⁶⁵ —Acheẽ ngue jêje nyii, ùquĩ sí aico ñee jêje a. Mbia ae ra siqui eã serese. Paba emingo mose serese, aque mose ra eriqui tuchi serese cote, i que Jesús ra.

⁶⁶ Aque mosebe bei que mbia tubiriã hui Jesús sí cote ra. Ae siqui erese nyii nae, ùquĩ mo ngue hui ja esi cote ra. Ngatayã ngue equia erui cote ra. ⁶⁷ Jesús que ñee uchimbaaquiату je cote ra. Doce je. —¿Jê abe ra jêhui sesi re? i que uchimbaaquiату je ra. ⁶⁸ Simón Pedro que ñee ee ra. —Tei, Urererecua. Aba rui quia ra ureico cote. Ndecheẽ ño mbia mingo beisa resẽ. ⁶⁹ Ureico ndeicua ã cote. Cristo rei nde. Dios rucucha rei nde, i que Pedro ra. ⁷⁰ Jesús que ñee ee cote ra. —Jê doce que jaẽirabo rei ra. Sechimbaaquiату sacua. Jemo ngue diablo rã nda, i que ra. ⁷¹ Judas Iscariote rĩ ngue eriqui ñee nda. Diablo, i. Simón ndiirĩ ndei Judas. Ae quia Jesús mee nguiã mbia icuã je. Jesús chimbaaquiату mo ndaque.

1—Jesús nandei quia, i rei que judíos quia ñee ñee nyue ra. Nyebe Jesús si eã nguiã Judea cote. Galilea bei que eriqui ngata ra. ² Fiesta rurubi mose que cote ra. Tuchua ñetê ngue judíos saã saã mbei quia aque fiesta mose ra. Curubite que cote ra. ³ Jesús nongue que ñee ja ee ra. —Eso rã Judea. I nda ndechimbaaquiatu mae ja ndechisaã ndese Judea jenda. ⁴ Mbae esaã nyecua chõ mbia resa rae jê! I nda mbia ndeicua ja. Co ereico mbia mae sayã naa naa co. Mbia resa rae quiatu esaã saã, i que enongue ee ra. ⁵ Jesús nongue abe que Jesús icuayâte ra. Nyia, i eã Jesús cheẽ je. ⁶ Jesús que ñee ee cote ra. —Emo mose quia ra aso nyecua mbia je cote. Jê jêso jê ae ae, jêsose mose. ⁷ Dios cheẽ mumbasa riqui jêucuyã eãte raque jê. Se quia eriqui nguiã seucuyâte ã. “Jenyisaã saã nguia eicuãte riqui nguiã”, ae quiatu nguiã ee co. Nyebe eriqui nguiã seucuyâte ã. ⁸ Jê ño jêso fiesta rea. Se ra asoã. Emo mose quia nda achecua nguiã mbia je cote, i que Jesús ngõngue je ra. ⁹ Jesús que siqui are jiri Galilea cote ra.

Jesús mbia mbaaquiatu quiatu fiesta mose

¹⁰ Jesús nongue que nyoi fiesta rea cote ra. Aquere que Jesús abe si mingue cote ra. Ngasê nyecuyã ño ngue oso ra. —Mbia ra jiranduchí serese re, i que uchiangui re ra. ¹¹ Judíos rerecua que Jesús sequia sequia ja u ra. —¿Ma Jesús riqui ma nde? i ja que fiesta mose ra. ¹² Mbia que ñee ata atate Jesús rĩ nda. —Jesús turâte que, i que emo emo nda. —Jesús turã eã ngue ra. Mbia mbĩĩ rĩte que equia no nda, i que emo emo no nda. ¹³ Mbia que siquichete judíos rerecua si ra. Nyebe mbia ucheẽ mbuchecua eã nguiã Jesús rĩ.

¹⁴ Fiesta ite mose que Jesús si Dios chuchua mbia mbaaquiatu quiatu cote ra. ¹⁵ Judíos que nyuruiru tuchi Jesús cheẽ andu ra. —Eaquiatute quia eriqui re. ¿Mangue eriqui ñimbaaquiatu mangue nyii re? i que mbia ra. ¹⁶ Jesús que ñee ee ra. —Secheẽ ae eã asenei senei nguiã jêje co. Paba cheẽ ño asenei senei nguiã jêje. Ae sembu. ¹⁷ Emo siquise mose Dios cheẽ ndui, aque ra Dios cheẽ icua tuchi. Aque ra ñee. “Ucheẽ ño eã Jesús senei senei nguiã mbia je co. Dios cheẽ ño esenei senei nguiã mbia je co”, i ra aque ñee serĩ. ¹⁸ “iSã mbia ñee turã mbe i serĩ jê!” i ra emo ucheẽ achõ nenei nenei. “iSã mbia ñee turã mbei Dios rĩ nguiatu jê!” ae chõ nguiã Dios cheẽ nenei nenei se co. Acheẽ ñooño eã ño nguiã co. Mbia ambĩĩ rĩ eã ño nguiã co. ¹⁹ Moisés que Dios cheẽ mbesa rei nande je ra. Nande emumbayã sacua. Jê nguia rei Dios cheẽ mumba. ¿Mbaerã jêingo sei quia serĩte re? i que Jesús ee ra. ²⁰ Mbia que ñee ee cote ra. —Emo ndiqui ndeiquia serĩ eãte co. Aba checuyã icuã ae nembicuã ndeae, i que mbia Jesús je ra. ²¹ Jesús que ñee ee cote ra. —Mbia rasi mo ngue ambucherõ sábadu mose. Aque mii ño ngue asaã ndei nguiã. Aque mii je chõ jêingochĩ nguiã nyuruirate mae serese. ²² Moisés que circuncisión teacuquia jêje ra. Nanderamei nane ngue circuncisión saã nguiĩĩ je ra. Nyebe jêingo nguiã sábadu mose abe circuncisión naa naa jendiĩĩ je. ²³ Moisés cheẽ nguire chõ jêingo nguiã circuncisión naa naa jendiĩĩ je ã. Sábado mose abe. ¿Mbaerã jêingo paama i seje mbia mbucherõ mose sábadu mose re? ²⁴ “Aque eicuãte”, jenye jei chõchĩ nguiã. Jêirandu turã na erese nyii, i que Jesús ee ra.

Ibatenda chõ se re, i Jesús

²⁵ Jerusalén jenda que ñee ñee Jesús rĩ cote ra. —A Jesús riqui ñee mbia je a. ¿Nandererecua ra Jesús iquia eã si chõ nde? ²⁶ A eñi nyecua ñee mbia ite re a. Nandererecua ñee eã tuchi chõchĩ ee. Teachõ tuchi chõchĩ. ¿Cristo

eriqui reĩ nandererecua je re? ²⁷ Cristo eã ño Jesús re. Galilea jenda chõ ae re. Cristo tu mose quiatu ra nandeiranuate. Ma si chõ nda eru, i que Jerusalén jenda ñee nda. ²⁸ Jesús que echeẽ ñandu ja ra. Dios chuchúaa eriqui mose mbia mbaaquiatu quiatu. Nyebe Jesús echeẽ ndibishorõ nguiã cote. —¿Ma si achu co re? ¿Jẽ seicuate re? Se ae achu eã nguiã co. Sembu ji ae aico nguiã co. Ichõĩnosa reã ae ngue sembu nguiã. Ae rese jemaẽ ãte nae, ae chõ sembu nguiã. ²⁹ Se ae que amae erese ra. Esi que achu ra. Ae chõ sembu nguiã co, i que Jesús ee ra. ³⁰ Mbía que paama i Jesús cheẽ mose ra. —Jesús nandeisi etarõ sacua, i rei que mbia ñee nyue ra. Ae mbia eisã ño nguiã. —Aque mose ra eremano, i ãte quiarei Dios ee. ³¹ Mbía tubirĩa ngue Jesús icua icua ramo ngua cote ra. Nguerecuarã. —Cristo tuchi rei co. Co eriqui mbia mae sayã naa naa tuchi co. Emo aquiatu mo nda tuãte rei. Co mĩ tuchi chõ ndei Dios chĩmbu co, i que mbia tubirĩa ngua ñee ñee Jesús rĩ nda.

Fariseos paama i Jesús je

³² Fariseos que nyiisaquia mbia cheẽ ndese ra. Mbía ñee turã turã mose Jesús rĩ. Nyebe fariseos paama i nguiã Jesús je. Policia jenda mo ngue emondo rei Jesús isi sacua nda. Sacerdote rerecua abe que policia jenda mondo rei Jesús isi sacua nda. ³³ Jesús que ñee nda. —Aico mbirĩ ño nguiã jendese a cote. Aquere ra aso si Paba rea. Ae sembu. ³⁴ Jẽ nda serequia cote. Serea eãte ra se cote. Ae ra aso nae, huee jengasẽ aroneate, i que Jesús ee ra. ³⁵ Judíos que ñee nyue ra. —Manguiti ra esi reae. Manguiti ra nandecuasẽ aroneate ee reae. Judíos siqui quia griegos rese nae, ùquĩ ndea ra esi reae. Griegos mbaaquiatu sacua ndeae. ³⁶ “Serequia ra se cote. Serea eãte ra se. Ae ra aso nae, huee jengasẽ aroneate”, i chõchĩ nguiã nande je. ¿Mbaerã eriqui ñee nande je ùquĩ nde? i que judíos u ñee nyue ra.

Jesús icuasa rei i riõ na

³⁷ Fiesta ua nonde que mbia ñumunua tuchi cote ra. Fiesta mumba bei. Aque mose que Jesús ñi juã ñee mbia ite re ra. —“Emo isei mose, sã eru serea. Ambiu ra se. ³⁸ Ae ra seicua nae, i riõ na nda ùquĩ. Iãcuã turã na nda ùquĩ”, sã embesa ji riqui i no, i que Jesús ucheẽ mbirãtãte mbia je ra. ³⁹ —Ae ra seicua nae, ùquĩ je ra Espiritu Turã mondo, i ñene. Espiritu Turã mba nonde chõ eriqui nguiã ñee. Jesús oso eã mose ibate chõ eriqui nguiã ñee.

Mbía ñee atate Jesús rĩ

⁴⁰ Mbía tubirĩa ngue chi Jesús cheẽ andu ra. Ùquĩ mo ngue ñee nyue ra. —Co rei Dios cheẽ nenei neneisa co. Ae ursaarõ arõ ngua co, i que u ñee Jesús rĩ nda. ⁴¹ Emo emo ngue ñee nda. —Co rei Cristo tuchi co, i que ra. Emo emo ngue echeẽ sibi shorõ no nda. —Tei. ¿Mañi nda Galilea jenda Cristo re? Hue jenda eã ño nda Cristo ndesẽ. ⁴² “David riiri nda Cristo. Belén jenda ra Cristo, David rã si”, sã embesa ji riqui i no, i que mbia ñee ñee nyue ra. ⁴³ Hue rĩ ja mbia ñee eãchĩ Jesús rĩ. Mbía que ñee ata ata Jesús rĩ nda. ⁴⁴ —Jesús nandeisi serao tarõ, i rei que emo emo ñee nda. Isiã si que ra.

Fariseos Jesús icuaya

⁴⁵ Policia jenda ochi que nyoĩ nyebi fariseos je cote ra. Sacerdotes rerecua je abe nyebi. —¿Mbaerã Jesús jendu eã ure je re? i que ererecua policia jenda je ra. ⁴⁶ Policia jenda que ñee ee ra. —Aque Jesús riqui mbia mbaaquiatu turã tuchi aque. Ae rã si emo mbia mbaaquiatu turã aronea, i que policia jenda ñee mbia rerecua je ra. ⁴⁷ Fariseos que ñee policia jenda je cote ra. —¿Jẽ abe

chee chõ Jesús jembĩĩrĩ irĩ nguia re? ⁴⁸ Nandererecua mo ngue “coche rei” iã tuchi Jesús je resẽ. Fariseos mo abe que “coche rei” iã tuchi Jesús je resẽ. ⁴⁹ ã mbia ataque riqui Dios cheẽ icua eãte ã. Quiachã ja ra Dios si, siqui mose Jesús rese, i rei que fariseos ra. ⁵⁰ Nicodemo abe rei fariseo. Ae tu Jesús je isa nae, aque que ñee fariseos je ra. Uataque je ra. ⁵¹ —Emo nandembasi mbasi chooño aroneate. Echeẽ nandechandu rane nguia tu. Nandeirandu ja rã nguia tu erese. Embasi nonde. Eĩ ngue Moisés embesa mĩi nande je ra, i que Nicodemo uataque je ra. ⁵² Fariseos que ñee ee cote ra. —¿Nde abe chõ Galilea jenda Jesús rese re? Embesa ji rese emae mae. Dios cheẽ nenei neneisa mo eãte que Galilea jenda resẽ, i rei que fariseos ñee asi Nicodemo je ra. ⁵³ Mbia que nyoi ja uchuchua cote ra.

8

Cuña mo siqui emo ndu rese

¹ Jesús que oso Monte de los Olivos ra. ² Isamami ngue Jesús si nyebi si Dios chuchúaa ra. Eresaitõ ndabe. Mbia que esichã tuchi ra. Jesús que ngoi ra. Mbia mbaaquiato quiatu. ³ Fariseos que cuña mo curucuaẽ Jesús je ra. Embesasa rese que cuña ndurucuaẽ ee ra. Cuña nda siqui emo ndu rese mbia je ra. Mbia ite re que fariseos cuña mĩi nda. ⁴ Ae cuña curucuaẽ nae, ùquĩ ngue ñee Jesús je ra. —Urembaaquiatusa, mbia que mae cuña ndese ra. Emo ndu rese siqui mose. ⁵ Moisés que ñee nande je ra. “¿Jẽiquia sita je”, i que Moisés quia ã mbia rĩi nda. ¿Mañi ere ra ã nĩi ñee nde re? i que cuña ndurucuaẽsa ñee Jesús je ra. ⁶ —Jesús nandembĩĩrĩ. I nda ñee icuã. I nda mbia nandembĩĩcuã Jesús je cote, ichõ equia nyii reaẽ. Nyebe cuña ndurucuaẽchĩ ee reaẽ. Jesús que nyatiquio chõ nda. Ibi que embesa mbesa o je ra. ⁷ —¿Mañi ere ra nde cuña je re? i bei que mbia quia Jesús je ra. Jesús que juã ñee mbia je cote ra. —Jemo turã mbeite mose, sã aque rane cuña chei sita je, i que Jesús ee ra. ⁸ Nyatiquio si que ibi mbesa ra. ⁹ Jesús cheẽ andu mose que mbia rerecua ireĩ ireĩ ja chõ nda. —Nandecua jate que, i ja chõ ngue ñee uchiangui re ra. Nyebe echoi nguia usẽ ja. Amei nane ja que ra. Eataque quia usẽ nguia erui cote. Ererecua que usẽ ja ra. Jesús ae que siquichõ nda. Cuña ndesechõ. ¹⁰ Jesús que juã mbia rerecua ruibe cote ra. Cuña je que ñee cote ra. —¿Manderurucuaẽsa ma nde? “Nandechei rã sita je”, ¿iãte emo nguia nderĩi co re? i que Jesús ñee cuña je ra. ¹¹ —Tei. Emo ñeeãte, Sererecua, i que cuña Jesús je ra. Jesús que ñee ee cote ra. —Se abe ra acheẽ eã ndeje. Eso rei. ¡Mbae icuã nda eresaã sichĩ jẽ! i que Jesús cuña je ra.

Tata rendi rã ndei Jesús

¹² Jesús que ñee si mbia je ra. —Mbia ja mbaaquiatusa chõ se re. Tata rendi rã ño aico nguia mbia je co. Ae siqui serui nae, ùquĩ nda siquiã itondáruu. Ùquĩ amingo bei quia querabe co, i que Jesús mbia mbaaquiato ra. ¹³ Fariseos que ñee Jesús je cote ra. —Ndechue chõ ereico nguia ñee mbia je. Nyebe mbia “coche rei” i aronea ndechẽ je, i que fariseos ñee Jesús je ra. ¹⁴ Jesús que ñee echeẽ ndibishorõ nda. —Sechue acheẽ ndaque mbia je. “¡Ae bei jẽ!” i chõ mbite raque aba secheẽ mose. Ae si achu nae, huee jẽicua yãte. Ae ra aso nae, hue abe ra jẽicua yãte no. Se ae aicua nguia co. ¹⁵ Jeñee icuã jei chõchĩ nguia aba rĩi. Mbae mumbusẽ ja mose rocoĩ. Eĩ ae eã ño nguia se. ¹⁶ “Co eicuãte”, ae eã nguia se ae co. Paba rese chõ aico nguia mbia mumbusẽ ja co. Nyebe aico nguia ñee Paba cheẽ ndui si co. ¹⁷ “Mbia nyeremo ñee mose hue rĩ si, ‘ae

beite' jenyé chō", i que Moisés jêje ra. ¹⁸ Sã ure nyeremo ure no. Paba rese. Ae sembu. Sã ureico ñee serĩ Paba rese no. Ure nyeremo, i que Jesús fariseos je ra. ¹⁹ —¿Ma nderu riqui ma nde? i que fariseos Jesús je ra. Jesús que ñee ee ra. —Paba jêicuayãte quia ã. Se abe seicuayãte quia ã. Jê seicua mose, Paba abe ra jêicua, i que Jesús ra. ²⁰ Eĩ ngue Jesús quia mbia mbaaquiātu quiātu Dios chuchúaa ra. Ofrenda no nosa jii que eriqui mbia mbaaquiātu quiātu ra. Emo ngue Jesús isi âte etarō sacuã nda. —Aque mose ra eremano, i âte quiarei Dios ee.

Aso si ra ibate Paba rea, i Jesús

²¹ Jesús que ñee si fariseos je ra. —Aso si ra Paba rea cote. Serequia requia rei nda se re. Jêicuã mbei ra jemano nyee. Ae ra aso nae, huee jengasê aroneate, i que Jesús ee ra. ²² Judíos que ñee ñee nyue ra. —¿Mbaerã nda nandecuasê aroneate ee re? Nyĩquia ra reae, i rei que ñee nyue ra. ²³ Jesús que ñee ee ra. —Ibi jenda chō jê nde. Ibatenda chō se re. Ibi jenda eã ño se re. ²⁴ Nyebe aico nguiã ñee jêje nyii. “Jêicuã mbei ra jemano nyee”, ae que jêje nyii. Seicuayã mbei mose ra jemano nyee jêicuã mosebe, i que Jesús ee ra. ²⁵ —¿Aba tuchi nde re? i que mbia Jesús je ra. Jesús que ñee ee ra. —Cose ndare bei chō aico nguiã serenei nenei jêje co. ²⁶ Mbae ra asenei tuchi jêje reae. Secheẽ nda jêicuã mbuchecua tuchi jêje. Ae sembu nae, aque quiarei ñee ñooño aronea. Echeẽ ngue achandu ra. Ae cheẽ ño asenei senei mbei nguiã mbia je co, i que Jesús mbia je ra. ²⁷ Mbia rerecua que Jesús cheẽ icuayã mbei ra. —Dios rĩ ño eriqui nguiã ñee, iã mbei que mbia ra. ²⁸ Jesús que ñeembe ee ra. —Mbiarã ngue achu ra. Jê nda sembucha ira rese cote. Aque mose ra mbae jêicua jiri serĩ cote. “Dios cheẽ nguire chō eriqui mbia mbaaquiātu quiātu re”, jenyé ra serĩ cote. “Dios rucucha chō eriqui re”, jenyé ra serĩ cote. ²⁹ Ae sembu nae, aque riqui bei serese co. Echeẽ nguire aico bei embia co. Nyebe eriqui nguiã serechayã mbei co, i que Jesús ra. ³⁰ Jesús cheẽ mose que mbia Jesús icua icua cote ra.

Jêingo bei mose seruí, sechĩmbaaquiātu tuchi chō jê nde

³¹ Ae Jesús icua quia judíos nae, ũquí je que Jesús ñee nda. —Secheẽ si jêhui eã mose, sechĩmbaaquiaturã tuchi ra jê. ³² Jê nda ichõiñosa reã jêicua tuchi cote. Mbia icuã nderecua rimba eã nda jê cote, i que Jesús ee ra. ³³ Mbia que ñee Jesús je ra. —Abraham nducucha rei ure. Mbia mo nimba eã mbei que ureico resê. ¿Mbaerã ereico ñee ure je re? “Mbia si taembui mingo cote”, i ure je re, i que mbia Jesús je ra.

³⁴ Jesús que ñee ee cote ra. —Ae mbae icuã saã saã nguia nae, ũquí ndiqui bei eicuã nimbarã ã. ³⁵ Erimba ra siqui bei eã nguerecua rese. Nguiirĩ tuchi quiātu ra equereco bei nyiese. ³⁶ Se jembui mose mbae icuã si, eicuã nimbarã eã nda jêingo cote. ³⁷ Abraham nducucha raque jê. ũquí aicuate raque. ã jêingo secheẽ isi turã eãte ã. Secheẽ jêicuayã nguia ã. Nyebe jêingo nguiã seiquia serĩte ã. ³⁸ Ae Paba teacuquia seje nae, ũquí ño asenei senei nguiã jêje co. Ae jendu teacuquia jêje nae, ũquí ndese chō jêingo nguiã jê ã no, i que Jesús ee ra.

³⁹ —Abraham ño ureru resê. Urei resê, i que mbia Jesús je ra. Jesús que ñee ee cote ra. —Abraham nducucha turã mose jê, eĩ nguia nda jêingo turã nguiã ña. Abraham ndui si. ⁴⁰ Dios que sembaaquiātu ra. Dios quiarei ñee ñooño eã. Echeẽ ño asenei senei nguiã jêje co. ũquí je chō jêingo nguiã seiquia serĩte ã. I âte que Abraham quia seje ra. ⁴¹ Jendu rã si chō jêingo nguiã ã, i que Jesús

ee ra. Mbia que ñee Jesús je cote ra. —Ureru ata ata eãte nyeresê. Dios mii ño ureru re, i que ñee Jesús je ra. ⁴² Jesús que ñeembe ee ra. —Dios jendu tuchi mose, eĩ nguia nda jëingo nguiã nyesecea serese chã. Ae quiarei sembu. Se ae eã achu nguiã. ⁴³ Æ jëingo secheê andu sereãte ã. Nyebe jëingo nguiã secheê icua aroneate ã. ⁴⁴ Aba checuayã nderecua rei jendu. Erese bei chõ jëingo nguiã ã. Echeê jemumbayã mbei chõ nguiã ã. Mbia iquia iquiasa bei que ae ra. Cose ndare mosenda bei. Ñee ñooñosa reã quiato aronea tuchi quiarei ae. Ñee ñooño mbeite equia co. Ucheê achõ ño esenei senei nguiã mbiirĩ irĩ querabe co. Ñee ñooñosa rerecua chõ aque re. ⁴⁵ Se quia acheê ñooño ãte rei nguiã jëje. Secheê jëucuyãte chõchĩ nguiã. ⁴⁶ Mbae icuã ngue asaã eãte ra. Ûquĩ jëicuate raque. Acheê ñooño ãte sequia co resê. ¿Mbaerã jëingo secheê andu sereã neate ã nde? ⁴⁷ Dios quiato quia Dios cheê ñandu turã nguiã. Dios quiato eã ño jë nde. Nyebe jëingo nguiã Dios cheê andu sereãte ã, i que Jesús mbia je ra.

Jesús rane siqui Abraham si nyii

⁴⁸ Judíos que ñee si Jesús je ra. “Samaria jenda chõ nde reae. Aba checuayã nyireco chõ nde reae”, ure que nderĩ nda. ¿Ae tuchi nde re? i que judíos ñee Jesús je ra. ⁴⁹ Jesús que ñee ee ra. —Aba checuayã nyireco eã ño se resê. Co aico ñee turã tuchi Paba riĩ co resê. Jë nguia jeñee icuã mbeite nguiã serĩ. ⁵⁰ “¿sã mbia ñee turã serĩ jê!” ae eã ño nguiã se co. Paba quia siqui nguiã ñee turã turãte serĩ co. Ae quia ra mbia icuã mbasi. ⁵¹ Tacheê nyecua jëje. Ae secheê mumbayã nguia nae, ùquĩ nda amingo bei. Ûquĩ nda manoã mbei, i que Jesús ra. ⁵² Judíos que ñee Jesús je ra. —Aba checuayã nyireco tuchi chõ ereico nguiã co. ¿Mbaerã ereico ñee nde? “Mbia ra manoã, secheê mumbayã mose”, i re. Abraham ngue mano. Nandei. Dios cheê nenei neneisa que mano ja resê. ⁵³ ¿Nde ndeacuiatu tuchi Abraham si re? Ae chee que mano. Dios cheê nenei neneisa chee que mano. ¿Abate nde re? “Mbia ra manoã”, ere chõte equia co, i que judíos Jesús je ra. ⁵⁴ Jesús que ñee ee cote ra. Se ae secheê turã mose serĩ, mbia ra seanduchõ. Paba quia ñee turã mbei nguiã serĩ co. Ae je jëingo ñee. “Dios urererecua” i raque eriĩ. ⁵⁵ Æ jëingo Dios icuayãte ã. Se quia aicuate nguiã co. “Dios aicuayã”, se i mose, eĩ nda acheê ñooñote rei jë na si. Dios aicua tuchite. Echeê ndui chõ aico bei nguiã co. ⁵⁶ Abraham ngue seraarõ arõ mbei quia ra. “Tu rae”, i bei que equia ñumbia serĩ nda. Secuasê mose que eyate mae serese cote ra, i que Jesús mbia je ra. ⁵⁷ Mbia que ñee Jesús je ra. —Cosete que Abraham mano ndesê. ¿Mañi ere mae erese re? Cincuenta años eãte nde resê, i que ra. ⁵⁸ Jesús que ñee ee ra. —Tacheê nyecua jëje. Cose ndare bei chõ aico nguiã co. Abraham tiã mosenda bei, i que Jesús ra. ⁵⁹ —;Sita je Jesús nandechei jê! i rei que mbia sita isi isi ra. Jesús que ñimi ñimi oso ra. Usê Dios chuchua si.

9

Jesús emo ndesayã mbucherõ

¹ Ñeenda rui que Jesús mae emo ndesayã ndese ra. Echaacuquia mosenda bei que eresayã nyobei ra. ² Jesús chimbacuiatu que ñee ee ra. —Urembaacuiatasa, ¿abate mbae icuã saã nyii re? Co resayã nonde re. Eru ereae. Esí ere no ae. Ae si ere no ae. ¿Abate ere? i que Jesús je ra. ³ Jesús que ñee ee ra. —Tei. Emo ngue mbae icuã saã eãte rei ra. Mbia ra mae ja Dios quiracuã ndese chã. Embucherõ mose. Nyebe eresayã nyaacuquia nguiã.

4 Arõ ño nandeico nguiã mbae raã naa. Itondaru mose, mbae rese nandeico aroneãte cote. Nyebe aico bei nguiã mbae rese Paba je co. Semano mose quia aico aroneãte nguiã mbae rese íbii cote. 5 Seico mose íbii, aico mbia resaete co, i que Jesús ra. 6 Jesús que ñinimbu íbii cote ra. Tuchu que esaã ngũendi je ra. Nguiti que eresayã ndesa rese cote ra. 7 —Eso nderuba irei cote. Ama Siloé eso eirei, i que Jesús eresayã je ra. (“Echimondo”, i chõ nguiã Siloé je.) Eresayã ngue osõ nguesa irei huee ra. Obei que eru quia mae turã cote ra. 8 Hue jenda que nyuruira jate mae erese ra. Ae mae nguia erese nyii nae, ũquí ngue nyuruira tuchi mae erese cote ra. Eresa cherõ mose. —¿Co resayã ño ache ache i quia nyii re? ¿Ae chõ ere? i que mbia ñee ñee nyue ra. 9 —Ae eã ño ñene, i que emo nda. —Ae chõ ñene, i que emo emo no nda. Eresayã ngue ñee cote ra. —Se chõ nyeresê, i que ñee mbia je ra. 10 —¿Mañi nderesayã mae nde? i que mbia ee ra. 11 Eresayã ngue ñee nda. —Ae eriqui “Jesús” i nae, aque que tuchu saã nda. Nguiti que seresa rese ra. “Eso nderuba irei Ama Siloé”, i que seje cote ra. Aso que se ra. Seruba irei ji que amae cote ra, i que eresayã mbia je ra. 12 —¿Ma nderesa mbucherõsa riqui ma nde? i que mbia eresayã je ra. —Qui chõ esi, i que ee ra.

Fariseos ñee eresayã je

13 Mbía que eresayã curuchoi fariseos je cote ra. 14 Ae mose Jesús eresayã mbucherõ nae, sábadõ mose que ra. Tuchu que esaã, aque mose que ra. 15 —¿Mañi ere nderesa ìra re? i que fariseos ee ra. —Tuchu que equiti seresa rese ra. Ae seresa airei nguiã. Co aico mae co cote, i que eresayã nda. 16 Fariseos mo ngue ñee nyue ra. —Ae eresa mbucherõ sábadõ mose nae, Dios cheẽ nenei neneisa eã ño aque re, i rei que nyue ra. Emo emo ngue ñee no nda. —Ei nguia nda eicuã mose mbia mae sayã naa naa eã nguiã nande je chã, i que fariseos mo ñee nyue ra. Hue rĩ ja eã ngue fariseos ñee Jesús rĩ nda. 17 Fariseos que ñee si eresayã je ra. —Ae nembucherõ nae, ¿mañi ee re? ¿Mañi ere quia nde erĩ co re? i que ra. Eresayã ngue ñee nda. —Dios chimondo que ae ra, i que eresayã nda.

18 Judíos que echeẽ ñandu sereã nda. Eresa turã mbei mo eriqui reĩ nguiã ee. Nyebe “jenyu” i nguiã eresayã ndu je. Esi je abe no. —Nandeirandu rá erese, i que ra. 19 —¿Co nderiirĩ co re? ¿Eresayã nyobei nyii re? ¿Eresayã nyaacuquia nyii re? ¿Mbae emumae nguia co cote re? i que ñee eru je ra. Esi je abe. 20 Eru que ñee ee ra. —Co rei seriirĩ co. Eresayã ngue nyaacuquia rei ra. 21 Mañi ño equia mae co cote. Aba chõ embucherõ. Ureicuayãte. Jeñee nguia ee. Etiarõte nyeresê. Ae ra ñee jêje, i que eru ñee judio rerecua je ra. Esi abe. 22 Judíos rerecua quia ñee nguia nyue nyii reaẽ. —Emo ñee turã mose Jesús rĩ, ũquí nandemombo bei mbia chumunuasa si. “Dios chimbu rei Jesús”, i mose, nandemombo bei mbia chumunuasa si, i quia ererecua quia ñee nyue nyii reaẽ. Nyebe eresayandu siquichete nguiã ñee turã Jesús rĩ. Esi abe no. 23 Nyebe eru riqui nguiã ñee ererecua je. —Jeñee nguia seriirĩ je. Etiarõte nyeresê, i ee. Esiquichete quia ñene.

24 —Quiatuchu, i si que judíos rerecua eresayã je no nda. —Echeẽ turã Dios mii je. ¡Jesús abe je ra erecheẽ turãchĩ jê! Eicuãte ae resê, i rei que judíos rerecua eresayã je ra. 25 Eresayã ngue ñee ee ra. —Aicuayãte se. Eicuãte ereae. Eturãte ere no ae. Aicuayãte se. Seresayã ngue nyii ra. Co aico mae co cote. Ũquí mii ño aicua nguiã co, i que eresayã judíos rerecua je ra. 26 —¿Mañi equia ndeje re? ¿Mañi nderesayã ìra re? i si que eresayã je no nda. 27 Eresayã ngue ñeembe ererecua je ra. —Acheẽ ndei que jêje resê. Secheẽ

ngue jemumb resê. ¿Mbaerã jêingo “echeembe” i seje ã nde? ¿Jê abe jêingose rete sembucherōsa rui re? i que eresayã judíos rerecua je ra. ²⁸ Ererecua que ñee icuâte ee cote ra. —Ae rui chō ereicochĩ nguiã nde co. Moisés rui chō ureico nguiã ure ã. ²⁹ Moisés je quiatu que Dios ñee nyii resê. Ũquĩ ño ureicua nguiã ã. Ae nembucherō nae, ma si quiatu ñi ae ru. Ae quia ureicuayâte nguiã, i que judíos rerecua ra. ³⁰ Eresayã ngue ñee ee ra. —Seresa que embucherō ndesê. “Dios chimbu”, jenyee eã ñochĩ equia ã. Seresa mbucherōsa raque ae. ³¹ Dios ra mbia icuã ñee ñanuã. Ae Dios cheẽ mumbayã nguia nae, ũquĩ ñee nguia ra Dios ñandu. ³² Seresayã ngue achaacuquia rei nyii ra. Ae que sembucherō nda. Emo abe ra ũquĩ saã eã. ³³ Dios chimbu eã mose, eĩ nguia nda mbae raã eâte nguiã ña, i que eresayã judíos rerecua je ra. ³⁴ Judíos rerecua que ñee eresayã je ra. —Ndechaacuquia mosenda bei chō ndeicua ndiqui nguiã co. ¿Mbaerã ereico urembaaquiату sete re? i que judíos rerecua eresayã je ra. Nyebe que judíos rerecua eresayã mombo bei judíos chumunuasa si cote ra.

Ureaquiatute ure, i chōchĩ fariseos

³⁵ Jesús que jirandu erese ra. Emombo mose. Nyebe esi nguiã ñee eresayã je. —¿Dios rucucha ereicuate quia co re? i que ee ra. ³⁶ —¿Aba chō Dios rucucha re? Aicua sete quia co, i que eresayã nda. ³⁷ —Ae chō se resê. Ae je chō ereã ñee a resê. Eremae ndei serese resê, i que Jesús ee ra. ³⁸ Eresayã ngue ngoi nguiã ndese Jesús ji cote ra. —Areicua tuchi se cote, i que Jesús je ra. ³⁹ Jesús que ñee ee ra. —Achu que íbii ra. Mbia icuã mbuchecua mbia je ra. Achu que eresayã ndesa mumae mae nda. Ae eresa nae, ũquĩ mumae eã sacua abe que achu ra, i que ra. ⁴⁰ Fariseos mo abe que chi hue ra. Jesús cheẽ andu que ñee Jesús je ra. —¿Uresayã ureico ure abe ã nde? i que fariseos ee ra. ⁴¹ Jesús que ñee ee ra. —Jendesayã mose, eĩ nda jêicua ambuchecuayã ndei. “Seaquiatute”, jenyechĩ equia ã. Nyebe aico nguiã jêicua mbuchecua jêje co, i que Jesús judíos rerecua je ra.

10

Ovejas ucha cheẽ icuate

¹ Jesús que ñee nda. —Tacheẽ nyecua jêje. Ae iqueã nguia oveja chiquesa rĩ nae, mbae mbuquiachãsa chō ũquĩ nde. Echiquesa eã ñi ique ique mose. ² Ae ique ique quia oveja chiquesa rĩ nae, aqee quia oveja raarōsa aqee re. ³ Ae echiquesa saarō nguia nae, aqee ra echiquesa equia oveja raarōsa je cote. Eique sacua. Oveja raarōsa cheẽ nda oveja icua ja. Ñee miĩ miĩ nda umbae oveja je. Oveja icua ja. Ae ra oveja nyoi usê erui. ⁴ Eraarōsa embusê ja mose etaronda si, ae rane nda ngata oso quia erêta. Oveja ra nyoi ja quia erui. Echeẽ nguia eicuate nguiã. ⁵ Emo ndui ra echoi eã. Uchã ño nda emo si. Echeẽ nguia eicuayâte nguiã, i que Jesús ñee nda. ⁶ Jesús que eĩ ndei ñee fariseos je ra. Ejemplo je. Oveja renei nenei ee. Jesús cheẽ andusa que echeẽ icuayâte ra.

Jesús rei oveja raarōsa

⁷ Jesús que ñee si ee ra. —Tacheẽ nyecua jêje. Oveja chiquesa rã ño se re. ⁸ Ae ngaẽ senonde nyii nae, mbae mbuquiachãsa ja chō ũquĩ nde. Nyebe ovejas eche siichã eã nguiã. ⁹ Oveja chiquesa chō se re. Ae seicua quia nae, ũquĩ nda atequiatu bei mingo. Sã oveja mo ndiqui oso quiaru quiaru no.

Sã eriqui cuaẽ nyebi chebi bei utaronda no. Eĩ si ra seicuasa quia siqui bei serese. ¹⁰ Mbae mbuquiachãsa quia ra tu mbae rirõ sacua. Mbae mbutiã sacua. Mbae iquia sacua. Se quia ni achu nguiã mbia mingo bei sacua. Mbia mbia tuchi nonde que achu ra. ¹¹ Oveja raarõsa rei se. Ovejas ateaquiatu bei quia co. Amano nda emingo bei sacua. ¹² Ae ovejacha eã nae, aque ra ovejas saarõ ndaque, saarõ turã eã ndae. Uchã ño nda nyacua tu mose ovejas je. Nyacua ra ovejas isi embuquiachamba u quia. ¹³ “Echa eã ndei se re”, i ra eraarõsa uchã erecha. Esiquiche mose. Oveja raarõ turã eã. ¹⁴⁻¹⁵ Se quiarei oveja raarõsa turã. Sã Paba riqui seicuate co no. Sã aico Paba icuate se abe co no. Eĩ ae chõ nguiã oveja icua sembae co no. Sembae abe seicua quia ã. Sembae ovejas mingo bei sacua ñda amano. ¹⁶ Ovejas mo abe que sembae no nda. A jenda eã ño ñqui nde. Ûqui abe ra aru a. Ûqui nda secheẽ mumbayã no. Sembae oveja ra chi ja serese cote. Se mii ño nda asaarõ ja cote. ¹⁷ Sesiquiche eã semana ndese. Sembae ovejas mingo sacua. Nyebe Paba iate riqui nguiã serese co. Semanonde ra aquera si. ¹⁸ Semano sereã mose, eĩ nda mbia seiquia aroneate rei. Se ae chõ amanosete nguiã mbia je. Se ae chõ nda aquera si no. Paba quia uquirãcuã meete nguiã seje, i que Jesús mbia je ra.

¹⁹ Judíos que ñee ata atate nyue ra. Jesús cheẽ mose. Hue rĩ si ñee ja eã. ²⁰ —Aba checuayã siquite Jesús rese co resẽ. ¿Mbaerã jẽingo echeẽ andu re? i que emo emo uataque je ra. ²¹ Emo emo ngue ñee no nda. —Ae rese aba checuayã ndiqui nae, ùqui nda ñee turã eã ndesẽ. Aba checuayã nda mbia resayã mbucherõ eã ndesẽ, i que emo emo no nda.

Judíos Jesús oseĩ chiã

²² Mbia que ñmunua nua nguia Jerusalén cote ra. Dios chuchua ao mosenda ndese ndua ndua. Nyiiseite que aque mose ra. ²³ Jesús que oso Dios chuchúaa ra. Portal de Salomón ngue eriqui ngata ra. ²⁴ Judíos que ngaẽ Jesús mama nda. Ñee ngue ee ra. —Ureico ndeicuyãte ã. ¿Manosete ra erecheẽ tuchi ure je re? Nde rĩ. Echĩmbu checua jiri ure je. Nde Cristo mose, ndecheẽ embuchecua ure je, i que judíos ñee Jesús je ra. ²⁵ Jesús que ñee ee ra. —Acheẽ ndei que jẽje resẽ. Secheẽ jẽñanuã ño nguiã ã. Paba quirãcuã je chõ aico nguiã mbia mae sayã naa naa co. ã ndese mae nda seicua nguiã ña. ²⁶ Acheẽ ndei que jẽje nyii resẽ. Serimba eã ño jẽ nde. Nyebe jẽingo nguiã secheẽ anuã. ²⁷ Serimba secheẽ icua ja quia ã. Serimba aicua ja quia ã. Serui ja serimba riqui ã. ²⁸ Serimba amingo bei quia co. Serimba ra quiachã eã mbei. Emo eisi aronea tuchi sesi. ²⁹ Paba que emee serimbarã nda. Emo eisi aroneate Paba o si. Ae quiarei equirãcuã tuchi. ³⁰ Aque mii ño ureico nguiã ã. Paba rese. Eĩ si tuchi ureico nguiã ã, i que Jesús ee ra.

³¹ Nyebe judíos paama i nguiã ee. Sita que esirõ sirõ nda. —Jesús nandechei, i rei que ra. ³² Jesús que ñee ee ra. —Paba que sembuquirãcuã tuchi ra. Nyebe jemae sayã asaã saã tuchi nguiã jẽje. ¿Ûqui mo nĩ jẽingo “nandechei” i seje re? i que Jesús judíos je ra. ³³ Judíos que ñee Jesús je ra. —Ndechiao turã mo je eã ño ureico nguiã “nandechei” i ndeje. Erecheẽ icuãte que Dios rĩ ndesẽ. Dios eresaã saãte quia ure je co resẽ. Mbia si chõ ndaque nde, i que judíos Jesús je ra. ³⁴ Jesús que ñee ee ra. —Sã embesa ji riqui i no: “Jẽ ndei dioses, i que Dios ra”, sã embesa ji riqui i no. ³⁵ Embesa ji ñeeñoño aronea. “Dioses rei jẽ”, i que Dios ucheẽ nenei neneisa je ra. ³⁶ Dios que seirabo ra. Sembu que ibii cote ra. ¿Mbaerã jẽingo paama i secheẽ mose re?

“Dios ririĩ ño se re”, i mose re. “Ndeicuãte chõchĩ Dios je”, jenyẽ chõchĩ nguiã seje. ³⁷ Se mbae raã naa eã mose Paba rã si, ùquiĩ mose quia secheẽ jeñanua. ³⁸ Paba rã si mose, “coche ñene” jenyẽ chõ sechisaã je. Secheẽ jeñandu sereã ndaque. Paba riqui serese co. Se abe aico Paba rese co. Ûquiĩ nda jëicua cote, “coche ñene” i mose sechisaã je, i que Jesús ee ra. ³⁹ —Jesús nanderao etarõ sacua, i rei que mbia ra. Jesús que oso chee hue si ra.

⁴⁰ Jesús que oso Ama Jordán ndobei ra. Ae Juan ndiqui bautizar i nyii nae, huee que esi ra. Huee que Jesús riqui arete cote ra. ⁴¹ Mbia que nyoĩ nyoĩ tuchite erea huee ra. Ñee ñee ngue nyue ra. —Juan ngue nandemae sayã mo saã eãte rei nande je. Nandembiirandu turã tuchihi Jesús rĩ. Ichõĩño eã ño equia ñee nande je reaẽ, i que mbia ñee nyue ra. ⁴² Mbia tubiriã ngue Jesús icua huee ra.

11

Lázaro mano

¹ Emo ndasi que chi ra. Lázaro, i que ee ra. María, i que enongue je ra. Marta, i que enongue je no nda. Echari ja que ùquiĩ nda. Betania jenda ja que ùquiĩ nda. ² María rei aba mbushimbusa ichusësa Jesús i rese. Ua je que esi esi ra. Enongue quia erasi re. Lázaro, i que ee ra. ³ Nyebe echari mbia mo mundo nguiã Jesús mbiirandu sacua. —Ndequiato rasi que chi aque rĩ nda, i que echoi Jesús mbiirandu ra. ⁴ Jirandu mose que Jesús ñee cote ra. —Mano sacua eã ño erasi chi nguiã aque. Dios quirãcuã ndese mbia mae sacua ño erasi chi nguiã aque. Se abe sequirãcuã ndese mae sacua ño erasi chi nguiã aque, i que Jesús ra. ⁵ Jesús que nyesecua tuchi Marta rese ra. María rese. Lázaro rese abe no. ⁶ Lázaro rasi rese jirandu mose que esi jei eã erea ra. Siquichõ ngue ra. Itõ nyeremo ngue huee ra. ⁷ —Nyaobe Judea cote, i que uchimbaaquiato je cote ra. ⁸ Echimbaaquiato que ñee ee ra. —Namote que judíos ndeiguia serĩte sita je. ¿Mbaerã nda ereso si huee re? i que Jesús je ra. ⁹⁻¹⁰ Jesús que ñee ee ra. —Dios quiato que sembu ra. Mbae raã naa sacua ee. Echeẽ ngue asaã ja eãte ra. Nyebe emo seiquia aroneate namo. Se echeẽ naa ja mose quia ra mbia seiquia arõte cote, i que ñee uchimbaaquiato je ra. ¹¹ Aquere que ñee si uchimbaaquiato je ra. —Nandequiato que uque cote ra. Lázaro. Taso emumba cote, i que ra. ¹² —Uque mose u, ae ae ra ñumumba rei, i que echimbaaquiato ee ra. ¹³ —Lázaro que mano nda, i eã ngue Jesús ucheẽ mbuchecua tuchi ee ra. Lázaro mano tuchi raque. Lázaro uquechõ nei nguiã echimbaaquiato je. ¹⁴ Jesús que ucheẽ mbuchecua ramo ee cote ra. —Lázaro que mano nda. ¹⁵ Coche aico eã nguiã huee. Jẽ nda seicua tuchi cote. Nyao erea cote, i que Jesús uchimbaaquiato je ra. ¹⁶ Tomás que ñee echimbaaquiato ataque je ra. —Nyao erese nande abe no. Sã mbia nandequia nande abe rõ, i que Tomás ra. “Eata”, i que mbia quia Tomás je ra. Eata rei ae.

Jesús mbia raaque mbuquerasa

¹⁷ Ngasẽ ngue Betania cote ra. Mbia hue jenda que ñee Jesús je cote ra. —Co Lázaro ati ji chi itõ mocoĩte co resẽ. Cuatro días tuchite nyeresẽ, i que mbia ñee Jesús je ra. ¹⁸ Aichite que Betania Jerusalén si ra. Tres kilómetros que ra. ¹⁹ Nyebe judíos rane ngaẽ jate nguiã ngasẽ Jerusalén si. María mbia jiri sacua. Marta abe no. Enongue raaque ati ji mose. ²⁰ Marta jirandu mose Jesús rese que esi erobeishĩ nda. Oo que erese ra. María quiato que siquichõ tuchúaa

ra. ²¹ Marta que ñee Jesús je ra. —Sererecua, ndeico mose a, eĩ nda senongue manoãte rei. ²² Dios ra ndecheẽ ñandu. “Mbae mo embu seje”, i mose, i que Marta Jesús je ra. ²³—Ndenongue ra quera si, i que Jesús ee ra. ²⁴ Marta que ñee ee cote ra. —Ae bei. Mbia raaque quera ja mose, a que mose ra senongue abe quera si. Mbae ua ja mose ra quera si. Aicuate raque se quia co, i que Marta ra. ²⁵ Jesús que ñee ee ra. —Mbia raaque mbuquerasa rei se. Mbia mingosa rei se. Ae seicua quia nae, ùquĩ nda mano ndaque, quera si rae. ²⁶ Ae seicua quia nae, ùquĩ nda uayã mbei. ¿Ùquĩ ereicua quia co re? i que Jesús ee ra. ²⁷ Marta que ñee ee ra. —Ae. Cristo chõ nde re. Dios rucucha chõ nde re. “Dios rucucha ra tu íbii”, i que mbia quia nyii nae, ae chõ nde re, i que Marta Jesús je ra.

Jesús nyeseo

²⁸ Aquere que Marta si María mbiirandu ra. —Nandembaaquiatusa que tu ra. Hue que eriqui nderequia ra, i que Marta ñee ngõngue ísaa ra. ²⁹ Echeẽ nduibe tuchi que María si juã asi Jesús rea ra. ³⁰ Jesús ngasẽ mose rocoĩ mbia chuchua ite re. Marta erobeishisa bei que Jesús riqui ra. ³¹ Mariaso rese que judíos chi mae ja ra. —Ngõngue atisa chõ María si nguiã nyeseo qui, i rei ngue judíos choi nguiã erui. ³² María que ngasẽ Jesús je ra. Ngoi que nguiã ndese ejii ra. Ñee ngue ee ra. —Ndeico mose a senongue ndasi mose, eĩ nda manoãte rei, i que María Jesús je ra. ³³ María que nyeseo ra. Judíos que chi erese, ùquĩ abe que nyeseo no nda. Nyebe que Jesús abe ia eãte ra. Echiã ngue ngoi eã tuchi ra. ³⁴—¿Mangue jenyati mangue re? i que Jesús mbia je ra. —Nyao erea ae, i que mbia ee ra. ³⁵ Jesús que nyeseo ra. ³⁶ Judíos que ñee nyue ra. —¡Sã jê! Nyesequa tuchi Lázaro rese. Eya eãte riqui erese co, i que mbia ra. ³⁷ Emo emo ngue ñee nda. —Jesús que eresayã ndesa mbucherõ. Eĩ nda Lázaro rasi mbucherõ nde chaẽ. Eĩ nda manoãte, i que mbia ra.

Jesús Lázaro mbuquera si

³⁸ Jesús ia eãte que ngasẽ Lázaro atiguia ra. Sita imi ye. Sita chõ ngue eatiquia no nda. ³⁹—¡Sita eatiquia jêjea jê! i que Jesús mbia je ra. Marta que ñee Jesús cheẽ mose ra. —¡Enete ra nande je jê! Curite que mano ndesẽ. Cuatro días tuchi que ra, i que Jesús je ra. ⁴⁰ Jesús que ñee ee ra. —“Seicua tuchi mose ra eremae Dios quirãcuã ndese”, ae rei que ndeje nyii, i que Jesús ra. ⁴¹ Sita eatiquia que mbia jea cote ra. Jesús que mae ibate quti ra. Ñee Dios je. —Paba, secheẽ ngue erchandú. “Íaanye”, ae bei quia ndeje co. ⁴² Nde quiarei seandu bei. Mbia resa rae aico ñee ndeje a. “Dios chimondo chõ eriqui re”, i nda ã serĩ ña, i que Jesús ñee Dios je ra. ⁴³ Jesús que ñeemombo Lázaro raaque je cote ra. —Lázaro, jechu usê! i que ra. ⁴⁴ Eraaque que usê u juã cote ra. Eo cuasa resebe que usê nda. Ei abe ecua ji tiru je. Eruba abe ecua ji tiru je. —Jenyura mondo, i que Jesús mbia je ra.

Jesús nandeiquia, i judíos

⁴⁵ Judíos que nyoĩ María rese, ùquĩ ngue mae ja Jesús rese ra. Lázaro mbuquera mose. Ûquĩ tubiriã ngue Jesús icua cote ra. ⁴⁶—Jesús que Lázaro raaque mbuchuruã nda, i que emo nyoĩ fariseos mbiirandu ra. ⁴⁷ Fariseos que ñumunua ja cote ra. Sacerdotes rerecua ja rese. Mbia rerecua ja. Ñee tuchi Jesús rĩ. —¿Mañi nande ra equia ee re? Mbia mae sayã naa naa tuchichĩ equia a que. ⁴⁸ Nande ereachõ mose ra mbia siqui ja techĩ erui re. ¡Roma

jenda ra nandembae isichĩ ibi jê! ¡Dios chuchua ra embucoichĩ ngaẽ jê! i que ererecua ñee nyue ra. ⁴⁹ Caifás que sacerdote rerecua tuchi aque mose ra. Ae que ñee uataque je ra. —Mbae jêicuayã tuchichĩ nguia ã. ⁵⁰ Jendua eã ñochĩ equia ã. Aque miĩ ño nda mano nguia nande ja je chã. Eĩ nda judíos ua tuchi eã, i que Caifás uataque je ra. ⁵¹ Caifás ae que ñee eã nda. Dios ae quiatu ngue embucheẽ nguia ñquĩ. Sacerdote rerecua tuchite quiatu ngue ae re. Nyebe Dios embucheẽ nguia. —Jesús ra mano judíos mingó ja sacua. ⁵² A jenda achõ je eã nda Jesús mano. Dios riirĩ mangue chooñoa jenda je abe chõ nda Jesús mano nguia. Dios riirĩ munua ja sacua, i que Caifás ñee nda. ⁵³ Aque mose bei que judíos rerecua ñee ñee nyue ra. —¡Jesús nandequia rei jê! i que equia ñee ñee nyue ra. ⁵⁴ Jesús que nyecua eã judíos je cote ra. Judea si que esi cote ra. Turuquia rurubi que esi ra. Efraín, i que sucha tubiriã je ra. Huee que eriqui arete uchimbaaquiatu rese cote ra. ⁵⁵ Fiesta de la pascua que ecurubite ra. Nyebe judíos nyoĩ choi ja nguia Jerusalén. Suchamo jenda emo emo ngue nyoĩ jate ra. Pascua nonde que echoi huicua mbitirõ sacua nda. ⁵⁶ Mbia que Jesús sequia quia ra. —¿Tu ra fiesta re? ¿Tu eã nda re? ¿Tu aroneate jêje re? i que mbia ñee ñee nyue Jesús riĩ nda. I que mbia u ñee Dios chuchúaa ra. ⁵⁷ Mbia rerecua que ñee mbia je nyii ra. —Emo jirandu mose Jesús rese, sã urembiirandu jei. Eĩ nda ureisi. Eĩ nda uretarõ miĩ, i que sacerdote rerecua ñee nyii ra. Fariseos abe no.

12

María aba mbushimbusa ichusẽ Jesús i rese

¹ —Seis días mose ra pascua cote, i que mbia ra. Aque mose que Jesús si Betania nda. Huee que Lázaro riqui ra. Ae Jesús mbuquera erua si. ² Mbia que ñio miĩ Jesús chiurã nda. Marta que echiurã mondo mondo ee ra. Mbia je abe. Lázaro abe que chĩ quiaru erese ra. ³ María que aba mbushimbusa queru Jesús je cote ra. Medio litro. Nardo, i que ñquĩ je ra. Mbae isiquia mumba tuchi que ñquĩ nda. María que eichusẽ Jesús i rese ra. Ua je que esi esi ra. Tuchua mbushimbu ja que ra. ⁴ Judas Iscariote abe que siqui ra. Simón ndiirĩ ngue aque ra. Jesús chimbaaquiatu mo ndei que aque ra. Ae quiatu que Jesús mee mbia icua je emo mose cote ra. Ae que ñee nda. ⁵ —¿Mbaerã eichusẽ ñooño nde? ¿Mbae isiquia ribishorõ ño nda aba emondo re? Tres cientos ribishorõ. Mbaecha reã je emee sacua, ñquĩ mbae isiquia, i que Judas ra. ⁶ Judas ndua eã ndaque mbaecha reã ndese. Mbae mbuquiachãsa tuchi que ae ra. Mbae isiquia riru que equereco quia Jesús je ra. Eyenda que esirõ sirõ nguia mbuchemi chemi nda. ⁷ Jesús que ñee Judas je ra. —¡Erecheẽchĩ nda María je jê! ¡Sã ae ae riqui jê! Seati nonde chõ aba mbushimbusa icherẽ nguia serese. ⁸ Mbaecha reã nguia nda chi are jiri nguia a. Se quia nda aico bei eã nguia jêje a, i que Jesús ra.

Lázaro nandequia, i rei judíos rerecua

⁹ Judíos que jirandu jate Jesús rese ra. Eriqui mose Betania. Nyoĩ jate que erea ra. Lázaro abe rea. Ae Jesús mbuquera erua si. ¹⁰ Nyebe judíos rerecua ñimbiirandu nguia. —¡Lázaro abe nandequia rei jê! i que ererecua ñee nyue ra. ¹¹ Judíos que siqui tuchite Jesús rese cote ra. Nguerecua que esecha jate cote ra. Lázaro que embuquera erua si nyii. Ñquĩ mbei bei que nyii ra. Jesús oso Jerusalén

¹² Mbia tubiriã ngue nyo: Jerusalén nda. Pascua raã naã sacua huee. Jesús abe que oso ra. Mbia que jirandu erese ra. Ecuasẽ nonde. ¹³ Mbia yate que Jesús cuasẽ mose ra. Sindo que ecuruchoi erobeishĩ nda. Mbia que tasẽ tasẽ tuchi ra. —Etura tuchi ruchĩ nguia co. Dios rucucha ruchĩ nguia co. Israel rerecua ruchĩ nguia co cote, i que mbia tasẽ tasẽ tuchi ee ra. ¹⁴ Jesús que ngasẽ burro riirĩ mo je ra. Nyui que eato ra. Embesa ji rui si. ¹⁵ I que embesa ji quia nyii ra:

jÿëireĩ ireichĩ nda, Sion jenda!

Co jenderecua ru quia co.

Co eru quia burro átoo co,

i que embesa ji quia nyii ra. ¹⁶ Jesús chimbaaquiato que ã icuayãte nyii ra. Embesa ji. Jesús quera si mose que ã icua cote ra. —Embesa ji rui si chõ eriqui rei reaẽ, i que echimbaaquiato eicua ramo cote ra. ¹⁷ Jesús que Lázaro mbuquera, ùqui ndese maesa que mbia mbiirandu randu tuchi quia ra. ¹⁸ Nyebe mbia nyo: ja tuchi nguia Jesús robeishĩ. Jirandure Lázaro raque mbuquera rese. ¹⁹ Fariseos que ñee ñee si nyue no nda. —Jesús rui ja tuchichĩ mbia. ¿Mañi nda aba mbia je re? i que ñee nyue ra.

Griegos mo Jesús requia

²⁰ Griegos mo abe que nyo: Jerusalén nda. Pascua raã naa Dios je. ²¹ Ûqui ngue nyo: ñee Felipe je ra. Felipe que Betsaida jenda ra. Galilea jenda. —Uremaese rete Jesús rese, i que griegos Felipe je ra. ²² Felipe que oso Andrés mbiirandu ra. Ûqui ja que nyo: Jesús mbiirandu cote ra. ²³ Jesús que ñee ee ra. —Mbiarã ngue achu ibate si ra. Semano nonde arubite cote. Sequera si nonde arubite cote. ²⁴ Tacheẽ nyecua jêje. Ibasĩ eĩ tiquia eã mose ra ia eã mbei. Chi chooño mbei rae. Etiquia mose ra suri cote. I a tuchi ra cote. Eĩ ae ra se. Ibasĩ eĩ na si. Amano nda se. Mbia ra setiquia. ²⁵ Ae nduate quia nyiese nae, ùqui nda nyo: eãte ibate. Ae ndua eãte quia nyiese nae, ùqui nguia ra nyo: ibate. Siqui bei sacua huee. ²⁶ Ae secheẽ mumba sereãte quia nae, sã ùqui ndiqui bei serui. Ae ra aico nae, huee ra ùqui abe riqui. Ae secheẽ mumba sereãte quia nae, ùqui niñi nda Paba ñee turã.

Amano nda se, i Jesús mbia je

²⁷ Seya eãte aico co. ¿Mañi ae ra ñee Paba je re? “Semingobe rei se ae. Sembasiã ndei se ae”, ae aroneate Paba je. ã sacua ño ngue achu resẽ. Sembasi sacua ño ngue achu resẽ. ²⁸ Paba, ndequirãcuã eteacuquia mbia je, i que Jesús ra. Ûqui mose que echeẽ mo ndu ee ibate si ra. —Seguirãcuã ngue ateacuquia mbia je ra. Ateacuquia si ra mbia je, i que ibatenda ñee ee ra. ²⁹ Mbia que ibatenda cheẽ ñandu ja rei ra. Ae chi Jesús rese, ùqui. —Ama ndieu ereae, i que mbia ra. —Tei. Angel mo ño ngue ñee nguia Jesús je, i que emo no nda. ³⁰ Jesús que ñee mbia je cote ra. —Seje eã ño ngue ibatenda ñee ndesẽ. Jẽ eandu sacua ño ngue ñee ndesẽ. ³¹ Paba ra seicuaa reã mbasi ja cote. Mbia icua nderecua ra Paba mombo ibi jenda cote. ³² Sembucha mose mii ibate, mbia ra siqui tuchi serese cote. Sucha mo jenda ja abete ra siqui serese cote, i que Jesús ra. ³³ —Mbia ra seiquia mii sembucha ira rese, i ñene. ³⁴ Mbia que ñee Jesús je cote ra. —“Cristo ra siqui bei”, i que Dios cheẽ embesa ji urembiirandu. ¿Mbaerã erecheẽ nde? “Mbia ra sembucha ira rese”, i re. ¿Aba quia Cristo re? ¿Aba quia tu mbiarã nde? i que mbia ñee Jesús je ra. ³⁵ Jesús que ñee ee ra. —Taico mbirimbe jendese jembaaquiato quiatu.

Jendesaebe mbĩrĩ. Tata rendi rãte aico co. Tata rendi siqui mose jendese, jjegata turã ño nguia jẽ! Seicuaa reã ño siqui nguia itondaru. Ũquĩ quiachã ño nguia ũquĩ. ³⁶ Tata rendi raãte aico co. Seico beebe mose jendese, seicua tuchi rã. Eĩ nda jẽingo turã jendesae ji, i que Jesús mbia je ra. Aquere que esi ñemi mbia si cote ra.

Judíos Jesús icua eã mbei

³⁷ Jesús que mbia mae sayã saã saã tuchi te rei mbia je ra. Mbia que Jesús icuayã mbei chõ nda. ³⁸ Ae Isaías mbesa mĩ nyii nae, ũquĩ na si chõ ngue mbia Jesús icuayã cote ra. Eĩ ngue Isaías embesa mĩ nda:

Sererecua, ae uresenei senei nguia mbia je nae, ũquĩ mbia icua sereãte quia ã.

Ndequirãcuã mbia tea sereãte quia ã, i que Isaías embesa ra. ³⁹ Mbia que Jesús icua aroneate ra. Isaías chimbese rã si chõ ngue ra. Eĩ ngue Isaías embesa mĩ no nda:

⁴⁰ Dios que mbia chiã matã nda.

Nyebe eriqui mbae icuayãte ã.

Nyebe eriqui nguia uba eãte serese.

Se embitorõ sacua,

i que Isaías chimbese huĩ nda. ⁴¹ Isaías que Cristo quirãcuã tea nyii ra. Nyebe ã mbesa mĩ nguia Jesús rĩ a. ⁴² Judíos tubiriãte que Jesús icua ra. Judíos rerecua emo emo abe que Jesús icua rei ra. Siqui checuayã ño ngue Jesús rui ra. Esiquichete quiatu ngue fariseos si re. —Fariseos ra nandemombochĩ mbia chumunuasa si jẽ! i que ra. ⁴³ —Dios cheẽ nandemumbayã jẽ, iã ñochĩ ngue re. —i Mbia cheẽ nguia nandemumbayã jẽ! i chõchĩ ngue re.

Secheẽ nguia ra seucuayãsa mbasi, i Jesús

⁴⁴ Jesús que ñee irãtã mbia je ra. —Ae seicua quia nae, se mĩ icua eã. Paba abe icua. Ae sembu ibate si. ⁴⁵ Ae mae nguia serese co nae, Paba abe rese mae. ⁴⁶ Mbia resae sacua ño achu nguia co. Eĩ nda seicuaa siquiã itondãruu. ⁴⁷ Jẽingo secheẽ andu ã. Jemo secheẽ mumba mose, se ra ambasiã. Secheẽ ae ra embasi. Mbia mingo bei sacua ño achu nguia co. Mbia mbasi sacua eã ño achu nguia. ⁴⁸ Secheẽ nguia ra seucuayãsa mbasi, mbae ua mose. Ibi ua mose. Secheẽ ae ra secheẽ mumbasa mondo tata cuasu. Secheẽ andu chooño nguia ngue re. ⁴⁹ Se ae eã ño acheẽ nguia mbia je. Paba quia ñee nguia seje. “Eĩ ere mbia mbaaquiato quiatu”, i que Paba sembu ra. ⁵⁰ Paba cheẽ ndei mbia mingo beisa. Echeẽ mumbayã mose. Nyebe aico nguia Paba cheẽ nenei nenei co. Secheẽ ae eã ño ñene.

13

Jesús mbia i irei irei

¹ —Namo jiri ra Paba sererao ibate ibi si cote, i que Jesús uchiangui re ra. Nyesequa tuchi que equia uchimbaaquiato rese ra. Mano nyee. ² Jesús que quiaru u uchimbaaquiato rese isa ra. Pascua nonde. —Jesús emondo mbia icuã je, i que diablo Judas Iscariote je nyii ra. Simón ndiirĩ ndei aque. ³ Jesús que mbae icua jate ra. —Dios si chõ achu nguia co. Asobe ra erea. Paba que quirãcuã mee tuchi seje ra, i que Jesús uchiangui re ra. ⁴ Quiaru jare que Jesús juã huĩrao mbui ra. Ngũmbi que echucua toalla je ra. ⁵ I que eichusẽ mbae mo ye ra. Uchimbaaquiato i que eirei irei ra. Mbĩru iru que toalla je ra. ⁶ Pedro i nda eirei nguia cote chã. —Sererecua chõ nde resẽ. ¿Mañi ere

ra sei irei re? i que Simón Pedro ñee Jesús je ra. ⁷ Jesús que ñee ee ra. —Ā ereicua yáte. Ae asaã saã nguia ã. Ereicua rei ra cote, i que Jesús ñee Pedro je ra. ⁸ —Sei ra ereirei eã mbei, i rei que Pedro Jesús je ra. —Ndeirei eã mose, serese eã nda nde cote, i que Jesús Pedro je ra. ⁹ —Sei achõ eã eirei rõ. Seo abe eirei no. Seãquĩ abe no, i chee que Pedro ee cote ra. ¹⁰ Jesús que ñee ee ra. — Ae echasu quiite, equishĩte ùquĩ ndesẽ. Jẽi miĩ ño tairei. Jẽquishĩ ja eãte raque. Aque mĩte raque echĩã nondeĩ, i que Jesús uchĩmbaaquiату je ra. ¹¹ Jesús que jirandu Judas rese ra. Nyebe eriquĩ nguia ñee. —Aque mĩte raque echĩã nondeĩ, i.

¹² Ei irei jare que huĩrao mingue cote ra. Ngoi si que ra. Ae ñee nguia nguesenda je. —Jẽi que airei, ¿ũquĩ jẽicuate rei quia re? ¹³ Nyebe jẽingo nguia ñee seje. “Sererecua, Sembaaquiatusa”, i seje. Coche jeñee nguia seje. Ererecua rei se. ¹⁴ Jẽi que airei irei. Ererecua raque se. Nyebe jẽ abe jemo i jẽirei irei ae. ¹⁵ Nyebe que ateacuquia jẽje resẽ. Serui sichõ jẽingo emo i irei irei ae. ¹⁶ Tacheẽ nyecua jẽje. Se rei jenderecua. Se chõ aemondo mondo nguia mbia mbaaquiату sacua. Jengasu ra jẽsaã saãchĩ sesi jẽ. ¹⁷ Jẽ secheẽ icua mose, secheẽ mumbayã mose, jẽya tuchi ra jẽingo. ¹⁸ Jẽ ja je eã aico nguia ñee a. Jaẽirabo que se resẽ. Jaẽicuate que se resẽ. “Ae quiaru serese nae, aque icuãte ra seje cote”, sã embesa ji i no. Embesa ji rui si ra jemo icuã seje cote. Quiarure serese. ¹⁹ ¡A aico ñee jei jẽje a jẽ! Eicuã nonde seje. Eicuã mose seje, jẽ nda seicua cote. “Dios nducucha” jenyẽ tuchi ra seje cote. ²⁰ Tacheẽ nyecua jẽje. Ae secheẽ nenei neneisa isi quia nae, ùquĩ nda seisi se abe. Ae seisi quia nae, Paba abe isi rae, i que Jesús uchĩmbaaquiату je ra.

Jemo nda semondo mbia icuã je, i Jesús

²¹ Jesús ia eã tuchi que cote ra. —Tacheẽ nyecua jẽje. Jemo nda semondo mbia icuã je cote, i que ñee nyecua uchĩmbaaquiату je ra. ²² Echĩmbaaquiату que mae mae ja chõ nyiese ra. —¿Aba ra re? ¿Aba ra re? i jaaja nyue. ²³ Jesús chesecua tuchi que se resẽ. Jaẽicuate que se resẽ. “Ae que quiaru Pedro o mee mee nda. —“¿Aba ra re?” ere ee, i que Pedro ra. ²⁵ Jesús chesecua que ñimbucha i i ñee Jesús je ra. —¿Aba ra re? i ee. ²⁶ Jesús que ñee ee ra. —Mbichae monde ji ra amee jemo je. Ae je ra amee, aque ra semee mbia icuã je, i que Jesús ra. Mbichae que emonde mondo Judas Iscariote je cote ra. ²⁷ Judas mbichae u mose que Satanás ndu embĩcuã tuchi cote ra. Jesús que ñee ee ra. —Ae ra eresaã nae, ¡ũquĩ esaã jeichõ jẽ! i que Jesús Judas je ra. ²⁸ —¿Mbae rĩ Jesús riquĩ ñee Judas je re? i que eataque ra. Mbia iranuã ja que ra. ²⁹ Judas que mbae isiquia quereco ja quia ra. —Mbae mo eisi rã nandechiurã, i rei Jesús quia Judas je uchĩmbaaquiату je. —Mbae mo emondo rã mbaecha reã je, i rei Jesús quia Judas je uchĩmbaaquiату mo je. Echeẽ ngue eicuayã ja ra. ³⁰ Mbichae ure que Judas si usẽ cote ra. Itondarوقي rĩ.

Jesús ucheẽ yasu renei mbia je

³¹ Judas usẽ mose que Jesús ñee nda. —Mbiarã ngue achu ra. Seguirãcuã ndese ra mbia mae cote. Dios quirãcuã abe areco co. Dios quirãcuã abe rese ra mbia mae cote. ³² Aico Dios quirãcuã ndeacuquia mbia je a cote. Dios abe ra seguirãcuã teacuquia mbia je cote. Seguirãcuã nda eteacuquia jei mbia je cote. ³³ Seresenda, aico mbĩrĩ ño nguia jendese a cote. Serequia rei ra se cote. Acheẽ ngue judíos je, ùquĩ sí aico ñee jẽje a. Ae ra aso nae, huee jengasẽ aroneãte. ³⁴ Aico secheẽ yasu nenei jẽje a. Secheẽ mumbayã sacua. ¡Jenyesequa ja jenyese jẽ! Sã ñi aico nyesequa tuchi jendese no. ¡Eĩ jenyẽ

nyesecua tuchi jenyiese jêl ³⁵ Jenyeseecua tuchi mose jenyiese, mbia ra ñee ja tuchi jenî. “Eî nguia Jesús chimbbaaquiatu quia re”, i ra mbia jêje, i que Jesús uchimbbaaquiatu je ra.

Pedro ra ñee ñooño serî, i Jesús

³⁶ —¿Manguiti ra ereso re? i que Simón Pedro ñee Jesús je ra. —Ae ra aso nae, huee ereso aroneate namo. Emo mose jiri ra ereso serui cote, i que Jesús Pedro je ra. ³⁷ Pedro que ñeembe ee ra. —¿Mbaerã nda asoã nderese namo nde? Seso sete nderese. Semano sete nderese, i que Pedro Jesús je ra. ³⁸ Jesús que ñee ee ra. —“Semano sete nderese”, erechî nguia seje. Co isa ra erecheê ñooño serî tres veces. “Jesús aicuayâte resê”, ere chooño nda serî nguira cheê nonde, i que Jesús Pedro je ra.

14

Jesús rei ñeenda Dios icha

¹ Jesús que ñee uchimbbaaquiatu je ra. —Jêya eã eriquichî nguia. Dios jêicua chõ ae. Se abe jêicua chõ ae. ² Ae Paba riqui, huee tuchia tubiriâte. Ûqui eande rae, eî nda acheê eâte rei jêje. Aso ra tucharã naã jêje. ³ Jenyucharã naa jare ra achube jendea cote, jenderao bei serese cote. Jê nda jêingo bei serese pee cote, ae ra aico. ⁴ Ae ra aso, huee jêicuate resê. Ñeenda abe jêicuate resê, i que Jesús ee ra. ⁵ Tomás que ñee ee ra. —Ureicuayâte nyeresê. ¿Mangue ra ereso mangue re? Ñeenda ra ureicua eâte chi nde, i que Tomás Jesús je ra. ⁶ Jesús que ñee ee ra. —Ñeenda rei se. Ñee ñooñoã je rei se. Mbia mingó beisa rei se. Ae ra seicuayâte, ùqui nda ngaseã mbei Paba je. ⁷ Jê seicua mose, Paba abe jêicuate quia ã. Jê Paba jêicuate quia cote resê. Jemae ngue erese namo ndesê, i que Jesús ee ra.

⁸ Felipe que ñee ee cote ra. —Nderu eteacuquia rã ure je. Ûqui mii ño ureico nguia ñee ndeje, i que Felipe ra. ⁹ Jesús que ñee Felipe je ra. —Aico tuchite que jendese, Felipe. ¿Mbaerã ereico seicuayâte re? Ae mae nguia serese, Paba abe rese maete. ¿Mbaerã ereico ñee seje re? “Nderu eteacuquia ure je”, i seje. ¹⁰ Co aico Paba rese co resê. Paba abe riqui serese co. ¿Ûqui ereicuayâte re? Ae aico ñee jêje nae, secheê ae eã ño ùqui nde. Paba riqui serese co. Ae abe riqui mbae raã naa serese co. ¹¹ Secheê jêicua rã. Co aico Paba rese co. Paba abe riqui serese co. “Nya”, jenyê eã mose secheê je, sechisaã je chõ “nya” jenyê.

¹² Tacheê nyecua jêje. Ae seicua quia nae, ùqui nda sechisaã saã saã se rã si cote. Ûqui nda mbae saã saã tuchi sesi. Co quia aso nguia Paba rea se co. ¹³ “Mbae emondo ure je” i mose seje, amondo ra jêje. Jê seicua mose. Eî ae ra Paba quirãcuã ndeacuquia mbia je. ¹⁴ “Mbae emondo ure je”, i mose seje, amondo ra jêje. Jê seicua mose.

Espíritu Turã tamondo jêje, i Jesús

¹⁵ Jenyeseecua mose serese, secheê jemumbayã ae. ¹⁶ Tacheê Paba je. “Espíritu Turã emondo sechimbbaaquiatu je”, ae ra Paba je. Espiritu Turã nda siqui bei jendese cote. Jêquiato tuchi ra ae cote. ¹⁷ Espiritu Turã nda ñee ñooñoã jêje, jembbaaquiatu quiatu. Ae ra siqui eã tuchi Dios quiatoã ndese. Espiritu Turã icuayâte quia ñe ne. Jê nguia jêicuate nguia. Co Espiritu turã ndiqui jendese co. Siqui bei ra jendese.

¹⁸ Aso raque quia co. Esi cheecha rã nda jêingoã. Achube ra jembirõ. ¹⁹ Aichite aî oso a cote. Dios icuasa reã nda mae eã serese cote. Jê nguia

nda jemaē nguiā serese. Aquera si ra siqui bei nonde. Jē abe ra jēingo bei serī cote. ²⁰ Espīritu Turā tu mose ra jēicuate cote. “Jesús rīqui ngu rese co. Ā ureico Jesús rese ā. Jesús rīqui urerese co”, jenyē ra serī cote. ²¹ Ae secheē icua quia nae, ae secheē mumbayāte quia nae, ūquī nguiā nyesequate nguiā serese. Paba nyesequate ūquī ndese. Se abe achesequate ūquī ndese. Tachecua ñimbucha ūquī ndese, i que Jesús uchimbacuaquiatu je ra. ²² Judas, i que echimbacuaquiatu mo je ra. Judas Iscariote eā ño aque re. Judas mo ño aque re. Judas que ñee Jesús je ra. —¿Mbaerā nda erehecua ure je re? Mbia ja je nyecua rocoī, i que Judas ra. ²³ Jesús que ñee ee ra. —Ae nyesequate quia serese, ūquī secheē mumbayāte quia ā. Paba abe ra nyesequate ūquī ndese. Paba ra siqui ūquī ndese. Se abe ra aico ūquī ndese. ²⁴ Ae nyesequa eāte quia serese, ūquī secheē mumba mumbate quia ā. Secheē ae eā asenei senei nguiā jēje co. Paba cheē ño asenei senei nguiā jēje. Ae chō sembu nguiā.

²⁵ Seso nonde aico co renei nenei jēje a. Sereco mosebe jendese. ²⁶ Paba ra Espīritu Turā mondo jēje secheē ndui si. Jēquiatu tuchi ra Espīritu Turā cote. Ae ra jembacuaquiatu tuchi mbae ja rī cote. Ae ra jemundua tuchi secheē ndese cote. ²⁷ Co aso quia co. Jēyayā eā taemingo a. Seicuaa reā na si eā taemingo. Ūquī nguiā eya eāte rīqui nguiā. Sā seyate se no. Eī tae jembia mingo a. ¡Jēya bei chō jē! ¡Jēsiquicheā ño jē! ²⁸ Aso ra Paba rea cote. Aquere ra achube jembirō. Ūquī ndese que jēirandu resē. Jenyesequa mose serese, eī ndei ra jēyate secheē ndese. “Taso Paba rea”, i mose. Ae quiarei i tuchi sesi. ²⁹ Seso nonde aico ñee tuchi jēje a cote. “Ñee ñoñoā tuchi quia equia re”, jenyē tuchi ra seso mose cote. Huee ra jē seicua tuchi cote. ³⁰ A nda aicobe ñee ñee jēje chā. Diablo quia tu nguiā co. Mbia icuā nderecua ru quia co. Ae quiarei equiracuā neā jiri sesi. ³¹ Paba cheē ndui si taico. Mbia seiquia arondete raque. “Nyesequa tuchi quia equia ngu rese re”, i ra mbia seje cote. Paba cheē mumbayā mose. Jēhuā. Nyao, i que Jesús uchimbacuaquiatu je ra.

15

Jesús rei ira i rā

¹ Jesús que ñeembe uchimbacuaquiatu je ra. —Se rei ira i rā. ² Paba rei ira raarōsa rā. Ira rāquīā ndibisho ia eā mose, nyisia rae. Erāquīā ia mose, saarō turā ndae. Mbeerera rera rae. Embitirō sacuā. Ia tuchi sacuā cote. ³ Jē ngue secheē jēisi turā ndesē. Nyebe Paba jembitirō secheē je resē. ⁴ Jēingo bei ñimbucha serese. Sā aico ñimbucha jendese no. Ira rāquīā ae ra ia eā. Siquīā mose ñimbucha hui rese. Eī jenyē ra jē. Mbae turā nda jēsaā eā jē ae. Siquīā mose ñimbucha serese. ⁵ Se rei ira i rā. Erāquīā na ndei jē. Jēingo mose ñimbucha serese, seico mose ñimbucha jendese, jētūrā tuchi ra jēingo cote. Jē ae ra mbae turā jēsaā eā, siquīā mose ñimbucha serese. ⁶ Ae siquīā ñimbucha serese nae, ūquī nda siqui ira rāquīā sia ji rā. Eiru mose ra mbia emunua nua. Erēi sacuā. ⁷ Jēingo bei mose serese, jeñee nda amumbayā. “Mbae embu ure je”, i mose, amondo ra jēje. Jētesareīā mose secheē si. ⁸ Jēingo turā mbei mose, mbia ra ñee turā turā mbei Paba rī. Jēingo turā mbei mose, “Jesús chimbacuaquiatu tuchi quia eriqui re”, i ra mbia jeni. ⁹ Sā Paba rīqui nyesequa serese nae, eī ae si equia nyesequa jendese co. Jēingo bei ñimbucha serese. Eī nda achesequa bei jendese. ¹⁰ Paba cheē amumbayāte quia co. Nyebe Paba rīqui nguiā nyesequate serese co. Jē secheē mumbayā mose, achesequa bei

tuchi ra jendese. ¹¹ Aico ñee jembaaquiato co. Jembia sacua. Sã seyate se no, se rã si ra jëya.

¹² ã ndei secheẽ ã: ¡Jenyesequa tuchi quia jenyiese jê! Sã aico nyesequa tuchi jendese no. ¹³ “Se tamano sequiato ribishorõ”, i mose emo, aque quiarei nyesequa tuchi te uquiato rese. ¹⁴ Sequiato rei jê, secheẽ mumbayã mose. ¹⁵ “Serimba” aeã nda jêje cote. Ererequa quiato “sequiato” i âte nguiã ngũimba je. Ñee ja eãte ngũimba je. Sã eriqui ñee ja uquiato je no. Se quia ñi Paba cheẽ asenei senei jate nguiã jêje. Nyebe “sequiato” tae jêje cote. “Serimba” i rocoĩ. ¹⁶ Jê ngue seirabo eã ndesê. Se quiato ngue jaẽirabo nguiã. ¡Mbae turã ño jësaã saã mbei quia seje jê! ¡Jenyisaã nda uachĩ jê! Jê ngue seicuante. Nyebe jê “mbae mo embu ure je”, i mose Paba je, mondo ra jêje. ¹⁷ ã ndei secheẽ jêje ã: ¡Jenyesequa tuchi quia jenyiese jê!

Mbia ataque Jesús rimba ucuayã

¹⁸ Dios icuasa reã nda jëucuayãte cote. ¡Jëicua quiato jê! “Eĩ ngue equia Jesús ucuayã nyii resê”, jenye ra cote. ¹⁹ Jaẽirabo que se ra. Nyebe jëingo nguiã Dios icuasa reã na eã. Nyebe eriqui nguiã jëucuayãte ã. Jê ùqui na mose, eĩ nda eriqui turãte rei jendese. ²⁰ Acheẽ ngue jêje nyii, ¡ùqui ndese jendua jê! ¡Jengasa ra jësaã saãchĩ sesi jê! Mbia icuã mose seje, jêje abe ra eicuã. Mbia secheẽ mumbayã mose, jê abe cheẽ mumbayã ndae. ²¹ Serĩ nda Dios icuasa reã jeĩ jeĩ jêje. Dios icuayãte quiato nguiã ã. Nyebe ra eicuã icuãte jêje. ²² Achu que mbia mbaaquiato quiato ra. Nyebe ra Dios eicuã tea chooñoã cote. Eĩ nda Dios eicuã tea chooño ndei. Se embaaquiato eã mose. “Ureicuã ureicuayãte quia ã”, i aronea ño emo cote re. ²³ Ae seucuayãte quia, Paba abe ucuayãte equia ã. ²⁴ Mbia mae sayã ngue ateaquiqua tuchi rei ee ra. Sechisaã nda mbia mo saã eã. Eĩ nda Dios mbia icuã tea chooño ndei. Sechisaã ndese mae eã mose. Sechisaã ndese mae ndaque, seucuayã ño nguiã ã. Paba abe ucuayã ño nguiã ã. ²⁵ Mbia riqui seucuayãte ã. Sã embesa ji riqui ñee no: “Mbia seucuayãte. Se mbae icuã asaã eãte raque”, sã embesa ji riqui i no. Ùqui ìquechĩ cote. ²⁶ Seso mose Paba rea, Espiritu Turã tamondo jêje. Jëquiorã. Ae ra tu Paba si jêje. Ae ra ñee ñooñoã jêje. Ae ra jembaaquiato quiato turã serĩ. ²⁷ Nyii mosenda bei chõ jëingo nguiã serese. Nyebe ra jê abe mbia jembaaquiato quiato turã serĩ, i que Jesús ra.

16

¹ Jesús que ñee i i uchimbaaquiato je ra. —A aico ñee jêje a. Eĩ nda jêhui eã sesi, mbia icuã icuã mose jêje. ² Mbia ra jendiquisã quisã, jëso jëso mose mbia chumunuasa. “Ã ureico rei nguiã mbae turã naa naa Dios je ã”, i ra mbia jëiquia iquia mose. ³ Seicuayãte quia ñe ne. Paba abe icuayãte quiato nguiã ã. Nyebe ra eriqui mbae raã icuã icuã jêje. ⁴ Eĩ ae chõ nguiã ñee jêje co. Eĩ nda jendua secheẽ ndese, mbia icuã icuã mose jêje. “Jesús cheẽ ìquechĩ cote”, jenye ra cote.

Espiritu Turã nda jembaaquiato quiato, i Jesús

Acheẽ jei eã ngue jêje ùqui cose resê. Aicote quiato ngue jendese re. ⁵ Co quia asote nguiã Paba rea co cote. Ae sembu. “¿Manguete ra ereso mangue re?” i eã ñochĩ jemo seje. ⁶ Se “taso” i mose jêje, jëya eãte chõ jëingochĩ nguiã ã. ⁷ Tacheẽ nyecua jêje. Coche aso nguiã jendecha co. Espiritu Turã nda ambu jêje. Jëquiorã. Ae ra siqui jendese. Eĩ nda Espiritu Turã tuãte rei. Seso eã

mose jësi. ⁸ Espiritu Turã tu mose ra ñee ñee mbia je. “Mbia icuã ja chõ ñe ne. Jëingo turã Dios resa rae. Dios ra Jesús icuasa reã mbasi ja”, i ra Espiritu Turã ñee mbia mbaaquiату quiату. ⁹ “Jë nguia Jesús jëicuayãte nguiaã ã. Nyebe jëicuã ndiqui nguiaã”, i ra Espiritu Turã ñee mbia mbiirandu. ¹⁰ Aso ra Paba rea cote. Mbia ra mae eãte serese cote. Nyebe ra Espiritu Turã mbia mundua mbae turã ndese cote. ¹¹ “Dios ra diablo mondo tata cuasu. Nyebe ra mbia icuã abe mondo tata cuasu”, i ra Espiritu Turã ñee mbia mbiirandu.

¹² “Taembaaquiature jiri”, ae rei se. Jëicuayã jeite chõ ndae. ¹³ Espiritu Turã tu mose, ae ra jembaaquiату quiату turã mbae ja rese. Ñee ñooñoa tuchi rae. Ucheë ae ra esenei seneiã. Paba cheë ño esenei senei nguia. Mbae tu nonde ra Espiritu Turã jembiirandu erese. ¹⁴ Espiritu Turã nda jembaaquiату quiату secheë ñii. Ûqui mose ra mbia ñee turã turã serii cote. ¹⁵ Ae Paba senei senei nguia, ùqui asenei senei nguia se abe co. Nyebe ra Espiritu Turã jembaaquiату quiату secheë ñii.

Jëya eande nyii ra jëya tuchi cote, i Jesús

¹⁶ Namó jiri ra jemaе eã serese cote. Aquere ra jemaembe serese cote. Aso ra Paba rea, i que Jesús uchimbaaquiату je ra. ¹⁷ Echimbaaquiату que ñee ñee nyue ra. —¿Mbae i Jesús quia re? “Namó jiri ra jemaе eã serese cote. Aquere ra jemaembe serese cote. Aso ra Paba rea”, i chõchõ. ¿Mbae ùqui nde? ¹⁸ ¿Mbaerã eriqui “namó jiri” i re? ¿Mbae rií eriqui ñee nde? Nandeiranuã tuchichí, i que echimbaaquiату ñee nyue ra. ¹⁹ Jesús que jirandu erese ra. —“Ndecheë embiasa jiri ure je” ¿jenye sete seje re? “Namó jiri ra jemaе eã serese cote. Aquere ra jemaembe serese cote”, ae que jëje, ¿aque jëicuayãte re? ²⁰ Tacheë nyecua jëje. Namó jiri ra jenyeseo. Jëya eãte rae. Sequiatóã nda eya tuchi. Aquere ra jëya tuchi cote no. Jëya eande nyii. ²¹ “Serasichí nda cote re”, i ra esi ndua ndua áquë nyaacuquia serí mose. Eyayã tuchi ae. Áquë nyaacuquia mose cote, eya tuchi ra cote. Ndua eã tuchi ra ngasi rese cote. Eya tuchi chõ nda nguiri ndese cote. ²² Áquë ndasi rá ño jë nde. Jëya eãte namó. Setube mose jendea, jëya tuchi ra cote. Emo nda jembia eã eã cote. ²³ “Ndecheë embiasa jiri ure je”, jenye eã nda seje cote. Tacheë nyecua jëje. Jë seicuate. Nyebe jë “mbae mo embu ure je”, i mose Paba je, mondo ra jëje. ²⁴ “Mbae mo embu ure je. Jesús icuasa je”, jenye eã mbeite equia Paba je ã. Jëñee ee. Jëñee mose ee, mondo ra jëje. Jëya tuchi ra cote.

Jesús quirãcua tuchi ibi jenda si re

²⁵ Acheë tuchi rei que jëje ra. Secheë ngue ambiasa tuchia jiri jëje ra. Emo mose jiri quia ra secheë ambiasa tuchi jëje cote. Paba rií. ²⁶ Aque mose ra jëñee Paba je. “Mbae embu rá ure je”, jenye ra Paba je serii. Aque mose ra acheë eã ee jeni cote. Jë ae chõ nda jëñee ee cote. ²⁷ Paba sí nyesequa tuchite quia jendese co. Jenyesequate quiату nguia serese ã. “Dios que Jesús mondo nande je resë”, jenye quiату nguia seje ã. Nyebe Paba riqui nguia nyesequa tuchi jendese. ²⁸ Paba si que achu ibii resë. Asobe ra ibi recha cote. Paba rea ra asobe ibátee cote, i que Jesús ñee uchimbaaquiату je ra.

²⁹ Echimbaaquiату que ñee ee ra. —Ereicochí ñee nyecuate ure je a cote. Ndecheë erembiasa tuchichí nguia ure je a cote. ³⁰ Mbae ereicua ja tuchi quiату quia nde reaë. Mbia ndua ndua ereicuate quia equia co reaë. Ñee nonde ndeje. Nyebe ureico nguia ndeicuate ã. “Paba si chõ erechu nguia co”, ure equia ndeje ã, i que echimbaaquiату ee ra. ³¹ Jesús que ñee ee cote ra. —Jë

ngue seicuate rei nguiã. ³² Seandu rã se. Namu jiri ra jeñimbuchao chao oso sesi. Jêso ja ra serecha namo. Se ae eã nda aico. Paba riqui nguiã serese co. ³³ Jê seicua mose, mbae ra jembia eã eã. Nyebe aico nguiã jembiiirandu randu beite co. Mbia icuã icuã mbeite ra eriqui jêje a íbii. ¡Jeñimbirãcuã jiri quia jê! Se quia sequirãcuã tuchi ibi jenda si re, i que Jesús ñee uchimbaaquiату je ra.

17

Sechimbaaquiату eteaquiату, i Jesús Dios je

¹ Jesús ñee jare uchimbaaquiату je que soboiba mae ibate ñee Dios je ra. —Paba, ndecheẽ ndiquichĩ io a cote. Seturã eteaquiquia mbia je cote. Eĩ nda se abe ndeturã ateaquiquia mbia je. ² Nde chõ ngue semii mbia rerecurã, Paba. Mbia mingo bei sacuã. Mbia que eremee seje, ùqui mingo bei sacuã. Se rei nderucucha. ³ Paba, nde mii ndei Dios tuchi ereico co. Se rei Jesucristo ndechimbu ibate si. Ae ndeicuate quia nae, se abe icua equia nae, ùqui nda siqui bei. ⁴ Ndeturã ngue ateaquiquia mbia je ra. “Ã esaã íbii”, ere que seje, ùqui ngue asaã ja cote ra. ⁵ Paba, seturã eteaquiquiabe mbia je. Cose ndare rã. Mbae eã mosenda rã. Asobe ra siqui nderese. MSã ndeturã eteaquiquia mbia je nae, seturã abe eteaquiquia mbia je.

⁶ Mbia que eremee seje, ùqui ngue ambiirandu tuchi nderese ra. Nembae rei que nyii ra. Eremee ngue seje cote ra. Ndecheẽ ngue emumbayã nda. ⁷ Nde chõ ngue sembaaquiату quiату nguiã, Paba. Ndecheẽ ae chõ ã nde. Secheẽ eã ño ñe ne. Ùqui ngue sechimbaaquiату icuate ra. ⁸ Eresenei senei ngue seje, ùqui ngue asenei senei ja ee ra. Nandechẽ ngue eisi ja turãte ra. “Paba si que Jesús ru ra. Paba que embu ra”, i equia nderiã ã. ⁹ Sechimbaaquiату eteaquiату, Paba. Seicuaasa reã je eã ño aico nguiã “eteaquiату” i ndeje. Ae eremee seje nae, ùqui je chõ aico nguiã “eteaquiату” i ndeje. Nderimbate quia ñe ne. ¹⁰ Ae nderimba nae, serimba chõ se abe re. Ae serimba nae, nderimba chõ ùqui no nde. Serimba riqui ñee turã mbei seriã ã. ¹¹ Asobe ra ndeje, Paba. A ra aicoã íbii cote. Serimba quia ra chichõ íbii. Eteaquiату, Paba. Ae eremee seje, ùqui eteaquiату ndequirãcuã je. Mbae mii ndese ja chõ emundua ndua mingo. Sã nande nandendua ndua mbae mii ndese no nae. ¹² Ae eremee seje, ùqui ngue ateaquiquiату quiату quia ndequirãcuã je ra. Seico mose íbii. Emo ngue quiachã eãte sesi ra. Aque mii nda quiachã. Embesa ji cheẽ ndui si ra aque mii quiachã. Huicuaã jê. Emo ngue quiachãyã cote ra. ¹³ Aso ra nderea cote. Seico beebe mose íbii, aico ñee ñee ndeje serimba rii a. I nda eya quiату chi a. Sã seyate se no. ¹⁴ Ndecheẽ ngue asenei senei ee ra. Ibi jenda eã ño se re. Serimba abe rei ibi jenda eã. Nyebe ibi jenda riqui nguiã serimba ucuayã. ¹⁵ “Serimba erao ibi si”, ae eã ño nguiã ndeje co, Paba. “Eteaquiату diablo si”, ae chõ nguiã ndeje co. ¹⁶ Se rã si rei serimba. Ibi jenda eã ndiqui ã. ¹⁷ Serimba emingo tuchi icúe nembraerã. Ndecheẽ je emingo icúe. Nde quia erecheẽ ñooño eãte nguiã. ¹⁸ Sã nde sembu mbia je no, eĩ ae si chõ nguiã serimba mondo mondo mbia mbaaquiату quiату co. ¹⁹ Aico ñimondo tuchi ndeje co, Paba. Mano sacuã serimba je. I nda serimba abe ñimondo tuchi ndeje.

²⁰ ã nii achõ eã aico ñee ndeje. “Eteaquiату” i ndeje. ã nda secheẽ senei senei emo je abe cote. Ùqui abe ra seicua cote. Serimbarã. Ae ra seicua icua nae, ùqui abe eteaquiату. ²¹ Mbae mii ndese ja chõ ùqui emundua ndua mingo. Mbae mii naanguia tuchi emingo nanderese, Paba. Sã ereico serese

no nae. Sã aico nderese no nae. Eĩ nyere si ũquĩ mingo mbae mii na. Eĩ nda mbia seicuasa reã ñee serĩ. “Dios chimbu quia eriqui re”, i nda mbia ñee serĩ ña. Seicuasa siqui mose mbae mii ndese. ²² Ndeturã ngue ereme seje, eĩ ae que seturã mondo seicuasa je ra. Eĩ nda eriqui mbae mii na. Sã nandeico mbae mii na nande no, Paba. ²³ Nyebe aico nguiã seicuasa rese co. Nde ereico serese co no. Nyebe seicuasa riqui mbae mii na co. Eĩ nda seicuasa reã ñee nderĩ. “Dios quia Jesús mbu quia reaẽ. Dios quia nyesequa quia Jesús icuasa rese re. Jesús rese rã si nyesequa”, i nda mbia ñee nderĩ ña. ²⁴ Paba, serimbarã ngue ereme seje. Ae ra aso, sã echoi serea siqui bei huee serese cote. Ndecheẽ turã andu sacua serĩ huee. Erecheẽ turã mbeite serĩ. Ibi eã mosenda bei chõ ereico nguiã nyesequa serese co. ²⁵ Ndeturã tuchi, Paba. Seicuasa reã ndeicuayãte quia ã. Se quia areicuata nguiã co. Serimba abe que ndeicuata quia ã no nda. “Dios chimbu”, i seje nderĩ. ²⁶ Arerenei nenei tuchi que serimba je ra. Tarerenei nenei tuchi be ee. Eĩ nda nyesequa tuchi nyiese. Sã ereico nyesequa tuchi serese no nae. Taico bei serimba rese cote, i que Jesús Dios je ra.

18

Mbia icuã ngaẽ Jesús ruruchoi

¹ Jesús ñeende ngu je que echoi ama ñetẽ ndobei ra. Cedrón, i que aque ama je ra. Aque robei que esi uchimbaaquiatu rese ra. Iraqui turã mo ngue echoi ra. ² Jesús que oso oso beite quia huee ra. Iraqui re. Uchimbaaquiatu rese. Nyebe Judas riqui nguiã hue icuate. —Jesús tateacuquia checuayã mbia je, i que Judas ra. ³ Nyebe Judas mbia ruruchoi nguiã huee Jesús isi sacua. Soldados que ecuruchoi ra. Policía jenda abe que ecuruchoi no nda. Sacerdotes rerecua chimondo rei policía. Fariseos chimondo abe no. Ũquĩ ja que nyoĩ ngasẽ Jesús je ra. Tiquise que ecuruchoi quia ra. Lámparas abe no. Mbae rendi abe no. ⁴ Jesús que mbae icuate ra. —Mbia ra jeĩ jeĩ seje, i que eicuate ra. —¿Aba rea jenyu quia co re? i que oso ñee ee ra. ⁵ —Jesús rea urechu quia co. Nazaret jenda, i que mbia ñee nda. —Se chõ Jesús resẽ, i que ee ra. Judas abe que siqui mbia rese huee ra. Ae que siqui Jesús mee mbia icuã je huee ra. ⁶ —Se chõ Jesús resẽ, i mose que mbia siri siri choi uquite quti ra. Ngoi ngoi chee que echoi ra. ⁷ —¿Aba rea jenyu quia co re? i be que Jesús ñee ee ra. —Jesús rea urechu quia co, i que ra. ⁸ Jesús que ñeembe ee ra. —“Se chõ nyeresẽ”, ae que jẽje. Serequia mose, sererao se ae. Sã seresenda chichõ, i que Jesús ee ra. ⁹ —Ae Paba mee seje serimbarã, ũquĩ mo quia chãyãte sesi, i que Jesús nyii ra. Nyebe ñee nguiã mbia je cote. —Sã seresenda chichõ, i mbia je cote. ¹⁰ Simón Pedro que uchuuru siqui tiquise ra. Sacerdote rerecua rimba rese que tiquise rerequia requia ra. Eisa que echisia equiatocuti quitinda ra. Malco, i que aque je ra. Ae isa Pedro chisia. ¹¹ Jesús que ñee Pedro je ra. —Ndechuuru emingue chõ eriru ye. Paba cheẽ tamumbayã na. Tachequachõ na mbia je. Sã mbia icuã sembasi tuchi cote, i que Jesús Pedro je ra.

¹² Soldados que Jesús isi cote ra. Soldados rerecua rese. Policía rese. Ũquĩ ja que Jesús isi ra. Nyucua que suruchoi ra. ¹³ Anás chuchua rane ngue eruchoi ra. Anás ndiirĩ ngue Caifás ninisi ra. Caifás que sacerdote rerecua aque mose ra. ¹⁴ Caifás sí quia que ñee nyii ra. —Aque mii ño nda mano nguiã nande ja je chã, i que judíos je nyii ra.

Jesús aicuayâte, ichõïño Pedro

¹⁵ Mbia Jesús ruruchoi mose que Simón Pedro nyoï erui ra. Jesús chimbaaquiату nongue rese. Co miï ndese. Enongue que sacerdote rerecua icua ra. Nyebe ique oso nguiã Jesús rui. Sacerdote rerecua itaicue. ¹⁶ Mbia que Pedro siquisã miï etaronda robei ra. Sacerdote chiicua que tu nyebi ñee echiquesa raarõsa je cote ra. —Sã Pedro ique rã serese, i que ra. Nyebe emingue nguiã cote. ¹⁷ Echiquesa raarõsa que ñee Pedro je ra. —¿Jesús resenda nde re? i que nyucuaaque Pedro je ra. Echiquesa raarõsa. —Tei, ichõïño ngue Pedro ee ra. ¹⁸ Nyiiseïte mose que ra. Nyebe policia jenda tata mbucha nguiã. Sacerdote rimba rese. Uqui ja que chi nyee ra. Pedro que chi nyee erese ra.

Sacerdote rerecua ñee Jesús je

¹⁹ Sacerdote rerecua que ñee Jesús je ra. —¿Aba ndechimbaaquiату re? ¿Mbae riñ ereico mbia mbaaquiату quiату re? i que ererecua ra. ²⁰ Jesús que ñee ee ra. —Se que acheẽ ja mbia resa rae ra. Mbia chumunua nuásaa ja que aico mbia mbaaquiату quiату ra. Dios chuchúaa abe no. Acheẽ nyecuayã cuayã eã ngue se quia mbia ísaa ra. ²¹ ¿Mbaerã ereico ñee seje re? Secheẽ andusa je quia echeẽ. Sã uqui ñee. Mbae riñ acheẽ ee re. Uqui ngue secheẽ ñandu ja quia ra, i que Jesús ererecua je ra. ²² Jesús cheẽ mose que policia jenda mo ucua eritiï rese ra. —¿Mbaerã ereico ñee sacerdote rerecua je uqui nde? i que policia mo ñee ucua Jesús rese ra. ²³ Jesús que ñee ee ra. —Secheẽ icuã mose quia echeẽ seje. Mbae icuã niï aico ñee nde. Secheẽ turã mose chõ erecuachï nguiã serese, i que Jesús ee ra. ²⁴ Anás que Jesús mondo Caifás je cote ra. Ecuasa que ecuruchoi Caifás je ra. Caifás que sacerdote rerecua ra.

Jesús aicuayâte, i si Pedro

²⁵ Pedro que nyee beite u tata ra. Mbia mo ngue ñee ee ra. —¿Jesús resenda nde re? i ee. —Tei, ichõïño ngue Pedro ee ra. ²⁶ Ae isa Pedro chisia nae, aque resenda que siqui huee ra. Sacerdote rerecua rimba chõ ae re. Ae que ñee Pedro je ra. —Nde rese amae iraquï re Jesús rese reae, i que Pedro je ra. ²⁷ —Tei, ichõïño ngue Pedro ee no nda. Aque mose tuchi que nguira ñee cote ra.

Pilato ñee Jesús je

²⁸ Policia jenda que Jesús curuchoi Caifás chuchua si cote ra. Ererecua tuchi chuchúaa que eruruchoi cote ra. Pretorio, i que hue tuchia je ra. I que nyaashï u quia cote ra. Judíos que iqueã ererecua chuchua ra. Mbaeiaete que abae chuchua ee ra. Pascua raã nonde. —Eï nda oveja roo nandeuâte rei pascua mose, ique mose abae chuchua, i que ra. ²⁹ Nyebe Pilato si nguiã usẽ ñee ee. —¿Mbaerã jëingo ñee Jesús je re? ¿Mbae icuã esaã nde? i que Pilato ra. ³⁰ Mbia que ñee ee ra. —Jesús que mbae icuã saã saãte ra. Eï nda uremondoâte rei ndeje. Mbae icuã naa naa eã mose, i que mbia Pilato je ra. ³¹ Pilato que ñee mbia je ra. —Jẽ ae Jesús jendao ae. Jẽ ae jëingo erese ae. Jẽ ae Jesús jembasi mbasi ae. Jenamei ñimbasa mumba mose, i que Pilato ee ra. Judíos que ñee Pilato je ra. —Ure rei judíos. Ure mbia mo ureiquia aroneate. Nde chõ echb ã. “Jëiquia” ere chõ soldados je, i que mbia ñee Pilato je ra. ³² Jesús cheẽ iquechï cote. —Mbia ra sei quia sembucha ira rese, i rei nyii. Echeẽ iquechï cote.

³³ Pilato que ique si oso uchuchúaa ra. Ae “quiatushu” i nguiã Jesús je. —¿Judíos rerecua tuchi nde re? i que Pilato Jesús je ra. ³⁴ Jesús que ñee ee ra. —¿Nde ae erecheẽ nguia seje a re? Emo ñee ndeje nyii reae, i que Jesús ee

ra. ³⁵ Pilato que ñee ee ra. —Judío eã ño se resē. Judíos sí chō ngue nemondo seje resē. Sacerdote rerecua abe no. ¿Mbae icuã eresaã nde? i que Pilato ra. ³⁶ Jesús que ñee ee ra. —Ererecua raque se. Ererecua eã ño se a íbii re. Eí nda serimba nyarō tuchi rei serese, judíos ndiquisã quisã tuchi sesi. Ibi jenda rerecua eã ño se re, i que Jesús Pilato je ra. ³⁷ —¿Ererecua rei nde re? i si que Pilato ñee Jesús je ra. Jesús que ñeembe ee ra. —Ae. Achu que íbii ra. Sechusua rei íbii. Achu que mbia mbiirandu randu Dios cheē ñii nda. Ichōiñosa reã ñee ñii. Ichōiñosa reã ndesenda ra seandu ja, i que Jesús Pilato je ra. ³⁸ —¿Mbae ichōiñosa reã nde? i que Pilato ee ra.

Jesús jembucha iquia ira rese, i ererecua

Aquere que Pilato usē si oso ñee judíos je ra. —Mbae icuã Jesús saã eãt e reae. ³⁹ Pascua mose bei que aico etarō ji mbusē mondo bei jêje ra. ¿Aba ra ambusē mondo jêje namo nde? ¿Judíos rerecua ra ambusē mondo jêje re? i que Pilato ñee mbia je Jesús rii nda. ⁴⁰ Mbia que ñee mombo mombo ja Pilato je ra. —Tei. Aque eã. Barrabás quia embusē imbu ure je, i ja que mbia ñee nda. Mbae mbuquiachãsa tuchi rei Barrabás.

19

¹ —Jesús jêiruã nua, i que Pilato ra. Mbia que Jesús iruã nua cote ra. ² Nyu ritiméi uma ji que soldados mii Jesús aqũ ndese ra. Tiru ireĩ ngue emingue ee ra. ³ —Judíos rerecua tuchi chō nde re, ichōiño ngue soldados ucuu ucua Jesús rese ra. ⁴ Pilato que usē si oso ñee mbia je ra. —Secheē jeñandu rã. Acheē ndei que Jesús je ra. Mbae icuã esaã eãte reae. Nyebe anosembe nguiã jêje co, i que Pilato ra. ⁵ Jesús que econosē mbia je ra. Nyu ritiméi uma ji que equerao quia uãquĩ ndese ra. Tiru ireĩ ngue equerao quia nguete rese ra. —A Jesús a resē, i que Pilato Jesús ndeacuquia mbia je ra. ⁶ Sacerdote rerecua que chí ja huee ra. Policía jenda mo abe que chí huee ra. Ūquĩ ja que ñee mombo mombo Pilato je ra. —¿Embucha ira rese! ¿Embucha ira rese! i ja que ñee mombo mombo ee ra. Pilato que ñee ee ra. —¿Jê ño jembucha ira rese ae. Mbae icuã esaã eã arôte seje, i que Pilato mbia je ra. ⁷ Judíos que ñee Pilato je cote ra. —“Dios rucucha rei se”, ichĩ Jesús nguiã. Nyebe eiquia. Sã embesa ji riqui i no: “Ae Dios ririĩ saã nguiã, aque jêiquia”, i que embesa ji ra, i que judíos ñee Pilato je ra. ⁸ —Dios rucucha, i mose que Pilato siqueiche tuchi cote ra. ⁹ Pilato que ique si oso ñee Jesús je ra. —¿Ma jenda rei nde re? i que Pilato Jesús je ra. Jesús que ñee eã tuchi echeē mose ra. ¹⁰ Pilato que ñee si ee ra. —¿Mbaerã ereico ñee áte secheē mose re? Arembucha arôte ira rese. Arembui abe arôte se. Se chí mbia rerecua, i que Pilato ñee Jesús je ra. ¹¹ Jesús que ñee Pilato je ra. —Dios nemii eã mose mbia rerecuarã, eí nda ereoco áte rei serese. Ae semondo ndeje, ae quiarei eicuã tuchi ndesi, i que Jesús ee ra.

¹² Aque mose bei que Pilato ndua ndua Jesús rese ra. —Jesús tambui mondo, i raque ndua ndua. Judíos quiatu que ñee ee ra. —Nya. ¿Erembuichĩ nda jê! Nde embui mose, César quiato eã nda nde cote. “Ererecua rei se”, i quia ñi Jesús re. Nyebe eicuãte riqui nguiã César je, i que judíos tasē tasē Pilato je ra. ¹³⁻¹⁴ Judíos cheē andu mose que Pilato ngoi ngüenda tose ra. Huee que eriqui ñee mbeite mbia je ra. Gábata, i que erenda je ra. “Sita mbiitee ji”, i ñi Gábata re. —Jesús jendu rã seje, i que Pilato policía jenda je cote ra. Pascua nonde. Mbia ico quiatu mose pascua nonde. Tenda nandeite re mose. —A jenderecua ñi a resē, i que Pilato mbia je ra. ¹⁵ Mbia que tasē tasē ee ra. —¿Eiquia rei! ¿Embucha ira rese! i que mbia Pilato je ra. —¿Se ra jenderecua

aiquia re? i que Pilato mbia je ra. —Urererecua mo eãte nyeresẽ. César mii ño nyeresẽ, i que sacerdote rerecua Pilato je ra. ¹⁶ Aque mose que Pilato Jesús mondo mbia je cote ra. —Jëiquia. Jembucha ira rese, i que mbia je ra. Hue si que mbia Jesús ruruchoi cote ra.

Mbia Jesús mbucha ira rese cote

¹⁷ Jesús que usẽ oso cruz resebe cote ra. Mbia que ecuruchoi ibi ibátee ra. “Eresa cuare” i que hue ibi ibate je ra. “Gólgota” i que judío cheẽ hue je ra. ¹⁸ Huee que soldados Jesús mbucha ira rese ra. mbia nyeremo abe que embucha ira rese ra. Co mii Jesús ribisho quiti. Enongue eribisho quiti no. Jesús que emii eite re ra. ¹⁹ Pilato que letrero mbesa ra. JESUS DE NAZARET REI JUDIOS RERECUA, i que embesa ra. Embesa ji que emii ibate Jesús aqũ nguiti ra. ²⁰ Judíos tubiriã ngue chi mae embesa ji rese ra. Sucha tubiriã jiite quiatu ngue Jesús mbucha nguiã ira rese. Embesa ji que chi mbia cheẽ mbuae jaa ja ra. Judío cheẽ. Griego cheẽ. Latín ñee. ²¹ Sacerdotes rerecua que ñee ja Pilato je ra. —“Judíos rerecua” erechi nguiã embesa. “Judios rerecua raã ñooño” ere chõ embesa mii ae, i rei que judíos rerecua Pilato je ra. ²² —Ae ambesa, sã ùqui ñi ño, i que Pilato judíos rerecua je ra.

²³ Cuatro soldados que chi huee ra. Ûqui ngue Jesús mbucha ira rese ra. Ûqui ngue Jesús irao isirõ sirõ ja ra. Jesús irao mii ngue chichõ cote ra. Tejido turã tuchi que aque tiru ra. Eiasa eã tuchi que ra. Eao ji chõ eresebe que ra. ²⁴ Soldados que ñee nyue ra. —Aque ra nandechisia eã. Sita ñetẽ nandesurubaba baba rã nandechue. Aba ra ja. Aba ra eirao querao ja, i que nyue ra. Sita ñetẽ ngue esurubaba baba uchue cote ra. Embesa ji cheẽ iquechi cote. Jesús irao soldados mbuchao chao mose. “Seirao que embuchao chao nyue ra. Sita ñetẽ ngue esurubaba baba uchue ra”, i que embesa ji huĩ nyii ra. Embesa ji iquechi cote.

²⁵ Jesús mbuchasa ira rese que cuña mo chi ra. Jesús si que ra. Esi nongue abe que ra. María Magdalena abe que ra. Cleofas ninisi abe que ra. María, i que aque je ra. Ûqui ngue chi ja Jesús ji ra. ²⁶ Juan abe que chi Jesús si ji ra. Jesús mae mose usi rese que ñee ee ra. —Taĩ, aque quia nderiirina cote, i usi je. Juan nii eriqui ñee. Jesuubi tuchi quia ñi Juan nde. ²⁷ —Aque ndesirã cote, i que Juan je cote ra. Juan ngue Jesús si querao bei uchuchua cote ra.

Jesús mano cote

²⁸ —Achimbirãcuã tuchi que mbae ja je Dios cheẽ nguire ra, i que Jesús uchiangui re cote ra. —Seisei, i cote. ²⁹ Vinagre mo ngue chi mbae mo ye huee ra. Mbia que esponja monde vinagre ye ra. Mondo que Jesús chúruu ra. ³⁰ Jesús que vinagre mocõ esponja resenda cote ra. —Dios cheẽ ngue asaã ja cote ra, i que Jesús ra. Uãqui ngue embucheseco cote ra. Mano ngue cote ra.

Soldado Jesús cúa chiõ tiquise je

³¹ Judíos que ñee nyue ra. —Ae embucha ji chi ira rese nae, sã ùqui chiã ira rese pascua mose huee, i que mbia ra. Pascua nonde que embucha ira rese ra. Mbia icoquiato mose pascua nonde. Mbia chumunuasa tuchi quiare pascua. Sábado mose rei pascua. Nyebe mbia ñee nguiã Pilato je. —Sã soldados ira resenda timasiquio ja jẽ. Eĩ nda mano jei. Eĩ nda soldados ecuruchi sábado nonde, i que judíos Pilato je ra. ³² Soldados que nyoĩ ira resenda tima ndiquio ra. Ae chi Jesús rereco chobei. ³³ Ngasẽ mose Jesús je, eraquette que ee ra. Nyebe etima ndiquio eã nguiã. ³⁴ Soldado mo ngue Jesús

cúa chiõ tiquise je ra. Eruqui que uchẽ nda. Eri abe que uchẽ nda. ³⁵ Nyebe aico nguiã ã mbesa mbesa a. Amae jee ngue erese re. Acheẽ ñooñoã se quia a. Eĩ nda jẽ abe “ae bei jẽ” jenye Jesús ríi. ³⁶ Embesa ji cheẽ ngue ique cote ra. Jesús tima ndiquio eã mose. —Etima nda mbia siquio eã, i que embesa ji nyii ra. ³⁷ —Ae embucha uquia ira rese nae, ùqui nda mae si erese, i abe que embesa ji huĩ nyii no nda.

Jesús ruruchoi eraaque atisa

³⁸ José de Arimatea, i que emo je ra. Jesús rimba checuayã ngue ae ra. —Sã judíos jiranuã serese, i que equia uchĩangui re ra. Ae que “Jesús rete embu seje” i Pilato je ra. Pilato que “eno” i ee ra. José que Jesús rete curuchi ira si cote ra. Ae equerao nguiã. ³⁹ Nicodemo abe que tu erea ra. Ae tu ñee Jesús je isa nyii nae, aque. Aque que tu aba mbushimbusa tubiriã tuchi reru ra. Eraaque mbaerã ndei aba mbushimbusa. Ira shĩmbu turã mbucú ji. Mbae a mbucú ji abe no. ⁴⁰ Ûqui ja que Jesús rete querao cote ra. José. Nicodemo ndese. Aba mbushimbusa resebe que eraaque uma uma tiru je ra. Eĩ mbei que judíos quia mbia raaque je ra. Eati nonde. ⁴¹ Jesús iquiasa rurubi que sita imi mo ñi nda. Eao ramo ji. Mbia raaque mondosa eã nyii. ⁴² Huee que Jesús raaque nduruchoi nyati ra. —Cochite quia sábadu ru nguiã nande je co, i que eati aichi chõ nda.

20

Jesús quera si

¹ Domingo mose que María Magdalena nyoĩ mae Jesús tãsa rese ra. Nyaasi nonde. Jesús atiquia nduruba ji que chi sita ra. ² Nyebe echoi nguiã uchã ñee Simón Pedro mbiirandu. Jesús chĩmbaaquiatu nongue abe mbiirandu. Ae Jesús quiato tuchi nae, aque. —Aba chõ nandererecua raaque sirõ suruchoi. Mangu e no mangu reae, i que María Magdalena nda. ³ Nyebe Pedro si nguiã ea tiquia rea. Uquiato rese. ⁴ Nyoĩ ja que uchã nda. Enongue rane ngue Pedro chucua oso ngasẽ nda. ⁵ Nyibi que mae Jesús atiquia rese ra. I que Jesús umanda achõ u tiru ra. Ique tuchiã ngue oso sita imi ni nda. ⁶ Aquere que Simón Pedro ngasẽ cote ra. Ae quiatu que ique oso sita imi ni nda. Ae abe que mae Jesús umanda achõ ndese cote ra. ⁷ Eãqui umanda rese abe que mae nda. Tiru ataque rese ja eã ngue eãqui umanda chi ra. Eacua ji que chi icúe ra. ⁸ Ae rane ngasẽ nguia nyii nae, aque abe que ique tuchi oso sita imi ni cote ra. Mae tuchi que Jesús oreã ndese cote ra. —Jesús quera chõ nguia re, i que eicua cote ra. ⁹ Ûqui ngue embesa ji icuayãte ra. “Jesús ra quera si”, i que eicuayãte ra. ¹⁰ Nyebi si que echoi uchuchúaa ra.

Jesús nyecua María Magdalena je

¹¹ María que chiño nyeseo eatiquia jii ra. Echeseo que nyibi mae Jesús rua rese ra. ¹² Angeles mo ngue chi huee nyeremo ee ra. Eiraoshĩ ja que chi ee ra. Enongue que chĩ ngoi Jesús ãqui ndúa quti ra. Enongue ecuii rúa quti no. ¹³ Angeles que ñee María je ra. —¿Mbaerã ereico nyeseo re? i que María je ra. —Aba chõ sererecua raaque querao. Nyebe aico nguiã nyeseo. Mangu chõ ereriqui ererecua mangu, i que María ra. ¹⁴ Ucheẽ nduibe que mae ndei uquite quti ra. I que Jesús uã ee ra. Icuã eãte que ra. ¹⁵ —¿Mbaerã ereico nyeseo re? ¿Aba eresequia quia re? i que Jesús María je ra. Ira a raarõsa Jesús riqui reĩ nguiã María je. Nyebe María ñee nguiã ee. —¿Nde Jesús raaque

ererao re? ¿Mangue erechono mangue re? Taso erea ae. Tarao ae, i que María ra. ¹⁶ Jesús que “María” i María cheë mose ra. María que uba tuchi Jesús icua cote ra. Judíos cheë ño ngue María ñee Jesús je ra. —Raboni, i que ra. —Sembaaquiatusa, i ñee Jesús icua re. ¹⁷ Jesús que ñee María je ra. ¡Seisi jeichĩ nda re! ¡Aso áte Paba rea resë! Eso rã ñee senongue je. “Jesús que ñee jêje ra. ‘Aso ra ibate Paba rea. Dios rea. Ae abe chõ jendu re. Huee ra aso’, i que Jesús ñee jêje ra”, ere rã senongue je, i que Jesús ñee María je ra.

Jesús nyecua uchĩmbaaquiatu je

¹⁸ María Magdalena que oso Jesús chĩmbaaquiatu mbiirandu ra. — Amaechĩ Jesús rese, i que ee ra. Jesús cheë ngue esenei ja ee ra. ¹⁹ Aque mose que domingo ra. Aque isa que Jesús chĩmbaaquiatu chĩ ñumunua nda. Etaronda matã ji que chĩ nda. Siquichete quia judíos si re. Jesús que oso ique uchĩmbaaquiatu mbuate ra. Eite re que esi ñee ee ra. —¡Jêya eãte jirichĩ nda jê! i que Jesús ñee ee ra. ²⁰ Aquere que Jesús o iõsa reacuquia ee ra. Ucuã iõsa abe no. Echĩmbaaquiatu ía tuchi que mae Jesús rese ra. ²¹ Jesús que ñee si ee ra. —¡Jêya eãte jirichĩ nda jê! Sã ñi Paba sembu no, eĩ tae si jemondo secheë nenei nenei sacua mbia je, i que Jesús uchĩmbaaquiatu je ra. ²² Jesús que uchĩmbaaquiatu ichu ñee nda. —Espíritu Turã ndu jêje a cote, i que eichu ra. ²³ —“Dios chõ jêicuã mbutiã nguiã jêsi co”, jenyemo emojê, Dios ra ùquĩ icuã mbutiã esi cote. “Dios chõ jêicuã mbutiã eã nguiã jêsi co”, jenyemo emojê, Dios ra ùquĩ icuã mbutiã eã esi, i que Jesús ra.

Tomás mae Jesús quera si rese

²⁴ Tomás oreãte que Jesús nyecua mose uchĩmbaaquiatu je ra. Jesús chĩmbaaquiatu raque Tomás. Eata, i que Tomás je ra. ²⁵ —Jesús rese que uremae nda, i que eataque embiirandu ra. Tomás que ñee nda. —Jesús eã ndei e. Se mae eã mose eo iõsa rese, se ocoã mose eo iõsa rese, se ocoã mose ecua iõsa rese, “nyia” aeã nda se, i que Tomás ñee nda. ²⁶ Jesús chĩmbaaquiatu que ñumunua si domingo nongue mose ra. Tomás abe que siqui uataque rese huee cote ra. Etaronda matã ji que chĩ nda. Jesús que ique oso ra. Eite re que esi ñee ee ra. —¡Jêya eãte jirichĩ nda jê! i que ee ra. ²⁷ Ñee ngue Tomás je cote ra. —¡Sã seo jê! Seo iõsa rese eoco. Secua iõsa rese abe eoco ae. “Jesús quera si eãte” jere sichĩ nda jê! “Jesús que quera si ra”, ere chõ cote, i que Jesús ñee Tomás je ra. ²⁸ —Sererecua. Nde rei sembae Dios, i que Tomás Jesús icua cote ra. ²⁹ Jesús que ñee Tomás je ra. —Nde mae mose serese, aque mose chõ seicuachĩ. Mae eã mose serese chõ ngue emojê ndiqui seicua ra. ùquĩ nguiarei eya tuchi ndesi, i que Jesús ee ra.

Je Jesús icua sacua ño co ambesa nguiã jêje

³⁰ Jesús que mbia mae sayã saã saã tuchi uchĩmbaaquiatu je ra. ùquĩ ambesa ja eã nguia a. ³¹ Ñ nguia ambesa ja quia a. Jê Jesús icua sacua. —Jesús rei Cristo. Jesús rei Dios rucucha, jenyemo nda chã. ùquĩ icua mose ra jêingo bei.

21

Jesús nyecua siete uchĩmbaaquiatu je

¹ Aquere que Jesús nyecua si uchĩmbaaquiatu je ra. Ama nimia ndese que eñi nda. Tiberias, i que aque ama ndisa je ra. Eĩ ngue Jesús uã nyecua ee ra. ² Echĩmbaaquiatu que chĩ nyiese ra. Simón Pedro. Tomás ndese. Ae je

eriqui “Eata” i. Natanael ndese. Caná de Galilea jenda rei Natanael. Zebedeo riiri abe que chi ra. Echimbaaquiato nongue abe que chi nyeremo no nda. ³—Taso rá sira rea, i que Simón Pedro ra. —Ure abe ra ureso nderese, i que eataque ee ra. Nyoi ja rei que sira rea ra. Nyui ja que echoi canoa ye ra. Sira que embua mbua eáte aque isa ra.

⁴Jesús que chí erimia ndese echimbaaquiato je ra. Jesús eá eriqui reñ nguiã ee. ⁵—¿Sira mo jembua re, Áquẽ? i que Jesús ñee mombo ee ra. —Tei, i que echimbaaquiato ee ra. Jesús icua rocoĩ. ⁶—Sira mbua mbuasa jenduba canoa quiato cuti. Sira ra jembua cote, i que Jesús ee ra. Jesús cheẽ ngue emumbayã nda. Sira que ua jate embua mbuasa ye cote ra. —Nandenosẽ ama si. Nandechuchã canoa ye, i rei que ra. Eusite que ee ra. ⁷Ae Jesús quiatote, aque que ñee nda. —Jesús chõ eriqui re, i que uataque je ra. Pedro eandu mose que huĩrao mingue asi oso ii ra. Jesús rea. Sira mbua mbua nonde quia huĩrao mbui nguiã nyii. ⁸Isho tuchiã ngue ama nimia nda. Cien metros chõ ngue ra. Pedro ataque que canoa querao ama nimia ndichã nda. Sira mbua mbuasa que ecuruchoi quia mbutiriri sira resebe ra.

⁹Nguichi que canoa si ibi rĩ cote ra. I que tata u ee ra. Sira miĩ ngue chi tata rĩ ee ra. Mbichae abe que chí ra. ¹⁰—Sira mo jendu rá. Ae jembua ramo, i que Jesús uchimbaaquiato je ra. ¹¹Simón Pedro que nyui oso canoa ye ra. Sira mbua mbuasa que embutiriri serao sonosẽ ama nimia ndese cote ra. Embisẽ sira resebe. Sira mbua mbuasa que soroáte enonosẽ mose ra. Sira cuasu achõte raque. Sira 153 raque. ¹²—Jenyu quiaru cote, i que Jesús ee ra. —¿Aba nde re? i áte que emo ñee ireĩ nguiã ee ra. Mbia que Jesús icua jate ra. ¹³Jesús que oso tátaa cote ra. Mbichae que esirõ nda. Mbuchao chao que uchimbaaquiato je ra. Sira abe que embuchao chao ee ra. ¹⁴Jesús que mano nyii ra. Quera si que ra. Nyecua nyecua que uchimbaaquiato je cote ra. Co rei tercera vez co.

Jesús ñee Pedro je

¹⁵Quiaru jare que Jesús ñee Simón Pedro je ra. Jonas ndiiri ndei Simón Pedro. —Simón, ¿erechesequa tuchi quia serese ã si re? i que Jesús Pedro je ra. —Ae. Achesequa tuchite sequia nderese co resẽ. Seicuate se resẽ, i que Pedro ñee ee ra. —Oveja raarõsa rá eico no. Seicuaa embaaquiato quiato quia secheẽ je no, i que Jesús Pedro je ra. ¹⁶—Simón, ¿erechesequate quia serese re? i si que Jesús ñee Pedro je ra. Pedro que ñee ee ra. —Ae. Achesequa tuchite sequia nderese co resẽ. Seicuate se resẽ, i si que Pedro ñee ee ra. —Oveja raarõsa rá eico no. Seicuaa esaarõ turã nguia no, i que Jesús Pedro je ra. ¹⁷—Simón, ¿erechesequate quia serese re? i si que Jesús ñee Pedro je ra. Co que tercera vez cote ra. Jesús ñee tres veces mose que Pedro ía eã tuchi ra. Pedro que ñee ee cote ra. —Mbae ereicua jate quia cõ, Sererecua. Achesequa tuchite sequia nderese co resẽ, i que Pedro ñee Jesús je ra. —Oveja raarõsa rá eico no. Seicuaa esaarõ turã nguia no. ¹⁸Tacheẽ nyecua ndeje, Pedro. Ndeyasu mose que ereico ndeirao mingue oso ngata chooño ndesose quiti ra. Nde amei mose ra ndechiba ereira cote. Mbia ra ndecua cote. Ndeso sere ãsa quiti ra mbia nderuruchoi cote, i que Jesús Pedro je cote ra. ¹⁹—Eĩ nda mbia Pedro iquia, i chõ Jesús re. —Eĩ nda Pedro Dios quirãcuã ndeacua quia mbia je, i chõ Jesús re. —Eico serui, i que Jesús Pedro je cote ra.

Ae uchimbaaquiato rese Jesús nyesequa tuchi

²⁰Pedro que uba mae serese cote ra. Se rei Juan. Jesús nyesequa tuchi rei se. Se chõ ngue acoi huĩ quiaru Jesús jii aque isa resẽ. Se chõ ngue “¿Aba ra

nemee mbia icuã je re?” ae Jesús je resẽ. ²¹ Pedro que mae serese cote ra. Ñee ngue Jesús je cote ra. —¿Mañi ite ra mbia quia Juan je re? i que Pedro Jesús je ra. ²² Jesús que ñee ee ra. —¿Mbaete ere? Serui chõ eicochõ nde. “Sechube mose chee ra Juan manoã”, se i mose, manoã ndae. Eico chõ serui nde, i que Jesús Pedro je ra. ²³ —Juan nda manoã mbeichĩ nde, i que Jesús icuasa Juan ñi cote ra. Jesús cheẽ abi chõchĩ. —Juan nda manoã, ire rocoĩ Jesús nyii. —Se cheẽ mose ra manoã, i chõ ndei ngue Jesús re. —Juan nda manoã, i ãte que Jesús ra.

Juan ñimbesa hui bei

²⁴ Jesús chimbaaquiatu chõ se re. Se chõ ã ambesa ja nguiã. Amae jate que se quia Jesús chisaã ndese ra. Acheẽ ñooño eãte se quia ã mbesa mbesa co. ²⁵ Jesús chisaã saã tubiriãte quia ñene. Ambesa ja aroneãte quia a. Jesús chisaã saã mbesa ja mose, eĩ ndei ra papel mbesa ji mbia recua mbiitayã jate. Amén.

LOS HECHOS DE LOS APOSTOLES

Espíritu Turã nda tu, ¡Jesús

¹⁻² Ambesa que ndeje nyii, Teófilo. Arembiirandu ja que Jesús chiaio rese. Eresco mose íbii. Jesús que mbia mbaaquiatsu quiatsu eresco mose íbii ra. Dios que equerao bei jiri ibate cote ra. Ũquí ngue asenei senei ndeje nyii ra. Oso nonde ibate que ucheẽ nenei nenei sacua irabo ra. Uchiirabo que embaaquiatsu quiatsu ra. Siqui que Espíritu Turã ndese mbia mbaaquiatsu quiatsu ra. Eaquiatsu que esecha oso ibate cote ra. ³ Manonde que eru si nyecua ũquí je ra. Oso nonde ibate. Ngucco que etecuquia cuquia si ee ra. Cuarenta días que eriqui nyecua nyecua bei uchi mbaaquiatsu je ra. Dios rese que eriqui embiirandu randu ra. Dios rei erereca tuchi. Ae riĩ eriqui embiirandu randu. ⁴ Jesús oso nonde ibate que eriqui ñee ñee uchimbaaquiatsu je ra. —¡Jēsochĩ nda sucha tubiriã si jê! ¡Jēsochĩ nda Jerusalén si jê! ¡Paba cheẽ nguire jengu Espíritu Turã ndaarõ aa jê! “Espíritu Turã tamondo jêje”, i que Paba jêje ra. Aque riĩ ngue acheẽ jêje nyii resẽ, i que Jesús ee ra. ⁵—I je que Juan bautizar i mbia je ra. Namõ jiri ra Espíritu Turã ndu. Ae ra i que jeñiangui re. Eĩ nda Espíritu Turã bautizar i jêje. I je eã cote. Espíritu Turã nda i que chõ jeñiangui re cote, i que Jesús uchimbaaquiatsu je ra.

Jesús oso ibate

⁶ Emo mose que Jesús chimbaaquiatsu ñee ee ra. Jesús oso nonde ibate. —¿Manose ra urerereca ishonda erembutiã ure si re? Israel jenda rei ure. ¿Namõ nda ure mo eremũ urererecarã nde? i que mbia Jesús je ra. ⁷ Jesús que ñee ee ra. —Manose chõ ndae. Paba miĩ eicua. Mbia eicuayã. Jê nguia jêicuayãte nguia no. Manosete chõ ndae. ⁸ ¡Co rese chõ jendua jê! Espíritu Turã nda tu jêje cote. Ae ra jembuquirãcuã. Ae ra jembucheẽ ñee seriĩ. Jê nda jêingo serenei nenei tuchi cote. Serenei nenei Jerusalén jenda je. Judea jenda je abe no. Samaria jenda je abe no. Mbia mangue choõõa jenda ja je abe no. Ũquí ja je jêingo serenei nenei, i que Jesús ra. ⁹ Ñeende que Jesús si ibate cote ra. Uchimbaaquiatsu resa rae que esi erecha ra. Ibeishĩ ngue embuchecuayã cote ra. ¹⁰ Echimbaaquiatsu que soboiba bei u mae ibei rese ra. Ibei rese mae mose que mbia nyeremo ngaẽ ereca ra. Ibate si. Huee que echi ra. Eiraoshĩ tuchi que ngaẽ ejii ra. ¹¹ Ibatenda que ñee ee ra. —Galilea jenda, ¿mbarã jengu beite mae ibei rese a re? Jesús oso quia ibate nae, ae si ra tube no. Jemaẽ ngue u eso rese nae, eĩ si ra u íbii no, i que ibatenda ee ra.

Dios que Matías irabo ra

¹² Jesús chimbaaquiatsu que nyoĩ nyebi hue recha ra. Monte de los Olivos recha. Nyoĩ que sucha tubiriã Jerusalén cote ra. Aichi jiri. Monte de los Olivos rei Jerusalén ndurubi. ¹³ Ngasẽ ngue Jerusalén nda. Nyoĩ que uchuchúaa cote ra. Á ja que ra. Pedro. Juan. Jacobo. Andrés. Felipe. Tomás. Bartolomé. Mateo. Alfeo riirĩ. Jacobo, i ee. Simón el Cananista. Judas. Jacobo riirĩ ndei Judas. ¹⁴ Ũquí ja que ñumunua mbei bei quia ñee ñee Dios je ra. Ari abe no. Acuani abe no. María abe no. Jesús si rei María. Jesús nongue abe no. Ũquí ja que ñumunua mbei bei quia ñee ñee Dios je ra.

¹⁵ Emo jiri mose que Jesús icuasa ñumunua ja ra. Ciento veinte que ra. Pedro que uã ñee ee ra. ¹⁶—Seandu rã se, Seresenda. ¡Sã embesa ji ñee ñoño eã ño jê! Cose que Espíritu Turã ñee Judas rĩ nda. David que embesa Espíritu Turã ñee nguire ra. Judas rĩ. Judas rei Jesús reacuquiasa mbia icuã je. Jesús rerao nonde iquia. ¹⁷ Jesús que Judas irabo rei nyii ra. Nanderesendacuã. Nyebe rei Judas nanderesenda nyii. ¹⁸ Judas que mbae isiquia isi icuã nda. Mbae isiquia je que ibi mo isi ra. Hue ereco mose que mano nda. Ibate si eru ngoi mano. Uãquĩ nguiti que eru ngoi ra. Erie que oo ra. Echique mburiri. ¹⁹ Jerusalén jenda que jirandu ja erese ra. Acéldama, i que hue ibi je cote ra. Mbia ruqui rua, i chõ nguiã hue je. Ecoisa ibi je. ²⁰ I ñi embesa ji Salmos nde: Sã echuchua oreã mbei.

Sã mbia mo ndiquiã mbei equi re.

Sã eriquicharomba riqui Dios cheẽ nenei nenei cote,

i que embesa ji Judas rĩ nda. ²¹ Emo nandeirabo Judas riquicharõ. Mbia chi bei quia nanderese nae. Jesús nandembaaquiату quiату bei mose. ²² Juan mbia mbiirandu randu mosenda bei. Dios Jesús querao chee quia ibate. Ae siqui beite quia nanderese nae, ùquĩ mo nandeirabo nanderesendacuã. Jesús quera rese mbia mbiirandu randu sacuã, Judas riquicharõ, i que Pedro ñee ee ra. ²³ Mbia nyeremo ngue etea cote ra. José Justo, i emo je. Barsabás, i abe ee no. Matías, i enongue je. ²⁴ Jesús chimbaaquiату que ñee Dios je cote ra. —Urererecua, aba chiã ereicuate quia co. Æ nyeremo ndiqui ã. ¿Aba ndechiirabo re? ¿Aba ereirabo urembirõ sacuã nde? ²⁵ ¿Aba eretea ndechimbaaquiатubirã nde? ¿Aba eretea Judas riquicharõ nde? Ae hui quia ndecheẽ si. Ae oso quiachã ndesi cote. ¿Aba eretea eriquicharõ nde? i que Dios je ra. ²⁶ Sita que embaba mbaba o ye cote ra. —¿Aba Dios chiirabo re? i ñene. Eĩ ngue Matías irabo ra. Dios que Matías mingo Jesús chimbaaquiату rese cote ra. Mbia once mbirõ. Docerã. Doce que Jesús chimbaaquiату cote ra.

2

Espíritu Turã tu Jesús icuasa je

¹ Fiesta de Pentecostés mose que Jesús icuasa chi ja ñumunua nda. Hue mii ngue echi ja ñumunua nda. ² Ibei rieu que embuate ra. Ama ndieu raanguia. Tuchua mbieu tuchi Jesús icuasa je. ³ Tata rendi raanguia que tu nguichi eãquĩ ndes e ra. Jesús icuasa aqũĩ ja rese. ⁴ Espíritu Turã ngue ique tuchi hue jenda chianguĩ re ra. Ique ja que Jesús icuasa chianguĩ re ra. Mbia que echeẽ ata mo saã saã cote ra. Echeẽ uchianuã ngue esaã saã nda. Espíritu Turã nguia rei embucheẽ echeemo. Mbia cheẽ mbuae jaaja que cote ra.

⁵ Aque mose que judíos tubiriã nyi Jerusalén nda. Ishonda tubiriã nyi huee. Mangue chooñoa jenda ja chõ chi nguiã huee. Ûquĩ ndei Dios cheẽ mumbasa reã judíos ataque rã si. ⁶ Ibei rieu andu mose que ùquĩ ngaẽ uchã nda. Nyuruira tuchi eandu. Jesús resenda mbia cheẽ mbuae saã saã ja chõchĩ nguiã u. Espíritu Turã ño ngue embucheẽ nguiã. Mbiamo ñee icuasa reã ndaque. Mbia que ucheẽ ñandu ñandu ja u ra. Jesús icuasa ñee mose. Nyebe que mbia chi nguiã nyuruira eandu. ⁷ Mbia nyuruira ja eandu. —¿Mañi equia mbiamo ñee icua ja re? Galilea jenda achõ ño ndaque ã, i tuchi que mbia u nyuruira eandu ra. ⁸⁻¹¹ —¿Mañi equia nande ja cheẽ naa naa ã nde? Nandecheẽ Jesús icuasa saã jaaja chõchĩ nguiã ã. Partia jenda cheẽ esaã saã ñochĩ nguiã ã. Media jenda cheẽ abe no. Elam jenda cheẽ abe no.

Mesopotami a jenda cheẽ abe no. Judea jenda cheẽ abe no. Capadocia jenda cheẽ abe no. Ponto jenda cheẽ abe no. Asia jenda cheẽ abe no. Frigia jenda cheẽ abe no. Panfilia jenda cheẽ abe no. Egipto jenda cheẽ abe no. Libia jenda cheẽ abe no. (Cirene ndobei.) Roma jenda cheẽ abe no. (Roma jenda mo ndei judios. Roma jenda ataque rei judios eã.) Creta jenda cheẽ abe no. Arabia jenda cheẽ abe no. Jesús icuasa ùquĩ ñee saã saã ja chõchĩ nguiã ã. Nandechẽ esaã saã ja chõchĩ nguiã ã. Jesús icuasa riquichĩ nandechẽ naa naa tuchi Dios chiaõ turã nenei nenei ã, i ja que mbia ucheẽ andu jaaja mose. ¹² I jate que mbia u nyuruirã eandu ra. Ndua ndua tuchi que u eandu ra. — Mañi equia ñee ã nde, i nyue. Jesús icuasa mbia cheẽ mbuae naa naa mose. ¹³ Emo emo ngue ñee icuã icuã Jesús icuasa je ra. — Quiacua chõ eriqui nguiã ã, i raque Jesús icuasa rĩ.

Pedro ñee mbia je

¹⁴ Pedro que uã ñee mbia je cote ra. Nguesenda once rese que echi uã ñee mbia je ra. Tasẽ jiri ñee ee. — Seandu ja u jẽ! Tacheẽ jẽje, Jerusalén jenda. Judea jenda abe no. ¹⁵ ¿Quiacua reĩ Jesús icuasa riqui jẽje re? Quiacua eã ño ñene. Tenda que nyui ramote resẽ. Mbia quiacuasa eã ño huee tenda resẽ. ¹⁶ Æ nĩ ngue Joel embesa mbesa cose ra. Dios cheẽ mbuchecuada que embesa ã nĩ nda. Eĩ ngue embesa ra:

¹⁷ “Mbae ua jiri mos e ra Espiritu Turã amondo mbia ja je”, i que Dios ra. “Jendiirĩ nda secheẽ mbuchecua mbia je.

Acuanindu ra serea rea tuchi cuu.

Amei abe ra serea rea cuu no.

¹⁸ Aque mose ra Espiritu Turã amondo serimba ja je.

Serimba ra secheẽ mbuchecua checua mbia je.

¹⁹ Mbua mae sayã nda asaã saã ibi rĩ no.

Eruqui rese ra mbia mae no.

Tata rese ra mbia mae no.

Tatashĩ ndese ra mbia mae no.

²⁰ Mbua rerecua tu nonde ra tenda ñimoo.

Eruqui rã nda nyasi mbia rerecua tu nonde”, i que Dios ra.

²¹ “Ndeya eã ño serese, Sererecua”, i mose emo ñee Dios je, aque ra Dios sirõ eicuã si,

i que Joel embesa ra. ²² Israel jenda, jseandu rã! Nazaret jenda rĩ aico ñee ñee jẽje a. Jesús rĩ. Dios que Jesús mbuquirãcuã tuchi ra. Nyebe que Jesús mbia mae sayã saã saã nda. Ûquĩ ndese que jemae nda. ²³ “Mbua icuã nda seriirĩ iquia”, i que Dios Jesús mano nonde ra. Jẽ nguia Jesús jẽiquia tuchi nguiã cote. Jẽ nguia jemee nguiã mbia icuã je. Eiquia nonde. Dios rane ngue jirandu Jesús rese ra. “Mbua icuã nda Jesús iquia”, i que Dios quia nyii ra.

²⁴ Dios que Jesús mbuquera si ra. Jesús mano mbei aroneãte. ²⁵ David que Jesús cheẽ senei cose ra. Æ ngue ñee nda:

Sererecua riqui sembui eã mbei co.

Eriqui bei serese co.

Mbae riqui sembusiquiche aroneãte co.

²⁶ Nyebe seya tuchite riqui co.

Nyebe aico ñee turãte Dios rĩ co.

Semano mose abe ra Dios hui eã mbei sesi.

²⁷ Seaingue ra eresehayã semano mose, Sererecua.

Serete abe ra erembuquera si mingo.

Ndechesequate aico co.

²⁸ Semingosa tuchi rei nde. Sereco mose nderese ra seya tuchi, i que David Jesús cheë nenei cose ra.

²⁹ Tacheë nyecua jêje, Seresenda. Nanderu David que mano cose resë. Mbia que echati resë. Eatisa nandeicua ja quia co resë. ³⁰ David rei Dios cheë mbuchecuaa. Dios que ñee ee ra. “Nderiiri mo nda Cristo. Ae ra mbia rerecuarã tuchi. Nderiquicharõ nda mbia rerecuabi tuchi”, i que Dios David je cose ra. “Dios ñee ñooñoa tuchi chõ nguiã”, i que David ra. ³¹ David que Dios cheë icuate quia ra. Nyebe que ñee Jesús riñ nda. “Seaingue ra eresechayã semana mose. Serete ra erembuquera si mingo”, nyebe David i nguiã Jesús riñ. ³² Dios que Jesús mbuquera si ra. Ũqui ureicua ja quia ã. Nyebe ureico nguiã jembirandu randu ũqui ndese ã. ³³ Dios que Jesús querao ibate nyiese ra. Dios jii eriqui pee cote. Dios que Espíritu Turã mee Jesús je cote ra. Ucheë nguire que emee ee ra. Jesús riqui Espíritu Turã mondo ure je co. ã Espíritu Turã nyisaã jeñandu ñandu quia ã. Espíritu Turã ndiqui ã mbucheë mbia mo ñee ã. ³⁴⁻³⁵ David osoã ibate aque mose. Jesús riñ ngue David embesa ra. ã ngue embesa ra:

Dios que ñee sererecua je ra. “Ecoi sejii. Nde abe ra ererecua serese.

Ae ndeucuyãte quia nae, ũqui je ra ndequirãcuã atecuquia tuchi.

Ndequirãcuã tuchi ra ũqui si”, i que Dios sererecua je ra,

i que David embesa mbesa ra. ³⁶ Jesús jembucha quia ira rese nae, ae si Dios mingo mbia rerecuarã co. Ae nandesaarõ arõ nguiã, ae si rei Jesús. Jesús rese tẽirandu ja, Israel jenda, i que Pedro ñee ocote ra.

³⁷ Mbia ia eã tuchite que Pedro cheë andu ra. Ñee ngue Pedro je ra. Pedro resenda je abe. —¿Mañi ure ra equia re? i que Pedro je ra. Jesús chimbaaquiatu ja je. ³⁸ Pedro que echeë sibishorõ nda. —jêicuã si jêhui rã jê! Sã bautizar ure jêje Jesucristo riñ. Dios jêicuã mbutiã sacua. Aqere ra Dios Espíritu Turã mondo jêje. ³⁹ “Espíritu Turã nda amondo jêje. Jendiiri je abe ra amondo. Ishonda je abe ra amondo. Sechiirabo ja je ra Espíritu Turã amondo”, i que Dios ñee nande je ra, i que Pedro Dios cheë nenei nda.

⁴⁰ Eñ ngue Pedro ñee ocote mbia je ra. Ñee turã ngue ee ra. —Mbia icuã achõte eriqui ibi jenda ã. Quiachã ja equia Dios si ã. Ũqui si jêhui chõ. Jê abe jêquiachã sacua Dios si, i que Pedro mbia mbaaquiatu ra. ⁴¹ —jAe beite jê! i que mbia tubiriã Pedro cheë andu ra. Ũqui j e que bautizar i ra. Aque mose que mbia tres mil Jesús isi ra. ⁴² Ũqui abe que ñumunua nua nguia Jesús quiato ataque rese ra. Jesús chimbaaquiatu ñee ñee mose mbia je. Ñumunua nua ñee Dios je. Eturã mbei que eriqui nyue ra. Mbichae que eu eu quia ndua ndua Jesús rese ra.

Jesús icuasa siqui turã nyue

⁴³ Mbia que siquiche ja Dios si ra. Jesús chimbaaquiatu que Dios mbuquirãcuã nda. Nyebe mbia mae sayã naa naa tuchi nguiã. ⁴⁴ Jesús icuasa que ñumunua nua mbei quia ra. Abei tuchi que eriqui nyue ra. ⁴⁵ Umbae je que eriqui vender i tuchi ra. Mbae isiquia que emee mee nguia mbaecha reã je cote ra. ⁴⁶ Ñumunua nua mbei que equia Dios chuchúaa ra. Quiaru quiaru que equia nyiese uchuchúaa ra. Jesús riñ ngue eriqui ñee turã turã nyue ra. Eya tuchi que eriqui Dios rese ra. ⁴⁷ Dios riñ ngue eriqui ñee turã turã nda. Mbia ataque que ñee turã turã nguia Jesús icuasa riñ nda. Jesús icuasa que Dios mbeta mbeta bei quia ra.

3

Ecuatayã mbucherõ

¹ Emo mose que Pedro nyoï quia Dios chuchúaa ra. Juan ndese. Tenda nyesece mose. Hue tenda bei que mbia riqui ñee ñee Dios je ra. ² Huee que ameï mo ngatayã ndiqui bei huee ra. Echaacuquia mosenda bei eiquieï icuã. Mbia que ecuruchoï choï bei quia huee ra. Dios chuchúaa. Eiquesa turã, i que hue eiquesa je ra. Huee que eriqui ecuatayã mï mï mbei eiquesa jii ra. Ache ache i sacua mbia ique mose Dios chuchúaa. ³ Dios chuchúaa nda Pedro ique nguiã Juan ndese chã. Ecuatayã ngue mae erese ache ache i ee ra. ⁴ Pedro que nguesa mbui reã mae erese ra. Juan abe. —¡Ure rese emae jê! i ecuatayã je. ⁵ Eandu mose que mae erese ra. —Mbae mo nda emee seje reae, i mae nguiatu erese. ⁶ Pedro que ñee ee ra. —Mbae isiquia eã ndaque sembae. Mbae mo nda asaã ndeje. Jesucristo quirãcuã nembucherõ na mbucuaata. Ehuã na ngata. Nazaret jenda quirãcuã nembucherõ na, i que Pedro ee ra. ⁷ Pedro que eo isi ra. Mua ngue eo rese ra. Aque mosebe que ei nyerõ nda. Eiquieï abe nyerõ eo isi ruibe. ⁸ Ecuatayã ngue juã asi cote ra. Ngata cuata que ra. Ique Dios chuchúaa ùquï ndese. Eya tuchi que ra. Oo oo tuchi que ra. ãanye, i tuchi que equia Dios je ra. ⁹ Mbia que mae ja u ecuatayã ngata rese ra. Ñee turã mose Dios je que mbia nyiisaquia u echeẽ ndese ra. ¹⁰ Mbia que nyuruira u mae erese ra. Mbia que eicua ja ra. —Ecuatayã ño aque re. Ache ache i beite que equia Dios chuchúaa, ae chõ co re, i que mbia nyuruira tuchi mae erese ra.

Pedro ñee oco judíos je

¹¹ Embucherõ ji que Pedro chiba isi isi quia ra. Juan chiba abe no. Mbia que ngaẽ ucha mae erese ra. Nyuruira erea. Portal de Salomón, i eiquesa je. Huee que echi ra. ¹² Pedro que mae mbia chumunua ndese ra. Ñee ngue ee ra. —¿Mbaerã jëingo nyuruirate mae erese re, Israel jenda? ¿Mbaerã jëingo nyuruira mae urerese re? Ure ae eã ño Ecuatayã urembucherõ nguiã. Urequirãcuã eã Ecuatayã mbucuaata nguiã. Dios quiarei uquiracuã mee ee embucherõ. Urecuata turã embucherõ eã nguiã. ¹³ Dios rei nanderu rerecua bei. Abraham. Isaac. Jacob. Ùquï nderecua bei Dios. Dios ñee turã mbei nguirĩ nï. Jesús rï. Ae que jemeẽ icuã mbia je eiquia sacua nda. “Jesús tambui”, i mose Pilato, ùquï mose que jëisi quiatu quiatu chõchĩ nguiã. ¹⁴ “Embui”, jenyẽ eã ñochĩ ngue Jesús turã nï nde. “Embui”, jenyẽ chõchĩ ngue mbia iquiasa rï nde. ¹⁵ Eï jenyẽ chõchĩ ngue mbia mingosa iquia nguiã. Dios que embuquera si ra. Equera si rese que urema nda. Æ ureico mbia mbirandu randu equera rese ã. ¹⁶ Æ jengu mae Ecuatayã ndese ã. Jë Ecuatayã jëicuate resẽ. Jendesa rae que Dios embucherõ nda. Ure Jesús ureicuate quia ã. Nyebe Ecuatayã mbuquirãcuã nguiã.

¹⁷ Jëaquiatuã ño Jesús jëiquia nguiã, Seresenda. Jenderecua aquiatuã ño Jesús iquia nguiã no. ¹⁸ Dios quia que ucheẽ mbuchecuaasa mbucheẽ cose ra. Cristo rï embucheẽ. “Mbia icuã icuã nda Cristo je. Cristo mbasi mbasi rae”, i que embuchecuaasa cose ra. Ùquï ñee nguire quia Cristo mbasi mbasi nguiã cote. ¹⁹ ¡jëicuã si jëhui chõ jê! Jemba rã Dios icha cuti. Dios jëicuã mbutiã sacua. Eï jenyẽ mose ra Dios jembiate cote. ²⁰ Dios ra Jesucristo mbuquichi imbu cote. Ae que emï jenderecua rã cos e ra. ²¹ Namõ ño nda Jesús riquichõ ibate. Dios mbae mbitirõ ja mose ra eru cote. Eï ngue Dios cheẽ mbuchecuaasa ñiinda ñee nda. ²² Nyebe Moisés ñee nguiã nanderu cose

ndare je. “Dios ra nanderesenda mo isi. Dios cheẽ mbuchecua sacua. ¡Ae cheẽ nda jemumba jirichĩ jẽ! ²³Echeẽ mumbasa ra Dios mbuquiachã nyesi”, i que Moisés ñee nda. ²⁴Dios cheẽ mbuchecuasa ja que mbia mbiirandu randu mbae rĩ nda. Ae rĩqui nyecua namo ã cote. Samuel nane ngue mbia mbiirandu randu ã ñi nda. Samuel nduinda ja abe que embiirandu randu ã ñi no nda. ²⁵Jẽje chõ Dios cheẽ mbuchecuasa ñee ñee nguiã. “Seturãte ra jendiirĩ ja je”, i que Dios ñee nanderu ñiinda je ra. Jẽje abe Dios ñee. Ucheẽ nda embuchebi eã. Dios que ñee Abraham je cose ra. “Nderiirĩ mo nda mbia mbia ja tuchi quia. Ibi jenda ra embia ja tuchi”, i que Dios Abraham je ra. ²⁶Dios que nguiirĩ mondo íbii cote ra. Jẽ nane je que embu ra. Jembuturã sacua. Jẽhui sacua jẽicua si, i que Pedro judíos je ra.

4

Ererecua paama i ja Pedro je, Juan abe je

¹Sacerdotes que ngaẽ cote ra. Pedro ñee mbei mose mbia je. Juan abe ñee mose ee. Dios chuchua raarõsa abe que tu erese huee ra. Saduceos mo abe que ngaẽ erese huee ra. ²Ūqui paama i ja Pedro je. Juan abe je. Mbiambaaquiātu quiātu mose chõ ngue paama i ra. —Jesús que quera si manonde ra. Eĩ nda mbia abe quera si, i que Pedro ee nyii ra. Nyebe ūqui ndiqui nguiã paama i ee. ³Nyebe eisi suruchoi nguiã policiaa. Eresaitõ ño emingue nguiã tarõ. —Isamami nguia nda nandechandu nguiã, i que ererecua nyue ra. ⁴Mbia tubiriã Dios cheẽ ñandu erenei nenei mose. Eatate que Jesús icua ra. Jesús icuasa rei cinco mil hombres.

⁵Isamami ngue mbia tubiriã ñumunua nda. Judíos rerecua que ngaẽ ñumunua huee ra. Amei abe que ngaẽ ñumunua erese ra. Embesasa abe que ngaẽ ñumunua erese no nda. Ūqui ja que ñumunua Jerusalén nda. ⁶Anás abe que chĩ erese ra. Ae rei sacerdote rerecua. Caifás abe que chĩ erese ra. Juan abe no. Alejandro abe no. Sacerdotes nducucha ja que chĩ ñimbaacua ra. ⁷Pedro que emi mbia ite re ra. Juan ndese. Mbiam ñee ee cote. —¿Aba jembirãcuã nde? ¿Aba jembirãcuã nguia ecuatayã mbucuaata nonde re? i que ee ra. ⁸Espíritu Turã ngue Pedro mbucheẽ cote ra. —Tacheẽ jẽje, mbia rerecua. Tacheẽ jẽ abe je, Amei. ⁹“Ecuatayã ndese urembiirandu rã”, jenyẽ chõ nguiã ure je ã. “¿Aba jembirãcuã ecuatayã mbucherõ nonde re?” jenyẽ chõ nguiã ure je ã. ¹⁰Tacheẽ nyecua jẽje. Sã mbia ureandu ja. Sã Israel jenda ureandu ja. A ecuatayã embucherõ ji rĩqui jendesa rae a. Jesucristo quirãcuã nguiarei embucherõ. Aque si quirãcuã ño ñene. Ae jẽiquia. Ae jembucha ira rese. Ae Dios mbuquera si. Aque quirãcuã ño ñene. Nazaret jenda quirãcuã. ¹¹Huaẽ nandechirirõ na ño Jesús re. Sañi nandeco mae mae ihuae nandechirirõ ndese no. “Aque chõ ndei que eturã nda”, sañi nandeco erirõ i no. Eĩ nyee ra mbia Jesús ndiichã i no. Mbiam ra eisi tuchi nguerecuarã cote. Jesús momboi isi. Eisire rocõ nyii. ¹²Aba mo eã ndei nanderirõsa nandecua si. Jesús ae nanderirõ nguiã nandecua si. Dios aba mo abe mbu eã nguiã mbia rirõ sacua huicua si. Jesús ae ñene, i que Pedro ra.

¹³Mbia rerecua nyuruirã Pedro cheẽ andu. —¿Mbaerã eriqui siquicheãte ñee nde? Papel ndesenda eã ndaque. Mbiam ataque rã ño ndaque, i que ererecua nyue ra. Pedro rĩ. Juan ñi. —Jesús resenda quia eriqui reaẽ. Nyebe eriqui siquicheãte ñee nde, i nyue cote. ¹⁴Hue que embucherõ ji rĩqui huee ra. Nyebe mbia rerecua ñee icua aroneate erĩ. ¹⁵Ererecua ñee ja cote. —Sã Pedro choi usẽ taicuee. Juan abe no. Nandechẽ nandechue nande ae, i que

ererecua nyue ra. ¹⁶—¿Mañi nande ra Pedro je re? ¿Mañi nande ra Juan abe je re no? Pedro chimbucherō ndese mbia riqui jirandu randu jate ā. Jerusalén jenda riqui jirandu randu jate ā no. “Mbucheroā ngue ra”, nande aroneate. ¹⁷ Nandembusiquiche rā no. Ñee ñee siā nda equia Jesús rñi ña. Mbia nda jiranua nguia mámbi chā. Jesús rese chā. “¡Jesús cheē nda jēsenei senei sichi jē!” nande rā ee, i que ererecua nyue ra. ¹⁸—Jenyu, i Pedro je cote. Juan abe je. —¡Mbia ra jembaaquiatchi Jesús rñi jē! ¡Jesús ra jēsenei seneichi mbia mo je jē! i rei que ee ra. ¹⁹ Pedro que echeē sibishorō nda. Juan ndese. —¿Aba cheē nguia ra aba mumbayā nguia re? ¿Jeñee nguiatu ra aba mumbayā nguia re? Dios cheē aba mumba aroneate. ¿i jēje re? ²⁰ ¿Mañi nda aba umaesa reneia nde? ¿Mañi nda aba uchiandu abe reneia ne no? i que Pedro ee ra. Juan abe. ²¹ Ererecua ñee icuā Pedro je. Juan abe je. —Nandembusiquiche nandechesi, i raque. Hui chō ngue esi cote ra. Embasiā mondo cote. Ererecua ireite mbia tubiriā si. Nyebe eiruā nuā eā nguia. Pedro ecuatayā mbucherō mose mbia ñee turā turā ño nguia Dios rñi neaē. Nyebe ererecua ireite riqui nguia esi. ²² Ae Dios mbucherō nae, aque amei. Cuarenta años que ae ra.

Urembusiquicheā, i equiato Dios je

²³ Mbia rerecua hui ja Pedro si. Juan abe si. Nyo i nguesenda mbiirandu ja mbia rerecua cheē ndese. Amei ñee ndese. Sacerdotes cheē ndese. Nguesenda mbiirandu ja. ²⁴ Eresenda eandu mose que ñee ja Dios je ra. Ñee nyecha ee. —Dios, urererecua tuchi nde. Nde rei mbae aosa. Ibei aosa. Ibi aosa. Ama abe aosa no. ²⁵ Sā David erembucheē nderimba cose no. Sā eī erembucheē no:

¿Mbaerā ño mbia pare pare i ja re?

¿Mbaerā mbia riqui ndua ndua chōñote mbae mo ndese re?

²⁶ Ibi jenda rerecua ja rei eicuā Dios je.

Mbia rerecua ja ñumunua icuā Dios je.

Ñumunua icuā ja eriiri abe je no. Cristo je,

sā David i cose no. ²⁷ Eī si tuchi mbia rerecua quia ñumunua icuā Jesús je co. Nderiiri turā je co. Herodes. Poncio Pilato. Judíos. Judíos eā abe no. Ūqui ja que siqui icuā icuā nguia Jesús je ra. Ndechiirabo raque Jesús. ²⁸ Eī ere que ñee cose, eī si eicuā nguia ā namo. ²⁹ Echiisaquia echeē icuā ndese, Urererecua. Nandembusiquiche, i tuchi equia ure rñi ā. Urembusiquicheā na, Urererecua. Urembusiquicheā ndecheē nenei nenei sacuā. ³⁰ Ndequirācuā embu ure je. Mbia rasi mbucherō cherō sacuā. Mbia mae sayā naa sacuā. Jesús rñi. Nderiiri turā ni, i que Pedro resendā ñee nyecha Dios je ra. ³¹ Ñeende Dios je que ibi nyere ee ra. Ñumunuásaa que ibi nyere mbia je ra. Espíritu Turā ngue igue tuchi echiangui re ra. Esiquicheāte que mbia mbiirandu randu Dios cheē ndese cote ra.

Jesús quiato abeichiā eā

³² Hue rñi ja Jesús icuasa ndua ndua checha. Eicuasa tubiriā. Ndua ndua ja. —Sembae ae chō co re, i eā emo umbae je. —Nandembaerā ja chō ā nde, i umbae ja je nyue. ³³ Jesús chi mbaaquiātu que mbia mbiirandu randu tuchi Jesús quera resera. Jesús que uquirācuā mee mee nguia uchimbaaquiātu me ra. Dios que siqui tuchi erese ra. ³⁴⁻³⁵ Mbae tiā eā ngue eriqui Jesús icuasa mo je ra. Tuchuacha que vender i jaaja uchuchua je ra. Ibi cha abe que vender i jaaja umbae ibi je no nda. Mbae isiquia que emee mee Jesús chimbaaquiātu je cote ra. Jesús chimbaaquiātu que emee mee mbaecha reā ja je cote ra.

Nyebe mbae tiã eãte riqui nguiã emo je. Jesús quiato mo je. ³⁶ Sã José no. Bernabé, i Jesús chimbaaquiato José je. Mbia mbiasa, i chõ nguiã Bernabé i. Ae rei Chipre jenda. Levita mo ngue ae ra. ³⁷ Ae rei ibicha. Ibi umbae je que vender i ra. Mbae isiquia que emee Jesús chimbaaquiato je cote ra.

5

Ananías ñee ñooño

¹ Ananías, i que emo je ra. Safira, i que eninisi je ra. Ûquí ngue vender i ibi mo je ra. ²—Mbae isiquia ataque nandembuchimi nandembaerã, i nyue. Eataque que emee Jesús chimbaaquiato je cote ra. Eninisi abe que eicua ja ra. ³ Pedro que ñee Ananías je ra. —¿Mbaerã Satanás ndiqui ique ndechiangui re re? ¿Mbaerã erecheẽ ñooño Espiritu Turã je re? ¿Mbaerã ño mbae isiquia ataque erembuchimi nde? ¿Mbaerã ño ibi ribishoronda erembuchimi nde? ⁴ ¿Mbaerã ño ere? Ibi rei nembrae vender i nonde. Mbae isiquia abe rei nembrae. Mbia je rocoĩ erecheẽ ñooñocheĩ nde. Dios je chõ erecheẽ ñooño nguiã, i que Pedro ra. ⁵ Ananías eandu mose que esi ngoi mano nda. Eandusa que siquiche ja ra. ⁶ Acuanĩndu mo ngue ngaẽ eraaque uma nda. Nguruchoi que nyati ra.

⁷ Emo mose jiri que mano je ninisi ru ra. Tres horas. Jiranuãte que ngu rese ra. ⁸ Pedro que ñee ee ra. —¿Manya rei ibi ribishoronda re? ¿Nderu ibi ribishoronda queru ja rei re? i que Pedro ee ra. —Ae. Ûquí ja chõ nyeresẽ, ichõĩño ngue eninisi Pedro je ra. ⁹ Pedro ñee ee cote. —¿Mbaerã ere? ¿Mbaerã jendua nduachĩ ùquí ndese re? Jeñee ñooñocheĩ nguiã Espiritu Turã je. Ae nderu curuchoi nyati nae, ùquí nyi nderaarõ arõ a. Eiquesa ji a. A ecuaẽ ndererao sacua a, i que Pedro ee ra. ¹⁰ Pedro cheẽ mose tuchi que esi ngoi mano nda. Ngu rã si. Pedro resa rae mano. Acuanĩndu que ique ja eraaque rea ra. Nguruchoi que nyati ra. Eru atiquia jii que eruruchoi nyati ra. ¹¹ Jesús icuasa que siquiche jate ra. Eandusa abe que siquiche jate no nda.

Mbia mae sayã

¹² Jesús chimbaaquiato que Dios quirãcua teacuquia cuquia mbia je ra. Mbia mae sayã ngue esaã saã nguia mbia je ra. Milagros, i que ùquí je ra. Jesús icuasa que ñumunua nua ja quia eiquesaa ra. Portal de Salomón, i que eiquesa je ra. ¹³ Jesús icuasa riĩ ngue mbia ñee turã ja quia ra. Mbia ataque que siquichete ra. Nyebe ñumunua eã nguiã erese. ¹⁴ Jesús icuasa tubiriãt e que cote ra. Hombres tubiriã. Mujeres abe tubiriã no. ¹⁵ Erasi abe que mbia curuchoi choi quia ñeenda jie ra. Huee que eriqui eno eno ngua ye ra. —Sã Pedro aĩ ño ubi ubi erasi rese, i que mbia ñee Pedro ucua mose ra. ¹⁶ Jerusalén ndurubinda abe que ngaẽ ngaẽ nguia ra. Erasi rurucuaẽ cuaẽ Jerusalén. Aba checuayã nyireco abe que ecurucuaẽ cuaẽ nguia ra. Dios que embucherõ cherõ ja quia ra.

Jesús quiato tarõ policíaa

¹⁷ Sacerdote rerecua que paama i ra. Saduceos mo abe que chi erese ra. Ûquí abe que paama i no nda. ¹⁸ Nyebe que Jesús chimbaaquiato isi icuã nda. Tarõ ngue policíaa ra. ¹⁹ Isa que ibatenda mo nguichi ee ra. Angel. Etaronda que embuquiata ra. Jesús chimbaaquiato que equerao itaicue ra. Ñee nonde ee. ²⁰—Dios chuchúaa jẽso. Mbia je mbiirandu randu tuchi Dios cheẽ ndese. Dios cheẽ ndei aba mingosa. Aque rese mbia jembiiirandu randu, i que ibatenda Pedro je ra. Juan abe je. ²¹ Jesús chimbaaquiato

eandu mose que echoi Dios chuchúaa ra. Mbia mbaaquiatsu quiatsu que echoi ra. Isamamimbe cote. Isamamimbe echoi mbia mbaaquiatsu. Sacerdote rerecua que “jenyu” i mbia rerecua ja je ra. Sacerdote resenda abe. Amei je abe ñee. Ñumunua ja u nyiese. Ñee ngue policia raarõsa je cote ra. —Jêso policiaa. Jesús chimbaaquiatsu jendu rã ure je, i rei que ee ra. ²² Ecuasê mose policiaa que Jesús chimbaaquiatsu oreã ño ee ra. Ae nyebi chõ ecuasê nguiã sacerdote rerecua mbiirandu. Ñee ee. ²³ —Puerta ãtã ngue chĩ ndei nguiã ure je. Soldados ngue chĩ rei nguiã itaicuee. Eraarõ ndaque. Ureequia rei ngue re. Eoreã ngue ra. Jesús chimbaaquiatsu oreãte que ure je ra, i que ra. ²⁴ Sacerdote rerecua que nyuruira eandu ra. Dios chuchua raarõsa abe nyuruira eandu. —¿Mañi mañite equia re? i que u ñee ñee nyue ra. ²⁵ Emo ngue tu ñee ee cote ra. —Huee que jenyitarõ nyi Dios chuchúaa ra. Mbia mbaaquiatsu quiatsu, i que mbiirandu ra. ²⁶ Eandu mose que Dios chuchua raarõsa nyoĩ erea ra. Nguesenda rese echoi erea. Curucuaẽ ja nguerecua je. Curucuaẽ turã. —Mbia tubiriã nda sita mombo mombochĩ nande je, i ñene. Nyebe eicuã eã ee.

²⁷ Jesús chimbaaquiatsu que ecurucuaẽ mbia rerecua je ra. Sacerdote rerecua que ñee ee cote ra. ²⁸ —“iMbia ra jemiirandu randuchĩ Jesús rese jê!” ure rei que jêje. Urecheẽ jemumba chõchĩ. Jerusalén jenda ja jemiirandu randu chõchĩ nguiã. “Jesús iquiasha chõ ùqui nde”, jjenyechĩ nda ure riĩ jê! i que sacerdote rerecua Jesús chimbaaquiatsu je ra. ²⁹ Pedro que echeẽ sibishorõ nda. Nguesenda rese echeẽ ndibishorõ. —Dios cheẽ nguia aba mumba aroneate nguiã. Mbia cheẽ nguia nda aba mumba jiri nguiã ña. ³⁰ Jê nguia Jesús jembucha nguiã ira rese. Eiquia sacua. Dios que embuquera si ra. Nanderu rerecua que embuquera si ra. ³¹ Dios que nguiarĩ mingo mbia rerecuarã tuchi cote ra. Ujii bei que emingo ra. Mbia rerecuarã. Mbia rirõ sacua eicuã si. Israel jenda mbui sacua huicua si. Dios eicuã mbutiã sacua esi. ³² Ûqui ndese que uremae ja ra. Nyebe ureico nguiã mbia mbiirandu randu ã. Espiritu Turã abe mae ja erese. Nyebe a e abe riqui nguiã mbia mbiirandu randu co. Dios quia Espiritu Turã mee mee nguiã ucheẽ mumbasa reã je, i que Pedro ra.

³³ Ererecua que paama i ja Pedro cheẽ mose ra. Nyebe eriqui nguiã eiquia ja serite. ³⁴ Fariseo mo abe que chĩ erese ra. Gamaliel, i que ee ra. Ae abe que ererecua ra. Mbia chicua jat e que ae ra. Mbia mbaaquiatsu quiatusa que ae ra. Dios cheẽ nenei neneisa que ae ra. Ae que juã ñee nda. — Jesús chimbaaquiatsu jemondo mbiirĩ conosẽ itaicuee, i que ra. ³⁵ Ñee ngue ererecua uataque je cote ra. —Tacheẽ jêje, Israel jenda. jendua tuchi jê! jJëocochĩ nda Jesús chimbaaquiatsu rese jê! ³⁶ ¿Teudas si jêtesarei re? ¿Jendua eãte quia erese re? Teudas quiatsu ucuasu saã saã nguia resẽ. Erimbarã tubiriãte chee. Cuatro cientos chee erimba. Mbia Teudas iquia chee. Teudas mano nyee. Erimba que saseĩ saseĩ ja chee. Erimba que ua ja ra. ³⁷ Aquere que Judas abe riqui ra. Galilea jenda. Censo mose. Mbia que siqui jate erui no nda. Erimbarã. Ae abe que mano cote ra. Erimba abe que saseĩ saseĩ nda. Erimba que ua ja no nda. ³⁸ Nyebe ã jêteachõ. Jesús chimbaaquiatsu jêteachõ. Sã ae ae quia ua, Dios siquiã mose erese. ³⁹ Dios quirãcuã siqui mose erese ra nandesiquisã aronea. ¿Mañi nande ra eriquisã nde? ¡Jesús rimba nandeteachõ ño jê! Dios quirãcuã nguia siqui rei erese. Dios je ra nandeicuã abareãte, i que Gamaliel ra.

⁴⁰ Gamaliel cheẽ ndui si chõ ngue ererecua siqui ja nguiã cote. —Jenyu,

i nguiã Jesús chimbaaquiato je cote. Iruã nua cote. —¡Mbia je ra Jesús cheẽ jēsenei senei sichĩ core jê! i rei que ee ra. Ererecua que hui esi cote ra. ⁴¹ Jesús chimbaaquiato que nyoi mbia rerecua recha cote ra. Eyate que nyoi ra. — Jesús rĩĩ ño ureiruã nua nguiã, i que ra. Eya tuchi chõ ngue ra. ⁴² Mbia que embaaquiato quiato bei ra. Jesucristo rĩĩ mbia mbiirandu randu bei. Mbia chuchua que embuchesea sea quia mbia mbiirandu randu Jesús rĩĩ nda. Dios chuchúaa abe mbia mbiirandu randu.

6

Mbia siete irabo mbia mbuquiaru sacuã

¹ Jesús quiato tubiriãte que cote ra. Ae griego cheẽ saã nguia, ũquí ngue paama i ra. Ae judío cheẽ saã nguia, ũquí je que paama i ra. Jesús quiato ja raque. —Urerresenda eru cheecha ja ngue jembuquiaru icuã icuã ñochĩ nguiã, i que griegos judíos je ra. ² Nyebe Jesús quiato rerecua mbia munua nguiã. Jesús quiato munua ja. Ñee sacuã ee. —Á ureico Dios cheẽ nenei nenei mbei mbia je ã. Urehui aronea tuchi quiarei Dios cheẽ si. Mbia urembuquiaru quiaru aroneate. Dios cheẽ nenei nenei ndocoĩ. ³ Nyebe Jesús quiato siete chõ jëirabo. Mbia mbuquiaru sacuã. Mbia chũcua siete chõ jëirabo. Hombres aracua chõ jëirabo. Espíritu Turã ndesenda tuchi chõ jëirabo. Sã ũquí ño mbia mbuquiaru quiaru quia. ⁴ Ure quiato ra urecheẽ mbei quia Dios je. Ure quiato ra Dios cheẽ uresenei senei mbei quia mbia je, i que Jesús quiato rerecua ra. ⁵ —Coche ñene, i jat e que Jesús quiato ra. Nyebe que siete irabo ra. Esteban irabo. Ae rei Jesús quiato tuchi. Ae rei Espíritu Turã ndesenda tuchi. Felipe. Prócoro. Nicanor. Timón. Parmenas. Nocolás. ũquí ja que eirabo ra. Nicolás ndei Antioquia jenda. Judío eã ngue ae ra. ⁶ Curuchoi ja que Jesús quiato rerecua je ra. Jesús quiato rerecua que o chono ñono ja ũquí ãquí arõ nda. ũquí siete ãquí arõ. Ñee ngue Dios je cote ra. ⁷ Mbia tubiriã ngue Dios cheẽ isi isi quia ra. Jesús quiato tubiriã tuchi que mbia Jerusalén jenda cote ra. Sacerdote tubiriãte abe que Jesús quiato cote ra.

Mbia icuã tuchi Esteban je

⁸ Dios que siqui tuchi Esteban ndese ra. Dios quirãcuã ngue siqui tuchi erese ra. Nyebe eriqui nguiã mbia mae sayã naa naa tuchi mbia je. ⁹ Mbia emo emo ngue paama i Esteban je cote ra. Esclavos Libertados, i que mbia chumunuasa mo je ra. Hue jenda que paama i ee ra. Cirene jenda abe no. Alejandría jenda abe no. Cilicia jenda abe no. Asia jenda abe no. ũquí jate que paama i Esteban je ra. ¹⁰ ũquí ngue Esteban ñee sobeishĩ aroneate quia ra. Espíritu Turã nguia Esteban mbaaracuate nguiã. Espíritu Turã nguia Esteban mbuch eẽ aquiature nguiã. Nyebe ũquí ndiqui Esteban ñee ndibishorõ aroneate. ¹¹ Paama isa que mbae isiquia mee mbia mo je ra. Ñee ñooño nonde Esteban nii. —Esteban ngue ñee icuãte Moisés rĩĩ nda. Esteban ngue ñee icuãte Dios rĩĩ no nda, ichõiño nonde Esteban nii. ¹² Ñee ñooño je que mbia mbũcuãte Esteban je ra. Amei abe mbũcuãte Esteban je no. Embesasa abe mbũcuãte Esteban je no. Nyebe mbia Esteban isi suruchoi nguiã ererecua je. ¹³ Ñee ñooño je que ñee icuã si Esteban nii huee no nda. —¡Esteban ngue ñee icuã icuãte quia Dios chuchua rĩĩ nda jê! ¡Dios cheẽ nii abe que Esteban ndiqui ñee icuã icuãte ra jê! ichõiño Esteban nii. ¹⁴ —¡Esteban ñee ngue urechandu ra jê! “Jesús ra Dios chuchua mbucoi. Moisés cheẽ nda

Jesús mbutiã”, ï que Esteban nda jê! ique ñee ñooño ererecua je ra. ¹⁵ Mbia que mae ja u Esteban ndese cote ra. Ererecua abe que mae ja u erese ra. Ibatenda nduba rã tuchi quiarei Esteban. Eruba nininya tuchi quiarei ùqui mose.

7

Esteban ñee mbia je

¹ Sacerdote rerecua que ñee Esteban je cote ra. —¿Mbia ñee ñooño nguia nderiñ nde? i Esteban je. ² Esteban ngue ñee oco ee cote ra. —Tacheê jêje, Seresenda. Tacheê jêje, Amei. Dios Turã ngue nyecua u nanderu Abraham je ra. Abraham siqui mose Mesopotamia. Oso nonde Harán. ³ Dios que ñee Abraham je ra. “Ibi mo nguia eso. Nderecua esecha. Nderesenda abe esecha ja. Ibi mo tateacuia ndeje. Huee eso rã. Huee quia tereico”, i que Dios ee ra. ⁴ Abraham ngue oso nguecua rechã ja ra. Ibi Caldea rechã ja. Oso ibi mo. Harán, i que hue ibi je ra. Emo mose que eru mano ee ra. Aquere que Dios Abraham ndurucuaë aa ra. A nandeico a. Aa que erurucuaë nda. ⁵ Dios que ibi mo mee eã Abraham je ra. Ibi boque ñetê mo mee eã tuchi ee. “Ibi tamondo nderiirĩ mbaerã. Ndetiã mose ra amee nderiirĩ je”, i que Dios ee ra. Abraham nguiirĩ ndea eã mose qu e Dios ñee ee ra. ⁶ “Nderiirĩ nda siqui ja rei mbiamo ndese. Ndetiãmbaa. Mbiamo ndécuaa ra eriqui bei. Mbia icuã tuchi ra eriqui nderiirĩ je. Mbia rimbarã nda nderiirĩ. Cuatro cientos años nda eriqui mbia rimbarã”, i que Dios Abraham je ra. ⁷ “Nderiirĩ mbuquiei quieisa ra ambasi mbasi. Ùqui mos e ra nderiirĩ cuaë usê aa. Aa ra ñee ñee turã seje aa cote”, i que Dios ra. ⁸ Dios que ñee Abraham je ra. Abraham ngue Dios cheê ñanduchõ eã nda. Nyebe Dios circuncisión ndeacuquia Abraham je cote. Erãcoi ire ai o ji je chõ eriqui nguã circuncisión, i ùqui je. Dios cheê si embutesareia sacuañ ndei circuncisión. Nyebe Abraham circuncisión saã nguiirĩ je. Eitãquieñ mose. Ocho días mose. Isaac, i que eririñ je ra. Isaac cuasu mose que ae abenguiirĩ tea ra. Jacob, i que eririñ je ra. Isaac abe que circuncisión saã nguiirĩ je no nda. Embutesareia sacuañ Dios cheê si. Jacob abe que nguiirĩ tea ecuas mose ra. Ae abe que circuncisión saã nguiirĩ je no nda. Doce eririñ. Ùquiñ ndei nandei cose.

⁹ José, i que Jacob ririñ mo je ra. José nongue que paama i ja José je ra. Nyebe José mee nguã mbia rimbarã cote. Mbia que José isi suruchoi Egíptoo ra. Huee ab e que Dios riqui tuchi José rese ra. ¹⁰ Mbia icuã mose José je, huee que Dios riqui eraarõ tuchi ra. José ia eã eãte que eriqui ra. Dios embaaracua tuchi. Nyebe mbia rerecua turãte riqui nguã ee. Faraón, i Egipito jenda rerecua je. Ererecuabi tuchi que José riqui ra. Nyebe emingo nguã ererecuarã. Egipito jenda rerecuarã. Nyebe emingo nguã uchuchua jenda rerecuarã. ¹¹ Emo mose jiri que mbae tiã mbia je ra. Mbia chiurã tiã ngue Egíptoo ra. Canaán abe mbia chiurã tiã. Nandei riãcuã ja que eriqui cose ra. ¹² Quiata a mbuae que Egíptoo ra. Jacob jirandu mose que nguiirĩ mondochoi erea ra. “Nandechiurã mo jêisi rã oso”, i que emondochoi Egíptoo ra. Aque ramo tuchi que eririñ nyoï Egíptoo ra. Jacob ndiirĩ ndei nandei ja. ¹³ Aquere que ehoi si uchiurã ndea ra. Aque mose chõ ngue José nyecua nguã ngõngue je cote ra. Nyebe Faraón José nongue icua nguã cote. ¹⁴ José que ngõngue mondochoi ngu rea cote ra. Jacob, i que eru je ra. “Nanderu jendu rã. Jeninisi abe jendu rã. Jendiirĩ abe jendu rã”, i que José ee ra. Curucuaë ja que ra. Setenta y cinco que mbia ra. ¹⁵ Eñ ngue Jacob oso siri

Egiptoo ra. Huee que eriqui bei ra. Mano nyee. Nandei ja abe que chi bei huee ra. Mano nyee. ¹⁶ Emo mose que mbia Jacob quiangue ruruchoi Siquem nda. Ibicua rie que eno huee ra. Ae Abraham isi ibi nyii, huee que equiangue no nda. Huee que nandei quiangue no nda. Ae ibi Abraham isi quia Hanor ndiiri si nae, huee que equiangue no nda.

¹⁷ “Cuatro cientos años nda nderiiri nyi bei Egiptoo. Aquere Ibi Canaán tamee ee”, i quia Dios Abraham je nyii reaē. Cuatro cientos años ua jiri mose que nandei tubiriāte cote ra. ¹⁸⁻¹⁹ Aque mose que emo Egipto jenda rerecua rā cote ra. Ae que jiranuā José rese ra. Nyebe ngue eriqui nguiā nandei mbiri iri. Eicuā tuchi que eriqui nandei je ra. “Jendiiri itāquieĩ jēsecha chō. Sā ae ae mano ja”, i que ererecua nandei je ra. ²⁰ Aque mose que Moisés nyaacuquia ra. Diosbi tuchi que Moisés ra. Nyaacuquia ramo mose. Tres nyasi que esi embutiarō nyecuayā nda. Mbia rerecua si. Eru abe siqui embutiarō nyecuayā. Eitāquieĩ mose. ²¹ Nguereco checuayā aroneate chee que ra. Nyebe ererecua riiri ngasē nguiā ee. Isi turā ngue ra. Mbutiarō ngue nguiirina nda. Nyucuaaque que ererecua riiri nda. Ae que Moisés itāquieĩ mbutiarō cote ra. ²² Nyebe Moisés mbaaquiātu tuchi nguiā Egipto jenda rā si. Earacua tuchi que ecuasū mose cote ra. I tuchi que ra.

²³ Moisés que ndua tuchi uataque rese cote ra. “Taso rā israelitas rea”, i que cuarenta años mose cote ra. ²⁴ Oso que cote ra. Egipto jenda mo icuā icuā mose israelita mo je que Moisés si ngasē nda. Moisés que esiquisā nda. Iquia que ra. Egipto jenda iquia que ra. ²⁵ Moisés que ñee uchiangui re ra. “Sere senda ra seisi turā. Seicuate rae. ‘Dios chimbu chō tu nguiā co. Urerirō sacū a si’, i ra seresenda serī”, i rei ngue Moisés uchiangui re re. Eresenda que eisā ñochi nguiā. ²⁶ Isamami nongue que israelitas mo icuā icuā nyue ra. “Tacheē turā ee. I nda eturā si nyue”, i rei que Moisés ra. “¿Mbaerā jēicuā icuā ndiqui jenyue re? Nande ja chō nyeresē”, i que Moisés ee cote ra. ²⁷ Ae rane eicuā icuā ndiqui nyue nae, aque que ñee icuā Moisés je ra. Moisés maña mondo. “¿Aba nemingo ererecuarā nde? Urereachō ño ae”, i que ñee icuā Moisés je ra. ²⁸ “Ae ereiquia curi, ¿aque rā si ra seiquia re?” i que ñee icuā Moisés je ra. ²⁹ Ā andu mose que Moisés si uchā nda. Ibimo. Madián, i que ibimo je ra. Huee que eriqui arete ra. Nguiiri nyeremo ngue etea huee ra.

³⁰ Huee que eriqui arete ra. Cuarenta años. Emo mose que esi turuquia rī nda. Ibi ibate jii que eriqui ra. Sinaí, i que hue je ra. Huee que ira ruri riqui sendi ee ra. Tata rendi mbirō ngue ibatenda mo nyecua ee ra. Angel que nyecua Moisés je ra. Ira ruri rendi ite re que nyecua ee ra. ³¹ Moisés que nyuruira tuchi erea ra. Erurubi que mae tuchi erese cote ra. Dios que ñee ee cote ra. ³² “Dios chō se re. Ndei rerecua chō se re. Abraham nderecua. Isaac abe rerecua no. Jacob abe rerecua no. Ūqui nderecua ja chō se re”, i que Dios ra. Moisés que titi titi i ra. Siquichete que mae ndocoĩ erese ra. ³³ Dios que ñeembe ee ra. “Ndeiyao esirō na. Seturā ño se re. Sésaa ndeiyao esirō. ³⁴ Serimba rese aico mae mae mbeite Egiptoo co. Mbia icuā tuchite ee. Mbia embasi mbasi beite. Amae mae mbeite que erese ra. Echeseo seo rese que aico mae mbei ra. A achu erirō sacū a. Tasirō eicuā si cote. Eso Egiptoo. Taremondo Egipto cote”, i que Dios Moisés je cote ra.

³⁵ Dios que Moisés mingo mbia rerecuarā cote ra. Mbia rirō sacū Egipto si. Mbae icuā si. Mbia que Moisés isi sereā nea nyii ra. “¿Aba nemingo urererecuarā nde?” i que mbia Moisés je nyii ra. Ūqui sí je que Dios Moisés mondo si ra. Ererecuarā. Dios que tata rendi ite renda mbucheē Moisés je

ra. ³⁶ Moisés que mbia mae sayã saã saã nguia nandei je ra. Mbia mae sayã tubiriãte que esaã saã nguia ra. Moisés que mbia curuchoi Egipto si cote ra. Curuchoi que Ama Irei ndasa ra. Moisés que mbia quereco bei turuquia rui ra. Cuarenta años. Mbia mae sayã tubiriãte que esaã saã nguia ra. ³⁷ Amei mose que Moisés ñee mbia je ra. “Dios ra jemo irabo ucheẽ mbuchecua sacuaã jêje. Seraanguia si ra eirabo. ¡Aque cheẽ nda jemumbachĩ jê!” i que Moisés israelitas je ra. ³⁸ Moisés bei chõ ngue ererecua ra. Moisés bei chõ ngue nandei quereco quia turuquia rĩ ndesẽ. Ae je chõ ngue ángel ñee ndesẽ. Mbia chumunua mose Ibi Ibate Sinaí. Ibatenda mo ngue ñee ñee u Moisés je ra. Moisés que ñee ñee nandei je cote ra. Ibatenda cheẽ mbuchecua ee. Mbia mingosa cheẽ nenei nenei mbia je. Nandei je. ³⁹ Nandei que Moisés cheẽ ñandu sereãte quia ra. Echeẽ mumba mumba. “Nyaso rei nyebi Egipto ae”, i que equia ra. ⁴⁰ Nandei que ñee ñee Aarón je ra. Moisés cutiã ngue ñee ñee ee ra. “Mbae raanguia mo esaã jiri ure je ae. Imagen. Urererecuarã. Ae je nda ureico ñee ñee jiri chã. Ae nda urererao Egiptoo chã. Moisés tiãte ure je cote. Ae urereru Egipto si. Maranguiti chõ esi urerecha”, i que mbia Aarón je ra. ⁴¹ Nyebe que Aarón ticuas raanguia raã ee ra. Imagen. Nandei que mbae iguia iguia ticuas raanguia je ra. Eroo que emũ ticuas raanguia jii ra. Mendi que ee cote ra. Mbia ia tuchi que uchiao rese cote ra. ⁴² Ūqui icuã tuchi que Dios je ra. Nyebe Dios hui nguia nandei si cote. Nandererecua, i chõchĩ mbia tenda je cote. Nyasi je abe no. Nyasi tata je abe no. Ūqui je chõ mbia riquichĩ ñee ñee. Ūqui mose que Dios ucheẽ mbu cote ra. Dios cheẽ mbuchecuaa que Dios cheẽ senei senei mbia je ra. Co rei embesa ji co:

Israelitas, ¿aba je jẽingo mbae roo mendi mendi cose re?

Jẽingo mose turuquia cuarenta años mose.

¿Seje chõ jẽingo mbae roo mendi mendi cose re?

⁴³ Tei. Seje eã ñene.

Jenyiao je chõ jẽingo mbae roo mendi resẽ.

Tuchua ñetẽ jendaso raso bei chõchĩ.

Mbae aingue raanguia resebe. Moloc, i ee.

Aque je chõ jẽingochĩ nguia ñee ñee.

Seje ñee ñee ndocoi.

Nyasi tata je abe jẽingochĩ nguia ñee ñee.

Nyasi tata rei Refán mbae.

Mbae raanguia jenyiao je abete que jẽingo ñee ñee nda.

Nyebe ra jaemondo jembae ibi si.

Babilonia ndobei ra jaemondo.

Mbia rimbarã nda jaemondo,

i que Dios nandei je cose ra. ⁴⁴ Nandei que chi arete turúquiaa ra. Aque mos e que nandei riqui tuchia rurucuata bei cose ra. Mbae ire que tucharã cose ra. Aque tuchiaqui re que mbia riqui ndua ndua Dios rese ra. Dios que tuchia nyao uquia Moisés je ra. “¡Eĩ ere chõ eao jê!” i que Dios Moisés je ra. Dios cheẽ ndui si tuchi que Moisés eao ra. ⁴⁵ Moisés manonde que Josué nandei rerecua cote ra. Ae que nandei curuchoi turuquia si cote ra. Ngasẽ nonde ibi mo je. Dios chimee, hue ibi je que ngasẽ cote ra. Nandei que guerra saã saã hue jenda je ra. Dios que mbia mombo ja hue jenda ra. Aque mose que nandei riqui tuchia ruruchoi bei ra. Tuchua, i chõ nguia mbae ire ao ji je. Aque tuchia que equereco bei quia ra. David abe mbia rerecua mose.

⁴⁶ Dios que siqui tuchi David rese ra. David que ñee ee ra. “Tuchia cuasu tasaã ndeje”, i rei ngue David Dios je re. Jacob nderecua rei Dios. ⁴⁷ David

ndiirĩ nguiatu que tuchia saã Dios je ra. Salomón, i que eririĩ je ra. ⁴⁸ Mbia rã eã ndei Dios. Dios siquiã tuchi chõ nguiã tuchiaqui re. Mbia chiaoqui re. Dios cheẽ mbuchecuasa que Dios cheẽ saã nda:

⁴⁹ Se quia ererecua tuchi re.

Ibatenda rerecua abe rei se.

Ibi jenda rerecua abe rei se no.

¿Mañi nda mbia sechucharã ao re?

Equi re ra aicoã ndesẽ.

⁵⁰ Se quiatu que mbae achao ja resẽ,

i que Dios nandei je ra. ⁵¹ Jeñia icuã ñochĩ. Jëisayã ñochĩ. Espiritu Turã jëisiteã teã ñochĩ. Jendu rã si chõ Espiritu Turã jëisiteã teã ñochĩ. ⁵² Jendu icuã bei que eriqui Dios cheẽ mbuchecuasa ja je ra. Jendu que Dios cheẽ mbuchecuasa iquia iquia bei quia ra. Ibatenda Turã nda tu, ae i quia cose nae, ùqui abe que jendu iquia iquia quia cose resẽ. Ibatenda Turã tu mose que jemeẽ ñochĩ nguiã mbia icuã je ra. Eiquia nonde que jemeẽ ñochĩ nguiã mbia icuã je. ⁵³ Dios que ángeles mbu rei jëje ra. Ucheẽ nderu raque jëje. Jë echeẽ mumbayã sacua. Echeẽ ngue jemumba mumba bei chõchĩ nguiã, i que Esteban ñee oco tuchi ee ra.

Mbia Esteban iquia sita je

⁵⁴ Eandusa que paama i tuchi Esteban je ra. Esteban i quia serĩ. ⁵⁵ Espiritu Turã ngue siqui tuchi Esteban ndese ra. Esteban ngue mae tuchi ibei rese mbia paama i mose ee ra. Dios Turã ndese que mae ibate ra. Jesús rese abe que mae nda. Jesús que chí juã Dios ji ee ra. ⁵⁶ Esteban ngue ñee nda. —Jemae jë. Ibei nyiequia rese aĩ mae a. Huee mbia rucucha ñi juã Dios ji huee. Huee Jesús ñi juã Dios ji huee, i que Esteban nda. ⁵⁷ Mbia que tasẽ tasẽ tuchi paama i ra. Huisacua que emitao ja Esteban ñee si ra. —Nandecua recua erese, i que o oe Esteban ndese ra. ⁵⁸ Mbia que Esteban curuchoi sucha tubiriã si ra. Huee que sita mombo mombo erese ra. Sita mombo mombosa que huiirao mbui mbui acuanindu mo je ra. —Esaarõ, i que ee ra. Saulo, i que eieirao raarõsa je ra. ⁵⁹ Mbia que sita mombo mombo Esteban ndese ra. Sita mombo mombo mose que Esteban ñee Ibatenda je ra. —Aque aso quia ndeje aque, Sererecua Jesús. Seisi cote, i que Esteban Ibatenda je ra. ⁶⁰ Ngoi que nguiã ndese cote ra. Tasẽ tasẽte que ñee mombo mombo ra. —Sererecua, ã icuã ndaque seje. ¡Erembasi mbasichĩ nda huiacuã ñi jë! i que Esteban Jesús je ra. Esteban ngue mano cote ra.

8

Saulo icuã Jesús quiato je

1 —Coche rei mano, i que Saulo Esteban mano mose ra. Aque mose tuchi que mbia icuã icuã tuchi Jesús quiato je cote ra. Jerusalén jenda. Jesús quiato que nyoĩ ja ñimbuchao Judea rĩ nda. Samaria rĩ abe que echoi ñimbuchao ra. Jesús chimbaaquiato achõ ngue chichõ Jerusalén nda. ² Mbia turã mo ngue Esteban nyati ra. Nyeseo tuchi que eati mose ra. ³ Saulo icuã tuchi que eriqui Jesús quiato je ra. —Jesús quiato tambutiã, i tuchi que Saulo quia ra. Nyebe eriqui nguiã mbia chuchua mbuchesea seate. Jesús quiato rea rea ererao sacua tarõ policiaa. Saulo icuã tuchi que eriqui Jesús quiato je ra.

Samaria jenda Dios cheẽ ñandu

⁴ Ae uchã nyoĩ quia Jerusalén si nae, ùqui ngue nyoĩ mbia mbiirandu randu tuchi quia Jesús rĩ nda. Mbia recua ja que eriqui nyoĩ nyoĩ mbia mbiirandu

randu Jesús rĩ nda. ⁵ Felipe que oso Samáriaa ra. Sucha tubiriã mo. Huee que eriqui mbia mbiirandu randu Jesús rĩ no nda. ⁶ Dios que Felipe mbuquirãcuã nda. Mbia mae sayã ngue esaã saã nda. Mbia tubiriã ngue nyiisaquia tuchi quia echeẽ ndese ra. ⁷ Aba checuayã icuã ngue Felipe jea jea tuchi mbia si ra. Aba checuayã icuã ngue tasẽ nguia hui mose mbia si ra. Felipe que mbia cuatayã mbucuata ja quia ra. Mbia umi sayã abe que embucherõ cherõ nguia ra. ⁸ Nyebe hue jenda ia tuchi sucha tubiriã jenda.

⁹ Huee sucha tubiriã ngue Simón ndiqui ra. Brujo que ae nyii ra. Ae que mbia mbĩrĩ irĩ tuchi quia nyii ra. Mbia Samaria jenda chiucua tuchi que ae ra. ¹⁰ Mbia que nyiisaquia tuchi quia Simón ñee ndese cose ra. Mbia riirĩ abe que nyiisaquia quia echeẽ ndese ra. —Dios embuquirãcuã tuchi quia co, i rei que mbia Simón nĩ nda. ¹¹ Simón ngue mbia mbĩrĩ irĩ tuchi quia brujeria je ra. Nyebe que mbia riqui nyiisaquia tuchi eres e nyii ra. ¹² Huee que Felipe Jesús renei nenei tuchi cote ra. —Dios ra mbia rerecuarã tuchi, i que Felipe quia hue jenda je ra. Ũquĩ mose que mbia Jesús icua icua tuchi ra. Bautizar i que mbia atate je ra. ¹³ Simón Brujo abe que Jesús icua cote ra. Bautizar i que ee ra. Felipe rui beĩ que eriqui cote ra. Felipe que mbia mae sayã saã saã quia ra. Simón ngue nyuruira tuchi quia mae erese ra.

¹⁴ —Samaria jenda riqui Dios cheẽ isi isi tuchi ã, i que mbia Jerusalén jenda mbiirandu randu ra. Nyebe que Jerusalén jenda Pedro mondochoĩ Samáriaa ra. Juan abe mondo. ¹⁵ Ngasẽ mose que ñee Dios je ra. —Espíritu Turã emondo rã Jesús quiato a jenda je, i que Dios je ra. ¹⁶ Espiritu Turã iqueã mose hue jenda chiangui re que Pedro choĩ erea ra. Jesús rimbarã ño ngue mbia bautizar i nguiã ee nyii. Espiritu Turã iqueã ño nguia echiangui re nyii reaẽ. ¹⁷ Pedro que o chono Jesús quiato aquĩ arõ nda. Juan ab e o chono earõ. Espiritu Turã ngue tu Jesús quiato je cote ra. ¹⁸ Simón ngue mae erese ra. O chono mose earõ. Espiritu Turã tu mose ee. Nyebe que mbae isiquia reacuquia Pedro je ra. Juan abe je. ¹⁹ Ñee ngue ee ra. —Sembaaquiato se abe. Ndequirãcuã embu seje. Sã se abe seo tachono ñono mbia arõ. Sã se abe Espiritu Turã quirãcuã tamee mee mbia je. Mbae isiquia tamee jẽje jẽquirãcuã ndibishorõ, i rei que Simón nda. ²⁰ Pedro que ñee asi ee ra. —Sã mbae isiquia nembae quiachã ja. Nde abe equiachã tuchi. ¡Dios ra uquirãcuã mee eã mbae isiquia ribishorõ jẽ! ²¹ Ndeturã eã ñochĩ ndechiangui re. Nyebe ra Dios uquirãcuã mee eã ndeje. ²² ¡Ndeicuã si ehui rã jẽ! Echeẽ ñee Dios je. Sã Dios nendua icuã mbutiã ndesi. ²³ ¡Sã ndeicuã tuchi riqui ndechiangui re jẽ! Ndeicuã aicuate quia co, i que Pedro ee ra. ²⁴ Simón ngue ñee Pedro je cote ra. —Echeẽ turã Dios je serĩ. Sã Dios seicuã mbutiã. f nda aquiachãyã esi, i que Simón nda.

²⁵ Pedro que Dios cheẽ senei senei nguia ra. Juan abe esenei senei no. Aquere que echoĩ nyebi Jerusalén nda. Ñeenda a cua jenda que embuchesea sea sucha tubiriã nda. Samaria jenda mbuchesea sea Jesús renei nenei mbia je.

Carro yenda Dios cheẽ ñandu

²⁶ Angel mo ngue tu Felipe je ra. Ibate si que eru nguichi ñee ee ra. —Eso chõ turũquiaa. Eso chõ ñeenda icoĩ Jerusalén icha. Gaza icha abe, i que ibatenda Felipe je ra. ²⁷ Felipe que oso Dios cheẽ nguire ra. Echia o ji mo ngue esobeishĩ ñeenda cúaa ra. Etiopía jenda rei echia o ji. Ae rei ererecua resenda. Candace, i que ererecua je ra. Reina. Mbae isiquia Candace mbae

que esaarō arō tuchi quia ee ra. Echia o ji oso quiatu quia Jerusalén nyii reaē. Oso quia equia Jerusalén ñee ñee sacua Dios je nyii reaē. ²⁸ Uba que u quia uchuchua quititi cote ra. Carro ye que eru quia cote ra. Isaías chimbesa rese que eru quia mae mae carro ye ra. Dios cheē. ²⁹ Espiritu Turā ngue ñee Felipe je ra. —Eso rā carro jii, i que ee ra. ³⁰ Felipe que oso ra. Oso que Etiopía jenda andu ra. Isaías chimbesa rese que esi quia maemaē nda. Nyebe Felipe ñee ee. —¿Isaías chimbesa checuate eriqui ndeje re? i que Felipe ee ra. ³¹ —Tei. ¿Mañi ae ra eicua re? Aba mo eicuayāte seje resē. Echui rā. Ecoi seji. Sembaaquiātu rā se, i que carro yenda ee ra. ³² Ā Isaías chimbesa rese que eriqui mae mae nda. Ā ndei e ā:

Nanderiquicharōsa rei oveja rā.

Mbia que oveja querao eiquiāsaa ra.

Mbia que ovejara nyisia sia ra.

Oveja ñee ñeeā ee.

Eñ ngue nanderiquicharōsa ñee ñeeā huiiquia mose ra.

³³ Nanderiquicharōsa turāte raque.

Mbia icuā tuchi ee. Mbia eiquiachō.

Emosenda icuā tuchite ee.

Emosenda eiquia chee.

Nanderiquicharōsa siquiā ibi rī cote,

i qu e Isaías embesa ra. Embesa ji rese que Etiopía jenda riqui mae mae nda. ³⁴ Etiopía jenda que ñee Felipe je ra. —Embesa ji embuchecua seje.

¿Aba rī Isaías riqui embesa mbesa re? ¿Mbiamo nī eriqui embesa re? ¿Ngūñ eriqui embesa re no? i que Felipe je ra. ³⁵ Felipe que embuchecua ee ra.

Mbaaquiātu tuchi que Jesús rī cote ra. ³⁶ Carro que ngasē ama moo cote ra. —¿Co ama ñi co! ¿Aa ra bautizar ere seje re? i que Etiopía jenda Felipe je ra. ³⁷ —¿Jesús ereicua quia cote re? Jesús icua tuchi mose ra bautizar ae

ndeje cote, i que Felipe ee ra. Etiopía jenda ñee ee cote. —Jesús aicuate quia co cote. Jesucristo rei Dios ndiirī. Aicua sequia co cote, i que ra. ³⁸ Carro que embutiba cote ra. Nguichi que esi ra. Ama ndie que echoi ra. Felipe que bautizar i ee cote ra. ³⁹ Usē ngue ama si cote ra. Espiritu Turā ngue Felipe

querao hue si cote ra. Etiopía jenda que mae eā mbei Felipe rese cote ra. Etiopía jenda ia tuchi que oso ra. ⁴⁰ Felipe que ngasē Azótoo ra. Sucha tubiriā

ngue embuchesea sea ra. Mbia mbiirandu randu tuchi Jesús cheē ndese. Ngasē nyee que Cesarea ra.

9

Saulo uba ramo Dios icha rui

¹ Saulo icuā mbei que eriqui Jesús quiato je ra. Taiquia ja, i rei que equia ra. Nyebe que esi ñee sacerdote rerecua je ra. ² —Papel embesa rā sechiraorā.

Tarao Damáscoo. Judíos chumunua mose ereacuquia sacua ee. Jesús quiat o hue jenda taru taru Jerusalén. Ecuasa taru taru quia etarō sacua policiaa. Mujeres abe taru. Hombres abe taru taru no, i rei que Saulo ñee icuā Jesús

quiato rī nda. ³ Damasco rurubi mose que tata mo tu tuchi ee ra. Tata mo ngue tu tuchi ee ibate si ra. Tata que Saulo tesae tuchi ra. ⁴ Saulo que ngoi oso íbii ra. Echeē mo ngue echandu ra. —¿Mbaerā ndeicuāte riqui seje re? i

que ibatenda ñee ee ra. ⁵ Saulo que ñee ee ra. —¿Aba nde re? i ee. Ibatenda que ñee ee ra. —Jesús rei se. Seje quia ndeicuāte riquichī nguiā. Ndeicuā

mose seje, nde sí chō ereico ñimbasi co. Sā ticuasū riqui nambacua mbuti no.

Sã eriqui hui mbaba ira racua echi no. Ñquĩ na tuchi quiarei nde, i que Jesús ee ra. ⁶ Saulo que titi titi i eandu ra. —¿Mañi ae ra sequia se re, Sererecua? i que Saulo Jesús je ra. —Ehuã. Eso sucha tubiriã. Huee ra sequiato mo secheẽ nenei ndeje, i que Jesús Saulo je ra. ⁷ Saulo resend a que siquiche tuchi ra. Echeẽ andu mose. Mbia mo ndese que maeã nda. Nyebe siquichete echeẽ andu. ⁸ Saulo que juã ndei nguesa ira ra. Emae sayã tuchi. Eresayã ngue ra. Nyebe que mbia eo isi suruchoi sucha tubiriã nda. Sucha tubiriã Damáscoo. ⁹ Tres días que eresayã tuchi riqui ra. Aque mose que eresayã mbae mo uãte ra. Aque mose que yu eã no nda.

¹⁰ Huee sucha tubiriã ngue Jesús quiato mo ndiqui ra. Ananías, i que ee ra. Aque nda Dios tea cuu ra. —Ananías, i nda Dios eque re ra. —¿Mbae? i nda Ananías e ra. ¹¹ —Eso rã Ñeenda Chaa Chaareã. Huee que Judas chuchua ñi nda. Huee eso Saulo rea. Saulo rei Tarso jenda. Hue eriqui ñee seje hue. ¹² Saulo que nderea cuu ra. Ereso que ndeo no erese cuu ra. Eresa que erembucherõ cuu ra. Ñquĩ sí esaã oso ee, i nda Dios Ananías je ra. ¹³ Ananías que teã ndei ra. —Mbia Saulo icuã icua tuchi quia co, Dios. Eicuã tuchi Jesús quiato Jerusalén jenda je. Mbia sembiirandu ja quia co, Dios. ¹⁴ A eru Jesús quiato isi ererao sacuaã. Ñquĩ je chõ sacerdote rerecua embu nguia a. Uretarõ ja sacuaã, i que Ananías Dios je ra. Esiquichete que Saulo si ra. ¹⁵ Dios que ñee ee ra. —Eso chõ erea. Ae quia airabo mingo serimbarã co. Ae ra Israel jenda mbiirandu randu secheẽ ndese. Ae ra mbia mangue chooñoa jenda abe mbiirandu randu secheẽ ndese no. Ae ra mbiamo nderecua abe mbiirandu randu secheẽ ndese no. ¹⁶ Saulo secheẽ nenei nenei mose ra mbia embasi mbasi tuchi. Mbia icuã icuã tuchi ra ee serĩ mambi. Ñquĩ ndese Saulo tambiiirandu, i que Dios ra. ¹⁷ Ananías que oso cote ra. Dios cheẽ nguire. Ique que Judas chuchúaa ra. O que echono Saulo rese ra. —Seresenda ereico co cote, Saulo. Jesús que nyecua ndeje ñeenda cúaa, ae sí sembu quia ndeje co. Jesús sembu ndeje co. Espíritu Turã ique sacuaã ndechiangui re. Nemaesacuaã abe sembu co no, i que Ananías Saulo je ra. ¹⁸ Aque mose tuchi que sira quishĩ naanguia tu ngoi eresa si ra. Saulo que mae turã cote ra. Jesús quiato que bautizar i Saulo je cote ra. ¹⁹ Saulo que quiaru ñimbuquirãcuã cote ra. Itõ mocoĩ jiri que Jesús quiato rese huee ra. Damasco jenda rese itõ mocoĩ.

Saulo Dios cheẽ nenei namo

²⁰ Saulo que oso oso quia Jesús renei nenei judíos chumunuásaa ra. —Jesús rei Dios riiĩ, i tuchi que equia mbia je ra. ²¹ Mbia que nyuruira tuchi quia echeẽ andu ra. —Co chõ Jesús quiato iquia iquia quia cose nye. Jerusalén jenda. Co chõ tu a Jesús quiato rerao sacuaã nye. Co chõ Jesús quiato queraose rete quia sacerdote rerecua je nye. Ae Jesús quiato riqui quia namo co cote, i que mbia nyuruira Saulo rea ra. ²² Saulo quirãcuã tuchi que eriqui cote ra. Ererecua rã ño eriqui nguia mbia mbaaquiato quiato Jesús rĩ. —Jesús rei Cristo. Ae jësaarõ arõ nguia, aque rei Jesús, i tuchi que Saulo quia judíos je ra. Judíos Damasco jenda que Saulo cheẽ sibishorõ aronea nda.

Saulo uchã judíos si

²³ Emo mose jiri que judío rerecua ñee nyue ra. —¡Saulo nandeiquia jẽ! i rei que ñee nyue ra. ²⁴ Mbia mo ngue Saulo mbiirandu ra. —Nandeiquia, i nda mbia nderĩ nda. Hue echi nyiquitirõ nderese eiquésaa hue. Isa abe echi nyiquitirõ nderese hue, i que embiiirandu ra. ²⁵ Itondaru mose que Jesús

quiato mo Saulo mbuchemi nda. Nyuchã ngue iru ye ra. Iru resebe que embuquichi mondo etaronda robei ra. Muralla robei.

Saulo siquibe Jerusalén Jesús quiato ramo mose

²⁶ Saulo que oso Jerusalén cote ra. —Taico Jesús quiato rese, i rei que ngasẽ nda. Jesús quiato que siquiche ja esi ra. —Saulo Jesús quiato saã saã ño nguiã nandẽ je co, i rei que mbia ra. Nyebe siquiche rei nguiã esi. ²⁷ Bernabé mii ngue Saulo isi turã nda. Ae que Saulo querao Jesús quiato rerecua je ra. Embiirandu tuchi Saulo rese. —Saulo que oso rei Damáscoco ra. Nandererecua Jesús que nyecua ee ñeenda cúa ra. Jesús que ñee ee ra. Saulo que siqui Jesús rui cote ra. Saulo que siquicheã nguia Jesús renei nenei Damasco jenda je cote ra, i que Bernabé uataque je ra. ²⁸ Aquere que Jesús quiato Saulo isi turã cote ra. Saulo que siqui are jiri Jerusalén cote ra. Hue jenda Jesús quiato rese que eriqui tuchi ra. ²⁹ Saulo siquicheã ngue eriqui Jesús renei nenei mbia je ra. Ae griego cheẽ saã saã nguia nae, ũqui je abe que erenei nenei nda. Ñee asi asi que Saulo je Jesús rii nda. Saulo abe que ñee tuchi ee Jesús rii nda. Nyebe mbia riqui nguiã “nandeiquia” i Saulo rii. ³⁰ Jesús quiato que jirandu erese ra. Nyebe Saulo ruruchoi nguiã Cesarea. Mondo que echuchúaa sí cote ra. Tarso, i que Saulo chuchua je ra. ³¹ Aquere que mbia icuã icuã eã Jesús quiato je cote ra. Judea jenda je. Galilea jenda abe je. Samaria jenda abe je no. Jesús quiato hue jenda que ñimbuquirãcuã nacua ja ra. Siqui i i tuchi Jesús rese. Espiritu Turã ngue embeta mbeta ra. Etubiriã nyee. Jesús quiato que Dios cheẽ mumba mumbayã nguia ra.

Jesús quirãcuã Eneas mbucherõ

³² Pedro que mbia mbuchesea sea tuchi quia ra. Oso que Jesús quiato Lida jenda rea no nda. ³³ Hue que umi sayã mo ndiqui ra. Ae ngatayã mbei quia ocho años. Nyaara bei chõ ngue equia ra. Eneas, i que umi sayã je ra. ³⁴ Pedro que ñee ee ra. —¡Jesús riqui nembucherõ a jẽ! Ehuã na. Nderua abe enua, ique Pedro umi sayã je ra. ũqui mose que nyerõ nda. ³⁵ Mbia que mae ja u umi sayã ngata rese ra. Nyebe que mbia Jesús icua ja cote ra. Lida jenda Jesús icua ja. Sarón jenda abe que eicua ja n o nda. Ngãmei ñee si que hui Jesús isi cote ra.

Dios quirãcuã Dorcas mbuquera si

³⁶ Dorcas, i que ari mo je ra. Jope jenda que ra. Dorcas, i que griego cheẽ quicuã je ra. Jesús quiato que ae ra. Ae que eturã mbei riqui mbia je ra. Ae que mbae mee mee mbei quia mbaecha reã je ra. ³⁷ Dorcas rasi que eiquia cote ra. Mbia que eraaque mbuchasu ra. Mii ngue equesa nongue ibatenda ye ra. Segundo piso. ³⁸ Pedro que siqui aichi ra. Lida, i que sucha tubiriã je ra. Nyebe que Jesús quiato mbia nyeremo mondochoi Pedro reru sacua nda. ³⁹ Pedro que oso erese ra. Ngasẽ mose que mbia eruruchoi equesa ibatenda ra. Dorcas raaque rese mae. Hue eru chiecha tubiriã a nyi nyeseo eraaque res e hue. Dorcas chimee tubiriã ngue eteacuquia cuquia u nyue hue ra. Mbia irao tubiriã ngue Dorcas chiao ra. ⁴⁰ Pedro que mbia mbusẽ ja mondo taicuee ra. Nguiã ndese que ñee Dios je cote ra. Aquere que ñee eraaque je cote ra. —Ehuã na, Dorcas, i que ee je ra. Eraaque que nguessa ira mae Pedro rese ra. Nyuruã ngue ngoi cote ra. ⁴¹ Pedro que emua eo rese ra. Jenyu, i que Jesús quiato je cote ra. Eru chiecha ja je abe no. Ngaẽ ngue mae equera rese cote ra. ⁴² Mbia Jope jenda que jirandu tuchi erese ra. Nyebe que mbia tubiriã Jesús

ica cote ra. ⁴³ Pedro que itō mocoĩ hue ra. Sucha tubiriã. Simón curtidor chuchúaa que eriqui uque ra.

10

Pedro oso Cornelio rea

¹ Soldados rerecua mo ngue siqui sucha tubiriã Cesaréaa ra. Italia jenda rei ũquí soldados. Cien ngue soldados ra. Cornelio, i que soldados rerecua je ra. ² Ae que ñee ñee mbei quia Dios je ra. Ae que eturã ndiqui Dios je ra. Mbae isiquia que emee mee tuchi quia mbaecha reã je ra. Echuchua jenda abe que eturã ndiqui Dios je ra. ³ Tenda nyeseco ramo mose que Cornelio ibatenda mo ndea cuu ra. Angel. Echecua tuchi que ee cuu ra. Ique que echuchúaa ee cuu ra. —Cornelio, i que ñee ee cuu ra. ⁴ Cornelio que mae quiatu tuchi erese ra. —¿Mbae ere, Sererecua? i que siquiche ñee ee ra. Ibatenda que ñee ee cote ra. —Co ereico ñee ñee mbeite Dios je co. Co ereico mbae mo mee mee mbeite mbaecha reã je co. Nyebe Dios ia tuchi riqui nguiã nderese co. ⁵ Huee que Simón Pedro mo ndiqui Jópee ra. Nderimba mo emondochoi erea. Ereru sacuí ñee ndeje. ⁶ Huee eriqui Simón Curtidor chuchúaa huee. Am a ndisha rimia eriqui hue. Sã nderimba ecurucuaẽ hue si. Ñee ñee sacuí ndeje, i que ibatenda Cornelio je cuu ra. ⁷ Dios chimondo ibatenda que oso Cornelio recha cote ra. Cornelio que ñumumba cote ra. Jenyu, i que ngũimba nyeremo je ra. Aque mii soldado je abe no. Ae rei Cornelio raarõsa. Ae que ndua ndua bei quia Dios rese ra. ⁸ Ũquí je que Cornelio uquereicua nenei nenei ja ra. —Jêso Pedro reru Jope si, i que ee cote ra.

⁹⁻¹⁰ Isamami ngue Cornelio rimba ngasẽ Jope rurubi cote ra. Aque mose que Pedro chi tuchua arõ nda. Huee rei equesa no. Huee que Pedro chi ñee ñee Dios je ra. Tenda ibate mose que Pedro riãcuã nda. Echĩurã ngue uchi ãte ra. Nyebe que uque u ra. Uchiurã naa mose. Equereicua ngue cote ra. ¹¹ Ibei que nyiequia ee cuu ra. Tiru icoi que tu ibei si ra. Tiru chimangũiana isi ji que tu nguichi ee cuu ra. Echimangũiana isi ji ja. ¹² Mbae tubiriã ngue tu nguichi tiru icoi y e ee cuu ra. Mbae chumumbara tuchi. Quiaa riinda ja. Mbei abe n o. Nguireĩ abe no. Mbae ibi riinda ja tuchi que chi tiru ye cuu ra. ¹³ Pedro que echẽẽ mo ñandu cote ra. —Ehuã na, Pedro. Emo eiquia ndechiurã, i que ra. ¹⁴ —Tei, Sererecua. Urechiu eã ño ã ndesẽ. ã mo ngue ureu eã mbei quia ra. Mbaeiaee tuchi ure je judíos ja je, i que Pedro ee ra. ¹⁵ Dios que ñeembe ee ra. —¿Sẽchimee ndechiurã nda ereisiteãchĩ jẽ! i que ra. ¹⁶ Eĩ si que tiru icoi ru tres veces ra. Mbae chumumbara ra ja resebe. Tiru que oso bei ibate cote ra.

¹⁷ Pedro que ñumumba cote ra. Ndua ndua tuchi que uquereicua ndese ra. Aque mosete que Cornelio rimba ngasẽ nda. —¿Ma Simón chuchua ma nde? i que ngasẽ nda. ¹⁸ —¿Simón Pedro riqui a re? i que ra. ¹⁹ Pedro qu e ndua ndua beite quia uquereicua ndese ra. Nyebe Espĩtu Turã ñee nguiã ee. —Mbia tres ngaẽ nguia nderequia co. ²⁰ Equichi. Eso rã erese. ¡Siquicheã oso erese jẽ! Se chõ ngue ambu nderea resẽ, i que Dios Pedro je ra. ²¹ Pedro que nguichi u ee cote ra. Cornelio rimba je. —Serequia chõ jenyu nguiã co. ¿Mbaerã jẽingo serequia re? i que Pedro ra. ²² —Cornelio quia urembu nguiã nderea co. Ae rei soldados rerecua turã. Judío chiua tuchi que ae ra. Eturãte eriqui Dios je co. Angel que oso ñee Cornelio je ra. “Mbia emondo rã Pedro reru sacuí. Pedro cheẽ echandu rã”, i que ángel Cornelio je ra, i que Cornelio rimba Pedro je ra. ²³ —Jenyu rã ique. Jengue a, i que Pedro ee ra. Isamami ngue Pedro oso erese cote ra. Jesús quiato Jope jenda abe que nyoĩ erese ra. ²⁴ Isamami ngue ngasẽ Cesarea cote ra. Cornelio que esaarõ arõ nguia

huee ra. Nguesenda rese que eriqui eraarõ arõ nda. Nguiirĩ abe rese que eriqui eraarõ arõ nda. —Jenyu Pedro raarõ serese. Echeẽ andu sacua, i nda nguesenda je nyii ra. ²⁵ Pedro que ngasẽ oso Cornelio chuchúaa ra. Cornelio que oo erese ra. Aquere que ngoi ngúia ndese ñee ñee ee ra. Ibatenda Pedro riqui rei nguiã Cornelio je. ²⁶ Pedro que ñee ee ra. —Ehuã ra. Dios eã ño se re. Nderã si chõ se re. Mbia chõ se re, i que Pedro ra. ²⁷ Ñee ñee ñee equia nyue cote ra. Nyoj que ique mbia tubiriãsa cote ra. ²⁸ Pedro que ñee ñee ñee ra. —Se rei judío. Judío siqui aronea ndaque mbiamo ndese. Judío ique aronea mbiamo nyuchúaa. Ñquĩ jẽicua raque quia ã. Dios que ñee seje cuu ra. Dios que sembaaquiату cuu ra. “Mbiamo abe que eturãte riqui ra. Mbiamo ndese abe eico jiri”, i que Dios seje ra. ²⁹ Nyebe achu jei nguiã ndecheẽ mose co. ¿Mbaerã “echu” ere seje re? i que Pedro Cornelio je ra.

³⁰ Cornelio que ñee ee cote ra. —Hue tenda bei aico ñee ñee Dios je co. Tenda nyesecco mose aico bei ñee ñee Dios je co. Se cheẽ mose que ibatenda mo ndu seje ra. Angel. Tu que seje hace cuatro días ra. Tirushĩ tuchi que ecunua nda. ³¹ Ibatenda que ñee seje ra. “Cornelio, Dios ndecheẽ ñandu bei quia co. Dios mae mbei quia nderese co. Mbae mee ndese mbaecha reã je eriqui mae co. Dios riqui ndeicuate co. ³² Mbia mo emondo rã Jópee. Hua Simón Pedro ndiqui hue. Hue eriqui Simón Curtidor chuchúaa hue. Ama ndisha rimiã ndese eriqui hue. Sã nderimba mo erurucuaẽ aa”, i que ángel seje ra. ³³ Nyebe serimba amondo jei nderea. Coche erechu nguiã seje aa. Ndecheẽ andu sacua ño urecu nguiã aa. Dios cheẽ esenei na ure je cote. Ae Dios mondo ndeje, erenei sacua ure je, i que Cornelio Pedro je ra.

³⁴ Pedro que ñee ee cote ra. —Judíos achõ je eã ño Dios turã ndiqui reaẽ. Mbiamo abe chõ ebi riqui reaẽ. ³⁵ Mbiamo abe ireĩ ireĩ chĩ nguiã Dios si re. Ibimo jenda re. Ñquĩ siqui turã ño nguiã Dios je reaẽ. Nyebe Dios abe eturã ndiqui ñquĩ je reaẽ. Judíos achõ eã ndaque. ³⁶ Dios que ucheẽ turã mondo judíos je ra. Dios cheẽ turã ngue tu Jesucristo rĩñ nda. Ae rei aba mbiasa. Jesucristo rei mbia rerecu tuchi. ³⁷ Judío recua ja que Dios cheẽ turã ndiqui ã ndesẽ. Juan Bautista reco mose que Dios cheẽ ngasẽ judíos ja je ra. Juan Bautista que Dios cheẽ senei senei Galilea ra. Aque mose rane ngue Dios cheẽ ngasẽ judíos ja je cote ra. Ñquĩ jẽicua tuchi quia ã ndesẽ. ³⁸ Jesús siqui turã jẽicua quia resẽ. Jesús Nazaret jenda siqui turã mbei. Dios que Jesús mbuquirãcuã Espiritu Turã je ra. Dios que siqui tuchi erese ra. Nyebe eriqui nguiã mbae turã naa naa. Nyebe eriqui nguiã aba checuayã icuã jea jea mbia si. Ñquĩ jẽicua quia ã ndesẽ. ³⁹ Jesús chĩmbaquiату chõ ureico nguiã ã. Jesús chisaã ndese que ureico mae mae huee ra. Judea rui ja. Jerusalén abe que ureico mae mae echisaã ndese ra. Huee Jesús reco mose que mbia eiquia cote ra. Huee que mbia embucha ira rese ra. Eiquia sacua. ⁴⁰⁻⁴¹ Dios que Jesús mbuquera si cote ra. Tres días mose. Dios que Jesús mbuchecua ure je cote ra. Mbia ja je embuchecua. Ure je achõ ngue embuchecua ra. Uchiirabo achõ je. Jesús renei nenei sacua ngue Dios ureirabo ra. Urequiaru que Jesús rese ra. Jesús quera ico. Mbae mo abe que urembei erese ra. ⁴² Jesús que uremondo mbia mbiirandu randu sacua ngũñ nda. “Secheẽ turã jẽsenei senei nguiã mbia je. ‘Dios que Jesús mĩñ nda. Mbia mano je icuã ndea sacua. Manoã je abe icuã ndea sacua. Jesús r a eicuã tea ja’, jenyje quia mbia mbiirandu”, i que Jesús ure je ra. ⁴³ Dios cheẽ mbuchecua ja que embesa mbesa Jesús rĩñ cose ra: “Dios turã nda eriqui Jesús icuasa je. Dios ra Jesús icuasa icuã mbutiã tiã esi”, i que Dios cheẽ mbuchecua ra, i que Pedro Cornelio je ra.

Espíritu Turã ique judíos eã chianguí re

⁴⁴ Pedro cheẽ mose que Espiritu Turã ndu ique eandusa chianguí re ra. Eandusa chianguí re ja ique. ⁴⁵ Pedro resenda judíos que nyuruira tuchi ra. —Judíos eã je abe chõ Dios riqui Espiritu Turã mondo mondo re, i que judíos Jesús quiato u nyuruira ra. ⁴⁶ Judíos eã ngue mbiamo ñee saã saã nda. Espiritu Turã ique mose echianguí re. Ñee turã ja Dios rĩĩ. Nyebe judíos ñee. —Ã ñiangui re abe Espiritu Turã iquechĩ. Judíos eã ndaque, i que eandu ra. Pedro que ñee nguesenda je cote ra. ⁴⁷ —Espiritu Turã ngue ique echianguí re cote ra. Nyebe bautizar tae ee i je cote. Emo nda seriquisãyã, i que Pedro ra. ⁴⁸ Nyebe que Pedro bautizar i ee ra. Jesucristo rimbarã ngue bautizar i ee ra. Aquereque ñee ja Pedro je ra. —Eitõ mocoĩ jiri quia ure rese aa, i que ee ra.

11

Pedro Jerusalén jenda mbiirandu ja

¹ Jesús chĩmbaaquiato que jirandu erese ra. Judíos eã ndese. Jesús quiato Judea jenda abe que jirandu erese ra. —Judíos eã abe riqui Dios cheẽ isi isi ã, i que mbia ee ra. ² Pedro que oso Jerusalén cote ra. Huee que judíos ñee asi asi ee cote ra. ³ —Mbiamo je ereso chõchĩ. Judíos eã je ereso chõchĩ. Judíos eã ndese ereiaru chõchĩ, i que ñee asi Pedro je ra. ⁴ Pedro que embiirandu tuchi cote ra. ⁵ —Emo mose que aico Jope ra. Huee que aico ñee ñee Dios je ra. Mbae mo ngue atea cuu ra. Tĩru icoĩ mo ngue tu ibate si cuu ra. Echimangũiana isi ji que tu nguichi seje cuu ra. Echimangũiana isi ji ja. ⁶ Mbae chumumbara tuchi que tu aque tĩru ye cuu ra. Quiaa rĩinda ja. Mbei abe no. Nguireĩ abe no. Mbae ibi rĩinda ja tuchi que chĩ tĩru ye cuu ra. ⁷ Echeẽ mo ngue tu seje cote ra. “Ehuã na, Pedro. Emo ei quia ndechiurã”, i que seje cuu ra. ⁸ “Teĩ, Sererecua. Urechũ eã ño ã ndesẽ. Ã mo ngue ureu eã mbei quia ra. Mbaeiaie tuchi ure je judíos ja je”, ae rei que ee ra. ⁹ Dios que ñeembe seje ra. “¡Sechimee ndechiurã nda ereisi teãchĩ jẽ!” i que seje ra. ¹⁰ Eĩ si que tĩru icoĩ ru tres veces ra. Oso bei que ibate serecha cote ra. ¹¹ Aque mosete que Cornelio rimba ngasẽ seje ra. Seruruchoĩ sacua ngue euaẽ Cesarea si ra. Tres que ngaẽ seruruchoĩ sacua nda. ¹² “Eso rã erese. ¡Esiquicheã oso erese jẽ!” i que Espiritu Turã seje ra. Ã nanderesenda seis que nyoĩ serese ra. Urecuasẽ ngue emondosa chuchua ra. Cornelio chuchua. ¹³ Cornelio que uquereicua senei ure je ra. “Angel mo ngue tu ñee seje ra. ‘Mbia emondo Jópee Simón Pedro rea. ¹⁴ Ae ra ñee ñee nguia jẽje. Ndechuchua jenda je abe ra eriqui ñee ñee. Dios jendiro sacua jẽicua si’, i que ángel seje ra”, i que Cornelio seje ra. ¹⁵ Se ñee namo mose ee que Espiritu Turã nguichi ee ra. Ique que echianguí re ra. Ique que nandechianguí re nyii nae, eĩ si que ique Cornelio chianguí re cote ra. Cornelio chuchua jenda chianguí re abe. ¹⁶ Jesús cheẽ ndese que andua ndua cote ra. Ã ndei echeẽ ã: “I je que Juan bautizar i rei mbia je ra. Espiritu Turã je bautizar tae jẽje cote”, i que Jesús cose ra. Aque rese que andua ndua cote ra. ¹⁷ Nande judíos achõ je eã ño Dios riqui nguia Espiritu Turã mondo. Judĩ eã je abe chõ eriqui nguia Espiritu Turã mondo. Jesús icua mose. ¿Mañi ae ra Dios riquisã se re? i que Pedro ñee oco judíos je ra. ¹⁸ Mbia que Pedro cheẽ sobeshiãte ra. Ñee turã turã ngue Dios je cote ra. —Dios judío eã abe mbui mbui quiato quia huicua si reaẽ. Judío eã abe chee ra siqui bei Dios rese nye, i que judíos ra.

Antioquía jenda Jesús quiato

¹⁹ Mbia icuã tuchi que eriqui Jesús quiato je cote ra. Esteban iquia mosebe bei que mbia icuã ndiqui Jesús quiato je ra. Nyebe Jesús quiato choi nguiã uchã Jerusalén si. Emo nyoí Feníciaa. Emo nyoí Chipre no. Emo nyoí Antioquía no. Huee ja que echí Jesús cheẽ turã nenei nenei nda. Judíos achõ je que echí erenei nenei nda. Judío eã je erenei nenei eã. ²⁰ Chipre jenda rei emo. Cirene jenda rei emo no. Ũquĩ nguia que nyoí Antioquíaa ra. Ũquĩ nguiatu que Jesús cheẽ senei senei judío eã je ra. ²¹ Dios quirãcuã ngue siqui tuchi embiirandusa rese ra. Nyebe que hue jenda tubiriã Jesús icua ra. ²² Jesús quiato Jerusalén jenda que jirandu erese ra. Antioquía jenda rese. Nyebe Bernabé mondo Antioquíaa. ²³ Bernabé que ngasẽ ñee Jesús quiato je ra. —Dios turã tuchi riqui nguiã jêje co. Aque rese seyate riqui co. jêingo tuchi nanderereca rese jê! jêhuichĩ nda esi jê! i tuchi que Bernabé quia mbia je ra. ²⁴ Bernabé turãt e que eriqui ra. Espíritu Turã ngue siqui tuchi erese ra. Ae que Dios icua tuchi quia ra. Nyebe mbia tubiriã ndiqui nguiã Jesús isi isi. ²⁵ Aquere que Bernabé si Tarso ra. Oso que Saulo requia huee ra. Tea que ra. Nguerao que Antioquíaa ra. ²⁶ Huee que echí bei Jesús quiato mbaaquiātu quiatu ra. Un año que echí huee ra. Mbia tubiriã mbaaquiātu quiatu bei. Hue jenda je rane ngue “Cristianos” i Cristo quiato je ra.

²⁷ Aque mose que Dios cheẽ mbuchecuaa mo ngaẽ Antioquíaa ra. Ngaẽ ngue Jerusalén si ra. ²⁸ Emo ngue juã ñee mbia je ra. Agabo, i que ee ra. Espíritu Turã ngue Agabo mbucheẽ ñee nda. —Mbia chiurã eã nda namo jiri. Mbia riãcuã ja ra cote, i que Agabo ra. Echeẽ nguire tuchi que mbae ua cote ra. Mbia riãcuã tuchi que cote ra. Claudio mbia rereca mose. ²⁹ Nyebe Jesús quiato Antioquía jenda ñee ñee nyue. —Mbae mo nandemondo rã Jesús quiato Judea jenda je. Nandembae mbae mo nandemondo ee, i que nyue ra. ³⁰ Eĩ ngue umbae mondo mundo Judea jenda je ra. Mee mee ja que Saulo je ra. Bernabé abe je. Ũquĩ ngue ecuruchoi cote ra. Ae emee nguiã Jesús quiato rerecua je. Judea jenda.

12

Mbia Jacobo iquia; mbia Pedro tarõ

¹ Aque mose que ererecua icuã tuchi riqui Jesús quiato je ra. Herodes, i que ererecua je ra. ² Ae que Jacobo ãquĩ ndoso ti quise je ra. Jacobo rei Juan nongue. ³ Judíos ia tuchi que Jacobo ãquĩ ndoso mose ra. —Judíos tambiabe no, i que ererecua ra. Nyebe Pedro abe isi nguiã. Fiesta de Pascua mose que Pedro isi nguiã. ⁴ Tarõ ngue mi mbia icuã tarõsaa ra. Diez y seis soldados que chi eraarõ mbei ra. —Pedro tamee je mbia je. Eiquia sacuã. Fiesta ua mose r a amee ee, i rei que ererecua uchiangui re ra. ⁵ Nyebe que soldados Pedro tarõ ji raarõ tuchi u ra. Pedro resenda que ñee ñee tuchi Dios je ra. Jesús quiato mo. Ñee ñee tuchi que equia Pedro rĩ ee ra.

Dios Pedro sirõ nyecuayã etaronda si

⁶ Isamami nda ererecua Pedro mee nguiã mbia je chã nde. Eiquia sacuã. —Isamami nda amee mbia je, i rei que Herodes ra. Aque isa que Pedro uque u soldados joõ ñi nda. Ecua ji que uque u ra. Cadenã nyeremo je que ecua ino nda. Soldados nyeremo ngue uqueã u eraarõ nda. ⁷ Ibatenda mo ngue tu Pedro je isa ra. Angel. Nyaashĩ na tuchi que tuchua ra. Mbae resae ja. Ibatenda que oco Pedro rese ra. Emumba. —jEhuã asi jê! i que Pedro je ra. Ehuã mose que cadenas nyera eo si ra. ⁸ —Ndeirao emingue ja rã. Ndeiyao

abe emingue, i que ibatenda ee ra. Ae que Pedro emingue echeẽ mose ra. —Ndeirao aronda abe emingue. Nyao serese cote, i que Pedro je ra. ⁹ Pedro que oso erese ra. Etaronda si que Pedro rerao cote ra. —Seque re chõ aico rei co, i rei que Pedro ra. Equereicuã eriqui reĩ nguiã ee. ¹⁰ Eraarõsa cuaãcuã ngue echoi quia ra. Eraarõsa jiranua tuchi erese. Ngasẽ nyee que etaronda icoi ra. Fierro que etaronda ra. Etaronda a e que nyeequia ee ra. Usẽ ngue ra. Pe jiri que ehoi nyiese ra. Ibatenda que oso Pedro recha cote ra. ¹¹ —Cu u eã ño eriqui re. Echecua chõ eriqui re, i que Pedro eicua cote ra. —Dios chõ ibatenda mo mbu serirõ sacuí nde. Serirõ ño equia Herodes si re. Judíos ra seiquiyã cote, i que Pedro uchiangui re ra.

¹² Pedro que ndua ndua huĩ nda. Ae esi nguiã María chuchúaa. María rei Juan Marcos si. Mbia tubiriãte que chi ñumunua huee ra. Ñee ñee ngue u Dios je ra. ¹³ Pedro que ngasẽ eiquesa mbuu mbuu ra. Nyucuaaque mo ngue oso rei ee ra. Rode, i que ee ra. ¹⁴ Pedro cheẽ ngue eicua ra. Eya tuchi que nyebi asi oso mbia mbiirandu ra. Eiquesa equia rocoĩ Pedro je. —Hue Pedro ñi taicuee hue, i que embiirandu ra. ¹⁵ —Tei. Echeẽ ñooñoa na, i chõ ngue mbia Rode je ra. —Ae beite. Acheẽ ñooñoa ño jêje re, i tuchi Rode. —Pedro eã ño ñene. Eãingue chõ ñee ndei ndeje, i ja rei que mbia nyucuaaque je ra. ¹⁶ Eiquesa que Pedro mbuu mbuu bei huĩ mbia je ra. Emo ngue oso cheete rei equia ee ra. Pedro que ique cote ra. Ñumunua je que nyuruira tuchi mae erese ra. ¹⁷ Pedro que mbia mbuquiri o je ra. Mbae que esenei ja ee cote ra. —Eĩ ngue Dios serirõ setarõsa si ra, i que erenei nenei ja ee ra. —Jacobo jembiirandu ja rã serese. Jesús quiato ja jembiirandu, i que Pedro ra. Pedro que oso mbia recha cote ra.

¹⁸ Isamamimbe que soldados pare pare i tuchi ra. Pedro oreã ndese mae. —¿Mañi Pedro usẽ nde? i que u ñee ñee nyue ra. ¹⁹ Herodes que ñee nda. Ererecua. —Pedro jendu rã seje, i rei que soldados je ra. Pedro oreã ngue ee ra. —Sembiirandu ja rã se. ¿Mañi Pedro si usẽ nde? i que ererecua soldados je ra. Soldados que eicuayãte ee ra. Nyebe que ererecua soldados iquia nguiã. Pedro raarõsa iquia ja. Aquere que Herodes si siri Cesaréaa ra. Judea si siri.

Herodes mano

²⁰ Herodes que mbia chiurã mondo mondo Tiro jenda je nyii ra. Sidón jenda je abe no. Paama i que ee cote ra. Nyebe echiurã mondo monoa ee cote. Nyebe que ùqui nyoĩ ja Herodes chuchúaa ra. —iNandeturã mbei chõ ee jê! † nda nandechiurã mondobe nande je, i que nyue ra. Herodes resenda mo ngue ñee turã ee ra. Blasto, i que aque je ra. —Echeẽ turã turã Herodes je ure rĩ. † nda eturambe ure je, i que mbia Blasto je ra. ²¹ Emo mose jiri que Herodes huĩrao turã mingue ra. Ngoi que ngũenda icoi tose ra. Jenyu seje, i que Tiro jenda je cote ra. Sidón jenda je abe no. Herodes que ñee ocote ùqui je cote ra. ²² Mbia abe que ñeete ee cote ra. —Dios chõ nde resẽ. Dios cheẽ na si nde. Mbia cheẽ na eã, i que mbia Herodes mbucuasuu i ra. ²³ —Dios eã ño se re, i eã mbei que Herodes mbia je ra. Ñee turã eã ngue equia Dios rĩ nda. Nyebe Dios embasi nguiã. Nyebe Dios ángel mo mbu nguiã Herodes mbasi tuchi. Erosei que erie u ra. Eiquia nonde. Mano ngue cote ra. ²⁴ Jesús quiato que Jesús cheẽ senei senei tuchi quia ra. Mbia tubiriã ngue echandu chandu quia ra. Mbia tubiriã ngue Jesús icua icua quia cote ra. ²⁵ Bernabé que nyoĩ Jerusalén nda. Saulo rese. Mbae isiquia ruruchoi sacuí. Mbae isiquia que emee mee Jesús quiato hue jenda je cot e ra. Nyoĩ que Antioquíaa cote ra. Juan Marcos abe que ecuruchoi nyiese ra.

13

Espíritu Turã Bernabé mondo Dios cheẽ nenei nenei sacua, Pablo rese

¹ Jesús quiato que ñumunua nua nguia Antioquia jenda ra. Mbia mbaaquiato quiatusa abe que chi erese ra. Dios cheẽ mbuchecuaasa mo abe que chi erese ra. Bernabé, i que emo je ra. Simón nonde i abe que ra. Lucio de Cirene abe que ra. Manaén abe que ra. Ae rei que Herodes resenda eñetẽ mose ra. Herodes ererecua nonde. Saulo abe que ra. Uqui ja que mbia mbaaquiato quiatusa ra. ² Emo mose que uqui nyi ñumunua nda. Ñee ñee ngue u Dios je ra. Uchiu si que hui ra. Ndua ndua sacua Dios rese. Aque mose que Espiritu Turã ñee ee ra. —Bernabé jemee na seje. Saulo abe jemee na seje no. Uqui ngue airabo ra. Airabo que secheẽ nenei nenei sacua nda, i que Espiritu Turã ñee ñumunua je je ra. ³ Mbia que ñee turã mbei Dios je ra. Quiaruã mbei que u ra. O que echono ñono Bernabé aquí ndese cote ra. Saulo aquí ndese abe no. Mondo que Dios cheẽ nenei nenei sacua cote ra.

Pablo Dios cheẽ senei senei Chipree, Bernabé rese

⁴ Aquere que Espiritu Turã Bernabé curuchoi Selúciaa ra. Saulo rese. — Ama ndui nyao Chipre, i que ua canoa cuasu ye ra. ⁵ Ngasẽ ngue sucha tubiriã Salamina nda. Salamina ndei Chipre jenda mo. Judíos chumunuasaa que echoi Dios cheẽ nenei nenei nda. Juan Marcos abe que siqui erese Dios cheẽ nenei nenei nda. ⁶ Tuchua que embuchesea sea tuchi ra. Ngasẽ nyee Pafos. Huee que brujo mo ndiqui ee ra. Barjesús, i que brujo je ra. Judío mo ndei aque brujo. —Dios cheẽ mbuchecuaasa rei se, ichõiño mbei que equia mbia je ra. ⁷ Brujo que siqui ererecua rese ra. Sergio Paulo, i que ererecua je ra. Ererecua aquiato tuchi que ra. —Jenyu, Dios cheẽ tachandu rã, i que ererecua Bernabé je ra. Saulo je abe no. ⁸ Brujo que Bernabé cheẽ siquisã nda. Pablo cheẽ abe riquisã. —I nda sererecua Jesús icuayã, i tuchi brujo uqui ñee ndiquisã. Elimas, i abe que brujo je ra. ⁹ Espiritu Turã ngue siqui tuchi quia Pablo rese ra. Pablo, i abe que equia Saulo je ra. Pablo que ma e quiatu brujo rese ra. ¹⁰ Ñee ngue ee ra. —Mbia mbiiri irisa tuchi quiarei nde. Diabolo resenda tuchi quiarei nde. Mbae turã ndesenda reã tuchi quiarei nde. ¿Mbaerã ereico mbia riquisã quisã Dios icha si re? ¿Manose ra erehu i uqui si re? i que Pablo ñee icua ee ra. ¹¹ —Dios ra nembasi tuchi cote. Nderesayra cote. Tenda rese ra ereico mae eã are jiri, i que Pablo brujo je ra. Echeẽ mosebe que eresa uque tuchi ra. Mae eã mbae rese cote. —Jenyiba taisi. ¡Sembucuata turã na nguia jê! i tuchi eresayã nguia mbia je cote. ¹² Ererecua que echandu ja ra. Nyebe ngue Jesús icua nguia cote. Nyuruira tuchi que hui Jesús cheẽ andu ra.

Pablo que siqui Antioquiaa ra; Bernabé rese

¹³ Pablo que nyo i Pafos recha cote ra. Nguesenda rese que echoi ama ndui ra. Ngasẽ ngue Perge de Panfíliaa ra. Huee si que Juan Marcos si nyebi Jerusalén nda. Pablo recha. Bernabé abe recha. ¹⁴ Emo mose que echoi Perge si ra. Ngasẽ ngue sucha tubiriã Antioquiaa ra. Pisidia, i que hue ibi je ra. Sábado mose que ique judíos chumunuasaa ra. Huee que echi ngoi ra. ¹⁵ Judíos que leer i Dios cheẽ je ra. Moisés chimbesa je. Dios cheẽ mbuchecuaasa chimbesa je abe no. Aquere que judíos ñee Pablo je ra. Bernabé je abe no. —¿Mbia ra jembaaquiato quiatu jê nde? i que ee ra. ¹⁶ Pablo que juã cote ra. O je que mbia mbuquiriri ra. Ñee ngue ee cote ra. —Seandu rã se, Israelitas. Seandu rã se, Dios quiato. ¹⁷ Dios que Israelitas rerecua ra. Dios que

nanderamei cose ndare irabo ra. Siqui tuchi que equia nanderamei ndese ra. Nanderamei chi mose Egipto. Dios que nanderamei mbeta mbeta ra. Dios quirãcuã ngue nanderamei sirõ nyee Egipto si ra. ¹⁸Dios que nyecuachõ tuchi quia nanderamei je ra. Cuarenta años que eriqui nyecuachõ tuchi ra. Nanderamei chi mose turuquia. ¹⁹Sucha tubiriã jenda que mano ja mbiamo nda. Dios que eiquia ja ra. Siete rei sucha tubiriã. Canaán jenda. Dios que ùquĩ iquia ja nanderamei si ra. Ùquĩ mbae ibi que Dios mee nanderamei je cote ra. ²⁰Dios que jueces mii mii nanderamei nderecuarã cote ra. Jueces que emii mii nguia cuatro cientos cincuenta años nda. Aquere que Dios Samuel ñee nanderamei nderecuarã nda. ²¹Aquere que nanderamei ñee Dios je ra. “Rey mo nguia emii urererecuarã”, i que Dios je ra. Nyebe que Dios Saúl mii ererecuarã nda. Rey. Ae rei Cis ririĩ. Cis rei Benjaminito. Saúl que siqui arete nanderamei nderecuarã nda. Cuarenta años que eriqui ererecuarã nda. ²²Cuarenta años ua mose que Dios Saúl mombo cote ra. Dios que David mii nanderamei ndere cuarã cote ra. Saúl rendaque re. David rei Isai ririĩ. Dios que ñee David je ra. “David sebi tuchi. Ae quia ra secheẽ mumba mumbayã”, i que Dios cose ra. ²³David sí que Jesús ramei nda. Dios que Jesús mbu Israel jenda rirõ sacua huicua si ra. Ucheẽ nguire que Jesús mbu ra. Dios que ucheẽ mbuchebiã nda. ²⁴Jesús tu nonde que Juan Bautista riqui ñee ñee nanderamei je ra. Israel jenda je. “Jëicuã si jëhui. Jemba Dios ichã rui. Ì nda bautizar ae jêje”, i tuchi que Juan nguia mbia je ra. ²⁵Umano nonde que Juan ñee mbia je ra. “Ae jësaarõ nguia nae, ae eã ño se re. Ae ra tu serui. Ae rei ererecu tuchi sesi. Se oco aronea eiyao rese”, i que Juan ñee Jesús rii nda.

²⁶Seresenda, Abraham ndiiriĩ ndei jë. Jemo ndiqui Dios icua ã. Nande je quia Dios ucheẽ mundo nguia. Nanderirõ sacua nandeicua si. Dios que Jesús mundo nande je ra. ²⁷Jerusalén jenda que Jesús icuayãte ra. Ererecu ja que chi Jesús icuayãte ra. Dios cheẽ mbesa ji abe que eicuayãte ra. Eraã naa mbei raque sábado mose, eicuayã mbei. Dios cheẽ mbuchecuasa cheẽ nguire que Jesús iquia ra. ²⁸“Jesús eiquia rã”, i tuchi que mbia quia Pilato je ra. Jesús icua eã ndaque. ²⁹Nyebe que Jesús mano ndei ra. Embesa ji cheẽ nguire que Jesús mano nda. Jesús raque que embuquichi ira si cote ra. Ñono ngue sita ribicoi ji ye ra. ³⁰Jesús que quera si manonde cote ra. Dios que embuquera si ra. ³¹Galilea jenda que siqui bei quia Jesús rese Jerusalén nae, ùquĩ ngue mae mae equera si rese cote ra. Mae mae mbei equia Jesús quera si rese cote. Ùquĩ ñee mbei quia Jesús rii ã cote. ³²A ureico Dios cheẽ turã nenei nenei jêje a. Dios ñee ñee nguia nanderamei je nyii nae, ùquĩ uresenei senei nguia jêje a. ³³Nande je que Dios Jesús mbuquera si ra. Ucheẽ nguire que embuquera si ra. Dios ñee ñee nguia nanderamei je nyii nae, eĩ si que Jesús mbuquera ra. “Nde rei serucucha. Namo ngue arembuchecua mbia je ra”, i que Dios Jesús rii cose ra. Eĩ ngue Salmo dos nda. ³⁴Dios que Jesús mbuquera si ra. Jesús roo ra soõ eã mbei cote. Nyebe que Dios ñee nyii ra. “Seturãte ra jêje. Seturã David je nyii nae, eĩ si ra seturãte jêje”, i que Dios ra. “Jesús tambuquera si jêje”, i ñene. ³⁵Co abe rei embesa ji. ã ndei e ã: “Se rei Ibatenda rucucha turã. Ibatenda ra seroo sechayã. Seroo ra emoo eã. Sembuquera si rae”, i que embesa ji ra. ³⁶David que siqui turã mbei quia uchabenda ja je ra. Dios cheẽ nguire que eriqui turã ee ra. Aquere que mano nda. Mbia que echati ngãmei jii rii nda. Aquere que David roo soõ cote ra. ³⁷Jesús roo quiatu que soõ eã nda. Dios que embuquera si resẽ. Nyebe ae roo soõ eã nguia. ³⁸Seresenda,

Jesús m̄i ndiqui nandeicuã mbutiã sacua co. A ureico ũqui nenei nenei jê je a. Jêirandu sacua erese. ³⁹ Dios que ucheẽ senei senei nguia Moisés je nyii nae, aque cheẽ nguia r a aba icua mbutiã eã. Jesús m̄i ndiqui nandeicuã mbutiã sacua co. Nande Jesús icua mose. ⁴⁰ “Mbae icua nda tuchi jê je”, i que Dios cheẽ mbuchecuasa ra. Jêtesa bei u jê. Sã Dios cheẽ mbuchecuasa io eã jê je. Eĩ ngue Dios cheẽ mbuchecuasa ra:

⁴¹ Co jê, mbae turã ucuayãsa.

Je nyuruira rae. Jemano ndae.

Mbia mae sayã nda asaã ndaque jê je.

Jêicua sereãte ra equia.

Mbia embuchecua raque jê je. Nyebe ra jemano,

i que Dios cose ra, i que Pablo ra.

⁴² Pablo que usẽ nyoĩ echumunuasa si cote ra. —Jenyube rã sãbado nongue.

Ũqui jêsenei seneimbe rã u ure je, i que mbia ee ra. ⁴³ Mbia que usẽ ja echumunuasa si cote ra. Judíos tubiriã ngue nyoĩ Pablo rui ra. Bernabé rui abe no. Judíos resenda tubiriã abe no. Pablo que ñee tuchi mbia je ra. Bernabé rese. —Dios rese jêingo tuchi jê, i tuchi que equia ee ra.

⁴⁴ Sãbado nongue mose que sucha tubiriã jenda ñumunua ja ra. Ñumunua nua ja Dios cheẽ andu. ⁴⁵ Judíos mo ngue chi mae mae mbia chumunua ndese ra. —Pablo cheẽ ño echanduchi nguia. Nandechẽ andu rocoĩ, i que judíos ngueteã mbia rese Pablo si ra. Nyebe judíos ñee icua icua nguia Pablo je.

⁴⁶ Pablo que siquicheã tuchi ñee judíos je ra. Bernabé rese. —Jê nane je ureico rei Dios cheẽ nenei nenei ã. Dios cheẽ nguire ureico rei nguia erenei nenei jê nane je ã. Ibate jêingo bei sereã ñochĩ. Nyebe jêingo nguia Dios cheẽ isiteã teã ã. Nyebe ureso nguia erenei nenei judíos eã je co. ⁴⁷ ã ngue Dios ñee ure je cose ra: “Aremingo que secheẽ nenei nenei sacua mbia ja je ra. Judíos eã ja je. Mbia ibi jenda ja je. Secheẽ isiquia ra siqui bei?”, i que Dios ure je ra, i que Pablo ra.

⁴⁸ Judíos eã ia tuchi que Pablo cheẽ ndese ra. Ñee turã turã ngue Dios cheẽ n̄i nda. Dios que mbia irabo ata ra. Emingo bei sacua ibate. Ũqui ngue Jesús icua ja cote ra. ⁴⁹ Hue jenda ja que embucha mbucha quia Dios cheẽ nenei nenei nda. ⁵⁰ Judíos que mbia mbuqueta queta tuchi Pablo je ra. Bernabé je abe. Ari mbia chiicua mbuqueta tuchi que ra. Amei mbia chiicua abe mbuqueta que ra. Nyebe mbia paama i ja Pablo je. Bernabé je abe. Nyebe Pablo mombo nguia hue si. Bernabé abe mombo no. ⁵¹ Nyoĩ nonde que hui tubi mbutomo tomo mbia je ra. —Jêicua tẽicua, i ñe hue jenda je re. Æquere que echoi Iconio nda. ⁵² Jesús quiato ia tuchi que chi ra. Espiritu Turã ngue siqui tuchi quia erese ra.

14

Pablo que siqui Iconio nda, Bernabé rese

¹ Pablo que ngasẽ Iconio nda. Bernabé rese. Judíos chumunuasa que echoi ra. Dios cheẽ ngue esenei senei huee ra. Nyebe que judíos tubiriã Jesús icua ra. Judíos eã abe que eicua no nda. ² Judíos ataque que Jesús cheẽ isiteã teã no nda. Ũqui ngue judíos eã m̄bicua icua Pablo je ra. Bernabé je abe no. Ñee icua icua tuchi erĩ. ³ Pablo que chi arete huee ra. Bernabé abe no. Siquicheã tuchi que equia Dios cheẽ nenei nenei nda. Ebia tuchi Dios rese. Dios que embuquirãcua nda. Nyebe que eriqui mbia mae sayã naa naa nda. —Ichõiño eã ño equia re, i chee mbia Pablo cheẽ je. Bernabé cheẽ je abe no. ⁴ Mbia

cuabê ndua turã ja eã. Emo emo ngue siqui Jesús resenda rui ra. Emo emo ngue siqui judíos rui no nda. ⁵Nyebe judíos icuã icuã Pablo je. Pablo resenda je abe no. Judíos eã abe eicuã icuã ee no. Mbia rerecua abe que eicuã icuã ee ra. —¡Pablo nandei quia jê! ¡Bernabé abe nandei quia jê! ¡Sita nande mombo mombo erese jê! ¡rei que mbia ra. ⁶Pablo que jirandu erese ra. Bernabé abe. Nyebe ehoi uchã sucha tubiriã mo. Licaonia jenda. Listra, ¡sucha tubiriã mo je. Derbe, ¡emo je. Hue rurubi que ehoi ra. ⁷Hue jenda je que Dios cheê nenei nenei nda.

Mbia sita mombo mombo Pablo rese

⁸Ngasê ngue Listra ra. Huee que emo ngatayã ñi ee ra. Eitãquei mosenda bei ei icuã. Nyebe ngatayã mbei. ⁹Aque que Pablo cheê ñandu ra. —Sembucherô arô, ¡ndua uchiangui re. Pablo que eicua ra. Nyebe e mae nguaiat erese. ¹⁰Ñee nyecua que ee ra. —Ehuã ndei rese, ¡que Pablo ee ra. Ecuatayã ngue juã asi ngata cote ra. ¹¹Mbia tubiriã ngue chi mae Pablo chimbucherô ndese ra. Nyebe ucheê naa naa u nyue. Pablo rii ñee ñee. —Dios ngaê nguichi nande je mbia rã sí a, ¡rei que nyuruira ra. Tasê tasê. Licaonia, ¡hue jenda cheê je. ¹²Mercurio reï nda Pablo mbia je. Mercurio, ¡mbia umbae dios mo je. Pablo que ñee mbeite quia ra. Nyebe “Mercurio” ¡mbia ee. Jupiter reï nda Bernabé mbia je. Jupiter, ¡mbia umbae dios mo je no. ¹³Hue jenda que ñumunua nua nguia ñee ñee Jupiter je ra. Ae ñee ñee nguia Jupiter je, aque que ticuasú quimbae queru Pablo je ra. Ira uti resebe ereru ee. —Ticuasú nandei quia quia rã Pablo je. Nandesei sei ee, ¡ja que mbia ra. —Pablo rei Dios rã si. Bernabé rese. Nyebe ticuasú nandei quia quia rã ee. Dios raanguia je, ¡rei que mbia ra. ¹⁴Pablo que echandu ra. Bernabé rese. Nyebe huirao ndoro ndoro paama ¡ee. —Ureya eã jendese, ¡ñee ne. Ique que ehoi mbia ite ite rii nda. Ñee asi asi mbia je. ¹⁵—¿Mbaerã nda re, mbia? ¿Mbaerã nda ticuasú jêiquia ure je re? Mbia chõ ure re. Jê na si chõ ure resê. Dios eã ño ure resê. Nyebe urechu nguia Dios cheê turã nenei nenei jêje ã. ã mbae icuã jêsecha ja chõ. Dios quiarei ereco. ¡Ae rui jêingo! Ae que ibei chao ra. Ae que ibi chao no nda. Ae que ama nyao no nda. Ae que mbae chao ja ra. Mbae aosa rui jêingo. ¹⁶Dios que mbia teachõ cose ra. Mbia tesarei mose esi. ¹⁷Dios que eturã saã saã mbei quia mbia je ra. Mbi a eicua sacua. Dios chõ ama mbuchaacqui bei nguia nande je. Ae quia mbae a mee mbei nguia nandechiurã. Dios chõ nandembia mbia bei nguia co, ¡que Pablo mbia je ra. ¹⁸Ei ngue Pablo embiirandu Dios rese ra. Nyebe que mbia ticuasú quia eã nyee ee ra.

¹⁹Emo jiri mose que judíos ngaê huee ra. Antioquia si. Iconio si abe no. Uqui ngue mbia mbaicua icuã Pablo je ra. Nyebe que mbia sita mombo mombo tuchi Pablo rese ra. Pablo manote reï nguia ee. Mbia que ecuruchoi mbutiriri pe jiri sucha tubiriã si. ²⁰Hue que Jesús icuasa chi Pablo matãte hue ra. Pablo que juã quera cote ra. Osobe que nyebi sucha tubiriã nda. Isamami ngue esi Derbe ra. Bernabé rese. ²¹Dios cheê turã ngue esenei senei nguia huee ra. Derbe jenda je. Mbia tubiriã ngue Jesús icua hue jenda cote ra. Aquere que nyebi Lístrea ra. Iconioo abe. Antioquiaa abe. Huee sucha tubiriã ngue ehoi nyebi ra. ²²Pablo que Jesús icuasa mbaaquiatu quiatu hue jenda ra. Bernabé rese. —¡Jesús rese jêingo tuchi jê! Mbia ra nandembasi mbasi tuchi. Aquere ra Dios nandererecuarã tuchi cote, ¡que Pablo mbia je ra. Bernabé rese. ²³Amei mo ngue eirabo rabo mii ino huee ra. Jesús icuasa rerecuarã no hue. Ñumunua je rerecuarã jaaja. Aquere que hui uchiu si ra. Quiaruã. Ñee

ñee ngue equia Dios je ra. Ñee ñee ee ererecua namonda rĩ. — ã jẽingo Dios icuate ã. Sã Dios jendaarõ arõ, i que Pablo ererecuarã je ra. Bernabé rese.

Pablo ngãembe Antioquíaa, Bernabé rese

²⁴ Nyoĩ que erecha cote ra. Pisidia, i equia ibi je, hue rĩ ngue echoi ra. Ngasẽ ngue Panfilia no nda. ²⁵ Jesús cheẽ turã ngue esenei senei sucha tubiriã Perge jenda je ra. Aquere que echoi Atalia no nda. ²⁶ Hue si que echoi ama ndui ra. Nguique riita quiti que ecuã tiba Antioquíaa cote ra. Mbia hue jenda rane nguiatu que Pablo mondo Bernabé rese Dios cheẽ nenei nenei sacua nyii ra. — Chã Dios turã jendeaquiato jẽso mose, i que ee nyii ra. Huee que tiba obeĩ cote ra. ²⁷ Ngasẽ mose Antioquíaa, Jesús icuasa que emunua nua cote ra. Mbae ja que esenei tuchi ee ra. — Dios que urereaquiato tuchi quia ra. Dios que urembucheẽ ñee nguia judíos eã je ra. Dios que Jesús icua tuchi ee ra. Nyebe etubiriã ndiqui nguiã Jesús icua cote, ure echeẽ nenei nenei mose, i que Pablo ra. Bernabé rese. ²⁸ Chi arete que Antioquíaa ra. Jesús icuasa ja rese echi huee.

15

Jesús quiato rerecua ñumunua ja

¹ Judea jenda mo ngue ngaẽ Antioquíaa ra. Ngaẽ ngue Jesús icuasa mbaaquiato quiato icua nda. — Circuncisión jẽsaã saã ja. Moisés cheẽ nguire jẽsaã saã, i rei que Jesús icuasa je ra. Eracoĩ ire o ji je chõ eriqui nguiã circuncisión, i ùquĩ je. — Eĩ jenyee eã mose ra jẽsoã ibate, i rei que ra. ² — Teĩ, eĩ eã ñene, i tuchi que Pablo ee ra. Bernabé rese. — Ae beite. Pablo ñee ñooño nguiã, i tuchi Judea jenda. Nyebe ñee tuchi nguiã nyue circuncisión ñĩ. Nyebe Jesús icuasa mondochoi Jerusalén. Jirandu sacua circuncisión ndese. Pablo mondochoi. Bernabé abe no. Mbia mo abe no. Ûquĩ mondochoi ja. — Jẽso Jerusalén. Jeñee Jesús quiato rerecua je. “¿Circuncisión nda uresaã saã nde?” jenyee oso ee. Sã Jesús quiato rerecua ñee jẽje. Jenyu ñee ure je cote, i que ñee uchimondo je ra. ³ Jesús icuasa que embucuata turã cote ra. Mondochoi Jerusalén. Fenicia rui que echoi ra. Samaria rui abe no. Judíos eã je rese que hue jenda mbiirandu randu ra. — Judíos eã abe que Jesús isi isi quia cote ra. Judíos eã ngue hui hui quia hui cuã si cote ra, i que hue jenda mbiirandu randu ra. Jesús icuasa ia tuchi que eandu ra. ⁴ Pablo que ngasẽ Jerusalén cote ra. Bernabé rese. Nguesenda rese no. Hue jenda Jesús icuasa que eisi turã nda. Jesús quiato rerecua abe que eisi turã no nda. Pablo que Dios turã senei senei ee ra. — Dios quirãcuã ngue siqui quia ure rese ra. Ûre echeẽ naa naa mose, i que embiirandu ra. ⁵ Fariseos Jesús icuasa mo ngue juã ñee cote ra. — Judíos eã Jesús icua mose, circuncisión jẽsaã saã ee. Jeñee na ee. “Moisés cheẽ ndui jẽingo bei”, jenyee chõ ee, i rei que Fariseos ee ra.

⁶ Nyebe Jesús quiato rerecua ñumunua ja aque rĩ. ⁷ Ñee ñee tuchi nyue circuncisión ñĩ. Aquere que Pedro juã ñee nda. — Tacheẽ se, Seresenda. Dios que seirabo cose ra. Ucheẽ turã nenei nenei sacua judíos eã je. Ûquĩ Jesús icua sacua ngue seirabo cose ra. Ûquĩ jẽicuate quia ã. ⁸ Dios quia aba chiã icua jate nguiã co. Judíos eã je abe Dios Espíritu Turã mondo mondo cote. Nande achõ je eã emondo. Ûquĩ abe je emondo mondo Jesús icua mose no. “Judíos eã abe sequiato”, i ñee Dios re. ⁹ Judíos eã Jesús icua mose, Dios ùquĩ ñia mbiasu cote. Nande rã si. Nyebe Dios riqui nguiã judíos eã je abe siqui turã. Nande rã si. ¹⁰ ¿Mbaerã jẽingo Dios cheẽ abi abi chõ nde? Dios cheẽ

jembeta mbeta chõchĩ nguia re. Judíos eã je chõ jẽingochĩ embeta re. Embeta ji chĩ nda eãtã tuchi aba je cot e re. Ũquĩ nanderu cose ndare saã aroneate. ¹¹ Dios turã nguia nandemingo bei nguiaã ã. Dios turã nguia nandemingo bei nguiaã ibate. Nande Jesucristo icua mose. Dios turã nguia judíos eã abe mingo bei nguiaã ã no. Nande rã si no, i que Pedro ra.

¹² Pablo que mbae senei ja mbia je cote ra. Bernabé rese. Mbia tubiriã ngue quiriri cote ra. Nyiisaquia que Pablo cheẽ ndese ra. Bernabé cheẽ ndese abe. —Dios que urererao judíos eã je ra. Urembirãcuã tuchi que equia ee ra. Nyebe mbia mae sayã uresaã saã tuchi ee, i que Pablo ra. Bernabé rese. ¹³ Pablo cheẽ huire que Jacobo ñee cote ra. —Seandu rã se, Seresenda.

¹⁴ Pedro que ñee jêje namo nda. Dios turãte que judíos eã je ra. Dios que ũquĩ mo irabo rabo nguesendarã nda. Pedro que jembiiirandu erese namo nda.

¹⁵ Eĩ ngue Dios cheẽ mbuchecuaa embesa cosete ra. Nyebe eriqui nguiaã eĩ eĩ ã cote. ¹⁶ ã ndei embesa ji ã:

Se rei Dios. David reco mose que serimba siqui tuchi serese ra.

Aquere hui ja sesi cote.

Achube ra echia mbitirõ si cote.

Siqui si ra serese cote.

¹⁷ Judíos eã abe ra siqui serese cote.

Mbia sembaerã nda siqui ja serese cote,

i que Dios ra. ¹⁸ Eĩ ngue Dios ñee mbia mbiirandu cose ra, i que Jacobo ra. ¹⁹—

Judíos eã mo ngue Dios icua icua quia cote ra. ¡Nandechẽ nandembetayã jiri ee jê! ²⁰ ¡Nandechẽ mii ño nandembesa mondo ee jê! Nandechẽ mumbayã sacua. “Mbia soo mondo mondo mose dios raanguia je, ¡aque soo ra jẽuchĩ jê!” nande rã ee. “¡Jeninisi rese siqui rocoĩ nda jẽingochĩ emo ndese jê! ¡Jendu rese siqui rocoĩ nda jẽingochĩ emo ndes e jê!” nande chõ ee. “¡Eruqui resebe ra soo jẽuchĩ jê! ¡Mbae ruqui ra jẽuchĩ jê!” nande chõ ee. Ũquĩ mii nandembesa rã mondo ee. Nandechẽ mumbayã sacua. ²¹ Ũquĩ mii nande rã ee. Ũquĩ ño mbia ñandu ñandu mbei quia cose ndare bei. Mbia Moisés chimbasa saã saã sucha tubiriã ja je. Sábado mose bei. Judíos chumunua nua mose, i que Jacobo ra.

²²—Coche ñene, i ja Jesús quiato rerecua Jacobo cheẽ je. Jesús icuaa ja abe. Nyebe mbia nyeremo mondo Pablo rese. Bernabé rese abe. Silas, i que ee ra. Judas, i que enongue je ra. Barsabás, i abe que equia Judas je ra. Ũquĩ ndei Jesús quiato rerecua mo. Ũquĩ ngue emondo Antioquiaa ra. —Urecheẽ jêsenei senei Jesús icuaa hue jenda je, i que Jerusalén jenda ra. ²³ Jesús icuaa que ucheẽ mbesa mondo ee ra. A rei embesai a: —Ure rei Jesús quiato rerecua. Ure rei Jesús icuaa. A ureico embesa mbesa jêje a, Jesús icuaa. Judíos eã je. Antioquia jenda je. Siria jenda je. Cilicia jenda je. Saludos. ²⁴ Uresenda mo ngue nyoichĩ jembaaquiatu icua icuaã nda. Ũquĩ ñee jemingo asi asite rei. “Circuncisión jêsaã saã”, i chõchĩ equia jêje reaẽ. “Moises cheẽ ndui jẽingo bei”, i chõchĩ equia jêje re. Ũquĩ uremondo eã ñee jêje. Ae ae chõ nyoĩ nguiaã ñee ñoõno jêje. ²⁵ Nyebe ureico nguiaã ñumunua a. Emo ngue ureirabo emondo sacua jendea ra. Nyeremo uremondo quia aque. Pablo rese. Bernabé abe rese. Urequiatio tuchi que ũquĩ nda. ²⁶ Ũquĩ ireĩ ireĩ eã tuchi nyoĩ Jesucristo cheẽ nenei nenei. Mbia eiquia arondete raque. Siquicheã tuchi. ²⁷ Aque Judas uremondo quia jendea aque. Silas rese. Ũquĩ nda jembiiirandu ja. Ũquĩ nda urecheẽ senei senei jêje. ²⁸ Espiritu Turã ngue urembaaquiatu ra. Nyebe

ra urecheē tuchiã jêje. Echeē mumbayã sacua. ã mii ño uremondo quia jêje aque. ²⁹“Mbia soo mondo mose dios raanguia je, ¡aque soo ra jêuchi jê! ¡Eruqui resebe ra soo jêuchi jê! ¡Mbae ruqui ra jêuchi jê! ¡Jeninisi rese siqui rocoi nda jêingochi emo ndese jê! ¡Jendu rese siqui rocoi nda jêingochi emo ndese jê!” Coche ùqui jemumbayã nguiã. Aque mii ño urecheē urembesa mondo aque, i que embesa ra. Eĩ ngue Jerusalén jenda embesa ee ra.

³⁰ Uchimondo que emonchoi turã nda. Ngasē ngue Antioquiaa cote ra. Jesús icuasa hue jenda que emunua ja ra. Embesa ji que emee ee ra. ³¹ Echumunua mos e que leer i ee cote ra. Eya tuchi que erese ra. Eya tuchi Jerusalén jenda chimbese isi mose. ³² Dios cheē mbuchecuaa rei Judas. Silas rese. Nyebe que ùqui Dios cheē nenei nenei tuchi Jesús icuasa je ra. Jesús icuasa mbaaquiату quiatu tuchi. ³³ Chi are jiri que huee ra. Jesús icuasa que embuchebi turã monchoi cote ra. Nyo: que nyebi Jerusalén nda. ³⁴ Silas que siquichō nda. ³⁵ Pablo abe que siquichō Antioquiaa ra. Bernabé rese. Mbia que embaaquiату quiatu quia ra. Dios cheē turã ngue esenei senei nguia ra. Jesús icuasa tubiriã ngue esenei senei erese ra.

Pablo nyao Bernabé si

³⁶ Aquere que Pablo ñee Bernabé je ra. —Nyao nanderique rui Jesús icuasa mbuchesea sea mae ja erese. Dios cheē ngue nandesenei senei, hue jenda mbuchesea sea nyao. Mañi Jesús icuasa u mambi reae. Nyao erea, i que Pablo ra. ³⁷ —Eno. Juan Marcos abe nanderao, i rei que Bernabé ra. ³⁸ —Tei. Ae que nanderecha Panfiliaa nyii resē. Hui jei que nande si resē, nande Dios cheē nenei nenei mose. ¿Mañi nande ra ererao si re? i que Pablo ra. ³⁹ Ñee asi asi chee que nyue ra. Marcos ri. Nyebe que nyao nyesi ra. Bernabé que Marcos querao ra. Ama ndui que echoi Chípree ra. ⁴⁰ Pablo que ñee Silas je ra. —Nyao serese, i que ee ra. Jesús icuasa que ñee ee ra. —Chã Dios turã jendeaquiату bei jêso mose, i ja que ee ra. Pablo que nyo: cote ra. Silas rese. ⁴¹ Siria ri ngue echoi ra. Cilicia ri abe no. Hue jenda Jesús icuasa mbaaquiату quiatu que echoi ra.

16

Pablo resenda bei que Timoteo cote ra

¹ Pablo que nyo: Dérbee ra. Lístraa abe echoi. Huee que Jesús icuasa mo ndiqui ee ra. Timoteo, i que ee ra. Esi rei judía. Esi rei Dios icuasa. Judío eã ngue eru ra. ² Jesús icuasa hue jenda que Timoteo icua ja ra. Timoteo turâte, i ja que Jesús quiato quia ee ra. ³ —Timoteo tarao serese, i que Pablo ra. Judíos tubiriã ngue chi aque ibi rui ra. —Judío eã ndei Timoteo ru, i ja judíos. Nyebe Pablo circuncisión naa Timoteo je. Nguerao nguesendarã cote. ⁴ Nyo: que sucha tubiriã mbuchesea sea cote ra. Jesús quiato rerecua cheē ngue esenei senei ja quia mbia je ra. Jerusalén jenda cheē. —¡Ûqui ñee nda jemumba mumbachi jê! i que Pablo nyo: quia ra. ⁵ Pablo que Jesús osei uquia Jesús quiato je ra. Jesús icuasa tubiriã nia ngue esi quia cote ra.

Echu urembaquiату quiatu, i que Macedonia jenda Pablo je cuu ra

⁶ —Nyao Dios cheē nenei nenei Asia, i rei ngue re. Espiritu Turã ngue nya i ee ra. Nyebe echoi nguiã Frígiaa. Galáciaa abe. ⁷ Ngasē ngue Misiaa ra. Nyao Bitinia, i rei ngue re. Espiritu Turã ngue nya i ee ra. ⁸ Misia que echucuaño nyo: ra. Ngasē nyee Troas. ⁹ Huee que Pablo Macedonia jenda

mo ndea isa ra. Tea que cuu ra. Chĩ nda juã ñee ñee Pablo je cuu ra. — ¡Echu aa Macedóniaa jê! Echu urembaaquiato quiato, i nda Pablo je cuu ra. ¹⁰ Nyebe ureso nguiã ereare. Se abe que aso erese ra. Se rei Lucas. —Dios urererao quia Macedonia co. Ucheẽ nenei nenei sacua, ure que urechue cote ra. Nyebe urecuata nguiã cote.

Pablo tarõ ji que chi Filipos ra

¹¹ Ama ndui que ureso Troas si ra. Eriimbe que ureso iasa ra. Urecuasẽ nyee que oso Samotracia ra. Isamami ngue ureso Neápolis cote ra. ¹² Hue si que ureso ibi rĩ nda. Urecuasẽ nyee oso sucha tubiriã tuchi je. Filipos, i hue sucha tubiriã je. Romanos mbae rei sucha tubiriã. Macedonia, i que ibi ja je ra. Huee que urecu arete ra. ¹³ Sábado mose que ureso ama nimíaa nda. Sucha tubiriã ndecha. Huee que judíos riqui ñumunua nua mbei ñee ñee Dios je ra. Ari que ngaẽ ngaẽ nguiã huee ra. Acuaní mo ndese. Urecoi que Dios cheẽ nenei nenei ee ra. ¹⁴ Lidia, i que urecheẽ andusa mo je ra. Ae rei tiru rubi vender isa. Ae rei Tiatira jenda. Ae rei Dios icuasa. Dios que Pablo cheẽ mbuchecua ee ra. Pablo cheẽ ngue eisi ra. ¹⁵ Nyebe que bautizar i ee ra. Echuchua jenda je abe que bautizar i ra. —Se Jesús resenda tuchi mose jêje, jenyu uque sechuchúaa, i que Lidia ure je ra. Ñee tuchi ure je. Nyebe urererao nguiã uchuchua.

¹⁶ Emo mose que ureso quia mbia ndua nduásaa Dios rese ra. Nyucuaaque mo ngue uresobeishĩ nda. Aba checuayã icuã ngue siqui tuchi quia erese ra. Aba checuayã icuã ngue mbae icua icua quia ee ra. Nyebe mbia mbae isiquia mee mee tuchi quia nyucuaaque rerecua je. Nyucuaaque cha je. ¹⁷ Nyucuaaque que tu Pablo rui ra. Tu ure ja rui. Ñee ngue urerĩ nda. —Ñ ndei Dios rimba ã. Ibatenda rimba. A echĩ aba icuã mbutiãsa nenei nenei jêje a. A echĩ Jesús renei nenei jêje a, i bei que nyucuaaque quia urerĩ nda. ¹⁸ I bei que nyucuaaque quia urerĩ nda. Pablo que echeẽ nyosei chiã nyee ra. Uba que ñee aba checuayã icuã je cote ra. —Jesús rĩ aico ñee ndeje a. Esẽ nyucuaaque si, i que Pablo aba checuayã icuã je ra. Echeẽ mosebe que usẽ esi ra.

¹⁹ Nyucuaaque rerecua que paama i Pablo je ra. —Mbia ra mbae isiquia mondo monoa techĩ nande je cote re, i nyue. Nyebe que Pablo isi ra. Silas rese. Curuchoi que plaza ra. ²⁰ Mondo que mbia rerecua je ra. —Ñ ndei judíos ã. Mbia mbicuaã icuãte equia ñee ñee ã. ²¹ “Ure rã jẽingo”, ichĩ nguiã nande je. Romanos ndaque nande. Ñquĩ nandesaa aronea tuchi quiarei, i que mbia nguerecua je ra. ²² Nyebe que mbia paama i Pablo je ra. Silas abe je. Ererecua que eirao mbui asi ra. —Ira je jẽiruã nua, i que ererecua ra. ²³ Mbia que eiruã nua tuchi ra. Tarõ ngue cote ra. —Jësaarõ tuchi, i que ererecua eraarõsa je ra. ²⁴ Echeende que etarõ tuchi cote ra. Ei abe que emumbi ino ira je ra.

²⁵ Pablo que ñee ñee nguiã Dios je itondiite mose ra. Silas rese. Irasei rasei abe no. Etarõi que ehandu ja quia ra. ²⁶ Aque mose que ibi titi titi i ra. Etarõsa abe que quiata quiata ja ra. Eiquesa abe que quiata ja ra. Eicuasa que nyera ja cadenas nda. Etarõ ji si que nyera ja ra. ²⁷ Eraarõsa que ñumumba ra. Eiquesa eequia ji rese que mae nda. Etarõ ji uchã nei nguiã ee. Nyebe ñee nguiã. —Tachiquia, i que tiquese rirõ nda. ²⁸ Pablo que tasẽ ee ra. —¿Mbaerã nda erechiquia re? ¡A urecu chõte a resê! i que Pablo ee ra. ²⁹ —Tata eru, i que eraarõsa mbia mo je ra. Ique que Pablo rea cote ra. Titi titi i tuchi que ra. Ngoi que nguiã ndese Pablo je ra. Silas abe je. ³⁰ Eraarõsa que ecuruchoi taicuee cote ra. Ñee ee. —Sã Dios serirõ seicuã si. ¿Mañi ae ra se re? Siqui bei

sacuã Dios rese re, i que eraarõsa ra. ³¹ Pablo que ñee ee cote ra. Silas rese. —Jesucristo eicua. Ûquí mose ra Dios nderirõ ndeicua si. Ûquí mose ra Dios ndechuchua jenda abe rirõ huicua si, i que Pablo ee ra. ³² Jesús cheẽ ngue esenei senei ee ra. Echuchua jenda je abe que erenei nenei nda. ³³ Pablo iruã nua ji que eraarõsa irei irei ra. Silas iruã nua ji abe. Itondii mose raque. Bautizar i que eraarõsa je cote ra. Echuchua jenda ja je abe que bautizar i ra. ³⁴ Eraarõsa que Pablo querao mbuquiaru uchuchúaa ra. Silas abe no. Ey a tuchi que ra. Echuchua jenda abe ia tuchi. —Nandeico Dios icua co cote, i ñene. Nyebe eya tuchi Dios rese.

³⁵ Isamamimbe que ererecua ñee policía je ra. —Jẽso Pablo mbusẽ cote. Silas abe jembusẽ, i que ee ra. ³⁶ Eraarõsa que ñee Pablo je ra. —A policía cuaẽ a. Jembusẽ sacua. Hui que jẽsi ra. Jẽso turã cote, i rei que eraarõsa Pablo je ra. ³⁷ —Nya, i que Pablo ee ra. —¿Mbaerã ererecua ureiruã ñooño nde? Mbiasa. Mbae icua naa mose rocoi. Romanos ndaque ur e abe. Uretarõ ñooño ngue ra. “Nandembusẽ checuayã”, i raque ure je co cote. Tei. Sã ùquí ngaẽ urembusẽ nyecua, i que Pablo ee ra. ³⁸ Pablo cheẽ ngue policía senei nguerecua je ra. “Romanos”, i mose que ererecua chiã cuaãcua i ja ra. ³⁹ Ererecua que nyoĩ Pablo rea cote ra. Silas abe rea. —Ureicua ñochĩ jẽje. Ureicua eã nda cote. Jẽso a si cote, i que ererecua embusẽ turã mondo cote ra. ⁴⁰ Pablo que usẽ etarõsa si cote ra. Silas rese. Nyoĩ que Lidia chuchua ra. Hue que echi mbiriĩ Jesús icuasa mundua ndua ra. Nyoĩ que hue si cote ra. Sucha tubiriã si.

17

Pablo que siqui Tesalónicaa ra

¹ Pablo que nyoĩ Antípolis rĩ nda. Apolonia nĩ abe echoi. Silas rese. Hue si que echoi ngasẽ Tesalónicaa ra. Huee que judíos chumu nuasa mo huee ra. Sina goga, i equia tuchua je. ² Pablo que oso hue sáado mose ra. Querabe que eriqui oso oso bei judíos chumunuásaa ra. Tres sáado que Pablo mbia mbaaquiātu quiātu huee ra. ³ Dios cheẽ ngue esenei senei ee ra. —“Mbia ra Cristo mbasi tuchi. Manonde ra quera si”, i que Dios cheẽ nda. Eĩ ngue mbia Jesús je cote ra. Jesús ae rĩ aico ñee ñee jẽje, ae rei Cristo. Ae jẽsarõ arõ mbeite quia, aque rei Jesús, i que Pablo embaaquiātu quiātu ra. ⁴ Emo emo ngue Jesús isi cote ra. Siqui que Pablo rui ra. Silas rui abe. Griegos tubiriã ngue siqui erui no nda. Dios icuasa rei ùquí. Griego ninisi tubiriã abe que siqui Pablo rui ra. Mbia chiicua tuchi rei ùquí. ⁵ Judíos que ngueteãte quia mbia rese Pablo je ra. Mbia siqui mose Pablo rui. Ae Dios cheẽ andu sereãte quia, ùquí ngue ngueteãte quia mbia rese ra. Nyebe ngata chooño je munua nguiã. Ûquí ngue sucha tubiriã jenda mbupaama i tuchi ra. Mbia tubiriã ngue mbaba chee Jasón chuchua je cote ra. —¿Ma Pablo ma nde? ¿Ma Silas ma nde? Uremee nda mbia icua je, i rei que judíos ra. ⁶ Pablo oreã ngue ee ra. Silas abe oreã ngue ee ra. Nyebe que Jasón nduruchoi mbutiriri nguerecua je ra. Jasón ndesenda rese. Ñee nguerecua je. —Pablo ngaẽ ñochĩ mbia mbicua icua ja aa. Pe jenda mbicua icua jare. ⁷ Jasón eisi turã ñochĩ nguia uchuchúaa a. Ûquí icua ja que eriqui nandererecua je. César cheẽ emumba mumba bei chõchĩ nguiã ã. “Jesús quia ererecua tuchi César si re”, i chõchĩ Pablo, i que mbia paama i Pablo je ra. ⁸ Mbia ataque eandu mose que paama i ra. Ererecua abe que paama i ra. ⁹ Ererecua que mbae isiquia isi Jasón si ra. Jasón ndesenda

si abe. —Uremeembe ra jêje Pablo choi mose, i que ererecua ee ra. Ererecua que hui ja esi cote ra.

Pablo que siqui Beréaa ra

¹⁰ Jesús icuasa que Pablo mondochoi jei Berea ra. Silas rese. Aque isa mose bei. Ngasē ngue Berea ra. Nyoï que judíos chumunuasa cote ra. ¹¹ Judíos Berea jenda que earacua ra. Tesalónica jenda si. Berea jenda quiatu que Dios cheē ñanduse rete ra. Berea jenda que embesa ji tea jei jei ra. —Ma Pablo ñee Dios cheē ndui si, i que nyue ra. ¹² Nyebe que mbia tubiriã Jesús icua ra. Griegos tubiriã abe que Jesús icua ra. Griegos ninisi abe. Mbia chüca rei griego s ninisi. ¹³ Pablo que Dios cheē senei senei Berea jenda je ra. Judíos Tesalónica jenda que jirandu ra. Jirandure que echoi Beréaa mbia mbücuã icuã Pablo je ra. ¹⁴ Jesús icuasa que Pablo mundo ama ndisha quiti ra. Silas que siquichō Beréaa ra. Timoteo rese. ¹⁵ Ae Pablo curuchoi, ũquí ngue tiba esi ra. Atenas, i que sucha tubiriã je ra. —A ureico nyebi a, i que Pablo je ra. Echebi mose que Pablo ñee ee ra. —Silas jembu jei seje. Timoteo rese, i que Pablo ee ra.

Pablo que siqui Atenas nda

¹⁶ Pablo que siqui Silas raarō arō Atenas nda. Timoteo abe raarō arō. Dios abareã tubiriã ngue huee ra. Ũquí ndese quiatu que mbia riqui oo tuchi ra. Pablo que mae icuã ũquí ndese ra. Pablo que paama ite mbia rese mae nda. Mbia Dios abareã nderequia requia mose. ¹⁷ Nyebe Pablo oso oso bei nguiã judíos chumunuasa. Ñee ñee tuchi hue jenda je. Judíos eã je abe ñee ñee tuchi hue jenda mbia je. Dios icuasa je. Plázaa abe que Pablo riqui ñee ñee tuchi mbia je ra. ¹⁸ Epicúreos resenda mo ngue ngaē ñee tuchi Pablo je ra. Estoicos resenda mo abe que ngaē ñee Pablo je ra. —¿Mbae ichôte Pablo quia nande je re? Echeese rete eriqui reae, i que emo emo nda. —Dios mo nñi eriqui ñee ñee nande je reae, i que emo emo nda. Pablo ñee ñee mose Jesús rñi. Pablo Jesús quera renei nenei mose. ¹⁹ Mbia que Pablo curuchoi ibi ato mo cote ra. Huee que ererecua riqui ñumunua nua mbei ra. Ñee ngue Pablo je cote ra. —¿Mbae rñi ereico ñee ure je re? Embuchecua ure je. ²⁰ A ngue urechanuate quia ra. Ndecheē embuchecua ure je. ¿Mbae ere quia re? i que mbia Pablo je ra. ²¹ Atenas jenda mingo uquia reã mbae mo ndese. Ae siqui Atenas jenda rese, ũquí abe mingo uquia reã mbae mo ndese. Echeemo andu andu bei. Echeemo ndese bei.

²² Nyebe que Pablo juã mbia ite re ra. Ibi ato. Ñe e ngue mbia je cote ra. —Tacheē jêje, Atenas jenda. Dios ata rete rese jéingo reae. ²³ Secuatasa que amae mae dios tubiriã jembae rese ra. Emo ndese que amae nda. “Co Dios mbia mae sayã”, jenyje que embesa mi nda. Ae je jéingo ñee ñee ũquí. Jemae sayã ndaque. Ae rñi aico ñe e jêje co. ²⁴ Co Dios que ibi chao ra. Mbae ao ja. Ae rei mbae rerecua. Ibi rñinda rerecua. Ibei jenda abe rerecua. Dios siquii ño nguiã tuchiaqui re mbia chiao. ²⁵ —¿Aba ra mbae chao seje re? i eã ngue Dios quia ra. Ae quiarei mbae meesa. Nandembuquiarusa rei ae. Nande mingsosa rei ae. ²⁶ Mbia mñi ngue Dios chao ra. Aque rei mbia i ja aque. Emo eã ño nandeico nguiã ã. Nande ja chō nandeico nguiã ã. Dios rei nandeiosa. Nyebe Dios mbae rerecua ja. —Co ra nyeacuquia co mose. Co ra mano co mose, i bei que Dios quia ra. Mbia recuarã ngue Dios mee mee mbia je ra. ²⁷ Dios que mbia mingo ibi rñi nda. f nda mbia Dios requia. f nda mbia Dios icua. Isho eãte Dios riqui a. Nande ja jii eriqui a. ²⁸ Dios rñi ae nandeico nguiã. Erñi ae

nandeico nguiã ngata. Jemo abe que ñee nda. “Dios riirĩ ño nandeico ja nguiã ã”, i que jemo nda. ²⁹ Ae bei chõ nandeico nguiã ã. Dios riirĩ. “Dios” nandechĩ nguiã mbia chiao je. Oro ao ji je. Plata ao ji je. Sita ao ji je. ³⁰ Dios que mbia icuã teachõ cose ra. Mbua aquiatuã mose. Namõ ño Dios riqui nguiã ñee mbia je co. “Jêhui chõ jêicuã si”, i Dios quia mbia jaje co. ³¹ Dios que Jesucristo irabo ra. Jesucristo turã mbei. Jesucristo ra ñee emo je. “Jêso tata cuasu”, i ra ee. “Jêso ibate”, i ra emo je no. Manose chõ nda ñee. Dios mõi ño eicua nguiã. Dios que Jesucristo mbuquera si manonde ra. Nyebe ra Jesucristo emo mondo ibate. Emo mondo tata cuasu no. ³² —Jesucristo que quera si manonde ra, i que Pablo ee ra. Mbua que icua icua chõchĩ nguiã Pablo cheẽ mose. Emo emo ngue ñee ee ra. —Emo mose quiatu ra ndecheẽ urechandu, i que eataque ra. ³³ Pablo que oso mbia recha cote ra. ³⁴ Emo emo ngue siqui erui ra. Ae Jesús cheẽ isi turã, ùqui ngue siqui bei erui ra. Dionisio, i que ùqui mo je ra. Ae rei mbia rerecua mo. Dámaris, i que cuña mo je ra. Emo emo abe que siqui Pablo rui ra.

18

Pablo que siqui Coríntoo ra

¹ Pablo que oso Atenas ndecha cote ra. Ngasẽ ngue sucha tubiriã mo cote ra. Corinto, i que hue je ra. ² Hue que judío mo ndiqui ee ra. Aquila, i que ee ra. Ponto jenda que ae ra. Priscila, i que eninisi je ra. Ùqui ngue ngaẽ namo Italia si ra. Italia recha ramo. Claudio judíos mombo ja mose Roma si. Pablo que oso Aquila chuchua ra. ³ Pablo que tuchia saã saã nguia mbae ire je ra. Eĩ ngue Aquila no nda. Tuchia raã naa mbei mbae ire je. Nyebe Pablo siquichõ nguiã erese. Quiei quiei erese. ⁴ Sábado mose que Pablo riqui oso oso judíos chumunuasa ra. Hue que eriqui bei Dios cheẽ nenei nenei judíos je ra. Judíos eã je abe no.

⁵ Silas que ngasẽ Macedonia si cote ra. Timoteo rese. Pablo que Dios cheẽ senei senei tuchi quia judíos je cote ra. Jesús mbuchecua checua tuchi ee. —Jesús rei Cristo. Ae jêsaarõ arõ mbei e quia, aque rei Jesús, i tuchi que Pablo ee ra. ⁶ Judíos que paama i Pablo je cote ra. Ñee icuã icuã tuchi que ee ra. Nyebe Pablo huirao mbaaba aba ee. Taso jendecha, i ñene. —“Aemingo bei ra se”, i rei Dios nande je. Jê nguiarei Dios cheẽ isi sereã tuchi. “¿Mbaerã Dios cheẽ eresenei eã ure je re?” jenyechĩ nda seje. ¡Dios cheẽ ngue asenei tuchi rei jêje ra jê! Nyebe taendecha. Judíos eã je Dios cheẽ tasenei senei cote, i que Pablo huirao mbaaba aba ee ra. ⁷ Pablo que oso judíos recha cote ra. Judíos chumunuasa jii esi. Justo chuchúaa. Judío eã ndei Justo. Dios quiato que Justo ra. ⁸ Crispo que judíos chumunuasa rerecua ra. Aque que Jesús icua cote ra. Echuchua jenda ja abe que Jesús icua cote ra. Corinto jenda tubiriã ngue Dios cheẽ ñandu ra. Mbua tubiriã ngue Jesús icua cote ra. Bautizar i que cote ra. ⁹ Itondaru mo ngue Pablo Jesús rea ra. Ñee ngue Pablo je cuu ra. —Eresiquichechĩ nda mbia si jê. Secheẽ esenei senei mbei. Erehuichĩ nda esi jê. ¹⁰ Co aico nderea quiatu co. Mbae icuã nda i eã ndeje. Secheẽ esenei senei mbei. A jenda ra seicua ja jiri cote, i que Jesús Pablo je cuu ra. ¹¹ Pablo que siqui arete Corinto ra. Un año ndobeichõ jiri que eriqui huee ra. Mbua mbaaquiatu quiatu bei Dios riĩ.

¹² Galión ngue Acayo jenda rerecua ra. Aque mose que judíos ñimbicua tuchi Pablo je ra. Oo que erese ra. Curuchoi que nguerecua je ra. ¹³ Judíos que ñee ererecua je ra.

—Pablo que mbia mbaaquiātu icuã icuã nguia ra. Dios rĩĩ. Nandererecua cheẽ ndui eã, i que judíos ra. ¹⁴ Pablo nda ñee nguia ña. Ererecua Galión nane nguia ñee nguia esi. Ñee judíos je. —Mbae icuã ndese que Pablo riqui ate. Eĩ nguia nda jeñee achandu nguia ña. ¹⁵ Mbae icuã ngue esaã eãte. Pablo cheẽ je chõ jẽingo nguia paama i. Judíos cheẽ nũ ño jẽingo nguia paama i Pablo je. Nyebe ra jeñee achandu. Jẽ ae jeñee turã jenyue ae, i que Galión judíos je ra. ¹⁶ Momo ja que uchuchua si cote ra. ¹⁷ Sóstenes, i que judíos chumunua nuasa rerecua je ra. Judíos eã ngue paama i Sóstenes je ra. Isi icuã ngue ra. Iruã nua tuchi que ra. Ererecua Galión ndésaa que eiruã nua nda. Ererecua que teachõ nda.

Pablo tube Antioquíaa

¹⁸ Pablo que siqui atate Coríntoo ra. —Co acua quia jendecha co, i que uataque je cote ra. Jesús quiato je. Aquila abe que oso erese ra. Priscila abe no. Ngasẽ ngue ama nimíaa nda. Such a tubiriã. Cencrea, i que hue sucha tubiriã je ra. Pablo que ua chisia cote ra. —Acheẽ ngue Dios je, a que que amumbayã nda, i que ua sia cote ra. Siria icha rui que echoi cote ra. Ama ndisha icoi tuchi rui. ¹⁹ Sucha tubiriã je que ngasẽ cote ra. Efeso, i que sucha tubiriã je ra. Aquila que siquichõ eresebe huee ra. Priscila, i que eninisi je ra. Pablo que oso judío s chumunuásaa ra. Ñee ñee tuchi que judíos je ra. ²⁰ —Eico are jiri aa, i rei que judíos ee ra. Pablo que echeẽ mumba bei oso ra. ²¹ —Taso Jerusalén. Mbia chumunua mose taico rã Jerusalén. Achube ra mae jendese. Dios sembu mose ra achube mae jendese, i que Pablo ra. Oso que Efeso si cote ra. Ama ndisha rui bei que echoi ra. ²² Ngasẽ ngue Cesaréaa ra. Hue si que Pablo si Jerusalén cote ra. Hue jenda rese que mae nda. Jesús quiato. Hue si que esi Antioquíaa ra. ²³ Siqui arete que Antioquíaa ra. Oso que Galacia cote ra. Frigia abe no. Sucha tubiriã ngue embuchesea sea tuchi quia hue jenda ra. Jesús quiato mundua ndua hue jenda.

Apolos Dios cheẽ senei senei

²⁴ Aque mose que judío mo ngasẽ huee ra. Efésoo. Apolos, i que ee ra. Alejandría jenda que ae ra. Dios cheẽ nenei neneisa tuchi mbia je. Dios cheẽ icuasa tuchi. ²⁵ Apolos que Dios icha icuate ra. Mbia que embaaquiātu quiātu turã tuchi quia ra. Mbia mbaaquiātu turã Jesús rĩĩ. Juan Bautista cheẽ achõ ngue eicua quia ra. Juan bautizar i mose mbia je. ²⁶ Apolos siquicheã tuchi que eriqui mbia mbaaquiātu quiātu ra. Judíos chumunuásaa. Aquila que ehandu ra. Priscila rese. Nyebe que ñquĩ Apolos rerao mbaaquiātu quiātu tuchi ra. Dios icha que embuchecua tuchi ee ra. ²⁷ Apolos que osose Acáya ra. Nyebe Jesús quiato emondo turã. Papel que embesa Acaya jenda je ra. Jesús quiato je Acaya jenda je. —Apolos jẽisi turã, i ee. Apolos que ngasẽ cote ra. Ae Jesús icua quia, ñquĩ mbaaquiātu quiātu tuchi. ²⁸ Apolos que judíos cheẽ siquisã tuchi ra. Judíos mbia mbaaquiātu choõño mose. Jesús rĩĩ eã. Nyebe Apolos echeẽ ndiquisã. Dios cheẽ ngue esenei senei nguia ee ra. —Jesús rei Cristo. Ae jësaarõ arõ nguia, a que rei Jesús i tuchi que Dios cheẽ nenei ee ra.

19

Pablo que siqui Efésoo ra

¹ Sita ibate bate ite rĩ ngue Pablo si ra. Ngasẽ ngue Efeso cote ra. Apolos siqui mose Corinto. Jesús quiato mo je que Pablo ngasẽ Efésoo ra. ² Pablo que ñee ee ra. —Jẽ Jesús isí mose, ¿Espíritu Turã abe i que jeñiangui re re? i

que Pablo ee ra. —Espíritu Turã ndese ureiranuate, i que mbia Pablo je ra. ³ Pablo que ñee ee ra. —¿Mbae rĩĩ bautizar i jēje re? i que ra. —Juan ñee nii ngue bautizar i ure je ra, i que Pablo je cote ra. ⁴ Pablo que ñee ee ra. —Juan ngue bautizar i mbia je ra. Mbia hui mose huiicua si. “Ae ra tu serui, aque jēicua jē. Jesucristo chō aque re”, i que Juan nda, i que Pablo ra. ⁵ Pablo cheē andu mose que bautizar i Jesús rĩĩ cote ra. ⁶ Pablo que o chono earō nda. Espíritu Turã ngue ique echiangui re cote ra. Ucheemo ngue esaã saã nguia cote ra. Dios cheē ngue embuchecua checua quia mbia je cote ra. ⁷ Doce que ũqui nda. Jesús quiato.

⁸ Pablo que oso oso quia judíos chumunuasa ra. Tres meses. Siquicheã tuchi que equia Dios cheē nenei nenei nda. —Ererecua tuchi quiarei Dios. Jesús jēicua rã, i que Pablo quia mbia je ra. ⁹ Emo emo ngue Pablo cheē ñandu sereã nda. Echeē mumba mumba. Jesús rĩĩ ñee icuã icuã mbei mbia ja je. Nyebe Pablo nyao nguia esi. Pablo que Jesús quiato curuchoi esi ra. Curuchoi que Tiranno chuchúaa ra. Huee que eriqui embaaquiato quiatu cote ra. ¹⁰ Dos años ngue Pablo riqui huee ra. Nyebe mbia Asia jenda jirandu ja nguia Jesús rese. Judíos jirandu ja erese. Judíos eã abe no.

¹¹ Pablo que mbae saã saã tuchi quia Dios quirãcuã je ra. Mbia mae sayã ngue esaã saã nguia ra. ¹² Mbia rasi mbucherō sacua ngue mbia riqui tiru mbucha mbucha Pablo rese ra. Ũqui tiru que ecuruchoi choi quia mbia rasi je cote ra. Ũqui tiru ruruchoi mose, mbia rasi que nyerō nyerō nguia cote ra. Aba checuayã icuã abe que usē usē nguia mbia chiã si cote ra. ¹³ Judíos mo ngue ngata beite quia ra. Sucha tubiriã mbuchesea sea bei que equia ra. —Aba checuayã icuã mbusē aquiature que ure ra, i que equia ra. —Jesús rĩĩ aba checuayã icuã nandembusē, i rei que nyue ra. Nyebe que ñee aba checuayã icuã mo je ra. —Jesús quirãcuã nii aico jembusē mbia si co. Ae Pablo senei senei nguia, i rei que judíos aba checuayã icuã je ra. ¹⁴ Sacerdote rerecua ririĩ abe que eĩ si ra. Siete eririĩ. Esceva, i que sacerdote rerecua je ra. Judío que ae ra. Ae ririĩ ngue eĩ si rei no nda. ¹⁵ Ũqui ngue ñee ndei aba checuayã icuã je ra. Aba checuayã icuã ngue echeē mumba ra. —Jesús aicua. Pablo abe aicua. ¿Aba chō jē nde? Jaēicuayãte se, i que aba checuayã icuã nda. ¹⁶ Aba checuayã nyireco que oo erese cote ra. Ucuu ucuu tuchi que ũqui ja rese cote ra. Ũqui siete rese. Aba checuayã icuã nyireco quirãcuã tuchi que esi ra. Aba checuayã nyireco que ũqui mbasi ja ra. Nyebe ũqui ndasi rasi uchã aba checuayã icuã si. Eirao eã ngu e nyoĩ uchã itaicuee rĩ nda. ¹⁷ Efeso, i que hue sucha tubiriã je ra. Hue jenda que jirandu ja erese ra. Judíos que jirandu ja erese ra. Judíos eã abe no. Nyebe hue jenda siquiche ja. Nyebe mbia ñee turã turã jate Jesús rĩĩ. ¹⁸ Jesús quiato mo ngue ngaē ngaē nguia ra. Eya eãte que huiicua ndese ra. Nyebe huiicua nenei nenei. ¹⁹ Mbia tubiriã ngue mbae icuã papel mbesa ji curucuaē nda. Libros de brujeria. Munua ja que huee ra. Ũqui ngue esei sei mbia ja résaa cote ra. Mba e isiquia ata tuchi raque que ũqui libros isiquia ra. Cincuenta mil plata. ²⁰ Mbia tubiriã ngue Dios cheē isi isi quia ra. Dios cheē irãte que mbia tea quia cote ra.

²¹ Aquere que Pablo ñee nda. —Taso Macedonia. Acaya abe. Aquere ra aso Jerusalén cote. Jerusalén osore ra aso Roma cote, i que ra. ²² Nguesenda nyeremo ngue emondo Macedonia nda. Timoteo. Erasto rese. Pablo que siquichō are jiri huee ra. Asia.

Efeso jenda paama i ja Pablo je

²³ Aque mose que mbia paama i tuchi Jesús rĩ nda. ²⁴ Demetrio quia rei mbia mbĩcuã icuã nyii. Dios mbuae chuchua que esaã saã nguia ra. Mbae rendi ãtã je que eriqui sucha ñetẽ naa naa nda. Sucha ñetẽ tubiriã nguie esaã saã nguia ra. Dios mbuae chucharã. Diana, i que Dios mbuae je ra. Demetrio que mbae isi tuchi quia sucha ñetẽ ndibishorõ nda. Eresenda tubiriãte que sucha ñetẽ naa naasa ra. ²⁵ Nguesenda ja que emunua nda. Dios mbuae chuchua raãsa que emunua ja ra. Ñee nguie ee ra. —Mbae nandeisi turãte rei nguia nandechiao ribishorõ ã. ²⁶ Pablo riqui ñee ñee mbia je co. “Dios mbuae mbia chiao rei eicuãte”, i Pablo quia co. Mbia riqui echeẽ mumbayãte ã. A jendachõ eã ñene. Efeso mii eã ñene. Asia jenda abe eriqui echeẽ andu ã. ²⁷ Uqui icuãte nande je. Nandechiao ra mbia isi isia ñochi cote re. Mbia ra hui ja chõchĩ Diana chuchua si cote re. Diana abe si ra mbia hui chõchĩ nde. Nandererecua tuchi que Diana. Mbia chĩcua tuchi que ae. Asia jenda chĩcua tuchi que ae. ¡Mbia ra hui chõchĩ esi jẽ! i que Demetrio ra.

²⁸ Demetrio resenda echeẽ andu mose que paama ite ra. —¡Diana quirãcuãte jẽ! ¡Efeso jenda rerecua quirãcuãte jẽ! i tuchi que mbia tasẽ tasẽ nda. ²⁹ Hue jenda que paama i ja ra. Pare pare i tuchi. Pablo resenda nyeremo nguie eisi ra. Gayo. Aristarco rese. Macedonia jenda. Uqui nyeremo nguie ecuruchoi mbia chumunuãsaa ra. ³⁰ —Taique se abe. Tacheẽ ñee mbia je, i rei que Pablo ra. Jesús quiato que Pablo siquisã nda. ³¹ Asia jenda rerecua mo abe que ucheẽ mondo Pablo je ra. —¡Ereiquechĩ nda nde jẽ! i Pablo je. Pablo quiato que uqui nda. ³² Mbia que pare pare i tuchi ra. Tasẽ tasẽ ja que ra. Hue rĩ ja mbia ndua eãte. Mbae mii ndese ndua eã. Paama i chooño ja. Eaquiatuã ño ñumunua ñooño nguia. ³³ Mbia mo nguie mbae senei senei ja Alejandro je ra. Judios que Alejandro mua mbia ite re cote ra. —Echeẽ mbia ja je, i que ee ra. Alejandro que o mee mbia je ra. —¡Jẽquiriri chõ jẽ! i rei nguie ee re. —Mbia je tacheẽ. I nda paama ia judios je, i rei nguie re. ³⁴ —Judio chõ Alejandro riqui re, i ja que mbia ra. Nyebe mbia riqui tasẽ tasẽ mbeite re. Dos horas. —¡Diana quirãcuãte jẽ! ¡Efeso jenda rerecua quirãcuãte jẽ! i tuchi que mbia tasẽ tasẽ nda. ³⁵ Secretario rei ererecua mo. Aque que mbia cheẽ siquisã cote ra. Ñee nguie ee cote ra. —Tacheẽ jẽje, Efeso jenda. Efeso jenda chõ nande re. Diana ndei nandererecua. Nande rei Diana ndaarõsa. Diana naanguia nguie tu ibei si, aque raarõsa chõ nande re. Diana chuchua raarõsa abe chõ nande re. Mbia jirandu jate uqui ndese. ³⁶ Emo eicuayã eãte. Nyebe jẽquiriri chõ jẽ. ¡Jẽaquiatuã jẽsaã saã eã ño jẽ! ³⁷ Ae jẽisi seru nae, uqui mbae mbuquiachã eãte dios mbuae chuchúaa. Uqui ñee icuã icuã eãte dios mbuae rĩ. Dios mbuae jenderecua rĩ. ³⁸ Demetrio ñee icuãse mose emo nii, sã esi nandererecua chuchúaa. Demetrio resenda ñee icuãse mose emo nii, sã echoi nandererecua chuchúaa. Huee chõ ererecua riqui nguia mbia cheẽ andu. Sã echoi ja ererecua je. Sã ñee ñee ja nyue ererecua rêsaa. Mbae icuã nii. ³⁹ Mbae mo nii abe mose, jẽnee mbia chumunua mose. ⁴⁰ Jesús quiato que nandeisi chooño chĩ nda. Nandechĩmbĩcuã ñooño ño nguia. Nandererecua ñee arõte nande je. Echeẽ nda nandesibishorõ eã, i que secretario ra. ⁴¹ Aquere que hui mbia si ra. Mbia mbui que cote ra.

¹ Mbia quiriri mose que Pablo Jesús quiato munua nda. Embaaquiato quiatu jiri. —Co acua quia co, i que ee cote ra. Macedóniaa ngue echoi cote ra. ² Hue jenda sucha mbuchesea seate que echoi ra. Jesús quiato mundua ndua. Ngasẽ ngue Gréciaa cote ra. ³ Huee que eriqui are jiri ra. Tres nyasi. —Taso Siria ama ndisha rui, i rei que cote ra. Jirandu que judíos icuã ndese cote ra. —Nandeisi, i nda judíos quia Pablo rĩ nda. Nyebe Pablo ru nguiã nyebi si Macedonia. ⁴ A ngue nyoĩ erese ra. Eata rete. Sópater. Berea jenda. Aristarco. Segundo abe. Tesalónica jenda rei ùqui. ⁵ Gayo. Derbe jenda. Timoteo. Tíquico. Trófimo. Asia jenda rei ùqui. ⁵ Ûqui ja rane nguia nyoĩ nguiã ure si. Troas que echi nguiã ureraarõ. ⁶ Fiesta de Pascua mose que urecu Filipos ra. Aquere que ureso ama ndisha rui cote ra. Cinco días que tu ure je ama ndisha ite re ra. Urecuasẽ namo ngue Troas cote ra. Ae ureraarõ arõ nguia, ùqui ngue uresiiti cote ra. Urecu are jiri que hue cote ra. Siete días.

Pablo nyoĩ Troas

⁷ Jesús quiato que ñmunua ja domingo mose cote ra. Mbichae sia sia nyue. Pablo que embaaquiato quiatu quia ra. —Taso isamami, i que ra. Nyebe embaaquiato quiatu itondiite mose chee. ⁸ Sucha ibátee que echi ñmunua nda. Eironguiã ibate tuchi que ra. Ibate tuchi que echi ñmunua nda. Tata rendi tubiriã ngue etesae tuchi ra. ⁹ Mbia mo ngue chí ibate ra. Ventana tose. Etiarõ namo ngue ra. Eutico, i que ee ra. Uque que huĩ ngoi ibate ra. Pablo que ñee oco tuchi embeesi esi ra. Eque que tu ngoi ibate si ra. Mano ndei que ra. Tambuchuruã, i rei que emo nda. Eraaque chõ eriqui reaẽ. ¹⁰ Pablo que nguichi u erea ra. Oo tuchi que erese ra. Quiaama ngue ra. —jÿsiquichechĩ nda jẽ! Manoãte, i que Pablo mbia je ra. ¹¹ Pablo que osoĩ nyui ra. Mbichae que echisia sia ra. U que ra. Mbia que embaaquiato quiatube ra. Eresaitõ ndabe chee. Oso que erecha cote ra. ¹² Ae ngoi nae, erasiã ño ngue mbia curuchoichĩ nguiã. Mbia ia tuchi que ngoi je rese cote ra.

Pablo nyoĩ Milétoo

¹³ Pablo que ñee nda. —Ibi rĩ taso se Asón. Hue si ra aso jendese cote. Ama ndisha rui, i que ra. Nyebe ure rane ureso nguiã ama ndisha rui. ¹⁴ Ae urecuasẽ nguiã Pablo je Asón cote. Pablo que oso urerese am a ndisha rui cote ra. Canoa naanguia ye. Urecuasẽ ngue Mitilene cote ra. ¹⁵ Hue si que ureso ra. Isamami ngue ejoõ acua mo urechucuã cote ra. Quío, i que hue ejoõ acua je ra. Isamami nongue que urecuasẽ Samos cote ra. Hue si que ureso Trogíloos ra. Huee que urequeneã urecua ra. Isamami ngue urecuasẽ Milétoo cote ra. ¹⁶ Pablo que quicoi asi Asia si ra. Nyebe uresoã Efésos. —Tacuasẽ quicoi oso Jerusalén. Fiesta de Pentecostés taicusu oso ngasẽ, i que Pablo ra.

Pablo ñee Jesús quiato rerecua je, Efeso jenda je

¹⁷ Mileto si que Pablo emo mondo Efésos ra. —Jenyu, i que amei je ra. Jesús quiato rerecua je. ¹⁸ Ûqui ngue ngaẽ ee ra. Pablo que ñee ee ra. —Cosete que achu Asia ra. Seicuate raque se. Sechisaã jëicuate raque. ¹⁹ Dios cheẽ ngue asenei senei turã tuchi quia jëje. Secuasu que asaã saã eãte quia jëje. Acheseo tuchi que sequia mbia rese. Judíos que sembasi mbasi tuchi quia ra. “Taiquia”, i rei que judíos quia seje ra. ²⁰ Dios cheẽ ngue asenei senei mbeite quia jëje. Asiquicheã mbei que sequia erenei nenei jëje. Jembitirõ sacuã. Jeñmunua nuã mose. Jenyuchúaa ja abe que aico Dios cheẽ nenei nenei jëje. ²¹ Acheẽ tuchi que jëje. Judíos je. Judíos eã je ab e no. —jÿicuã si

jēhui rā! Jesucristo jēicua rā”, ae tuchi que sequia jēje. ²² Co aso quia Jerusalén co. Co Espiritu Turā sererao quia Jerusalén co. Mañi ño nda seje pee. ²³ Co miñi ño aicua nguiā. Espiritu Turā ngue ñee seje ra. Sucha mbuchesea sea mose que eriqui ñee ñee seje. Mbia icuāte ra seje. Sembasi rae. Sematā ndae. Setarō ndae. Espiritu Turā ngue sembiirandu ra. ²⁴ Sesiquirecheāte ũqui si. Sā seiquia quiatu. “Dios turā esenei senei mbei quia mbia je”, i que Jesús seje ra. Aque miñi ndese chō aico nguiā ndu a co. Echeē miñi ndese. † nda echeē amumba eā. ²⁵ Dios nandererecua que asenei senei tuchi jēje. Jemae eā mbei ra serese cote. Aicuate se quia co. ²⁶ Jemo siqui sereā mose Jesús rese, se eā ño cote re. Jē ño cote re. Jē ja je chō ngue asenei senei ndesē. ²⁷ Dios cheē ngue asenei senei jate jēje. Asiquicheā mbei que sequia erenei senei jēje. Dios cheē mo ngue atibo tibo eāte jēje. ²⁸ ¡jēingo turā ño nyiese jē! ¡Jesús quiato abe jēteaquiato quia jē! Espiritu Turā ngue ñee jēje resē. “Jesús quiato rerecuarā jē”, i que Espiritu Turā jēje resē. Jesús quiato jēteaquiato quia jē. Ũqui ndibishorō ngue Jesús nguqui mondo ra. Umano mose. ²⁹ Seso mose ra emo ngaē ñee ñooño jēje. Tambiirī irī, i ra jēje. Eicuā ño ũqui nde. Nyacua rā sí. ³⁰ Jendese ra emo ndiqui. Jesús quiato mbaaquiato icuā icuā. Jesús quiato mbiirī irī. “† nda Jesús quiato siqui nanderese”, i ra ũqui. ³¹ Jēteaquiato jē. Jaembaaquiato quiatu tuchi que se. Tres años. Jē ja que jaembaaquiato quiatu. Acheseo tuchi que sequia jendese. ³² Aico jendecha Dios je a. Aico jendecha Dios turā je a. ¡Dios cheē turā jemumbayā mbei quia jē! Dios cheē nda jembuquirācuā. Dios cheē nda jeringo tuchi Jesús quiato rese. ³³ Mbae isiquia que achosei chosei āte quia mbia mbae aē. Mbia irao abe que achosei chiāte quia aē. ³⁴ Seicuate rei que equia aē. Se sí chō aquiei quiei nguiā icua. Seresenda mbaerā abe que aquiei quiei quia aē. ³⁵ Jaembaaquiato quiatu beite que se. “Jēquiei quiei”, ae beite que sequia jēje. “Mbaecha reā je mbae jemee mee”, ae que sequia jēje. Jesús cheē ndese jendua. “Ae mbae meeño nguia emo je, eya tuchi chō aque re. Ae eo jenda isi, aque quia eya tuchiā jiri”, i que Jesús nande je ra, i que Pablo Efeso jenda je ra.

³⁶ Aquere que Pablo ngoi nguiā ndese ra. Ñee ngue Dios je ra. Ũqui ndes e ja. ³⁷ Mbia que nyese o ja Pablo rese ra. Quiaama ama ngue ra. Eriti que esiite it e ra. ³⁸ —Jemae iā nda serese cote, i que Pablo ee ra. Nyebe que eya eā tuchi ra. Pablo rese que echoi erasaa ra. Ama ndisha rimia ndese. Pablo so rese mae.

21

Pablo nyoj Jerusalén

¹ Urecuata que ũqui ndecha cote ra. Canoa naanguia ye que ureso cote ra. Cos que ureso ra. Isamami ngue ureso Rodas cote ra. Hue si que ureso Pátaraa cote ra. ² Huee que canoa mo chi ure je ra. Fenisia rī ngue esi quia ra. Aque ye que urea cote ra. Eye que ureso cote ra. ³ Chipre rese que uremae nda. Ejoō acua. Ejii rī ngue ureso ra. Síriaa que ureso ra. Tiro que ure cu mbiirī cote ra. Huee que canoa yenda jea jea ra. ⁴ Jesús quiato que urembirō hue jenda ra. Siete días que ureico erese ra. Espiritu Turā ngue hue jenda mbucheē Pablo je ra. —¡Eresochi nda Jerusalén jē! i rei ngue Pablo je re. ⁵ Aquere que ureso cote ra. Jesús quiato que nyoj ja urerese ra. Ama nimia ndese. Eresebe echoi urerese. Nguiirī abe ruruchoi. Ama ndisha rimia ndes e que urecoi ja ureniā ndese ra. Ñee ñee Dios je. ⁶ Urechiquiaama ama ja que cote ra. —Co urecua

quia co, ure que ee ra. Canoa ye que ureso cote ra. Hue jenda que nyoĩ nyebi uchuchúaa cote ra.

⁷ Tiro si que ureso cote ra. Ureso que Tolemaida ra. Huee que urecheẽ ñee Jesús quiato je ra. Ureitõ mii ngue erese ra. ⁸ Isamami ngue ureso cote ra. Cesaréaa que urecuasẽ nda. Felipe chuchúaa que ureso ra. Ae que Jesús cheẽ nenei neneisa ra. Ae que mbaecha reã mbuquiaru sa ra. Diáconos, i que mbaecha reã mbu quiarusa je ra. Aque chuchúaa que urecu ra. ⁹ Cuatro que Felipe rucucha ra. Eruã ja. Dios cheẽ nenei neneisa ja que ũqui nda. ¹⁰ Huee urecu are jiri mose que emo ndu ra. Judea si. Agabo, i que ee ra. Dios cheẽ nenei neneisa que ae abe ra. ¹¹ Ae que tu ure je ra. Pablo numbicuasa que eisi ra. O que echucua eye ra. Hui abe que echucua ra. Pablo numbicuasa je. Ñee ngue cote ra. —Espíritu Turã ndiqui ñee ndeje a. “I nda judíos ndecua pee Jerusalén. Nemeẽ nda judíos eã je cote”, i que Espiritu Turã nda, i que Agabo Pablo je ra. ¹² Ure eandu mose queurecheẽ Pablo je ra. Cesarea jenda abe que ñee ee ra. —¡Eresochĩ nda Jerusalén jê! ure ja rei ngue ee re. ¹³ Pablo que ñee ure je ra. —¿Mbaerã jêingo nyeseo seo serese re? ¿Mbaerã jêingo sembia eãte re? ¿Mbaete ere? Sã secua Jerusalén ae. Sã seiquia Jesús rĩĩ ae, i que Pablo ra. ¹⁴ Pablo que uresiquisã aroneate ra. Nyebe urecheẽ eã nguia e e cote. — Sã Dios ae riqui ñee ñee ee no, ure chee que ra.

¹⁵ Ureico quiatu que cote ra. Ureso que Jerusalén cote ra. ¹⁶ Jesús quiato mo abe que nyoĩ urerese ra. Cesarea jenda. Chipre jenda mo ngue siqui Jerusalén nda. Masón, i que ee ra. Jesús quiato tuchi que ra. Cose tuchi que eriqui Jesús rese ra. Cesarea jenda que urererao Masón nyuchúaa ra. Huee que urecu erese ra.

Pablo oso Jacobo rea

¹⁷ Jesús quiato ia tuchi que urecuasẽ mose Jerusalén nda. Ureisi turã ngue ra. ¹⁸ Isamami ngue Pablo si Jacobo rea ra. Ure abe que ureso erese ra. Huee que amei ja chi ra. Jesús quiato rerecua. ¹⁹ Pablo que ñee ee ra. Mba e renei nenei ja ee. —Dios que siqui tuchi serese ra. Se echeẽ nenei nenei mose judíos eã je, i que Pablo Jesús quiato rerecua je ra. ²⁰ Pablo cheẽ andu mose que ñee turã turã Dios je ra. Ñee ngue Pablo je cote ra. —Jesús quiato tubiriãte que judíos cote ra. “¡Moisés cheẽ ndui si chõ nandeico jê!” i tuchi que ũqui nguia ra. ²¹ ũqui ndiqui ñee icuã icuã nderĩĩ ũqui. “Pablo que judíos ataque mbui Moisés cheẽ si ra”, i equia nderĩĩ ũqui. “ ‘Coche rei Moisés cheẽ jemumba. ¡Circuncisión jêsaachĩ jendiĩrĩ je jê! ¡Judíos ataque chisaã saã nda jêsaachĩ jê!’, i que Pablo quia judíos je ra”, i rei equia nderĩĩ ũqui. ²² ¿Mañi nande ra re? Jesús quiato ra ñumunua ja judíos. Jirandu mose ndereco mose a. ²³ ¡ĩ ere jê! Mbia cuatro que siqui urerese ra. ũqui ngue ñee Dios je ra. “Ã nda uresaã ndeje”, i que ũqui Dios je ra. ũqui nda esaã ee cote. ²⁴ ũqui erao Dios chuchúaa. ũqui na si esaã nde abe. Nembuturã sacua. Mbae isiquia emondo ee Dios chuchúaa. Queñi ua sia cote. I ere quiatu. Mbia ra jirandu jate nderese. “Pablo abe riqui Moisés cheẽ mumbayã tuchichĩ nande rã si”, i ra nderĩĩ cote. ²⁵ Judíos eã je que nandechẽ Jesús quiato je. Nandechẽ mii ño ngue nandemondo ee. I nande chõ ngue ee. “Mbia soo mondo mondo mose dios mo je, ¡aque soo ra jêuchĩ jê! ¡Eruqui resebe ra soo jêuchĩ jê! ¡Mbae ruqui ra jêuchĩ jê! ¡jeninisi rese rocoĩ nda jêingochĩ emo ndese jê! ¡jendu rese rocoĩ nda jêingochĩ emo ndes e jê!” nande que judíos eã je, i que Jesús quiato rerecua Pablo je ra.

Soldados rerecua Pablo isi

²⁶ Pablo que ũqui cuatro querao cote ra. Dios chuchúaa que ererao ra. Isamami ngue Pablo ñimbitirō nda. Ũqui cuatro rese. Oso que ñee Dios chuchua rerecua je cote ra. —Aque mose ra mbae mo ureiquia Dios je cote, i que Pablo ee ra. ²⁷ Siete días que echí huee ra. Judíos mo ngue mae Pablo rese cote ra. Asia jenda mo. Dios chuchúaa Pablo chí mose que judíos mae erese ra. Ũqui ngue mbia mbicuã Pablo je ra. Oo que Pablo rese ra. Isi que ra. ²⁸ Tasē tasē ngue ñee mbia je ra. —¡Israel jenda! Jenyu rã urerese. Pablo nandeisi rã. Ae quia oso oso beite nguiã ñee icuã icuã judíos rĩ. Moisés cheē ni i abe quia eriqui nguiã ñee icuã icuã mbeite. Dios chuchua rĩ abe quia eriqui nguiã ñee icuã icuã mbeite. Judíos eã mo abete quia equeruchĩ nguiã Dios chuchúaa. Dios chuchua mbĩcuãte nyeresē, i que mbia paama i Pablo je ra. ²⁹ Pablo quia ñi siquichĩ nguiã Trófimo ndese. Pablo quia Trófimo querao abareãte nguiã Dios chuchúaa judíos je. Nyebe ngue mbia riqui nguiã ñee icuã icuã ee. Judíos eã nguia ñi ngue Trófimo nde. Efeso jenda quia ñi ngue Trófimo nde. Nyebe ngue mbia riqui nguiã ñee icuã icuã Pablo je. ³⁰ Hue jenda que ñimbiacuã tuchi Pablo je ra. Oo ja que erese ra. Isi que ra. Mbutiriri que Dios chuchua si ra. Dios chuchua que ematã cote ra. ³¹ Pablo nda mbia iquia nguiã ña. Emo ngue oso ñee soldados rerecua je ra. —Mbia Pablo iquia serite quia pee, i que oso ee ra. ³² Soldados rerecua que soldados munua nda. Oficiales abe no. Nyoĩ asĩ que mbia icuã ndea cote ra. Mbia que Pablo iruã nua eã cote ra. Soldados rese mae mose. ³³ Ererecua que oso Pablo rea ra. Pablo isi que ra. —Echucua cadenas je, i que soldados je Pablo rĩ nda. Ererecua que ñee mbia je cote ra. —¿Aba co re? ¿Mbae icuã esaã jēje re? i que mbia je ra. ³⁴ Hue rĩ ja mbia ñee eã ee. Mbia que ñee ata ata ee ra. Tasē tasēte que ñee ee ra. Ñee ñoñoño ererecua je. —¿Mbae ra aba icua jeñee nde? i chee que ererecua mbia je ra. —Pablo jenya mbirĩ na cuartel, i que ererecua soldados je ra. ³⁵ Pablo ruruchoi que ra. Ngasē ngue eiquesa rurubi cote ra. Hue que mbia icuã icuã si Pablo je no nda. Nyebe soldados ecuruchoi nguiã sui cote. ³⁶ Mbia que tasē tasē ngaē nguia eruĩ ra. —¡Jēiquia rei ae! i que mbia cuaē nguia eruĩ ra.

Pablo ñee mbia cuabē je

³⁷ Pablo nda emingue nguiã soldados chuchúaa chã. Ae Pablo ñee ño nguiã ererecua je. —Tacheē na, i que ererecua je ra. ³⁸ Ererecua que ñee Pablo je cote ra. —¿Griego cheē ereicuate nde re? Egipto jenda ereico reĩ seje. Ae eicuã icuã ndiqui gobierno je, ¿ũqui nderecua eã nde re? ¿Nde mbia iquia iquiasa rerecua eã nde re? Cuatro mil mbia iquiasa. ¿Nde ererao eã turúquiaa re? i que ererecua Pablo je ra. ³⁹ Pablo que ñee ee ra. —Tei. Judío chō se re. Tarso jenda chō se re. Sucha tubirĩ tuchi que Tarso de Cilíciaa ra. Tacheē na mbia je, aechi nguiã ndeje, i que Pablo ererecua je ra. ⁴⁰ —Eno. Echeē ee, i que ererecua ra. Eironguia ibate rese que Pablo ñi juã nda. O que emee mbia mbuquiriri ra. Mbia quiriri mose que ñee ee ra. Judíos cheē ngue esaã mbia je ra.

22

¹ —Seataque, seandu rã. “Eicuã”, jenyechĩ nguiã seje. Nyebe tacheē jēje, i que Pablo ra. ² Pablo judíos cheē naa mose, mbia que quiriri ja tuchi cote ra. Pablo que ñee mbei mbia je ra. ³ —Judío chō se re. Társoo que achaacuquia ra.

Tarso de Cilicia. Aa que atiarõ nda. Jerusalén ngue atiarõ nda. Gamaliel que sembaaquiatusa ra. Nanderamei ndui si que sembaaquiato quiatu ra. Eraã si. Dios cheẽ ngue amumba sereã tuchi ra. Sã jëngo namo ã no. ⁴ Seicuã tuchi que eriqui Jesús quiato je nyii ra. Emo emo ngue aiquia chee ra. Emo emo ngue aru aru quia tarõ nda. Mbia ninisi abe que atarõ tarõ nguia ra. ⁵ Sacerdote rerecua que cartas mondo seje ra. Judíos rerecua abe que cartas mondo seje ra. Damáscoo nda aso nguiã ererao chã. Judíos je nda cartas arao nguiã ña. Hue jenda je. Damáscoo nda aso nguiã ña. Jesús quiato requia requia. Aa nda aru nguiã tarõ ña. Aa nda aru nguiã eiruã nua ña. Jenderecua ùqui icuate raque. Jeñee ee ae.

Aico uba Dios rese co cote, i Pablo

⁶ Acuasẽ nda Damáscoo chã nde. Tenda ibate que tata mo tu seresae ra. Ibate si que eru ra. Tata rendi que seresae tuchi ra. Sembua tuchi que ra. ⁷ Tata rendi rese mae mose que acoi oso íbii ra. Echeẽ mo ngue achandu ra. “Saulo, Saulo. ¿Mbaerã ndeicuãte riqui seje re?” i que seje ra. ⁸ “¿Aba nde re?” ae que ee ra. “Jesús rei se. Nazaret jenda. Ae je ndeicuãte riqui”, i que seje ra. ⁹ Seresenda que siquiche tuchi ra. Mae ndei ngue tata rese re. Echeẽ nguia echanuate nguiã. ¹⁰ “¿Mañi ae ra se re, Sererecua?” ae que se ra. “Dios que ndeirabo ra. Ehuã cote. Ecuasẽ oso cote. Damáscoo. Mbae rñi nda acheẽ ja ndeje huee cote”, i que Jesús seje ra. ¹¹ Tata rendi que seresa mungue ra. Seresayã. Nyebe seresenda sererao nguiã seo rese. Damáscoo.

¹² Huee que emo ndiqu i ra. Ananías, i que ee ra. Moisé s cheẽ ngue emumbayã tuchi quia ra. Judíos huee jenda que ñee turã ja quia ee ra. ¹³ Ananías que tu serea ra. Ñee ngue seje ra. “Saulo, Jesús quiato ereico co cote. Emae cote”, i que seje ra. Seresa turã ngue cote ra. Amae ngue erese cote ra. ¹⁴ Ananías que ñee seje ra. “Nanderu rerecua que Dios ra. Dios que ndeisi cose ra. Ae Dios chosei quia, ùqui icua sacua ngue Dios ndeisi cose ra. Jesús turã ndese mae sacua ngue ndeisi cose ra. Jesús cheẽ andu sacua ngue ndeisi cose ra. ¹⁵ Dios cheẽ nda eresenei senei mbia ja je cote. Ae erechandu, ùqui nda eresenei senei mbia ja je cote. Ae rese eremae, ùqui nda eresenei senei mbia ja je cote. ¹⁶ ¿Mbaerã ereico chõte a re? Ehuã na. Sã Jesús quiato bautizar i ndeje. Echeẽ na Jesucristo je. Sã Dios ndeicuã mbutiã”, i que Ananías seje ra.

Dios que atea cuu ra, i Pablo

¹⁷ Achube que Jerusalén nda. Aso que ñee Dios je ra. Dios chuchúaa. Huee que Jesús atea cuu ra. ¹⁸ Jesús que atea ra. Ñee ngue seje ra. “Eso asi Jerusalén si. A jenda ra ndecheẽ mumba mumbate, nde serenei nenei mose. Eso erecha” i que Jesús seje ra. ¹⁹ Acheẽ ngue Jesús je ra. “Sererecua, a jenda que seicuate nyii ra. Seicuãte que eriqui nyii ra. Jesús quiato que asirõ sirõ nguia judíos chumunuasa si nyii ra. Atarõ tarõ ngue sequia ra. Airuã nua ngue sequia nyii ra. ²⁰ Mbia Esteban iquia mose, seyate que ùqui mose ra. Huee que aico ra. Eiquiasa irao que asaarõ nda”, ae que Jesús je cuu ra. ²¹ Jesús que ñee seje ra. “Eso. Taremondo isho. Secheẽ nda eresenei seneite judíos eã je”, i que Jesús seje ra, i que Pablo mbia je ra.

²² Judíos eã ñii ñee mose que mbia nyiibute cote ra. Pablo cheẽ andu sereã cote. —iPablo nandeiquia rei jê! I nda eriquiã cote, i que judíos tasẽ tasẽ nda. ²³ Mbia paama i ja Pablo je. Tasẽ tasẽ. Huñrao mbaaba aba. Ibi tuba ara ara mombo mombo ibate. ²⁴ Soldados rerecua que ñee cote ra. —Pablo jendao

matã. ¡Nandeiruã nua jê! †nda ñee, i que ererecua ra. —¿Mbaerã mbia ñee icuã icuã ndeje re? i Pablo je. ²⁵ Soldados que Pablo chucua ra. Iruã nua nda eña nde. Pablo que ñee capitán je cote ra. —¿Mbaerã nda seiruã nua nde? Romano ño se resê. Mbae icuã asaã eãte resê, i que ra. ²⁶ Capitán ngue oso ererecua mbiirandu cote ra. Pablo cheẽ nguire. —¿Ereiruã nuachĩ nda jê! Romano ño ae re, i que capitán nda. ²⁷ Ererecua que oso ñee Pablo je cote ra. ¿Romano nde re? i que ee ra. Ae, i que ee ra. ²⁸ Ererecua que ñee mbe ee ra. —Mbae isiquia que amondo tuchi mbia je ra. “Romano” i nonde seje, i que ererecua Pablo je ra. Pablo que ñee ee ra. —Romano mbei chõ se re. Sechiacuquia mosenda bei, i que ra. ²⁹ Pablo iruã nua eã ngue cote ra. Mbia que hui esi cote ra. Mbia siquiche ja tuchi que cote ra. —Pablo nandechucuachĩ. Romano ño eriqui re, i que mbia cote ra. Ererecua abe que siquiche tuchi cote ra. Pablo o cuare.

Ererecua ñu munua Pablo cheẽ andu

³⁰—¿Mbaerã judíos paama i Pablo je re? i que soldados rerecua ra. Isamami ngue ererecua ataque munua cote ra. Sacerdote rerecua ja. Amei ererecua ja. Pablo que ecuruchoi ererecua achõ je cote ra. Ũquí ererecua ñee sacua ee.

23

¹ Pablo que mae hui ererecua ja rese ra. Ñee ngue ee ra. —Seresenda, mbae turã ndesê aico bei co. Namó abe. Nyebe sesiquicheã mbei riqui Dios si co, i que Pablo ra. ² Ananías, i sacerdote rerecua je. Aque que ñee Pablo ji jenda je ra. —Pablo churu rese jengua, i que ra. ³ Pablo que ñee ee cote ra. —Dios ra ucua nderese jê. Ndeturã eresaã ñooñoohĩ nguia. “¡Moisés cheẽ nda jemumbachĩ jê!” ere rei que ure je. ¿Mbaerã ereico echeẽ mumba mumba nde re? “Jengua Pablo churu rese”, ere chõchĩ nguia serii. Moisés cheẽ mumba, i que Pablo ee ra. ⁴ Pablo cheẽ andusa que ñee asite ee ra. —¿Mbaerã erecheẽ icuã sacerdote rerecua je re? Dios emingo rei a resê, i que Pablo je ra. ⁵ Pablo que ñee ee ra. —Sacerdote rerecua eã eriqui rei nguia seje. †nda acheẽ eãte erii. Aciuyãte quia ñi se re. “Jenderecua rii jëingochĩ nguia ñee icuã”, i rei que Dios ñee nande je resê, i que Pablo ra.

⁶ Hue rĩ ja ererecua ndua eã. Fariseos, i que ererecua ataque je ra. Saduceos, i que eataque je no nda. Nyebe Pablo ñee nguia ee. —Seresenda, se rei fariseo. Seru ja rei fariseos no. “Mbia mano je ra quera si”, ae quiatu nguia co. Ũquí je chõ mbia riqui nguia paama i seje. Ũquí je chõ ngue sereru nguia jêje, i que Pablo ererecua je ra. ⁷ Pablo cheẽ nguire que ererecua ñee icuã icuã nyue ra. Saduceos que ñee icuã icuã fariseos je ra. Fariseos abe que ñee icuã icuã saduceos je no nda. ⁸ Saduceos que ñee nguia ra. —Mbia raaque ra quera si eã. Angeles eã ibatenda. Mbia aĩ abe eã, i que saduceos quia ra. Fariseos que echeẽ sobeishĩ nda. —Eraaque ra quera si. Angeles siqui ã ndesê. Mbia aĩ abe siqui ã ndesê, i que fariseos ra. Nyebe ererecua ñee icuã icuã nguia nyue. ⁹ Tasê tasê tuchi que nyue ra. Fariseos mo ngue juã ñee nda. Ũquí ndei embesasa. Ñee ngue Pablo rii nda. —Pablo que mbae icuã saã eãte quia. Emo aĩ ñee ee reae. Angel mo ñee ee re no ae. Nyebe nandeico turã ee no. Ũquí mose ra nandeico turã Dios je abe, i que fariseos ra. ¹⁰ Mbia que ñe e icuã icuã mbei chõchĩ nguia nyue. Soldados rerecua ireite que eriqui ra. Mbia que Pablo iquia serite quia ee ra. Nyebe ñee soldados je. —Jêso Pablo rea. Jendao rã jenyuchúaa, i que ererecua soldados je ra.

11 Isa que Jesús ru ñee Pablo je ra. —Eresiquiche techĩ nda, Pablo. Serenei nenei ngue se a, eĩ ere si ra oso serenei nenei Roma, i que Jesús Pablo je ra.

Pablo nandeiquia, i rei mbia

12 Isamami ngue judíos ñee ja nyue ra. —¡Pablo nandeiquia jê! i ja nyue. Mbae mo nda nandeu eã mbei, Pablo iquiayã mbei mose. Nandeyu eã mbei ra Pablo iquiayã mbei mose. Chã Dios nandembasi, Pablo iquiayã mose, i tuch i que judíos ñee nyue ra. 13 Ae Pablo iquia serĩte quia, ùquĩ cuabête que ra. Cuarenta que ra. 14 Ûquĩ ngue nyoĩ ja ñee mbia rerecua je ra. Sacerdote rerecua je abe no. —Mbae mo nda ureu eã mbei, Pablo iquiayã mbei mose. Chã Dios urembasi, Pablo iquiayã mose. 15 “¡Pablo embu ure je!” jenyẽ soldados rerecua je. “Pablo rese uremae na”, jenyẽ soldados rerecua mbiĩrĩ irĩ. Ñeenda cúa ra urechiquitirõ erese. Pablo ra ureiquia chã, i rei que judíos ra.

16 Pablo nongue ririĩ ngue jirandu erese ra. Aque que oso Pablo mbiirandu ra. Soldados chuchúaa. —¡Mbia ra nyiquitirõ tirõ nderese jê! ¡Ndeiquiachĩ nda jê! i que Pablo je ra. 17 Nyebe Pablo ñee soldado mo je ra. —Senongue ririĩ erao ndererecua je. Ñee nda ndererecua je chã, i que Pablo ra. 18 Nyebe ererao nguiã nguerecua je. —Pablo que acuanĩndu mbu ra. Mbae i chõ nda ndeje, i nguerecua je. 19 Ererecua que acuanĩndu querao eo rese ra. Pe jiri que eñi ñee ee ra. —¿Mbae ere u ñee seje re? i que ererecua ra. 20 Acuanĩndu que ñee ererecua je cote ra. —Judíos ra ñee ndeje. “Pablo embu ererecua chumunua mose. Ererecua ra Pablo cheẽ ñandu”, i ra nemiĩrĩ irĩ. 21 Ñee ñooño nda ndeje. ¡Echeẽ nda eremumbayãchĩ jê! Judios cuabê nda nyiquitirõ tirõ erese. Cuarenta. “Mbae mo nda nandeu eã mbei Pablo iquiayã mbei mose. Nandeyu eã mbei ra Pablo iquiayã mbei mose”, i tuchi judíos, i que acuanĩndu ererecua mbiirandu ra. 22 Soldados rerecua que ñee acuanĩndu je ra. —¡Equiriri chõ oso! ¡Erecheẽchĩ nda emo je jê! i que ee ra.

Pablo mondo ererecua Félix je

23 Ererecua que ñee ererecua ataque mo je cote ra. —Sã soldados icoquiatsu. Sã echoĩ Cesarea itondáruu. Sã doscientos choĩ ibi rĩ. Sã setenta choĩ ticuasato. Sã doscientos choĩ ira racuatirõ ji rerecua. Cesarea ra jêso itondaru, i que soldados rerecua ñee nda. 24 —¡Ticuasu jêisi mua Pablo rendacuã jê! ¡Pablo jendao turã nguia jê! Jendao turã ererecua Félix je, i que soldados rerecua ra. 25 Embesa ji que emondo Félix je ra. † ngue carta mbesa ra: 26 —Se rei Claudio Lisias. Co ambesa quia ndeje co, Félix. Mbia rerecua tuchi quiarei nde. 27 Co amondo quia ndeje co. Pablo, i equia ee. Judíos eisichĩ naeã. “Nandeiquia”, i rei ereaẽ. Se chõ ngue asiquisã nguiã. Romano ndei ae. Nyebe mbia asiquisã nguiã esi. 28 Judíos rerecua chumunua mose que Pablo arao ee ra. “¿Mbaerã mbia icuat e riqui Pablo je re?” ae rei ngue ñee ererecua je re. 29 “Pablo nandetarõ”, i rei que judíos quia ra. “Pablo nandeiquia”, i rei que judíos quia ra. Pablo siquiã ndaque mbae icuã ndese. Judíos cose ndare cheẽ nguire chõ ngue judíos paama i Pablo je ra. 30 Airandu que erese ra. “Judíos ra Pablo iquia”, i que mbia mo ñee seje ra. Nyebe aico nguiã nguiã mondo ndeje aque. Ae eicuã icuãte riqui Pablo je, ùquĩ je que acheẽ nda. “Jêso quia ñee Félix je”, ae chõ ngue ee ra. Hasta luego. † ngue carta mbesa ra.

31 Soldados que Pablo curuchoĩ isa ra. Nguerecua cheẽ nguire. Ngasẽ ngue Antípatris ra. 32 Soldados que nyoĩ ibi rĩ, ùquĩ ngue ngaẽ nyebi isamami nda. Ae nyoĩ ticuasato, ùquĩ ngue nyoĩ bei ngasẽ Pablo ruruchoĩ ra. 33 Ngasẽ

ngue Cesaréaa ra. Soldados rerecua chimbesea que emondo mbia rerecua je ra. Pablo abe que emondo mbia rerecua je ra. ³⁴ Mbia rerecua que mae huí carta echimbesea rese ra. —¿Ma jenda nde re? i que Pablo je cote ra. —Cilicia jenda rei se, i que Pablo ee ra. ³⁵ —Ae ñee icuã icuã nguia ndeje, ũquí ngasê mose ra ndecheê achandu ja, i que ererecua Pablo je ra. —Pablo jêtaequiatu tuchi Herodes chuchúaa, i que soldados je cote ra.

24

Judíos ererecua mbïcuãse Pablo rîí

¹ Cinco días mose que sacerdote rerecua ngasê Cesaréaa cote ra. Ananías, i equia sacerdote rerecua je. Ererecua ataque mo ngue ngasê erese ra. Tértulo abe que ngasê erese ra. Abogado rei Tértulo. Ngasê ngue ecuaê ñee ñooño Félix je ra. Pablo rîí. ² Soldados que Pablo curucuaê ererecua chumunua mose ra. Tértulo que ñee icuã tuchi Pablo rîí cote ra. Ererecua nda embïcuã nguia Pablo rîichará ña. Ñee ngue ererecua je ra. —Ndeturâte eriqui ure je co, Urererecua. Ndeaquiatute eriqui ur e je co. Urembiate equia co. ³ Nyebe “iaanye” ure bei nguia ndeje co, Félix. ⁴ Ureandu mbirí na. Urecheê oco eã nda ndeje nye. ⁵ Pablo quiarei siqui chooñoa judíos je. Judíos mbuchesea sea ja. Embïcuã icuã uchue. Nazarenos, i que judíos ataque mo je ra. Ũquí nderecua rei Pablo. ⁶ Pablo que Dios chuchua mbïcuã seríte rei ra. Nyebe ureisi nguia. Ureera rei que judíos rerecua chumunua mose ra. ⁷ Lisias tu chōchî soldados rurucuaê cote. Ureriquisã. Pablo rirō icuã ureo si. ⁸ “Jeñee icuãse mose Pablo rîí, jeñee ño oso Félix je”, i que Lisias ure je ra. Echeê Pablo je no. Ereirandu ra Pablo rese cote. Eicuã ndese, i rei que Tértulo Félix je ra. ⁹ —Ae beite, i ja judíos Tértulo cheê mose. Ñee icuã icuã ja Pablo rîí.

Pablo ñee ererecua Félix je

¹⁰ Ererecua que ñoomee Pablo je cote ra. —Nde echeê seje cote, i chō ñoomee nguia ee. Pablo que ñee ee cote ra. —Urererecua ima nde. Ndeaquiatute. Nyebe sebite riqui nguia secheê mose ndeje. ã ngue ñee ñooño nguia serîí nda. Echeê tasibishorō ndeje. ¹¹ Namō jiri que aso Jerusalén nda. Doce días. Acheê ñee ngue oso Dios je ra. Echeê ñee mbia je ae. Sã mbia nembirandu ae. “Ae beite” i ra mbia ndeje. ¹² Emo je que aico ñee icuã icuã eãte Dios chuchúaa ra. Mbia que ambucheê icuã eã nguia nyue ra. Judíos chumunuásaa que aico eã mbia mbïcuã icuã nda. Mbia chuchua ite re abe que aico eã mbia mbïcuã icuã no nda. ¹³ ã ñee ñooño ño nguia serîí. ã mae âte seicuã mo ndese resê. ¹⁴ Aque mii ndese chō aico resê. Dios cheê yasu rui bei chō aico nguia co. Dios cheê yasu quiarei eicuã eã. Dios rei ureru rerecua bei. Co aico Dios icua co. Co aico Moisés cheê icua co no. Co aico Dios cheê mbucheuasa chimbesea icua co no. ¹⁵ Co aico Dios icua ũquí na si co. Mbia raaque ra quera si no. Ũquí aicuate. Mbia icuã nda quera si. Mbia turã na si. Quera ja chō ndae. ¹⁶ Nyebe aico Dios cheê ndui bei co. Nyebe sechiã cuaãcuã i eã Dios si. Mbia si abe. ¹⁷ Cosete que aso a si ra. Muchos años. A achube a cote. Mbae mee mee sacua mbaecha reã je. Seresenda je. Dios je abe mbae mee. ¹⁸ Achimbuturã ngue Dios chuchúaa ra. Mbia eãsa. Mbia ambïcuã eã. Judíos Asia jenda que mae serese ra. Dios chuchúaa. ¹⁹ Sã ũquí ngaê serenei ndeje. Seicuã mose, sã ũquí ngaê ñee ndeje. ²⁰ Sã ã abe ñee ndeje. Seruruchoi rei que judíos rerecua chumunua mose ra. Mbae i âte que seje ra. “Mbae icuã ngue eresaã nda”, i eã ngue ererecua seje ra. ²¹ “Mbia mano je ra quera si, ae chō ndei nguia co.

Ūquí je chõ ngue sereru nguiã jêje”, ae que ererecua je ra. Ūquí i equia seje reae, i que Pablo Félix je ra. Félix rei ererecua.

²² —Emo mose ra acheê ndeje, i que Félix Pablo je ra. Félix jirandu tuchi rei Jesús chimbaaquiatu rese reae. —Sã soldados rerecua ru rã. Huee quia nda acheê nguiã cote. Mañi ño nda aba ndeje cote, i que ererecua Pablo je ra.

²³ Félix que ñee capitán je cote ra. —Pablo jêteaquiatiu bei jê. Jêhui jêhui jiri esi. Sã equiatiu ngaê ngaê erea. Mbae mondo mondo ee, i que Félix ra.

²⁴ Emo mos e jiri que Félix ngasembe Cesaréaa ra. Eresebe que eru ra. Drusila, i que eninisi je ra. Judía rei eninisi. —Pablo jendu rã. Pablo cheê tachandu rã. Jesucristo ríi tachandu, i que Félix ra. ²⁵ Pablo que tu ñee ee ra. —Sã mbia siqui turã Jesús rã si. Sã mbia ñimbirãcuã mbae icuã si. Dios ra mbia icuã mbuchao, embasi sacua, i tuchi que Pablo Félix je ra. Félix chiã ngue cuaãcuã i Pablo cheê mose ra. Nyebe ñee Pablo je. —Eso cote. Serecoñi mose ra acheembe ndeje, i que Félix Pablo je ra. ²⁶ —Pablo ra mbae isiquia mondo chee seje. Se embui sacua, i rei que Félix ra. Nyebe Félix “echu” i i bei nguiã Pablo je. ²⁷ Eí mbei que Félix quia ra. Dos años. Aquere que Félix ererecua eã cote ra. Porcio Festo que esiquicharõ nda. Félix que Pablo tarõ mbei mii nda. —Í nda judíos paama iã seje, i que ra.

25

Pablo ñee ererecua Festo je

¹ Festo que ngasê Cesaréaa cote ra. Félix rendaque re, mbia rerecuarã. Tres días mose que esi Jerusalén cote ra. ² Huee que sacerdote rerecua ñee icuã ja Pablo ríi nda. Judíos rerecua abe ñee icuã ja Pablo ríi. Festo je ñee ñee Pablo ríi. ³ —Urembia jiri rã. Pablo eru Jerusalén, i ja rei que sacerdote rerecua Festo je ra. Iquia nda eña nde. Ñeenda cúaa. ⁴ —Pablo tarõ ji ñi Cesarea pee. Aruã nda se. Namó jiri ra aso pee, i que Festo ra. ⁵ —Sã jenderecua abe nyoi serese Cesaréaa. ¿Mbae jenye quia Pablo je re? ¿Mbae icuã esaã nde? Nyao pee teñee seje, i que Festo ra.

⁶ Festo que siqui mbiríi Jerusalén nda. Ocho o diez días. Hue si que eru nyebi Cesaréaa ra. Isamami ngue esi mbia chumunuásaa ra. Ae que mbia rerecua cote ra. Ngoi que huee ra. —Pablo jendu rã. Echeê tachandu cote, i que mbia je cote ra. ⁷ Pablo que ique cote ra. Judíos Jerusalén jenda que ñee icuã icuã Pablo ríi nda. Maende rocõ mbae icuã naa mose. Ñee ñooño eríi. ⁸ Pablo que ñee echeê mose ra. Judíos cheê ngue esibishorõ nda. —Mbae icuã mo asaã eãte resê. Judíos chimbesa amumbayãte resê. Romanos nderecua cheê amumbayãte no ndesê. Dios chuchua abe ambãcuã eãte no ndesê, i que Pablo ra. ⁹ —¿Ndeso sereãte Jerusalén nde? Mañi ae ra se quia ndeje hue reae, i rei que Festo Pablo je ra. —Í nda judíos paama iã seje. Judíos tambia jiri, i que equia ndua ra. ¹⁰ Pablo que ñee ee ra. —Romanos nderecua raque jê. Aico raque jêsaa a. Jê nguiatu jeñee seje. Ñ jêingo raque seicuate ã. Mbae icuã mo asaã eãte judíos je resê. ¹¹ Se mbae icuã naa tuchi mose, ¿seiquia se jê! Judíos ñee ñooño mose serií, ¿mbaerã nda semondobe judíos je re? Semondo aroneate ee. Ererecua tuchi je semondo rã. Sã ae quia ñee seje, i que Pablo Festo je ra. ¹² Festo que ñee nyecuayã cuayã nguesenda je ra. Aquere que ñee Pablo je cote ra. —“Semondo ererecua tuchi je”, ere que seje. Taremondo ee cote, i que Festo Pablo je ra.

Pablo cheê tachandu, i Agripa

¹³ Aquere que Agripa si Cesaréaa ra. Ererecua rei ae. Berenice rese que esi ra. Festo rea. ¹⁴ Huee que itō mocoite ra. Festo que Agripa mbiirandu ja Pablo riñ nda. —A emo tarō ji ñi a. Félix que etarō mñi nda. ¹⁵ Seso mose Jerusalén, sacerdote rerecua ñee tuchi seje. “Pablo eiquia”, i rei ngue seje re. Judíos rerecua abe ñee icuã icuã tuchi Pablo riñ. ¹⁶ Acheẽ ndei ngue ee re. “Tei. Mañi ae ra mbia mo iquiachō nde. Mbia eicuã nenei eã mose seje. Ae ñee icuã nguia eriñ, sã ũqui ngaẽ ñee ee. Sã ñee nguia nyue sésaa”, ae que ee ra. ¹⁷ Judíos que ngaẽ a cote ra. “Isamami jeñee tachandu Pablo je”, ae que ee ra. “Pablo jendu rã”, ae que isamami serimba je cote ra. ¹⁸ Pablo ucuyãsa que juã ja rei cote ra. Ñee icuã tuchite rei nda Pablo riñ seje. Pablo chisaã icuã mo ngue embuchecuyã ñochi nguiã seje. “Mbia ra Pablo mbiicua tuchichĩ nde”, aechi ngue se re. ¹⁹ “Judíos rã eã ño Pablo. Judío ndua rã eã ño Pablo riqui nguiã ndua”, i chõ ngue judíos ñee ñee seje ra. Jesús, i que emo je ra. Judíos que ñee icuã icuã tuchi Jesús riñ nda. “Jesús que quera si manonde ra”, i que Pablo judíos je ra”, i que Festo Agripa je ra. ²⁰ —“¿Mañi ae ra se re?” aete que se ra. Nyebe que acheẽ ee ra. “¿Ndeso sereate Jerusalén nde? Huee quia nandechẽ”, ae rei que ee ra. ²¹ “Sã ererecua tuchi quia ñee seje. Semondo ee Roma”, i que Pablo seje ra. “Eno. Aremondo je nda ee re”, ae que ee ra. Nyebe ngue atarõ mbeite mñi nguiã, i que Festo Agripa je ra. ²² Agripa que ñee ee ra. —Se abe nda aque cheẽ achandu rã ña, i que Festo je ra. —Eno. Isamami nda echeẽ erchandu cote, i que Festo ra.

²³ Isamami ngue Agripa huiirao turã mingue ra. Berenice rese. Ererecua irao. Ererecua ataque chumunua mose que echoi ique ra. Soldados rerecua que chi ja huee ra. Mbia rerecua mo abe que chi ra. —Pablo jendu cote, i que Festo mbia je cote ra. ²⁴ Festo que ñee cote ra. —Tacheẽ ndeje, Agripa. Jẽ abe je tacheẽ, mbia rerecua. A eriqui a cote. Pablo, i equia ee. Ae riñ judíos riqui ñee mbeite seje. “Eiquia”, i bei seje. Jerusalén jenda abe ñee mbei eriñ. Cesarea jenda rã. “Sã mano”, i bei seje. ²⁵ ¿Mbae riñ nda aba eiquia re? Mbae icuã mo esaã eate resẽ. Ae quiarei ñee. “Semondo rã ererecua tuchi je”, i que Pablo seje ra. Nyebe tamondo ee. ²⁶ ¿Mbae i ra aba embesa mondo ee re? Mbae icuã ngue esaã eate. Nyebe Pablo aru nguiã jẽje a. Ndeje chõ ngue aru nguiã, Agripa. Echeẽ ee. † nda eicuã erembuchecua. † nda eicuã ambesa mondo ererecua tuchi je. ²⁷ ¿Ma nda aba etarõi mondochõ nde? Eicuã mbesa iriã mose, i que Festo Agripa je ra.

26

Pablo ñee ererecua Agripa je

¹ Agripa que ñee Pablo je ra. —¿Mbae i mbia quia ndeje re? Nde quia echeẽ cote, i Agripa. Pablo que o sui ñee ee ra. ² —Secheẽse rete ndeje, Sererecua. Judíos que ñee icuã tuchi quia serñi nda, Sererecua. ³ Nde quiarei ureicuasa tuchi. Judíos icuasa tuchi nde. Urecheẽ icuã icuã ereicuate nde. Nyebe nderosei nguiatu rã secheẽ andu.

⁴ Judíos maesate raque se, señetẽ mosenda bei. Serecua quitu. Jerusalén abe. ⁵ Se rei fariseo. Setiarõ namo mosendachõ ndei fariseo se. Judíos seicuate raque. Fariseos achõ ño ureramei ñee mumbayã mbei. ⁶ “Mbia raaque ra ambuquera si”, i que Dios ureramei je cose ra. Dios ra ucheẽ nyabiã. Nyebe “ae bei” ae nguiã ee. Ũquí nñi ño judíos riqui nguiã seucuyã ã. Ũquí nñi ño mbia riqui nguiã ñimbicua seje ã. ⁷ “Mbia raaque ra ambuquera si”, i que Dios ra. “Ae bei”, i ja Israel jenda quia ee ã. Nyebe Israel jenda riqui

bei nguiã echeẽ ndui si ã. “Mbia raaque ra Dios mbuquera si”, ae sequia se abe co. Ûqui je chõ judíos icuã icuã ndiqui nguiã seje, Agripa. ⁸ ¿ÿẽ abe je Dios mbia raaque mbuquera aroneate re?

Seicuã tuchi Jesús quiato je nyii, i Pablo

⁹ Se abe que seicuã icuãse rete riqui Jesús quiato je cose ra. Nazaret jenda chõ Jesús re. ¹⁰ Seicuã icuãte que ee Jerusalén nda. Sacerdote rerecua que ñee seje ra. Nyebe ngue aico nguiã Jesús quiato tarõ tarõ mbeite cose. Sacerdote rerecua cheẽ nguire. Jesús quiato iquia iquia mose, “coche rei” ae que sequia ra. ¹¹ Jesús quiato que airuã nua tuchi quia ra. “Í nda hui Jesús si”, ae rei que sequia ra. Sucha tubiriã ngue ambuchesea sea quia ra. Jesús quiato je seicuã sacuã. Judíos chumunuasa mbuchesea sea. Paama ae tuchi que sequia Jesús quiato je nyii ra. Isho tuchi que aico oso oso Jesús quiato requia ra. Seicuã tuchi sacuã ee.

Aico uba Dios rese co cote, i Pablo

¹² Emo mose ngue aso rei nguiã Damáscoo. Sacerdote rerecua semondo mose. ¹³ Tacheẽ tuchi ndeje, Sererecua. Tenda nandeite re mose que tata mo tu seresae ra. Ibate si que seresae ra. Seresenda abe resae. Tata rendi que ureresae tuchi chõ nguiã tenda si. ¹⁴ Tata rendi rese ma e mose que urecoi íbii ra. Echeẽ mo ngue achandu ra. Hebreo cheẽ. “Saulo, Saulo, ¿mbaerã ndeicuãte riqui seje re? Nde sí chõ erechimbasi mbasi nguiã aque. Ticuasurã tuchi quiarei nde aba cheẽ mumba mose. Sã ticuasurã riqui nambacua mbuti no. Sã eriqui hui mbaba ira racua echi no. Ûqui na tuchi quiarei nde”, i que seje ra. ¹⁵ “¿Aba nde re?” ae que ee ra. “Jesús rei se. Ae je ndeicuãte riqui”, i que seje ra. ¹⁶ “Ehuã na. Aico nyecua ndeje a. Serenei nenei sacuã mbia je. ‘Jesús rese que amae nda’, ere bei quia mbia je. Mbae mo abe ra ambuchecua ndeje. Ûqui abe teresenei senei mbia je. ¹⁷ Judíos eã je taremondo. Secheẽ nenei nenei sacuã. Ûqui o taisi eicuã icuã mose ndeje. Judíos o abe taisi eicuã icuã mose ndeje no. ¹⁸ Taremondo judíos eã je. Terembaaquiato quiatu. Í nda eriquiã mbae icuã ndese. Í nda eriqui mbae turã ndese. Í nda eriquiã aba mbiriã irisa rui. Í nda eriqui Dios rui. Í nda Dios icua. Í nda eicuã ambutiã esi. Í nda Dios ùqui ngue recoe umbaerã”, i que Jesús seje ra.

Pablo Dios cheẽ senei tuchi Agripa je

¹⁹ Ibatenda cheẽ ngue amumbayã nda, Agripa. ²⁰ Dios cheẽ ngue asenei senei tuchi mbia je ra. Mbia Damasco jenda je. Jerusalén jenda je abe no. Judea rurubinda je abe no. Judíos eã je abe no. “jÿeicuã si jÿehui chõ jÿe! Dios icha rui jÿingo. Jÿingo turã. ‘Dios icha rui eriqui’, i nda mbia jÿeje chã”, ae que ee ra. Embaaquiato quiatu. ²¹ Nyebe judíos seisi nguiã Dios chuchúaa. Nyebe eriqui nguiã “nandeiquia” i seje. ²² Dios que serea quiatu bei quia ra. Namó abe. Nyebe aico echeẽ nenei nenei mbei mbia ja je. Mbaecha je. Mbaecha reã je abe. Moisés cheẽ ndui si aico ñee ñee mbia je co. Dios cheẽ mbuchecuasa rui si aico ñee ñee mbia je co. ²³ Í ngue Dios cheẽ mbuchecuasa embesa cose ra: “Mbia ra Cristo mbasi mbasi. Aquere ra mbia eiquia. Ae rane nda quera si mbia raaque si. Ae ra mbia mbiirandu nguico mose uquera rí. Judíos mbiirandu. Judíos eã ab e mbii randu”, i que Dios cheẽ mbuchecuasa mbia je cose ra, i que Pablo Agripa je ra.

²⁴ Festo que ñee Pablo je cote ra. —Erequiachã ño nguiã co, Pablo. Embesai rese mae tuchire erequiachãte equia co, Pablo, i que Festo tasẽ Pablo je ra. ²⁵ —Aquiachã eãte se resẽ, Festo. Acheẽ nyecuate raque jÿeje. Dios cheẽ tuchi

chõ asenei nguiã jêje co. ²⁶ A Agripa riqui raque a. Nandererecua tuchi. Echeê ee. Ae riĩ aico ñee jêje, ùqui ngue Agripa icua tuchi ra. Nyebe sesiquiche eâte riqui nguiã ñee ee. Secheê icua jate equia co. Jesús que ñee nyecuayã eã mbia je ra. Jesús mbae saã nyecuayã eã, i que Pablo ra. ²⁷ —¿Dios cheê mbuchecuaa cheê ndebite re, Agripa? Ndebite que ra, i que Pablo ee ra. ²⁸ —“Jesús quiato ra nde cote”, ¿erechĩ equia seje re? i que Agripa Pablo je ra. ²⁹ Pablo que ñee ee ra. —Nde miĩ eã. Seandusa ja. Ajengu ja a. Jesús quiatorã na jê, se rã si, aechĩ nguiã jêje. Jengasa ra chi eã nguiã, se rã si, i que Pablo ra. ³⁰ Pablo ñeende que ererecua juã cote ra. Agripa. Festo abe. Berenice abe. Ae chi ngoi erese, ùqui abe que juã nda. ³¹ Nyoĩ que pe jiri cote ra. Ñee ñee nyue. —Pablo mbae icuã saã eã tuchi chõ nguia re. Eiquia aroneate quia eriqui re. Etarõ abe aroneate quia eriqui re, i que ererecua nyue ra. ³² Agripa que ñee Festo je ra. —“Semondo rã ererecua tuchi je”, i chõchĩ Pablo. I nda aa chõ nandehui esi, ñee eã mose. “Semondo rã pe ererecua tuchi je”, iã mose, i que Agripa ra.

27

Pablo mondo Roma quti

¹—Pablo tamondo Italia, i que ererecua ra. —Jëisi suruchoi, i que soldados rerecua mo je ra. Julio, i que soldados rerecua je ra. Augusto rimba, i que ùqui soldados je ra. Ermo abe que ecuruchoi isi ra. Se abe que aso erese ra. Lucas rei se. ² Aristarco abe que oso urerese ra. Macedonia jenda rei ae. Tesalónica, i sucha tubiriã je. Ureique ja que canoa cuasu ye ra. Adramitio jenda rei canoa. Asia quti que urecuata ra. Sucha mbuchesea sea sacuã hue jenda. ³ Isamami ngue urecuasẽ Sidón cote ra. Julio turãte que Pablo je ra. Ecuatasa que eriqui ra. Nyebe Pablo si uquiato rea. Equiatio que etequiatu ra. ⁴ Urecuata si que ama ndui ra. Quiririã ngue ureriquisã nda. Canoa mbucuatayã. Nyebe ejoõ acua mo uresiichã nguiã. Eibichi que ureso quia cot e ra. —I nda quiririã nandebutiba eã, ure que ra. Chipre, i que ejoõ je ra. ⁵ Cilicia que urechucuã cote ra. Panfilia abe que urechucuã nda. Urecuasẽ ngue Mira cote ra. Licia, i que ibi je ra. ⁶ Huee que soldados rerecua canoa cuasu nongue tea ra. Alejandria jenda rei canoa. —Oso ra Itália, i que ure je ra. —Aque ye jëingue, i que ure je ra. Ae ureso nguiã eye cote. ⁷ Ureitõte que oso quia ra. Ureque atate que ama ndisha rasa ra. Urecuasẽ nyee que Gnidoõ ra. Quiririã mbeite que ureruba quti ra. Nyebe ejoõ acua mo uresiichã nguiã. Creta, i que ejoõ je ra. Salmón ngue urechucuã nda. ⁸ Ejoõ acua que uremama jiri ra. Quiririã icuã icuã ngue ure je ra. Buenos Puertos que urecuasẽ cote ra. Lasea, i que hue rurubinda je ra. Sucha tubiriãte que ra. ⁹ Ureitõ mocoĩte que huee ra. Quiririã tuchite chee que ra. Aba ireĩte que quiririã cote ra. Ama mose. Nyebe que Pablo ñee mbia je ra. ¹⁰—Nandecuata i i mose ra canoa ñimĩ nandé je. Mbae ra ñimĩ ja canoa yenda. ¡Nande abe ra nandemanochĩ jê! i que Pablo ee ra. ¹¹ Soldados rerecua que Pablo cheê mumba ra. Canoanya cheê mumbayã. —Nyao rei, i que soldados rerecua ra. ¹²—Canoa ndua icuãte a. Quiririã aronea. Nyao rei a si. Ma nandecuasẽ ãte Fenice. Huee nda nandecu are jiri nguiã. Huee que quiririã eã jiri. Nyao huee, i que ureataque ra. Fenice rei sucha tubiriã. Ejoõ acua jenda.

Quiririã mbia iquia serĩ

¹³ Quiririã ngue uba cote ra. Ichu chooño jiri que cote ra. —Nandecuataa jirichĩ cote, i que ureataque ra. Canoa que embucuata cote ra. Ejoõ acua ibi

que ureso quia ra. ¹⁴ Urecuata ramo mose que quiririã icuã tu ure je ra. Ejoõ acua quti que eru ra. Noreste, i que aque quiririã je ra. ¹⁵ Quiririã ngue canoa mbucuatayã ureruba quti ra. —Sã quiririã ae nanderuruchebi serao, ure chee que ra. ¹⁶ Ejoõ quitera quti que ureso ra. Ejoõ ngue quiririã nyoote ure si ra. Clauda, i que ejoõ je ra. Canoa ñetê ngue urembuti serao quia ra. Canoa cuasu riita rese. Ejoõ quitera quti que canoa ñetê urechuchã canoa cuasu ye cote ra. Eusite raque. ¹⁷ Canoa ñetê ngue urechuchã canoa cuasu ye ra. Canoa cuasu que echucua chucua ra. —Quiririã nda embuquiatachĩ nande je re, i que ra. Mbia siquiche tuchi que ra. —¡Eriiri iri quti ra nyaochĩ jê! Nandejaã ndae, i que nyue ra. Nyebe que tiru canoa aronda mbuquichi cote ra. —Sã canoa ae si quia nandererao surucuata, i que nyue ra. ¹⁸ Isamami abe que quiririã icuã icuã mbeite ra. Nyebe mbia mbae mombo mombo nguiã ii. Canoa yenda. Emumbebi sacua. ¹⁹ Aquere que ureitõ si no nda. Isamami ngue mbae uremombo mombo ja cote ra. Canoa mumbebi tuchi cote. ²⁰ Ureitõ mocoĩ mocoĩ tuchi ama ndisha riite re. Itõ nguicoi bei que ure je ra. Quiririã mbei. Pã i bei. Tenda checuayã mbei que ra. Nyasi tata abe checuayã bei que ra. —Nandecuaeã mbeichĩ nda ibi je re. Ama ndisha riite re ra nandemanochĩ nde, ure chee que ra.

²¹ Mbae que ureu eã mocoĩ mocoĩ nda. Nyebe que Pablo juã ñee mbia je ra. Canoa yenda je. —Seresenda, secheẽ ngue jemumbachĩ nda. Secheẽ aba mumbayã mbichĩ. Crétaa nandecuchõ mbichĩ. † nda canoa yenda nandemomboate ii. Mbae mbuquiachã nondechĩ. ²² ¡jeñimbirãcuã ño jê! Nande mo nda mano eã. Canoa nda quiachã. Nande quiatu ra nandequiachã. ²³ Dios rimba rei se. Dios que ángel mo mbu ñee seje isa ra. ²⁴ “¡Eresiquichechĩ nda jê, Pablo! Eremano eã ndae. Erecuasẽ nyee r a ererecua Roma jenda je. Nderiĩ nda nderesenda mo manoã. Dios ra eteaquiatu ja,” i que ibatenda seje ra. ²⁵ Seresenda, ¡jeñimbirãcuã ño jê! Dios aicua tuchite quia co. Dios ra ucheẽ nyabiã nande je. Angel cheẽ nguire ra nandemanoã. ²⁶ Quiririã nda nandemondo ejoõ acua mo ndese, i que Pablo ra.

²⁷ Ureitõ mocoĩ mocoĩte que ama ndisha riite re ra. Catorce días. Quiririã ngue urerurucuata chõte quia ra. Adria, i que ama ndisha je ra. —Ama nimia nanderubite rei reae, i que canoa yenda ra. Itondiite mose. ²⁸ Ama ndiite que embuchecha ra. ¿Ecuã tuchi ere? i que nyue ra. Treinta y seis metros. Pe jiri que embuchecha si no nda. Veintisiete metros cote. ²⁹ —¡Canoa nda cua ichĩ sita je jê! ¡Quiatachĩ nda jê! i que mbia nyue ra. Nyebe mbae usi mondo mondo nguiã ii canoa ndiquisã sacua. Mbae usi cuatro. Anclas, i que ùqui je ra. Ae ecuaa chi nguiã canoa ndese embutiba. —Quiatuchu, nyaashĩ, i tuchi que equia ra. ³⁰ —Nandechã nyecuayã, i que canoanya rimba ra. Nyebe canoa ñetê mbuquichi mondo ii. —Mbae usi urechucua mondo ii. Urechucua canoa ai rese, i que urembiriĩ iriĩ nda. —Nandechã nyecuayã, i chõ mbei que equia nyue ra. ³¹ Pablo que ñee soldados je ra. Ererecua abe je. —Á chichõ eã mose canoa ye, jeñimi ja rae. Ama nda ¡jeiquia, i que Pablo ra. ³² Ae soldados canoa ñetê sã nyisia nguiã. Emondo ii. Hui esi cote.

³³ Nyaashĩ namo mose que Pablo ñee ja mbia je ra. —Mbae mo jêu jiri cote. Jeniãcuã mocoĩ mocoĩte que. Mbae mo ngue jêuãte catorce días. Jengueãte que catorce días no. ³⁴ Mbae mo jêu rã cote ae. † na jêquirãcuã jiri. Mbae mo nda jêĩ eã jêje. Jemo nda mano eã, i que Pablo ee ra. ³⁵ Aquere que Pablo mbichae sirõ nda. ¡aanye, i que Dios je ra. Mbia resa rae. Nyisia que ra. U que cote ra. ³⁶ Pablo cheẽ ngue mbae oseĩ uquia mbia je ra. Mbia ja que mbae u

cote ra. ³⁷ Urecuabête que canoa yenda ra. Doscientos setenta y seis que ure ra. ³⁸ Mbia ja que mbae u tuchi ra. Quiata a raanguia que emombo mombo ii cote ra. Canoa mumbebi sacua.

Canoa jaã

³⁹ Ureachashĩ ngue cote ra. Ibi rese que uremae cote ra. —A ureicuayãte, i que mbia ibi je ra. Eicoinda rese que uremae nda. Ama nimia turã. —Nyao nguichi huee. Eicoinda, i rei que ererecua ra. ⁴⁰ Anclas sã ngue echisia sia ra. Anclas recha bei ii. Canoa mbuchaa chaasa que embuquiata ra. Tiru icoi que embuchesecope quiririã je ra. Canoa ngue ngata ama nimia turã nguiti cote ra. ⁴¹ Iaãcuã eicoinda que canoa jaã nda. Eriquiraa eãsaa. Canoa ai que jaã tuchi ra. I rebera tubiriã ngue ra. Canoa ndiita mbaaba aba. Eriita que nyiquiiso ra. Quiata que ra. ⁴² Soldados que ñee cote ra. —Ã ecuasa riqui ã nae, jã nandeiquia ja jê! I nda echoi eã ita. Oso chee eã, i rei ngue soldados re. ⁴³ Soldados rerecua que Pablo iquia sereã nda. Nyebe ñee nguã soldados je. —¡Ecuasa mo nda jêiquiachĩ jê! i que soldados je ra. Ererecua que ñe e mbia je cote ra. —Eita aquiatu jêso ii. Jêso usê ama nimia ndese. ⁴⁴ Eita aquiatuã, jêso mbebi ira rese, i que soldados rerecua ure je cote ra. Eĩ ure ja que usê ama nimia ndese cote ra.

28

Ngasê ejoõ ácuua Máltaa

¹ Resê ja que ama nimia ndese ra. —Malta, i que a je ra. Ejoõ acua je, i que hue jenda ure je ra. ² Hue jenda turãte que ure je ra. Tata que emendi ure je ra. Urechee sacua. Tiquindiiseite que eriqui ure je ra. ³ Pablo que nyea queru mbuchuuta ra. Nyea mbucha mose que mbei usê asi Pablo echĩ ra. Mbei que Pablo o shiu ra. ⁴ Eo resebe tuchi que eñi nda. Nyebe hue jenda ñee ñee nyue. —Mbia iquia iquiasa Pablo reae. Oso chee que ama ndisha si no. A mbei riqui eshiu a no. Mano nda cote reae. Huũcuã mose, i rei que hue jenda nyue ra. ⁵ Pablo que mbei mbaba tátaa ra. Erasiã mbei que Pablo je ra. ⁶ Mbia que mae nguiatu Pablo rese ra. —Ma eruru. Embusiate rei rae. Mano ndae, i rei que ra. Mbia que mae nguiatute rei u nguã erese. Erasiã mbeite que ee ra. Nyebe mbia ucheê mbuchebi nguã. —Dios mo ndei Pablo, i que mbia cote ra.

⁷ Hue robeichõ ngue ererecua mbae ibi ra. Ejoõ acua rerecua. Publio, i que ererecua je ra. Urererao que uchuchúaa ra. Urembuquiaru turãte que ra. —Jêitõ mocoĩ jiri, i que ure je ra. Tres días que ureitõ erese ra. ⁸ Publio ru rasite que ra. Eracute que ra. Eruushi ruquite que ra. Pablo que oso erea ra. O que echono earõ nda. Ñee ngue Dios je ra. Nyerõ ngue cote ra. ⁹ Aquere que mbia rasi ngaẽ ngaẽ ja Pablo je cote ra. Ejoõ jenda ja. Dios que embucherõ ja ra. ¹⁰ Mbia que mbae mee mee tuchi ure je ra. Urecuata mose que mbae chuchã nyuchã tuchi canoa ye ra. Urechurã.

Pablo ngasê Rómaa

¹¹ Ejoõ acua que urecu bei ra. Tres meses. Canoa cuasu mo abe que chi beite aque rĩ nda. Alejandría jenda rei aque canoa. Dios Nyeremo, i que aque canoa je ra. Aque canoa ye que ureso cote ra. ¹² Siracusa, i que sucha tubiriã mo je ra. Huee que urecuasê nda. Huee que ureitõ mocoĩ nda. Tres días. ¹³ Hue si que ureso siquiibi cot e ra. Urecuasê ngue Regio ra. Huee que ureitõ nda. Isamami ngue quiririã ureichu urequite quiti ra. Canoa maña turã. Co mi ngue ureque ama ndiite re ra. Urecuasê ngue Puteoli ra. Huee

que urequichi bei canoa si cote ra. ¹⁴ Jesús quiato mo ngue uretea huee ra. —Jenguchō na urerese, i que ure je ra. Ae urecuchō nguiã una semana erese. Aquere que ureso Roma nguiti cote ra. Ibi rĩ. ¹⁵ Jesús quiato que jirandu urerese cote ra. Roma jenda. Nyebe ecuaē nguiã urerobeishĩ. Foro de Apio, huee que urerobeishĩ nda. Tres Tabernas, hue abe que urerobeishĩ ishĩ nda. —Iaanye, i que Pablo mae mose Jesús quiato rese ra. Pablo ia tuchi erobeishĩ mose. ¹⁶ Urecuasē ngue Roma cote ra. Sucha tubiriã tuchi que Roma nda. Soldados rerecua que ecuaasa mondo ja mbia icuã ndaarōsa je cote ra. Pablo mbuchao que ra. —Ndechuchua chō eico nde, i que ee ra. Soldado mii ngue Pablo reaquiatu bei quia ra.

Pablo Dios cheē senei senei Rómaa

¹⁷ Urecuasē namo jiri mose que Pablo judíos rerecua munua j a ra. Roma jenda. Pablo que ñee ee ra. —Seresenda, mbae icuã ngue asaã eãte judíos je ra. Nanderamei ñee abe que amumba eãte ra. Judíos que semeño Romanos je ra. Jerusalén seico mose. ¹⁸ Romanos ngue ñee tuchi seje ra. “Nandehui esi”, i rei ngue serĩ cote re. “¿Mbaerã nda nandehi re? Mbae icuã mo ngue esaã eãte”, i que serĩ nda. ¹⁹ “¡Jēhuichĩ nda esi jē!” i bei que judíos quia ra. Romanos je. Judíos quia ñi hui sereãte nguiã sesi. “Semondo ererecua tuchi je”, ae chee que se ra. Ererecua saa ra acheē icuã eã ndei judíos rĩ. ²⁰ Nyebe “Jenyu. Tamae jendese. Tacheē jēje”, ae que jēje ra. Mbia mano je ra quera si, nande chō ndaque equia co. Ūquí je chō secuasa riqui nguiã co, i que Pablo judíos je ra. ²¹ Judíos rerecua que ñee Pablo je ra. —Jerusalén jenda que ucheē mbesa eãte imbu ure je ra. Ae ngaē ngaē nguia hue si, ũquí abe que ñee icuã eãte quia nderĩ nda. ²² Ndecheē urechandu rã. Mangue chooño eã mbia ñee icuã icuã jeni. Jesús quiato rĩ. Nyebe echeē ure je, i que Roma jenda Pablo je ra.

²³ —Aque mose ra urechu ndecheē andu, i que judíos Pablo je ra. Aque mose que ecuaē jate cote ra. Pablo chuchúaa. Isamamimbe. Pablo que embaaquiatu quiatu tuchi ra. Tenda mondo chee. Jesús rĩ ngue eriqui ñee ñee mbia je ra. Moisés chimbasa que esenei senei ee ra. Dios cheē mbuchecuaasa chimbasa abe que esenei senei ee ra. † nda mbia Jesús icua. —Dios quiarei ererecua tuchi, i tuchi que Pablo judíos je ra. ²⁴ Emo emo ngue Jesús isi ra. Pablo cheē mose judíos je. Eataque que Pablo cheē isiteã teã nda. Ichōño nei equia ee reaē. ²⁵ Pablo cheē ndui ja eã ngue ra. —Nyao rei erecha, i que eataque ra. Nyebe Pablo ñee ee. —Espíritu Turã ngue Isaías mbucheē turã nanderamei je cose ra. Ēĩ ngue ñee nda:

²⁶ Eso rã ñee judíos je: “Secheē nda jeñandu rei nguiã.

Jeñandu eã naanguia rae.

Jemae ndei nda erese re.

Jemae eã naanguia ra erese.

²⁷ Jeñia ãtãte.

Aba cheē mumba mumba.

Jendesa jemungue munguete.

Secheē jēicua sereãte.

Jemba sereãte seicha rui.

Nyebe aico nguiã jembucheroãte”, i que Dios ra, ere ee,

i que Isaías chimbasa ra, i que Pablo ra. ²⁸ Pablo que ñee mbei ra. —Tacheē jēje, judíos. Judíos eã je ra Dios cheē uresenei senei cote. Ūquí nguia ra eya tuchi erese. † nda Dios erirō eicuã si, i que Pablo ra. ²⁹ Pablo cheē nii ngue

judíos choi guiã ñee icuã icuã nyue ra. ³⁰ Dos años ngue Pablo riqui huee ra. Roma. Mbae isiquia que emondo mondo tuchuacha je ra. Huee eico mose. Pablo iate que eriqui ra. Mbia nyoï nyoï mose erea. ³¹ Mbia mo ngue Pablo cheë siquisã eãte ra. Jesucristo rññ ngue eriqui ñee ñee mbia je ra. —Dios ra mbia rerecua tuchi, i que equia mbia je ra. —¿Mbaerã ereico ñee Jesús rññ nde? i eã ngue emo Pablo je ra.

LA CARTA DEL APOSTOL SAN PABLO A LOS ROMANOS

Pablo ucheẽ mbesa mondo Roma jenda je

¹ Co aico co mbesa jẽje co. Se rei Pablo. Jesucristo rimba rei se. Dios que seirabo ra. Ucheẽ nenei nenei sacua. Dios que semingo icue ra. Ucheẽ turã nenei nenei sacua. ² —Secheẽ turã tamondo mbia je, i que Dios cose ra. Ucheẽ nenei neneisa je ñee. Echeẽ ngue ique cote ra. ³ Dios cheẽ turã nandembiiranduchi Jesucristo riĩ cote. Dios riirĩ ndei Jesucristo. David riirina ngue tu íbii cote ra. ⁴ Jesucristo manonde, Espiritu Turã ngue embuquera ra. Dios quirãcuã je que embuquera ra. Dios riirĩ ndei Jesucristo. Nyebe Espiritu Turã embuquera nguiã. Mbia mbiirandu randu sacua Dios riirĩ ndese. ⁵ Dios turãte que ure je ra. Jesucristo riĩ. Nyebe ureirabo mingo nguiã ucheẽ nenei nenei sacua. † nda mbia mangue chooñoa jenda abe Jesucristo icua. † nda mbia mangue chooñoa jenda abe Jesucristo cheẽ mumbayã no. ⁶ Sã jẽ Jesucristo cheẽ jemumbayãte no. Sã Dios jẽirabo no. Jesucristo rimbarã. ⁷ Co ambesa mondo quia Rómaa jẽje co. Dios chesecua tuchi chõ jẽ nde. Dios que jemingo icue uquiatorã nda. Nanderu chõ Dios re. Nandererecua chõ Jesucristo re. Sã ñquĩ turã mbei riqui jẽje. Sã ñquĩ ndiqui jembia tuchi.

Pablo oso sete raque Rómaa

⁸ —Jesús quiato tuchi chõ ñquĩ ndiqui re, i jate mbia quia jeniĩ ã. Mangue chooñoa jenda abe. Nyebe aico nguiã gracias i tuchi Dios je co. ⁹ Dios cheẽ asenei senei mbeite quia mbia je co. Eriirĩ nii. Dios resa rae aico embesa mbesa jẽje a. Aico ñee mbeite Dios je jeniĩ co. ¹⁰ Aico ñee ñee mbeite Dios je co. † nda Dios semondo jendea. Semondose mose ra aso jendea. ¹¹ Seso sete raque jendea. Jembaaquiato quiato sacua Jesús riĩ. Jembirãcuã sacua Jesús riĩ. ¹² Seso sete jendea. Ñimbia sacua nyiese. Nandeico tuchi sacua Jesús rui. Nande Jesús nandeicuate resẽ. ¹³ Taso jendea, ae beite rei que se quia ra. Taembaaquiato quiato Jesús riĩ, ae rei se. Eĩ nda Jesús jẽicua secheẽ nguire. Sã mbiamo Jesús icua tuchite secheẽ nguire no. Mbae seriquisã quisã mbeite. Nyebe asoã mbeite nguiã jendea. ¹⁴ Jesús cheẽ nenei nenei si ahui aroneãte. Tasenei senei tuchi mbia ja je. Griego ja je. Mbiamo abe je. Eaquiato je. Eaquiata abe je. ¹⁵ Nyebe aico nguiã icoquiature co, Jesús cheẽ nenei nenei sacua jẽje. Roma jenda je.

Jesús cheẽ quirãcuã tuchi

¹⁶ Aireĩ ireĩ eãte Jesús cheẽ nenei nenei mbia je. Jesús cheẽ quirãcuã tuchi quia ique nguiã aba chianguĩ rĩ. Aba rirõ sacua mbae icua si. Judíos je rane ngue Jesús cheẽ quirãcuã nda. Judío eã je abe no. ¹⁷ Jesús cheẽ nandembiirandu quia ã. Nande Jesús icua mose, Dios ra nandesi turã uquiatorã. Mbae turã mo nandesaã eãte raque.

Ae Jesús icua quia nae, Dios ra ñquĩ isi turã tuchi.

Ñquĩ nda siqui bei cote,
i ñi embesa ji re.

Mbia icua tuchi Dios je

18 Ae siqui Dios rã eãte nae, ùquĩ nda Dios mbasi ja. Ae siqui icuãte quia nae, ùquĩ nda Ibatenda mbasi ja no. Ûquĩ nandẽicuate quia nande co. Ichõĩnosa reã ñee andu sereãte quia ñene. 19 Jirandu tuchi rei que Dios rese ra. —Eĩ ae chõ nguiã co, i rei que Dios ee ra. Dios icua sereãte quia ñene. 20 Dios rese mbia mae aroneãte raque. Dios quirãcuã ndese mbia mae aroneãte raque. Mbia ra Dios icua uchiangui re, echiao rese mae mae mose. Dios que mbae chao ja nyii ra. Aque mose bei mbia riqui mae mae Dios chiao rese co. Nyebe eriqui nguiã “Dios rese ureiranuãte”, i aroneãte. 21 Jirandu tuchi rei que Dios rese resẽ. Ñee turãyã tuchi chõchĩ Dios riĩ. Gracias iã ñochĩ Dios je. Nyebe eriqui nguiã ndua icuã icuã mbei. Nyebe eriqui nguiã itongui rĩ mbei. 22 “Ureaquiature” ichõĩño ñochĩ equia ùquĩ. Eaquiaturã ño siqui nguiã ùquĩ. 23 Hui tuchi que Dios si ra. Ae manoã mbeite quia, aque si. Sererecua i chõchĩ mbae ao ao ji je cote. Ae ra mano, ùquĩ je chõ eriquichĩ nguiã “sererecua”, i. Mbia raanguia je. Quiaa riĩnda je chõ eriquichĩ nguiã “sererecua” i. Ae mbebe quia. Ae uchã nguiã. Ae nguata quia nguẽ rese. Ûquĩ je chõ eriquichĩ nguiã “sererecua” i.

24 Nyebe Dios hui nguiã esi cote. Mbae icuã naa naa mbei sacua cote. 25 Ñee ñooño tuchi Dios riĩ cote. “Nandererecua” i chõchĩ Dios chiao je cote. “Nandererecua” i rocoĩ Dios mui je. “Nandererecua” i bei chõ mbichĩ aba quia Dios mui je. Amén.

26 Nyebe Dios erecha ja nguiã cote. Oco chooño sacua mbae icuã ndese. Ubi icuã ndese. Cuña mo oco oco nyiese si. Cuña ngu raã naa cuña nongue je. Siqui rocoĩ ngu rese. 27 Hombre mo abe hombre nongue mo oseĩ oseĩ. —Seninisirã nde, i ñee ñee uchue si. Oco oco nyiese. Siqui rocoĩ ngũinisi rese. Icha tuchi Dios si. Nyebe Dios riqui nguiã embasi tuchi co cote.

28 Dios rese jirandu sereã. Nyebe Dios hui nguiã esi. Siqui bei bei sacua ubi icuã ndese. Nyebe eĩ eĩ nguiã nyue mbae icuã ndese. 29 Eicuã tuchi eriqui ùquĩ. Ico chooño tuchi equia cuña ndese ùquĩ. Ndua ndua icuã mbei tuchi equia ùquĩ. —Aque rã nda se chã, i beite equia emo mbae je ùquĩ. Mbia mbasi chooñote equia ùquĩ. Mbaecha ucuayã ñooño tuchi equia ùquĩ. Mbia iquia iquia chooño tuchi equia ùquĩ. Paama i chooñote equia uchue ùquĩ. Mbia mbiĩrĩ irĩ ñote equia ùquĩ. Mbia ucuayã ñooño mbeite equia ùquĩ. 30 Ñee ñooño mbeite equia mbia mo nui ùquĩ. Dios ucuayã tuchi equia ùquĩ. Ñee icuã icuã mbeite equia aba cheẽ ndibishorõ ùquĩ. Ucuasu raã naa ñooñote equia ùquĩ. “Se quiarei i tuchi”, i beite equia ùquĩ. Emo mbiicua icuã mbeite equia ùquĩ. Ngu cheẽ mumba mumba chooñote equia ùquĩ. Usi cheẽ abe mumba mumba chooñote equia ùquĩ. 31 Eaquiaturã tuchite ùquĩ. Ucheẽ mumba mumbate ùquĩ. Emo je eturã eãte riqui ùquĩ. Emo icuã si eriqui tesareĩate ùquĩ. Eya eã eãte riqui emo ndese ùquĩ. 32 —Ae ùquĩ saã saã nguia mbae icuã nae, ùquĩ nda amondo tata cuasu, i que Dios ra. Dios cheẽ icuare equiatu eriqui nguiã mbae icuã naa i ite. —Sã emõ abe mbae icuã naa naa nandechabe, i chee chee.

2

Dios mbia cuata tea ja

1 —Dios ra ùquĩ mbasi rã ña, erechĩ nda ùquĩ mbia icuã je. Nde i mose, nde abe ra ndeicua nyecua mbia je. —Seturãte aico co, jerechĩ nda jẽ! —Ùquĩ ndiqui mbae icuã naa naa ùquĩ, nde i mose, ùquĩ icuã sí chõ eresaã saã nguiã

nde abe aque. ²—Ae ũquí icuã saã saã nguia, ũquí tambasi, i mose Dios, Dios ra embasi chooño eã. Maende erese quia ra embasi. ³—Dios ra ũquí mbasi rã ña, erechĩ nguia huee. Eraã sí tuchi chõ ereicochĩ nguia ũquí sí raã naa aque. Nde abe ra Dios nembasi ũquí ndese resẽ. ⁴Dios ia eãte raque aba icuã ndese. Dios aba mbasi jei eã ndaque aba icuã mosebe. Ñimbirãcuãte aba icuã je. Coche ñene, ereã ñochĩ Dios chimbirãcuã mose ndeje. —Eyayã jé nda hu#cuã ndese chã, i Dios quia nderĩ co. Nyebe eriqui nguia ñimbirãcuã ndeicuã je. ⁵Ndechĩã átã tuchi chõchĩ. Ndeico sereã tuchi chõchĩ Dios rui. Ndeicuã eremunua tuchi chõ nguia aque re. Dios nembasi nonde. Dios mbia icuã mbasi ja mose ra nde abe mbasi. ⁶Aque mose ra Dios mbia mbuchao chao. Emo emo nda emondo tata cuásuu. Emo emo nda emingo bei no. ⁷Ae eturã mbeite riqui, ũquí nda Dios mingó bei. Nyoí sete quia Dios rea re. Siqui bei serete quia mbia mingó beisa rese re. Nyebe ra Dios emingo bei cote. ⁸Dios ra paama i tuchi mbia icuã je. Mbasi tuchi rae. Mbia mb#cuãsa tuchi quia ũquí nde. Dios cheẽ mumbate quiatu nguia. Nyebe ra Dios embasi tuchi. ⁹Ae siqui mbae icuã ndese, ũquí ja ra Dios mbasi. Judíos icuã nane nda embasi. Judíos eã abe ra embasi no. ¹⁰Ae siqui mbae turã ndese, ũquí je ra Dios turã mbei. Judíos turã nane. Judíos eã abe cote. Mbia ra ũquí turã icua tuchi. Dios ra ũquí mbia tuchi. ¹¹Co quiatu, i eã nda Dios mbia mo m# je. Mbia m# ndese ra ebia eã. Mae turã ja chõ nda erese.

¹²Ae jirandu eãte Moisés chimbesa rese nae, ũquí siqui icuã mose ra Dios embasi. Jirandu eãte raque Moisés chimbesa rese. Ae Moisés chimbesa icua nae, ũquí siqui icuã mose ra Dios embasi. Moisés chimbesa cheẽ nguire ra Dios embasi. ¹³Ae Dios cheẽ ñandu chooño nguia nae, “taeisi turã” iã nda Dios ũquí je. Ae Dios cheẽ mumbayã nguia nae, ũquí nguia ra Dios isi turã. ¹⁴Ae judíos eã nae, ũquí Moisés chimbesa ñandu eã mbeite raque. Ũquí mo ae siqui turã turã mbei mbae turã ndese. —Mbae turã nandesã, ite eicua. Dios cheẽ andu eãte raque emo mose. ¹⁵Ae ae chõ mbae turã icua nguia. Mbae icuã abe icua. Mbae icuã naa mose, “eicuã asaã ñochĩ”, i tuchi eicua uchiangui re. Mbae turã abe raã mose eicua tuchi uchiangui re no. ¹⁶Aque mose ra Dios ñee Jesucristo je. Ae icuã mbia saã nyecuayã cuayã nguia nae, ũquí nda Jesucristo mbuchecua ja cote. Jesucristo ra mbia icuã mbasi mbae icuã m# cote.

Judíos Moisés cheẽ mumba mumba

¹⁷—Judíos chõ ure re, jenyẽ equia ũquí. —Moisés chimbesa ra nandemingo bei, jenyẽ chõchĩ equia ũquí. —Dios quiarei ebia tuchi ure m# ndese, jenyẽ chõchĩ equia ũquí. ¹⁸Ae Dios bite nae, ũquí jẽicuate quia jẽ ũquí. —Moisés cheẽ ureicuate quia ã. Nyebe mbae turã ureicua jate quia ã, jenyẽ chõchĩ nguia ũquí. ¹⁹—Ure m# ño ñeenda Dios icha ureicuachĩ, jenyẽ bei chõchĩ equia ũquí. —Itondaru jenda uretesaete, jenyẽ chõchĩ equia ũquí. ²⁰—Mbia aquiatuã urembaaquiato quiatu, jenyẽ chõchĩ nguia ũquí. —Mbia aracuayã urembaaquiato quiatu, jenyẽ chõchĩ nguia ũquí. Jẽ Moisés chimbesa jẽicua aba reãte quia ũquí. —Moisés chimbesa ñee ñooño eãte, jenyẽ raque quia eicua ũquí. ²¹Jẽaracuayã mbia jembaaquiato quiatuchi nguia. ¿Mbaerã jeñimbaaquiato iã jẽ nyii re? —Mbae ra jembuquiachãchĩ, jenyẽ chõchĩ equia ũquí. Jẽ sí chõ mbae jembuquiachã nguia ũquí. ²²—Emo ninisi rese ra jẽingochĩ, jenyẽ chõchĩ equia ũquí. Jẽ sí chõ jẽingo nguia emo ninisi rese

ũqui. —Ae je mbia riqui “Dios” i chooño nae, ũqui ndese ra jëingochĩ, jenyechõchĩ equia ũqui. Dios abareã mbae jembuquiachã quiachã ñochĩ nguiã ũqui. ²³—Dios cheẽ ureicua tuchi quia ure ã, jenyechõchĩ equia ũqui. Jẽ sí echeẽ jemumbate quia ũqui. Nyebe mbia riqui nguiã ñee turã eãte Dios rĩ ã. ²⁴Nyebe embesa ji cheẽ ndiqui nguiã ique ã cote. Jẽ Dios cheẽ mumba mose, judíos eã ndiqui ñee icuã tuchi Dios rĩ ã.

²⁵Coche circuncisión jësaã saã nguiã Dios je, jëingo bei mose Dios cheẽ ndese. Jëingo eã mose Dios cheẽ ndese, circuncisión naa eã naanguia chõ jëingo nguiã ũqui. ²⁶Ae circuncisión saã eã nguia nae, ũqui siqui mose Dios cheẽ ndese, circuncisión naande raanguia chõ eriqui nguiã ũqui. ²⁷Ae circuncisión saã eã nguia nae, ũqui siqui mose Dios cheẽ ndese, Dios ia tuchi chõ ũqui ndese re. Eyare rocõ jendese. Jẽ nguia Dios cheẽ jemumba mumbate nguiã. Dios cheẽ jëicuate raque. Circuncisión jësaã saãte raque. ²⁸Ae judíos Dios cheẽ mumba mumba quia nae, judíos tuchi eã ño ũqui nde. Circuncisión naa naa ndaque. Ae circuncisión saã nguia nae, ũqui siquiã mose Espíritu Turã ndese, circuncisión turã eã ño ũqui nde. ²⁹Ae Dios isi tuchi quia uchiangui re, ũqui nguiarei judíos tuchi. Ae siqui Espíritu Turã ndese, circuncisión tuchi chõ ũqui cote re. Ũqui je ra mbia achõ ñee turã eã. Dios abe quia ra ñee turã ee.

3

¹¿Mbaerã judiorã sete riqui mbia re? ¿Mbaerã circuncisión sete riqui mbia re? ²Eturãte quia mbia je re. Judíos je quiatu ngue Dios ucheẽ mondo nguiã. Mbiamo je eã. ³⁻⁴Judíos mo hui hui raque Dios cheẽ si. Dios quia ra ñee ñooñoã mbei. Echeẽ nguia ra io bei. Mbiamo hui hui raque esi. Mbiamo ñee ñooño ndaque. I ñi embesa ji re:

Ndecheẽ nda io tuchi mbia resa rae.

Mbia icuã mose ndeje, nde quia ra ere tuchi mbia si,

i que embesa ji ra. ⁵Jemo ngue ñee no nda: —Dios turãte riqui nandeicua je co. Mbae icuã nandesã saã mbei chõ nguia. Mbiamo mae sacua Dios turã ndese. Dios nandeicua mbasi mose, Dios icuãte, i chõchĩ jemo. ¿Mañi nande ra ũqui ñee mose re? ⁶Ichõiño tuchi chõ ũqui nde. Dios icuã aroneãte. Dios icuã mose, eĩ nda Dios mbia icuã mbasi aroneãte rei. ⁷Jemo ngue ñee ño nda. —¿Nandecheẽ ñooño ño nguia jẽ! Nandecheẽ ñooño mose, mbia ra ñee turã Dios rĩ. “Ñee ñooñoosa reã tuchi quia Dios riqui re,” i ra mbia Dios rĩ cote. Nyebe Dios riqui nguiã nandembasi ãte nandecheẽ ñooño mose, i chõchĩ jemo. ⁸—Mbae icuã nandesã saã ño. I nda Dios turã nyecua mbia je, i chõchĩ jemo. Urecheẽ ãte ure ũqui ndesẽ. Ae ñee nguia ũqui, ũqui nda Dios mbasi.

Mbia mo eturã eãte

⁹Judíos chõ nande re. ¿Nandeturã nda eriqui reĩ mbiamo si re? Tei. Nandeturã eã ño esi re. Nandeicua ja chõ ñene. Judíos eã icuã ja chõ ñene. Judíos icuã ja chõ eno nde. ¹⁰I ñi embesa ji re: Emo eturã eãte. Aque mii mo eã.

¹¹“Dios icha taicua”, iãte emo.

“Dios rese taico”, iãte emo.

¹²Mbia que icha icha jate Dios si ra.

Eicuã jate que eriqui ra.

Emo mbae turã mo saã eãte.

Aque mii mo eã.

¹³ Ũquĩ quiarei mbia raaque tã tãsa rã.

Aba mbia eã.

Sã eriqui ñee icuã mbei.

Mbia mbiĩrĩ irĩ tuchi ñee ñooño uchuru je.

Mbei rasi rã ño echeẽ nde.

Aba mbasi.

¹⁴ Echeẽ icuã achõ tuchi chõ ñene.

Mbia mbiĩcuãsa tuchi chõ echeẽ nde.

¹⁵ Mbia iquia chooño ño ñene.

¹⁶ Mangue chooñoa ño eriqui nguiã mbae icuã naa naa.

Mbia mbiayã ñooño.

¹⁷ Ico chooñoa mbei mbia je.

¹⁸ Dios rese ndua eã tuchi,

i ñi embesa ji re. ¹⁹ Dios que Moisés chimbesa mee ja judíos je ra. Embesa ji mumbayã sacuã. Mbia huĩcuã icua ja sacuã. —Dios cheẽ nandemumba tuchi chõ nguia re, i nda mbia ja chã. ²⁰ Emo ñee aroneãte. —Embesa ji amumbayã mbeite quia co. Nyebe ra Dios seisi turã, i aroneãte emo. Dios que Moisés chimbesa mee mbia je ra. Mbia huĩcuã icua ja sacuã.

Dios icuasa quia ra siqui bei

²¹⁻²² Dios que Jesús turã teacuquia nande je cote ra. Ae que mano nandecuã ndiquicharõ sacuã nda. Nande Jesús icua mose, Dios ra nandeiisi turã cote. Eĩ ja chõ Dios mbia je re. Dios bia eã ño mbia mo mĩ ndese. —Jẽ Moisés chimbesa mumbayã mose, taẽisi turã, iãte Dios. —Jẽ Jesús icua mose, ũquĩ mose quiatu ra jaẽisi turã, ite Dios. Embesa ji ñiinda abe que ñee ñee Jesús rĩ nyii no nda. ²³ Nandecuã ja chõ ñene. —Aque eturãte, iã nda Dios nandemo je. ²⁴ Nandecuãte raque. Dios quia eturãte nande je re. —Mbae mo jemondo jẽicuã ndibishorõ, i ãte Dios. Jesucristo que mano nandecuã ndibishorõ ndesẽ. Nyebe Dios riqui nguiã mae turã nanderese co. ²⁵ Dios que Jesucristo mondo mbia je ra. Mano sacuã mbia icuã ndiquicharõ. —Jesús que mano seicuã ndibishorõ nda, nande i mose, ũquĩ mose ra Dios nandemingo bei. Dios que mae ñooño mbia icuã ndese nyii ra. —Seriĩ nguia ra mano nguiã eicuã ndiquicharõ, i que ra. Echeẽ ngue ique cote ra. Dios uturã ndeacuquia mose que echeẽ ique cote ra. ²⁶ Dios riĩrĩ ngue mano mbia icuã ndiquicharõ nda. Mbia mae sacuã Dios turã ndese. Dios turã mbeite. Mbia icuã isi turã nonde. Mbia Jesús icua mose ra Dios mbia isi turã.

²⁷ Nande ae ra nandecuã nandembutiã eã. Dios ae quia nandecuã mbutiã nguiã, Jesús icua mose. Nyebe nandeco nguiã nandecuasu raã naa aroneãte. Moisés chimbesa que nandemumba mumbate quia resẽ. ²⁸ Mbia Jesús icua mose, aque mose quia ra Dios mbia isi turã. —Taẽisi turã, jẽ Moisés chimbesa mumbayã mose, iãte Dios nande je. —Jẽ Jesús icua mose, ũquĩ mose quiatu ra jaẽisi turã, ite Dios nande je. ²⁹ Judíos achõ nderecua eã ño Dios re. Judíos eã abe rerecua chõ ñene. ³⁰ Emo abe eãte Dios. Dios mĩ ño ñene. Ae Jesús icua quia nae, ũquĩ nda Dios isi turã ja. Judíos abe isi, Jesús icua mose. Judíos eã abe isi, Jesús icua mose no. ³¹ Nande Jesús icua mose, Dios cheẽ mbesa ji riqui ua eã mbeite nande je co. Nande Jesús icua mose, Dios cheẽ nda nandemumbayã tuchi cote.

1 Nandendua mbĩrĩ na Abraham ndese. Nandei ñiinda tuchi quia Abraham nde. 2 Cose que Dios Abraham isi turã nda. Abraham mbae turã naa naa eã mose que Dios eisi turã nda. Dios icua mose quiatu que Dios eisi turã nda. Nyebe Abraham uturã naa naa aroneãte nguiã. 3 I ñi embesa ji re: Abraham ngue Dios icua ra. Nyebe Dios eisi turã nguiã, i ñi embesa ji re. 4 Sã emo ndiqui quiei quiei emo je no. Mbae mo ndibishorõ. Ae echa mondo quia ee, mondochõ eã ño nguiã ee. Embae raã naa ndibishoronda chõ ùquĩ nde. Eĩ eã ño Dios re. 5 Dios chõ mbia icuã isi turã nguiã. Emo Jesús icua mose, ùquĩ nda Dios isi turã. Emo mbae turã naa naa eã ndaque. Jesús icua mose, aque mose chõ Dios “ndeturãte seje,” i ee. Mbae turã naa naa eã ndaque. 6 David abe que ñee nda: “Ae je Dios ñee, ‘ndeturãte seje,’ i mose ee, aque ia tuchi chõ ñene. Mbae turã naa eã ndaque. Dios icuate quia ñene,” i que David ñee nda. 7 Co rei David chimbese co:

Ae icuã Dios mbutiã nae, ùquĩ ia tuchi chõ ñene.

8 Ae icuã ndese Dios riqui mae ãte nae, eicuãte raque, Dios ra eisi turã.

Ûquĩ ia tuchi chõ ñene,

i ñi David chimbese re. 9 ¿Aba icuã ño nda Dios mbutiã ña? Embia sacua ña. ¿Judíos icuã achõ nda embutiã nde? ¿Ae circuncisión saã nae, ùquĩ achõ icuã nda embutiã nde? Tei. Ûquĩ achõ eã ñene. Abraham Dios icua mose, aque mose tuchi chõ Dios eicuã mbutiã nguiã esi. 10 Abraham circuncisión naa eã mose chõ Dios eicuã mbutiã nguiã. Circuncisión naa nonde. 11 Abraham Dios icua mose chõ ngue Dios eicuã mbutiã nguiã. Aquere quiatu ngue Abraham circuncisión naa nguiã cote. Circuncisión ndei marca Dios mbae. Dios Abraham isire chõ circuncisión naa nguiã Abraham je. —Abraham ngue aisi turã nda, i ñe Dios re. Ae circuncisión saã eã nae, ùquĩ abe chõ “seru” i nguiã Abraham je, Jesús icua mose. 12 Ae circuncisión saã nae, ùquĩ abe chõ “seru” i nguiã Abraham je, Jesús icua mose. Ûquĩ nyiicua chõ Dios re. Sã Abraham nyiicua Dios no. Circuncisión naa eã mose no.

Abraham Dios icua mose, Dios ucheẽ mbuchebiã mbei ee

13 Dios que ñee Abraham je cose ra. —Ibi tamondo ja ndeje nembraerã. Nderiirĩ mbaerã abe no, i que ee ra. Secheẽ mumbasa reã je chõ ibi tamondo, iã ño Dios re. —Ae seicua quia, aque je chõ tamondo, i que Dios Abraham ñi nda. 14 —Nandeico bei mose Moisés chimbese rui, aque mose ra Dios nandemingo bei, i chõchĩ judíos mo. Ûquĩ mose quiatu ra nandeico rei Jesús icua chooño. Ûquĩ mose quiatu ra Dios cheẽ ique ãte rei nande je. 15 —Ã jësaã saã, i mose Dios, emo echeẽ mumba mose, ùquĩ nda embasi. —Ã jësaã saã, iã mose, emo nda embasiã cote.

16 Dios turãte quia ñene. Nyebe eriqui nguiã mbae mondo chooño nande je eicua mose. Judíos achõ je eã ño eriqui nguiã mbae mondo mondo. Judíos eã je abe chõ eriqui nguiã mbae mondo mondo, Dios icua mose. Sã Abraham Dios icua no. Sã Dios mbae mondo mondo ee no. Nyebe nandeico nguiã “nanderu” i Abraham je co. Ae rane nguiatu ngue Dios icua nguiã. 17 Nyebe embesa ji riqui nguiã i:

Dios que ñee Abraham je ra.

“Nde ra mbia i tuchi.

Ibi jenda ja i tuchi ra nde”, i que Dios Abraham je ra,

i que embesa ji ra. Dios ra mbia mangue chooñoa jenda ja isi turã, Jesús icua mose. Dios cheẽ sí tuchi chõ ã nde. Dios ae mbia raaque mbuquera nguiã.

Ae emoãte namo nae, Dios ae ra ùquĩ nyao no. ¹⁸—Nderiirina tamee ndeje. Eretiirĩ nda cote. Mbia ja i ra nde cote, i que Dios Abraham je ra. Abraham ngue “nyia, eno”, i Dios cheẽ mose ra. Amei tuchi raque. Tiirĩ aroneãte raque aba je. ¹⁹ Amei tuchite raque. Cien aõte raque. Eninisi abe arite raque. Eninisi rie chuumate raque. —Dios ra seriirina mee seje ucheẽ nguire, i que Abraham nda. —Ureimate nyeresẽ. ¿Mañi nda Dios ureriirĩ mee ure je re? i ãte que Abraham nda. ²⁰ Abraham ngue “nducua” iã mbeite quia Dios cheẽ mose ra. “Nyia, eno”, i beite que equia Dios cheẽ mose ra. Ñee turã mbei que equia Dios riĩ nda. ²¹—Dios quirãcuã tuchi quia ñene. Ae ra ucheẽ nyabiã mbei ñeende seje, i que Abraham nda. ²² Nyebe Dios Abraham isi turã nguiã. —Abraham ndiqui seicua tuchite co, i que Dios ra. ²³⁻²⁴ Abraham mii je eã ño Dios riqui nguiã ñee. —Abraham seicuate. Nyebe aico nguiã eisi turã co, i que Dios ra. Abraham mii je eã ño embesa ji riqui nguiã ñee. Nande abe je chõ eriqui nguiã ñee. Nande Dios icua mose, Dios ra nande abe isi turã. Dios sí que Jesús raaque mbuquera ra. ²⁵ Dios que Jesús mbu íbii nande je ra. Mano ngue nandeicua ndiquicharõ nda. Aquerere que Dios embuquera sí cote ra. Nandembitirõ sacua ñgue Dios embuquera ra.

5

Nande Jesús icua mose, Dios riqui nandeisi turã

¹ ã nandeico Jesucristo icuate ã. Nyebe Dios riqui nguiã nandeisi turãte cote. Nyebe Dios riqui nguiã nandembiate cote. ² ã nandeico Jesucristo icuate ã. Nyebe Dios riqui turãte nguiã nande je co. Dios turã tuchi. Dios ra nandemingo Jesucristo rã si tuchi cote. Ûquĩ ño nandesaarõ arõ nguiã ã. ³ Ûquĩ mii eã ño nandembia nguiã. Mbia icuã icuã ndaque ra nande je, ùquĩ mose abe chõ nda Dios nandembia no. Mbia icuã icuã mose nande je, Dios ra nandechiã mbucui turã. Nandeico tochi sacua. ⁴ Nandeico tochi mose, Dios ia tuchi ra nanderese. Dios ia mose nanderese, Dios cheẽ nandesaarõ arõ na. Sã echeẽ ique rã nande je. ⁵ Nande Dios cheẽ ndaarõ arõ mose, ae ra ucheẽ nyabiã. Ae quiatu ngue Espíritu Turã mondo nguiã nande je. —Dios riqui nyesequate jendese co, i Espíritu Turã nguia nande je co.

⁶ Mbae turã ngue nandesaa aroneãte nandechue, aque mose que Cristo mano nande je ra. Nandeicua mbitirõ sacua. ⁷ Mbia mo mano aroneate emo ndibishorõ. Nande turã mose, aque mose abe ra emo mano aroneãte nanderibishorõ. Eturã tuchi mo ndibishorõ nguia emo mano sete raque reae. ⁸ Cristo quiatu que mano nanderibishorõ nandeicua tuchi mose ra. Nyebe nandeico nguiã ñee: —Dios riqui nyesequa tuchite nanderese co, i. ⁹ Cristo mano mose que nandeicua mbitirõ cote ra. Ae ra nandemingo icúe Dios mbia icuã mbasi mose. ¹⁰ Dios riirĩ ngue mano nande je ra. Nande Dios ucuayã mose. Ae quia ngue eturã mbeite riqui nguiã nande je. Dios que “sequiatorã jẽ”, i nande je cote ra. Nyebe ra nandeico tuchi erese cote. Jesús quiatu ngue quera sichĩ nguiã nande je cote. ¹¹ Nyebe nandeya tuchi riqui nguiã Dios rese co. Jesucristo riĩ. Jesucristo quiatu ngue mano nguiã nande je.

Adán na eã tuchi chõ Jesucristo re

¹² Mbia mii nane ngue siqui nyii ra. Aque rane ngue mbae icuã saã nande je ra. Nyebe mbia icuã jate riqui nguiã cote. Nyebe Dios riqui nguiã ñee. —Mbia ra mano ja, i cote. ¹³ Mbia que mbae icuã saã saã ndei quia nyii ra. Moisés Dios cheẽ mbesa nonde. —Dios cheẽ ngue jemumbachĩ nda, i aroneãte que aque mose ra. Dios cheẽ mbuchecua iriãte quiatu ngue aque mose re. ¹⁴ Adán

nane ngue Dios cheẽ mumba cose ra. Aque mose bei chõ ngue mbia mbae icuã naa naa nguiã cote. Nyebe mbia riqui nguiã mano mano ja huicua mose cote. Moisés que Dios cheẽ mbesa chee ra. Moisés embesa nonde que mbia mano mano ja huicua mose ra. Jesucristo rã eã tuchi chõ Adán nde.

¹⁵ Adán nane tuchi que mbae icuã saã nda. Jesucristo quiatu que mbia rirõ nguia mbae icuã si ra. Adán mbae icuã naa mose, aque mose bei que mbia mano mano cote ra. Jesucristo mbae turã naa mose, ae que mbia icuã mbitirõ tirõ cote ra. Dios turã nii. Jesús chisaã nguia rei Adán chisaã na eã tuchi. ¹⁶ Adán ae rane ngue mbae icuã saã cose ra. —Mbia ra mano mano ja cote, i que Dios cote ra. Adán icuã ndese maende. Ae Adán saã icuã nande je nae, aque je que Jesucristo mano nda. Jesucristo turãte que mbia je cote ra. Nyebe Dios riqui nguiã nandeisi turã, nandeicuã ndese mae ndocoĩ. ¹⁷ Adán ae que mbae icuã saã nyii ra. —Mbia ra mano mano ja cote, Adán mbae icuã naande, i que Dios cote ra. Jesucristo ae que mbae turã saã mbia je cote ra. Mbia icuã mbutiã sacua esi. Ae Jesús turã icua quia nae, ũqui nda Dios mingo turã mbei, ũqui icuã ndese mae ndocoĩ.

¹⁸ Adán ae que mbae icuã saã nyii ra. —Mbia ra mano mano ja cote, i que Dios cote ra. Adán icuã ndese maende. Aquere que Jesucristo mbae turã naa mbia je cote ra. Mano nguiatu ngue mbia riquicharõ nde. Nyebe Dios riqui nguiã nandemingo bei co cote. Jesús rĩ ae ñene. ¹⁹ Adán Dios cheẽ mumba mose, mbia mbiicua ja que ũqui cote ra. Jesucristo Dios cheẽ mumbayã mose chõ mbia tubiriã mbuturã nguiã no. ²⁰ Dios que ñee Moisés je ra. —Secheẽ embesa mbia je, i que ee ra. † nda mbia jirandu tuchi huicua ndese. Mbia icuã i i tuchi mose, eĩ ño Dios turã i i tuchi mbia je no nde. ²¹ Adán mbae icuã naa mose, mbia mbiicua ja chõ ũqui nde. —Mbia ra mano mano cote, i que Dios cote ra. Jesucristo que mano nandeicuã ndiquicharõ cote ra. Aque mose que Dios uturã ndeacuquia tuchi nande je cote ra. Nandembuturã sacua cote. Nandemingo bei sacua cote.

6

Nandeyasu chõ nandeico nguiã ã cote

¹ ¿Mañi nande ra cote re? ¿Mbae icuã nda nandesaa i i re? ¿Dios turã i i sacua nande je re? ² Tei. Dios biãte ũqui. Jesús rese que nandemano ndesẽ. Nandemano ngue mbae icuã naa eã sacua ndesẽ. ¿Mañi nande ra mbae icuã naa naa si re? ³ ¿Ëiranuãte bautizar i rese re? —Jesús resenda tuchi chõ ũqui ndiqui re, i nda mbia bautizar ire nande je chã. Nande bautizar ire, nandemano de raanguia chõ ũqui nde. Mbae icuã naa eã sacua cote. ⁴ ¿Mbaerã ño bautizar nande chã? —Amano ngue Jesús rese ra, i chõ bautizar i re. —Seati que Jesús rese ra, i chõ bautizar i re. —Dios que sembuquera si Jesús rese ra, i chõ bautizar i re. Sã Dios quirãcuã Jesús mbuquera eraaque mose no. Eĩ nande chõ siqui nandeyasu ae.

⁵ Nandeico Cristo rese ã. Nandemano mose Cristo rese, nandereco yasu chõ nandeico nguiã erese ã. ⁶ Cristo mbucha mose ira rese, nandeicuã abe que Dios mbucha ira rese ra. Nande mbae icuã osei chiã sacua ño ũqui nde. Mbae icuã nimba nda nandeico eã cote chã. ⁷ Mbia raaque quia mbae icuã saã aroneãte nguiã. Eĩ nande chõ nguiã mano mose Cristo rese ã. Mbae icuã naa aroneã. ⁸ Nandemano mose Cristo rese ira rese, nandemingo bei ra uchiese cote. Ae rã si. ⁹ Cristo que mano nda. Quera si que cote ra. Aquere ra mano siã cote. ¹⁰ Aque mii ngue Cristo mano mbia icuã je ra. Quera si que

cote ra. Mano si eã ndae. Siqui bei equia Dios rese co. ¹¹ Jendaaque chõ jêsaã saã mbae icuã je. Jenderecuarã eã mbae icuã cote. Jesucristo rese nandeico tuchite ã cote. Mbae yasu rã ño nandeico nguiã Jesucristo rese ã cote.

¹² ¡Mbae icuã ndese ra jêingochi jenderecuarã jê! Jê mba e icuã oseï mose, jêteachõ ño jê! ¹³ ¡Jendete ra jemeë meechi mbae icuã je jê! Dios je quia jendete jemeë. Mbae turã naa sacua. Cristo rese que jemano ndesê. Jêyasu chõ ngue jêquera si Cristo rese resê. ¹⁴ Nandererecuarã eã nda mbae icuã cote. Moisés chimbasa rui eã ño nandeico nguiã ã cote. Dios turã ndui ae chõ nandeico nguiã ã cote.

Mbae turã nimba chõ nandeico cote

¹⁵ Dios turã ae nandemingo nguiã. ¿Ûqui mose ra mbae icuã nandesã saã nde? Tei. Dios biãte ùqui. ¹⁶ Nande nandechimondo mose mbae icuã je, mbae icuã nda nandererecuarã cote. Mbae icuã nda nandeiquia chee cotê. Nande nandechimondo mose Dios je, ae ra nandererecuarã cote. Ae ra nandemingo bei mbae turã ndese cote. ¹⁷ Jêingo bei que mbae icuã ndese jenderecuarã nyii ra. Mbia Jesús cheë nenei nenei mose jêje, jêisi turã ño ngue cote ra. Æ jêingo echeë mumbayã ã cote. Nyebe aico nguiã gracias ite Dios je co. ¹⁸ Dios que jendirõ mbae icuã si cote ra. Mbae icuã ndese ra jêingoã cote. Mbae turã ndese bei ra jêingo cote. ¹⁹ Secheë ambuchecua tuchi quia jêje co. Jê eicua tuchi sacua. Jendete que jemondo tuchi mbae icuã je nyii ra. Jê ngue jêingo i i tuchi mbae icuã ndese nyii ra. Jendete jemondo Dios je cote. Mbae turã naa i i sacua cote.

²⁰ Mbae icuã mbaerã ño jêingo nguiã cose. Mbae turã ngue jêsaã aroneãte quia aque mose ra. ²¹ Jêireite mbae icuã naa naande cote. Jenyisã saã mbae icuã ñiinda, ùqui ngue mbae turã mo mondo ãte jêje resê. Ae mbae icuã saã i ite quia, ùqui nda mano. ²² Dios que jendirõ mbae icuã si cote ra. Dios rimba chõ jê cote re. Nyebe Dios jemingo nguiã icúe mbae icuã si. Nyebe ra Dios jemingo bei ibate manonde cote. ²³ Ae mbae icuã saã saã nguia nae, ùqui nda Dios mbasi bei manonde. Ae Jesucristo icua quia nae, ùqui nguiatu ra Dios turã mingo bei. Mbae turã naa eã ndaque. Dios turãte quia ee re.

7

Eraaque rã ño nandeico nguiã Moisés chimbasa je cote

¹ Sã jenderecua ibi jenda mo no. Echeë jemumba aroneate no. Jemano mose, jenderecuayã nda cote. ² Sã cuña mo ndiqui ngu rese no. Cuña mo ngu rerequia mose, sã eriqui bei erese. Eru mano mose, aque mose ramo nda siquã erese cote. Aque mose ramo nda ae ae riqui cote. ³ Ngu reco mose, siqui aroneãte emo ndese. Siqui mose emo ndese, Dios cheë mumba chõ ùqui nde. Eru mano mose, aque mose quiatu ra ngu mo ndea cote. Dios cheë mumba eã ño ùqui nde.

⁴ Eraaque rã ño jêingo nguiã Moisés chimbasa je ùqui cote. Cristo quiatu que mano jenii nda. Quera si que jenii no nda. Cristo rese chõ jêingo nguiã ùqui cote. Dios je mbae turã naa naa sacua ño jêingo nguiã erese ùqui cote.

⁵ Nandeico mose mbae icuã ndese nyii, mbae icuã achõ ño ngue nandehosei chosei quia aque mose ra. Nandebi tuchi que Dio s cheë mumba mumba aque mose ra. Nyebe que nandeico mbae icuã naa i i tuchi aque mose ra. Eï nda nandeicuã nandeiquia rei aque mose. Espiritu Turã nandembiasu eã mose. ⁶ Eraaque rã ño nandeico nguiã Moisés chimbasa je ã cote. Moisés chimbasa rui eã ño nandeico nguiã ã cote. Dios cheë miï ndui chõ nandeico

nguiã ã cote. Espíritu Turã nguiatu ngue nandembiasu nguiã. Espíritu Turã ño nandembaaquiatu nguiã ã cote. Moisés chimbasa achõ eã ño cote re.

7—Moisés chimbasa icuãte, ae ãte raque quia co. Moisés chimbasa quiatu que sembiirandu seicuã ndese resê. —Eicuãte quia emo mbae oseï oseï riqui re, i que Moisés chimbasa ra. Eï nda seiranuãte rei ùquĩ ndese. Moisés chimbasa eande ndae. Moisés chimbasa ae ngue sembiirandu nguiã ùquĩ ndese. —Eicuãte ùquĩ, i seje. ⁸ Moisés chimbasa sembiirandure mbae icuã ndese, mbae icuã achosei i i tuchichĩ cote. —Mbae icuã nda jêsaã saãchĩ, i mose chõ mbae icuã achosei i i tuchichĩ cote. Emo Moisés chimbasa icuayã mose, mbae icuã abe ra eicuayã no. ⁹ Moisés chimbasa que aicuayãte quia nyii ra. Seturã aico reï aque mose. Moisés chimbasa que aicua cote ra. Eicua mose que echeẽ amumba i i tuchi cote ra. Ùquĩ mose que seicuã aicua cote ra. ¹⁰ Mbia mingo bei sacuã ndaque Moisés chimbasa. Ae que semingo bei eã nda. Moisés chimbasa amumba mumba bei chõchĩ. Nyebe aico nguiã ishõ tuchi Dios si aque mose. ¹¹ Seicuã ño ngue sembiirã irĩ mbei quia nyii ra. Se Moisés chimbasa icua mose, seya eã tuchi que aque mose cote ra. Seicuã nda seiquia chee, ae que se ra. ¹² Moisés chimbasa turãte raque. Dios cheẽ ndaque.

¹³ Moisés chimbasa turãte. Ùquĩ je eã ngue Dios paama i seje ra. Seicuã ae quiatu que Dios mbupaama i seje ra. Moisés chimbasa que sembiirandu tuchi seicuã ndese ra. Se Moisés chimbasa turã icua mose, ùquĩ mose que seicuã Dios mbupaama i seje ra. Nyebe Dios Moisés chimbasa mee nguiã nande je. Nandeicuã mbuchecua tuchi sacuã nande je.

Nandechianqui renda icuã ño nandeisi isi nguiã

¹⁴ Moisés chimbasa turãte raque. Se ae seicuã nde. Mbia chõ se re. Moisés chimbasa amumba mumba chõchĩ nguia co. ¹⁵ Mbae turã asaã mbite raque. Mbae icuã asaã eã mbite raque. Mbae icuã nguia seisi isite nguiã. Mbae turã uquia reã. ¿Mbaerã aico mbae turã naa eãte re? ¹⁶ Ae asaã sereãte quia nae, ùquĩ asaã mbeichĩ. Moisés chimbasa turãt e raque. Aico echeẽ mumba mumba beichĩ. ¹⁷ Se ae chõ eã ño aico nguiã mbae icuã naa naa co. Sechiangui renda icuã nguia “mbae icuã esaã saã”, ite nguiã seje co. Nyebe aico nguiã mbae turã mo naa eã mbeite co. ¹⁸ Seicuã tuchi chõchĩ se. Seturã mo eã tuchichĩ se. —Mbae turã tasaã, aete raque quia co. Aico mbae icuã naa naa mbei chõchĩ co. ¹⁹ Sebite raque mba e turã. ¿Mbaerã aico mbae turã naa eãte re? Sebiãte raque mbae icuã. ¿Mbaerã aico mbae icuã naa naa mbeite re? ²⁰ Se ae eã mbae icuã asaã saã nguiã. Sechiangui renda icuã nguia “mbae icuã esaã saã” ite nguiã seje. Sechiangui renda icuã ño seisi isi nguiã mbae turã si co.

²¹ “Mbae turã tasaã”, i mose se, mbae icuã ño seriquisã quisãchĩ nguiã co. ²² Sebite raque Dios cheẽ sechiangui re. ²³ —Dios cheẽ ndese taico, ae rei nguiã sechiangui re co. Sechiangui renda icuã nguia seriquisã quisãte nguiã. Nyebe aico nguiã mbae icuã naa i ite. ²⁴⁻²⁵ Dios cheẽ ndese aico sete raque. Sechiangui renda icuã nguia semingo beite nguiã mbae icuã ndese. Seraaquete aico co. Nyebe seya eãte aico co. ¿Aba quia ra seicuã mbitirõ nde? Jesucristo quia ra seicuã mbitirõ cote. Nyebe aico gracias i tuchi Dios je co.

¹ Ae Jesucristo icua quia nae, ũquĩ nda Dios mbasiã mbei. ² Nande Jesucristo icua mose, Espíritu Turã nda nandechiã mbiasu. Espíritu Turã nda siqui nanderese, mbae icuã naa eã sacuã. Eĩ nda nandemano mbeite rei, mbae icuã naa naa mbei mose. ³ Moisés chimbasa que nanderirõ aroneãte mbae icuã si ra. Echeẽ nguiatu ngue nandemumbayã aroneãte nguiã. Mbiate quiatu ngue nande re. Nandequirãcuã nea. Dios que ndua nanderese ra. Nyebe nguiirĩ mondo nguiã nande je. Mbia rã ngue Jesús ru íbii ra. Mbia icuã jate raque. Ae mii ngue eicuã eã nda. Ae que mano nandeicuã ndiquicharõ nda. Nyebe nandererecua eã ño mbae icuã cote re. ⁴ Jesús que mano nande je ra. Nyebe mbae icuã ñimbirãcuã eãte nande je cote. Nyebe Dios cheẽ nandemumbayã arondete namo cote. Espíritu Turã ndui chõ nandeico nguiã cote. Mbia icuã ndui eã ño nandeico nguiã ã cote. ⁵ Ae siqui quia Espíritu Turã ndese nae, ũquĩ ño siqui nguiã Dios cheẽ ndui si. Ae siquiã nguia Espíritu Turã ndese nae, ũquĩ ño siqui nguiã uchiangui renda icuã ndui si. ⁶ Ae siqui quia Espíritu Turã ndese, ũquĩ ia bei ra eriqui. Siqui bei rae. Ae siquiã nguia Espíritu Turã ndese, ũquĩ nda siquiã. Mano ndae. ⁷ Nandechiangui renda icuã nguia siqui icuã icuã mbeite nguiã Dios je. Nandechiangui renda icuã nguiareĩ Dios cheẽ mumbayã aroneã. ⁸ Ae siqui bei quia uchiangui renda icuã ndui, ũquĩ siqui aroneãte Dios cheẽ ndui.

⁹ Eĩ jenye eãte raque jẽ. Espíritu Turã ndui chõ jẽingo nguiã jẽ. Espíritu Turã nguia siqui nguiã jeñiangui re. Espíritu Turã siquiã mose emo ñiangui re, Cristo rimba eã ño ũquĩ nde. ¹⁰ Jesucristo riqui jeñiangui re ũquĩ. Jendete ra mano ndaque mbae icuã je. Espíritu Turã nda jeãingue mingo bei ibate. Dios quiatu ngue jẽisi turã nguiã. ¹¹ Dios que Jesucristo raaque mbuquera ra. Eĩ si ra Dios nanderete raaque mbuquera Espíritu Turã quirãcuã je no. Eĩ si ra nanderete mbiasu, Espíritu Turã siqui mose nandechiangui re.

¹² Nandechiangui renda icuã ndui nandeico aroneãte cote. ¹³ Nandechiangui renda icuã ndui nandeico mose, nandemano mbei ra equia. Espíritu Turã nandebi icuã mbutiã mose, nandemingo bei rae. ¹⁴ Ae je Espíritu Turã ndiqui ñee nae, “eĩ jenye” i nae, Dios rimba chõ ũquĩ nde. ¹⁵ Nande Espíritu Turã isi mose, aque mose bei chõ Dios riirĩ nande cote re. Dios rimbachõ eã ño nande cote re. Dios riirĩ tuchi chõ nande cote re. Nandesiquiche tuchi que equia Dios si nyii ra. Nandesiquicheãte esi namo cote. —Paba, nande chõ nguiã e e co cote. ¹⁶ —Dios riirĩ tuchite jẽ, i chõ Espíritu Turã nguiã nandembiirandu tuchi. —Dios riirĩ tuchi rei nande re, nande chõ nguiã nande abe nandechiangui re co. ¹⁷ Dios riirĩ tuchite quia nande re. Nyebe ra Dios mbae mondo tuchi nande je Jesucristo rese. Sã ñi mbia Jesucristo mbasi cose no, eĩ si ra mbia nandembasi nande abe. Aquere ra nandeico turã mbei erese ibate cote.

Mbae turã mbei jee ra nande je nandeico mose ibate

¹⁸ Mbia ra nandembasi raque a nyii. Dios ra nandererao bei ibate cote. Aque mose ra mbae turã mbei nande je cote. Nyebe ra nandetesarei nanderasi jua si cote. Nandeico bei mose ibate. ¹⁹ Dios ra huicuaasa mbuchecua ja aque mose. —Co rei seicuaasa co. Co abe no. Co abe no, i ra Dios aque mose. ũquĩ ño nandesaarõ arõ nguiã ã. Ae Dios chao mbae ja, ũquĩ abe riqui ũquĩ ndaarõ arõ ã. ²⁰ Adán mbae icuã naa namo mose, mbae icuã ja que aquere cote ra. Dios chiao icuã ja cote. Dios que mbae mbiãcuã ja Adán mbae icuã naa namo mose ra. ²¹ Eĩ mbei eã nda mbae. Mbae ra ñimbitirõ ja cote. Ñimbiasu ra cote, Jesús tu mose íbii cote. Mbae ra manaõ

cote. Mbae ra shi eã cote. Jesús quiato rese ra mbae ny#cuabo ja aque mose cote. ²² Dios chiao ra ny#cuabo ja aque mose. Dios chiao ia eãte quia namo nde. Āquē ndasi rã ño eriqui nguiã namo. Nyebe ra Dios uchiao mbiasu ja cote. ²³ Dios que Espiritu Turã mondo nande je ra. Nyebe nandeico nguiã ñee, “Dios ra nandembiasu nguiirina tuchi cote”, i. Aque mose ra Dios nandembuch#cuabo tuchi uchiao ja rese cote. Namō ño nanderasi rasi re. Nandeya eãte abe no. Nandembuch#cuabo mose, nanderete abe ra embiasu. ²⁴ —Jendete tambiasu, i que Dios nanderirō mose mbae icuã si ra. Ūquĩ ño nandesaarō arō nguiã ā. Nanderete yasu eãte namo. Nyebe nandeico nguiã eraarō arō ā. ²⁵ —Jendete tambiasu, i que Dios nande je ra. Nyebe nandeico nguiã eraarō arō mingue ā.

²⁶ Nandequirācuã neate nande. Nyebe Espiritu Turã ndiqui tuchi nguiã nanderese. Sã nandeico ñee: “¿Mañi nande ra ñee Dios je re?” i nandechiangui re. Nandechēē ndequia requia mose chō nandeico nguiã iabu abu. Nandeiahu mose chō Espiritu Turã ndiqui nguiã ñee turã Dios je nanderiĩ. Nandeuru ñee Dios je nandechiangui re. ²⁷ Dios mbia chiã icua jate quia co. Espiritu Turã ñee mose Dios je nandeuru, Dios echeē icua chō nguiã aque. Dios cheē ndui si chō Espiritu Turã ndiqui nguiã ñee Dios je Dios icuasa rĩ. ²⁸ Ae nyesecua quia Dios rese, ūquĩ je chō Dios riqui nguiã mbae turã naa ja. Dios quiatu ngue eirabo nguiã. Ndua quiatu ngue erese nyii re.

²⁹ Ae res e Dios riqui nduate nyii nae, ūquĩ ngue Dios mingo icúe nyii ra. Jesucristo rã si embiasu sacuã. Nyebe nandeico nguiã Dios riirĩ tuchi Jesucristo rese cote. Jesucristo rei nanderiqui cote. Nande tubiriãte ra Dios quiato cote. ³⁰ Dios que ndua nanderese nyii ra. Aquere que nandemingo icúe umbaerã cote ra. Nandei si turã ngue cote ra. —Mbia tamumae turã ja jendese jēingo mose ibate, i que Dios nande je cote ra.

Mbae mo nda nandembui eã mbei Dios si

³¹ Dios riqui tuchi nanderese co resē. Nyebe ra emo ñimbirācuã eã nande je cote. ³² Dios que nguiirĩ m#i mundo nande je ra. Mano sacuã nandeicuã je. Eĩ nda mbae mondo ja nande je no. Sã nguiirĩ mundo nande ja je no. ³³ Dios chesecua tuchi chō nande re. Emo ñee icuã aroneãte nande je. Dios quiatu ngue nandei si turã nguiã. ³⁴ Cristo que mano nandeicuã je ra. Quera si que ra. Dios quiatocuti eñi ngoi hue cote. Ñee turã turã nanderiĩ Dios je hue cote. Nyebe emo ndiqui nguiã ñee icuã aroneãte nande je cote. ³⁵ Mbae mo Dios mbesarei aroneãte nandesi. Nyesequa beite quiatu nguiã nanderese co. Nanderasi arondete raque. Mbae nandembia eã arondete raque. Mbi a icuã arondete raque nande je. Nanderiãcuã arondete raque. Nandearao eã arondete raque. Mbia nandei quia arondete raque. Ūquĩ ja ra Dios mbesarei eã tuchi nandesi. ³⁶ Mbia icuãte riqui nande je ā. Sã embesa ji riqui i no:

Nderiĩ ño mbia riqui nguiã ureiquia serĩ mbeite ā.

Oveja iquia iquia rã ño eriqui nguiã ure je ā,

i ñi embesa ji re. ³⁷ Mbia icuã icuãte raque nande je. Ñimbirācuã eã mbei ra nande je. Jesucristo quia siqui nguiã nanderese co. Nyesequa beite quiatu nguiã nanderese co. ³⁸⁻³⁹ Dios nyesequa tuchite quiatu nguiã nanderese co. Dios hui aroneãte nandesi. Mbia nandei quia iquia mose, aque mose abe Dios hui aroneãte nandesi. Mbae mo nda embui eã nandesi. Angeles. Aba checuayã icuã. Mbia rerecua. Ae icuã icuã ndiqui nande je namo. Ae icuã icuã nda nande je emo mose. Ibatenda mo. Ae siqui ibiqui rĩ no. Dios

chiao mo. Ũquĩ ja ra Dios mbui eã nandesĩ. Dios quia nyesecua tuchite nguiã nanderese Jesucristo rĩ co.

9

Dios que judíos mĩ icúe umbaerã tuchi ra

¹ Jesús icuasa chõ se resẽ. Aico ñee ñooño eãte co resẽ. Espíritu Turã abe riqui sembiirandu sechiangui re co resẽ. ² Seya eãte aico co. Seya eãte aico judíos rese co. ³ Se sí raque judío. Judíos ja chõ ure re. Judíos siqui sereãte chõchĩ Jesús rese. Seso sete raque tata cuasu, judíos mingo bei sacua Jesús rese. Eĩ ndei ra sesose rete tata cuasu judíos rendaque re. Seresenda tuchite quia ñene. ⁴ Israel ndei judíos i tuchi. Seririĩ, i rei que Dios judíos je ra. Dios que uquirãcuã teacuquia rei judíos je ra. Dios que contrato saã ndei judíos je ra. Moisés chimbesa que judíos quereco rei ra. —Eĩ jenyẽ chõ ñee seje, i rei que Dios judíos mbaaquiату quiatu ra. —Mbae turã nda asaã saã mbei quia jẽje, i bei que Dios quia judíos je ra. ⁵ Nanderamei ñiinda tuchi quiarei judíos i. Cristo tu mose ibi, judío que ae abe cote ra. Cristo rei Dios tuchi. Mbia nerecua bei tuchi rei Cristo. Amén.

⁶ Dios turã tuchi raque judíos je. Judíos que siquiãte Dios rese cote ra. Dios quiatu que ucheẽ mbuchebiã ndei ee ra. Ũquĩ mo nguiatu que judíos tuchi eã nda. Siquiã tuchi que Dios rese ra. ⁷ Abraham ndiriĩ nyeremo ndei que ra. Ismael. Isaac. Ũquĩ nyeremo ngue eririĩ ja rei ra. Dios que Isaac mĩ isi ra. —Abraham ndiriĩ, i eã ngue Dios Ismael ririĩ je ra. —Abraham ririĩ, i chõ ngue Dios Isaac ndiriĩ je ra. Isaac ndiriĩ jaje que Dios “judíos” i cote ra. ⁸ Abraham ndiriĩ nducucha que Dios isi turã ja eã ndese. Ae Dios cheẽ isi turã nguia, ũquĩ je chõ Dios riqui nguiã “seririĩ” i. ⁹ Dios que ñee Abraham je ra. —Tenda nongue ra achu. Aque mose ra aqũe nacui mo nyaacuquia neninisi Sara je, i que Dios Abraham je ra. ¹⁰ Aqũe ngue tiarõ cote ra. Isaac, i que ee ra. Isaac que ngũinisi tea chee ra. Rebeca, i que eninisi je ra. Eata riru rerequia mose que Dios ñee ee ra. ¹¹⁻¹² —Ae rane nda nyaacuquia aqũe, ngõngue rimba tuchi chõ nda aque, i que Dios Rebeca je ñee nda. Echaacuquia nonde. Eriiriĩ mbae icuã naa nonde. Mbae turã abe naa nonde. —Co chõ taisi, i que Dios ra. —Co chõ taisi, i beite Dios quia co no. Mbia mbae turã naa nonde chõ Dios eirabo nguiã. Dios turãte quia ñene. Nyebe mbia mo irabochõ nguiã. Ebite quia ñene. ¹³ Dios que ñee Rebeca ririĩ nĩ nda. Ũquĩ nyeremo nĩ: Jacob ndese chõ aio nguiã nyesecua.

Esau rese achesequa eãte, i que Dios ra,
i que embesa ji ra.

¹⁴ ¿Mbaerã Dios riqui aque mĩ irabo re? ¿Mbaerã eriqui enongue abe isiã nde? ¿Dios icuãte ere? Tei. Eicuã eãte raque. ¹⁵ Sã Dios ñee Moisés je nyii no: Seya eãse mose emo ndese, seya eãte erese.

Setutãse mose emo je, seturãte ee,

i que Dios Moisés je ra. ¹⁶ —Dios turã naa nda seje chã, i mose emo, ũquĩ je eã ño Dios turã ndiqui nguiã. Ae mbae turã saã saã ndei quia, ũquĩ je eã ño Dios turã ndiqui nguiã. Ae rese Dios ia eã ndiqui, ũquĩ je quiatu Dios turã ndiqui nguiã. ¹⁷ Sã faraón no. Egipto jenda nerecua. Dios que ñee ee ra. —Aremĩ ngue mbia rerecurarã nda. Sequirãcuã ndeacuquia sacua mbia je. Mbia jirandu ja sacua serese, i que Dios faraón je ra. ¹⁸ Dios ia eãse mose emo ndese, eya eã nda erese. Dios emo ñia matãse mose, matã ndae.

Dios ra judíos isi turã sí

¹⁹ Jemo nda ñee seje reae. —Dios ae emo ñiã mātã mose, ¿mbaerã nda jeñee asi echiã átã je re? i ra jemo ñee seje reae. ²⁰ Dios cheẽ nandesobeishĩ aroneãte. Sã nandembaecua ñio ñee aroneãte uaosa je no. —¿Mbaerã seraã eĩ nde? i aroneãte ñio ñee uaosa je no. ²¹ Ñio aosa ra ñio saã ñooño ño ubi mose no. Ñio turã tuchi raã arondete no. Ñio icuã abe raã arondete tuchu sique je no. Embae quia tuchu re. Tuchu rã ño nande re. Ñio aosa rã ño Dios re. ²² Ae eicuã icuã mbeite riqui Dios je nae, ũqui je Dios siqui mingue i ite co. Ũqui nda nyoi je tata cuasu. Ũqui Dios mbasi serĩte cote. ²³ Dios mbae turã saã sete ubi je. Nyebe uquirãcuã ndeacuquia nguiã ubi je. Diobi chõ nande re. Dios que nandea uchesecuarã nda. Nandeico sacua erese. ²⁴ Diobi chõ nande re. Dios que nandeirabo ra. Nandemo ndei judíos. Judíos eã abe abe. Dios chiirabo ja chõ nande re. ²⁵ Sã Oseas Dios cheẽ mbesa no:

Ae serimba eã nyii nae, ũqui nda serimbarã cote.

Ae rese mbia nyesequayã nyii, ũqui ndese ra achesequa tuchi se cote.

²⁶ “Seresenda eã ño jẽ nde”, i que Dios ñee ee nyii ra.

Hue jenda sí je ra Dios ñee cote.

“Seresenda chõ jẽ cote re”, i ra Dios si ñee ee cote, i que Oseas Dios cheẽ mbesa ra.

²⁷ Eĩ ngue Isaías Dios cheẽ mbesa cose ra:

Judíos tubiriã tuchite raque rae.

Siqui ja eã nda Dios rese.

Co mii mii ño nda siqui erese.

²⁸ Dios quia ra uquiatoã mbasi ja ibi jenda cote.

Mbasi jei ra cote, i que Isaías embesa ra. ²⁹ Isaías que ã mbesa cose no nda:

Mbia rese Dios ndua eande rae, eĩ nda judíos ua ja rei.

Dios judíos mo ndecha eande rae, eĩ nda judíos ua ja rei.

Sã Sodoma jenda ua ja no.

Gomorra jenda abe no,

i que Isaías embesa ra.

Judíos siqui sereã Jesús rese

³⁰ Tacheẽ nyecua jėje. Ae judíos eã nae, ũqui ngue “taico Dios rese”, iã ndei ra. Aque mose que Jesús icua cote ra. Jesús icua mose que Dios echiã mbitirõ cote ra. ³¹ Judíos quiatu que ñee ndei ra. —Dios cheẽ ndui si tuchi nandeico. Nandeico mose erui, Dios ra nandemingo bei, i rei que judíos ra. Dios que emingo bei eã nda. Siqui bei eã nguiatu ngue Dios cheẽ ndese re.

³² —Jesucristo nandeicua, i eã ñochĩ judíos. —Nande ae nandeico Dios cheẽ ndui, i chõchĩ. —Nandeico mose erui, Dios ra nandemingo bei, i chõchĩ. Judíos biãte que Jesús riqui ra. Nyebe judíos riqui turã eãte nguiã. ³³ Eĩ ngue embesa ji Dios cheẽ nda:

Serucucha que amii judíos rae ra.

Judíos ra eisiteã.

Judíos ra cuã i nyoi ee.

Ngoi ra echoi cuã i mose ee.

Sita rã ño serucucha ee re.

Ae serucucha icua quia nae, ũqui nguia ra ngoi eã nyoi.

“Dios rucucha aisi jirichĩ nguia no”, i eã nda Cristo icuasa mo ñee, i que Dios cheẽ mbesa ji ra.

10

1—Sã Dios judíos rirõ mbae icuã si, ae rei quia co. —Paba, judíos emingo Jesucristo rese, ae tuchi rei quia co. ² Judíos siqui sete raque Dios cheẽ ndui. Ñeenda quia eicuayãte nguiã Dios icha. ³—Dios ra nandechiã mbitirõ Jesucristo rĩ, i eã ñochĩ. Ae ae uchiã mbitirõse chõchĩ. Jesucristo icua sereaã nea mbei chõchĩ. Nyebe Dios riqui nguiã echiã mbitirõ eã mbei. ⁴ Jesucristo tu nonde que judíos siquise tuchi Moisés chimbesa rese ra. Jesús que tu ibii cote ra. —Moisés chimbesa rui jëingo mose, taembitirõ turã, i ãte que Jesús ra. —Seicua mose quiatu ra jaembitirõ, i que ra.

Sã mbia siqui ja serese, i Dios

⁵—Emo mbae icuã mo saã eã mbei emo mose, ùquĩ nda Dios mingo bei, i rei que Moisés ra. ⁶⁻⁷ ã nandeco Jesús icuate ã. Nyebe ae riqui nguiã nandemingo bei i ite ã. Nyebe nandeco nguiã ñee ãte. —Aba quia ra oso Jesús reru ibate si nande je, i ãte. —Aba quia ra oso mbia raaque rea, Jesús mbuquera sacua, i ãte nande mo. ⁸ ã ureico Jesucristo renei nenei mbia je ã. —Jẽ Jesucristo icua mose, jëingo bei rae, ure equia mbia je ã. Jesucristo icuasa ra ñee: —A Jesucristo cheẽ ndiqui aba jiite a. Echeẽ aba chiicua bite aba chianguire, i ra Jesucristo icuasa ñee. ⁹—Jesucristo rei sererecua, ere chõ ñee. —Dios que Jesucristo raaque mbuquera ra, ere chõ nguia ndechianguire. Nde i mose, Dios ra nemingo bei. ¹⁰ Emo Jesucristo icua mose uchianguire, Dios ra echiã mbitirõ. —Jesucristo aicua quia co, i mose, Dios ra esirõ mbae icuã si. ¹¹—Jesucristo aisi jirichĩ nguia no, i eã nda Jesús icuasa mo ñee, i que embesa ji Dios cheẽ nda. ¹² Dios quia mbia ja rerecua tuchi re. Judíos achõ ndeecua eã. Judíos eã achõ nderecua eã no. Eĩ ja chõ mbia Dios je re. —Mbae mo embu seje, i mose emo Dios je, mondo turã tuchi ra ee. ¹³ Sã embesa ji riqui i no:

“Paba, seicua embitorõ”, i mose emo, Dios ra ùquĩ mingo bei tuchi, i que embesa ji ra. ¹⁴ Mbia mo Jesús icuayã mose, ñee aroneãte ee. Mbia jiranuã mose Jesús rese, Jesús icua aroneãte. Emo Jesús cheẽ nenei nenei eã mose mbia je, mbia jirandu aroneãte Jesús rese. ¹⁵ Dios mbia mo mondo eã mose echeẽ nenei nenei sacua, echeẽ nenei nenei aroneãte. Sã embesa ji riqui ñee no. Eĩ si chõ ñene:

Aba bite emo tu mose Dios cheẽ nenei nenei ure je.

Ureya tuchite erese,

i que embesa ji cose ra. ¹⁶ Mbia mii mii ño siquichĩ Dios cheẽ turã ndese ùquĩ.

Sã Isaías ñee no:

Dios, mbia que urecheẽ ñandu sereãte ra,

i que Isaías embesa ra. ¹⁷ Mbia ra Jesucristo icuayã mbeite, jiranuã mose erese. Mbia ra jiranuãte Jesucristo rese, emo echeẽ nenei neneiã mose ee.

¹⁸ ¿Judíos Dios cheẽ turã ñanuãte re? Ñandu ja rei que ra. Dios cheẽ ngue judíos chandu ja rei resẽ. Mangue chooño eã ngue echoi Dios cheẽ nenei nenei ndesẽ. ¹⁹ ¿Judíos jiranuãte Jesús cheẽ turã ndese re? Jirandu tuchite rei que ra. Sã Moisés Dios cheẽ mbesa no:

Dios rei se. Judíos eã ndese taico turã.

Mbia aquiatuã taisi serimbarã. Judíos nda queteã tuchi serese chã,

i que Moisés Dios cheẽ mbesa ra. ²⁰ Isaías abe que Dios cheẽ mbesa ra. ã ngue embesa ra:

Ae serequia eãte quia, ùquĩ ño ngue serea ra.

Ae ndua eãte quia serese, ùquĩ je chõ achecua nguiã, i que Dios ra,

i que Isaías siquicheãte Dios cheẽ mbesa ra. ²¹ Isaías que ñee judíos je no nda: Dios riqui ñee jêje co. “Jêingo serese”, ae beite raque se quia judíos je co. Secheẽ mumba bei chõchĩ.
 “Jêingo serese”, ae beite raque quia secheẽ mumbasa je co,
 i que Dios ra, i que Isaías Dios cheẽ mbesa ra.

11

Dios ia eãte judíos rese

¹ Dios que hui eã judíos si ra. Judío chõ se no nde. Abraham ndei sei. Benjamín abe rei sei no. ¿Mañi nda Dios hui judíos si re? ²—Serimbarã mbei ra judíos, i que Dios cose ra. Nyebe eriqui nguiã emombo eã mbei. ¿Jêtesarei chõ Elías cheẽ si Dios je re? Elías que ñee icuãte judíos ataque riĩ aque mose ra. ³—Dios, judíos que ndecheẽ nenei neneisa iquia ja ra. Altar abe que embucoi coi nembae ra. Se ae tuchi aico nderimba co cote. Se abe ra judíos seiquia chee, i rei que Elías Dios je ra. ⁴ Dios que ñee Elías je cote ra. —Nde mui eã ño serimba re. Serimba tubiriãte nyeresẽ. Siete mi l serimba que ngoi eãte ngũĩã ndese ñee ñee Baal naanguia je ra, i que Dios ñee Elías je cose ra. ⁵ Eĩ ño namo abe re. Judíos emo emo ño siqui nguiã Dios rese ã. Ûqui mui ño Dios chiirabo ùqui nde. Uturã je chõ Dios ùqui irabo nguiã. ⁶ Mbae turã naa mose eã ño Dios eirabo nguiã. Uturã je ae chõ Dios eirabo nguiã. Mbae turã naa naa ndibishorõ eã ño Dios riqui nguiã aba irabo umbaerã. Mbae turã naa naa ndibishorõ mose, eĩ nda Dios aba irabo eãte rei uturã je. ⁷ Dios quiatorã nande, i rei que judíos ra. Dios quiatoã tuchi que eriqui ra. Jesucristo icua sereãte que equia ra. Co mui mui ño ngue Dios irabo uquiatorã nda. Eataque que Jesucristo icua sereãte quia ra. ⁸ Sã embesa ji riqui ñee no: Dios que embaaracua eã nda.
 Nyebe mbae icua eãte nguiã, mae mose Dios chiao rese.
 Nyebe Dios cheẽ icua eãte nguiã eandu mose no,
 i que embesa ji cose ra. Eĩ mbei chõ namo abe re. ⁹ David abe que ucheẽ mbesa ra. Eĩ ngue embesa ra:
 Sã eya chooño umbae tubiriã ndese.
 “Nandeico turãte ã”, sã i, siqui icuã mose.
 Sã Dios embua tuchi embasi mose.
¹⁰ Sã eresa nyiati ati bei.
 Mae eã sacuã.
 Sã mbae usi riqui eituquia bei,
 i que David ñee nda.

¹¹ Judíos que Dios cheẽ secha rei ra. Uba je quia ra ecuaẽ Dios rese. Dios si judíos hui mose quiatu que judíos eã siqui arõte Dios rese cote ra. Dios judíos eã mingõ bei tuchi sacuã cote. Judíos ra queteã tuchi chee Dios rese cote. Uba si sacuã erese cote. ¹² Judíos que Dios cheẽ isiteã nda. Nyebe mbia judíos eã ja Dios cheẽ andu ja nguiã cote. Judíos Dios cheẽ mumba mose, Dios que uturã teacuquia ja mbia mangu chooñoa jenda ja je cote ra. Judíos uba si mose Dios rese, mbia mangu chooñoa jenda ra siqui tuchi Dios rese cote.

Judíos eã ño Dios cheẽ isi

¹³ Jêje judíos eã je aico Dios cheẽ nenei nenei a. —Judíos eã je eico secheẽ nenei nenei, i que Dios semondo ra. Nyebe aico nguiã Dios cheẽ nenei nenei sete. ¹⁴ Judío chõ se no nde. Sã jê jêingo Dios rese no jê. Sã judíos abe riqui Dios rese jê na si. Dios erirõ sacuã mbae icuã si. ¹⁵ Judíos Dios isiteã mose

que Dios hui chõ judíos si ra. Judíos eã nguiatu que Dios isi uquiatorã cote ra. —Mbia mo ja sequiatorã cote, i que Dios judíos eisiteã mose ra. Judíos ra uba si chee Dios rese emo mose cote. Mbia raaque quera si rã tuchi ra aque mose cote. ¹⁶ Sã mbia mo mbichae raã no. Mbichae ñiinda uchi turã mose, eruinda abe ra uchi turã no. Mbichae ñiinda rã ño Abraham nde. Judío i tuchi chõ Abraham nde. Sã Abraham siqui turã tuchi Dios je no. Nyebe ra eriirĩ abe uba chee Dios rese no. Ei turã mose, erãquiã abe ra eturã no.

¹⁷ Olivo rãquiã na ño judíos re. Judíos siquiã mose Dios rese, olivo rãquiã na ño ngue Dios echisia mombo ra. Ũquiã naquiã nendaque re chõ ngue Dios jemii nda. Jẽ judíos eã. Injertar i raanguia chõ Dios jembucha nguiã ei rese. Jemingo tuchi sacua Dios rese. Olivo rãquiã na eã ndaque jẽ. ¹⁸ Jenguasu ra jẽsaã saachĩ judíos je jẽ! ¡Dios jẽisi turã mose jẽ! Erãquiã injertar i ji rã achõ ño jẽ nde. Erãquiã nda hui mingo eã. Ei quia nda erãquiã mingo nguiã. Erãquiã na ño jẽingo nguiã jẽ. ¹⁹ —Olivo rãquiã ngue Dios chisia urembucha sacua ei rese, jjenyechĩ nda jenguasu raã naa jẽ! ²⁰ Dios que echisia sia Jesucristo icua sereã mose ra. Jẽ Jesucristo icua mose chõ ngue Dios jembucha olivo i rese ra. Jemingo bei sacua. Nyebe jẽingo jenguasu raã naa eã. Jẽireĩ ireĩ jiri quia Dios si. ²¹ Dios que olivo rãquiã nyisia mombo Jesús icuayã mos e ra. Eĩ nda Dios jemombo jẽ abe Jesús icuayã mose. ²² ¡Sã Dios turãte mbia siqui mose erui no jẽ! ¡Sã mbia mbasi echeẽ mumba mose no jẽ! ¡Sã eturãte jẽje no jẽ! ¡Jẽingo bei chõ Dios turã ndese jẽ! Jẽingo eã mose Dios rui, Dios ra jemombo. Ira rãquiã sia ji mombo rã si. ²³ Judíos uba si mose Dios rese, Dios ra embucha si esiasa rese. Injertar i si ra ee. Dios mii ño equiatu ũquiã naa nde. ²⁴ Judíos eã ño jẽ nde. Olivos turã naquiã eã ño jẽ nde. Olivo mbuae rãquiã na ño jẽ nde. Dios ae que jembucha nguiã olivo i rese. Injertar i jẽje. Ae Dios nyisia nyii nae, ũquiã nda Dios mbucha si uchisia rese.

Judíos abe ra siqui chee Jesús rese

²⁵ Tacheẽ nyecuayã na jẽisaa. Mbia chiicuayã tasenei na jẽje. Jenguasu raã naa sacua eã judíos je. Judíos yete tuchi que hui rei Dios si ra. Judíos eã nguia siqui tuchi Dios icua ã cote. Judíos eã Dios chiirabo Jesús icua ja mose, judíos abe ra uba ja erese cote. ²⁶ Aque mose ra Dios judíos rirõ ja huicua si cote. Sã embesa ji riqui i no:

Mbia mbuturãsa ra tu Sion si.

Ae ra Jacob riirĩ sirõ ja huicua si. Judíos rirõ ja huicua si.

²⁷ Aque mose ra judíos icua ambutiã ja esi.

Secheẽ nda ique aque mose cote, i que Dios ra,

i que embesa ji ra. ²⁸ Judíos yete tuchi chõ Jesús cheẽ turã ucuayã nguiã ũquiã.

Nyebe Dios uturã ndeacuquia nguiã jẽje. Judíos eã je. Dios quia nyesecua beite nguiã judíos rese. Irabo que nyii ra. Eramei ja rii ño Dios judíos irabo nguiã. ²⁹ —Mbae mo tamee jẽje, i mose Dios, mondo rae. Dios ra uchimondo sirombe eã. Dios ra hui eã mbei uchiirabo si. ³⁰ Jesucristo que jẽicuayãte quia nyii ra. Judíos hui mose Dios si, Dios que uturã teacuquia jẽje cote resẽ.

³¹ Judíos quia Jesucristo icuayãte nguiã cote. Sã Dios ia eãte riqui jendese no, eĩ si ra eya eãte judíos rese cote. Uturã nda eteacuquiabe chee judíos je. ³² Eĩ ja chõ mbia Dios je re. Emo ngue echeẽ mumbayã eãte quia ra. Nyebe eya eãte riqui nguiã nande ja rese.

³³ Dios turã tuchite. Dios aracua tuchite. —¿Mbaerã Dios ũquiã naa nde? nande aroneate. Dios chisaã nandeicua aroneãte quia ã. ³⁴ ¿Emo ndua ndua quia Dios rã nde? ¿Emo mose mbia riqui Dios mbaaquiātu re? ³⁵ ¿Emo nane

mbae mo mondo quia Dios je re? ¿Dios mbae mondo nonde re? ³⁶ Dios ae que mbae chao ja ra. Umbaerā ño echao ja nguiā mbae. Ae quia ecuasú jiri mbae ja si re. Nandechē turā mbei ra equia erī. Amén.

12

Je sí chō jeñimondo Dios je

¹ Dios ia eā mbeite riqi nanderese co. Nyebe jē sí chō jeñimee Dios je. Jendeco chō jeme Dios je. Jeñia turā jeme Dios je. Ebite ũquí. Dios que mbae mondo tuchi nande je ra. Eī nande chō ñimondo ee ae. ² ¡Jesús quiatoā na nda jēingochī jē! —Nde rā si semundua ndua ramo, Paba, jenyē chō nguia Dios je. Eī jenyē mose ra Dios ñeenda huīcha teacuquia jēje. —Eī jenyē, eī jenyē chō, i bei ra Dios quia jēje cote.

³ Dios turā ngue seirabo ucheē nenei nenei sacuā jēje ra. Nyebe aico nguiā jembirandu randu co. —Se jiri quia mbia si re, ¡jenyē tuchi te chí na jē! ¡Endua ndua turā ño ndechue jē! Dios nembaaquiātu tuchi mose, ebite quia nde re. ⁴⁻⁵ Mbae tubiriāte nanderete rese. Nanderesa. Nandeo. Nandeisa. Ũquí jate nanderete rese. Mbae miī nda siquīā nanderete rese. Nandeo oco mbae rese. Nandeisa mbae andu. Nanderesa mae mbae rese. Nandechuru ñee. Nanderete quiareī “ā nandesaā”, i tuchi nyue. Eī si chō Jesús icuasa nande re. Jesús rete ja chō nande re. “Ā nandesaā”, nandete equia nandechue ā. Mbae rese jaajate que Dios uquiato mingo ra. ⁶ Dios turā tuchi que nande je ra. —Co rese eico nde. Ā ndese eico nde, i Dios quia nandembuchao chao co. Ũquí naa sacuā Dios riqi uquirācuā mee mee nande je co. —Secheē esenei senei, i mose Dios emo je, sã aque echeē nenei nenei turā echeē ndui si. ⁷ —Mbae turā esaā saā mbia je, i mose Dios emo je, sã aque mbae turā naa naa mbei mbia je. —Mbia embaaquiātu quiātu, i mose Dios emo je, sã embaaquiātu turā tuchi. ⁸ —Seosei uquia mbia je, i mose Dios emo je, sã aque Dios osei uquia turā tuchi mbia je. —Mbae emee mee mbia je, i mose Dios emo je, sã aque abei tuchi. Sã ngueteā eā tuchi mbae rese ee. Dios emo miī mose ererecuarā, sã ererecuā turā tuchi aque. —Mbaecha reā je mbae esaā saā, Dios i mose emo je, sã aque ia tuchi mbae turā naa naa mbaecha reā je.

⁹ ¡Jenyesequa choñochī nda jenyiese jē! ¡Mbae icuā si jenyicuasē cuasē tuchi quiātu jē! ¡Mbae turā ndese chō jēingo tuchi jē! ¹⁰ ¡Jembi turā ño jenyiese jē! ¡Jenongue rā nguiātu jēingo turā tuchi jenyue jē! ¡Jeñee turā turā ño nguia emo niī jē! ¡Nderī nda erecheē turā turāchī jē! ¹¹ ¡Jeñimbotomo tomochī nda jē! ¡Jeñimbirātā tuchi quiātu Dios je jē! ¹² Jesucristo cheē nda io chee nande je emo mose cote. Ũquí ño nandesaarō arō nguiā ā. Nyebe jēya tuchi quiātu siqui eraarō arō. Mbia jembasi mbasi mose, jenyecuachō ño nguia ee. Jeñee ñee mbei quiātu quia Dios je. ¹³ Mbae eā mose Jesús quiato je, mbae mo jemondo ee. Mbia mo oso mose jenyuchúaa, ¡jēisi turā ño jē!

¹⁴ Mbia mo icuā icuā mose jēje, ¡jētūrā ño ee jē! —Paba, mbae turā emondo rā ee. Ae icuāte riqi seje, ũquí je, jenyē chō Dios je. ¹⁵ Ae eyate riqi, ũquí ndese chō jēya jē abe. Ae nyeseo quia, ũquí je ndese abe jenyeseo no. ¹⁶ Hue rī ja chō jēingo ndua turā. ¡Jenguasu ra jēsaā saāchī emo je jē! ¡Jēseteā ño jēingo jē! ¡Jēaquiātu ra jēsaā saāchī jē! ¹⁷ Mbia mo icuā icuā mose jēje, jenyecuachō ño nguia ee. Mbae turā ño jēsaā nguia mbia resa rae. ¹⁸ ¡Jēingo turā ño mbia je jē! † nda jēingo ubi turā jenyiese. ¹⁹ Mbia icuā mose jēje, ¡jeñee icuāchī nda erobeishī jē! Dios quia ra embasi nguiā eicuā mose. Sã embesa ji riqi i no:

Se quia mbia tambasi eicuã mose, i que Dios ra, i que embesa ji ra. ²⁰ Ae eicuãt e riqui jêje, ùquĩ jembuquiaru chõ eriãcuã mose. Ûquĩ jembiu chõ eisei mose. Eĩ jenye mose ee, eireĩ te ra huãicuã mose cote. ²¹ Mbia icuã mose jêje, jeñeechĩ nda echeẽ ndibishorõ. Jẽingo turã ño ee. Mbae turã nguia equirãcuã jiri mbae icuã si re. Mbae icuã mombo jiri.

13

Sã mbia riqui turã ererecua ja je

¹ Mbia ja ererecua cheẽ mumbayã nguiatu. Dios ae chõ ererecua miĩ nguiã. Dios chimii ja chõ mbia rerecua re. ² Ae mbia rerecua cheẽ mumba quia, Dios cheẽ abe mumba chõ nguiã aque. Dios quia emii tare nguiã. Ae ererecua cheẽ mumba mumba quia, ùquĩ nda mbae rasi saã cote. ³ Mbia turã mbusiquiche sacuã eã ño ererecua re. Mbia icuã mbusiquiche sacuã nguia ñene. Nde ndeico turã mose, ererecua ra nembusiquiche eã. Ndeico turã mose, ererecua ra ñee turã mbei ndeje. ⁴ Dios ae chõ ererecua miĩ nguiã. Nandereaquiату turã sacuã. Nde mbae icuã naa mose, ndesiquiche jiri nda esi chã. Ndeicuã mose ra ndeiruã nua arõte. Dios quiatu emii nguiã ererecuarã mbia icuã mbasi mbasi sacuã. ⁵ Ererecua cheẽ nandemumbayã ño nguia. Nandembaasi asiã sacuã achõ eã ño ñene. Nandendua turã sacuã abe chõ ñene. ⁶ —Impuestos jêisi isi mbia si, i que Dios ererecua miĩ nda. Nyebe nandeico nguiã impuestos mondo mondo turã ererecua je. Dio s cheẽ nguire chõ ererecua riqui nguiã eisi isi. ⁷ Jẽ deber i mose emo je, mbae jembuchebi jei chõ ee. Jẽ deber i mose impuestos, jemondo chõ ee. Ererecua je jẽingo turã ño. Jeñee turã ño eriĩ.

Jenyesequa ja quia jenyiese

⁸ Emo mbae mondo mose jêje, jẽingo are arete chĩ nguiã mbae mondo rocoĩ ee. Deber jenyechĩ nda emo je. ¡Jenyesequa ja quiatu quia jenyiese jẽ! Jenyesequa mose mbia rese, Moisés chimbese ja jemumbayã ño nguiã ùquĩ. ⁹ ã ndei Moisés chimbese ã: Emo ninisi rese ra ereicochĩ. Mbia mo nda ereiquiachĩ. Mbae mo nda erembuquiachãchĩ. Emo je ra erecheẽ ñooñochĩ. Emo mbae ra erechesei choseichĩ, i que Moisés chimbese ra. Nandehesecua mose mbia rese, nandeico embesa ji cheẽ mumbayã ã. ã ndei Jesucristo cheẽ ã: Sã ereico nyesequa nderete rese no, eĩ ere si chõ nyesequa emo ndese. Nde ã naa mose, Moisés chimbese ja eremumbayã nguia ã. ¹⁰ Ae nyesequa quia mbia rese, ùquĩ nda mbae icuã saã eã mbei emo je. Emo nyesequa mose mbia rese, Dios cheẽ ndui si chõ eriqui nguiã mbae turã naa naa ùquĩ.

¹¹ Dios rese jẽingo tuchi ùquĩ. Nandemae jei ra Jesucristo rese cote. Nandechẽe ngue equia nyii. —Nandemae je ra Jesucristo rese, nande que equia nyii. Namõ nda nandemae erese cote. Aichite eñi tu a cote. ¹² Itondaru rã ño mbae icuã ja namõ nde. Jesucristo ra tu mbae mbuturã cote. Nyaashĩ na nda cote. Nyebe nandeico bei rã mbae turã ndese cote. Dios rese nandeico tuchi rã cote. Mbae icuã ndiquisã sacuã nandesĩ. ¹³ Nandeico turã ño Dios resa rae. ¡Mbia quiacua ra nandesiihãchĩ jẽ! ¡Nandequiacuachĩ nda jẽ! ¡Emo ninisi rese ra nandeico icochĩ jẽ! ¡Mbae icuã nda nandehesei choseichĩ jẽ!

¡Nandeicuã icuãchĩ nda emo mb̃icuã icuã jẽ! ¡Emo mbae ra nandechosei choseichĩ jẽ! ¹⁴ Jeñimee tuchi quia Jesucristo je. Ae nda uquiracuã mee tuchi jẽje chã. Mbae icuã ndiquisã sacuã jẽsi. Ae icuã mbia chosei chosei quia nae, ũquĩ nda jẽsaã saãchĩ jẽ Jesús resenda chõ jẽ ndesẽ.

14

Jeñee asiã mbei jenongue je

¹ Jesús quiato mo Jesús icua tuchiã mose, jẽisi turã ño. Jeñee asi asichĩ nda ee. ² Emo emo mbae u ja. Emo emo soo u eã tuchi no. Ae soo u eãte quia nae, embaaquiato tuchi iriã ño ũquĩ nde. ³ Ae soo u guia nae, sã ũquĩ ñee asiã mbei soocua reã je. Ae soo u eãte guia nae, sã ũquĩ ñee asiã mbei soocua je no. Dios quiato ja chõ ñene. ⁴ Erecheẽ icuã aroneãte ererecua rimba mo je. Ae ae mbae saã nguiã nguerecua je. Dios ae nda ñee nguiã nguimba je. Mbae raã turã mose. Mbae raã icuã mose abe no. Dios quiracuã ae nda ngũimba mingo nguiã mbae turã ndese.

⁵ —Nyaashĩ mo ngue Dios irabo mb̃icue cose ra. Ũquĩ nyaashĩ mose nandechimbaacua rã, i Jesús quiato mo nguia co. Jesús quiato mo nguia ñee nguiã: —Eĩ ja chõ nyaashĩ ndesẽ, i emo no. Sã Dios quiato ja ae riqui ndua ndua uchiangui re ae. ⁶ Dios quiato mo ñimbaacua mose aque nyaashĩ mose, Dios je chõ eriqui nguiã ñimbaacua. Dios quiato mo mbae raã naa mose aque nyaashĩ mose, Jesús je chõ eriqui nguiã mbae raã naa aque nyaashĩ mose. Ae soo u quia, Dios je chõ eriqui nguiã soo u. Gracias, i que Dios je nyii ra. Ae soo u eã nguia, Dios je chõ eriqui nguiã soo u eã no. Ae abe gracias i chõ nguiã Dios je ague. ⁷ —Sebi rese chõ taico bei, nande aroneãte. —Semanose mose quia tamano, nande aroneãte. ⁸ Dios ae chõ nandereco mingo nguiã. “Emano”, i mose Dios nande je, nandeico nguiã mano. Nandereco siqui mose, Dios rimbarã ño ñene. Nandemano mose, Dios rimbarã ño nda nandeico nguiã no. ⁹ Cristo que mano nda. Quera si que ra. Mbia rerecuarã ngue quera si ra. Mbia reco rerecuarã. Mbia mano je rerecuarã abe no.

¹⁰ Nandechẽ icuã icuã aroneãte nanderesenda mo je. Emo mose quia ra Dios mae tuchi nanderese cote. Nandechiangui renda ra etea tuchi cote. Ae quia nda nandeicuã tea nguiã. Nandeturã abe rea. ¹¹ ã ndei embesa j i ã: Dios ndei se. Se rei sereco bei. Sésaa ra mbia chi ja ngoi ngũiã ndese.

Ñee jaaja ra seje cote.

“Dios tuchi chõ nde re”, i jaaja ra seje cote, i que Dios ra, i que embesa ji ra. ¹² Nande ae ae ra mbae nandesenei senei Dios je aque mose. —ã ngue asaã saã nguia seico mose íbii ra, nande ja ja ra ee cote.

Jenongue jemb̃icuã eã

¹³ Nyebe nandechẽ icuã eã nguia nanderesenda mo ñi. ¡Nandembia eãte chĩ nda jẽ! ¡Mbae icuã nda nandesaa uquiachĩ ee jẽ! ¹⁴ Jesucristo que sembaaquiato ra. —Mbae turã ja chõ mbia chiurã nde, i que ra. —¡Co ra jẽuchĩ jẽ! iãte Dios mbae mo ñi. —Eicuãte co, i mose emo, sã ae m̃i eu eã. Ae eu mose, eicuãte ee. ¹⁵ —¡Co nandeu eã jẽ! Eicuãte, i mose nderesenda mo ndeje, eu eã. Nde eu mose, ereshesecua eã ño nguiã nderesenda rese aque. Nderesenda je abe chõ ngue Jesucristo mano ndesẽ. ¿Mbaerã nda nderesenda eremb̃icuã ndechuubi je re? ¹⁶ Ndechuubi turã ndaque ndeje. “Eicuãte” i mose nderesenda mo, eu eã ae. Nde eu mose, mbia ra erembucheẽ icuã

ndechue. ¹⁷ Dios chõ nandererecua cote re. Nyebe nandendua tuchi eã nguia nandechiurã ndese. Ae nandembei quia, ùquiã abe rese. Dios rese quia nandendua. Ae chõ nandemingo nguiaã mbae turã ndese co. Ae chõ nandechiã mbucoi nguiaã co. Espiritu turã ae nandembia mingo nguiaã co. ¹⁸ Eĩ nande mose Cristo je, Dios ia tuchi ra nanderese. Mbia abe ia ra nanderese. ¹⁹ Nandeico turã nda nandechue chã. Eĩ nande nda Jesús oseĩ oseĩ uquia nandechue chã. ²⁰ —¡Aque soo ra nandeuchi jẽ! i mose Jesús quiato mo, jereuchiã nda jẽ! Jesús quiato ra erembicuã arõte nde eu mose. Mbae turã ja raque mbia chi. “Eicuãte”, i mose Jesús quiato mo, eu eã ae. ²¹ Soo Jesús quiato mbicuã mose, soo ra nandeu eã. Vino Jesús quiato mbicuã mose, vino nda nandembei eã. Mbae mo Jesús quiato mo mbicuã mose, nandeoco eã erese nande abe. Mbae mo Jesús quiato mo mbicha serĩ mose Dios icha si, ùquiã ndese nandeicoã nande. Eĩ nda ichayã esi. ²² —So o icuã eã ño ñene, i mose Dios ndeje, echecuachõ ño nguia eu. Endua tuchi mbae mo naa nonde. Eicuã arõ mose ndeje, esaã eã. Eturã mose ndeje, echecuachõ ño eraã. Nde ùquiã naa naa mose, ndeya tuchi rae. ²³ Nde ndeiranaã mose mbae mo ndese, esaã eã. —Eturãte ereae. Eicuãte ere no ae, nde i mose erisu isu, esaã eã ño. Ndeiranaã eraã ñooño mose, eicuãte ùquiã. Ndechiisu isu u mose soo, eicuãte ùquiã. —Eicuãte ereae, nde i mose, ereicochiã nguia eu.

15

Nandebi rese ra nandecoichi jẽ; nandenongue bi rese quia nandeico

¹ Nande mo Jesús icuat e quia co. Ae Jesús icua tuchiãte quia nae, ùquiã je nandeico turã jiri ae. Nandembaaquiato quiato ae. Nandebi achõ ndese ra nandendua eã. ² Ae nandebite nande ae, ùquiã ndese nandeicoã. Ae Jesús quiato nongue bite nae, ùquiã ndese quia nandeico. Ùquiã mose nandeico nanderesenda mbaaquiato tuchi Jesús rĩ co. ³ Cristo chee que siquiã ubi rese ra. Sã embesa ji riqui ñee Cristo rĩ no: Paba, ae ndeucayãte quia nae, ùquiã ngue ñee icuã mbeite quia seje ra, i que Cristo ñee ngu je ra, i que embesa ji ra. ⁴ Dios cheẽ mbesa ji cose ndare chõ nandembaaquiatusa re. Nandemingo mingue sacua. Nandembiracuã sacua Jesucristo rĩ. Nyebe nandeico nguiaã Jesucristo raarõ arõ minguete ã. ⁵ Dios chõ nandemingo mingue nguiaã. Dios chõ nandembiracuã nguiaã. Dios nda jemingo turã mbei nyiese Jesucristo cheẽ ndui si chã. ⁶ Ùquiã mose ra jëingo ñee turã mbei Dios je. Hue rĩ ja ra jëingo ndua turã Dios rese. Dios quia Jesucristo ru re.

Dios iate judíos eã ndese

⁷ Sã Cristo nandeisi turã no, eĩ jenye si chõ nguia nyiisi turã. Eĩ nda mbia ñee turã Dios rĩ. ⁸ —Eĩ tae tae, i que Dios judíos i ñiinda ja je cose ra. Nyebe Cristo ru nguiaã mbae turã naa naa judíos je cote. —Dios cheẽ iochĩ cote, i nda judíos chã. ⁹ Judíos eã abe mundua sacua Dios rese que Cristo ru ra. Dios turã ndese emundua sacua ño ngue eru nguiaã. Co rei David chimbesa co: Paba, ndeturã tasenei senei judíos eã je. Tairasei rasei abe ndeje, i que David embesa ra. ¹⁰ Co rei embesa ji cheẽ mo co: Judíos eã, jëya chõ Dios rese. Sã Dios rimba iate erese no, eĩ jenye chõ jẽ abe jëya erese, i que embesa ji ñee nda. ¹¹ Co rei embesa ji cheẽ mo co no:

Sã mbia ibi jenda ja ñee turã ja Dios rĩĩ,
 i que embesa ji ra. ¹² Isaías que co mbesa ra:
 Isaí ririĩ nguia ra mbia judíos eã nderecuarã tuchi cote.
 Mbia judíos eã nda “ichõĩñosa reã”, i tuchi ee,

i que Isaías embesa Jesús rĩĩ nda. ¹³ Ũquí jẽingo Dios icuate ũquí. Dios nda jembia tuchi mingo chã. Dios nda jeñia mbucoi chã. Dios ae chõ “Cristo jẽsaarõ arõ”, i chõ nguiã nandemingo mingue ã. Espiritu Turã ndiqu i nandembirãcuã tuchi ã. Nandembia mingo Cristo raarõ arõ ã.

¹⁴ Seyate aico jendese co, Seresenda. Jẽingo turãte quia jenyiese ũquí. Mbae jẽicua tuchite cote. Jẽ ae jẽingo nĩmbaaquiato quiatu turã jenyue ũquí. ¹⁵ Aireĩ ireĩ ãte ã mbesa jẽje, Seresenda. Jẽtesareĩã sacua ã si. Dios turã ae ngue seirabo nguiã. Mbia mbesarei eã sacua Jesús cheẽ si. ¹⁶ Dios que seirabo Jesucristo rimbarã nda. Ucheẽ nenei nenei sacua mbia judíos eã je. Mbia judíos eã secheẽ isi turã mose, Espiritu Turã nda emingo icúe Dios mbaerã cote. Ũquí mose ra Dios judíos eã isi turã cote. ¹⁷ Se Dios cheẽ nenei nenei mose mbia je, mbia que siqui tuchi erese secheẽ nguire ra. Nyebe ũquí ndiqui nguiã sembia tuchi. ¹⁸ Jesucristo que sembirãcuã nda. Ucheẽ nenei nenei sacua judíos eã je. Nyebe judíos eã ndiqui nguiã siqui tuchi Dios rese cote. Secheẽ nguire cote. Sechisaã ndese abe maende cote. Mbae mo nĩ abe ra acheẽ iã cote. Jesucristo que sembirãcuã, ũquí mĩ ño aico nguiã ñee jẽje a. ¹⁹ Espiritu Turã ngue uquirãcuã mee seje ra. Nyebe aico nguiã mbia mae sayã naa naa tuchi mbia je. Ũquí mos e que mbia riqui tuchi Dios rese cote ra. Jesucristo cheẽ ngue asenei senei Jerusalén nda. Mbia mangue chooñoa jenda je abe. Ilírico jenda je abe. ²⁰ —Ae mbia riqui Jesucristo cheẽ nenei nenei eãte nae, huee Jesucristo cheẽ tasenei senei se, ae que se ra. Emo Jesucristo cheẽ nenei neneisa, huee taico bei eã, ae que se ra. ²¹ Sã embesa ji riqui ñee no:

Ae jiranuãte quia Cristo rese, ũquí nda jirandu erese cote.

Ũquí nda eicua cote,
 i que embesa ji ra.

Aso ra Rómaa, i Pablo

²² Ae mbia riqui Dios cheẽ nenei nenei eãte, huee quiato ngue aico nguiã Dios cheẽ nenei nenei. Nyebe aico nguiã osoãte jendea. ²³ Cose ndarechõ mbei chõ aico rei nguiã “taso jendea”, i. A jenda mbia que Dios cheẽ ñandu tuchi cote ra. Nyebe taso jendea cote. ²⁴ Seso mose España nda aso jendea. Sembia jiri sacua jendese. Taico mbirĩ na jendese huee. Jẽ nda sembucata turã mondo hue si cote chã. ²⁵ Jerusalén nane nda aso. Ofrenda mo arao quia Jesús quiato je co. ²⁶ Jesús quiato Macedonia jenda que ofrenda munua nua nda. Jesús quiato Acaya jenda rese. —Jesús quiato mbaecha reã je mbae nandemondo rã Jerusalén jenda je, i que ñee nyue nyii ra. Ũquí ño arao nguiã co. ²⁷ Coche ũquí ndiqui nguiã mbae mondo judíos Jesús quiato je. Judíos rane nguia Dios cheẽ senei senei tare nguiã judíos eã je. Nyebe ra judíos eã mbae mo mondo judíos Jerusalén jenda je cote. ²⁸ Nyebe ra ofrenda munua ji arao ee. Jesús quiato mbaecha reã je. Aquere ra aso España quti cote. Aicha ra ñeenda cúa si mae jendese. ²⁹ Jesucristo ra semondo turã jendea. Ae ra nandembia ja uturã je. ³⁰ Seresenda, Jesucristo quiato quia jẽ nde. Espiritu Turã ño jembuchesequa nguiã jenyiese ũquí. Nyebe jeñee tuchi quia Dios je serĩĩ. Nandechẽ ja tuchi quiato ee serĩĩ. ³¹ —Paba, mbia icua Judea jenda

esiquisã Pablo si. Paba, ndequiatio Jerusalén jenda nda ofrenda isi turã Pablo si chã, jenyẽ chõ Dios je. ³² Ûquĩ mose ra seya tuchi mae jendese cote, Dios “eno” i mose seje. Jendese seico mose ra sequenea aucua tuchi cote. ³³ Sã Dios riqui bei jendese. Sã eriqui jembia.

16

Pablo saluda i ja mbia je

¹ Febe jëisi turã ño. Jesús quiatio chõ aque cuña nde. Mbae turã esaã saã mbeite quia Jesús quiatio Cencrea jenda je aque. ² Jëisi turã ño nguia Jesús rii. Sã Jesús quiatio riqui nyiisi turã no, eĩ jenyẽ chõ Febe isi turã no. Ae que mbae turã saã saã mbeite Jesús quiatio je ra. Seje abe no. Nyebe jëturã ño jë abe ee. ³ Aquila je saluda jenyẽ rã seje. Eninisi Priscila je abe no. Serese que ùquĩ ndiqui Jesucristo cheẽ nenei nenei tuchi ra. ⁴ Mbia que eiquia serĩ serĩte rei quia serĩi nda. Siquicheã mbeite que equia ra. Nyebe aico nguiaã gracias i tuchi ee. Se ae eã. Jesús quiatio judios eã abe riqui gracias i jate ee ã. ⁵ Ae Jesús quiatio ñumunua nua nguia Aquila chuchua, ùquĩ je abe saluda jenyẽ. Epeneto je abe saluda jenyẽ. Sequiatio tuchite que aque ra. Ae rane ngue Cristo isi Acaya jenda ra. ⁶ María je abe saluda jenyẽ. Ae que mbae saã saã tuchi Dios je jësaã ra. ⁷ Andrónico je abe saluda jenyẽ. Junias je abe. Se sí chõ ùquĩ nde. Serese que etarõ ji riqui cárcel nda. Dios cheẽ nenei neneisa tuchi chõ ùquĩ nde. Ûquĩ nane ngue Cristo icua sesi cose ra. ⁸ Amplias je abe saluda jenyẽ. Sequiatio tuchi chõ Dios resenda aque re. ⁹ Urbano je abe saluda jenyẽ. Ae que Dios cheẽ senei senei nguia urerese ra. Sequiatio Estaquis je abe saluda jenyẽ. ¹⁰ Apeles je abe saluda jenyẽ. —Seicuaa tuchi Apeles riqui co, i que Dios Apeles rii nda. Aristóbulo chuchua jenda je saluda jenyẽ seje. ¹¹ Herodión je abe saluda jenyẽ. Se sí chõ ae re. Narciso chuchua jenda, ae Jesús quiatio nae, ùquĩ je saluda jenyẽ. ¹² Trifena je abe saluda jenyẽ seje. Trifosa je abe. Ûquĩ ndiqui mbae raã naa tuchi Dios je ùquĩ. Nandequiatio Pércida je abe saluda jenyẽ. Ae que mbae saã saã tuchi quia Dios je ra. ¹³ Rufo je abe saluda jenyẽ. Dios chiirabo tuchi chõ ae re. Esi je abe saluda jenyẽ. Taĩ na tuchi que eriqui seje ra. Mbae que esaã ja tuchi quia seje ra. ¹⁴ Asíncrito je saluda jenyẽ seje. Flegonte je abe. Hermas je abe. Patrobas je abe. Hermes je abe. Ae Jesús quiatio riqui ùquĩ ndese, ùquĩ je abe saluda jenyẽ. ¹⁵ Filólogo je abe saluda jenyẽ. Julia je abe. Nereo je abe. Enongue je abe. Olimpas je abe. Ae Jesús quiatio riqui ùquĩ ndese, ùquĩ je abe saluda jenyẽ. ¹⁶ Jenyiquiaama ama saluda i nyue. Tuchuamo jenda ja Cristo quiatio riqui saluda i jëje ã.

¹⁷ Hue emo ndiqui Jesús quiatio mbicua sete hue. Hue emo ndiqui “Jesús quiatio tambicha Jesús si”, ite hue. Jenyicuasẽ ño nguia ùquĩ si. Jesús cheẽ ndui si eã ño eriqui nguiaã mbia mbaaquiato quiato ùquĩ. ¹⁸ —Ae Jesucristo bite, ùquĩ nandesã saã, iã ño nguiaã ùquĩ. Ubi achõ ño esaã saã nguiaã ùquĩ. Echeẽ turã aba reã ño eriqui nguiaã mbia je ùquĩ. Ae Jesucristo icua tuchi eate quia nae, ùquĩ mbirĩ irĩ ño nguiaã ùquĩ. Jenyicuasẽ tuchi chõ nguia ùquĩ si. Aba mbirĩ irĩsa tuchi chõ ùquĩ nde. ¹⁹ Jë ngue Dios cheẽ jemumbayãte ra. Mbia que jirandu jate jendese ra. Nyebe seyate riqui nguiaã jendese co. Jëingo bei nda equia mbae turã ndese chã. Mbia nda jembirĩ irĩ eã jiri quia mbae icua

je chã. ²⁰ Dios quiarei aba mbiãsa. Namó jiri ra ae Satanás ndiquisã mbei jësi cote. Sã Jesucristo riqui turã mbei jëje.

²¹ Timoteo ucheë mondo quia saludar i jëje aque. Siqui beite equia serese Dios cheë nenei nenei co. Lucio abe ucheë mondo quia saludar i jëje aque. Jasón abe no. Sosipáter abe no. Se sí chõ ùquĩ nde.

²² Se abe secheë amondo quia saludar i jëje aque. Tercio rei se. Se chõ aico nguiã Pablo cheë mbesa mbesa jëje co. Jesús icuasa ja chõ nande re.

²³ Gayo abe ucheë mondo quia saludar i jëje aque. A aico rã echuchua uque a. Jesús quiato chumunua nuasa bei chõ a re. Gayo chuchua. Erast o abe ucheë mondo quia jëje aque. Ae chõ tesorero sucha tubiriã jenda je. Cuarto nandequiato abe ucheë mondo quia jëje aque. ²⁴ Sã Jesucristo riqui jendeaquiato turã mbei. Amén.

Pablo ñee hui bei sacua cote

²⁵ Nandechëë turã mbei chõ nguia Dios rii. Ae ra jembirãcuã tuchi mingo ucheë turã je. Echeë turã ngue asenei senei nguia Jesucristo rii nda. Aque cheë turã ngue mbia icuayãte quia cose nyii ra. Dios que embuchecua eã mbei mbae ao ramo mosenda bei ra. ²⁶ Namó ño Dios ucheë turã mbuchecua nguiã mbia je cote. Jesucristo rii. Dios cheë nenei neneisa que echeë mbuchecua nande je cote ra. Mbesa que nande je ra. Dios que ñee seje ra. — Secheë turã esenei senei mbei quia mbia jaje cote. Siqui sacua secheë ndese. Secheë mumbayã sacua, i que Dios seje cote ra. ²⁷ Dios mii nguiarei siqui bei. Dios mii ño mae ja nguiã mbae ja rese. Sã Jesucristo riqui mbia mbuchëë turã mbeite Dios rii. Amén.

PRIMERA CARTA DEL APOSTOL SAN PABLO A LOS CORINTIOS

Pablo embesa Jesús quiato Corinto jenda je

¹ Pablo, i que seje ra. Dios que seirabo Jesucristo renei nenei sacuã nda. Aico ã mbesa jêje a. Nanderesenda Sóstenes ndese aico embesa jêje a. ² Aico ã mbesa jêje a. Jesús icuasa je. Corinto jenda je. Jê ndei Dios quiato jêingo Jesucristo riĩ ùqui. Dios riqui jemingo icúe umbaerã ùqui. Sã Dios riqui mangue jenda chooñoa mingó icúe umbaerã no, eĩ si. Ñee mose Jesucristo je. Jesucristo rei ùqui abe rerecua no. Sã nandererecua nande no. ³ Sã Dios nanderu uturã mingó tuchi jendese. Sã Dios jembia bei mingó. Sã Jesucristo abe siqui jembia bei mingó.

Dios turãte riqui jêje co, i Pablo

⁴ Dios turã tuchi que eriqui jêje Jesucristo riĩ nda. Nyebe aico nguiã gracias i tuchi Dios je jeni co. ⁵ Jesucristo quiato chõ jê cote re. Nyebe Dios riqui turã tuchi nguiã jêje co cote. Jembaaquiato tuchi ucheẽ nenei nenei sacuã mbia je. Jembaaracua tuchi que ucheẽ niĩ nda. ⁶ Ure Jesucristo renei nenei mose jêje que jêisi turãte ra. Jê Jesucristo jêicuante quia ùqui cote. ⁷ Nyebe Dios turã ndiqui nguiã hui ãte jêsi co. Jembirãcuã mbeite equia querabe co. Ùqui jêingo Jesucristo raarõ arõ ùqui. ⁸ Dios ra jembirãcuã mbei mingó mbae ua ja chee. Mbã mo nda ñee icuã eã jêje Jesucristo tu mose. ⁹ Dios ra jendeaquiato bei. Ucheẽ nda embuchebiã mbei ñeende jêje. Ae quiato ngue ñee nguiã jêje. —Taemingó bei seriirĩ ndese Jesucristo rese, i.

Jesús quiato nyao nyao chõchĩ nyesi

¹⁰ Seresenda, nandererecua ja chõ Jesucristo resẽ. Jenyao chao mose nyesi, eicuãte ùqui. Hue rĩ ja chõ jêingo ndua ndua. Mbae miĩ ndese chõ jêingo. ¹¹ Mbã quiatu ngue ñee nguiã seje. —Eicuã icuãte que nyue ra, i que Cloé chuchua jenda ñee sembiirandu jeni nda. ¹² —Pablo mbae chõ se re, i chõchĩ jemo nguiã seriĩ ùqui. —Apolos mbae chõ se re, i chõchĩ jemo nguiã ùqui no. —Pedro mbae chõ se re, i chõchĩ jemo nguiã no. —Cristo mbae chõ se re, i jemo no. ¹³ ¿Cristo mbuchao chao ji ere no? ¿Pablo mano jendiquicharõ nde no? ¿Pablo riĩ bautizar i jêje re no? ¹⁴ Se que bautizar ae eã jêje resẽ. Crispo miĩ je que bautizar ae ra. Gayo je abe. ¹⁵ —Pablo riĩ ño ngue bautizar i nguiã seje, i aroneate jemo ñee seriĩ. ¹⁶ Estéfanos chuchua jenda abe que bautizar ae ra. Aquere que bautizar ae ãte jemo je ra. ¹⁷ Bautizar i sacuã eã ngue Cristo semondo ra. Ucheẽ turã nenei nenei sacuã ño ngue semondo nguiã. Seaquiato asaã saã eã ño nguiã Dios cheẽ nenei nenei co. Cristo cheẽ ambiasa mingue turã ño nguiã co. Se seaquiato raã naa mose, i nda mbã ndua ndua eãte rei Cristo mano ndese.

Dios cheẽ quirãcuã tuchi Jesús riĩ

¹⁸ Ae ra nyoĩ tata cuásuu, ùqui ndei “ichõiñosa” isa Dios cheẽ nenei neneisa riĩ. —Cristo que mano mbã riquicharõ nda, i mose ee, “ichõiño ñene” i chõ nguiã. Nande quiatu que Dios nanderirõ nandeicuã si ra. Nyebe Dios cheẽ turã ndiqui nguiã uquirãcuã ndeacuquia nande je co. ¹⁹ ã ndei Dios cheẽ mbesa ji ã:

Ae “seaquiātu tuchi” i quia, ũqui aquiatu ra ambuquiachã esi.
 Ae “searacua tuchi” i quia, ũqui aracua abe ra ambuquiachã esi no,
 i que Dios cheẽ mbesa ji ra. ²⁰ Ae uaqiātu saã saã nguia, ibi jenda ja chõ
 ũqui nde. Ae ucheẽ aquiatu saã saã nguia, ibi jenda ja chõ ũqui no nde.
 Eaquiātuãte ũqui, i chõ Dios nguia ũqui je. ²¹ Mbia ae ra Dios icuayã mbei
 uaqiātu ae je. Dios cheẽ ae je quia nda mbia Dios icua nguia emo Dios
 cheẽ nenei nenei mose ee. Ae Dios cheẽ isi nae, ũqui nda Dios sirõ eicuã si.
 Ichõiño nguia, i raque mbia ataque Dios cheẽ nii. ²² —Mbia mae sayã ndese
 nda uremae na ña, i bei que judíos quia ra. —Urechimaaquiātu tuchi rã, i
 bei que judíos eã nguia ñee nyue no nda. ²³ Nande quiātu Cristo nandesenei
 senei nguia ã. Ae mbia mbucha quia ira rese, aq̄ue chõ nandesenei senei
 nguia nande ã. Ũqui si judíos ireite riqui ã. Cristo renei nenei mose, judíos
 eã ndua eã tuchi chõ nguia erese ã. ²⁴ Nande quiātu nandebite riqui nguia
 Cristo renei nenei mose ã. Dios judíos mo irabo chõ nguia. Judíos eã mo abe
 irabo chõ nguia no. Ũqui je chõ ngue Cristo Dios quirãcuã mee nguia. Ũqui je
 chõ Cristo Dios aquiatu mee nguia. ²⁵ Dios aquiatuãte, i raque mbia mo ñee
 Jesús mano je rii. Dios quia eaquiātu tuchi jiri riqui nguia mbia si co. Dios
 quirãcuã neate, i raque emo ñee no. Dios quia equirãcuã tuchi jiri riqui nguia
 mbia si co.

²⁶ Dios que jëirabo ja ra. Jëaquiātu tuchi eã ndaque ee. Ererecua eã ndaque
 jë. Mbaecha eã ndaque jë. Dios ae chõ ngue jëirabo nguia. Ũqui ndese jendua
 jiri. ²⁷ Ae je mbia riqui “eaquiātuãte” i nae, ũqui ño ngue Dios irabo nguia. Ae
 ucuasu saã saã nguia nae, ũqui ireĩ ireĩ sacua esi. ²⁸ Ae mbia ataque ucuayãte
 quia nae, ũqui ño ngue Dios irabo nguia. Ae ucuasu saã saã nguia nae, ũqui
 mbutiã sacua. ²⁹ Nyebe nandeco nguia nandeaquiātu raã naa aroneate Dios
 je ã. Nande mii mo jiri jiriã. ³⁰ Dios quiātu que nandembucha Jesucristo rese
 ra. Ae quiātu que nandembiiirandu Dios rese ra. Ae chõ ngue nandechiã
 mbuturã no nda. Ae chõ ngue nandemingo icúe Dios mbaerã no nda. Ae
 que mano nanderiquicharõ no nda. ³¹ Sã embesa ji riqui ñee ã no:
 Ae Dios saã nande je nae, ũqui nii nandechẽ turã.
 A e nandesã nande ae nae, ũqui nii nandechẽ turã eã,
 i que embesa ji ra.

2

Jesucristo mii Pablo senei senei mbia je

¹ Seresenda, seso mose jendea que Dios cheẽ asenei senei turã jëje hueue
 resẽ. Seaquiātu asaã saã eã ño nguia jëje Dios cheẽ nenei nenei. ² —Jesucristo
 mii ño tasenei senei jëje. Jesucristo mano nguia mbia icua ndiquicharõ nae,
 ũqui mii ño tasenei senei jëje, ae chõ ngue oso nguia ñee jëje. ³ Seireite que
 seso mose ñee jëje nyii ra. Semburirite que aq̄ue mose ra. ⁴ Seaquiātu que
 asaã saã eãte quia ra. Dios cheẽ ngue ambuchecua tuchi quia ñee ñee jëje ra.
 Espiritu Turã nguia que secheẽ mbirãcuã tuchi quia ñee ñee jëje ra. Nyebe
 mbia ñee nguia. —Dios cheẽ ño eriqui re, i nguia secheẽ mose. ⁵ Dios quirãcuã
 ae jemingo nguia Jesucristo rese ũqui. Mbia mo aquiatu eã ño jemingo nguia
 Jesucristo rese ũqui.

Espiritu Turã ndiqui mbae icua jate nande je co

⁶ Ae seaquiátute, ũqui ja chõ asenei senei mbei nguia Jesús quiato je co. Ae
 seaquiátute nae, ibi jenda rã eã ño seaquiātu riqui nguia co. Ae seaquiātu

nae, ibi jenda rerecua rã eã ño seaquiату riqui nguiã co. Ûqui aquiatu quia ra tiã jei. ⁷ Ae ureico ñee ñee nae, ùqui nguia mbia mbaaquiату jiri nguiã. Dios cheëte quia ñene. —Secheë nda ambuchecua je nguiã mbia je. Mbia mingo bei sacua, i que Dios nyii mbae ao nonde ra. Dios que esenei eã nyii ra. Namó ño embuchecua nguiã nande je cote. ⁸ Mbia rerecua que Dios aquiatu icua eãte ra. I nda eriri mbucha eãte rei ira rese. ⁹ Sã embesa ji riqui ñee ã no: Dios ra mbae turã saã tuchi nande je. Ucheseecua je.

Ae ra Dios saã nande je, ùqui ndese emo iranuate namo.

Emo mae ãte erese namo,

i que embesa ji ra. ¹⁰ Nande quia nandeico nguiã irandu erese ã. Espiritu Turã quiату nandembiirandu nguiã. Espiritu Turã nguia mbae icua jate nguiã co. Dios chiao abe icua jate equia co. ¹¹ Ae rese emo ndiqui ndua, mbia mo ùqui ndua ndua icuayãte. Ae rese nandeico ndua, nande ae nandeicua nguiã. Ae rese Dios riqui ndua, Espiritu Turã mi ño eicua nguiã. Dios sí chõ Espiritu Turã nde. ¹² Dios que espíritu mbuae mo monoã nande je ra. Espiritu Turã ño ngue emondo nguiã nande je. Ae Dios saã turã nguia nande je nae, ùqui ndese nandembiirandu sacua ño ngue Espiritu Turã mondo nguiã nande je. ¹³ Ae Dios saã turã nguia ure je nae, ùqui uresenei senei nguia ã. ã ndese chõ ngue Espiritu Turã urembaaquiату nguiã. Mbia cheëño eã ño ñene. Nyebe aico nguiã Dios chisaã nenei nenei Dios quiato je co.

¹⁴ Ae Jesucristo icua eãte, ùqui sí Espiritu Turã ñee icuayãte quia ã. Echeë mbaranguiatuãte riqui ee ã. Nyebe eriqui nguiã echeë isiãte. ¹⁵ Ae Jesucristo icuate nae, ùqui nguia mbae icua jate nguiã ã. Ae eturãte nae, ae eicuãte nae, ùqui icua ja equia ã. ¿Mañi Jesús quiato quia re? i chõ mbia nguiã Jesús quiato cheë icuayã ã. ¹⁶ Tarembaaquiату, i aroneate mbia mo Dios je. Dios quiato eã mo ndua eãte quia Dios rã si ã. Nande quia nandendua ndua nguiã Cristo ndua rã si ã. Dios resendate quia nandeico nguiã ã.

3

Mbae mi na ño ureico nguiã Dios cheë nenei nenei

¹ Jesús resenda jëingo raque ùqui. Jëingo tuchiãte quiату nguiã erese ùqui. Ae jembite riqui nae, ùqui mi ndese chõ jëingochi nguiã ùqui. Ae Cristo bite nae, ùqui ndese jëingoã ñochi nguiã ùqui. Nyebe jaembaaquiату tuchi aroneate equia co. ² Mbia riiri na ño jëingochi nguiã secheë andu mbiri mbiri cose. Querabe chõ jëingo nguiã secheë andu sereã ùqui. Nyebe jaembaaquiату quiату tuchiã nguiã Jesús cheë ndese. Ae jembite riqui nae, ùqui ndese jëingo mose ra Dios cheë jëicuayã mbei. ³ Jëe turã turã eãte quiату nguiã jenyue ùqui. Jendua turã ja eãte equia ùqui. Jeñee turã turã eãte quiату nguiã jenyue ùqui. Nyebe acheë nguiã jëje. —Ae Cristo bite nae, ùqui ndese jëingoã ñochi nguiã ùqui, ae chõ ndei nguiã jëje co. ⁴ —Se rei Pablo mbae, i chõchi jemo nguiã ñee ùqui. —Se rei Apolos mbae, i chõchi jemo no. Nyebe jëingo eã nguiã Cristo bi rese ùqui.

⁵ ¿Aba chõ se chã? ¿Aba chõ Apolos no ña? Mbia rerecua eã ño ureico nguiã ã. Dios cheë nenei neneisa chõ ureico nguiã ã. Ure Dios cheë nenei nenei mose jëje que Jesús jëicua resë. ⁶ Mbae tiquia ji rã ño jë nde. Sã emo mbae eï tiquia no. Sã emo i icherë cherë erese no. Dios ae chõ embusuri nguiã. Anyae chõ ngue Dios cheë mingue nguiã jendese. Apolos chõ ngue jembaaquiату quiату nguiã cote. Dios quiarei ucheë mbusuri raanguia jeñangui re. ⁷ Ae

echitiquia nae, aque embusuri aroneate. Ae i icherē cherē erese nae, aque abe embusuri aroneate no. Dios ae embusuri nguiã. ⁸ Ae echitiquia quia, ae i icherē cherē nguia erese, eĩ si chõ ùquĩ nde. Dios ra mbae turã mee ee, ae esaã ùquĩ ndibishorõ. ⁹ Ure rei Dios cheẽ naa naasa. Sã chacocho no, eĩ si chõ Dios mbae jẽ nde. Sã tuchuacha no, eĩ si chõ Dios mbae jẽ nde.

¹⁰ Dios turã tuchi que seje ra. Seje quiatu ngue ucheẽ mee nguiã. Mbia mbaaquiату quiatu sacua. Tuchua ao aquiату rã ño se re. Tuchua i raanguia chõ asaã nguiã base cote. Aque arõ ño emo ndiqui nguiã tuchua ao hue no. Ae tuchua chao sechisaã arõ nae, sã eraã mingue turã. ¹¹ Tuchua i raanguia chõ Jesucristo riqui nguiã. Ae mii tuchi chõ tuchua i raanguia re. ¹²⁻¹³ Ae arõ tuchua mo nandesaa arondete. Sita je eraã mose, siqui turã mbei rae. Oro je eraã mose, siqui turã mbei ra eno. Plata je eraã mose, siqui turã mbei ra eno. Ûquĩ je eraã mose, oquei eã nda Dios tata mbu mose. Ira je eraã mose, oquei chõ ndae. Quiata je eraã mose, oquei chõ nda eno. Nandechisaã nda Dios tea ja. ¹⁴ Nandechisaã siqui i i mose, Dios ra mbae turã mee nande je. ¹⁵ Nandechisaã oquei mose, nandembae ra quiachã nandes. Nande quia ra nandequiachãya ndaque. Nandecuasẽ ndaque ra ibate Dios je. Nandechi quiatu ra nandeico cote.

¹⁶ ¿Jêtesarei chõ ere? Dios chuchua chõ nanderete riqui co resẽ. Dios riqui beite nandeye co. Espíritu Turã ndiqui beite nandeye co. ¹⁷ Emo Dios chuchua mbiicua mose, aque ra Dios mbutiã. Nande quia Dios chuchua re. Dios que uchuchua mii icúe umbaerã nda. Nanderete je sichõ nandeico nguiã ñee co. Dios chõ nandemingo nguiã icúe umbaerã co.

¹⁸ —Nandeaquiату, jenyechi nguiã jeñiangui re ùquĩ. Ae eaquiату ibi jenda achõ ndese, sã ùquĩ uaqiату raã naa eã. Siqui mingue mose ra Dios embaaquiату turã cote. ¹⁹ Ae eaquiату ibi jenda achõ ndese, “eaquiату”, i chõ Dios nguiã ùquĩ je co. Sã embesa ji riqui ñee no:

Dios ra ùquĩ aquiату mbutiã ño cote.

“Seaquiату tuchite aico co”, i quiatuchĩ ngue nyii re,

i que embesa ji ra. ²⁰ Sã embesa ji riqui ñee no:

Ae rese eaquiату riqui ndua nae, ùquĩ Dios icua tuchite quia co.

Ndua ndua iru chõ nguiã,

i que embesa ji ra. ²¹ ¡Mbia aquiату mo ndese ra jeñimbucha chooñochĩ jẽ!

Dios quiату que mbae mondo ja jẽje ra. ²² Jembae chõ se re. Apolos abe rei jembae no. Pedro abe rei jembae no. Mbae ibi jenda ja rei jembae. Dios mbia mingue mose, jẽje chõ emingo. Dios mbia mingue eã mose, jẽje chõ emingo eã.

Ae siqui quia namo, jembae ja chõ ùquĩ nde. Ae ra siqui aquere, jembae ja chõ ùquĩ no nde. Jembae ja chõ ñene. ²³ Cristo mbae chõ jẽ nde. Dios mbae chõ Cristo no nde.

4

Ureaquiату tuchi Jesús chimbuaquiату si, jenyechĩ nda jẽ

¹ —Cristo rimba ja chõ ùquĩ nde, jenyechõ serĩ. Apolos rĩ abe no. —Ae ambuchecua eã mbia je nyii, ùquĩ jembuchecua checua mbia je serĩ cote, i que Dios ure je ra. ² Dios rimba mose nande, Dios cheẽ nandemumbayã mbei chõ nguia. ³ —Serimba turã ño nde re, i ra Dios seje reae. Nducua. Aicuayate se. —¿i se jẽje re? ae áte se quia jẽje co. Ae áte se quia emo je co no. Dios mii ño seicua nguiã. ⁴ Dios rimba turãte aico reae. Dios ae chõ seicua nguiã. ⁵ —Dios rimba turã ño aque re, ¡jenye jeichĩ nda emo nii jẽ! Jesucristo tu mose, ae quia

ra mbae mbuchecua ja. Ae ra nandendua ndua mbuchecua ja. Aque mose quia ra Dios ñee. —Co rei serimba turã tuchi co, i ra Dios mbia mbiirandu aque mose cote.

⁶ Jembaaquiato sacua ño aico nguiã ñee jêje co. Sechue si chõ aico nguiã ñee. Apolos rñi abe chõ aico nguiã ñee. Dios rimba achõ ño ure re. Ure mñi ndui jëingo bei aroneate. Dios rimba ja rui chõ jëingo. Eñi jenyete mose ra embosa ji jemumbayã. ⁷ ¿Mbaerã nda jëcuasu jësaã saã nde? Ae jendecote jembaerã nae, Dios chimondo ja chõ ñquĩ nde. Jëaquiato mose, Dios ae jembaaquiato nguiã. —Se ae que sembae asaã saã nda, ijenyechĩ nda jëcuasu raã naa jê!

⁸ —Ureaquiato tuchite cote, jenyechĩ ngue ñee nda. —Ureico Dios cheẽ icua jate co, jenyechĩ ngue ñee no nda. Ererecua tuchi jësaã saãchĩ ureririrõ cote. Ererecua jësaã ñooño na jê no. Se abe ra ererecua asaã saã ndei jê na ndeae. ⁹ Dios ucheẽ nenei neneisa quirirõ jiri ure reae. Mbia tarõ ji rã ño ureico uremano ndaarõ arõ ndeae. —¿Mañi ã nguia re? i tuchi mbia quia mae nguiatu urerese co. Angeles abe ñee nyee mae nguiatu urerese. ¹⁰ Ureico tuchi mose Cristo rese, “eaquiataã”, jenyete chõchĩ equia ure je ñquĩ. “Ureaquiataute ure”, jenyete chõchĩ equia jê jëingo mose Cristo rese ñquĩ. Urequirãcuã neãte ure, jê jëquirãcuã mose. Mbia ureosei chiãte ure; jê nguia mbia jëoseite nguiã. ¹¹ Mbae eã mbeite urembae namo abe. Ureirãcuã ãcuãte que eriqui emo mose ra. Ureiseite abe que eriqui ra. Ureirao eãte abe no. Mbia icuã icuã mbeite ure je. Urechuchua eãte abe no. ¹² Mbae uresaã saã tuchite quia ureo je co. Mbia icuã icuã mbeite riqui ure je co. Urecheẽ turã turã mbeite equia ure ee ã, ñquĩ ñee icuã icuã mose ure je. Urechecua chõte equia ñimbirãcuã ee ã. ¹³ Urecheẽ mingue beite equia ñquĩ ñee icuã mose ure je ã. Mbae quia rã tuchi chõ ureico nguiã mbia je ure ã. Mbia ureririrõ mbeite quia namo nyee ure ã.

¹⁴ Jëireĩ ireĩ sacua eã ño aico nguiã ã mbesa jêje ã. Jemundua ndua sacua ño ñene. Seririrõte quia jê nde. ¹⁵ Jembaaquiato quiatusa tubiriãte raque Cristo rñi. Se mñi tuchi chõ jendu re. Se rane nguiatu ngue echeẽ turã asenei senei nguiã jêje nyi. Se quiatu ngue Cristo aicua uquia nguiã jêje. Nyete aico nguiã “seririrõ” i beite jêje co. ¹⁶ Nyete jëingo se rã si. ¹⁷ Timoteo amondo quia jêje aque. Ae rei sechimbaaquiato tuchi. Nyete “seririrõ” ae tuchi nguiã ee. Ae quiareĩ siqui turã tuchi Dios rese. Ae ra jemundua bei secheẽ ndese. Sechisaã ndese abe no. —Eñi ngue Pablo quia Jesús quiato mbaaquiato quiatu sucha mbuchesea sea mose ra, i ra Timoteo jêje serirõ. ¹⁸ Jemo ndiqui uaqiata raã naa tuchichĩ ñquĩ. —Pablo ra tu eã mbei urerea, i chõchĩ jemo nguia serirõ ñquĩ. ¹⁹ Aso jei ra jendea, Dios eno i mose seje. Ae uaqiata saã saã tuchi quia jemo nae, ñquĩ tatea cote. Mañi nda equia mbae raã ndeae. Echeẽ achõ achandu sereã. ²⁰ Dios rimba cheẽ achõ aroneate. Siqui eã mose Dios quirãcuã ndese. ²¹ Manyae ra jêje seso mose jendea reae. Acheẽ asi asi ra jêje reae. Aico mingue chõ nda jêje renoae. Jëhui mose jëicuã si, acheẽ asi asi eã nda seso mose jendea.

5

Ae siqui ngu ninisi rese, aque jemombo

¹ Mbae icuã tuchi rese que ureirandu jendese ra. Jemo nda siqui siqui ngu ninisi rese ra. ¿Mbaerã jëataque jëtea chooño mbae icuã naa mose re? Ae Jesús quiato ãte nae, ñquĩ ño siqui ãte ngu ninisi rese. ¿Mbaerã Jesús quiato quiatu

siqui ngu ninisi rese re? ² Jêturã jêsaã saã mbei chõchĩ nguiã jê ùqui. Jêya eã eã ño jêingochĩ ùqui ndese ùqui. Jêireĩ ngũã tuchi chõchĩ. Ae siqui ngu ninisi rese, ae jemombo eã ñochĩ jeñumunua nuasa si.

³ Ishote aico raque jêsi co. Andua beite sequia jendese co. —Ae siqui ngu ninisi rese, aqwe jemondo Satanás je, ae chõ nguiã sechiangui re co. Se siqui raanguia jendese. ⁴ Jeñumunua na Jesús quiato hue jenda. Se abe ra andua ndua jendese. Jesucristo quirãcuã abe ra siqui tuchi jendese jeñumunua mose. ⁵ Ae siqui ngu ninisi rese nae, aqwe jemombo chõ jêsi. Jesús quiato si. Jemee ño Satanás je. †nda Satanás erete mbasi. †nda eaĩ siqui bei Jesucristo tu mose cote.

⁶ ¿Mbaerã jeingo jêturã naa naa mbae icuã ndea choõño nde? Levadura rã ño mbae icuã nde. “Levadura ñetê nda oso raque mbichae raã namo mose. Mbuchimatã ja rae”. ¿Ùqui jeñanuãte quiato re? ⁷ Ae eicuãte nae, aqwe jemombo jêsi. †nda jê abe mbae icuã jêsaã eã. Dios que Jesucristo iquia nandeicuã ndibishorõ nda. Sã mbia riqui oveja iquia iquia huicua ndibishorõ no. ⁸ Nyebe nandeico turã na Dios rese, mbae icuã naa naa ndocoĩ. Cochee nandeico. Nandeicuã nandesecha ja.

⁹ —Ae siqui emo ninisi rese, ùqui je ra jeñee ñeechĩ, ae que secheẽ mbesa mondo jêje nyii. ¹⁰ Ae Jesús quiato ãte, ùqui ñi eã ño ngue acheẽ nguiã jêje. Nandechẽ eã aroneate Jesús quiatoã je nandeico mose íbii. Ae siqui quia emo ninisi rese nae, ae abei chiãte riqui nae, ae mbae mbuquiachã nguia nae, ae siqui Dios abareã ndese nae, ùqui je nandechẽ eã aroneate. ¹¹ Jesús quiato mo ùqui icuã naa mose, jemombo chõ jêsi. Jeñee ñeechĩ nda ee. Emo ninisi rese siqui mose. Abei chiã mose. Dios abareã ndese siqui mose. Uchuru rerequia choõñoã mose. Quiacua mose. Mbae mbuquiachã mose. Jesús quiato ùqui naa naa mose, jêhui chõ esi. Jêquiaru jiri jiriã tuchi ùqui ndese. ¹² Jesús quiatoã nandeteaquiato aroneate. Ae Jesús quiato, ùqui nguiatu nandeteaquiatu. ¹³ Dios quia ra Jesús icuasa reã mbasi. Ae siqui ngu ninisi rese nae, “Jesús quiato se”, i rei quia nae, aqwe jemombo chõ jêsi.

6

Jemo icuã icuã mose nyue, jê ae chõ jêingo

¹ Jemo icuã icuã mose nyue, jêsochĩ nguiã ñee Jesús quiatoã nderecua je. Jê ae chõ jemaee erese ae. Jêicua ae. Sã Dios quiato achõ ño ñee ùqui je. —¡Eĩ jenyee jê! i ùqui je. ² Dios quiato quia ra “¡eĩ jenyee jê!” i ja Dios quiatoã je emo mose. Jê nguia ra “¡eĩ jenyee jê!” jenyee mbia ataque je emo mose. ¿Mbaerã jêingo “¡eĩ je nye jê!” ise reã mbae ñetê naa mose re? ³ Angeles je abe chee ra “¡eĩ jenyee jê!” nande. ¿Ùqui ndese jêiranuãte re? ã ibi jenda je “¡eĩ jenyee jê!” nande turã ja rã ae. ⁴ Jesús quiato chõ jê nde. Ibi jenda mo ñi jemo icuã icuã mose nyue, jê ae chõ jemaee ùqui ndese. Jêsochĩ nguiã ñee Jesús quiatoã nderecua je. Dios quiato eãte quia ùqui nde. ⁵ Jesús quiato mo ñee icuã icuã mose nyue, ¿jemo jêaquiataate ñee ee re? “¡Eĩ jenyee jê!” i ee re. Jê jêireĩ ireĩ sacua ño aico nguiã ñee jêje ùqui. ⁶ —¿Mañi ure ra re? i aroneate Jesús quiato ñee Jesús quiatoã nderecua je.

⁷ Jemo Jesús quiato mo icuã icuã mose nyue, echia turã tuchi ãte quia ñene. Jeñimbirãcuã ño mbae icuã naa mose jêje. Jeñimbirãcuã ño jembae mbuquiachã mose no. ⁸ Jê abe mbae icuã jêsaã saã ñochĩ, ñimbirãcuã ndocoĩ.

Jê abe jendesenda mbae jembuquiachã ñochĩ Jesús quiato mbae, ñimbirãcuã ndocoĩ.

⁹⁻¹⁰ Mbia rerecuarã tuchi ra Dios cote. Aque mose ra mbia icuã siquĩã tuchi Dios rese. Ae siqui emo ninisi rese nae. Ae siqui ngũinisiã ndese nae. Ae ndua chooño nguia Dios abareã ndese nae. Ae siqui quia nyiese ngũinisi raã naa nguesenda je nae. Ae mbae mbuquiachã quiachã nguia nae. Ae abei chiãte riqui nae. Ae quiacua quiacua quia nae. Ae ucheẽ mondo chooño mbeite quia mbia je nae. Ũquĩ nda siquĩã tuchi Dios rese. —Eicuã abe ra siqui bei Dios rese, ijenyechĩ nda ñimbiĩrĩ irĩ jê! ¹¹ Eĩ ngue jemo icuã cose ra. Dios ae jembitorõ nguĩã cote. Dios chõ jemũ nguĩã icũe umbaerã cote. Espĩritu Turã ngue jêisi turã Jesucristo rĩ cote ra.

Espĩritu Turã nyuchua chõ jendete re

¹² —Co rese ra ereicochĩ, i ãte raque Dios quia seje mbae mo nũ. Dios biãte nande mbae raã ja chooño mose. Mbae mo sembũcuã serĩ mose, asaã eã mbei ra se. ¹³ Nandechiurã ndei nanderie ye sacuã. Nanderie rei nandechiururã. Ũquĩ ja ra Dios mbutiã emo mose cote. Dios mbaerã ño nanderete re. Siqui chooño sacuã eã ño emo ninisi rese chõ nanderete re. Nanderete rerecuã chõ Dios re. ¹⁴ Dios quirãcuã ño ngue Jesucristo raaque mbuquera nguĩã. Eĩ ño nda Dios quirãcuã nanderaaque mbuquera nguĩã nande abe no. ¹⁵ ¿Jẽiranuãte quia jendete rese re? Cristo nanderete mbucha quia uchiese co. Cristo rete chõ nandeco nguĩã co cote. Cristo rete nandembucha aroneate cuña icuã ndete mo ndese. ¹⁶ Emo siqui mose cuña icuã mo ndese, erete ucha chõ nguĩã nyiese aque. Erete nyeremo eã ño cote re. Ũquĩ ndete ja ra co mũ cote, i que Dios cose ra. ¹⁷ Emo siqui mose Cristo rese, nguete mbucha chõ nguĩã erese ũquĩ cote. Erete mũ na ño ũquĩ cote re. ¹⁸ ¡Jeninisiã ndese ra jẽingochĩ jê! Mbae icuã mo naa mose, ũquĩ nda nanderete mbũcuãya jiri. Siqui mose ngũinisiã ndese, ũquĩ nguia ra nanderete mbũcuã tuchi cote. ¹⁹ Espĩritu Turã siqui chee jeñiangui re ũquĩ. Espĩritu Turã nyuchua chõ jendete re. Dios mbae chõ jê nde. Jembae ae eã ño jendete re. ²⁰ Eicuã nimba rei ngue jê nyii re. Dios quiatu ngue jêisi nguĩã cote. Nguĩrĩ ngue emondo jendibishorõ nda. Nyebe jẽingo jendete mee Dios je. Jêã abe jeme e noae.

7

Pablo mbia mbaaquiātu emo ngũinisi rerequia rĩ

¹ Jênee ngue jembesa mondo seje nyii nae, ũquĩ tasibishorõ jêje cote. Coche emo siquĩã nguĩã cuña mo ndese. ² Coche mbia ngũinisi ae rerequia nguĩã. Coche cuña ngu mũ nderequia nguĩã no. Emo ndese siqui chooño eã sacuã ño ũquĩ nde. ³ Sã eru riqui turã ngũinisi rese. Sã eninisi abe riqui turã ngu rese. Nyao aroneate nyesi. ⁴ Eninisi rete chõ eru mbae cote re. Eru rete chõ eninisi mbae cote no nde. ⁵ Nya i aroneate eru ngũinisi je nguete rese ngueteã. Nya i aroneate eninisi nguete rese ngueteã ngu je no. —Nandechẽ mbei Dios je namo, siqui rocoĩ nyiese, i mose nyue, eturãte ũquĩ. Sã eriquibe nyiese aquere cote. Ñee ñeende Dios je cote. Siquire eã mose nyiese, ñimbirãcuã eã arõ ndete. Satanás embũcuã arõte cote. ⁶ —Jeninisirã jendeco, ae ãte quia jêje co. —Jeninisibi mose, jendeco ae, ae chõ nguĩã jêje co. ⁷ —Sã Jesús quiato ja ninisiã ndiqui se rã si, ae rei que se ra. Dios cheẽ eã ño ũquĩ nde. Nandechisaã ae aerã ño Dios mondo nguĩã nande je. Emo ninisiã siqui turã arondete. Emo ae ngũinisi quereco sete nguĩã no.

⁸ Ae eninisiâte nae, ũquí je tacheẽ. Eru cheecha je abe tacheẽ no. Coche jẽingo nguiã jendu eã. Coche jeninisiã ndiqui nguiã no. Se rã si. ⁹ Jeñimbirãcuãyã mose jendete je, jeninisirã mo jẽtea ae. Jendurã mo jendeco noae. Mbia mo oseï oseï rocoĩ.

¹⁰ Ae ngu quereco nae, sã ũquí ngu rechayã mbei. Jesús cheẽ tuchi chõ ũquí nde. Secheẽ ae eã ño ũquí nde. ¹¹ Cuña mo ngu recha mose, sã eriquiã mbei emo ndese. Sã ae ae chõ ndiqui bei, ñimbucha si eã mose ngu rese. Sã eru abe ngūinisi rechayã mbei.

¹² Se ae tacheẽ cote. Jesús cheẽ eã ño ã cote re. Jesús quiato mose emo, sã eriqui bei ngūinisi rese. Jesús quiatoã ndaque eninisi. Eninisi siquise mose ngu rese, sã eru siquichõ erese. ¹³ Jesús quiato mose cuña mo, sã eriqui bei ngu rese no. Jesús quiatoã ndaque eru. Eru siquise mose ngūinisi rese, sã eninisi siquichõ erese no. ¹⁴ Jesús quiato mose eru, eru ngūinisi mbucha arõte quia Jesús rese co. Jesús quiato mose eninisi, eninisi ngu mbucha arõte quia Jesús rese co no. Eĩ nda eriirĩ abe Jesús icuayãte rei, ũquí ande. ¹⁵ Jesús quiato mo ninisi siquiã mose Jesús rese, “seru tasecha” i bei mose, sã eru eriquisã quisã eã. Cuña mo Jesús quiato mo ndu siquiã mose Jesús rese, “seninisi tasecha” i bei mose, sã eninisi ngu riquisã quisã eã no. ũquí naa mose, Jesús quiato mbae icuã saã eãte. —Sã seriirĩ ndiqui turã nyue, i quiatu que Dios nande je ra. ¹⁶ Ae Jesús quiato nae, ũquí ngūinisi mingo arõte Jesús rese. Ae Jesús quiato cuña nae, ũquí ngu mingo arõte Jesús rese no.

¹⁷ —Eĩ jenye chõ nguia jẽ ae ae, i que Dios nandechiaorã mee mee nande je ra. ũquí ndese nandeco bei quiatu nande ae ae. Dios que ñee nande je nyii, aque mosenda rã si bei chõ nandeco. ũquí ño asenei senei nguiã Jesús quiato ishonda jaje abe. ¹⁸ —Echu serui, i mose Dios judío mo je, sã judío bei chõ ae riqui. —Echu serui, i mose Dios judío eã mo je, sã ae riqui judío raã naa eã. ¹⁹ Sebite judíos achõ, iã nda Dios. Sebite judíos eã achõ, iã nda Dios no. Ae Dios cheẽ mumbayãte quia nae, ũquí nguia Dios bite re. ²⁰ Eĩ nande que equia Dios ñee namo mose nande je nyii, aque mosenda rã mbei chõ nandeco. ²¹ Mbia rimba mose nde, Dios “eico serui” i mose ndeje, eico chõ eru. Mbia mo nimba raque nde. Erechãchĩ nda ndererecua si. Ndererecua huise mose ndesi, nde ae eico cote ae. ²² —Eico serui, i mose Dios mbia rimba mo je, Dios embui chõ nguiã eicuã si cote. —Eico serui, i mose Dios emo ae siqui mose, Cristo rimba chõ aque cote re. ²³ Jesucristo que mano jẽje ra. Nyebe Jesucristo rimba ae chõ jẽingo nguiã ũquí cote. Mbia rimba ae eã ño jẽingo nguiã ũquí cote. ²⁴ Dios que ñee nande je nyii, aque mosenda raanguia bei chõ nandeco Dios rese.

²⁵ Nyucuaaque rĩ tacheẽ ndaque jẽje cote. Dios que ñee ãte seje ũquí nĩ nda. Se ae chõ tacheẽ jẽje. Airandu que Dios ia eã mose serese ra. Nyebe aico nguiã ñee ñooño eã tuchi jẽje co. ²⁶ Sã mbia ngūinisirã mo ndea eã namo. Sã nyucuaaque ae riquichõ ngurã mo ndea rocoĩ. Mbia icuãte quiatu eriqui nguiã Jesús quiato je ã cote. ²⁷ Neninisi mose, eico bei chõ erese rechayã mbei. Neninisiã mose, nde ae eico bei. ²⁸ Neninisirã ndea mose, eicuã eã ño ũquí no nde. Nyucuaaque ngurã mo ndea mose, eicuã eã ño ũquí no nde. Mbae icuã nda eĩ eĩ ee ngurã ndea mose cote reae. Nyebe aico nguiã ñee jẽje. —Jẽ ae jẽingo jeninisiã, i jẽje. ²⁹ Tacheẽ tuchi rã jẽje, Seresenda. Mbae ra ua jei ja nande je cote. Ae ngūinisi quereco quia, sã ũquí ndiqui ngūinisi rerequia eã naanguia. ³⁰ Ae eya eãte riqui, sã ũquí ia tuchi raanguia riqui no. Ae eyate

riqui, sã ũquĩ ia eãte raanguia riqui no. Ae mbae isi quia, sã ũquĩ ndiqui mbae isiã naanguia no. ³¹ ã nandeico rei nguiã ibii ã. ¡Ibi jenda rese ra nandendua tuchichĩ jẽ! ¡ã ibi jenda ja ra ua ja chõ jẽ!

³² —Jeninisiã ño jẽingo, ae que se ra. Jendua ndua eã jiri nda ibi jenda rese chã. Ae eninisiã, ũquĩ ndua ndua bei arõte Dios mi ndese. Ae Dios bite, ũquĩ esaã saã mbei arõte. ³³ Ae eninisi nae, ũquĩ ndua ndua bei arondete ibi jenda achõ ndese. Ae eninisi bite nae, ũquĩ esaã saã mbei arondete. ³⁴ Eĩ si chõ cuña no nde. Eru eã mose, ndua ndua arondete Dios achõ ndese. Ae Dios bite, ũquĩ nda esaã saã mbei ee. Siqui tuchi ra Dios rese. Ae ngu quereco nae, ũquĩ ndua ndua bei arondete ibi jenda achõ ndese. Ae eru bite nae, ũquĩ esaã saã mbei arõte. Siqui rocoĩ Dios rese. ³⁵ Jaendiquisã quisã eãte raque se jeninisirã mo ndea mose. Jemundua sacua Dios rese chõ aico nguiã ñee jẽje co. Jendua eã sacua mbae mo ndese chõ ñene. Jeninisi mose jendua bei aroneate Dios rese.

³⁶ —Seriirĩ ndu bite chĩ cote. Etiarõte chĩ cote, i mose amei mo, sã eriirĩ ngurã mo nderequia. Eicuã eã ño nguiirĩ ndurã mee ee re. ³⁷ —Sã seriirĩ ndu eã ae riqui. Erurã nda amee eã ee, i tuchi mose amei mo, eturãte ũquĩ abe. ³⁸ Ae nguiirĩ ndurã mo mee ee, eturã ño ũquĩ nde. Ae nguiirĩ ndurã mo mee eã ee, eturã tuchi chõ ũquĩ cote re.

³⁹ Eru mbae bei chõ eninisi re. Nyao aroneate nyesi. Eru mano mose, ngurã mo nderequia arõte Dios quiato mo cote. ⁴⁰ Eru mano mose, siqui turã arondete ngurã mo ndea eã mose cote. Eya tuchi ra siqui ngu eã mose reae. Se chõ acheẽ nguia ũquĩ ndeae. Espiritu Turã abe sembucheẽ nguia reae.

8

Ae soo mbia mondo rei dios abareã je nae

¹ —Mbia soo mondo mundo quia dios abareã je nae, ¿ũquĩ soo ra nandeu re? jenyẽ que seje. Ũquĩ tasenei jẽje cote. —Seaquiatute se, nande ja jate raque quia ã. Emo eaquiatu tuchi mose, ucuasu raã naa arondete. Emo nyesequa mose mbia rese, Dios abe rese ra nyesequa bei. ² Seaquiatute se, i mose emo, eaquiatuã ño ũquĩ nde. ³ Emo nyesequa mose Dios rese, Dios ũquĩ icua chõ nguiã ũquĩ.

⁴ Mbia soo mondo mundo quia dios abareã je, ¿ũquĩ nda nandeu re? ¿Nandeu eã tuchi chõ nda re? Dios eã tuchi chõ dios abareã nde. Co mi tuchi chõ Dios re. ⁵ Dios abareã nguia etubiriãte re. Ibi jenda. Ibei riinda abe no. Dios raanguia tubiriãte raque no. ⁶ Dios quia co mi tuchi nande je re. Ae quiare nanderu tuchi. Ae mi ngue mbae chao ja tuchi ra. Ae mi ngue nandeaõ umbaerã nda. Nandererequa mi tuchi chõ siqui nguiã co no. Jesucristo, i equia ee. Ae que mbae chao ja tuchi Dios rese ra. Ae mi ño nandemingõ nguiã ã.

⁷ Dios quiato mo iranuate quia ũquĩ ndese ã. Siquiche beite quiatu nguiã dios abareã si ũquĩ. Ae soo mbia mondo dios abareã je, ũquĩ mbaeiaie riqui rei nguiã ee. —¡Ũquĩ soo jẽu eã jẽ! i rei Dios nguiã ee. ⁸ Ae nandeu quia nae, ũquĩ nda nandebuturã eã Dios je. Nandechiu mo nda nandembuturã eã mingõ. Nandechiurã nandeiõ teã teã mose, ũquĩ nda nandembucua eã no. ⁹ —¡Ũquĩ soo ra jẽuchĩ jẽ! iãte raque Dios nande je. Mbaeiaie eãte raque ũquĩ soo. Mbaeiaie nda eriqui rei Jesús quiato namonda je raẽ. Jẽ eu mose, ũquĩ abe ra eu chee. —Mbaeiaie au chõchĩ, i ra ñimbucua tuchi cote. ¹⁰ Jẽquiuru mose dios abareã chuchua, Jesús quiato namonda ra mae jendese. Ũquĩ abe ra soo

u chee, ae mbia mondo Dios abareã je. Maende jendese. Eicuã ndaque eriqui reĩ nguiã ee. ¹¹ Jẽ ndaque jẽirandu ũquĩ soo rese. Eicuã eã ndaque eu mose. Jẽu eã ndei. Jẽ eu mose, Jesús quiato namonda abe ra eu chee. Siquichete raque esi. Eĩ jenyẽ chõchĩ ũquĩ mbĩcha arõte Dios si. Ũquĩ nĩ abe chõ ngue Jesucristo mano nguiã. ¹² Soo mbaeiaie riqui reĩ mose ee, jẽu eã uquia ee ae. Jẽ euquia mose Cristo quiato namonda je, eicuãte ũquĩ Cristo je. ¹³ Jesús quiato mo ambĩcuã sereã tuchi chõ nguiã se. Se soo u mose, ũquĩ Jesús quiato mo mbĩcuã mose, soo ra auã mbei cote.

9

Mbae mo jembu seje Dios cheẽ nenei nenei ndibishorõ, i ãte Pablo

¹ Jesús cheẽ nenei neneisa tuchi chõ se re. Sererecua mo eãte ibi jenda mo. Amae tuchi que Jesucristo rese se ra. Secheẽ nguire chõ jẽingo nguiã Jesucristo icua ũquĩ cote. ² Jesucristo cheẽ nenei neneisa eã ño co re, i arõte raque emo seje. Jẽ quiatu jeñee aroneate nguiã ũquĩ seje. Ũquĩ jẽingo seicua tuchite ũquĩ. Secheẽ nguire quiatu que Jesús jẽicua cote resẽ.

³ Eĩ ae chõ nguiã ñee mbia ñee icuã ñee seje. ⁴ Se abe Jesús quiato sembuquiaru quiaru arondete raque. ⁵ Seninisirã Jesús quiato mo arao rao arondete raque mananguiti. Secuata cuata mose mbia mbiirandu randu Jesús riĩ. Sã Pedro riqui ngũinisi rerao rao no. Jesús nongue abe no. Sã Jesús cheẽ nenei neneisa ja ngũinisi rerao rao no. ⁶ ¿Se miĩ ño nda Jesús quiato sembuquiaru aroneate reĩ jẽje re? Bernabé abe rese. Ure Jesús cheẽ nenei nenei mose. ⁷ Sã soldado siqui chooño eã comandante mbae mee eã mose ee. Sã emo ndiqui mbae tiquia chooñoa no. —Sechitiquia nda au chã, i chõ nguiã. Sã emo ndiqui ticuasuararõ ñooñoa no. —Equiandi nda ambei chã, i chõ nguiã.

⁸ Secheẽ ae eã ño ũquĩ nde. Embesa ji chõ asenei nguiã jẽje. ⁹ Co rei Moisés chimbesa co:

Jẽ ticuasu mbuquiei quiei mose, echuru jemumbi eã.
Sã ae ae si quia mbae cua,

i que embesa ji ra. Ticuasuarachõ je eã ngue Dios ñee nguiã. ¹⁰ Nande abe je chõ ngue ñee nguiã. —Sã Jesús quiato abe riqui mbae mee mee echeẽ nenei neneisa je, i chõ ñene. Ae mbae chitiquia quia nae, “sechitiquia tau”, i chõ nguiã etiquia. Ae mbae a chiqui chiqui quia nae, “sechitiqui tau”, i chõ nguiã eiqui iqui. ¹¹ Dios cheẽ ngue uremingue mingue tuchi quia jendese resẽ. ¿Jẽ urembuquiaru quiaru aroneate quia cote re? ¿Ureiraorã jemee aroneate quia ure je cote re? ¹² Mbae mo jemee mee nguiã Jesús cheẽ nenei neneisa mo je ũquĩ. ¿Mbaerã jẽingo emee eã ure abe je quiatu re? —jMbae mo nandei si teã eo si jẽ! ure que equia oso mose jendea ra. Dios si jembĩcha eã sacua ño ngue mbae mo ureisi teã nguiã jẽsi. ¹³ Sã Dios ñee sacerdotes je cose no. —Ae siqui quia sechuchua sacrificio raã naa nae, sã ũquĩ ndiqui ofrenda u u bei ae, i que Dios ñee cose ra. ¹⁴ Eĩ si chõ ngue Jesús ñee nguiã ucheẽ nenei neneisa je. —Ae secheẽ turã senei senei nguiã nae, sã sequiato ataque riqui mbae mee mee mbei ũquĩ je, i que Jesús ra.

¹⁵ Dios cheẽ nenei neneisa tuchi raque se. Mbae mo ngue aisi chõ ãte jẽsi ra. Se ae chõ mbae achao chao nguiã sembaerã co. —Mbae mo jemee seje, ae ãte chõ nguiã co mbesa mbesa jẽje co. Tamano ae, “mbae embu seje”, i rocoĩ jẽje. ¹⁶ Dios cheẽ nenei neneisa tuchi chõ se re. ũquĩ nĩ seturã asaã saã aroneate. —Secheẽ esenei senei mbia je, i quiatu Dios nguiã seje. Se erenei

nenei eã mose mbia je, Dios ra paama i seje. ¹⁷ Se ae que andua eã nda. — Dios cheẽ tasenei senei, aeã ngue se ae ra. Dios chõ ngue ñee nguiã seje. — Secheẽ esenei senei mbia je, i nguiã seje. Se ae andua mose, eã nda Dios mbae mo mee ndei seje ucheẽ nenei nenei ndibishorõ. Dios rimbate quia se re. ¹⁸ ¿Mbae chõ sebite riqui chã? Mbae mo isiã Dios cheẽ nenei nenei ndibishorõ, ùqui ño sebi re. —Mbae mo embu seje Dios cheẽ nenei nenei ndibishorõ, ae ãte quia co. Ûqui nguia sebi re.

¹⁹ Mbia mo nimba eã ndaque se. Mbia rimba asaã saã ño nguiã Dios cheẽ nenei nenei mbia je co. Mbia Jesucristo icua sacua. ²⁰ Seico mose judíos ite re, judío asaã saã ño nguiã. Judíos Jesucristo icua sacua. Ae siqui tuchi quia Moisés chimbese rui nae, ùqui ite re seico mose, Moisés chimbese asaã saã ño nguiã se abe. Ûqui Jesucristo icua sacua. —Moisés chimbese rui eico, i ãte raque Dios seje. ²¹ Ae siquiã nguia Moisés chimbese cheẽ ndui nae, ùqui ite re seico mose, se abe Moisés chimbese asaã saã eã ño nguiã cote. Ûqui Jesucristo icua sacua. Cristo mi ñee ño amumba mumbayã nguiã co. ²² Jesús quiato quiracuã nea ite re seico mose, ùqui asaã saã ño nguiã se abe, sequiracuã nea naa naa. Ûqui Jesucristo icua sacua. Ae ite re aico oso oso beite nae, ùqui na ño aico nguiã se abe. Ûqui Jesucristo icua sacua. ²³ Ûqui ja chõ asaã saã nguiã Dios cheẽ turã ni co. Nandeico turã ja sacua Jesús rese.

²⁴ Sã mbia carrera raã naa no. Mbia ja chõ uchã ndaque. Co mi ño nda premio isi. Aque rã tuchi chõ jẽingo Jesús rese. Premio isi sacua naanguia. ²⁵ Ae ra carrera saã saã nae, ùqui mbae icua secha ja chõ nguiã ùqui. Premio isi sacua ño eriqui nguiã mbae icua naa eã. Premio nda ua jei raque. Ae Jesús mee arõte quia nande je premio nae, ùqui nguia ra ua eã mbei nandesi. ²⁶ Se aico choõna nguia Jesús rese co. Jesús rese aico turã tuchi chõ nguiã se co. ²⁷ Mbae asaã saã ño nguiã serete mbiracuã co. Serete secheẽ mumbayã sacua. Se premio ganar i sacua ño aico nguiã eraã naa co. Premio isiã sebiãte, se Dios cheẽ nenei nenei tuchire. Nyebe aico nguiã siqui tuchi Jesús rese co.

10

Dios raanguia rese ra jẽingochi jẽ

¹ ¡Jẽtesareichĩ nda nandei ñiinda si jẽ! ¡Moisés mosenda si jẽ! ¡Ûqui ngue siqui ja rei ibeishĩ ndui ra jẽ! ¡Ûqui ngue nyoi ja rei Ama Ireĩ ndasa Dios ñee mose ee ra jẽ! ² —Moisés rese nandeico bei, i ja rei que mbia siqui ja mose ibeishĩ ndui ra. —Moisés rese nandeico bei, i ja rei que mbia Ama Ireĩ ndasa mose ra. ³ Ae Dios mee ndei ee echirã nae, ùqui ngue mbia ja u u rei ra. ⁴ Ae Dios mee ndei ee embei sacua nae, ùqui ngue mbia ja mbei mbei rei ra. I que tuutu quia sita si nae, ùqui ngue mbia ja mbei mbei rei ra. Aque sita rei Cristo rã. Cristo que siqui tuchi quia ùqui mbia rese ra. ⁵ Ûqui ataque rese que Dios ia eã tuchi riqui ra. Siqui turã eã tuchi que equia Dios rui ra. Nyebe Dios eataque iquia iquia nguiã turúquiaa.

⁶ Nandemundua sacua ño ùqui nde. Mbae icua osei osei eã sacua nande chõ ùqui nde. Sã ùqui mbae icua osei osei no. ⁷ Jẽingochi nda dios abareã ndese. Sã ùqui ndiqui dios abareã ndese no. Sã embesa ji riqui ñee no: “Mbia que quiaru quiaru ra. Mbae abe que embei mbei ra. Aque que nyuruqui ruqui ticuasú raanguia je ra”, i que embesa ji ra. Jẽ nguia jẽingo eã dios abareã ndese. ⁸ Ûqui nandei que siqui siqui ngüinisiã ndese no nda. Nyebe

Dios eiquia iquia tuchi nguiã. Veintitrés mil que mano aque nyaashĩ mose ra. ¡Mbae icuã nda nandesã saãchĩ ùqui na jê! ⁹—Ma Cristo roseĩte, nandechĩ nda mbae icuã naa jê. Sã nandei riqui “ma Dios roseĩte” i nyii no. Sã ñi ngue eriqui mbae icuã naa mbei cose no. Sã mbei tásie riqui eiquia iquia no. ¡Ūqui nandesã saã eã tuchi chõ nguia nande jê! ¹⁰ ¡Jeñee icuã icuãchĩ nda Dios rĩ jê! Sã ùqui nandei ñee icuã icuã nguia Dios rĩ no. Nyebe ángel nandei ñiinda iquia iquia tuchi nguiã. ¹¹ Eĩ si tuchi que nandei ñiinda quia nyii ra. Dios que embesa mĩi nandesareĩ eã sacuã nda. Mbae ua ja serĩ mose chõ Dios riqui nguiã nandembesareĩ eã co. ¹²—Sequirãcuã tuchi chõ se re, i mose emo, ¡sã aque riqui nyĩcua tuchi quiatu jê! Mbae icuã jeĩ nonde ee. ¹³—¡Mbae icuã esaã jê! i mose diablo jêje, eĩ si chõ nguiã ñee mbia ataque je. Jê mĩi je eã. Dios quia ra ucheẽ mbuchebiã mbei. Jendeaquiatu bei ra diablo ñee mose jêje. Jẽmbirãcuã ndae. Jê “nya” i sacuã mbae icuã je.

¹⁴ Seresenda, ¡dios raanguia rese ra jẽingochĩ jê! ¹⁵ Jẽaracuate rei jê ndesẽ. Secheẽ ndese jemaẽ quiatu. ¿Acheẽ ñooño se re? Acheẽ ñooño eã se reae. Jẽtea quiatu. ¹⁶ Nande Santa Cena naa naa mose, Cristo ruqui mbei raanguia chõ nandeico nguiã uva rique mbei mbei. —Cristo ruqui nandembitirõ ja bei quia ã, i chõ nguiã uva rique mbei mbei. Mbichae nandesiquio quio quia eu nonde nae, Cristo roo rã ño ùqui nde. —Cristo roo nandembitirõ ja bei quia ã, i chõ nguiã mbichae u u. ¹⁷ Nandetubiriãte raque Jesús quiato. Nande ja chõ aque mbichae mĩi nandeu ja nguiã. Mbae mĩi na nguiatu nandeico nguiã nande ja ã. ¹⁸ Judíos rese chõ jendua. Ūqui sacrificio raã naa mose, sacrificio eu chõ nguiã ã. —Dios resete quia nandeico nguiã ã, i eiquia ã. ¹⁹—Dios abareã mbae mo saã arondete, ae áte raque quia co. Ae soo mbia mondo mondo quia dios abareã je, soo chõ ndaque ùqui. ²⁰ Mbia soo mondo mondo mose dios abareã je, Dios tuchi je eã ño eriqui nguiã emee mee. Aba checuayã icuã je chõ eriqui nguiã emee mee. ¡Aba checuayã icuã ndese ra jẽingo jiri jirichĩ jê! ²¹ Jê mbae mbei mose aba checuayã ndese, Jesús ruqui mbei raanguia jesaã aronea ño nguiã cote. Jẽquiaru quiaru mose aba checuayã nyuchua, Santa Cena jesaã aronea ño nguiã cote. ²² ¿Mbaerã jẽingo Jesucristo mbupaama ite re? ¿Jẽquirãcuã tuchi chõ eriqui esi jê nde?

Jesús quiato ataque rese quia jẽingo ndua

²³—Ae soo mbia mee mee nguia dios abareã je nae, ùqui ndese ra jẽocochĩ, i áte raque Dios nande je. Dios biãte nande mbae raã ja chooño mose. Ūqui ñi Dios ñee áte raque nande je. Nande ae chõ nandeicua. Mbae mo Jesús quiato mo mundua icuã mose, ùqui si nandehui chõ. ²⁴—Nande ae nandeico Dios rese, jenyechĩ nda jê. —Mbia ja quiatu nandemingo erese, jenyẽ quiatu. ²⁵ Soo jẽisichõ ño nguia mbae vender ísaa. —¿Dios abareã je co soo jemondo nyii re? ¡jenye chí nda ñee ee jê! Jẽiranua mose, mbaeiaie eã ño soo jêje cote re. Jẽisichõ ño nguia jẽiranua. ²⁶ Jesucristo mbae chõ ibi re. Mbae ibi jenda ja abe rei embae no. Ae Jesucristo chao ja nae, ùqui ndei nandechiurã ja. ²⁷—Nyao rã quiaru serese, i mose emo jêje, jẽso chõ quiaru erese jẽsose mose. Ae ra echara mondo jêje, jẽuchõ ño. —¿Co mbia mondo dios abareã je nyii re? jenyechĩ nda ee. Jẽiranua mose, mbaeiaie eã ño jêje cote re. Jẽiranua ño jẽquiaru. ²⁸—Co soo que mbia mondo dios abareã je ra, i mose emo jêje, jẽu eã ño cote. Ae ñee jêje nae, aque mbiicua eã sacuã ño jẽu eã. Aque soo jẽu eã cote, jẽirandu mose erese. Jê eu mose, Jesús quiato ra ndua icuã icuã cote. ²⁹ Jendua icuã eã ndaque jê. Emo nguia ndua icuã arõte nguiã cote, jirandu mose jê eu rese.

—¿Mbaerã nda aque soo au eã sebi mose re? i arõte jemo seje. —¿Mbaerã nda emo ñee amumbayã nde? i arõte jemo seje. ³⁰—Se “gracias” i mose Dios je aque soo u nonde, eicuã eã ño cote reae. ¿Mbaerã nda emo ñee icuã seje re? i arõte jemo seje. —¿Mbaerã nda au eã eicuã eã mose re? i arõte jemo seje.

³¹ ã ndese chõ jendua. Ae nandesaã saã nguia nae, Dios je chõ nandesaã. Ae nandeu ndeu quia mbae nae, Dios je chõ nandeu. Ae nandembei mbei quia mbae nae, Dios je chõ nandembei no. Mbia ra ñee turã Dios je, nandeico turã mose. ³² iMbia ra jemundua ata atate chĩ jẽ! —Ã icuã ereae, i mose emo jẽje, iũquĩ nda jẽsaãchĩ jẽ! Jẽ eraã mose, ũquĩ nda ndua icuã Jesús rese cote. Judíos. Judíos eã abe. Jesús quiato abe. Ũquĩ ndua icuã arõ Dios rese, jẽ eraã mose. ³³—Se ae taico Dios rese, ae ãte quia co. —Mbia ja quiatu tamingo erese, ae quia co. Dios mbia rirõ sacuã eicuã si. Mbia siquĩ bei sacuã Dios rese.

11

¹ Se rã si chõ jẽingo. Sã aico Cristo rã si se no.

Eĩ jenyẽ chõ nguia u ñumunua nua mose, i Pablo cuña je

² Acheẽ turãte quia jeni co. Jendua beite quiatu quia serese. Acheẽ ngue jẽje nyii, ũquĩ jemumbayã mbeite quia secheẽ ũquĩ. ³ Ae ra ambesa jẽje namo, iũquĩ jẽicua tuchi quiatu jẽ! Cristo rei hombre ja rerecua. Hombre rei ngũinisi rerecua no. Sã Dios Cristo rerecua no. ⁴ Mbia ñumunua mose, sã hombre mo ñee eã Dios je huiite sucha resebe. Sã eãquĩ nyecua chõ siquĩ Dios cheẽ nenei nenei. Uãquĩ ati mose, aba ireĩte ũquĩ. ⁵ Mbia ñumunua mose, sã cuña mo ñee eã Dios je huiite suchayã. Sã cuña ãquĩ ati ji chõ siquĩ Dios cheẽ nenei nenei. Cuña uãquĩ ati eã mose, aba ireĩte ũquĩ. Uãquĩ huĩ na ño eriqui nguia uãquĩ ati eã no. ⁶ Cuña mo uãquĩ ati sereã mose, sã uãquĩ huĩ tuchi quiatu no. Eirẽ mose uãquĩ huĩ, sã uãquĩ ati quiatu ua sia rocoĩ no. ⁷ Hombre mo nguia uãquĩ chati aroneate nguia Dios cheẽ nenei nenei. Dios quiatu ngue hombre chao nguia umbaerã. Aquere que cuña mo ao hombre mbaerã cote ra. ⁸ Cuña ndoquieĩ je eã ño ngue Dios hombre ao nguia. Hombre roquieĩ je quiatu ngue Dios cuña mo ao nguia. ⁹ Cuña chirecorã eã ño ngue Dios hombre ao nguia. Hombre chirecorã nguiau ngue Dios cuña ao nguia. ¹⁰ Nyebe ra cuña uãquĩ ati quiatu. —Seru chõ sererecua re, i chõ nguia uãquĩ ati. Angeles quia maete nguia erese. ¹¹ Jesucristo quiato ja chõ nande re. Hombre achõ nda siquĩ turã eã cuña eã mose. Cuña achõ nda siquĩ turã eã hombre eã mose no. ¹² Hombre roquieĩ je chõ ngue Dios cuña ao rei nguia nyii. Cuña abe riqui tiĩrĩ irĩ hombre co cote. Dios chiao ja chõ ñene. Cuña. Hombre abe. ¹³ Jẽ ae chõ jendua mae erese. Eicuãte cuña ãquĩ ati iriã ñee Dios je. ¹⁴ Hombre a boco mo siquĩ mose, aba ireĩte ũquĩ. —Eicuãte ũquĩ, i ja tuchi mbiamo ñooñoa nguia ũquĩ je ã. ¹⁵ Cuña mo nguiau ea boco siquĩ mose, ũquĩ nguia earõte re. Ea boco que Dios mee ee ra. Eãquĩ ati sacuã. ¹⁶—Cuña a boco sebiã, i mose jemo, sã ndua chõ Jesús quiato ataque rese. —Sã cuña a boco riquichõ, i ja chõ Jesús quiato nguia serese ũquĩ.

Jenyao chaochĩ nda Santa Cena u mose jẽ

¹⁷—Santa Cena naa icuã icuã ño ngue equia ñumunua nua nda, i que mbia mo sembiirandu jeni nda. Nyebe seya eãte riqui nguia jendese. ¹⁸—Hue rĩ ja eã eriqui ndua ndua ñumunua nua mose ũquĩ, i que emo sembiirandu jeni nda. —Ichõĩño eã ereae, ae sequia ndua ndua co. ¹⁹ Jeñĩmbuchao chao

chõchĩ equia ùquĩ. Mbia Jesús quiato tuchi icua sacua ño jeñimbuchao chao nguiã. ²⁰ Santa Cena naa naa mose, abei chiã tuchi chõ jëingo nguiã jenyue ùquĩ. Eĩ eã tuchi que Jesucristo nandembaaquiato ra. ²¹—Se rane sembae tau ja, jenze jaaja chõchĩ nguiã Santa Cena naa naa ùquĩ. Mbae mee ndocoĩ emo je. Nyebe mbaecha riqui nguiã quiaru tuchi. Mbae mbei tuchi no. Mbaecha reã niacuã mose. ²² Jëquiaru tuchi mose Santa Cena, jëingo icua ño nguiã Jesús quiato ataque je ùquĩ. Mbaecha reã irei irei ño nguiã jësi ùquĩ. ¿Mañi ae ra ñee jëje re? Eicuãte ùquĩ ndesẽ. Jenyuchua ae ae rei jëquiaru sacua ndesẽ.

Jesús quiaru mose uchimbbaaquiato rese

²³ Jesucristo ae sí que sembaaquiato ra. Ñ ngue asenei ndei jëje nyii resẽ: Judas Jesucristo reacuquia nonde mbia icua je, aque isa sí que Jesucristo mbichae sirõ nda. ²⁴ Gracias, i que ñee Dios je cote ra. Mbichae que esiquio uchimbbaaquiato je cote ra. —¡Co jê! Jêu. Serete rá ño mbichae riquio ji co re. Jeni ño nda serete riquio ji cote. Co jêu mose, jendua ndua bei quia serese, i que Jesús mbichae mondo ee ra. ²⁵ Quiaru jare que Jesús eyuquia rirõ cote ra. Ñee ngue uchimbbaaquiato je cote ra. —Seruqui rá ño uva rique co re. Mbia icua mbutiã sacua tuchi chõ seruqui re. Dios cheẽ yasu rui sí chõ seruqui riqui nguiã mbia icua mbutiã cote. Co mbei mbei mose, jendua ndua bei quia serese, i que Jesús ee ra. ²⁶ Jê co mbichae u mose, jê uva rique mbei mose, Santa Cena, i chõ nguiã ùquĩ je. Jê Santa Cena naa naa mose, Jesucristo mano nenei nenei ño nguiã mbia je ùquĩ. Santa Cena jësaã saã mbei quia Jesucristo tu mose chee.

Jendua tuchi Jesús rete rese Santa Cena u mose

²⁷ Emo Santa Cena naa icua icua mose, ùquĩ siqui icua icua ño nguiã Jesucristo rete je ùquĩ. Ùquĩ siqui icua icua ño nguiã Jesucristo ruqui je ùquĩ no. ²⁸ Nyebe nandendua ndua tuchi quiato quia Santa Cena naa nonde. ²⁹ Emo Santa Cena naa icua icua mose, emo ndua eã mose Jesucristo rete rese, ùquĩ nda Dios mbasi. ³⁰ Ùquĩ je chõ jendasi rasi bei riqui nguiã. Ùquĩ je chõ jëingo nguiã mano mano tuchi. ³¹ Nande ae nandereco nandeicua jiri ae. Eĩ nda Dios nandembasiã cote. ³² Jesucristo nandembasi mose, nandemundua sacua ño ùquĩ nde. Nandembitirõ sacua ño cote re. Dios nandemombo eã sacua tata cuasu chõ ùquĩ nde. Jesús quiatoã mombo mose tata cuasu.

³³ Nyebe aico nguiã ñee nyecua jëje co. Jê Santa Cena naa naa mose, jeñumunua nua turã ño. Jëingo turã ño jenyue. Jenyisaarõ turã ja chõ Santa Cena u nonde. ³⁴ Jemo niacuã siqui mose, sã quiaru uchuchua, Santa Cena naa nonde. Eĩ jenze mose, Dios ra siqui turã jëje cote, jeñumunua nua mose. Seso mose jendea ra secheẽ ataque asenei jëje cote.

12

Espíritu Turã ño nandechisaã saã sacua mondo nguiã nande ae ae je

¹ Espiritu Turã ngue mbae mee jaaja nande ae ae je ra. —Co esaã nde, co rese eico nde, i jaaja que nande je ra. Ùquĩ ndese taembiirandu cote. ² Dios abareã ndese que jëingo tuchi nyii ra. Mbia que jëingo tuchi dios abareã tubiriã ndese nyii ra. Dios abareã aba cheẽ andu aroneãte. Ùquĩ jëingo Jesucristo rese ùquĩ cote. ³ Ñ ndese jendua tuchi: —Jesús icuãte riqui Dios je co, i mose emo, echeẽ ae chõ ùquĩ nde. Espiritu Turã embucheẽ eã ño nguiã

ũquiĩ. —Jesús rei Dios tuchi, i mose emo, echeẽ ae eã ño ũquiĩ nde. Espíritu Turã ño embucheẽ nguiã ũquiĩ.

4-6 —Co esaã nde, co rese eico nde, i jaaja que Dios nande ae ae je ra. Espíritu Turã mii ño siqui bei nguiã nande ja rese co. Jesucristo mii ño siqui nguiã nanderese co. Jesucristo mo eãte emo. Dios mii ño siqui nguiã nandembuquirãcuã co no. Dios mo eãte emo. 7 Espíritu Turã uquirãcuã teacuquia chõ nguiã nande ae ae je co. Nandeico turã ja tuchi sacuaã Dios rese. 8 Espíritu Turã mii ño siqui nguiã co. Hue rĩ ja eã ño eriqui nguiã uquirãcuã mee nande je. —Nde ra erecheẽ aracua bei quia, i chõ nguiã nandemo je. —Nde ra mbia erembaaquiatsu turã mbei quia, i chõ nguiã nandemo je no. 9 —Jesucristo ra ereicua tuchi quia nde, i chõ nguiã nandemo je co no. —Mbia rasi ra erembucherõ cherõ mbei quia nde, i chõ nguiã nandemo je co no. 10 —Mbia mae sayã nda eresaã saã mbei quia nde, i chõ nguiã nandemo je co no. —Dios cheẽ nda eresenei senei tuchi quia mbia je nde, i chõ nguiã nandemo je co no. —Espíritu eicua icua bei quia nde. Eeturã icua. Eicuaã abe icua no, i chõ nguiã nandemo je co no. —Mbiamo ñee esaã saã tuchi quia nde. Mbia cheẽ chumumbara, i chõ nguiã nandemo je co no. —Mbia cheẽ mo eicua icua quia mbia je, i chõ nguiã nandemo je co no. 11 Eĩ ño Espíritu Turã mii nguiã ucheẽ mbuchao chao nande je co. Nandechisaã saã sacuaã mee mee nande ae ae je co. Eĩ ño Espíritu Turã mii nguiã uquirãcuã mbuchao chao nande je co no. —Co esaã nde, co esaã nde no, i chõ nguiã nande ae ae je co.

Mbae mii na ño nandeico nguiã nande ja

12 Jesús rete rã ño nandeico nguiã nande ã. Nande tubiriãte raque Jesús quiato. Sã aba rete resenda tubiriãte no. Eresa. Erie. Eo. Erete mii ndaque. Eĩ ño nande no nde. Jesús rete mii na. 13 Jesús rete rã ja chõ nande re. Erete mii na ño nande ja re. Judíos mo ño nandeico nguiã nande ã. Judíos eã abe mo ño nandeico nguiã ã no. Mbia rimba mo abe abe nandeico ã no. Mbia rimba eã mo abe abe nandeico ã no. Mbae mii na ño nandeico nguiã Jesús quiato ja ã. Erete mii na. Eĩ ño Espíritu Turã mii nguiã nandemingo ã.

14 Nanderete mii ae siqui ãte. Nanderete resenda tubiriãte riqui ã. 15 Nandei achõ ñee aroneate. —Eo eã ñochĩ se. Nyebe erete resenda eã se re, i aroneate nandei ñee. Nanderete resenda bei chõ nandei re. 16 Nandeisa achõ ñee aroneate. —Eresa eã ñochĩ se. Nyebe erete resenda eã se re, i aroneate nandeisa ñee. Nanderete resenda bei chõ nandeisa re. 17 Nanderesa achõ mose nanderete resenda, i nda nandeico rei mbae anuate co. Nandeisa achõ mose nanderete resenda, i nda nandeico rei mbae retõ ãte co. 18 Dios ae que nanderete resenda mii ja ja cose ra. —Co tamii a, co abe tamii a no, i jaaja que nanderete resenda mii mii nda. 19 Nanderete resenda mii mose, eĩ ndei ra nanderete eãte. 20 Nanderete resenda ja que Dios mee nande je ra. Nanderete resenda tubiriãte raque. Nanderete mii tuchi chõ ñene. 21 —Arerecoã nda se, i aroneate nanderesa ñee nandeo je. —Arerecoã nda se, i aroneate nandeaquĩ nandei je no. 22 Ae nanderete resenda ñetẽ tuchi nae, ae nanderete resenda quirãcuã nea tuchi nae, ũquiĩ nguiareĩ nandechireco tuchi. 23 Ae nanderete resenda aba ireĩte nae, ũquiĩ nandetea quiatsu chõ nguiã. Nandechati turã ño nguiã. 24 Ae nanderete resenda checuate riqui nae, ũquiĩ nguiatsu nandechatiã nguiã. Dios que nanderete resenda saã turã ja ra. Ae nanderete resenda aba ireĩte nae, ũquiĩ quiatsu aba queteamba re. 25 Nyebe nanderete resenda riqui nguiã ñee aroneate nanderete resenda nongue je. —Arerecoã nda se, i aroneate ee. Nyebe nanderete resenda riqui nguiã siqui turã ja nyiese. 26 Nanderete resenda mo ndasi mose, nanderete mbasi ja chõ

nguiã. Nande ñee turã mose nanderete resenda mo je, nanderete ia ja tuchi ra erese.

²⁷ ã ño secheẽ tuchi ã nde: Cristo rete rã ño nandeico ja nguiã nande ã. Cristo rete resenda rã ja chõ nandeico nguiã nande ae ae ã. ²⁸ —Co esaã nde, co rese eico nde, i jaaja chõ Dios nguiã iglesia jenda uquiato je ã. —Cristo chimbaaquiato tuchi chõ nde re, i chõ nguiã emo je. —Secheẽ nenei neneisa chõ nde re, i chõ nguiã emo je no. —Mbia mbaaquiatusa chõ nde re, i chõ nguiã emo je no. —Mbia mae sayã esaã saã nguia nde, i chõ nguiã emo je no. —Mbia rasi embucherõ cherõ nguia nde, i chõ nguiã emo je no. —Ayudante eico nde, i chõ nguiã emo je no. —Iglesia rerecuarã nde, i chõ nguiã emo je no. —Mbia cheemo esaã saã nguia nde, i chõ nguiã emo je no. ²⁹ Cristo chimbaaquiato ja eã ño nande re. Dios cheẽ nenei neneisa ja eã ño nande no nde. Mbia mbaaquiatusa ja eã ño nande no nde. Mbia mae sayã naa naasa ja eã ño nande no nde. ³⁰ Mbia rasi mbucherõ cherõsa ja eã ño nande no nde. Mbia cheemo naa naasa ja eã ño nande no nde. Mbia cheemo mbiase asasa ja eã ño nande no nde. ³¹ Nandechẽ ño Dios je. —Ndequirãcuã emee na seje. Ae je erecheẽ ñee ure je, eĩ nda ùqui mo asaã saã se abe, nande quia ñee Dios je. Mbae turã tuchi mo tasenei na jėje.

13

Nandehesecua eã mose, Dios chirirõ ño nande re

¹ Se nyesequa eã mose mbia rese, secheẽ iru iru beite ra eriqui. Mbia cheẽ nda aicua ja raque. Angeles cheẽ abe ra aicua raque no. ² Se nyesequa eã mose mbia rese, mbae turã mo naasa eã ño se re. Dios cheẽ nda ambuchecua checua tuchi raque. Se ra mbae aicua ja raque. Se ra Dios aicua tuchi raque. Ibi ibate mo nda arusuri raque Dios quirãcuã je. ³ Se nyesequa eã mose mbia rese, aico chooño mbei chõ nda se. Sembæe ra amee ja raque mbia mbaecha reã je. Mbia ra serei raque, se Dios cheẽ nenei nenei mose.

⁴ Ae nyesequate quia mbia rese nae, ùqui nguia siqui minguete nguiã mbia je ã. Ùqui nguia eturãte riqui nguiã mbia je co. Ùqui nguia mae icuã icuã eãte nguiã emo mbae rese ã. Ùqui nguia “seaquiato tuchite se”, iãte nguiã co. ⁵ Ae nyesequa quia mbia rese nae, ùqui nguia “se quiato”, iãte nguiã mbae mo je. Ae aba ireĩte nae, ùqui mo esaã saã eãte quia co. Ae nyesequa quia mbia rese nae, ùqui nguia paama i jei jei eãte nguiã ã. Ùqui nguia ndua icuã icuã eãte nguiã emo icuã mose ee ã. ⁶ Ae nyesequa quia mbia rese nae, ùqui nguia eya eãte riqui nguiã, emo mbae icuã naa mosẽ ã. Emo mbae turã naa mose quia eyate riqui nguiã ã. ⁷ Ae nyesequa quia mbia rese nae, ùqui ñimbirãcuã ño nguiã mbae ja je ã. —Hchõño nguiã, iã ño nguiã mbia cheẽ je. Siqui tochi chõ nguiã.

⁸ Dios quiato ra nyesequa bei mbia rese, mbae ua ja chee. Dios cheẽ nda nandesenei senei eã emo mose cote. Mbia cheẽ ata mo nda nandesã eã emo mose cote. Mbia mbaaquiatusa mo eã nda emo mose cote. Ùqui nda ua ja chee. Dios quiato quiato ra nyesequa bei quia. ⁹⁻¹⁰ Mbae mii mii ño nandecua icua nguiã namo ã. Jesús tu mose quia ra mbae mii nandecua eã cote. Dios cheẽ mii nandesenei senei nguia namo ã. Jesús tu mose quia ra mbae nandecua ja cote. ¹¹ Señetẽ mose que aico ñee ñee mbia riiĩ na nda. Mbia riiĩ na ño ngue aico ndua ndua señetẽ mose ra. Mbae que aicua icua chõ nguia mbia riiĩ na no nda. Sescuas mose que señetẽ mosenda asecha ja cote ra. ¹² Mbae cuu rese mae naanguia chõ nandeico nguiã mae namo. Jesús tu mose quiato ra mbae checua ja nande je cote. Mbae mii mii ño aicua

icua nguiã namo co. Jesús tu mose quia ra mbae aicua ja cote. ¹³ ã nandeico Dios icuate ã. ã nandeico Jesucristo ru raarõ arõ ã. ã nandeico nyesecua jate mbia rese ã. Nandechesecua mose quiarei, ùqui eturã tuchi mbae ja si.

14

Mbiamo cheẽ naa naa mose

¹ Jjenyesequase tuchi quiatu quia mbia rese jẽ! Jeñee ño nguia Dios je. — Paba, ndequirãcuã emee na seje. Mbae raã naa sacua ndeje, jenye bei chõ nguia Dios je. — Ndecheẽ asenei senei sete ndequirãcuã je, jenye chõ nguia ee. ² Jesús quiato mo mbiamo cheẽ naa naa mose, mbia ra eicuayã jate. Dios mi ño nda eicua nguiã. Dios mi je chõ eriqui nguiã ñee. Uchue si chõ eriqui nguiã ñee. Mbia quia echeẽ icuayãte nguiã. ³ Ae Dios cheẽ senei senei nguia, ùqui nguia ñee nyecuate nguiã mbia je. Ûqui nguia mbia mbaaracua turãte nguiã Jesucristo ri. Ûqui nguia mbia mingo uquia tuchi nguiã Jesucristo rese no. Ûqui nguia mbia mbia tuchi nguiã Jesucristo rese no. ⁴ Ae mbiamo cheẽ saã saã nguia nae, mbia mingo uquia reã ño nguiã Jesucristo rese. Ae ae umingo uquia nguiã erese. Ae Dios cheẽ senei senei nguia nae, ùqui nguia Jesús quiato mingo uquiate nguiã Jesús rese. ⁵ Mbiamo cheẽ nda jesaã aquiatu ja raquete seje chã. Dios cheẽ nenei nenei aquiatu mose, ùqui nguia eturã tuchi re. Ûqui nguia eturã tuchi mbiamo cheẽ naa naa si re. Ae mbiamo cheẽ saã saã nguia nae, aque ucheẽ mbiasa mose Jesús quiato je, eturã ño ùqui no nde. Jesús quiato mingo uquia chõ nguiã Jesús rese ùqui.

⁶ Se mbiamo cheẽ naa naa mose jẽje, ùqui nda jemingo uquia reãte Dios rese. Se ñee nyecua mose jẽje, ùqui nguia eturãte re. Ae rese Dios sembiirandu nae, ùqui nenei nenei mose jẽje, ùqui nguia eturãte re. Se Dios cheẽ mbuchecua tuchi mose jẽje, ùqui nguia eturãte no nde. Se Dios cheẽ icua icua tuchi mose jẽje, ùqui nguia eturãte no nde. Mbiamo cheẽ naa naa si. ⁷ Sã música no. Emo flauta mbucheẽ icuã icuã mose, mbia ra tonada icuayãte. Emo guitarra mbucheẽ icuã icuã mose, mbia ra tonada icuayã no. ⁸ Sã soldados no. Emo corneta mbucheẽ icuã icuã mose, soldados ra icoquiata. ⁹ Eĩ si chõ jẽ no nde. Jẽ mbiamo cheẽ naa naa mose, mbia ra jeñee icuayãte. Jẽ mbiamo cheẽ naa naa mose, mbia eãsa ñee ñee na ño ùqui nde. ¹⁰ Mbia cheẽ ñumumbarate eriqui rei. Ucheẽ ae raã naa mose, echecuate ee. ¹¹ Emo ucheẽ naa naa mose seje, se eicuayã mose, mbiamo ño aico nguiã ee. Mbiamo ño ae riqui nguiã seje no. ¹² Espíritu Turã quirãcuã jenyosei tuchi quia reae. Coche tuchi chõ ùqui nde. Jesús quiato mingo tuchi sacua Jesús rese chõ equirãcuã jenyosei jẽ.

¹³ Nde mbiamo cheẽ naa naa mose Jesús quiato je, echeẽ na Dios je. — Paba, ndequirãcuã emee na seje. Secheẽ mbiasa sacua mbia je, ere chõ Dios je. ¹⁴ Se mbiamo cheẽ naa mose Dios je, acheẽ ñee ndaque Dios je. Mañi ae quiatu ñi se quia ñee ee. ¹⁵ Mbiamo cheẽ abe ra asaã saã ndaque Dios je. Secheẽ abe ra asaã saã ee no. Mbia secheẽ icua ja sacua. Mbiamo cheẽ abe ra asaã saã se irasei rasei mose. Secheẽ abe ra asaã saã se irasei rasei mose no. ¹⁶ Nde mbiamo cheẽ naa naa mose Dios je, mbia ra ndecheẽ icuayãte. Ae equiatuãte, ùqui nda ndecheẽ icuayãte. Nyebe eriqui nguiã ñee aroneate Dios je nderese. Nyebe nandechẽ sĩ chõ nandesã Dios je. ¹⁷ Coche jẽingo nguiã ñee Dios je. Jeñee sĩ quia nda aba saã Dios je re. Jẽ mbiamo cheẽ naa naa mose ee, jendesenda quia nda jeñee icuayãte nguiã. Ûqui mose ra jendesenda

jemingo uquia reãte Jesús rese. ¹⁸ Mbiamo cheẽ aicua tuchite raque quia jẽsi co. Gracias, aete raque quia Dios je ùquĩ nã co. ¹⁹ Dios quiato ñumunua mose, acheẽ nyecuase rete ee. Secheẽ jua chõ ndaque. Cinco palabras. Mbiamo cheẽ nda asaã eã ee. Mbiamo cheẽ icuayãte quia ñene. Emo nda ñee oco raque ee, icuayãte rae.

²⁰ Mbia riirĩ naate ra jẽingochĩ, Seresenda. Jendua quiatu secheẽ ndese mbia cuasu rã. Coche jẽingo nguiã mbia riirĩ na mbae icuã naa ndocoĩ. ²¹ Ñ ndei Dios cheẽ mbesa ji ã:

Mbiamo tamondo rei secheẽ nenei nenei sacuã ã serimba je.

Secheẽ nda esenei senei ndei serimba je mbiamo cheẽ je.

Aquere ra serimba secheẽ mumba i i tuchi querabe, i que Dios ra,

i que embesa ji ra. ²² Jemo mbiamo cheẽ naa naa mose, Jesús quiatoã mundua sacua Dios rese chõ ùquĩ nde. Jẽ Dios cheẽ nenei nenei mose, Jesús quiato mundua sacua ño Dios rese chõ ùquĩ no nde. ²³ Jesús quiato ñumunua nua mose u, sã mbiamo cheẽ naa naa ja eã u. Jẽ mbiamo cheẽ naa naa ja mose ra Jesús quiatoã ñee jẽje. “Earacuayã” i ra ique mose mae jendese. ²⁴ Coche jẽingo nguiã Dios cheẽ nenei nenei ja jeñumunua mose. Jesús quiatoã mo ique mose jendea, ndua ndua tuchi ra huicuaã ndese. —Seicuã tuchi chõ aico se re, i ra jeñee andu mose. ²⁵ Ae rese ndua ndua uchiangui renda icuã nae, Espiritu Turã ae ra ùquĩ mbuchecua checua nguiã ee. Nyebe ra ngoi nguiã ndese ñee turã Dios je. —Dios riqui tuchi jendese a, i ra ñee jẽje.

Mbae jẽsaã turã turã ja chõ nguia jeñumunua nua mose

²⁶ —Eĩ jenye quiatu quia ñumunua Jesús riĩ, ae ra jẽje cote. Emo irasei rasei. Emo mbia mbaaquiato quiatu Jesús riĩ. Emo Dios cheẽ icua icua mbia je no. Emo mbiamo cheẽ naa naa no. Emo mbiamo cheẽ mbiasa asa ee no. Jenyuuru uru chõ nguia. Mbia mingo ja sacua Dios rese chõ ùquĩ nde. ²⁷ Mbiamo cheẽ jẽsaã saã mose ñumunua mose, jẽ nyeremoño ño jeñee ñee. Jenyuuru uru chõ nguia. Sã emo ndiqui echeẽ mbiasa asa. ²⁸ Jemo echeemo mbiasa aquiataũ mose, mbiamo cheẽ nda jẽsaã saãchĩ, jeñumunua mose. Jeñumunua eã mose quiatu mbiamo cheẽ jẽsaã saã jẽ ae Dios je. ²⁹ Ae ra Dios cheẽ senei senei mbia chumunua mose nae, sã nyeremoño ño ñee. Sã eataque ndua ndua ùquĩ ñee ndese. Eĩ ngue ra, i sacua. Eĩ eã ngue ra, i sacua abe echeẽ icua mose no. ³⁰ Emo chĩ mose Jesús quiato ataque mbaa quiatu quiatu, emo nda ñeechĩ echeẽ cúaa. —Nde abe ã embuchecua mbia je, i mose Dios emo je, sã ñiinda ñee ja rã nyii. ³¹ —Nde abe ã embuchecua mbia je, i mose Dios jemo je, jenyuuru uru chõ nguia ñee. Mbia Dios cheẽ icua ja sacua. Mbia siqui tuchi sacua Dios rese. ³² —Nde abe ã embuchecua mbia je, i mose Dios emo je, sã emo ndaarõ mbirĩ na huĩ, emo chĩ mose Dios cheẽ nenei nenei. ³³ Jemo ñee mose jenongue cheẽ cúa, Dios biãte ùquĩ. Jeñee turã mose nyuuru uru, ùquĩ nguia Dios bite re. Eĩ ja chõ Dios quiato nguiã iglesia jenda ja. ³⁴ Jeñumunua nua mose Dios riĩ, cuña mo nda ñeechĩ. Eĩ si que Moisés chimbesa no nda. Sã cuña ndiqui mbia cheẽ mumbayã mbei. ³⁵ — Ûquĩ embuchecua seje, i aroneate cuña ñee mbia chumunua mose. Uchuchua quia cuña ñee ngu je, ñimbaaquiatus mose. Cuña mo ñee aroneate Jesús quiato chumunua nua ite re. ³⁶ —Ichõiño nguiã ¿jenye quia secheẽ mose re? Jẽ nane je eã ngue Dios ñee ndesẽ. Jẽ mii je eã ngue Dios ñee ndesẽ.

³⁷ Secheẽ ae eã ambesa nguiã jẽje co. Dios cheẽ ño ambesa nguiã jẽje. — Dios que uquiracuã mee seje ra. Ucheẽ nenei nenei sacua, i mose jemo ñee,

sã ùquĩ nane ñee seriĩ. —Dios cheẽ tuchi chõ Pablo senei senei nguiã, sã i seriĩ. ³⁸ Ûquĩ secheẽ isi sereã mose, jẽhui chõ esi. Sã eaquiatuã ae riqui. ³⁹ ¡Dios cheẽ jẽsenei seneise tuchi quiatu jẽ! Jemo mbiamo cheẽ naa naa mose jechẽ nda jẽsiquisã quisãchĩ jẽ! ⁴⁰ ¡Mbae jẽsaã turã turã ja chõ nguia jeñmunua nua mose jẽ! Jenyuuru uru turã ño nguia.

15

Cristo quera si mose

¹ Dios cheẽ turã ngue asenei senei nguia jẽje Jesucristo rĩĩ nae, ùquĩ sí rese chõ aico nguiã jemundua ndua co. Ûquĩ ngue jẽisi turãte. Jẽingo beite ùquĩ ndese ùquĩ. ² Ûquĩ ndiqui jemingo beite ùquĩ, jẽtesareiã mose secheẽ si. Ûquĩ jẽingo Jesucristo icua iruã ùquĩ. ³ Ae Dios senei senei seje nae, ùquĩ nane ngue asenei senei jẽje ra: Jesucristo que mano nandeicua ndiquicharõ. Embesa ji cheẽ nguire. ⁴ Mbia que echati rei. Tres días mose que quera si. Embesa ji cheẽ nguire. ⁵ Quera si mose que nyecua Pedro je. Aquere que nyecua uchĩmbaaquiato doce je cote. ⁶ Quinientos uquiato je que nyecua cote. Hue equiato chi ja mose ñmunua. Ûquĩ tubiriãte riqui ã. Emo emo ngue mano nda. ⁷ Nyecua que Jacobo abe je cote no. Aquere que nyecua uchĩmbaaquiato jaje cote. ⁸ Nyecua nyecua jare mbia je que nyecua chee se abe je cote ra. Sã ñũa ndiqui erã mo mbua no, ùquĩ na si chõ aico rei nguiã se co. ⁹ Se quia señetẽ jiri riqui nguiã Jesús chĩmbaaquiato ataque si co. —Jesús chĩmbaaquiato chõ se re, ae eã jiri quia co. Seicua tuchi quiatu ngue Dios quiato je nyii re. ¹⁰ Dios turã ae semingo turã nguiã co cote. Dios turã ñooño eã ño eriqui nguiã seje co. Se abe que serecoteã jiri riqui nguiã Jesús rese echĩmbaaquiato ataque si ra. Mbae raã naa Jesús je. Se ae eã ño ngue aico nguiã mbae rese. Dios turã ae ngue semingo nguiã mbae rese. ¹¹ —Aba Dios cheẽ senei senei tuchiãte quia reae, ure ãte equia co. Ûquiã ñene. Uresenei senei ja chõ equia ã ndesẽ. Jẽ ngue urechisenei senei jẽisi turãte quia resẽ.

Mbia raaque quera si mose

¹² —Cristo que quera si manonde ra, ure que equia erenei nenei jẽje. Urecheẽ ngue jẽisi turã ndei nyii. ¿Mbaerã jemo ndiqui ñee cote re? — Mbia raaque ra querayã mbei, i cote re. ¹³ ¿Cristo raaque bei namo nde? — Mbia raaque ra querayã mbei, jenyẽ mose, ¿mañi Cristo raaque quera re no? ¹⁴ Cristo raaque quera si eã mose, eĩ nda ureico rei echeẽ nenei nenei iru chõ. Eĩ nda Jesucristo jẽicua iru chõ ndei. ¹⁵ Cristo raaque quera si eã mose, eĩ nda ureico rei ñee ñooño Dios rĩĩ mbia je. —Dios que Cristo mbuquera si ra, ure bei equia ã ndesẽ. Mbia raaque quera si eã mose, i nda Dios Jesucristo raaque mbuquera si eã ndei no. ¹⁶ Mbia raaque querayã mose, eĩ nda Cristo raaque quera eãte rei no. ¹⁷ Cristo raaque quera eã mose, eĩ nda jẽingo rei Cristo icua iru no. Eĩ nda jẽingo rei jẽicua nderequia beite no. ¹⁸ Eĩ nda Cristo quiato quiachã mbei rei manonde no. ¹⁹ A mii eã ño Cristo riqui nguiã nanderese. Nandemanonde abe ra eriqui bei nanderese no. A mii mose, eĩ nda nandeya eã tuchiãte riqui rei mbia mo si no. ²⁰ Cristo que quera si ra. Ae bei tuchi. Ae rane ngue quera nyii ra. Nyebe ra mbia abe quera si eraã si cote no. ²¹ Adán mii nane ngue mano huicua je cose ra. Nyebe nandeico nguiã mano mano mbei cote. Eĩ si chõ Cristo mii quera si nguiã cote. Nyebe ra uquiato mbuquera si ja cote. ²² Sã nandeico mano mano ja Adán ndui ã no,

eĩ si ra Cristo nandembuquera quera no. ²³ Dios que Cristo rane mbuquera nandesĩ ra. Cristo tube mose, uquiato raaque ra embuquera ja cote. ²⁴ Cristo tube mose ra mbae ibi jenda ua ja cote. Mbia mo nda siquĩã ererecua cote. Cristo ra mbae mee ja Dios je cote. Cristo ra mbia rerecua mbutiã ja cote. ²⁵ Ererecuarã tuchi ra Cristo cote. Uquiatoã nda embuquiachã ja tuchi chee cote, ae siqui mose ererecuarã. ²⁶ Mbia mano mano mose, Cristo biãte ũquĩ. Ũquĩ abe ra Cristo mbuquiachã tuchi mbia si cote. Mbae icuã ataque ra embuquiachã ja rã nyii. ²⁷ Dios que mbae mee ja Cristo je ra. Cristo mbae rerecua ja tuchi sacuã. —Cristo ra mbae rerecua ja tuchi, i ñi embesa ji re. Dios rerecua eã ndaque. Mbae ja rerecua chõ nda Cristo. ²⁸ Dios mbae mee ja mose Cristo je, Cristo ra ñimee Dios je cote no. Eriirĩte quia ñene. Eĩ nda Dios mbia rerecua ja tuchi cote.

²⁹ Emo emo ño bautizar i nguiã eraaque riĩ ũquĩ. Eraaque quera si eã mose ¿mbaerã ũquĩ ndiqui bautizar i eraaque riĩ nde? ³⁰ Mbia raaque quera eã mose, eĩ nda ureico rei Dios cheẽ nenei nenei ãte mbia je co. Eĩ nda mbia riqui rei ureiquia serĩ serĩ ãte. ³¹ Mbia “taiquia” i bei beite quia seje ã. Acheẽ ñooño eãte jẽje. Sã seyate riqui jendese co no. ³² Nyacua rã tuchi que Efeso jenda riqui seje ra. Ũquĩ ngue asiquisã tuchi rei quia ñee nda. Eĩ nda asiquisã quisã iru rei no, mbia raaque quera eã mose. Mbia raaque quera eã mose, eĩ nda nandeico rei ñee. —Mbae nandembeĩ chooño. Mbae nandeu chooño. Mano mbeĩ cote, i. ³³ —Eĩ jenyẽ quiatu ¡ichĩ nda mbia jembĩirĩ irĩ jẽ! Jeingo mose mbia icuã ndese, jembĩicuã icuã nda jẽ abe cote. ³⁴ Jendua quiatu. Mbae turã nguiatu jesaã saã nguia. Mbae icuã jesaã eã nguiatu quia. Jemo emo ndiqui Dios icuayãte ũquĩ. Aba ireĩ tuchi quiarei ũquĩ.

Jesús quiato rete yasu ja ra cote

³⁵ Jemo nda ñee ndei. —¿Mañi nda eraaque quera si re? ¿Mañi nda erete cote re? i ra jemo ñee ndeae. ³⁶ Ndua eã ño nguiã ũquĩ. Sã nandeico mbae eĩ tiquia no. Mbae eĩ nda soõ suri sacuã cote. Eĩ si chõ nda nanderete soõ nandemano mose. Nanderete yasu sacuã cote. ³⁷ Sã nandeico mbae eĩ tiquia no. Ei ra nandechitiquiayã. Ieĩ achõ ño nandechitiquia nguiã. Quiata a eĩ. Mbaemo eĩ abe no. Ei quia nda suri nguiã cote. ³⁸ —I ño nda ndei, i chõ Dios nguiã mbae eĩ jaje. ³⁹ Nanderete rã ño mbae eĩ nde. Eĩ ja eã ño mbae rete re. Emo ño mbia rete no nde. Emo ño quiaa riĩnda rete no nde. Ae mbebe quia, erete ae chõ ũquĩ no nde. Sira ae erete mo no nde. ⁴⁰ Ibatenda ae rei erete mo no. Ibi jenda ae erete mo no. Ibatenda ae rei erete turã mo no. Ibi jenda ae rei erete turã mo no. Eĩ ja eã ño mbae rete re. ⁴¹ Nyasi rendi rã eã ño tenda rendi re. Nyasi tata rendi rã eã abe no. Nyasi tata rendi chiabi abi chõ eno nde. Erendi turã ja raque.

⁴² Eĩ si chõ mbia raaque quera je re. Ae mbia raaque nandechitiquia quia nae, ũquĩ ndei soõ je ũquĩ. Ae ra quera si nae, ũquĩ nda soõ eã mbeĩ cote. Manoa mbeĩ ra eno. ⁴³ Ae nandechitiquia quia nae, eraaque tuchi chõ ũquĩ nde. Ae ra quera si nae, enininya tuchi chõ ũquĩ cote re. Etiquia mose, equirãcuã nea tuchi chõ aque mose re. Equera si mose, equirãcuã tuchi chõ aque mose cote re. ⁴⁴ ã nanderete nandereco ã nae, erete achõ ño ũquĩ nde. Quera si mose ra nyiicabo tuchi cote. Mbae ibi jenda ra mano ja. Ae ibi jenda eã nae, ũquĩ nda manoa no. ⁴⁵ ã ndei embesa ji cheẽ ã: “Ae Dios chao Adán nyii nae, aque reco que siqui rei nyii ra”, i que embesa ji ra. Ae tu Adán ndui Jesucristo, mbia mingo beisa rei aque. ⁴⁶ ã nanderete nandereco ã nae,

mano mano mbei arõte. Ûquĩ nane nandereco nanderete ã. Aquere quiatu ra nanderetemo nandereco cote. Manoa mbei sacua cote. ⁴⁷ Ae Dios chao Adán nyii nae, ibi je chõ eao nguiã nyii. Nyebe ibi jenda bei ae re. Ae tu Adán ndui nae, Jesucristo i equia ee nae, ibatenda chõ aque re. ⁴⁸ ã nanderete nandereco ã nae, Adán ndete rã si chõ nanderete nandereco nguiã ã. Ibi jenda chõ ã nanderete re. Ae nanderete ra quera si nae, ibatenda rete rã ño nda ùquĩ cote. ⁴⁹ Ae Dios chao ibi je nyii nae, Adán i equia ee nae, aque rã si chõ nandeico nguiã nande abe namo ã. Aquere ra nandeico ibatenda rete rã cote. ⁵⁰ Nanderoo achõ ño nanderete re. Nanderuqui abe no. Ûquĩ oso aroneate ibate Dios récuua. Ae mano nguia soõ nae, ùquĩ nyoĩ aroneate Dios récuua. Ae mbia riqui manoa mbeite nae, huee nanderoo oso aroneate.

⁵¹ Ae rese mbia riqui jiranuate nae, ùquĩ tasenei na jêje. Nandemano ja eã ndae. Nandechiicabo ja chõ ndae. ⁵² Corneta pu i mose ra Dios nanderete mbuchiicabo asi cote. Nanderesa pirirã i rã nda Dios nanderete mbuchiicabo asi. Corneta pu i mose ra eraaque abe quera si manoa mbei nonde cote. Aque mose ra nandechiicabo bei nande abe cote. ⁵³ Ae nanderete nandereco namo ã nae, ã nda nyiicabo tuchi cote. Manoa mbei sacua cote. Soõ eã mbei nonde cote. ⁵⁴ Nanderete nyiicabo mose, ùquĩ mose ra embesa ji cheẽ io cote: “Nandemano ngue ua tuchi cote ra”, i ñi embesa ji re. ⁵⁵ Nanderasi ra nandeiquiayã cote. Ibicua ra nanderaarõã cote. ⁵⁶ Nandeicua ño nandemano mbu uquia nguiã nande je co. Moisés chimbesa chõ nandeicua mbuchecua nguiã nande je co. ⁵⁷ Dios ra nandemano siquisã mbei nandesi cote Jesucristo rã. Nyebe nandeico nguiã gracias i tuchi Dios je ã cote. ⁵⁸ Seresenda ¡jẽĩmbirãcua tuchi quiatu quia jê! ¡Jesucristo rese jẽingo bei quiatu quia jê! ¡Echeẽ jẽsenei senei mbei tuchi quiatu quia jê! Ae jẽsaã saã nguia Jesucristo rese nae, jẽsaã iru iruã ño nguiã ùquĩ.

16

Ofrenda jembae jendecoquiato, i Pablo

¹ Ae ofrenda ra jemondo Jesús icuasa je nae, ùquĩ tasenei jêje. Acheẽ ngue Jesús quiato je ra. Galacia jenda je ra. Eraã si chõ jẽingo ae. ² Domingo mose bei jẽingo mbae rerecúe cúe ae. Ofrendar ã. Ae mbae isi atate quia, sã aque mbae rerecúe ata jiri ae. Ae mbae isi mĩte quia, sã aque co mĩ jiri rerecúe ofrendarã ae. Ûquĩ jemunua ño seso nonde jendea ae. Eĩ mose ra ofrendarã jẽsaã eã seico mose jendese cote. ³ Secuasẽ mose huee, jẽĩmundo sacua mo jẽirabo ño, ofrenda rerao sacua. Cartas nandemondo ùquĩ oo. Ofrenda rese. Ûquĩ nda amondo Jerusalén ña. Ofrenda rerao sacua hue jenda Jesús quiato je. ⁴ Ofrenda tubiriã mose ra aso se abe erese.

Aso ra jendea, i Pablo

⁵ Macedonia ñi nane nda acua. Aquere ra aso ngasẽ jêje cote. ⁶ Aico arete jiri ra jendese huee reae. Ama mose bei ra aico jendese huee reae. Eĩ jenyẽ nda sembucuaata turã mondo cote, seso mose mbaranguiti. ⁷ Amaeño sereãte jendese secua mose. Aico arese rete jendese huee, Dios eno i mose seje. ⁸ Efeso taico are rã nyii. Fiesta de Pentecostés mose. ⁹ Dios cheẽ asenei senei arõ tuchite mbia je a. Mbia seanduse rete. Emo emo icua icuaite riqui Dios cheẽ nenei nenei mose seje ã no.

¹⁰ Timoteo ngasẽ mose jêje ¡jẽisi turã ño jê! ¡sã eireĩ nguiã tuchi jẽsi jê! Se rã si chõ eriqui bei nguiã Dios cheẽ nenei nenei mbia je aque. ¹¹ ¡Nyebe jemo

Timoteo isiteã eã jê! ¡Jembucuata turã ño imbu seje jê! Aico eraarõ arõ tuchi se a. Nanderesenda ataque rese.

¹² Acheẽ ndei que nanderesenda Apolos je ra. —Nde abe eso erea, ae rei que ee jenĩ nda. Oso sereã ngue namo nda. Oso bi mose quia nda esi nguiã jendea cote.

Pablo ñee hui bei

¹³ ¡Jendua tuchi quiatu quia jê! ¡Jesucristo jêicua tuchi quiatu quia jê! ¡Jêsiquicheã tuchi quiatu quia jê! ¡Jêquirãcuã tuchi quiatu quia jê! ¹⁴ ¡Mbia rese jenyesequa tuchi quiatu quia mbae raã naa mose jê! ¹⁵ Seresenda, jêingo Estêfnas chuchua jenda icua jate ñquĩ. Ñquĩ nane tuchi ngue Jesús icua Acaya jenda nyii nae. Ñquĩ ndiqui mbae mondo mondo bei Jesús quiato je ñquĩ. Ñquĩ ndiqui mbae raã naa mbei Jesús quiato je ñquĩ. ¹⁶ Ñquĩ na si chõ jêingo. Ñquĩ ñee nda jemumbachĩ. Ae Dios cheẽ senei senei nguia nae ¡ñquĩ ñee nda jemumbachĩ jê! ¹⁷ Seya tuchi Estêfnas ngaẽ mose serea. Fortunato abe. Acaico abe. Ñquĩ ngue sembia tuchi ngaẽ jêingoã mose a ra. Ae jêsaã aroneate quia seje nae, ñquĩ ño ngue esaã ngaẽ seje a ra. ¹⁸ Ñquĩ ngue sechiã mbucoite Dios rese ra. Jêña abe mbucoite ereae. Gracias jenye bei ñquĩ je.

¹⁹ Jesús quiato Asia jenda ja chõ saludos mondo quia jêje aque. Aquila abe saludos mondo quia jêje aque. Priscila abe. Ae Jesús quiato ñmunua nua nguia ñquĩ nyuchua nae, ñquĩ ja abe saludos mondo quia jêje Jesucristo rĩ aque. ²⁰ Jesús quiato a jenda ja saludos mondo quia jêje aque. Jenyiquiaama ama ja quiatu quia Jesús rĩ.

²¹ Seo je tuchi co saludo ambesa mondo quia jêje aque. Pablo tuchi chõ se re. ²² Emo nyesequayã mose Jesucristo rese, sã Dios embasi. Echu, Jesucristo. ²³ Jesucristo turã nda siqui jendese chã. ²⁴ Achesequa ja chõ nguiã jendese Jesucristo rĩ co. Amén.

SEGUNDA CARTA DEL APOSTOL SAN PABLO A LOS CORINTIOS

Pablo ucheẽ mbesa mondo Corinto jenda je

¹ Pablo chõ se re. Dios chiirabo chõ se re. Jesucristo chimondo chõ se re. Timoteo rese co ambesa mondo quia jẽje aque. Jesús quiato Corinto jenda ja je. Acaya jenda ja je abe no. ² Sã Dios uturã mingo tuchi jendese. Sã Dios jembia bei mingo. Sã Jesucristo abe jembia bei mingo.

Pablo mbae rasi saã tuchi

³ Gracias nande bei tuchi quiatu quia Dios je. Jesucristo rute quia ae re. Ae quia eya eãte riqui nguiã nanderese co. Ae chõ nandeya eã mbuquiachã quiachã nguiã co. ⁴ Mbae icuã tu mose ure je chõ Dios riqui nguiã ureya eã mbuquiachã quiachã ure si co. Ure mbia mo mbia sacuã abe chõ ñene. Mbae icuã tu mose ee. ⁵ Cristo rane ngue mbae rasi saã tuchi nyii ra. Mbia urembasi mbasi tuchi quia ure abe Cristo riã ã. Cristo riqui urembia tuchi ure abe ùqui mose co. ⁶ Ure mbae rasi raã mose, jẽje chõ ñene. Ure mbae rasi raã mose nyii, jẽingo sacuã Dios rese chõ ñene. † nda jẽya bei riqui mbae rasi raã mose. Dios ureya eã mbuquiachã mose, jẽya eã mbuquiachã sacuã abe chõ ñene. Eĩ nda jeñimbirãcuã tuchi mbae rasi raã mose. Sã ureico mbae rasi raã ure no. ⁷ —Mbae icuã tu mose ee, ñimbirãcuã turã nda Dios riã, ure beite equia jeniã ã. Mbae icuã tu mose jẽje, Dios ra jẽya eã mbuquiachã jesi. Sã seya eã mbuquiachã sesi no.

⁸ Mbae rasi que uresaã tuchite ureico mose Asia ra. Ûqui ndese taembi-irandu. Mbia que urecuayãte quia ra. Aete ureico ñimbirãcuã eã. —Mbae icuã nda hui eã mbeichĩ nandesi re, ure rei que equia ra. ⁹ —Mbae icuã nda nandemingoã nyee, ure rei que equia ra. Mbae icuã tuutu bei mose ure je. Ure Dios icua sacuã ño ngue ùqui nde. —Nande ae eã ñene, ure i sacuã ño ñene. Sã Dios ae riqui mbia raaque mbuquera uquirãcuã je no. ¹⁰ Mbae icuã ureiquia serĩ nguia nae, ùqui si que Dios ae urerirõ nda. Ûqui si eriqui urerirõ ndirõ mbei ã. Ûqui si ra eriqui urerirõ mbei no. Ûqui ureicuate quia ã. ¹¹ Jẽ abe jeñee Dios je urerĩ no. Mbia tubiriã ñee mose Dios je urerĩ, Dios ra ùqui ñee ñandu. Dios ra uturã mondo tuchi ure je. Ûqui nda gracias i tuchi Dios je urerĩ cote.

Pablo oso jei eã Corinto

¹² Ure que mbia mo urembĩri irĩ ãte quia ra. Jẽ abe mbĩri iriã no. Dios resendate que ureico jẽje ra. Ureyate mbae turã naa naa mose jẽje. Nyebe urechiã iate riqui nguiã. Dios ae chõ ngue uremingo mbae turã ndese huee ra. Ureaquiato ae eã ngue ra. ¹³ Ae urembesa mondo quia jẽje nyii, ùqui jẽicuate raque quia ùqui. Urechimbesa checuate raque. Urechimbesa nda jẽicua ja tuchi rã seje chã. ¹⁴ Jẽ seicua jiri raque quia ùqui. Jẽya tuchi rã nda urerese Jesucristo tu mose chã. Sã ureyate riqui jendese ã no.

¹⁵ Sã jẽyate riqui serese co no. Ûqui aicuate quia se abe co. Nyebe acheẽ ndei nguiã sechiangu re nyii. —Tasobe rã erea. † nda eyabe jiri sesobe mose erea, ae rei que se nyii ra. ¹⁶ —Seso mose Macedonia, taicha bei oso jenda, ae rei que se ra. —Obei abe nda aichabe erea chã. † nda mbae mo mee seje sembu bei sacuã Judea, ae rei que se no nda. ¹⁷ Se ndua mose ùqui ndese, zeicuate

ũquí nde? ¿Acheẽ ñooño ño se quia ũquí nde? Se eno i mose, eno ae bei chõ nda se. Secheẽ nda ambuchebiã mbei. Jesús quiatoã ae ũquí saã nguiã. ¹⁸ Sã Dios ñee ñooñoa no. Eĩ ure quia ure abe urecheẽ mbuchebiã jêje ã. ¹⁹ Sã Dios rucucha ucheẽ mbuchebiã mbei no. Jesucristo i equia ee. Ae abe eno i bei quia co. Jesucristo sí cheẽ ño ngue asenei senei nguia jêje resẽ. Timoteo rese. Silvano abe rese no. ²⁰ —Mbae turã nda asaã jêje, i tuchi rei que Dios quia nande je nyii ra. Jesús rĩ ño eriqui nguiã ũquí naa naa nande je ã cote. Jesús rĩ ño nandeico nguiã Amén i Dios je ã cote. ²¹ Dios ae chõ nandembirãcuã mingo nguiã Cristo rese co. Nandemingo icúe umbaerã. ²² Dios que nandéisirõ umbaerã nda. Umbae marca que emi naanguia nanderese ra. Espíritu Turã ngue emondo nandechiangui re ra. Nanderereco quiatu sacua umbaerã.

²³ Aso eã equia jendea nae, jêireĩ nguiã sacua ño asoã nguiã jendea aque mose. Seso sereã ae eã ngue eno nde. Acheẽ ñooño eã ño nguiã jêje co. Dios riqui sechiã icuate co. ²⁴ —Jenderecuarã nda se, ae ãte quia co. —Co rese chõ jêingo ndua, ae aroneate quia jêje co. Taembiã chõ Jesús rese. ũquí mi ño asaã nguiã jêje. Jê ae chõ jêñimbirãcuã nguia Jesús quia ũquí.

2

¹ —Aso si eã nda ñee asi asi jêje jembia eã, ae que se ra. ² Seso mose jembia eã, aba quia ra sembia se cote. Jê ño sembia quia resẽ. ³ Nyebe ambesa mondo jêje nyii resẽ. Jê mbae mbitorõ sacua seso nonde jendea. Seso sereãte que oso mae jêicuã ndese ra. Sembia eã sacua. Jê nguia nda sembia nguiã ña. —Seya mose ra jêya jê abe, ae que se ra. ⁴ Ae ambesa mondo jêje nyii nae, ũquí mose que seya eã tuchi riqui jendese ra. Acheseo chee que jendese ra. Jembia eã sacua eã ño ngue aque ambesa mondo nguiã jêje. —Pablo ndua tuchichĩ nanderese, i sacua ño ngue ambesa mondo nguiã jêje.

Ae mbae icua saã nguia nyii nae, aque jêisi turã ño cote, i Pablo

⁵ Ae siqui ngu ninisi rese nyii nae, sembia eã tuchi chõ aque re. Se mi eã ngue sembia eã nda. Jemo abe abe mbia eã ngue ra. ⁶ Mbae rasi que esaã tuchi huicuã ni cote ra. Jê emombo mose nyii. Jêisi turã ño cote. ⁷ Aque icua si jêtesarei chõ cote. Jêturã ño ee cote. Jembia jiri. I nda eya eã embiicha eã Dios si. ⁸ Jenyesequa tuchi chõ nguia erese jê. Jêturã sí chõ ee jê. ⁹ —Ma secheẽ mumba eã, ae que embesa mondo jêje nyii ra. ¹⁰ Jêtesarei mose aque icua si, se abe atesarei chõ nguiã esi co. Jeni ño aico nguiã tesarei esi co. Cristo resa rae chõ aico nguiã tesarei esi. ¹¹ Nandetesarei mose emo icua si, Satanás siquiã sacua nanderese chõ ñene. Sã Satanás ndiqui aba mbirĩ irĩ mbeite no.

Sechiã ngue ngoi eã mbei Troas ra, i ñi Pablo re

¹² Secuasẽ mose Troas Cristo cheẽ nenei nenei sacua, Cristo que mbia mbuchiisaquia tuchi rei secheẽ andu ra. ¹³ Tito oreãte que seje huee ra. Nyebe sechiã ngoi eã mbeite nguiã. Nyebe “co acua quia co” ae nguiã hue jenda je. Macedóniaa ngue aso cote ra.

Dios uremingo turã mbeite quia Cristo rĩ co

¹⁴ Aico gracias i beite Dios je co. Ae chõ uremingo turã mbeite nguiã Cristo rĩ co. Ae chõ urembirãcuã nguiã mbae icua si co. Ae chõ ucheẽ senei senei quia nguiã ure je manguie jenda choñoa je co. Aba mbushimbusa rã tuchi chõ echeẽ nde. Sã aba mbushimbusa riqui mbae mbushimbu turã jate no. ¹⁵ Cristo riqui urechiangui re co. Nyebe ureico nguiã aba mbushimbusa rãte

Dios je ã. Ure Dios cheẽ nenei nenei mose, emo emo ño echeẽ isi nguiã. Siqui bei sacua. Emo emo ño echeẽ isia nguiã no. Nyoï sacua tata cuasu. ¹⁶ Ae ra nyoï tata cuasu nae, mbae shimbu icua naanguia chõ Dios cheẽ ndiqui nguiã ee. Ae ra siqui bei quia nae, aba mbushimbura turã naanguia chõ Dios cheẽ ndiqui nguiã ee. ¿Aba chõ equiatu Dios cheẽ nenei nenei ña? ¹⁷ Ae Dios cheẽ senei senei ñooño nguia nae, ñquĩ na eã ño ureico nguiã Dios cheẽ nenei nenei ure ã. —Mbae mo jembu rã ure je, ureã tuchi chõ nguiã Dios cheẽ nenei nenei mose jêje ã. Sã eataque riqui Dios cheẽ abi abi erenei nenei mose no. Eĩ eã ño ure re. Dios cheẽ uresenei turã ja chõ nguiã ure. Ureico mingue chõ nguiã erenei nenei ure ã. Dios chõ ngue ureirabo nguiã ure. Cristo quiato chõ ure re. Dios résaa chõ ureico nguiã echeẽ nenei nenei ã.

3

Jesús cheẽ yasu nandereco quia ã cote

¹ ¿Urecuasua uresaa saã si rei nguia jêje ã nde? Tei. Jenyicua ja chõ ure resẽ. ¿Emo nda ureturã senei mbesa mondo jêje re? ¿Emo nda jêturã senei mbesa imbu ure je re no? Tei. Nandechicua ja chõ equia ã ndesẽ. ² Aico jenderequia beite sechiangui re co. Embesa ji rese mae na ño mbia riqui nguiã mae jendese ã. ³ Urechimbuaquiatu chõ jẽ ndesẽ. Cristo chimbese rã ño jêingo nguiã. Tinta je eã ngue jembesa ra. Espiritu Turã je chõ ngue jembesa nguiã. Sita eã ngue Cristo mbesa nguiã. Jeñia ño ngue embesa nguiã.

⁴ Cristo chõ ã icua nguiã seje. Dios résaa chõ aico nguiã ñee jêje ã. ⁵ Sequirãcuã ae je ra mbae aicuayã. Dios chõ uquirãcuã mee nguiã seje mbae icua sacua. ⁶ Dios chõ uquirãcuã mee nguiã seje, ucheẽ yasu renei nenei sacua. —Embesa ji cheẽ jemumbayã mose ra jaemingo bei, i ãte Dios quia nande je ã. Espiritu Turã ae chõ aba mingo bei nguiã. —Embesa ji cheẽ tamumbayã mbei chõ nguia seico bei sacua, i mose emo, aque ra siqui bei eã. Espiritu Turã ae nandemingo beisa re.

⁷ Sita mbesa ji Moisés queroco quia nae, mbae nininya tuchi que eriqui aque mose ra. Mbia mae sayã tuchi que Moisés ruba riqui ra. Moisés ruba nininyate quiatu ngue eriqui nguiã ee. Enininya que uque uquete oso quia cote ra. Moisés chimbese mbia mingo bei aroneate. —Mbia siqui icua mose, mbia ra mano, i que Moisés chimbese mbia mbiirandu ra. ⁸ Mbae nininyate raque aque mose. Ae Jesús cheẽ yasu nandereco namo ã nae, ñquĩ nguiarei enininya tuchi Moisés chimbese si. ⁹ Moisés chimbese quiatu que mbia mbiirandu tuchi huicua ndese ra. Jesús cheẽ yasu quiarei nandembiirandu nandicua mbitirõ ndese. Jesús cheẽ yasu quiarei enininya tuchi Moisés chimbese si. ¹⁰ Moisés chimbese quiarei enininya eã jiri Jesús cheẽ yasu si. Jesús cheẽ yasu quiarei i tuchi Moisés chimbese si. ¹¹ Moisés chimbese que siqui bei sacua eã nda. Jesús cheẽ yasu quia siqui bei sacua nde. Nyebe Jesús cheẽ yasu enininya tuchi Moisés chimbese si re.

¹² Jesús cheẽ yasu ra siqui bei. Ñquĩ nandecuate quia ã. Nyebe ureico nguiã ñee tuchi jêje ã. Mbae mbuchecua tuchi jêje. ¹³ Moisés rã eã ño ureico nguiã ure ã. Moisés que nguba chatite quia aque mose ra. —† nda judíos mae eã seruba nininya que rese, i. ¹⁴ Judíos que Moisés chimbese icuayãte quia ra. Namu abe icuayãte. Emo leer i mose Moisés chimbese je judíos je, icuayã mbeite. Ae siqui Cristo rese nae, ñquĩ mĩ ño Moisés chimbese icua nguiã. ¹⁵ Namu abe judíos Moisés chimbese icuayãte quia ã. Emo leer i mose ee, echecuayã mbeite riqui ee ã. ¹⁶ Emo uba mose Jesús rese, Moisés chimbese

abe ra echecuate ee cote. ¹⁷ Jesús si rei Espíritu Turã. Nandeico mose Espíritu Turã ndese, ae chõ nandembui mingo nguiã Moisés chimbesa si ã. ¹⁸ Nande Jesús icua mose, espejo rã ño nanderuba riqui nguiã. Jesús ruba nininya rã i i chõ nande re. Espíritu Turã abe siqui i i chõ nguiã nanderese. Nyebe nandeico i i nguiã Cristo rã ã.

4

¹ Dios turãte eriqui ure je co. —Jesús cheẽ yasu jêsenei senei mbei mbia je, i Dios quia ure je co. Nyebe ureico nguiã ñimondocho ãte echeẽ nenei nenei mbia je ã. ² Mbae icuã asaã saã nyecuayã eãte quia co. Ae aba ireĩte riqui nae, ùqui asaã saã eãte quia co no. Mbia ambĩrĩ irĩ eãte quia Dios cheẽ nenei nenei co no. Secheẽ ambeta mbeta eãte quia Dios cheẽ je co. Dios cheẽ ndui si tuchi chõ aico nguiã erenei nenei co. Dios résaã chõ aico nguiã erenei nenei co. Secheẽ ñoõnoa mbia icuate raque quia uchiangui re ùqui. ³ Ae asenei senei mbeite quia Jesús rĩĩ nae, echecuayã eã ño ùqui nde. Ae ra nyoĩ tata cuasu nae, ùqui mĩĩ je chõ echecuayã nde. ⁴ Jesús icua eãte quiatu nguiã. Nyebe aba checuayã nderecua riqui nguiã embaaracuayã Cristo cheẽ turã ñi co. Nyebe eriqui nguiã Cristo nininya icuayãte co. Dios rã tuchi rei Cristo. ⁵ Se mbia mbaaquiātu quiātu mose, serĩ eã ño aico nguiã ñee ee. Jesucristo rĩĩ ño ñene. Ae rei mbia rerecuarã tuchi. Jenimba rã ño aico nguiã Jesús rĩĩ se co. ⁶ Dios que nyaashĩ saã nyii ra. Itondaru beire nyii. Ae sí que nandembaaquiātu quiātu Jesucristo rĩĩ nda. Ae sí que Jesucristo nininya mingue nandechiangui re ra. Dios nininya rei Cristo nininya rã si.

Dios ae rese aico co, i ñi Pablo re

⁷ Ure ae urenininya eãte raque. Tuchu achõ na ño ureico nguiã Jesucristo nininya siquiã mose urerese. Dios ae chõ uquirãcuã mee nguiã ure je co. ⁸ Mbae icuã tã i bei beite raque ure je. Urechimondocho eã mbei rae. Mbae aba mbecoteã chĩchĩte raque. Urehui eã mbei ra Jesús si. ⁹ Mbia siqui icuã icuãte raque ure je. Dios quia hui ãte nguiã uresi co. Mbia ureririrõte raque. Urembui eã mbei quia nda Dios si re. ¹⁰ Sã mbia icuã icuã ndiqui Jesús je cose no. Sã eiquia no. Eĩ si chõ mbia nguiã ureiquia serĩ serĩte ã no. Mbia mae sacuã Jesús quirãcuã ndese chõ ùqui nde. Ae quera si nae, aque quirãcuã ndese mae sacuã ño ùqui nde. ¹¹ Ureico raque ure ã. Mbia ureiquia serĩ serĩ mbeite quia Jesús rĩĩ ã. Jesús quirãcuã siqui sacuã urerete quirãcuã nea ndese chõ ùqui nde. Mbia mae sacuã Jesús quirãcuã ndese chõ ùqui nde. ¹² Uremano serĩ serĩte equia ã. Jẽingo turã sacuã Jesús rese chõ ùqui nde. ¹³ Sã embesa ji ñee no: “Dios icuare chõ aico nguiã ñee”, sã i no. Eĩ si chõ ure no nde. Dios icuare chõ ureico nguiã ñee. ¹⁴ Sã Dios quirãcuã Jesús raaque mbuquera no. Eĩ si ra Dios nandembuquera Jesús rĩĩ nande abe. Ae ra nandemingo turã ja ujji cote. ¹⁵ Seje mbae icuã icuã mose, jemingo turã sacuã ño ùqui nde. † nda Dios uturã mee mbia tubiriã je. † nda mbia tubiriã gracias i tuchi Dios je. Dios iate mbia ùqui naa mose.

¹⁶ Nyebe ureico nguiã ñimondocho eã mbei. Urerete si raque quia ngoite qui cote. Urechimbiasu i i chõ nguiã urechiangui re ã. ¹⁷ Ae rasi uresaã nguiã ã nae, ùqui ndasi ra ua jei chõ. ùqui ndasi raande nyii ra Dios mbae turã mee mbei ure je cote. Dios chimee turã nda ua eã mbei uresi cote. ¹⁸ Ae rese nandeico mae mbae nae, ùqui nda ua jei. Ae rese nandeico mae eãte nae, ùqui nguiã ra ua eã mbei. Nyebe ureico nguiã ndua mbae nandemae sayã ndese.

5

¹ Sã tuchua riqui shii jeite no jê. Eĩ si chõ nanderete no nde. Mano jei. Mbia serete iquia mose, tuchua ao ji mo ñi ibate seraarõ arõ pe. Dios chisaã ño hue re. Hue tuchua ra shii eã mbei. Mbia chisaã eã ño ñene. ² Tuchia mo na ndei nanderete. Shii jei. Co serete rerequia mose, aico jibute co. Co aico oso sete sechuchia ibatenda rea co. ³ ñnda serete yasu areco bei pee ibate. ⁴ Tuchia mo na ndei nanderete. Co serete rerequia mose, aico jibute co. Seya eãte aico co. Semano sereãte raque. Serete yasu quia areco sete nguiã. Mbae yasu ja ra aque mose seje cote. Amanoa mbei ra aque mose cote. ⁵ Uqui je chõ ngue Dios sererecoquiato nguiã. Semingo turã mbei ra cote. Nyebe Espiritu Turã mondo nguiã seje. Sembiirandu sacua uqui ndese. Dios Espiritu Turã mondo mose seje, umbae marca mii naanguia serese chõ uqui nde.

⁶ Nyebe aico nguiã ñimondocho eãte co. Ñ nanderete rerequia bei mose, eĩ nda nandeso aroneate rei ibate siqui Jesús rese. ⁷ Aico beite Dios icua co. Amae ãte raque erese. Ae rese nandeico mae nae, uqui ndese aico ãte co. ⁸ Nyebe aico nguiã ñimondocho eãte co. Co serete ajae bite raque oso sacua ibate siqui bei nonde Jesús rese. ⁹ Ae Dios bite nae, uqui asaã sete quia ee co. Dios seisi turã nonde chõ uqui nde. Aa seico mose. Pee ibate seico mose abe no. ¹⁰ Cristo résaã ra nandecu ja emo mose. Ae nanderea sacua. Nandeicua sacua. Ae mbae turã saã saã nguiã siqui mose ibii nae, Cristo ra mbae turã mondo uqui je pee cote. Ae mbae icua saã saã nguiã siqui mose ibii nae, uqui je ra Cristo mbae icua mondo

Dios ae nandemingo turã nguiã uchiese Jesucristo rii co

¹¹ Aba siquichesa tuchi cho Dios re, mbia siqui eã mose erese. Nyebe ureico nguiã mbia mbuti mbuti tuchi co. Dios riqui ureicuate co. Jê abe jëingo ureicuate uqui ndenoae. ¹² Ñ ureico urecuasu raã naa si ãte raque ã. Jembia sacua ño ureico nguiã ñee urerii sí ã. ñnda jeñee aquiato mbia icua ñee ndibishorõ. Ae uturã saã ñoño nguiã nae, uqui ñee ndibishorõ sacua ño ñene. ¹³ Urearacuayã mose, Dios cheẽ ndese siqui sacua ño ñene. Urearacua mose, jembaaquiato sacua ño uqui no nde. ¹⁴ Sã Cristo nyesecua tuchite nanderese no. Ae chõ sembuti mbuti nguiã co no. Cristo que mano nande ja je ra. Nyebe nande abe nandemano ja nguiã erese. ¹⁵ Cristo que mano nande ja je ra. Ae nandebite riqui nae, uqui ndese nandeico eã sacua ño Cristo mano nguiã. Ae Cristo bite riqui nae, uqui ndese nandeico sacua nguiatu ngue Cristo mano nguiã. Nande je que Cristo mano nda. Nande je que Cristo quera si no nda.

¹⁶ Jesús quiatoã na eã ño ureico nguiã mae mbia rese ã. Urechesequa chõ nguiã mbia rese ã cote. Urechesequa eãte raque Cristo rese nyii. ¹⁷ Emo ñimbucha mose Cristo rese, mbia yasu rã ño uqui cote re. Ae esaã saã nguiã mbae icua nyii nae, uqui si que hui ja cote ra. Mbae yasu ja chõ ee cote re. ¹⁸ Dios ae uqui saã ja nguiã nande je co. Dios ae nandemingo turã nguiã uchiese Jesucristo rii co. —Mbia emingo mingo bei serese sequia torã jê, i que Dios seje ra. ¹⁹ —Sã mbia sequiatorã ja, i que Dios Cristo rii nda. Uqui je chõ ngue Cristo mano nguiã. Mbia icua mbutiã sacua esi chõ ngue Cristo mano nguiã. —Mbia emingo mingo bei serese sequiatorã jê, i que Dios seje ra. ²⁰ Cristo chõ sembucheẽ nguiã co. Secheẽ ae eã ñene. Dios ñee na jêje chõ aico nguiã ñee jêje co: Dios quiatorã ño jëingo jê. ²¹ Mbae icua mo ngue Cristo saã eãte rei ra. Dios que mbae icua naasa saã tuchi ee ra. Dios nandemingo

turã mbei sacua ño ñquĩ nde. Sã Dios nandemingo turã mbei nandeico mose Cristo rese no.

6

¹ Dios resenda chõ ureico nguiã Dios cheẽ nenei nenei ã. Dios turã jëisi chooñoa ño nguia jë. Jëisi tuchi quiatu jë. ² Eĩ ngue embesa ji huĩ Dios cheẽ nda:

“Jeñee mose seje, jeñee ngue achandu ra.

Aendirõ ngue mbae icuã si ra”, i que Dios mbi a je cose ra, i ñi embesa ji re. Namõ ño Dios riqui nguiã aba cheẽ anduse co. Namõ ño Dios riqui nguiã mbia rirõse eicuã si co no. ³ ã ureico mbia mo mbiĩĩ irĩ eãt e ã. ⁴ Mbae urecheẽ andu turã Jesús rĩĩ. ⁵ Mbae uredaã turã sete quia ure ã. —Dios rimba turã ño ñquĩ nde, i nonde mbia ure rĩĩ. Nyebe ureico nguiã ñimbiracuã tuchi mbia icuã mose ure je ã. Mbae tiã mose abe ure je. ⁶ Ureiruã nua ngue equia ra. Uretarõ tarõ mbei que equia ra. Urerecteã mbei que eriqui ra. Ureque reã tuchi que equia ra. Ureiracuã tuchi que eriqui no nda. ⁷ Ñquĩ icuã eĩ eĩ mose ure je, ureico turãte que equia ra. Ure que Dios ureicuate quia ra. Urechimbiracuãte que equia ra. Ureico turãte que equia mbia je no nda. Espiritu Turã ngue siqui tuchi urerese no nda. Urechesequa chooñoa ngue equia mbia rese no nda. ⁸ Dios cheẽ ichoĩñoa reã ngue uredenei senei tuchi quia mbia je ra. Dios quiracuã ngue siqui tuchi quia urerese ra. Ae uturã Jesucristo mee nguia ure je nae, ñquĩ mĩ ño urereaquiato bei nguiã co. ⁹ Emo emo mose mbia riqui ñee turã urerĩĩ ã. Emo emo mose mbia ñee icuã urerĩĩ no. —Aba mbiĩĩ irĩsa, i tuchi que mbia quia ure je emo emo mose no nda. —iAe bei jë! i tuchi que equia urecheẽ je emo emo mose no nda. ¹⁰ Mbia riqui ureririrõ ndirõ emo mose ã. Emo emo mose eriqui ureisi turã turãte ã no. Mbia ureiquia arõ arõte raque quia ã. Urereco ureico beite ã. Mbia urembaasi asite raque quia ã. Ureiquia eãte no. ¹¹ Ureya eãte raque. Dios rese quia ureyate re. Mbaecha reã ndaque ure no. Mbaecha que uredaã quia tuchi mbia je ra. Mbae eã tuchi raque urembae. Dios rese quia urembae tubiriã tuchi re.

¹² Urecheẽ nyecuate que jëje ra. Urecheẽ ngue jembĩĩ iriã tuchi quia ra, Corinto jenda. Ureico nyesequa tuchi jendese a. ¹³ Ure que urechao eã jësi ra. Jë nguia tu ngue jenyao nguiã ure si. ¹⁴ Sã mbia mo ndiqui ñee nguiĩĩ je no. Eĩ ae chõ nguiã ñee jëje. Jendu rã ño aico nguiã jëje. Jenyesequa tuchi chõ nguia serese. Sã aico nyesequa jendese no.

Dios chuchua tuchi chõ jendete re

¹⁵ Dios quiatoã ndese ra jeñimbuchachĩ jë. Dios quiatoã na eã ño jë nde. Sã mbae turã ndiqui mbae icuã mbiroã no. Sã nyaashĩ ndiqui itondaru mbiroã no. ¹⁶ Sã Cristo riquiã Satanás ndese no. Eĩ si chõ Cristo quiato siqui aroneate nguiã Cristo quiatoã ndese no. ¹⁷ Sã Dios abareã siqui aroneate Dios chuchua no. Jendete rei Dios chuchua tuchi. Dios riqui tuchi jendete ye ñquĩ. Sã Dios ñee ã no:

Erete ye ra aico. Ererecuarã nda se.

Mbia ra siqui serui,

sã i Dios no. ¹⁸ Dios cheẽ ño ã no nde:

Jëhui chõ mbae icuã si. Icuẽ jëingo.

Mbae icuã ndese ra jëocochĩ.

Jaëisi turã nda se chã.

¹⁹ Jendurã nda se chã.

Seriirina nda jẽ ña.
 Sequirãcuãte se,
 i que Dios cheẽ mbesa ji ra.

7

¹ Dios cheẽ ño ã nde. —Aico bei ra jendese, i que ra. Nyebe nandehui mbae icuã si ñimbitirõ mbei. Cochee chõ nandeico Dios je. Nandereco nandemee tuchi ee.

Seyate aico jendese co cote, i ñi Pablo re

² Ureisi turã ño jẽ. Mbae icuã mo ngue uresaã åte jemo je ra jẽ. Ureico que equia jembirĩ irĩ åte ra jẽ. ³ Jẽicuã i sacua eã ño aico nguiã ñee jẽje. Achesecua tuchite quia jendese co. Semano mose chee. Sã ñi acheẽ jẽje nyii no. ⁴ Seyate aico jendese co. Secheẽ nda emumbayã, aete se quia jeni co. Mbia icuã icuã mose seje, seyate aico jendese co.

⁵ Urechu que aa Macedõniaa, aque mose bei que urerecteãte ra. Mbae icuã ngue uremingo asi asite rei quia ra. Mbia icuã icuãte que eriqui rei ure je ra. Sechiã ngue ngoi åte rei quia ra. ⁶ Dios que sechiã mbocoi Tito ngasẽ mose cote ra. Sã Dios riqui uquiato mbia beite eya eã mose no. ⁷ Tito mii ndese eã ño seya re. Seya tuchi que sembiirandu mose jendese no nda. Jẽ nane ngue jeñee Tito mbirãcuã nda. Aquere que Tito ru sembirãcuã cote ra. —Hue echĩ ndua tuchite nderese huee, i que u ñee seje ra. Nyebe seya tuchite riqui nguiã jendese. Jẽtesarei eãte quia equia sesi reaẽ. ⁸ Ae ambesa mondo jẽje nyii nae, ùquĩ ngue jembia eãte rei ra. Erea ramo mose. —Amondo jirichĩ nguia, ae rei que se quia nyii ra. —Amondo jirichĩ nguia, ae åte se quia co cote. ⁹ Seyate aico jendese co cote. Jẽya eã nii eã ño ñene. Jeñimbitirõ nguiatu ngue re. Maende sechimbesa rese. Sechimbesa jembia eã mose jẽicuã ndese, Dios rese que jendua cote ra. Sechimbesa chõ jemingo turã nguiã cote. ¹⁰ Emo ia eã ñooño mose huicua ndese, ùquĩ nda nyoĩ tata cuasu. Emo ia eã tuchi mose huicua ndese, hui ra huicua si cote. Dios ra emingo bei cote. —Ahuĩ jirichĩ nguia seicuã si, iã tuchi rae. ¹¹ Sechimbesa oso mose jẽje, jẽya eã tuchi que jẽicuã ndese ra. Nyebe Dios ia tuchi riqui nguiã jendese. Jendua tuchi que ra. —Mbae icuã ngue uresaã eãte resẽ, jenyee eãte que ra. Mbae icuã ndese que jemaee sereã tuchi cote ra. Jẽireĩ ireĩte que equia mbae icuã si ra. Jemaee sete que equia serese ra. Ae siqui ngu ninisi rese nae, aque que jemombo cote ra. Mbae que jesaã turã jate ra. Eicuãte i aroneate que emo nguia jẽje ra. ¹² Ae siqui ngu ninisi rese nae, aque je eã ngue ambesa mondo nguiã. Eru je eã ño ngue eno nde. Jẽ ja je chõ ngue ambesa mondo nguiã. —Pablo riqui nyesecua tuchichĩ nanderese, i ja nonde chõ ngue ambesa mondo nguiã. ¹³ Nyebe ureya tuchi riqui nguiã jendese co cote. Jẽ ngue Tito abe jembia cote ra. Jẽ hui mose mbae icuã si. Seirandu mose ùquĩ ndese que seya tuchi se abe cote ra. ¹⁴ Sã ñi aico jeturã nenei nenei Tito je nyii no. Eĩ jenyee si tuchi equia siqui turãte ùquĩ. Nyebe seireĩ ngũiate riqui nguiã ñee jeni ùquĩ. Acheẽ ñooñoa ngue jeturã nii Tito je ra. Sã aico ñee ñooñoa emo mose jẽje no. ¹⁵ Tito riqui nyesecua i ite jendese co. Ndua beite equia jendese co. Echeẽ nguiatu que jemumbayã tuchi quia ra. Cocheete quiatu que jẽingo ee ra. Jẽisi turãte quiatu que equia ra. ¹⁶ —Ùquĩ nda siqui tuchi Dios rese, ae tuchi se quia jeni co. Co seyate aico jendese co.

8

Jembae jemee jiri quia Dios je

¹ Jesús quiato Macedonia jenda tasenei jêje cote, Seresenda. Hue jenda ja iglesias. Dios turã tuchi que eriqui ùquĩ ja je ra. ² Mbia icuãte que eriqui rei ee ra. Eya beite chõ ngue eriqui ra. Mbaecha reã ndaque. Mbae que emondo tuchi guã Jesús quiato je ra. Mbaecha rã tuchi mbae mondo mbia je. ³ Umbae que emee tuchi ra. Embae tubiriã eã ndaque. Abei tuchi quiatu ngue re. Amae ngue erese ra. ⁴—Ure abe ra urembae uremee tuchi Jesús quiato je, i tuchi que seje ra. ⁵ Mbaechõ eã ngue emee Dios je ra. Nguete rane ngue emee ee ra. Ure je abe que nguico mee nda. Mbae turã naa naa mbei sacua ure je Dios riã. Aquere que umbae mee tuchi Jesús quiato je cote ra. ⁶ Macedonia jenda umbae mee tuchi mose Dios je, urendua que jendese cote ra. Nyebe Tito amondobe quia aque. Tito jembae ofrenda munua nua ja sacua. Sã Tito ñee nyii no. —Tamunua nua ja, sã i no. ⁷ Sã jëingo Dios icua tuchi no. Sã jëingo Dios cheẽ icua jate no. Sã jëaquiatute mbia mbaaquiato no. Sã jëingo sete riqui Dios cheẽ ndese no. Sã jëingo nyesequate serese no. Nyebe jembae jemee tuchi quiatu ofrendarã cote.

⁸—Secheẽ nguire quiatu jembae jemondo Dios je, ae ãte se quia co. Jê ae chõ jendua mbae mee nonde. Jesús rese jenyesequa tuchi mose, jembae ra jemee mee Jesús quiato je. Sã Macedonia jenda umbae mee mee Jesús quiato je no. ⁹ Nandererequa tuchi chõ Jesucristo re. Jesucristo turã jëicuate quia ùquĩ. Mbaecha tuchi rei que ae erico mose ibate ra. Mbaecha reã ngue esaã tuchi u ibii nande je ra. Erĩ ño Dios riqui nguiã mbae mondo tuchi nande je. Ae mbaecha reã naa mose u ibii. ¹⁰ Tacheẽ tuchi rã jêje. Tenda nongue mose que jenduate Jesús quiato mbaecha reã ndese ra. Mbae que jemondo sete quia ee ra. Jê nane ngue “ofrenda nandemondo” jenye Macedonia jenda si ra. Cosete que jeñee ñee. Jemondo turã cote. ¹¹ Ae ra jemondo nae, ùquĩ ja jemondo jei eae. Mbae jemondose jiri quia ee. Sã mbae jemondose ee nyii no. Jembae tubiriã mose, jemondo tuchi ee. Jembae mi mose, co mi jemondo ee. ¹² Nande mbae mo meese mose, Diobi tuchi chõ ùquĩ nde. —Mbae tubiriã embu seje, iã nda Dios mbaecha reã je. ¹³—Jembae jemondo ja tuchi mbaecha reã je, ae ãte quia jêje co. ¹⁴ Sã jembae nyiabiã jiri mbaecha reã mbae rese. Sã jembae tubiriã namo no. Eme sacua ùquĩ je. Emo mose ra ùquĩ mbae tubiriãte no. Emondo sacua jêje jembae eã mose no. Ùquĩ mose ra jembae nyiabiã jiri ja cote. ¹⁵ Sã embesa ji riqui ñee no: Ae mbae tubiriãte nae, embae rire eãte que ra. Ae embae miite nae, embae que ua eãte ra, i que embesa ji ra.

Tito ra nyoj jendea, i Pablo

¹⁶ Sã aico ndua tuchi jendese co no. Eĩ si tuchi Dios quia Tito mundua jendese co. Nyebe aico nguiã gracias ite Dios je co. ¹⁷ Tito si quia jendea aque. Secheẽ nguire achõ eã esi nguiã jendea aque. Ae abe que ndua jendese ra. ¹⁸ Tito rese Jesús quiato mo amondo quia jendea aque. Jesús quiato ñee turã jate quia aque riã aque. Jesús cheẽ nguiatu esenei senei mbeite nguiã aque. ¹⁹ Jesús quiato que aque irabo ra. Oso sacua serese. Ofrenda munua nua sacua serese. Sã ureico ofrenda munua nua Dios mbia sacua no. Mbia “abei” i sacua jêje. ²⁰ Ae que siqui beite urerese ofrenda isi isi mose ra. Mbia ñee icua eã sacua ure riã. “Ofrenda que embuquiachã nda”, i eã sacua mbia ureriã. ²¹ Mbae ursaã turãse rete quia ã. Dios ia tuchi sacua ure rese. Mbia abe ñee

icuaã eã sacuaã ure riĩ. ²² Ure resenda mo abe ure mondo quia ũquiĩ ndese aque. Ae quiarei mbae raã naase bei Dios je. Oso sete equia jendea co. ²³ Tito rei seresenda tuchi. Siqúi bei que equia serese Dios cheẽ nenei nenei mose ra. Ae nyoĩ quia jendea Tito rese nae, iglesias chõ emondo nguiã jendea ũquiĩ. Cristo quiato tuchi chõ ũquiĩ nde. ²⁴ Ũquiĩ jëisi turã ja chõ jë. Sã ure cheẽ ee jeniĩ nyii no. —Jëisi turã ndae. Nyesequa tuchi ra jendese, ure que ee nyii ra. Nyebe jëisi turã ño. Eĩ nda iglesias jenda ja abe “eturã” i jeniĩ.

9

Jembae ofrenda jemunua ja rã emondo sacuaã mbaecha reã je

¹ Aete aico embesa eã jëje ofrenda riĩ. —Ae ae chõ nda mbae mo mondo nguiã Jesús quiato je, se ñee mose rocoĩ ee, ae que se ra. ² Jë ae chõ mbae jemondose nguiã Jesús quiato mbaecha reã je ũquiĩ. Jeniĩ ño aico nguiã ñee Macedonia jenda je co. —Tenda nongue mosenda bei chõ Acaya jenda riqui nguiã mbae mondose Jesús quiato je ũquiĩ, ae se quia Macedonia jenda je jeniĩ co. Nyebe ũquiĩ abe riqui nguiã mbae mee sete ee cote. Jirandure jendese. ³ Aque mbia amondo quia jendea aque. Jë icoquiato sacuaã. Mbae jemondo sacuaã Jesús quiato mbaecha reã je. Ureireite ra jë ofrenda mondo eã mose se ñeende jeniĩ nyii. ⁴ Seso mose jendea, Macedonia jenda mo abe ra nyoĩ serese reae. Jë ofrenda munua eã mbei mose, ureireite ra urecuasẽ mose hue. ⁵ Nyebe ã nane amondo nguiã jendea aque. Jembae ofrenda munua ja sacuaã. Ae riĩ jëñee ndei tenda nongue mose. —Ofrenda jemunua na, ae bei sereãte se. Jë ae chõ ofrenda jemunua nua, jenyesequa mose mbia rese.

⁶ Jendua rã ã ndese: Ae mbae mii jiri chitiquia quia, aque ra mbae a ucua mii jiri. Ae mbae chitiquia tuchi quia, aque quia ra mbae a ucua tuchi. ⁷ Mbae ata nandemondose mose nandechiangui re, mbae ata nandemondo chõ. Mbae mii nandemondose mose nandechiangui re, mbae mii nandemondo chõ. —Mbae amondo jirichĩ, nande mose nandechiangui re, eicuãte ũquiĩ. Ae eyate riqui umbae mee mose emo je nae, Dios bite ũquiĩ. ⁸ Dios quirãcuã tuchite riqui co. Mbae emondo ja arõte quia nande je co. Mbae ua eã mbei sacuaã nandesĩ. Mbae nandemondo mondo bei sacuaã Dios quiato mbaecha reã je. ⁹ Sã embesa ji riqui ñee no:

Mbae que Dios quiato mondo mondo bei quia mbaecha reã je ra.

Echisaã turã si ra mbia tesarei eã mbei,

i que embesa ji ra. ¹⁰ Dios chõ mbae eĩ mondo nguiã nande je etiquia sacuaã. Dios chõ mbae mondo nguiã nandechiurã no. Dios chõ “jabei chõ jë jë!” i nguiã nande je. Dios chõ mbae mee nguiã nande je emondo sacuaã mbia mo je. ¹¹ Dios ra mbae mondo tuchi jëje. Eĩ nda jë mbae jemondo tuchi ofrendarã. Se jëñimee ofrenda mondo mose mbaecha reã je, gracias i tuchi ra Dios je cote. ¹² Nande mbae mo mondo mose Jesús quiato mbaecha reã je, quiaru turã jiri ra equia cote. Ũquiĩno eã nda esaã nguia. Gracias i abe ra Dios je. ¹³ Jë mbae mo mee mose Jesús quiato mbaecha reã je, mbaecha reã nda ñee turã Dios je jeniĩ cote. —Cristo cheẽ emumbayã tuchi quia ã, i ra jeniĩ cote. —Eriqui mbae mee tuchichĩ mbia ja je, i ra ñee turã jeniĩ cote. ¹⁴ Mbaecha reã nda ñee tuchi jeniĩ Dios je cote. Dios jendeaquiato sacuaã. Mbaecha reã nda ndua tuchite jendese cote. Jë mbae mondore ee nyii. ¹⁵ Dios quiato que mbae turã tuchi mondo nande je ra. Nyebe nandeico nguiã gracias i ee.

10

Mbia mbaaquiату sacuã ño Dios sem# nguia

¹ Se rei Pablo. Tacheẽ nyecua jêje. Nandeico mingue chõ nguia Cristo rã si jê. Cochee chõ nandeico Cristo rã si jê. —Cochee chõ Pablo riqui nguia siqui mose nanderese. Siqui eã mose nanderese, ucuasu esaã saã ño nguia aque, jenye chõchĩ equia serĩ ùqui. ² Mbae jêsaã turã turã ja chõ nguia. † nda acheẽ asi asiã jêje seso mose jendea. Emo emo ñee icuã ño nguia serĩ. —Dios je eã ño Pablo riqui nguia mbae raã naa, i serĩ. Ùqui je quiatu acheẽ asi asi arõte nguia. ³ Mbia chõ ndaque se. Mbia quirãcuã je eã ño aico nguia mbae raã naa co. Dios quirãcuã je chõ aico nguia mbae raã co. ⁴ Sequirãcuã je eã ño aico nguia mbae raã. Dios quirãcuã je chõ ñene. Nyebe aico nguia mbia icuã ndiquisã quisã co. Mbia icuã quirã cuãteraque. ⁵ Ae mbia mundua icuã icuã nguia Dios rĩ nae, ùqui asiquisã quisã ño nguia co. Mbia amundua turã ja quia Cristo rĩ co. Cristo cheẽ mumbayã sacuã cote. ⁶ Jê nane Dios cheẽ jemumbayã na jê. Aquere ra Dios cheẽ mumbasa amombo ja cote.

⁷ Mbia chiangui renda rese jemaẽ ate. Earonda rese chõ jêingo nguia mae. —Cristo mbae chõ se re, i mose emo, ae m# eã ño Cristo mbae re. Se abe chõ ñene. ⁸ Se ecuasã raã naa mose, seireĩ nguiaate. Dios quiatu ngue sem# nguia ererecuarã. Jembaaquiату turã sacuã ño ngue Dios sem# nguia ererecuarã. Jem#icuã sacuã eã ño ñene. ⁹ Jaembusiquiche sereãte sech#mbesa je. ¹⁰ Mbia ñee icuãte raque seje. —Pablo reco mose isho, ñee asi asite equia ucheẽ mbesa mbesa mondo nande je co, i jemo nguia serĩ ùqui. —Siqui mose nanderese, ererecuã raã naa aquiатуate cote, i jemo nguia serĩ ùqui. ¹¹ Ae ñee nguia ùqui nae, ùqui je tacheẽ. Co secheẽ asi asi ambesa mondo quia jêje aque nae, anyae sí ra ñee asi asite seso mose jendea huee. Secheẽ mbesa ji ra achabiã seso mose jendea huee. ¹² Ae ñee mbeite quia uturã nã, ùqui na eã ño se re. —Aque rã si chõ aico nguia se co, i beite equia ùqui. —Seturãte aico aque si co, i beite equia ùqui no. Ùqui ñee mose ùqui, earacuayãte riqui ùqui.

¹³ Seturã nda asaã saã eã. Dios ae chõ “hue eso, pe eso”, i nguia seje co. Ae chõ ngue semondo nguia jendea. ¹⁴ Se rane ngue Dios semondo jêje Cristo cheẽ nenei nenei sacuã nda. Nyebe hue jenda ja sembaerã, se embaaquiату sacuã Dios cheẽ ndese. Ae Dios riqui “hue eso” i ate seje nae, huee ra asoã. ¹⁵ —Sech#mbaaquiату chõ ùqui nde, ae aronea tuchite quia emo ñimbaaquiату je co. Jê Cristo icua i i tuchi mose, jendobeinda quia ra ambaaquiату i i tuchi oso cote reae. ¹⁶ Seso sete jendobei Cristo cheẽ nenei nenei hue jenda je. Sech#mbaaquiату ae aroneate emo ñimbaaquiату je. ¹⁷ Emo ñee turãse mose mbae mo n#, sã Dios rĩ nguia ñee turã. ¹⁸ Ae uturã saã saã nguia nae, Dios biãte ùqui. Ae rĩ nguia Dios riqui ñee turãte nae, ùqui nguia Diobi tuchi re.

11

Mbia mbaaquiату icuã icuãsa rese ra jêingochĩ

¹ Jeñimbirãcuã jiri se ñee mose jêje jê. Seturã tasaã saã jiri ñee jêje. ² Aqueteãte jendese jê. Dios mbaerã jê, ae que se ra jê. Sã acuan# mo ndiqui siqui eã mbei ngu mo ndese no. Sã mbia emee acuan#ndu mo je cote no. Eĩ tae si chõ jemeo Cristo je. Cristo m# mbaerã nda jê cote chã. ³ Sã mbei Eva mbiãrĩ irĩ cose no. Eĩ jenye si arõte jê ndeae. Eĩ si arõ mbia jem#cha Cristo icha si. Jemundua icuãte chõ nda reae. Cristo m# ndese chõ jêingo jê. Sã acuan#

ndiqui ngu m̄i ndese no. ⁴ ¿Mbaerã jenyiisaquia turã mbia jembaaquiato icuã icuã mose re? Mbia Jesús abareã nenei nenei mose jêje re. Mbia Espiritu Turã abareã abe renei nenei mose jêje re. Mbia Jesús cheê turã abareã nenei nenei mose jêje re no. Se que ũquí asenei senei âte quia jêje resê. ⁵ ũquí ñee ndese que jenyiisaquia, ¿mbaerã nda jenyiisaquia eã secheê abe rese re? Se quia Jesús cheê aicua tuchi quia ũquí si co resê. ⁶ Secheê turã eãt e raque. Seaquiato quia aico nguiã Dios cheê ndese co. Jêingo seicuate ũquí ndesê.

⁷ —Mbae jemondo seje, ae âte que se quia Dios cheê nenei nenei mose jêje ra. ¿Eicuâte ũquí nde? Aico mingue que se quia jêje ra. Jêingo turã sacua Cristo rese. ¿Eicuâte ũquí nde no? ⁸ Seico mose jendese jembaaquiato quiato mose, mbae mo ngue jemee âte quia seje ra. Jesús quiato ishonda quiato que mbae mo mee mee nguia seje ra, se siqui mose jendese. ⁹ Seico mose jendese que mbae jemondo eãte seje resê. Sembae eã mose que “mbae embu seje” ae âte jêje resê. Jesús quiato que ngã Macedonia si nae, ũquí nguiato que mbae mee tuchi sembae eã mose resê. “Mbae embu seje” ae eã mbei ra jêje. ¹⁰ Cristo riqui sechiangui re co. ũquí aicuate. Sebite “mbae embu seje” iã mose se jêje. “Acaya jenda que mbae mee tuchi ndeje ra”, i aroneate emo seje jeni. ¹¹ ¿Mbaerã ño mbae aisiã jêsi chã? Achesecua eãte quia jendese reae. Tei. ũquí eã ñene. Achesecuate rei jendese resê.

¹² Mbia ñee eã sacua nda mbae aisiã mbei jêsi resê. Ae Jesús abareã senei senei nguia nae, ũquí ñee eã sacua. “Pablo rã sí chõ ure re” ũquí i eã sacua. ¹³ Cristo cheê nenei neneisa turã eã ño ũquí nde. Mbia mbiirĩ irĩsa chõ ũquí nde. Cristo cheê nenei neneisa raã ñoõño ño nguiã ũquí. ¹⁴ Satanás na sí chõ ũquí ndiqui nguiã ũquí. Satanás uturã saã saã ño nguiã. Angel turã naa naa ño nguiã no. ¹⁵ Ae siqui Satanás ndui nae, ũquí nda uturã saã ñoõño Satanás na sí. Nyebe ra Dios ũquí mbutiã tuchi emo mose.

Pablo mbae rasi saã tuchi

¹⁶ “Earacuayã” jenyechĩ nda seje jê. “Earacuayã” jenye raque seje, seandu rã se. Secuasú tasaã saã mbiirĩ na jêje. ¹⁷ Ae aico ñee jêje namo nae, Dios cheê eã ño ũquí nde. Earacuayã na ño aico nguiã ñee jêje. Secuasú asaã saã ño nguiã ñee jêje co. ¹⁸ Sã mbia riqui ucuasú raã naa jate no. Eĩ tae rã se abe secuasú raã naa jêje. ¹⁹ Jêaquiato rei jê ndeae. Jêingo ñimbiirãcuãte eaquiatoã jê ũquí. Seaquiatoã jê abe jeñimbiirãcuã ño. ²⁰ Ae icuã icuã mbeite riqui jêje nae, ũquí jêingo ñimbiirãcuã mbeite ũquí. Jembuquieĩ quieĩ choõño mose. Jembae mbutiã choõño mose abe no. Ucuasú raã naa mose abe no. Ucuasú mose jêsiba rese abe no. ũquí jê jêingo ñimbiirãcuãte ũquí. ²¹ Se quiato que ũquí asaã saã eãte quia jêje ra. Aico mingue chõchĩ jêje. Acheê asi asi eã ñochĩ jêje. Emo ucuasú raã naa mose, se quia secuasú asaã saã mbite nguiã esi. Earacuayã na ño aico nguiã ñee se co. ²² ¿Hebreos ũquí nde? Se abe chõ ñene. ¿Israelitas ũquí nde? Se abe chõ ñene. ¿Abraham nducucha riiirĩ ũquí nde? Se abe chõ eno nde. ²³ ¿Cristo rimba chõ ũquí nde? Se quia Cristo rimba tuchi esi re. Earacuayã na ño aico nguiã ñee co. Se quia serecoteã tuchite Dios cheê nenei nenei mose esi re. Se quia mbia seiruã nua tuchi nguiã esi. Se quiato ngue mbia sematã matã tuchi nguiã esi. Se quiato ngue mbia seiquia serĩ serĩ tuchi nguiã. ²⁴ Judíos que seiruã nua mbei quia ra. Treinta y nueve azotes bei que eriqui seiruã nua nda. Emo mose treinta y nueve no. Emo mose eĩ

sí no. Cinco veces chee. ²⁵ Ira que euru uru serese tres veces ra. Emo mose que sei sei sita je ra. Tres veces que barco ñimi ama ndiite re seje ra. Emo mose que aitō ama ndiite re barco eã nda. Abebi chō ngue sequia ra. Nyaashĩ mĩ abe que amumba quia mbebi ra. Barco ñimi mose seje. ²⁶ Acuata tuchi que sequia ra. Mbae icuã ngue sequia arō arō tuchi quia ra. Secuata mose ama ndui. Seico mose abe sucha cuasu no. Seico mose turuquia rĩ no. Mbia mbae mbuquiachãsa que sequia arō arō tuchi quia no nda. Seresenda abe que sequia arō tuchi no nda. Judíos eã abe que sequia arōte no nda. Jesús quiato chooño abe que sequia arōte no nda. ²⁷ Serisirō ngue nyichuarō arō tuchi quia ra. Aqueã mocoĩ mocoĩ tuchi que se quia no nda. Seriãcuã mocoĩ mocoĩ tuchi que eriqui ra. Seisei abe tuchi que eriqui ra. Nyiiseĩ ngue airara mocoĩ mocoĩ tuchi quia ra. Seirao eã tuchi que eriqui no nda. ²⁸ Ūquĩ mĩ eã ngue ra. Jesús quiato rese abe que aico ndua ndua ra. Sã iglesia jenda ja ja siqui tuchi Jesús rese, ae beite sequia ndua co. ²⁹ Jesús quiato mo mbae rasi raã mose, se abe seya eã ndasite riqui erese co. Emo icuã icuã mose Jesús quiato mō je, se abe paama i rasite aico co.

³⁰ Sequirãcuã ndese eã nda seya riqui nguiã. Sequirãcuã nea ndese chō nda seya riqui nguiã. ³¹ Acheẽ ñooño eãte quia co. Dios quia secheẽ icuate nguiã. Jesucristo ru chō Dios re. Sã mbia riqui ñee turã mbei erĩ. ³² Aretas resenda que serequia rei Damáscoo ra. Sei quia sacuã. Ae que alcalde ra. Ae que mbia mondo rei eiquesa raarō nda. Setarō nda eña nde. ³³ Hue rĩ ngue asoã mbei ra. Mbia que sembuquichi imbu irairu ye ra. Ventana ni. Eĩ ae que oso chee mbia icuã si ra.

12

Pablo ibatenda tea cuu

¹ Secuasu asaã saã ñochĩ nguia co. Ae rese Dios semumae mae mbeite cuu nae, ūquĩ nguiatu tasenei jêje. ²⁻³ Cosete que Dios sererao ibate cuu ra. Hace catorce años. Serete resebe Dios sererao reae. Seaĩ achō ere no ae. Aicuayãte se. Dios ae eicua nguiã. ⁴ Dios que sererao ibate ra. Huee que ibatenda cheẽ turã achandu ra. —Ae erechandu nae, ūquĩ nda ereseneichĩ mbia je, i que Dios seje ra. ⁵ Ibatenda cheẽ andure secuasu asaã saã arondete raque se. Sequirãcuã je ra secuasu asaã saã eã. Sequirãcuã nea ndese chō seya riqui nguiã. Sequirãcuã nea mose quia Dios uquirãcuã mee tuchi nguiã seje cote. ⁶ Secuasu ra asaã saã ndaque, asaã ñooño eã ño se re. Dios quia que uquirãcuã mee seje ra. Mbae ja raã sacuã. Secuasu ra asaã saã eãte jêje. Jê ae chō nda jemaie nguiã serese seicua nonde. Jê ae chō nda secheẽ jeñandu nguiã seicua no. ⁷ Ae rese Dios semumae cuu nae, ūquĩ eturã tuchite seje. Ūquĩ ndese maende que aico secuasu raã naa arōte raque ra. Nyebe Dios nyu raanguia mondo nguiã sequi rĩ. Satanás sembecoteã sacuã. Dios semingo tochi sacuã. ⁸ —Nyu raanguia esiqui sesi, ae tuchi rei que Cristo je tres veces ra. ⁹ Cristo que ñee seje ra. —Coche rei ñene. Sã ñiño ndei. Seturã nguiatu amondo mbeite nguiã ndeje co. Ndequirãcuã nea mose quiatu sequirãcuã amee tuchi nguiã ndeje, i que Cristo seje ra. Nyebe seyate riqui nguiã sequirãcuã nea ndese co cote. Ūquĩ mose quia Cristo riqui nguiã uquirãcuã mee tuchi seje co. ¹⁰ Nyebe seyate riqui nguiã sequirãcuã nea mose. Mbia ñee icuã mose abe. Mbia icuã icuã mose seje abe. Mbae eã mose seje abe no. Se mbae icuã irara mose Cristo rĩ abe no. Ūquĩ ja mose seyate riqui co. Cristo quiatu uquirãcuã mee tuchite nguiã seje, sequirãcuã nea mose.

Jeñia jembitirõ se oso nonde jendea, i Pablo

¹¹ Sebiãte raque se sí ñee turã mose serĩ. Jẽ nguiatu jeñee turã mbite raque serĩ, mbia ñee icuã mose seje. Ae rui jẽingo nae, ùqui eaquiatu ãte riqui sesi ùqui. Seaquiatu eã ndaque se abe. Ae rui jẽingo nae, Jesús cheẽ mbuchecuasa chooño ño ùqui nde. ¹² Dios cheẽ mbuchecuasa tuchi chõ se re. Seico mose jendese. Aico minguede que sequia seico mose jendese ra. Mbia mae sayã ngue asaã saã tuchi quia ra. Dios quirãcuã ngue siqui tuchi quia serese ra. ¹³ Aico turãte que sequia jẽje ra. Sã aico turãte iglesias ataque jenda je no. Eĩ si. Jẽ mĩ je chõ ngue “mbae jembu seje” ae eã nguiã. ¿Ùqui eicuãte jẽje re? “Mbae jembu seje”, iã mose jẽje.

¹⁴ Aico icuquiatu oso nonde jendea a. Co rei tres veces co cote. Co aico oso jendea co. “Mbae jembu seje” aeã tuchi ra jẽje. Mbae achosei chiãte jembae. Jesús rese jẽingo mose, ùqui mĩ ño achosei nguiã. Jendu rã ño aico nguiã jẽje. Sã mbia riĩri ndiqui mbae mo mondo mondo eã ngu je no. Sã eru chõ ndiqui mbae mondo mondo nguiĩri je no. ¹⁵ Sembae amondo ja bite raque jẽingo sacuã Cristo rui. Sereco abe amondo bite raque jẽingo sacuã Cristo rui. Sechesequa tuchi mose jendese, ¿mbaerã jẽingo nyesequa eãte serese jẽ nde? ¹⁶ “Mbae jembu seje”, ae ãte que sequia jẽje. Ùqui jẽicuate raque. ¿Mbaerã nguia jẽingo ñee ñooño nde? “Pablo que nandembĩĩri irĩ nda”, ¿mbaerã jenyere? ¹⁷ ¿Mbaerã jeñee ùqui nde? Ae amondo jẽje jembaaquiatu sacuã nae, ùqui abe que jembĩĩri irĩ eãte resẽ. Ùqui ngue jembae isiãte sembaerã ndesẽ. ¹⁸ Tito que amondo jendea nanderesenda rese resẽ. Ae abe que jembae isiãte resẽ. Se rã si chõ ngue eriqui jẽje resẽ.

¹⁹ Achiquisã eãte sequia jẽsi co resẽ. Dios resaa chõ aico nguiã ñee jẽje. Cristo rĩ ño aico nguiã ñee jẽje. Se mbae mo naa mose jẽje, jẽingo tuchi sacuã Cristo rese chõ ñene. ²⁰ Seso mose jendea, sembia eã arõte. Ae sebite se, ùqui jẽsaã eã arõte seje. Ae jembite nae, ùqui asaã eã arõte se abe jẽje. Jeñee icuã icuã nda jenyere serésaa reae. Jẽingo icuã icuã ja ra jenyere reae. Jenongue mbae ra jenyosei chousei jẽ sí chõ ndeae. Jenguasu ra jẽsaã ñooño sésaa reae. ²¹ Seso mose jendea ra Dios sembia eã tuchi se mae mose jẽicuã ndese reae. Seireite ra jẽicuã ndese mae mose. Jẽicuã cose ndare si jẽhui eã mbei chõchĩ namo nyee. Ae jeninisiã nae, ùqui ndese jẽingo bei chõchĩ ùqui. Ae jendu eã nae, ùqui ndese abe jẽingo bei chõchĩ ùqui no. Mbae aba ireingua rese jẽingo bei chõchĩ ùqui.

13

Hui bei Pablo saludar i mbia je

¹ Aso quia jendea aque cote. Co rei tres veces co cote. Emo mĩ sembiirandu mose mbae icuã ndese, achanduchõ nda se. Emo nyeremo ñee mose, aque mose quiatu ra echeẽ achandu cote. ² Ae eicuã saã saã nguia nyii nae, sã aico ñee asi asite ee nyii no. Ùqui sí je chõ aico nguiã ã mbesa ã. Huiacuã ndecha eã mose ra achimbirãcuã eã ee cote. Jẽ ja je chõ aico nguiã ñee ùqui. Seico mose raanguia jendese. ³ —¿Ma Cristo quirãcuã ndiqui Pablo rese ma nde? jenyere equia nyii nae. Cristo quirãcuã ndese ra jemaẽ secheẽ asi mose quiatu jẽje cote. Cristo que mbae saã ja tuchi jẽje uquirãcuã je ra. ⁴ Cristo mbia mbucha quia ira rese iquã nyii nae, aque mose que quirãcuã neate rei ra. Dios quirãcuã nguia emingo bei nguiã co cote. Sã Cristo quirãcuã nea ndei nyii no. Eĩ ño urequirãcuã nea ure namo nde. Ureico rei nguiã erese co. Ae chõ

uremingo nguiã Dios quirãcuã je co. Ae quirãcuã je ra ureico jembaaquiату quiatu.

⁵ Jẽ ae chõ jendua. —¿Cristo aicua quia sechiangui re re? jenyẽ ja ja chõ jeñiangui re. Jemae nguia jenyiese sí. Jẽ Cristo icua chooñoa mose, Cristo riqui jeñiangui re ùqui. ¿Ùqui ndese jẽingo iranuate re? ⁶ Ure quia Cristo ureicua chooñoa nguiã ã. Ùqui ndese nda jẽirandu rã seje chã. ⁷ Urecheẽ tuchi quia Dios je jeniã. Jẽ mbae icuã naa eã sacuã. Mbia ndua turã sacuã eã ure rĩ ño ureico nguiã ñee Dios je jeniã. Jẽ mbae icuã naa eã sacuã ño ñene. Mbia ra ñee icuã ndaque ure je. ⁸ Mbae icuã mo nandesã aroneate Dios cheẽ ndobeishĩ. Mbae turã nguiatu nandesã Dios cheẽ mose. Dios cheẽ nguia ichõiño eã nde. ⁹ Coche mbia riqui nguiã ñee icuã icuã ure je. Jẽ nguia jẽingo bei Cristo quirãcuã ndese. Jẽ nda Cristo jẽicua tuchi rã seje chã. ¹⁰ Secheẽ asi asi ambesa quia seso nonde jendea a. Se ñee asi eã sacuã seico mose jendese. Dios quiatu ngue uquirãcuã mee nguiã seje. Jembãicuã sacuã eã ño ngue Dios uquirãcuã mee nguiã seje. Jemingo tuchi sacuã Cristo rese chõ ñene.

¹¹ Aico hui secheẽ mbesa mbesa si a cote, Seresenda. Jesucristo jẽicua tuchi quia. Jẽya bei tuchi jẽingo erese. Jẽingo turã mbei chõ nguia jenyiese. Ùqui mose ra Dios siqui tuchi jendese. Ae ra jemingo turã mbei jenyiese. ¹² Saludar jenyẽ turã mbei quiatu quia jenyue. ¹³ Jesús quiato a jenda saludos mondo quia jẽje aque. ¹⁴ Sã Jesucristo turã ndiqui bei jendese. Sã Dios riqui nyesecua tuchi jendese. Sã Espíritu Turã ndiqui bei jendese no. Amén.

LA CARTA DEL APOSTOL SAN PABLO A LOS GÁLATAS

llo ucheẽ mbesa mondo Galacia jenda je

¹ Pablo chõ se re. Jesucristo chiirabo chõ se re. Mbia mo ngue seirabo eã nguiã. Dios ae chõ ngue seirabo ra. Ucheẽ nenei nenei sacuaã. Ae sí que Jesucristo raaque mbuquera ra. ² Seresenda ja rese chõ aico nguiã ã mbesa jêje a. Jesús quiato Galacia jenda ja je.

³ Sã Dios turã ndiqui bei jendese. Sã ae riqui jembia bei. Nanderu chõ ae re. Sã Jesucristo turã abe riqui jendese. ⁴ Ae quiatu ngue mano nguiã nandeicuã ndibishorõ. Nandembui sacuaã mbae icuaã si. Ae icuaã ndese nandeico mae mae nae, ùquiã si. Nanderu cheẽ nguire chõ ngue Jesucristo mano nguiã nande je. ⁵ Sã mbia riqui ñee turã mbei Dios je. Amén.

Cristo mii mbia rirõsa huicuaã si

⁶ ¿Mbaerã jẽingo hui hui jei Dios si ùquiã nde? Ae sí chõ ngue “jẽingo Cristo turã ndese” i jêje resẽ. ¿Mbaerã jẽingo Cristo cheẽ abi abi re? Siqui emo ñee ndese re. ⁷ Nyeremo eã ño Cristo icha ñeenda re. Uturã mii je chõ Cristo riqui nguiã nandemingo bei. Nandechisaã turã je eã ño Cristo riqui nguiã nandemingo bei co. —Nandechisaã turã je ra Cristo nandemingo bei, i chõchĩ mbia nguiã jêje ùquiã. ⁸ Acheẽ se quia jêje nyii nae. —Uturã je achõ ño Dios riqui nguiã nandemingo bei co, ae se quia jêje nyii nae. Eĩ mbei chõ ñene. —Hue rĩ eã ño Dios icha re, i mose emo jêje, sã Dios ùquiã mbasi tuchi. —Hue rĩ eã ño Dios icha re, se abe i mose, sã Dios sembasi tuchi se abe. Angel ibatenda abe mbasi rae, ùquiã ñee mose. ⁹ Acheẽ namo ngue jêje, ùquiã taseneimbe jêje: —Nandechisaã turã je chõ Dios riqui nguiã nandemingo bei co, i mose emo, sã Dios ùquiã mbasi tuchi. Ae acheẽ jêje nyii nae, ùquiã abi tuchi chõ eriqui nguiã ñee ùquiã. ¹⁰ “Sã mbia riqui turã seje”, ae ãte quia co. “Dios ae chõ nda seisi turã nguiã”, ae chõ nguiã co. “Sã mbia riqui turã seje”, se i bei mose, eĩ nda Cristo rimba eãte rei se.

Cristo chimbaaquiatu chee que Pablo ra

¹¹ Tacheẽ nyecua jêje, Seresenda. Dios icha asenei nguia jêje nae, secheẽ ae eã ño ùquiã nde. Mbia cheẽ ae eã ño eno nde. Dios cheẽ ae chõ ñene. ¹² Mbia mo ngue esenei eãte seje ra. Jesucristo mii ño ngue esenei nguiã seje. ¹³ Jẽirandu que equia serese cose resẽ. Jesús icuayã mose se nyii. Seico mose judíos ramei ñee ndui. Siqui rocoĩ Jesús cheẽ ndui. Seicuaã tuchite que eriqui Dios quiato je nyii ra. “Jesús quiato tambutiã ja tuchi”, ae que se quia aque mose ra. ¹⁴ Moisés cheẽ ndui que aico tuchi rei quia mbia ja si ra. ¹⁵ Aquere que Dios seisi Jesús quiatorã cote ra. Dios que seirabo cose seã mose nyii ra. Uturã je que seirabo ra. ¹⁶ Dios que nguiriĩ teacuquia seje cote ra. Se Dios ririĩ nenei nenei sacuaã judíos eã je. “¿Mañi ae ra se re?” ae eã ngue oso ñee mbia mo je ra. Dios nguiriĩ ndeacuquia mose seje. ¹⁷ Jerusalén abe que asoã ño nda. “¿Mañi ae ra se re?” ae eã ngue oso hue jenda Jesús chimbaaquiatu ñiinda je no nda. Arabia que aso jei se ae ra. Aquere que aso nyebi Damasco ra.

¹⁸ Tres años mose ramo ngue aso Jerusalén cote ra. Pedro rea que aso aque mose ra. Huee que aico erese quince días ra. ¹⁹ Jacobo abe rese que

amae huee ra. Jesús nongue que ae ra. Ũquí mii ndese que amae Jesús chimbaaquiato ra. ²⁰ Acheẽ ñooñoa tuchi chõ nguiã ã mbesa jêje a. Dios secheẽ ñandute quia co. ²¹ Jerusalén ngue asecha oso Siria cote ra. Cilicia abe no. ²² Jesús quiato Judea jenda que seicuayã mbeite quia aque mose ra. ²³ Jirandu randuchõ ño ngue equia serese ra. “Ae icuã icuã ndiqui Jesús quiato je nyii nae, aque riqui Jesús renei nenei co cote. Mbia Jesús icua sacuã”, i que equia jirandu randu serese ra. ²⁴ Nyebe eyate riqui nguiã serese cote. Ñee turã turã Dios je.

2

Cristo chimbaaquiato ataque Pablo isi turã

¹ Catorce años mose ramo ngue asobe Jerusalén cote ra. Bernabé rese. Tito abe que arao serese ra. ² Dios ae que “eso Jerusalén” i seje ra. Huee que acheẽ nyecuayã Jesús quiato rerecua ja je ra. Ae asenei senei mbeite quia Dios cheẽ judíos eã je co nae, ũquí nñi ngue acheẽ ja Jesús quiato rerecua je ra. Ũquí secheẽ icua sacuã. Ũquí sembaaquiato sacuã se Dios cheẽ abi mose. ³ “Circuncisión nandesã na Tito je”, i ãte que Jesús quiato rerecua quia ra. Judío eã ndaque Tito. ⁴ Jesús quiato chooño abe que chi hue Jesús quiato tuchi mumbara mbara ra. Ndua ndua rei que equia ra. Ure mbae icuã naa naa sacuã ndaque. “Sã circuncisión naa naa Moisés cheẽ ndui”, i rei que equia urerĩ nda. Ebiã tuchi que eriqui ureico mose Cristo mii ndese ra. “Sã eriqui judíos ramei ñee ndui bei”, i chõ ngue equia ra. ⁵ Ũquí ñee ngue uresiquisã tuchi quia ra. Jẽingo bei sacuã Dios cheẽ turã mii ndese. “Jesucristo turã ae nandemingo bei nguiã co”, jenye sacuã. Jẽingo rocoi judíos rerecua cheẽ ndui. ⁶ Dios quiato rerecua que sembaaquiato quiato eãte mbae mo nñi nda. “Ã abe esenei senei nguia judíos eã je”, i ãte que ererecua seje ra. Dios quiato rerecua tuchi ũquí ndeae. Aicuayãte se. “Ererecua achõ ño taisi turã”, i ãte Dios. Nandechiã ndese quia eriqui nguiã mae ja. ⁷ Jesús quiato rerecua iate que serese ra. Se Dios cheẽ nenei nenei mose judíos eã je. Ererecua que ñee nyue ra. —Sã Dios Pedro mondo judíos je no jẽ. Dios cheẽ nenei nenei sacuã no. Eĩ si chõ Dios Pablo mondo quia judíos eã je re. Dios cheẽ nenei nenei sacuã ee re, i que ererecua ñee nyue ra. ⁸ Sã Dios Pedro mondo judíos je no. Dios sí chõ ngue semondo nguiã judíos eã je no. Se echeẽ nenei nenei sacuã ee. Dios ũquí mingo bei nonde. ⁹ —Dios chõ Pablo mondo quia judíos eã je re, i ja que Jesús quiato rerecua ja cote ra. Jacobo. Pedro rese. Juan ndese. Nyebe eriqui nguiã seo isi isi. Bernabé o abe isi no. —Coche jẽingo nguiã Dios cheẽ nenei nenei judíos eã je. Ure Dios cheẽ nenei nenei mose judíos je, i que ñee turã ja ure je ra. ¹⁰ —Mbaecha reã je chõ jẽingo mbae mondo mondo, i mii ño ngue ure je ra. Ũquí ño asaã saã mbei rei nguiã co.

Pablo ñee asi Pedro je Antioquíaa

¹¹ Pedro tu mose Antioquíaa, acheẽ asite que ee ra. Mbae icuã nguiatu que esaã huee ra. ¹² Quiaru turãte que equia judíos eã ndese nyii ra. Aquere que judíos mo ngaẽ ngasẽ cote ra. Jacobo resenda. Pedro que quiaru sereã judíos eã ndese cote ra. Eireite que judíos si ra. Nyebe nyiicuasẽ nguiã judíos eã si cote. Ucuasu raã naa esi cote. Judíos abe raque Jesús quiato. ¹³ Nyebe Jesús quiato judíos abe nyiicuasẽ nguiã judíos eã si cote. Pedro rui sí. Ucuasu raã naa judíos eã si cote. Bernabé abe chee que nyiicuasẽ judíos eã si cote

ra. Pedro rui si no. ¹⁴ Dios cheẽ ndui si eã ño ngue Pedro riqui nguiã. Judíos nguesenda rese. Nyẽcuasẽ mose judíos eã si. Nyebe acheẽ asi nguiã Pedro je mbiãsaa. —Nde Jesucristo icua mose, erehũ que judíos ramei ñee si cote ra. Judío raque nde. ¿Mbaerã ereico ñee judíos eã je re? “Judíos ramei ñee ndui jẽingo”, i ee re.

Judíos abe ra siqui bei Jesucristo icua mose

¹⁵ Judíos chõ ndaque nande. Judíos eã na eã ndaque nande. Mbia icuã na eã ndaque nande. ¹⁶ Emo mii siqui turãyã mbeite quia Moisés cheẽ ndui si co. Dios emingo bei sacuã. Moisés cheẽ mumbasa ja tuchi chõ nande re. Jesucristo icua mose quiatu ra Dios nandemingo bei. Nyebe nandeico nguiã Jesucristo icua ã. Dios nandemingo bei sacuã. Moisés cheẽ ndui si nandeico eã ndaque, ae que ee ra. ¹⁷ “Cristo que mano nandeicuã nĩ nda”, nande bei equia ã. ¿Ūquĩ ño nandembĩcuã nguia re? Tei. Cristo riqui nandembĩcuã eã mbei co. Cristo quiatu nandembirandu quia nandeicuã ndese co resẽ. ¹⁸ Se Jesucristo icua mose, judíos ramei ñee si que ahui cote ra. Se siqui si mose erui, eicuãte ũquĩ cote. ¹⁹ Moisés cheẽ ngue aicuate rei ra. Ūquĩ ngue seicuã mbutiã eã mbei ra. Moisés cheẽ sí chõ ngue sembiirandu Jesucristo rese cote ra. Jesucristo que seicuã mbutiã cote ra. Seico bei nonde cote. ²⁰ Cristo mano mose, se abe que amano erese ra. Se ae aicoã nguiã co cote. Cristo riqui sechiangui re co cote. Equirãcuã je chõ aico nguiã mbae rãã naa co. Dios riĩrĩ aicuate quia co. Ae chõ ngue nyeseuca tuchi nguiã serese. Ae chõ ngue mano nguiã seicuã nĩ. ²¹ Dios turã aisiteã teã eãte quia co. Moisés cheẽ mumbayã mose eã ño Dios riqui nguiã aba icuã mbutiã. Ūquĩnde rae, Jesús manoño.

3

Moisés chimbesa aba mingo bei aronea

¹ ¿Mbaerã jẽaquiatuã tuchi riqui re, Galacia jenda? ¿Aba jembaaquiatu icuã tuchi quia Cristo riĩ nde? Cristo mano ngue asenei tuchi rei jẽje resẽ. Jẽisi turãte rei que equia nyii. ¿Mbaerã jẽingo hui serĩ serĩte esi cote re? ² Moisés cheẽ mumbayã mose eã ño Espiritu Turã ique nguiã jeñiangui re. Jẽ Jesucristo icua mose chõ ngue re. Se Jesucristo renei mose jẽje chõ ngue re. ³ ¿Mbaerã jẽaquiatuãte riqui re? Moisés chimbesa que jẽicuã mbutiã eã ndesẽ. ¿Mbaerã jẽingo siqui beite erese re? Siqui rocoĩ Jesucristo mii ndese. ⁴ Mbae rasi que jẽsãã tuchi quia Jesucristo riĩ nyii resẽ. Jẽhui eã ño esi jẽ. Fnda ae rasi jẽsãã nguia nyii nae, ũquĩ iru eã. ⁵ ¿Mbaerã Dios Espiritu Turã mondo jẽje chã? ¿Mbaerã ño Dios mbia mae sayã naa naa jẽje chã? ¿Moisés cheẽ jemumbayãte quiatu quia ee re? Tei. Ūquĩ eã ñene. Jẽ nguia Jesucristo jẽcuate nguiã ũquĩ.

⁶ Sã Abraham no. Abraham ngue Dios icuate quia ra. Nyebe Dios Abraham isi turã nguiã. ⁷ Nyebe Dios riqui nguiã “Abraham nducucha” i huĩcuasa je co. ⁸ “Judíos eã abe ra Dios riĩrĩ icua. Ūquĩ abe ra Dios mingo bei”, i que embesa ji cose ra. “Nderĩĩ nda aico turã mbia ja je”, i que Dios Abraham je ra”, i que embesa ji ra. ⁹ Sã Abraham Dios icua tuchi no. Sã Dios turãte riqui ee no. Ae Dios icua quia namo nae, ũquĩ je abe chõ Dios turã ndiqui nguiã Abraham ndese.

¹⁰ Sã emo ndiqui ñee no. “Moisés cheẽ ndui taico bei Dios semingo bei nonde”, sã emo ndiqui i no. Ūquĩ nda nyoĩ chõ tata cuasu. Sã embesa ji riqui ñee no. “Emo embesa ji cheẽ mumba mbĩrĩ mose, echeẽ mumba tuchi raanguia chõ ũquĩ nde”, i que embesa ji ra. ¹¹ Dios ra ñee jiri jiriã emo nĩ.

“Co que embesa ji cheẽ mumbayã mbei quia ra. Nyebe taisi turã”, i eã nda Dios emo je. Ae je Dios riqui “co taisi turã”, i nae, Dios icuate quiatu nguiã ee ùqui. Nyebe ra ùqui ndeco siqui bei. ¹² “Dios cheẽ mumba eã mbei mose quia ra Dios nandemingo bei”, i mose emo, Dios icuayã ño nguiã ùqui. ¹³ Cristo que nandembui Moisés cheẽ si cote ra. Nande Moisés cheẽ mumba mose, ùqui nda nandemombo eã tata cuasu cote. Cristo quiatu ngue mbae rasi aba ireingua saã tuchi nguiã nande je. Sã embesa ji riqui ñee no. “Aba ireingua tuchi mae mose embucheseco ji ira resenda rese”, i que embesa ji cose ra. Jesús mbucha nonde ira rese. ¹⁴ Dios turã sacua judíos eã je chõ ngue Jesús mbae rasi aba ireingua saã tuchi nguiã. Dios judíos eã mingo bei sacua ño ngue re. Sã Dios turãte riqui Abraham je nyii no nae. Eĩ si sacua Dios turã judíos eã je chõ ngue eno nde.

Dios contrato saã Abraham je

¹⁵ Sã mbia mo ndiqui contrato raã emo je no. Sã firmar i embesa mii no. “Eĩ nguiatu”, i aroneate emo ee cote. Embesa jite quia cote re. ¹⁶ Eĩ si que Dios contrato raã Abraham je no nda. Abraham ndiiri je abe no. “Abraham ndiiri ja je”, i eã ngue embesa ji ra. “Abraham ndiiri je”, i chõ ngue ñee nguiã aque mii je. Cristo rii ño ngue ñee nguiã. ¹⁷ Tacheẽ nyecua tuchi rã jêje. Dios que contrato saã Abraham je cose ra. —Mbae tasaã ndeje. Nderiiri je abe no, i que Dios Abraham je cose ra. Mbesa que aque mose ra. Aquere que Moisés ucheẽ mbesa cote ra. Aquere tuchi 430 años ua mose cote. Moisés cheẽ ngue contrato mbutiã aroneate ra. Dios cheẽte quiatu ngue contrato re. ¹⁸ Dios que ñee Abraham je cose ra. —Mbae tasaãno ndeje. Nde mbae mo naa ndocoi seje, i que Dios ñee Abraham je cose ra. —Nde Moisés cheẽ mumbayã mose quiatu mbae tasaã ndeje, iã ngue Dios ee ra. —Nde mbae mo naa ndocoi, i chõ ngue ee ra. ¹⁹ ¿Mbaerã ño nda Moisés chimbese cheẽ nandechandu chã? Mbã huiãcuã icua sacua ño Moisés chimbese re. Cristo tu mose chõ ngue Moisés chimbese cheẽ ua nguiã. Sã Dios contrato naa Abraham ndiiri je nyii no. Cristo je chõ eriqui nguiã “Abraham ndiiri” i. Dios rane ngue ucheẽ mondo ángeles je ra. Angeles que emondo Moisés je cote ra. Aquere que Moisés embesa mbia je cote ra. Mbã echeẽ mumbayã nonde. ²⁰ Sã Dios contrato naa Abraham je no. Ae sí chõ ngue ñee nguiã Abraham je. “Secheẽ esenei Abraham je”, iã ngue Dios emo mondo ñee Abraham je ra.

Nandeico Cristo icua ã cote; Moisés cheẽ ndui siqui rocoi

²¹ Ae contrato Dios saã Abraham je nae, Moisés chimbese ùqui mbutiã aroneate quia co. Moisés chimbese aba mingo bei arõ mose, ei nda Jesucristo manoate rei. Moisés chimbese aba mingo bei aroneate. Nandechiã abe mbitirõ aroneate no. ²² “Mbã icua ja chõ ñene”, i que embesa ji ra. Nyebe nandemo mbae mo turã naa aroneate siqui bei sacua. Jesucristo icuasa quia ra Dios mingo bei ucheẽ nguire. Jesucristo icuate quia ñene. Mbae mo naa ndocoi Dios je nyii.

²³ Cristo tu nonde que nandeico rei ñee nda. “Moisés cheẽ nandemumbayã” i rei ra. Moisés cheẽ ngue nandemumbayã aroneate quia ra. “Cristo ra tu” i que equia nande je, ùqui ño ngue nandesaarõ arõ ngua ra. ²⁴ Mbã mbaequiatusa rã ño Moisés chimbese re. Mbã mbiirandu que Cristo rese ra. Mbã siqui nonde Cristo mii ndese tu mose cote. Cristo icua nonde. Dios Cristo icuasa isi turã mbei nonde cote. ²⁵ Nandeico Cristo icua ã cote. Nyebe ra nandeicoã Moisés cheẽ ndui cote. ²⁶ Nandeico Jesucristo icua jate ã. Nyebe

Dios riirĩ ja chõ nande re. ²⁷ Nandembucha ji nandeico mose Cristo riĩ, Cristo rã sí chõ nandeico nguiã ã cote. ²⁸ Nande Jesucristo icua ja mose, nyiabiã ja chõ nandeico nguiã ã cote. Judíos ra siqui turã judíos eã je cote. Ererecua ra siqui turã ngũimba je cote no. Mbia ra siqui turã ja nyiese no. Aque mĩ na tuchi chõ nda nandeico ja nguiã Cristo rese cote. ²⁹ Cristo icuasa chõ jẽingo nguiã ũquí. Nyebe Abraham ndiirĩ abe chõ jẽingo nguiã ũquí no. Ae turã nda Dios saã Abraham ndiirĩ je nae, jẽje chõ nda eraã nguiã.

4

¹ Sã mbaecha riirĩ mo no. Sã mbae raã aroneate ae ae uñetẽ mose no. Erimba rã si chõ nda eriqui mbia cheẽ mumba eã. Mbaecha riirĩ ndaque. ² Ae rese eriqui ndua nae, ũquí ndese eriqui aroneate. Uraarõsa nduasa achõ ndese chõ nda eriqui. Ucuasu mose ramõ ño nda eriqui ndua ae ae cote. “Co tasaã”, i cote. ³ Eĩ si chõ nande nyii re. Mbia riirĩ na si. Jesús tu nonde. Mbia cheẽ achõ ndui chõ ngue nandeico nyii ra. Jesús tu nonde. ⁴ Dios que “coche ñene” i cote ra. Ũquí mose que nguiirĩ mondo mbia je íbii cote ra. Dios riirĩ ngue tu mbiarã nda. Moisés cheẽ ngue emumbayã mbei quia eico mose íbii ra. ⁵ Ae que tu nandembui bei Moisés cheẽ si cote ra. Dios nandererequia sacua nguiirĩ na cote. ⁶ Dios riirĩ ño nande cote re. Nyebe Dios Espíritu Turã mondo nguiã nandechiangui re cote. Nyebe nandeico nguiã Paba i tuchi Dios je namo cote. ⁷ Dios riiri tuchi chõ nande cote re. Erimbachõ eã. Nyebe ra Dios mbae mondo tuchi nande je cote ucheẽ nguire.

Pablo ndua tuchi Jesús quiato rese

⁸ Jẽ ngue Dios jẽicuayãte quia nyii ra. Dios abareã ndese chõ ngue jẽingo aque mose ra. ⁹ Ũquí jẽingo Dios icuate ũquí cote. Dios abe riqui jẽicuate co cote. ¿Mbaerã nguiã jẽingo hui serĩte esi cote re? ¿Mbaerã nda jẽingo sí dios abareã nimbarã nde? Dios abareã quirãcuã eãte nyeresẽ. Mbae mo naa aroneate nande je rese. ¹⁰ “Co tenda mbae mo nandesaã Dios je Dios nandesi turã sacua”, jenyẽ chõchĩ nguiã ũquí. “Co nyasi mbae mo nandesaã Dios je Dios nandesi turã sacua”, jenyẽ chõchĩ nguiã ũquí no. Eicuã tuchi chõ ũquí nde. ¹¹ Jaembaaquiato quiatu iru chõ se reae.

¹² Se rã ño jẽingo ae. Sã aico eãte Moisés chimbesa cheẽ ndui sí co no. Sã jẽ abe jẽingo eãte erui nyii no. Sã jẽicuã eãte emo mose seje no. ¹³ Se Jesucristo renei namo mose jẽje, serasite quiatu ngue se aque mose re. Ũquí jẽicuate quia ũquí. ¹⁴ Mbae rasi que asaã tuchite rei aque mose ra. Serasi que jẽucuayã eãte quia aque mose ra. Serasi que jẽisiteã eãte quia aque mose no nda. Angeles que jẽsaã ño seisi turã aque mose ra. Jesucristo que jẽsaã ño seisi turã aque mose ra. ¹⁵ Seisi turã tuchi que se aque mose ra. Jendesa que jemondo bite quia seje aque mose ra. ¿Mbaerã jẽingo secheẽ isi sereãte cote re? ¹⁶ Dios cheẽ ngue asenei turã tuchi quia jẽje. ¿Ũquí je chõ jẽingo seucuayãte cote re? ¹⁷ Ae riqui jembaaquiato icuã icuãte ũquí nae, ũquí siqui sete raque jendese ũquí. Mbae turã ñi eã ño ñene. Jembũcha sacua ure si chõ ñene. Jẽingo sacua ũquí achõ ndese chõ ñene. ¹⁸ Coche rei ũquí siqui jendese Dios cheẽ nenei nenei turã mose jẽje. Sã eriqui jembaaquiato turã turã mbei. Seicoã mose abe jendese. ¹⁹ ¿Mbaerã jẽingo sembia eã tuchi ũquí nde? Jẽhui serĩ serĩ mose Dios turã si. Sã ãquẽ ndasi riqui cuña je no. Eĩ ño seya eã ndasi nguiã jendese co. Jẽingo sacua Cristo rã si. ²⁰ ¿Mañi ae ra se quia jẽje re? Aico rã nda jendese chã. Se ñee tuchi nonde jẽje. Secheẽ mbesa rocoĩ mondo jẽje.

Sã Abraham ndiirĩ nyeremo no

²¹ ¿Mbaerã jëingo ñee nde? “Moisés cheẽ nandemumbayã, Dios nandemingo bei sacuaã”, ¿mberã jëingo i re? Moisés cheẽ jëicuayãte quia reae. ²² Moisés chimbese chõ nandembirandu nguiã Abraham rese co. Abraham ndiirĩ nyeremo ndei que ra. Co mii ngue eninisite riirĩ nda. Sara, i que eninisite je ra. Agar, i que erimba je ra. Aque abe que Abraham nbiirĩ ndei ra. Nyebe Abraham ndiirĩ nyeremo ndei nguiã. ²³ Mbia rã si chõ ngue erimba tiirĩ ee ra. Dios ñeende ee nyii quiatu que eninisite tiirĩ ee ra. —Neninisi ra tiirĩ ndeje, sã Dios i ee nyii no. Ûqui io sacuaã ño eninisite tiirĩ cote ra. ²⁴ Nandemundua sacuaã ño ùqui nde. Contrato rã si chõ Sara re. Contrato mó na ño Agar no nde. Ae contrato Dios saã Moisés je Sinaí no nae, Agar rã si chõ ùqui nde. Ae siqui bei quia ùqui contrato rui nae, mbia rimbachõ na ño ùqui nde. ²⁵ Sinaí rã si chõ Agar re. Arabia jenda chõ Sinaí re. Jerusalén na si chõ Sinaí re. Ae siqui quia Jerusalén nae, erimba rã si chõ ùqui nde. Erimba rã si chõ judíos ja no nde. Jesucristo icua rocoĩ. ²⁶ Jerusalén mo ño chĩ nguiã ibate pe no. Ae mbia hue jenda nae, mbia rimba mo eã ño ùqui nde. Hue jenda chõ nande abe no nde. ²⁷ Sã embesa ji riqui ñee no: Ndeya chõ eico, tiiriã je. Ndeya chõ eico, ãquẽ ndasi raãsa eã. Nderiirĩ nda eretea tuchi cote. Eru chirirõ nguia ra tiirĩ tuchi eru rerecua si cote, i que embesa ji ra. ²⁸ Dios riirĩ tuchi chõ nande re. “Seriirĩ tuchi ra ùqui”, ã i Dios nanderĩ nyii no. Sã ñee Isaac nii nyii no. ²⁹ Sã Dios ñee Abraham je nyii no. “Nderiirina tamondo ndeje Isaac”, sã i ee no. Sã Isaac nyaacuquia Espiritu Turã nii no. Sã Agar riirĩ icua icua Isaac je cote no. Eĩ si chõ namo no nde. Ae siqui tuchi judíos cheẽ ndui nae, ùqui icua icua ndiqui namo nande je ã no. ³⁰ ¿Mañi ño embesa ji cheẽ ña? “Erimba emombo chõ. Eriirĩ ndese. Eninisite riirĩ na eã ño erimba riirĩ nde. Erimba riirĩ siqui aroneate eninisite riirĩ ndese”, i que embesa ji ra. Eĩ si chõ ae siqui tuchi quia judíos cheẽ ndui nae. Siqui aroneate Jesús quiatorã. ³¹ Erimba riirĩ na eã tuchi chõ nande re. Eninisite riirĩ na tuchi chõ nande re. Nande Jesús icua mose.

5

Cristo nandembui Moisés chimbese si cote

¹ Cristo que nandembui Moisés chimbese si cote ra. “Moisés chimbese cheẽ nda semingo bei”, jenyechĩ nda jẽ. Ae ra i ùqui, mbia rimba rã ño ùqui nde. ² Tacheẽ nyecua tuchi rã jẽje. Circuncisión nda jësaachĩ. Moisés chimbese cheẽ ndui ra jëngochĩ cote jẽ. Cristo mii ndese chõ jëingo cote. Jẽ circuncisión naa mose, jëingo turã eã ño nguiã Cristo rui ùqui cote. ³ “Moisés chimbese cheẽ tamumbayã mbei”, i raanguia chõ circuncisión nde. ⁴ “Dios ra seisi turã seico bei mose Moisés cheẽ ndui” i mose jemo, Dios cheẽ abi tuchi chõ ùqui nde. Dios turã si nyicuaasẽ tuchi chõ ùqui nde. ⁵ Espiritu Turã ndiqui nanderese co. Nande Jesucristo nandecuate quia ã. Nyebe ra Dios nandeisi turã Jesucristo mii nii. ⁶ Nandeico mose Jesucristo rese, eĩ ja chõ nande ee re. Ae circuncisión saã nae, ae circuncisión saã eã no nae, eĩ ja chõ nande ee re. Jesucristo icua mose, ùqui nguia eturã tuchi re. Nandechesecua mose mbia rese, ùqui nguia eturã tuchi no nde. ⁷ Jëingo turãte rei que equia nyii. ¿Aba jembui Cristo cheẽ si cote re? ⁸ Dios eã ño ngue jembui nguiã esi.

Dios chõ ngue “jenyu” i nguiã jêje. ⁹ Sã levadura riqui no. Eñetê mondo mose mbichae ye, mbuquiche ja rae. ¹⁰ Dios ra jendeaquiato bei. Mbia mo jembücha eã sacua esi. Ae jembücha seríte quia esi nae, ùqui nda Dios mbasi. Ererecua raque ra emo. ¹¹ “Circuncisión jêsaã na”, ae äte quia mbia mo je co. “Circuncisión jêsaã na”, se i mose, eĩ nda judíos icuã icuã eãte rei seje. Eĩ nda judíos paama i äte rei seje Cristo mano nenei nenei mose mbia je. ¹² Ae “circuncisión jêsaã na”, i quia jêje nae, ùqui nda nguete chisia tuchi rã jendecha chã.

¹³ Jesucristo que jembui Moisés cheẽ si ra, Seresenda. Ae icuã jenyosei chosei quia nae, ùqui ndese ra jëingochi cote jê. Jëingo turã nguiatu quia jenyue. Jenyesequa tuchi quiatu quia jenyiese. ¹⁴ Dios cheẽ ja tuchi chõ ã nde: “Sã ereico nyesequa ndechiese no. Eĩ ere si chõ nyesequa emo ndese”, i que Dios cheẽ nda. Nandechesequa mose mbia rese, Dios cheẽ nandemumbayã tuchi chõ nguiã ùqui. ¹⁵ Paama jenyechi nda jenyue jê. Jenyishi u shiuchi nda eno jê. Ûqui naa naa mose ra jêhui ja ja chee Cristo si.

Ae icuã nandehosei chosei quia nae, ùqui si nandehui

¹⁶ Tacheẽ nyecua tuchi jêje. Espíritu Turã ñee ndui bei jëingo. Ae icuã jenyosei chosei quia nae, ùqui ndese nda jëingoã cote chã. ¹⁷ Ae mbae icuã nandehosei chosei quia nae, Espíritu Turã quiatoã tuchi chõ ùqui nde. Ûqui quiatoã tuchi chõ Espíritu Turã no nde. Ae nandehosei chosei quia, nyebe ra ùqui nandesaã eã. ¹⁸ Jëingo mose Espíritu Turã ndui, “Moisés cheẽ nda nandemingo bei” jenyue eã nda cote. ¹⁹ Ae siqui quia ubi icuã ndese nae, mbae icuã esaã ata atate quia ã. Siqui siqui chõ nguiã ngüinisiã ndese. Cuña abe siqui siqui chõ nguiã ngu eã ndese no. Siqui chooño mbia rese. ²⁰ Dios abareã ndese siqui chooño. Brujería abe rese siqui chooño. Mbia ucuãyã cuãyã. Siqui icuã icuã nyue. Mae icuã icuã emo ndese. Paama i jei jei emo je. Abei chiã. Mbia mbuqueta queta. ²¹ “I ãchi sembae”, i mbia mbae osei osei. Mbia iquia. Quiacua. Siqui chooño mbae ja rese. Ae ã icuã ñumumbara saã saã mbeite quia nae, ùqui nderecuarã eã mbei ra Dios.

Espíritu Turã ño aba mingo nguiã mbae turã ndese

²² Ae siqui quia Espíritu Turã ndese nae, Espíritu Turã ño emingo nguiã mbae turã ndese ã. Nyesequa chõ nguiã mbia rese. Eya chõ eriqui nguiã. Quicoi coi eã ño nguiã. Siqui tochi chõ nguiã. Siqui turã ño nguiã. Ucheẽ mbuchebi chebiã ño nguiã. ²³ Eseteã ño eriqui nguiã. Ae ae chõ nyiteaquiato nguiã mbae icuã si. Nande ùqui naa naa mose, emo ñee aroneãte nande je cote. ²⁴ Sã Cristo mano nyii no. Eĩ si chõ Cristo quiato undua icuã mbutiã nguiã no. Cristo mano nyabe.

²⁵ Sã Espíritu Turã ndiqui nandereco mingo turã co no. Eĩ nande sí siqui turã erui jê. Ae nandererequia turã bei nonde mbae turã ndese. ²⁶ Nandecuasu ra nandesaã saãchi jê. Nandecua techi nda nandehue jê. “Aque rã eãchi se”, nandechi nda mae icuã icuã nandenongue rese jê.

6

Jendua chõ nguiã nyiese mbae mo naa jenongue je

¹ Emo mbae icuã naase i i mose, “Dios rui eico” jenyue chõ ee. Ae jemo siqui tuchi quia Dios rese, ùqui mo ñee ee. Embucuata turã sí nonde Dios rese. Jeñee mingue mingue chõ nguiã ee. “Mbae icuã tã i arõte se abe je”,

jenye chõ nguia ndua jẽ abe. ² Jendesenda ia eã ndasi mose, jendua chõ nguia erese mbae mo naa naa ee. Cristo cheẽ mumbayã ja chõ ùquĩ nde. ³ “Seaquiature rei ñene”, i mose eaquiataũ mo, ae sí chõ ñimbĩĩrĩ irĩ nguiaã aque. ⁴ Ae ra resaa mbae mo nae, esaã turã mbei chõ nguia. Ùquĩ mose ra ndeya quiátu tuchi ndechisaã ndese. Mae ndocoĩ emo nyisaã ndese. ⁵ Nande ae ae nandechimbirãcuã nguiaútu nandeya eã ndasi ae ae je.

⁶ Emo siqui mose jembaaquiata quiatu Cristo rĩĩ, mbae ja quia jemondo mondo quia ee. ⁷ Erechimbĩĩrĩ irĩchĩ nda ndechue si jẽ. Dios abe erembĩĩrĩ irĩ aroneate. Ae ra erechitiquia mbae mo nae, ùquĩ sí chõ nda ereucua. ⁸ Ae siqui quia ubi achõ ndese nae, ùquĩ nda ua chee. Ae siqui Espiritu Turã ndui nae, ùquĩ nda Espiritu Turã mingo bei. ⁹ Nandechimondocho eã ño nguia mbae turã naa naa mbei jẽ. Nandehui eã mbei chõ nguia esi jẽ. Ùquĩ mose ra Dios mbae mee tuchi jee nande je cote. ¹⁰ Mbae turã nandesaã saã mbei chõ nguia mbia je. Jesús quiato je quia mbae turã nandesaã saã tuchi jiri.

Pablo hui bei saludar i mbia je

¹¹ Seo ae je chõ co ambesa mondo nguiaã jẽje aque. Sã letras cuasute. ¹² Ae “circuncisión jẽsaã”, i quia jẽje nae, siqui turã sacua mbia rese chõ ùquĩ nde. Siqui turã ndocoĩ Cristo rese. “Cristo ae ra aba mingo bei” i sereã. Siquichete quiatu mbia si re. ¹³ Ae circuncisión saã nguia nae, ùquĩ abe riqui eã Moisés cheẽ ndui ùquĩ. “I nda mbia riqui urerui”, i chõ nguiaã “circuncisión jẽsaã” i jẽje ùquĩ. Ucuasu ra esaã saã jẽ circuncisión naa mose. Eyate ra jendese cote, jẽingo mose erese. ¹⁴ Jesucristo mĩĩ ndese chõ nda seya se. Ae mano ira rese. Ae mĩĩ ñĩĩ nda acheẽ ñee mbia je. Mbaemo ndese abe eã nda seya se. Jesucristo mano mose ira rese, se abe que amano mbae icua si ra. Mbae icua abe que mano sesi no nda. ¹⁵ Nandeco mose Cristo rese, eĩ ja chõ nande ee re. Ae circuncisión saã nae, ae circuncisión saã eã no nae, eĩ ja chõ nande ee re. Dios nandechiã mbiasu mose, ùquĩ nguiaútu eturã tuchi re. ¹⁶ Ae siqui quia Jesucristo mĩĩ ndese nae, sã Dios turã ndiqui bei ùquĩ ndese. Sã Dios riqui embia bei. Sã Dios turã ndiqui bei ngũimba ja je. ¹⁷ Secheẽ nda jẽsibishorõchĩ namo jẽ. Emo mose abe jẽ. “Pablo eaquiataũte”, sã emo i eã cote. Sã mbae rasi airara rara beite quia Cristo rĩĩ co no. Sã seiruã nuasa cherõ areco serete rese co no jẽ. Jesucristo rĩĩ ño ùquĩ nde. ¹⁸ Sã Jesucristo turã ndiqui bei jendese, Seresenda. Amén.

LA CARTA DEL APOSTOL SAN PABLO A LOS EFESIOS

Pablo embesa Jesús quiato Efeso jenda je

¹ Se rei Pablo. Dios que seirabo ra. Jesucristo chimbaaquiatu sacuã. Co ambesa mondo quia jêje aque. Jesús icuasa je. Efeso jenda je. ² Sã Dios riqui uturã ndeacquia bei jêje. Jesucristo abe no. Sã ùquĩ ndiqui jembia bei.

Cristo mbae turã saã ja nande je

³ Nandechê turã mbei chõ nguia Dios rĩ. Jesucristo ru rĩ. Jesucristo rese chõ nandeco nguia ã cote. Ibatenda chõ nandeco nguia ã cote. Nyebe Dios riqui nguia mbae turã naa jate nande je co. ⁴ Dios que nandeirabo nyii ra. Cristo rĩ. Mbae ao ja nonde. Nyesequa tuchi que nanderese ra. Nyebe nandecua mbutiã ja nguia nandesi. Nandeco turã sacua enonde. ⁵ Dios que nandeirabo tuchi coose ra. Mbae ao nonde. —Jesucristo rĩ nda seriirina jê, i que nande je nandecua mose ra. ⁶ Nandechê mbei sacua Dios turã nã. Uturã je chõ nandesi nguia Jesucristo rĩ. ⁷ Jesucristo mui ngue mano nanderirõ sacua mbae icua si ra. Ae rĩ ño Dios nandecua mbutiã nguia nande si cote. Dios turãte quia nande je re. ⁸ Dios que uturã teacquia ja nande je ra. Nyebe eriqui nguia mbae icua jate nande je. ⁹ —Seriirĩ nda amondo mbia je ibii. Ae ra mbia mangue choõoa jenda mingo ja serese cote, i que Dios cose ra. Ùquĩ ngue eteacquia nande je cote ra. Nandecua sacua. ¹⁰ Dios icoquiatu mose ra mbae mbuchicuabo ja cote. Nandemunua ja ra ino Cristo nonde. Cristo ra mbae rerecua ja tuchi aque mose cote. Ibi jenda rerecua ja. Ibatenda abe rerecua ja.

¹¹ Ae Cristo saã nande je nae, ùquĩ nã ño ngue Dios nandeirabo nguia cose. Mbae tiã mose que Dios nandeirabo nyii ra. Ae sí mbae turã naa naa sacua nande je. Dios cheẽ nguire mbae riqui nyecua bei ã. ¹² Urecheẽ turã mbei sacua Dios rĩ ño ngue ureirabo nguia. Ure rane ngue Cristo urecua nyii ra. ¹³ Jê abe que Cristo jêcua chee cote ra. Jê echeẽ turã andu mose. —Cristo ra jendirõ jêcua si, i mose jêje. Jê Cristo icua mose que Espiritu Turã Cristo mbae marca mui jendese ra. —Espiritu Turã tamondo Cristo icuasa je, i Dios quia nyii nae, aque sí que Cristo mbae marca mui jendese cote ra. ¹⁴ Espiritu Turã ndiqui nandechiangui re co. Nyebe nandeco nguia ñee. —Dios ra mbae mee ja nande je ucheẽ nguire, i. Dios que nandesi Jesús ruqui ribishorõ nda. Nandemingo bei ra erese cote. Ùquĩ nã ño Espiritu Turã Cristo mbae marca mui nguia nanderese. Nandechê turã mbei sacua Dios rĩ ño ngue ùquĩ nde.

Sã Dios jembirandu uquirãcua ndese, i Pablo

¹⁵ Airandu que jendese ra. Jesús jêcua tuchite quia ùquĩ. Jenyesequa tuchite equia Dios quiato ja rese ùquĩ. ¹⁶ Nyebe aico nguia ñee hui ãte Dios je. Gracias, i bei ee jeni. ¹⁷ —Paba, ndequiato embaaquiatu tuchi Cristo rĩ. Cristo eicua uquia tuchi ee, ae beite se quia Dios turã je jeni co. ¹⁸ Acheẽ mbeite quia Dios je jeni co. —Paba, ae turã nda eresaã je ndequiato je nae, ùquĩ ndese embiirandu jiri namo. Ae turã nda eremeje ee nae, ùquĩ ndese abe embiirandu. ¹⁹ Ndequirãcua ndese abe embiirandu, ae beite quia Dios je jeni co. Dios quirãcua nda ua eã mbei. Equirãcua ndiqui Jesús quiato

chiangui re ja ã. ²⁰ Dios quirãcuã ae que Jesús raaque mbuquera si ra. Dios quirãcuã ae que Jesús mbocoi mii ujii ra. ²¹ Dios que Jesús mii mbae rerecuarã ja ra. Ae quia rei i tuchi ererecu mo si. Gobierno mo ab e si. Ae quia rei ecuasu tuchi ibi jenda ja si. Ibatenda abe mo si. ²² —Mbae ja rerecu tuchi rei Jesús, i que Dios ra. —Sequiato rerecu ja chõ ae re, i que Dios ra. ²³ Dios quiato rei Jesús rete rã. Jesús riqui uquiato chiangui re co. Manguiti eriqui eã aroneate. Mbae aosa ja chõ ae re.

2

Uturã nii Dios aba rirõ aba icuã si

¹ Dios que nguco mondo jêje cote ra. Jêicuã nii ño ngue jêingo nguiã eraaque rã nyue. ² Mbia ataque rã tuchi que jêingo aque mose ra. Mbae icuã naa naa ndesechi. Satanás ñee ndui beite que jêingo nyii ra. Equirãcuãte que eriqui jêje ra. Ae siqui ãte quia Dios rese nae, ùqui ño Satanás ñee mumbayã nguiã ã. ³ Eĩ nande que equia cose nyii ra. Ae nandebite riqui mbae icuã nyii nae, ùqui ndesechõ ño ngue nandeico ra. Ae rese nandeico ndua beite mbae icuã nyii nae, ùqui ndesechõ ño ngue nandeico nyii ra. Mbia ataque rã sí chõ ngue nandeico mbae icuã naa naa nda. Dios nda nandembasi nguiã nandeicuã nii ña. ⁴ Eyayãte quiatu ngue eriqui rei nguiã nanderese. Nyesequa tuchite quiatu que equia nanderese ra. ⁵ Eraaque raãte raque nande nandeicuã nii nyii. Nyebe nguco turã mondo nguiã nande je Cristo raaque mbuquera si mose. Dios turã ae chõ jendirõ nguiã jêicuã si. ⁶ Dios Cristo raaque mbuquera mose que nande abe mbuquera echabe ra. Dios que nandemingo erese ibate cote ra. ⁷ Dios turã tuchi riqui nande je Jesucristo rii co. I nda mbia jirandu randu Dios chisaã turã ndese emo mose. Ibãtee nandeico mose abe no. ⁸ Jê ngue Jesús jêicua ra. Nyebe que Dios jendirõ jêicuã si ra. Uturã nii ño ngue jendirõ nguiã jêicuã si. Jê ae jeñimbucha aroneate Jesús rese. Dios ae ngue jembucha nguiã erese. ⁹ Nandechisaã turã nii eã ño Dios nandembucha nguiã Jesús rese. Nyebe nandemo ndiqui uturã naa naa aroneate. ¹⁰ Dios ae que nandea ra. —Se emingo mose Jesucristo rese, aque mose quia ra mbae turã naa naa cote, i que Dios nanderii cose ra.

Cristo mii ño mbia mingo turã turã nguiã nyiese

¹¹ Dios rese que jêingo ãte nyii ra. Ùqui si jêtesareia ño. Judíos eã ño ngue jê ndesê. Nyebe judíos jendirirõ nguiã. Circuncisión ngue jêsaã eãte judíos rã ndesê. ¹² Jêingo eãte que Cristo rese nyii resê. Jêingo turã eãte que equia Dios rimba je resê. Dios chee si que jêingo ishote resê. —Dios ra mbae turã saã nande je, jenyê ãte que equia ndua aque mose resê. ¹³ Jesucristo mbae chõ jê cote re. Ishote jêingo raque Dios si cose. Dios que jembucha tuchi uchiese Jesucristo mano nii nda. ¹⁴ Cristo mii ño nandemingo turã nguiã nyiese ã. Ae mii ño judíos mingo turã nguiã judíos eã ndese co. Ae mii ño judíos eã mingo turã nguiã judíos rese co no. Ùqui ngue siqui icuãte quia nyue Cristo icuayã mose nyii ra. Mbia mii na ño eriqui nguiã siqui turã nyue ã cote. ¹⁵ Umano mose que Jesús judíos mbui mondo Moisés chee si cote ra. Ae Moisés ñee, judíos echee mumba eã sacua nae, ùqui si que Jesús embui cote ra. Nyebe judíos siqui turã arõte judíos eã ndese ã cote. Judíos eã abe siqui turã arõte judíos rese cote. Ùqui siqui mose Jesús rese, co mii na ño eriqui nguiã ã cote. Mbia mii mbiasu ji rã ño eriqui nguiã ã cote. ¹⁶ Ùqui icuã icuã mose nyue que Cristo mano ùqui icuã ndiquicharõ nda. Ùqui mingo turã ja nonde Dios rese.

Siqui turã mose Dios rese, siqui turã nda nyue cote. ¹⁷ Cristo que mano mbia mingo turã sacua Dios rese ra. Tu que mbia mbiirandu ja nonde nyiese ra. Judíos. Judíos eã abe mbiirandu nonde nyiese. ¹⁸ Cristo que mano nande ja je ra. Judíos je. Judíos eã je abe no. Nyebe Espiritu Turã mii nandemingo ja nguiã nyiese ã. Dios nandesichã ja aröte qui a ã cote. ¹⁹ Mbiamo eã ño jê Dios je cote re. ã jêingo isho eãte Dios si ã cote. Dios riirĩ tuchi chõ jê cote re. Cristo resenda ataque rã sí chõ jêingo nguiã ã cote. ²⁰ Tuchua raã ji mo na ndei jê. Jesús chimbaaquiatsu rei tuchua i rã. Dios cheẽ mbuchecuaa cose ndare abe rei tuchu a i rã no. Jesucristo rei ùqui i tuchi. ²¹ Nande Jesús icua mose, Dios chuchua turã naanguia chõ nandeico nguiã Jesús je ã. Nande Jesús quiato tubiriã i ite riqui ã. ²² Espiritu Turã ño jemingo nguiã Dios rese jê abe ùqui. Nyebe jê abe jêingo Dios chucharã ùqui. Dios riqui jêiangui re ùqui.

3

Judíos eã abe ra siqui Dios rese, i Pablo

¹ Se rei Pablo. Jesucristo rimba. A setarõ ji ñi jenii a. Jê judíos eã nii. — Judíos eã abe riqui Dios rimba ã, ae beite que se quia jenii nda. Nyebe setarõ ji ñi nguiã a. ²—Judíos eã je chõ seturã esenei senei nde, i que Dios seje ra. Ùqui ndese beite aico co. Jêirandu equia serese reae. ³—Judíos eã abe ra siqui serese. Secheẽ turã esenei senei ee, i tuchi que Dios sembaaquiatsu ra. Ùqui ngue asenei jua chõ jêje ra, se embesa mose jêje nyii. ⁴ Sechimbesa rese jemae mose ra jênee cote. —Pablo Dios cheẽ icua tuchi chõ nguia judíos eã nii nde, jenje ra cote. ⁵—Judíos eã abe ra siqui serese judíos rã sí tuchi, i eã ngue Dios mbia mo je cose ra. Namõ ño mbia jirandu nguiã ùqui ndese. Namõ ño Espiritu Turã Jesús chimbaaquiatsu mbiirandu nguiã ùqui ndese. Dios cheẽ mbuchecuaa abe mbiirandu ùqui ndese. ⁶ ã ndei Dios cheẽ mbuchecua ramo ji ã: Judíos eã abe ra siqui Dios rese judíos rã sí tuchi cote. Mbia rete mii na nda eriqui ja cote. —Mbae turã tasaã jêje Jesucristo riĩ, i mose Dios, judíos achõ je eã ño eriqui nguiã ñee. Judíos eã abe je chõ ñene.

⁷—Ùqui secheẽ esenei senei mbei quia mbia je, i que Dios seje ra. Mbae turã mo asaã eã ndaque Dios je nyii. Uquirãcuã abe que emee seje ùqui naa sacua nda. ⁸ Dios turã tuchite que seje ra. Se mbae raande rocõ ee nyii. Nyebe ñee nguiã seje. —Secheẽ esenei senei mbei quia judíos eã je. Ae rese mbia riqui jiranuate Cristo turã nae, ùqui esenei senei judíos eã je, i que seje ra. ⁹—Ae turã nda asaã judíos eã je nae, ùqui ndese mbia embiirandu ja cote, i que Dios seje ra. Dios quiarei ndua ndua ùqui nyii. Mbae ao ja nonde nyii. ¹⁰ Mbaerã ño Dios mbia mbiirandu ùqui ndese cote chã. Mbia jirandu sacua Dios aquiatsu rese chõ ñene. Dios judíos eã mingo turã mose judíos rese, mbia ra nyuruira tuchi mae Dios quirãcuã ndese. Ibatenda abe ra nyuruira tuchi mae erese no. ¹¹ Dios ndua ndua ùqui nyii. —Mbia chumumbarate riqui raque ã. Emo emo nda ambucha nyiese Cristo mano mose, i que Dios cose ra. Ùqui ngue esaã Jesucristo riĩ cote ra. ¹² Nandeico Jesucristo icuate ã cote. Nyebe nandeico nguiã siquicheate ñee Dios je ã cote. ¹³ Ae mbae rasi asaã nguia cárcel co nae, jenii ño ñene. Seyate se mbae rasi raã mose jenii. Jê abe jêimbua chõ nguia serese.

Cristo nyesecua tuchi quiato rese

14 Judíos eã abe chõ Dios mingo nguiã uchiese. Nyebe aico nguiã gracias i bei Dios je co. 15 ã nandechumubarate riqui íbii ã nae, ùquĩ ndu ja chõ Dios re. Ibatenda abe ru chõ ae no nde. 16 Dios mbae saã ja arõte nande je. Ebite mbae raã mose nande je. Nyebe aico nguiã ñee ee jeniã a. —Paba, Espiritu Turã emondo tuchi echiangui re. Embuquirãcuã sacua, ae chõ nguiã ee a. 17 —Paba, sã Cristo riqui tuchi echiangui re. Sã Cristo icua tuchi. Sã eriqui nyesecua tuchi Cristo rese, ae beite se quia Dios je jeniã co. 18-19 Mbaerã ño Dios riqui nyesecua tuchite nanderese co. Co eriqui nyesecua tuchite nande rese co. Jendua tuchi quiatu quia ùquĩ ndese. Sã Cristo quiato riqui ndua ja ùquĩ ndese. Sã Dios riqui tuchi jeñiangui re. 20 Dios quirãcuã ndiqui beite nandechiangui re co. Nandembirãcuã mbeite equia co. Nyebe eriqui mbae raã ja arõte nande je co. Ae rese nandeico ndua eãte nae, ùquĩ abe chee esaã rãque quia nande je co. 21 Sã Jesucristo quiato riqui ñee turã mbei Dios je Jesucristo rĩ. Mbae ua ja mose chee. Eĩ si ra equiato quia ñee turã mbei erĩ. Amén.

4

Hue rĩ ja chõ Espiritu Turã ndiqui nguiã Jesús quiato mundua

1 Setarõ ji aĩ Jesús rĩ a. Secheẽ amondo quia jẽje aque. Jẽingo turã ño nguia Cristo rã si. Dios chiirabote quia jẽ nde. 2 Jẽseteã ño jẽingo. Jẽingo tochi chõ nguia. Jendoseĩ nguiatu chõ nguia jenyue. Jenyesecua chõ nguia jenyiese. 3 —Hue rĩ ja chõ nandeico ndua jẽ, jenyue chõ nguia jenyue. Sã Espiritu Turã ndiqui jemundua hue rĩ ja. 4 Jesús rete miĩ na ño nande re. Espiritu Turã miĩ ño siqui nguiã nandechiangui re co no. Jesús miĩ na nda nande ja nandeico. 5 Ae miĩ ño nandererecua ja re. Ae miĩ ndese chõ nandeico ja nguiã ã. Aque miĩ niĩ ño ngue bautizar i nguiã nande je no. 6 Dios miĩ ño nanderu ja re. Ae miĩ ño nandemingo nguiã mbae rese. Ae miĩ ño siqui nguiã nandeite re co no. 7 Dios que nandechisaã ae aerã mee nande je ra. Cristo que uturã mee mee nande je ra. Ae ra nandesã saã, ùquĩ naa naa turã sacua. 8 Sã embesa ji riqui ñee no:

Cristo que nyui oso ibate ra.

Mbia tarõ ji que equerao ra.

Mbia chisaã ae aerã ngue emee mee mbia je ra,

i que embesa ji ra. 9 Jesús que siqui ibátee nyii ra. Aquere que eru nguichi íbii cote ra. 10 Ae sí que oso nyui ibei robei cote ra. Mbae rerecuarã ja sacua ngue ae cote ra. 11 Ae que mbia chisaã ae aerã mee ee ra. —Apóstoles ra jẽ, i que emo emo je ra. —Secheẽ embuchecua checua quia mbia je, i que emo emo je ra. —Mbia sequiatoã je secheẽ turã esenei senei mbei serĩ, i que emo emo je ra. —Mbia serimba etequiatu bei, i que emo emo je ra. —Mbia embaaquiatu quiatu bei quia, i que emo emo je no nda. 12 Eĩ ngue Dios uquiato mbaaracua racua ja uchisaã ae aerã ndese ra. Ùquĩ mose ra Jesús quiato Jesús oseĩ i i tuchi cote. 13 Ùquĩ mose ra nandendua ja Jesucristo rese hue rĩ ja. Ùquĩ mose ra Jesucristo nandeicua i i tuchi. Jesucristo rã nda nandeico chee ùquĩ mose. 14 Ùquĩ mose ra nandeico ñimbirãcuã tuchi Cristo rese. “Tambĩrĩ irĩ Cristo rĩ” i mose emo nande je, nandeicoã nda ùquĩ ndese. Nandendua ata ata eã nda Cristo rĩ. Ae miĩ ndese chõ nda nandeico bei. Mbia rĩrĩ na nda nandeico ndua ata ata eã. 15 Ùquĩ mose ra nandechẽe ñooõ eã. Mbia ra nandembĩrĩ irĩa. Nandechesecua ja ra equia mbia rese. Cristo rã si chõ nda nandeico turã. Dios quiato rerecua tuchite quia ae re. Sã nandẽaquĩ

nanderete rerecua no. ¹⁶ Sã nanderete riqui ñimbirãcuã ja no. Eĩ si chõ Cristo rimba nguiã ñimbirãcuã ja siqui turã nyiese. Sã nanderete no. Nanderete resenda siqui turã ja mose, nanderete rasiã ja rae.

Ae icuã jesaã saã nguia nyii nae, ùquĩ jesaã saã eãte quia namo ã

¹⁷ Jesús cheẽ tuchi chõ ã nde: Dios icuasa reã na nda jëingochĩ cote jë. Ndua chooño ño nguiã mbae rese ùquĩ. ¹⁸ Eãquĩ átã ño ùquĩ nde. Dios cheẽ andu sereã nea je chõ ùquĩ nde. Nyebe Dios riqui nguiã ngueco mee eã tuchi ùquĩ je. ¹⁹ Mbae icuã achõ ndese chõ eriqui nguiã ndua ndua. Eireĩ nguiãte mbae icuã naa naa mose cote. Oo oo tuchi mbae icuã ja rese. ²⁰ Ùquĩ ngue Cristo jembaaquiato quiato eã jë nda. ²¹ Jëirandu que Jesús rese resẽ. Ae si chõ ngue jembaaquiato resẽ. Jembaaquiato que ucheẽ turã ñi nda. ²² Jeñiangui renda icuã si jëhui chõ. Aba mbũcuãsa tuchi chõ ùquĩ nde. Aba mbũrĩ irĩ ño ùquĩ nde. ²³ Jendua ndua jembiasu chõ ae. Ae rese jëingo ndua icuã icuã nyii nae, ùquĩ si jëtesarei chõ cote ae. ²⁴ Jeñimbiasu chõ nguia ae. Ùquĩ mose ra jëingo Dios rã si. Jëingo turã tuchi ra equia ee.

²⁵ Jeñee ñooño eã ná nguia jendesenda mo je cote ae. Nyiesenda ja chõ nande cote re. ²⁶ Jë paama i mose, paama jenyete turã ño nguia. Paama jenyete ocoã ño nguia. Tenda oso nonde ti jenyete. ²⁷ Jë paama i oco mose, diablo ra jembũcuãte cote. ²⁸ Ae mbae mbuquiachã quiachã nguia nae, sã mbae mbuquiachã eã cote. Sã ae ae mbae ao ao o jë icua cote. Sã eriqui mbae mondo mondo mbae cha reã je cote. ²⁹ Jenyuru jendecochõ ño nguia ñee ndocoĩ mbae icuã ñi jë. Mbae turã ñi ño jëingo ñee mbia je jë. Emundua ndua sacua Dios rese. ³⁰ Espiritu Turã nda jembia eã eãchĩ jë jë. Ae chõ ngue Cristo mbae marca mii nguiã jendese. Nyebe jëingo nguiã ñee. —Cristo ra nandembiasu erã si, i. ³¹ Paama jenyechĩ nda emo ñi. —Iãchĩ se, jenyechĩ nda emo ñi jë. Jëtasẽ tasẽchĩ nda emo je. Jeñee icuã icuãchĩ nda emo ñi. ³² Jëturã ño jëingo jenyue. Jëseteã ño jëingo jenyue. Jendesenda icuã icuã mose jëje, jëtesarei chõ eicuã si. Sã Dios jëicuã mbutiã jë Cristo rĩ nyii no.

5

Dios quiato siqui bei mbae turã ndese

¹ Dios riirĩ tuchi chõ jëingo nguiã ã. Nyesecua tuchi equia jendese co. Erã si chõ jëingo. ² Jenyesequa tuchi quia mbia rese. Sã Cristo riqui nyesecua tuchite nanderese no. Sã mano nandëicuã ndiquicharõ oveja rã no. Emano mose que Dios ia tuchi erese ra.

³ Cristo mbae chõ jë cote re. Nyebe jëingo eã emo ninisi rese. Eruã mo ndese abe no. Emo mbae ra jenyosei choseichĩ. Eicuãte ùquĩ. ⁴ Jenyuru jendecochõ ño nguia ñee ndocoĩ mbae icuã ñi. Mbae icuã aba ireingua rĩ jeñee eã. Eicuãte ñee mose ùquĩ. Gracias jenyete quiato quia Dios je. ⁵ Emo siqui mose ngũinisiã ndese, aque ra siqui eã Cristo rese, Cristo siqui mose ererecua. Ae mbae icuã saã saã mbeite quia nae. Ae emo mbae chosei chosei quia nae, ùquĩ abe ra siqui eã Cristo rese. Emo mbae osei osei mose, Dios abareã ndese siqui raanguia chõ ùquĩ no nde. ⁶ Ae ùquĩ saã saã nguia mbae icuã nae, ùquĩ je ra Dios mbae rasi raanguia tuchi. “Ichõiño ñene” ichĩ nda emo jembũrĩ irĩ jë. ⁷ Ae ùquĩ saã saã nguia mbae icuã nae, ùquĩ ndese ra jëingochĩ jë. ⁸ Itondaruqui re rã ngue jëingo cose ra. Nyaáshĩ ño jëingo nguiã Jesús rese ã cote. Nyebe jëingo turã. ⁹ Ae siqui nyaáshĩ nae, ùquĩ siqui turã ño

nguiã ã. Ñee ñooño eã ño nguiã emo je ã. Siqui ãte equia mbae icuã mo ndese ã. ¹⁰ Ae Dios bite riqui nae, ùquĩ ndese chõ jëingo ñimbaaquiato quiatu. ¹¹ Ae itondaruqui riinda saã saã nguia mbae icuã nae, ùquĩ nda jësaã saãchĩ erese jë. Echiao icuã ñii ño jeñee ee emundua jë. ¹² Ae ùquĩ saã nyecuayã cuayã nguia mbae icuã nae, aba ireite ñee ùquĩ ñii. ¹³ Jë ùquĩ nyiao icuã mbuchecua mose ee, ndua ndua ra erese cote. Emo emo siqui arõte Cristo rese cote. Itondaruqui riinda recha mbae icuã. ¹⁴ Sã embesa ji riqui ñee no:

Ae uque saã saã nguia nae, sã ùquĩ ñumumba.

Ae siqui quia eraaque rã nae, sã ùquĩ quera si.

Ûquĩ mose ra Cristo uturã ndeacuquia ee,
i que embesa ji ra.

¹⁵ Cochee tuchi chõ jëingo Dios rese. Mbia aquiatuã na nda jëingochĩ. Mbia aquiatu rã nguiatu jëingo. ¹⁶ Ae Dios bite riqui nae, ùquĩ ndese chõ jëingo ñimbecoteã. Mbae icuã icuãte eriqui ã cote. ¹⁷ Jëaquiatuã eã ño jëingo Dios rese. Ae Dios bite riqui nae, ùquĩ ndese chõ jëingo ñimbaaquiato quiatu. ¹⁸ Jëquiaca quiacuachĩ nda equia jë. Jëquiaca mose mbae icuã jësaã saã ja arondete. Espiritu Turã nguiatu jemingo tuchi jeñiangui re. ¹⁹ Cristo riĩ jeñee turã tuchi quiatu quia jenyue. Jëirasei rasei tuchi quiatu quia Dios je. Himnos. Salmos. Jëya chõ jëingo irasei rasei Dios je. ²⁰ Dios rei nanderu. Ae chõ mbae ja mee mee nguiã nande je co. Nyebe “gracias” jenyee bei quiatu quia ee Jesucristo riĩ.

Jëingo turã ja chõ nguia jenyuchua jenda ja je

²¹ Jenongue cheë jemumbayã ño nguia. Cristobi tuchi chõ ùquĩ nde. ²² Sã cuña ngu cheë mumbayã. Sã eriqui Dios cheë mumbayãte no. ²³ Eru quia rei ngüinisi rerecua. Sã Cristo uquiato rerecua no. Cristo quiato rei Cristo rete rã. Cristo quiatu ngue esirõ nguiã eicuã si. ²⁴ Sã Cristo quiato riqui echeë mumbayãte no. Eĩ si chõ cuña nguia ngu cheë mumbayã mbei. ²⁵ Sã eru riqui nyesecua tuchi ngüinisi rese. Sã Cristo nyesecua tuchi uquiato rese no. Sã mano nyee eriquicharõ no. ²⁶ Uquiato no sacua icuã chõ ùquĩ nde. Irei que i je ra. Ucheë je abe que eirei no nda. ²⁷ Cristo uquiato mbuturã turã ja quia co. Mbae icuã ndese emingo uquia reãte. Nyebe eyate riqui nguiã erese co. ²⁸ Sã Cristo riqui nyesecua tuchi uquiato rese no. Eĩ si chõ mbia quia nyesecua ngüinisi rese. Sã emo ndiqui ngueteãte nguete rese no. Emo ngueteã mose ngüinisi rese, nguete rese ngueteã naanguia chõ ùquĩ nde. ²⁹ Emo nda nguete ucuayã eã. Nguete ra equereco turã. Teaquiato turã nda equia. Eĩ si Cristo quia uquiato rerequia turã co no. ³⁰ Cristo rete rã si chõ equiatio re. Nande abe chõ Cristo rete rã no nde. ³¹ Dios que ñee nyii ra. Emo ngüinisirã ndea mose, sã nyao usi si. Ngu si abe no. Sã ngüinisi mii ndese chõ eriqui. Co mii siqui rã ño eriqui nguiã nyiese cote. ³² Mbaranguiatuãte raque ùquĩ icua. Nyeremo siqui mose co mii na. Cristo riĩ ño eriqui nguiã ñee. Equiatio riĩ abe no. ³³ Jëje abe chõ eriqui nguiã ñee. Jë nyesecua tuchi sacua jeninisi rese. Sã jëingo nyesecuate jendete rese no. Sã cuña abe riqui ngu cheë mumbayã mbei.

6

¹ Mbia riiri, jendu cheë jemumbayã ño nguia. Jësi cheë abe. ²⁻³ Ñe nguete Dios ñee cose ra: “Jëingo turã ño nguia jësi je jë. Jendu je abe. Jëingo turã mbei ra equia ùquĩ mose. Jendeco ra jëingo arete íbii,” i que Dios mbia je cose ra. ⁴ Eru

je tacheẽ cote. Esi abe je. Jeñee icuã icuã tuchite chĩ nda jendiirĩ je jẽ. Paama i chee ra jẽje. Jembaaquiatur turã turã quiatu quia. Jemingo turã quiatu quia Dios rese.

⁵ Mbia rimba je tacheẽ cote. Jenderecua cheẽ jemumbayã ño nguia. Cochee chõ jẽingo ee. Jẽingo turã ño nguia jenderecua je. Cristo bite ũquĩ. ⁶ Jenderecua mae eã mose jendese, ũquĩ mose abe chõ jẽingo embae raã naa turã ee. Mbae jẽsaã turã ja quiatu quia Dios cheẽ ndui si. Cristo rimbate quia jẽ nde. ⁷ Jẽya chõ jẽingo mbae raã naa mose jenderecua je. Dios je chõ jẽingo nguia eraã ũquĩ. Jenderecua ibi jenda miĩ je eã ño ñene. ⁸ Dios ra mbae turã mee jẽje emo mose jenyiao turã ndibishorõ. Jẽingo mose mbia rimba. Mbia rimba eã jẽingo mose ra re no ae. ⁹ Mbia rerecua je tacheẽ cote. Jẽingo turã ño nguia jẽ abe jenimba je. —Tareirua nua, jenyechĩ nda embĩrĩ irĩ jẽ. Jẽ abe chõ jenderecua no nde. Jesucristo rei jenderecua. Jenimba abe rerecua. Eĩ ja chõ mbia Dios je re. Mbia miĩ ndese ra eriqui turã eã.

Soldados rã si chõ jẽingo nyiquisã mbae icuã si

¹⁰ Hui bei nonde ã tacheẽ jẽje. Dios quia rei equirãcuã tuchi. Dios quirãcuã je chõ jẽingo nguia ñimbirãcuã. ¹¹ Sã soldado riqui armadura mingue no. ũquĩ ndei nyiquisã sacua ũquĩ. Eĩ jenye si chõ nguia siqui tuchi Dios rese nyiquisã Satanás si. ¹² Ae icuã icuã ndiqui nande je Jesús rĩ nae, mbia eã ño ũquĩ nde. Satanás ño ũquĩ nde. Satanás nimba abe no. Aba checuayã icuã abe no. Mbae icuã nderecua ja chõ ũquĩ nde. Equirãcuã tuchi riqui ũquĩ. ¹³ Jẽingo tuchi Dios rese ũquĩ icuã si nyiquisã sacua. Jẽquirãcuã jẽingo tuchi sacua. Jẽquirãcuã mbei quia jẽingo, Satanás jembũcuã eã sacua. ¹⁴⁻¹⁷ Jẽquirãcuã tuchi chõ jẽingo. Sã soldado riqui icoquiatur armadura mingue no. Eĩ jenye si chõ nguia icoquiatur diablo jembũcuã eã sacua. Sã soldado riqui ngũmbi cuasa mingue no. Huũsia riĩnda abe mingue nyiquisã sacua no. Sã soldado riqui huiyao mingue icoquiatur no. Sã escudo abe rerequia oo no. Nyiquisã sacua emo uu mombo mose ee. Sã huiite sucha ãtã abe mingue uãquĩ ndiquisã sacua no. Sã tiquise abe rerequia no. Soldado rã si chõ jẽingo icoquiatur nyiquisã sacua diablo si. Jeñee ñoño eã ño nguia. Jẽingo turã mbei chõ nguia. Jẽingoquiatur bei quia Dios cheẽ turã nenei nenei mbia je. Dios jẽicua tuchi quiatu quia. Dios icua tuchi mose ra diablo tã i eã jẽje. Dios quirãcuã ndese quia jẽingo tuchi mbae icuã naa eã sacua. Dios cheẽ jẽicua tuchi quiatu quia. ũquĩ mose ra Espĩritu Turã siqui tuchi jendese. ¹⁸ Jeñee mbei quiatu quia Dios je. Sã Espĩritu Turã jembucheẽ turã mbei quia ee. —Mbae embu seje. ã embu seje, jenye bei quiatu quia Dios je. Dios quiato ja rĩ ño jẽingo ñee Dios je. Dios siqui turã sacua erese. ¹⁹ Serĩ abe quia jẽingo ñee mbei Dios je. Sembucheẽ turã sacua, se echeẽ nenei nenei mose mbia je. Ae rese mbia riqui jiranuate Cristo rĩ nae, ũquĩ asenei senei nguia mbia je co. ²⁰ Dios que semondo ucheẽ turã nenei nenei sacua nda. ũquĩ nĩ ño setarõ ji aĩ nguia a. Jeñee mbei quiatu quia Dios je serĩ. Se ireĩ ireĩ eã sacua. Se echeẽ turã nenei nenei mbei sacua mbia je.

Pablo ñee hui bei

²¹ Tiquico si quia jendea aque. Ae ra mbae senei ja jẽje jembiiirandu serĩ. Ae que mbae saã turã mbeite quia serese ra. Dios rimba turã tuchi chõ ae re. ²² Nyebe amondo nguia jendea aque. Jembiiirandu ja sacua urerese. Jembia tuchi sacua Cristo rese abe. ²³ Jesús quiato chõ jẽ abe, se rã si re. Sã Paba ibatenda riqui jembia bei tuchi. Sã eriqui jembuchesequa tuchi mbia rese.

Sã Jesucristo icua uquia tuchi jẽje. ²⁴ Ae nyesequa tuchi quia Jesucristo rese nae, sã Dios turã siqui tuchi ãquĩ ndese. Amén.

LA CARTA DEL APOSTOL SAN PABLO A LOS FILIPENSES

Pablo tarō ji ucheẽ mbesa mondo Jesús quiato je

¹ Pablo chõ se re. Timoteo rese. Jesucristo rimba chõ ure re. A ureico ã mbesa jêje a. Felipos jenda Jesucristo quiato ja je a. Jesús quiato rerecua je abe ureico ã mbesa a. Diáconos je abe no. ² Sã Paba Ibatenda turã ndiqui jendese. Sã jembia mingo. Sã Jesucristo abe jembia mingo no.

Pablo ñee Dios je Jesús quiato rñ

³ Sendua ndua mose jendese, seya beite aico jendese co. Gracias ae beite sequia Dios je jeni co. ⁴ Se ñee ñee mose Dios je jeni, seyate riqui co. ⁵ Se Jesucristo cheẽ nenei namo mosenda bei chõ jêingo nguiã ndua bei serese co. Nyebe jêingo nguiã mbae mondo mondo bei seje co. Nyebe seya tuchi riqui nguiã jendese co. ⁶ Dios que ucheẽ mingue jeñiangui re, ae si ra siqui bei jendese jembitirõ tirõ. Jesucristo tu chee. Ae bei. Siqui bei ra jendese. Aicuate se quia co. ⁷ Coche aico nguiã ndua ndua eĩ jendese cco. Achesequa tuchite quiatu nguiã jendese. Jê ngue jêingo beite quia serese ra. Jendua ndua beite que equia serese ra. Mbae mondo mondo bei seje. Mbia icuã icuã mose seje. Se mbia cheẽ ndiquisã quisã mose Jesús cheẽ si. Mbia setarõ tarõ mose. Ũquí mose abe que jêingo beite serese ra. Dios turã ndese que nandeico mae mae mbeite ra. ⁸ Dios resa aico ñee co. Jesucristo rã si aico nyesequa tuchite jendese co. ⁹ Aico ñee mbeite Paba je jeni co. —Paba, ũquí embuchesequa i i tuchi mbia ja rese. Ndeaquiato emondo i i tuchi ee, ae beite quia Paba je jeni co. ¹⁰ Eĩ nda mbae turã jêicua. Eĩ nda jêingo bei mbae turã ndese. Eĩ nda Jesucristo ñee asiã jêje tu mose. ¹¹ Eĩ nda Jesucristo jemingo bei mbae turã ndese. Eĩ nda mbae turã jêsaã saã ja Dios je.

Cristo mñ nñ ño aico nguiã se co, i Pablo

¹² Æ tasenei jêje. Mbae icuã ngue jeĩ jeĩ mbeite quia seje, ũquí ngue Jesús cheẽ mbutiba eã mbei ra. Ũquí jeĩ jeĩ mose seje, mbia que jirandu tuchite quia Jesucristo rese cote ra. ¹³ A setarõ ji ñi cárcel a. —Cristo rñ ño etarõ ji ñi nguiã hue, i jate mbia quia serñ ũquí. Mbia rerecua chuchua jenda ja. Tuchuamo jenda ja abe. ¹⁴ Jesús quiato jirandu mose setarõ ji rese, esiquicheate riqui Dios cheẽ nenei nenei ũquí cote. Jesús quiato ja riqui Dios cheẽ nenei nenei tuchi ũquí cote. —Dios riqui tuchi urerese co, i equia ũquí cote. Maende setarõ ji rese.

¹⁵ Emo emo ndiqui Cristo renei ñooño ũquí. Ndua icuã icuã ño nguiã ũquí. Mae icuã icuã ño nguiã serese ũquí. Emo emo ndiqui Cristo renei turã tuchi ũquí no. ¹⁶ Ae Cristo senei ñooño nguiã nae, ũquí icuãte riqui seje ã. —Sã Pablo tarõ ji ñiño, i equia serñ ã. Cristo renei ñooño ã. Emo ndese ndua eã. Nyiese chõ eriqui nguiã ndua. ¹⁷ Ae Cristo senei turã nguiã nae, ũquí ndua chõ nguiã emo ndese. —Jesucristo cheẽ ni ño Pablo tarõ ji ñi nguiã hue, i equia ndua serese ũquí. ¹⁸ Seyate emo Cristo renei turã mose. Seyate emo Cristo renei ñooño mose no. Cristo rñ nguiatu eriqui nguiã ñee. Tachimbua tuchi chõ nguiã ũquí Cristo renei nenei mose.

¹⁹ Jêndese abe seyate aico co. Ũquí jêingo ñee Dios je serñ ũquí. Espiritu Turã ndiqui serese a no. Ae Jesucristo mbu seje. Nyebe Dios riqui nguiã setarõ ji

reaquiату tuchi a. Nyebe seya tuchi riqui nguiã a. ²⁰ Sesiquireheã tuchi ra se reae. Seireĩ nguiã mbei nda eriqui Cristo cheẽ nenei nenei ña. Cristo bi achõ ndese taico bei setarõ ji. Mbia nda seiquia rei nguiã, se taico bei Cristo rese. Mbia nda sembusẽ ndei nguiã no, ùqui mose abe taico bei erese no. Eĩ ja chõ seje re. Eturã ja chõ seje no nde. ²¹ Cristo mii ñi ño aico nguiã se co. Semano mose, eturã tuchi quiarei ùqui seje cote. ²² Dios semingobe mose, ae si je chõ aico nguiã mbae turã naa naa co. Ma ño eturã jiri riqui seje. Mano mose ereae. Siquibe jiri mose ere no ae. Aicua eãte se. ²³ Ma ño sebi jiri. Semano sete raque oso sacuã Cristo rese. Ûqui nda eturã jiri seje. ²⁴ Se seicobe mose íbii, ùqui nda eturã jiri jêje reae. ²⁵ Ûqui aicuate se. Seicobe mose, ùqui nda eturã jiri jêje reae. Nyebe ra Dios semingobe jiri jendese. Se Cristo icua uquia sacuã jêje. Se jemiabe jiri sacuã Cristo rese. ²⁶ Anyae ra oso jendea. Aque mose nda jêya tuchi Jesucristo rese chã.

²⁷ Ae uresenei senei nguiã Cristo rii nae, ùqui andure chõ jêingo turã. Airandu turã nda se quia jendese chã. Eĩ nda mbia ñee seje chã. —Hue rĩ ja chõ eriqui ndua turã nye. Huee echi mbia cheẽ ndiquisã quisã Jesucristo cheẽ si hue, i nda mbia seje chã. I nda mbia seico mose isho chã. Seico mose abe jendese. ²⁸ ¡Tiri jenyechĩ nda Jesús ucuãyãsa si jê! Jêsiquireheã mose, Dios ra ùqui mundua tata cuasu rese cote. “Huee ra asochĩ nde”, i chee rae. “Jesús icuasa ra Dios mingobe”, i ra ùqui jeni cote, jêsiquireheã mose esi. ²⁹ Jê Cristo jêicuate quia ùqui cote. Ûqui mii ño eã. —Jeñimbirãcuã abe quiatu quia serii, mbia icuã icuã mose jêje, i Cristo quia jêje co. ³⁰ Sã mbia icuã icuãte riqui seje no. Eĩ si chõ mbia icuã icuã ndiqui nguiã jêje ùqui. Nande jaje bei chõ ñene. Jemae ndei que equia serese cose resẽ. Se mbia icuã ndiquisã quisã mose. Ûqui sí rese chõ jêingo nguiã jirandu randu serese namo no.

2

Cristo seteã tuchi que tu ra

¹ Jesucristo jembiu turãte quia co. Cristo nyesequa mose jendese, jêyate riqui ùqui. Espiritu Turã abe riqui jendese ùqui. Jendua turãte equia emo ndese ùqui. ² Nyebe aico nguiã ñee jêje. Seyate aico raque jendese co. ¡Secheẽ jemumbayã tuchi quiatu quia jê! ¡Sembia tuchi quiatu se jê! ¡Jendua ata atachĩ nda jê! ¡Hue rĩ ja chõ jêingo ndua jê! ¡Hue rĩ ja chõ jêingo nyesequa nyiese no jê! ³ ¡Abei chiãte ra jêingochĩ jê! ¡Jenguasu ra jêsaã saãchĩ! ¡Jêseteã ño jêingo! —Nde chõchĩ ndeturã sesi, ¡jenye chõ jenyue! ⁴ “Se chõ jê” ¡jenyechĩ nda jê! Emo mbaerã abe rese quia nandeico ndua. ⁵ Sã Jesucristo riqui ndua eãte uchiese no. Erã si chõ nandeico ndua nande abe jê. ⁶ Dios rã si rei que Jesucristo ra. Ñimbuseteã tuchi que u íbii ra. Ererecua rã eã ngue eru íbii ra. —Dios rã si chõ taico bei se, iã ngue u íbii ra. ⁷ Mbia rerecua tuchi rei que Jesucristo ra. Huiico mose ibate. Mbia mo na ngue eru íbii cote ra. Mbia mbaecha reã na ño ngue eriqui íbii cote ra. Mbia rimba rã. ⁸ Mbia mo na ño ngue ae ra. Íbii cote mose cote. Mbia rerecua que esaã saã eãte quia ra. Siqui mingue chõ ngue equia ra. Dios cheẽ ngue emumbayã mbei mano nyee ra. Embucha ji que mano ira rese ra. Aba ireite mano ira rese. ⁹ Nyebe Dios riqui nguiã Jesucristo mbuchecua beite co cote. Mbia rerecuarã tuchi Dios Jesucristo mingobe co cote. ¹⁰ Mbia ra ngoi ja chee nguiã ndese Jesucristo je ñee. Ae siqui ja íbii. Ae siqui ja íbatee no. Ae siqui ja íbiqui rĩ. Ûqui ja ra ñee turã Jesucristo

je. ¹¹—Jesucristo rei mbia rerecua ja, i chee ra ũquí ja ñee. Ũquí mose ra Dios ia tuchi cote.

Secheẽ jẽisi chooño eẽ ño nguiã, i Pablo

¹² Secheẽ ngue jemumbayãte quia seico mose jendese. Ishote aico jẽsi co. Secheẽ jemumbayã tuchi quiatu quia isho seico mose abe. Cochee jiri quiatu jẽingo Dios je. Jẽingo bei tuchi quia erese. Jenderao chee ra ibate mbae icuã si. ¹³ Dios quirãcuã ndiqui jeñiangui re ũquí. Dios quia mbae turã nyosei uquia nguiã jẽje. Dios mũ ño jemingo nguiã ubi rese.

¹⁴ Mbae turã jẽsaã turã ja chõ. Ñee icuã icuã ndocoĩ. Teã teã ndocoĩ. ¹⁵ Eĩ nda mbia mo ñee icuã icuã eã jẽje. Eĩ nda jẽicuã eã emo je. Dios riirĩ ño jẽ nde. Sã nyasitata riqui mbae resae jate itondáruu no. Eĩ ño jẽ nde. Nyasitata rã si chõ jẽ nde. Mbua icuã ndesae ja. ¹⁶ Jẽingo mbia mingo beisa renei nenei tuchi mbia je ũquí. Nyebe ra seya tuchi jendese Cristo tu mose. Secheẽ jẽisi chooño eã ño nguiã. Jaembaaquiatu chooño eã ngue Cristo rĩ nda. ¹⁷ Secheẽ nguire jẽingo Dios icuate ũquí cote. Secheẽ nguire jendete jemee tuchi mose Dios je, seya tuchite ra jendese cote. Mbua nda seiquia rei nguiã Jesucristo rĩ, seya bei ra aico jendese, jendete jemee tuchi mose Dios je. ¹⁸ Jeñimbia chõ nguiã resere. Sã seyate aico co no.

Timoteo tamondo jẽje Epafrodito rese, i Pablo

¹⁹ Jesús eno i mose, Timoteo tamondo rã jendea. Eĩ nda seya jirandu mose jendese. ²⁰ Timoteo rã si ãte emo ndua tuchi jendese. ²¹ Umbaerã achõ ndese chõ eataque riqui nguiã ndua ndua. —Ã tasaã saã mbei Jesucristo je, i ãte equia ũquí. ²² Sã eririĩ ndiqui mbae raã naa ngu rese no. Eĩ si que Timoteo quia serese ra. Jesucristo cheẽ nenei nenei mose serese. Siqui turã mbeite que equia serese ra. Ũquí jẽicuate quia ũquí. ²³ Nyebe ra Timoteo amondo jendea. ã tatea rã nyii. Mbua ra setarõ ji mũ mbei a reae. Sembusẽ nda re no ae. Ũquí tatea rã nyii. Ũquí ndeare ra Timoteo amondo jendea. ²⁴ Aĩ mbeite ndua Dios rese a. Ae ra sembusẽ jei reae. Semondo ra jendea cote reae.

²⁵ Epafrodito abe tamondobe jẽje. Ae jemondo seje nyii seraarõ sacua nae. Seresenda turãte riqui seje co. Dios cheẽ nenei nenei serese. Senongue rã tuchi eriqui seje co. ²⁶ Mae sete equia jendese co cote. —Mbua jiranduchĩ serasi rese re, i equia jenĩ co. Nyebe eya eã ndiqui nguiã nduate jendese cote. ²⁷ Ae bei. Erasi tuchi que eriqui rei ra. Mano serĩ tuchi rei que equia ra. Dios ia eã tuchi que eriqui erese ra. Nyebe embucherõ nguiã. Serĩ abe que Dios embucherõ nda. Sembia jiri sacua. Sã mbae riqui eĩ eĩ ja tuchi sembia eã se no. ²⁸ Nyebe Epafrodito amondo nguiã jẽje aque. Jembia sacua erasiã ndese cote. Seya eã nda sasẽ jiri jemae mose erese cote. ²⁹ Nanderesenda tuchi chõ ae Jesucristo rese re. Ngasẽ mose pee, jẽya chõ erese. Jẽisi turã ño. Eraanguia rese jẽingo turã mbei Jesús quiato. ³⁰ Jesucristo rĩ ngue mano serĩ serĩte ra. Jesucristo cheẽ nenei nenei mose. Siquiche ãte que equia ra. — Amanochĩ nda se re, i ãte que equia ra. Sereaqiutu turã tuchi que equia ra. Ishote quiatu ngue jẽingo nguiã jẽ. Sereaqiutu aronea.

3

Cristo mũ ndese aico cote, i Pablo

1 Jēya bei chō jēngo Jesucristo rese jē! Ae asenei senei nguia jēje nyii nae, ũquĩ sí tasenei senei jēje. Sebite secheē nenei nenei sí jēje. Jendua bei sacua ere.

2 Ae siqui nyacua raate nae, ũquĩ si jeny#cuasē ño nguia. Eicuâte riqui ũquĩ. Aba rete sia choño ño ũquĩ nde. Mbia mbaaquiato turā ndocoĩ. 3 Circuncisión ño nande re. Nandechiangui re chō nandeico nguia Dios rerequia nande ã. Nande chō nandeya riqui nguia Jesucristo rese ã. —Mbia circuncisión naa mose, aque mose quia ra Dios emingo bei cote, i chōchĩ emo hue jenda nguia ũquĩ. Nandequiato jiriã tuchi chō ũquĩ nde. 4 —Dios ra semingo bei, mbae turā naa naa mose, ae rei que se quia nyii ra. —Seturã nii nda Dios semingo bei, i chōchĩ emo. Seturã tuchi raque eriqui ũquĩ si. 5 Sechacuquia mose, ocho días mose que circuncisión naa seje ra. Israelita chō se re. Benjamín ndiirĩ nducucha chō se re. Hebreo chō se re. Paba abe que hebreo ra. Fariseo que se nyii ra. Moisés chimbesa que amumbayã nguia ra. 6 Aico asite que se quia Dios rese nyii ra. Jesús quiato que asiquisã tuchi quia nyii ra. —Pablo riqui Moisés chimbesa mumbate co, i aroneate que equia serĩ nda. 7 Ũquĩ nii ngue aico secuasura ra naa tuchi cose ra. Jesús icuayã mose se. Mbae eã tuchi chō ũquĩ seje cote re. Cristo rese quiato aico nguia co cote. 8 Mbae mo ndese aico queteã eãte co cote. Aico ndua eãte mbae mo ndese co cote. Jesucristo miĩ aicuate quia co cote. Ũquĩ eturãte mbae ja si seje cote. Jesucristo rĩ aico hui jate mbae si co cote. Iti rã ño mbae ja riqui nguia seje cote. Seico bei sacua Cristo rese. 9 Cristo rese tuchi chō aico nguia co cote. Aico bei rei que Moisés chimbesa rui nyii ra. Ũquĩ nii eã ño Dios seisi turã nguia. Se Jesucristo icua mose, ũquĩ mose quiato ngue Dios seisi turã nguia. Ae Jesucristo icua quia nae, ũquĩ Dios isi turã ño nguia. 10 Cristo aicuae tuchichĩ nguia co. Ae quirãcuã Cristo mbuquera si nae, aque quirãcuã nda siqui rã serese chã. Sã Cristo ñimbirãcuã mbia icuã si no. Eĩ ae rã nda ñimbirãcuã mbia icuã si chã. Sã Cristo mano nandecuã ndiquicharõ no. Eĩ ae rã nda mano mbae icuã si chã. 11 Eĩ mose ra Dios seraaque mbuquera si mingo bei cote.

Cristo miĩ ndese aico ndua co cote, i Pablo

12 Mbae quia asaã ja eãte rei nguia. Jesús turã na nguia ra aico jee cote. Co Dios riqui sembitirõ tirõ mbeite co. Co aico erui beite co. Jesucristo que seisi seico sacua ae rã si ra. Jesucristo turã na tuchi aicoã ndaque namo co. Nyebe aico nguia siqui tuchi erui co. Seico sacua tuchi chee ae rã si cote. 13 Ae ra Dios mee seje, ũquĩ asiiti ja eãte. Ae eĩ eĩ seje cose, ũquĩ si aico tesareite co. Ae ra Dios mee seje, ũquĩ nda asiiti. Ũquĩ miĩ ndese chō aico nguia ndua co cote. 14 Ae siqui tuchi quia Jesucristo rese, ũquĩ je quia ra Dios premio mee. Nyebe aico tuchi nguia ere co. Premio isi sacua. 15 Jē nande ja tuchi quiato quia siqui Jesucristo rese jē! Nande eicua tuchi mose. Jendua ja eã mose hue rĩ, Dios ra ñee jēje. —A ndese chō jēngo, i ra jēje. 16 Ae nandesiti nae, ũquĩ ndese bei chō nandeco. Ae rĩ Dios nandembaaquiato quiato nyii nae, ũquĩ ndese bei chō nandeco. 17 Serui bei jēngo, Seresenda. Ureico bei Jesucristo rui ã. Sã mbia siqui bei urerui. 18 Mbia tubiriã ndiqui Cristo ucuãyãte ã. Ũquĩ ae rei que se quia jēje nyii resē. Aba mbucheseo serĩ. “Cristo que mano mbia riquicharõ nda”, ũquĩ andu sereãte. 19 Ũquĩ nda nyoi ja tata cuásuu. Ubi rese achõ ño ũquĩ ndiqui nguia. Eireĩ nguiaete. Eya chō eriquichĩ nguia huicua ndese. Ibi jenda

achō ndese chō eriquichĩ nguiã ndua. ²⁰ Jesucristo riqui nanderirō mbae icuã si co. Ibei jenda chō nande cote re. Jesucristo ra tu ibei si nanderea cote. ã nandeico eraarō arō ã namo. ²¹ Jesucristo tu mose nande je ibii, nanderete ra embuchicuabo. Nanderete icuã ño siqui nguiã namo ã. Jesucristo rete nininya chō siqui nguiã co. Jesucristo ra nanderete mbuchicuabo nguete rã si. Uquirãcuã je ra nanderete mbuchicuabo. Sã mbae mbitirō ja arōte uquirãcuã je no. Eĩ nda nanderete je.

4

Jëya bei chō jëingo Cristo rese

¹ Secheseuca, andua tuchite quia jendese a. Amaese tuchi se quia jendese a. Seya tuchite aico jendese a no. ¡Jëingo turã tuchi chō Jesucristo rese jê! ² Evodia je tacheê. Síntique abe je tacheê. ¿Mbaerã jëingo siqui icuãte nyue re? Jëingo turã ño jenyue ae. Jesús quiato chō jê ndesê. ³ Nde abe je tacheê, Seresenda. Ũquĩ cuña emingo turã nyiese. Eteaquiato bei quia. Ũquĩ ngue siqui bei serese Jesús cheê nenei nenei mose ra. Clemente rese abe no. Eataque rese abe no. Dios que ũquĩ mbae nombre mii mii libro umbae rese ra. —Ũquĩ nda siqui bei serese, i que ra. ⁴ Jeñimbía bei Jesucristo rese. ¡Jeñimbía tuchi jê! ⁵ Sã mbia mae ja jêturã ndese. Jê abei rese. Achite Jesucristo ñi tu a. ⁶ Pari pari jenyechĩ nda mbae mo je. Jeñee ja quiato Dios je. —Mbae mo embu ure je, jenyê chō nguiã ee. Gracias jenyê chō nguiã ee. ⁷ Ũquĩ mose ra Dios jembía tuchi. —Mañi Dios quia ã mbia tuchi re, i nda mbia mae mose jendese chã. Jesucristo ra jeñia mbucoi tuchi. Jesucristo ra jembía bei mingo no.

Mbae turã ndese chō jëingo ndua

⁸ Hui bei nonde ã abe tambesa jêje. ¡Mbae icuã ndese ra jenduachĩ jê! Mbae turã ndese chō jëingo ndua. Ae riĩ nandeico ñee turãte, ũquĩ ndese chō jëingo ndua. Ichôñosa reã ndese chō jëingo ndua. Ae Dios bite nae, ũquĩ ndese chō jëingo ndua. Mbae quishĩ ndese chō jëingo ndua. Ae rese mbia turã ndiqui mae sete, ũquĩ ndese chō jëingo ndua. ⁹ Ae asenei senei nguiã jêje nyii, ũquĩ ndese chō jëingo jê. Ae eraã ndese jëingo mae mae seje nae, ũquĩ ño jêsaã saã mbei quia. Ũquĩ naa naa mose, Dios ra siquijendese. Jembía bei ra equia.

Jesús quiato ofrendas mondo Pablo je

¹⁰ Jendua ramombe equia serese ũquĩ. Dios sembia tuchite quia ũquĩ ndese co. Jêtesarei eãte rei que equia sesi nyii ra. Mbae que jemondo aroneate quia seje nyii ra. ¹¹ —Mbae ãte seje. Mbae mo embu seje, ae ãte se quia jêje co. Sembae eã mose, seyate ũquĩ mose. Sembae ñetê mose, seyate ũquĩ mose no. Ũquĩ je que achimbaaquiato se ra. ¹² Sembae eã mose, seyate ũquĩ mose se. Sembae tubiriã mose, seyate ũquĩ mose no. Seya beite aico co. Seriãcuã mose. Serio mose abe no. Sembae tubiriã mose. Sembae eã mose abe no. ¹³ Cristo que uquirãcuã mee seje ra. Equirãcuã je mbae asaã ja arondete. ¹⁴ Coche ngue mbae jemondo nguiã seje. Sembae eã mose. Seyate raque sembae eã mose. ¹⁵ Jê ae chō ngue mbae jemondo mondo bei nguiã seje. Se Jesús cheê nenei namo mose bei chō ngue mbae jemondo mondo nguiã seje. Iglesia mo abe que mbae mee ãte seje ra. Jê ae chō ngue re. Filipos jenda ja. Se Jesús cheê nenei nenei namo mose jêje, aque mose bei chō ngue mbae jemondo mondo seje. Seso ramo mose Macedonia si. ¹⁶ Sã ñi mbae mo jemondo mondo seje Tesalónica seico mose no. Mbae eã mose seje. ¹⁷ —Mbae

mo jemondochō seje, ae ãte quia jêje a. Dios je chō jêingo nguiã emondo ùqui. Dios ra mbae mondo tuchi jêje eribishorō. Ûqui ndese quiatu seya riqui nguiã. ¹⁸ Ae jemondo seje namo Epafrodito rese nae, ùqui ngue aisi ja ra. Dios bite jeñimondo. Ofrenda turã tuchi que ùqui Dios je ra. Mbaete rei sembae cote re. ¹⁹ Jesucristo resenda chō jê nde. Ae emoate jêje nae, ùqui nda Dios mee ja jêje. Dios quia mbae quereco ja nguiã. Equirãcuãte quia ñene. ²⁰ Sã mbia ñee turã mbei Dios rí. Nanderu rí. Amén.

Hui bei chō ã cote re

²¹ Jesucristo quiato je saludar jenyê ja seje. Ae Jesús quiato riqui serese nae, ùqui ucheẽ mondo quia saludar i jêje aque. ²² Jesús quiato a jenda ja ucheẽ mondo quia saludar i jêje aque. César chuchua jenda abe ucheẽ mondo quia jêje aque. Ae siqui quia Jesús rese, ùqui. ²³ Sã Jesucristo turã tuchi riqui jê ja je. Amén.

LA CARTA DEL APOSTOL SAN PABLO A LOS COLOSENSES

Pablo embesa mbesa Colosas jenda je

¹ Pablo chō se re. Dios chiirabo chō se re. Jesucristo que seirabo mingo ucheē nenei nenei sacuā nda. Timoteo rese aico ā mbesa mbesa jēje a. Nanderesenda Timoteo. ² Dios rimba Colosas jenda je chō aico nguiā co mbesa mbesa a. Cristo icuasa hue jenda ja je. Ae Cristo icua tuchi quia nae, ũqui ja je. Sā Dios turā ndiqui bei jendese. Sā eriqui jembia bei. Sā Jesucristo abe riqui bei jendese.

Pablo ñee Dios je Jesús quiato rñi

³ Nandererecua tuchi rei Jesucristo. Dios rei eru. Ureico beite ñee Dios je jeniñi. Gracias ure beite equia jeniñi. ⁴ Ureirandu turāte quiatu ngue jendese re. Jesucristo jēicuate quiatu nguiā ure je ũqui. Jenyesequa tuchi quiatu nguiā Dios quiato rese ũqui. ⁵ —Cristo rese ra nandeico je ibate, jenyete quiarei equia icua ũqui. ũqui ndese que jēirandu tuchite nyii ra. Jesucristo cheē nenei nenei namo mose jēje nyii. ⁶ Jesucristo quiato echeē senei senei mbeite quia mangue choñoa jenda ja je. Nyebe Jesús quiato riqui nguiā ñimbeta i i tuchi. Sā nandeico mbae a ucua ucua no, eñi chō ñene. Sā eriqui Jesucristo cheē nenei nenei jēje nyii no. Sā Jesucristo cheē jeñia mbitirō eandu ramo mose no. ⁷ Epafras abe que jembaaquiato quiato Cristo rñi nda. Cristo resenda tuchi chō ae re. Ae chō Cristo cheē senei senei turā nguiā co. Nanderesenda tuchi chō ae re. ⁸ Ae que sembiirandu turāte jendese ra. Espíritu Turā ndiqui tuchi jendese ũqui. Nyebe jēingo nguiā nyesequa turāte mbia rese ũqui.

⁹ Ureirandu mose jendese ũqui ndese, aque mose bei chō ureico nguiā ñee Dios je jeniñi. Dios jemingo bei sacuā ubi rese. Ucheē abe rese. Dios uquiato mee sacuā jēje. ¹⁰ Jēingo turā sacuā Dios mbia. Jēingo turā sacuā mbae turā ja rese. Jē Dios icua i i tuchi sacuā. ¹¹ Dios jembirācuā tuchi sacuā uquiato je. Jeñimbirācuā tuchi sacuā mbae rasi je. I nda jēingo tochi tuchi mbae ja je. ũqui mose ra jēyate no. ¹² Ureico gracias i tuchi Dios je. Ae quiatu ngue nandembuchiicabo nguiā. Ae ra Dios mee uquiato ja je mbae turā nae, nande abe je ra emee. Dios quia nandererequa turāte nguiā nyaashñi na co cote. ¹³ Mbae icuā nguiato que nanderereco quia itondáruu nyii ra. Dios que nandembui ũqui si cote ra. Nguiirñi ndese que nandemingo cote ra. ¹⁴ Dios riirñi ngue nandemingo umbaerā mbei ra. Mano ngue nanderiquicharō nda. Nandeicuā ngue embutiā mbei nyesi ra.

Cristo que mano nandemingo turā sacuā Dios rese ra

¹⁵ Mbua mae aroneate raque Dios rese. Dios rā si tuchi chō Cristo re. Ae rane ngue siqui Dios chiao mbae ja si ra. Ae que nyecua u mbia je cote ra. ¹⁶ Dios ae que mbae chao eñi nda. Nguiirñi ndese quiatu ngue mbae ja ao nguiā. Mbae ibatenda ao ja. Mbae ibi riinda abe ao ja no. Ae rese nandeico mae ā nae, ũqui ja que Dios chao nguiirñi ndese ra. Ae rese nandeico mae aroneate nae, ũqui abe que echao nguiirñi ndese no nda. Mbua rerecua ja abe no. Aba checuayā ja abe no. ũqui ja que Cristo chao ngu rese ra. Cristo mbaerā ño ũqui ja re. ¹⁷ Mbae ao ja nonde Cristo riqui rei nyii. Erñi ño mbae riqui ja

nguiã ã cote. ¹⁸Dios quiato rerecua ja chõ Cristo riqui nguiã co. Sã nandeãquĩ nanderete rerecua no. Cristo rei mbae i tuchi. Mbae i ja. Ae rane ngue quera si manonde ra. Ae rei mbae rerecua ja tuchi. ¹⁹—Se rã sí tuchi Cristo jê, i que Dios ra. ²⁰Cristo mano mose, nandemingo turã sacua Dios rese chõ ñene. Nande mii mingo turã sacua eã ño ñene. Mbae ja mingo turã sacua Dios rese chõ Cristo mano nguiã. Mbae ja ibi riinda. Mbae ibei riinda ja abe no.

²¹Ishote que jêingo Dios si nyii ra. Mbae icua naa naa mose. Uquĩ mose que jêingo Dios ucuayãte ra. Jendua ndua icuate que equia erĩ nda. Namu nguia eriqui nguiã jemingo turãte uchiese uquĩ. ²²Cristo quiatu ngue mano nguiã jeni. Mbia rete raanguia rerequia mose. Mbae rasi que esaã tuchi umano mose ra. Jeni ño ngue mbae rasi raã nguiã. Jêicua mbutiã sacua. Jemingo turã sacua icue Dios mbaerã. ²³Nyebe jeñimbirãtã jiri quia Jesús icha rui. Jeñimondocho eã mbei quiatu quia jê. Jêhui eã ño Jesús cheẽ turã si jê. Jesús cheẽ turã ngue jeñandu tuchi quia. Mangue chooñoa jenda ja que echandu ra. Se abe asenei senei tuchi quia Dios cheẽ nguire co. Pablo chõ se re.

Dios que seirabo ra, i Pablo

²⁴Se mbae rasi raã mose jêje, seyate aico se co. Cristo quiatu ngue mbae rasi saã tuchi nguiã nande je nyii. Se mbae rasi raã mose, Cristo abe chõ mbae rasi saã nguiã serese. Cristo rete rã ño Cristo quiato riqui nguiã. Nyebe seyate riqui nguiã serete mbae rasi raã mose Cristo quiato je. ²⁵Dios que seirabo uquiato mbaaquiato quiatu ja sacua nda. Iglesia jenda ja. Dios cheẽ mbuchecua ja tuchi sacua jêje. ²⁶⁻²⁷Dios que seirabo judíos eã mbaaquiato quiatu sacua nda. Ae Dios mbuchecua eã mbei judíos je nyii nae, aico uquĩ mbuchecua Jesús quiato ja je ã cote. ã ndei ã: Cristo riqui jeñiangui re ã cote. Ae mii ño aba mingo arõ nguiã Dios rese co. Uquĩ ño Dios mbuchecua ramo nguiã uquiato je co. ²⁸Cristo mii nii ño aico nguiã ñee mbia je co. Mbiaambutu mbuti chõ nguiã Cristo icha rui co. Seaquiato je chõ aico nguiã mbia mbaaquiato quiatu Cristo rii co. f nda Jesús quiato ja riqui siqui i i tuchi erese. ²⁹Nyebe serecoteã tuchite riqui nguiã uquĩ ndese co. Dios quia sembirãcuã mbeite nguiã co. Mbia mbuti mbuti sacua Cristo icha rui.

2

¹Co secheẽ jeñandu rã. Andua ndua tuchite se quia nimbecoteã jendese co. Acheẽ tuchite se quia Dios je jeni co. Laodicea jenda nii abe no. Ae mae ãte quia serese Jesús quiato nae, uquĩ nii abe no. Mbia mbaaquiato icua icuãsa riqui jembui serite Cristo si uquĩ. ²Jê ja rii aico ñee Dios je co. Jêingo i i sacua Dios rese jeñiangui re. Jenyeseua ja sacua jenyiese. Jendua ja sacua hue rĩ si. Jêaquiato tuchi sacua Cristo rii. f nda Cristo jêicua tuchi cote. ³Cristo mii tuchi chõ aba mbaaracua nguiã co. Ae mii tuchi chõ aba mbaaquiato nguiã Dios rese co. ⁴Mbia jembuirĩ irĩ eã sacua ño aico nguiã ñee jêje co. Mbia cheẽ turã abareãte raque. Jesús cheẽ ndui eãte quia ñene. ⁵Aico ndua ndua tuchi jendese co. Siqui rocoĩ jendese. Ae rese airandu jendese nae, sembia tuchi chõ uquĩ nde. Jêingo turã mose jenyiese. Jê Cristo icua i i tuchi mose. Nyebe seya bei tuchi riqui nguiã jendese co. ⁶Sã Jesucristo jêisi nyii no, eĩ jenye si chõ nguia siqui bei erese. ⁷Sã ira riqui ngao mondo tuchi ibiqui rĩ no. Ñimbirãcuã tuchi sacua. Eĩ jenye si chõ nguia jê abe jê. Jeñimbirãcuã ño nguia Cristo rui. Cristo jêicua tuchi quiatu quia. Secheẽ ñiinda rui sí. Gracias jenye bei chõ nguia Dios je.

Dios que jembiasu Cristo rã cote ra

⁸ Mbia ra jembĩĩrĩ irĩchĩ jembĩcha nonde Cristo si jẽ. Ũquĩ ñee turã arõte raque. Ñee iru iru chõ nguiã ũquĩ. Ñimbucha eãte equia Cristo rese ũquĩ. Mbia cheẽ achõ ño echeẽ nde. ⁹ Dios rã si tuchi rei Cristo. Mbia rete raãte raque Cristo rete. ¹⁰ Ũquĩ jẽingo ñimbucha Cristo rese ũquĩ. Cristo rã sí tuchi rei nande cote. Cristo quiarei ererecua tuchi mbia rerecua ja si. ¹¹ Cristo que jembui jenyiosei osei icuã si cote ra. Jemingo que icúe Dios mbaerã cote ra. ¹² Ũquĩ jẽingo Dios quirãcuã icuate ũquĩ. Sã mbia Jesús raque ati rei no. Eĩ si chõ jẽ Jesús icua mose re. Jendaaque ati rã si chõ jẽ Jesús icua mose re. Sã Dios Jesús mbuquera si uquirãcuã je no. Eĩ si chõ jẽ Jesús icua mose re. Jembuquera si rã ño jẽ Jesús icua mose re. Dios chõ Jesús icua uquia nguiã jẽje. ¹³ Isho que jẽingo rei Dios si cose ra. Jenyiosei osei icuã ndese siqui bei mose. Jẽ jẽicuã nderequia bei mose. Dios que ngueco mee jẽje cote ra. Jẽ Cristo icua mose. Dios que jẽicuã mbutiã cote ra. ¹⁴ Ae icuã nandesã saã nguia Dios je nae, Dios que ũquĩ mbutiã nandesĩ ra. Ae cheẽ nandemumba mumba quia mbia nae, ũquĩ ñee ngue Dios mbutiã nandesĩ cote ra. Dios nandeicuã mbucha raanguia Cristo rese chõ ñene. Cristo chí mose cruz rese. ¹⁵ Cristo mano mose que aba checuayã nderecua quirãcuã mbutiã nda. Cristo que aba checuayã mbuquirãcuã nea ja ra. Mbia resa rae que embuquirãcuã nea ja ra.

Mbia chisaã saã ndese ra jẽingochĩ jẽ

¹⁶ Sã emo jendiquisã quisã eã mbei mbaeiae mo si. Jẽ mbaeiae u sereã mose, jẽu eã ño. Jẽ euse mose, jẽu chõ. Jẽ jẽingose mose mbae mo ndese sábadu mose, jẽingo chõ erese. Jẽ jẽingose mose mbae mo ndese nyasi yasu mose, jẽingo chõ erese. Jẽingo sereã mose erese, jẽingoã erese. ¹⁷ Cristo siqui nonde ibii chõ ngue ũquĩ ja nyii re. Mbia Cristo ru raarõ sacua ño ngue ũquĩ nyii re. Cristo tu mose que ũquĩ quiachã ja cote ra. ¹⁸ Mbia jembĩĩrĩ irĩchĩ jembĩcha nonde Cristo si jẽ. Ae useteã saã ñooño nguia nae. Ae “Dios chõ ñene” i quia ángeles je nae. “Se quiatu” i chooño ño nguiã eaquiату rocoĩ. Ndua turã eã ño nguiã Dios rese ũquĩ. Unduasa rese achõ ño eriqui nguiã ucuasu raã naa ũquĩ. Ũquĩ nda jembĩchachĩ Cristo si jẽ. ¹⁹ Ñimbucha eã ño nguiã Cristo rese ũquĩ. Ererecua raque Cristo. Sã nandeãquĩ ndiqui nanderete mingue turã ja no. Eĩ si chõ Cristo uquiato mingue turã ja nguiã nyiese ã. Nyebe Cristo quiato riqui nguiã Cristo icua i ite ã. Dios chõ Cristo icua uquia i i nguiã ee.

²⁰ Cristo mano mose que jẽ abe jemano erese resẽ. Mbia chisaã saã ima si que jẽhui turã ndesẽ. ¿Mbaerã nda ũquĩ ñee ndui si jẽingo si cote re? ²¹ Sã ũquĩ ndiqui ñee no: “Jẽocochĩ nda ã ndese. Æ nda jẽuchĩ no. Ũquĩ nda jẽisichĩ jẽo je no”, sã eriqui i no. ¿Mbaerã jẽingo ũquĩ ñee mumbayãte re? ²² Mbia cheẽ achõ ño ũquĩ ndesẽ. Dios cheẽ eã ño ũquĩ ndesẽ. Nandechiurã ño mbae ja resẽ. ²³ Ũquĩ ñee turã arõte raque. Eturã arõte raque mbia mbaeiae uã mose. Mbia mbaeiae uã mose, eaquiату arõte raque. Siqui mingue arõte raque. Ũquĩ nda aba chiousei osei icuã mbutiã eã. Ũquĩ nda aba mingue eã Dios miĩ ndese.

3

Jendua chã mbae ibatenda rese

¹ Dios que jendaaque mbuquera si Cristo rese resẽ. Nyebe jẽingo mbae ibatenda osei. Mbae ibi jenda osei rocoĩ. Cristo quia chí nguiã ngoi ibate ngu jii hue. ² Jendua quiату quia mbae ibatenda rese. Mbae ibi jenda rese ndua

rocoĩ. ³ Jemano ngue Cristo rese resẽ. Dios que jembucha Cristo rese resẽ. Nyebe Dios riqui nguiã jendeco rerecoquiato jêje co. ⁴ Dios chõ nandereco mingo nguiã Cristo rese co. Cristo tube mose ra jendete mbiasu tuchi cote. Jenininya tuchi ra erese cote.

Cose ndare rã eã ño jêingo nguiã ã cote

⁵ Ae icuã jendeco quia jeñiangui re nae, ùqui icuã jêquiti chõ jenyiesi. Jenyioseĩ oseĩ icuã jêquiti chõ jenyiesi. Jêingochĩ nda jeninisiã mo ndese. Jendu eã ndese ra jêingochĩ no. “Aque rese nda aico rã ña”, jenyechĩ nda emo nĩ jê. Mbae icuã mo ndese ra jendua ndua jirichĩ jê. Emo mbae ra jenyoseĩ choseĩchĩ jê. Dios abareã ndese siqui raanguia chõ ùqui nde. ⁶ ã icuã ja rĩ nda Dios mbia mbasi. Ae echeẽ mumba mumbate quia. ⁷ Jê abe que ã icuã jêsaã saã tuchi quia nyii ra. Cristo icuayã mose. ⁸ ã icuã jêjea ja chõ jenyiesi cote. Jê paama i. Jêicuã icuã nyue. Jeñee nyecua nyecua emo nĩ. Jenyuru icuã. ã jêjea ja chõ jenyiesi. ⁹ Jeñee ñooñochĩ nda jendesenda je jê. Jê mbae oseĩ oseĩ icuã ñiinda que jembuquiachã jenyiesi resẽ. Jenyisaã saã ima jêsaã eãte quia ùqui cote resẽ. ¹⁰ Jeñimbiasu ji chõ jêingo nguiã ùqui. Nyebe Cristo riqui nguiã jembaaquiato tuchi Dios rĩ ùqui. Jêingo turã sacuã Dios rã si. ¹¹ Cristo quia rei mbia mbuchiabi abiã tuchi. Judíos raque. Judíos eã ndaque. Ishonda mo ndaque. Ae eaquiatuãte raque. Mbã rimba raque. Mbã rimba eã ndaque. ùqui ja Cristo mbuchiabi abiã tuchi. ùqui ja chiangui re Cristo riquise rete. Cristo siqui mose nandechiangui re, ùqui nguia rei eturã tuchi mbae ja si.

¹² Co Dios riqui nyesequa tuchi jendese co. Dios que jêirabo mingo icúe umbaerã nda. Nyebe jêingo nguiã siqui turãte. Jêya eã ño jêingo mbia rese. Jêseteã ño jêingo mbia rese. Jêingo tochi chõ nguia. Jendoseĩ nguiatu chõ jêingo. ¹³ Jeñimbiãcuã ño nguia jendesenda rese. Jêtesarei chõ nguia jendesenda icuã icuã mose jêje. Sã Cristo tesarei jêicuã si no. ¹⁴ Jenyesequa tuchi quiatu quia mbia rese jê. Dios cheẽ tuchi chõ ã nde. Jenyesequa tuchi mose mbia rese, mbae turã ja rese chõ nda jêingo tuchi cote. ¹⁵ Jeñimbia bei chõ nguia Dios rese. f nda jemingo turã mbei jenyue. ùqui nĩ ño Dios jemingo nguiã icúe umbaerã. Jesús rete mĩ na ño Dios jemingo nguiã ùqui. “Coche ñene” jenyie bei chõ nguia Dios je. ¹⁶ Sã Cristo cheẽ ndiqui tuchi jeñiangui re. Jêaquiato tuchi nda jêingo chã. Jenongue jembaaquiato quiatu chõ nguia. Jenongue jembuti mbuti quiatu quia Cristo cuti. Jêirasei rasei tuchi quiatu quia Dios je. Himnos. Salmos. Jêya chõ jêingo irasei rasei Dios je. ¹⁷ Jê mbae raã mose, Jesús rĩ ño jêsaã. Ae jêingo ñee nae, Jesús rĩ ño jeñee. Gracias jenyie bei chõ nguia Dios je Jesús rĩ.

Ae jêsaã nguia nae, jêsaã ño Cristo je

¹⁸ Tacheẽ mbia ninisi je. Jendu cheẽ jemumbayã ño nguia. Diosbi tuchi chõ ùqui nde. ¹⁹ Eru, jenyesequa tuchi quiatu quia jeninisi rese. Jêingo tochi chõ nguia ee. ²⁰ Mbã riiri, jendu cheẽ jemumbayã mbei chõ nguia. Jêsi cheẽ abe no. Diosbi tuchi chõ ùqui nde. ²¹ Jendiiri nda jembupaama ichĩ jenyue jê. f nda ñimondocho eã. ²² Tacheẽ erimba je cote. Jenderequa cheẽ jemumbayã mbei quiatu quia. Emae eã mose abe quiatu echeẽ jemumba eã. Jêseteã jêsaã ñooñoa nguiatu quia ee. Dios je quiatu jêingo mbae raã turã ja. Ae quia mae mbeite nguiã jendese co. ²³ Jê mbae raã mose, jêsaã turã ño nguia. Mbã je eã ño jêingo nguiã mbae raã. Dios je chõ jêingo nguiã eraã. ²⁴ Dios ra mbae turã mee jêje jenyisaã turã ndibishorõ. Cristo je chõ jêingo nguiã mbae ao ao ùqui.

Jenderecua tuchi chō ae re. ²⁵ Ae mbae icuã saã nguia nae, Dios abe ra mbae icuã mee ee echisaã icuã ndibishorō. Dios ra emo mbasi chooño eã. Emo nda eisi turã ñooñoa no.

4

¹ Mbia rerecua je tacheẽ cote. Jenimba jembuquieĩ quieĩ chooño eã ño nguia. Mbae jêsaã turã jiri quiatu quia jenimba je. Jê abe jenderecua riqui Dios co no.

² Jeñee ñee mbei quiatu quia Dios je. Jêtesa tesa bei quiatu quia Dios rese. Gracias jenyee bei quiatu quia ee. ³ Jeñee ñee mbei quiatu quia Dios je ure riĩ. ¶ nda Dios riqui sembucheẽ ñee mbei tuchi mbia je Cristo riĩ. Ae rese mbia riqui jiranuate Cristo rese nae, ũqui asenei senei sete mbia je. Nyebe setarō ji aĩ nguia a. ⁴—Paba, sã Pablo Jesucristo mbuchecua checua tuchi quia mbia je, jenyee bei quiatu quia Dios je.

⁵ Jeñimbaaracua chō nguia siqui turã Jesús quiatoã je. Ae Dios bite nae, ũqui ndese chō jêingo ñimbecoteã. ⁶ Sã embiquesa riqui mbae mbiise no. Eĩ jenyee si chō nguia ñee turã mbia je. ¶ nda jêaquiatute ñee Jesús quiatoã ñee ndibishorō.

Pablo ñee hui bei

⁷ Tíquico si quia jendea aque. Ae ra mbae senei ja jêje jembiiirandu serĩ. Ae que mbae saã turã mbeite quia serese ra. Dios rimba turã tuchi chō ae re.

⁸ Nyebe amondo nguia jendea aque. Jembiiirandu ja sacua serese. Jembia tuchi sacua Cristo rese abe. ⁹ Onésimo abe si quia erese aque. Hue jenda sí chō ae re. Jesús quiato tuchi chō ae abe re. Ũqui nyeremo nda jembiiirandu tuchi a jenda ja rese.

¹⁰ Aristarco tarō ji ñi serese a. Ae abe saludos mondo quia jêje aque. Marcos abe saludos mondo quia jêje aque. Bernabé nongue riirĩ ño ae re. Ae oso mose jendea, jêisi turã ño secheẽ nguire. Acheẽ ngue jêje eriĩ nyii. ¹¹ Jesús Justo abe saludos mondo quia jêje aque no. Ũqui mii judíos que siqui tuchi quia serese Dios cheẽ nenei nda. Ũqui ngue sembiate quia mbae raã turã mose serese ra. ¹² Epafras abe saludos mondo quia jêje aque no. Cristo rimba rei ae no. Jendesenda sí chō ae no nde. Ae ñee mbeite quia Dios je jenii co. Jêingo iratã sacua Dios rui. Ae Dios bite riqui nae, ũqui ndese jêingo tuchi sacua. ¹³ Epafras riqui nyesecua tuchite jendese co. Aicuate se quia co. Laodicea jenda rese abe eriqui nyesecua tuchite co. Hierápolis jenda rese abe no. ¹⁴ Lucas abe saludos mondo quia jêje aque no. Aba rasi rea reasa rei ae. Médico rei ae. Jesús chesecua tuchi chō ae re. Demas abe saludos mondo quia jêje aque no. ¹⁵ Jesús quiato Laodicea jenda je saludar jenyee rã ure je. Ninfas je abe saludar jenyee. Ae ñumunua nua nguia Ninfas chuchua Jesús quiato nae, ũqui abe je saludar jenyee rã ure je. ¹⁶ Ae ambesa mbesa quia a nae, emondo nonde jêje a nae, ã je leer jenyee ja rã. Aquere jemondo rã Jesús quiato Laodicea jenda je. Ũqui abe leer i sacua ee. Ae carta ambesa Laodicea jenda je nae, jê abe leer jenyee ee no. ¹⁷ Jeñee na Arquipo je. —Ae je Jesús ñee nae, “co esaã seje” i ndeje nae, ũqui esaã turã ja chō, jenyee Arquipo je.

¹⁸ Hui bei sacua co ambesa mbesa quia seo ae je co. Pablo chō se re. Jendua serese setarō ji rese. Sã Dios riqui turã tuchi jêje. Amén.

PRIMERA CARTA DEL APOSTOL SAN PABLO A LOS TESALONICENSES

Pablo ã mbesa

¹ Pablo rei se. Silas riqui serese a. Timoteo abe no. A urembesa mondo quia jêje aque, Tesalónica jenda. Ae ñumunua nua mbeite quia Jesús rñ. Jesucristo icuasa chõ jê nde. Dios icuasa abe chõ jê no nde. Dios rei nanderu. Jesucristo rei nandererecua. Sã ûquí turã ndiqui bei jêje. Sã ûquí ndiqui jembia bei.

Jesús jêicuate quia ûquí

² Gracias, ure bei quia Dios je jeniã ã. Jê ja rñ. Ure ñee mose Dios je, jeniã ño ureico nguiã ñee ñee ee ã. ³ Jesús jêicuate quia ûquí. Nyebe jêingo beite nguiã mbae turã ndese ûquí. Jenyesequate quia Jesús rese ûquí. Nyebe jêingo nguiã Dios cheẽ nenei nenei mbei mbia je ûquí. Jesús nyebi sí mose, ûquí ño jêsaarõ arõ u nguiã hue. Jeñimbirãcuã tuchi equia eraarõ arõ ûquí. ⁴ Seresenda, Dios riqui nyesequa tuchi jendese co. Dios que jêirabo umbaerã nda. ⁵ Dios cheẽ turã ngue uresenei senei nguia jêje ra. Urecheẽ achõ je eã. Espiritu Turã abe que jembaaquiату quiatu ra. —Ichõño eã tuchi chõ Dios cheẽ nde, ure que equia erenei nenei jêje ra. Ureico mose jendese que ureico turãte jêje ra. Ûquí ndese que jêingo mae nda. ⁶ Ure rã si que jêingo Dios rui ra. Nandererecua rã si que jêingo ra. Dios cheẽ ngue jêisi tuchi ra. Nyebe que mbia icuã tuchi riqui jêje ra. Mbia icuã icuã mose jêje que Espiritu Turã ndiqui tuchi jendese ra. Jembia tuchi sacuã. ⁷ Nyebe Jesús icuasa riqui nguiã siqui turã jendui. Jesús icuasa Macedonia jenda. Acaya jenda abe no. ⁸ Nandererecua cheẽ ngue jêsenei senei tuchi quia Macedonia jenda je ra. Acaya jenda je abe no. Ishonda ja je. Mbia que jirandu ja quia jendese ra. —Dios icuasa rei ûquí, i equia jeniã ûquí. ¿Mbaerã nda Dios cheẽ asenei ee re? Jembiirandu turã ngue eno. ⁹ Ûquí nguia ñee turãte nguiã jeniã ûquí. —Tesalónica jenda que Pablo isi turã nda. Pablo resenda abe isi turã. Hui tuchi que Dios raanguia si ra. Siqui bei nonde Dios reco rese cote, i equia jeniã ûquí. ¹⁰ —Tesalónica jenda chi Jesús raarõ arõ huee. “Tu ra nyebi ibate si”, i u huee, i equia jeniã ûquí. Jesús rei Dios reco riirĩ. Dios que Jesús raaque mbuquera si ra. Jesús ra nanderiquisã mbae rasi si. Dios mbia icuã mbasi mose.

2

Dios cheẽ uresenei tuchi jêje

¹ Ureso choõño eã ngue equia jendea ra, Seresenda. Dios cheẽ ngue uresenei tuchi quia jêje ra. Jêisi turã turãte que equia ra. Ureso mose jendea. ² Ureso que Filipos nyii ra. Hue jenda que mbia icuãte riqui ure je ra. Ureirua nua ngue ra. Ûquí jêicuate quia ûquí. Aquere que Dios cheẽ turã uresenei senei tuchi jêje cote ra. Ureso mose jendea. Dios que urembusiquiche eã tuchi ra. Mbia icuã tuchi raque ure je. ³ Dios cheẽ ngue urechabi chabiã tuchi quia erenei nenei nda. Ûrendua icuã icuã eã ngue equia ñee mose jêje ra. Jemburĩ irĩ eã. ⁴ —Mañi nda equia reae, i que Dios quia ure je nyii ra. Maende ure rese que ureirabo cote ra. Echeẽ turã nenei nenei sacuã. Mbia mbia sacuã eã ño ureico nguiã Dios cheẽ nenei nenei jêje. Dios mbia sacuã

ño ñene. Dios riq̄ui mae mbeite urechiangui renda rese co. ⁵ Urecuas̄u que uredsā sā eāte quia j̄eje ra. Urecheē ñoño eāte que equia j̄eje ra. Jemb̄ir̄i ir̄i eāt e que ureico quia ra. —Sā mbia mbae mo mee mee ure je, ure eāte que equia jemb̄ir̄i ir̄i nda. Dios riq̄ui maete urerese co. ⁶ —j̄enderecuarā nda ure cote j̄e! ure eāte que equia j̄eje ra. Ure eāte que equia mbia mo abe je ra. Cristo ch̄imondo raque ure, echeē nenei nenei sacuā j̄eje. ⁷ Ureico turā ngue equia j̄eje ra. Sā esi mo ndiqui nguiir̄i nderequia turā, eī ure ch̄o ngue equia j̄eje ra. ⁸ Urechesequa tuchi que equia jendese ra. Nyebe Dios cheē ach̄o eā uremee nguiā j̄eje. Mbae ja uremeese rete raque j̄eje.

⁹ Urechisā sā ndese que j̄eingo mae tuchite ra, Seresenda. Ureico mose jendese. Mbae que uredsā sā mbeite quia ra. Ure ae ch̄o urechiurā ureisi isi nguiā. Nyaash̄i mose ach̄o eā ngue ureico mbae raa naa nda. Itondaru mose ab e que ra. †nda je mbae j̄emondoā ure je. Ure Dios cheē nenei nenei mose j̄eje. ¹⁰ Jesús icuasa ch̄o j̄e cote re. Urecuata turāte que equia j̄eje ra. Jemaē ngue equia urerese ra. Dios abe que mae nguia urerese ra. Ureico mose jendese. Ureico turāte que equia ra. Nyebe emo ñee icuā aroneate urer̄i. ¹¹ Jendu rā ngue ureico j̄eje resē. Sā emo ndiqui nguiir̄i mundua turā no. Sā emo ndiqui nguiir̄i mbucuata turā no. Eī si ch̄o ure re. Jemundua ndua. Jembucuata turā nonde. ¹² Urecheē tuchi que equia j̄eje. —Dios quiato ch̄o j̄e cote re. Nyebe j̄eingo nguiā Dios mbia beite cote. Dios que j̄erabo ra. Dios ra jenderecuata tuchi cote. Dios ra uturā mee j̄eje, ure beite que equia j̄eje ra.

¹³ Gracias, ure bei equia Dios je j̄eni a. Dios cheē nguiatu ngue j̄eisi turāte nguiā. Ure Dios cheē nenei nenei mose j̄eje, j̄eisi turā ngue ra. Mbia cheē na eā ngue Dios cheē j̄eje ra. Dios cheē ngue jembuturā nda. J̄e eisi mose. Gracias ure que Dios je, j̄e echeē isi mose ra. ¹⁴ Sā judíos icuā icuā Jesús quiato Judea jenda je no. Eī si ch̄och̄i mbia icuā icuā j̄eje no, Seresenda. J̄e ji jenda ch̄o eicuā icuā ndiqui nguiā j̄eje Jesús r̄i ūquī. ¹⁵ Judíos sí que Jesús iquia nandererecuata ra. Sā Dios cheē mbuchecuasa iquia nyii no, eī sí que Jesús iquia no nda. Ure abe mombo no. Judíos icuā tuchi que ūquī nda. Ā eicuāte riq̄ui Dios je ā. Mbia abe je eicuāte riq̄ui ā no. Mbia ja je. ¹⁶ —¿Mbaerā nda j̄eso Dios cheē nenei nenei Judíos eā je re? i que equia ure je ra. Ureriquisā quisā ndei que equia ra. Dios cheē ngue uredenei mbei bei ch̄o judíos eā je ra. Dios erir̄o sacuā eicuā si. Judíos que urecheē siquisā quisā ño nguia ra. Judíos que huicuā sā i i tuchi quia ra. Nyebe que Dios paama i tuchi ee cote ra. Dios ra embasi tuchi cote.

Sesose rete jendea

¹⁷ Seresenda, ishote urecu j̄eisi a. Nyebe ureya eāte riq̄ui nguiā jendese ā. Uremaese rete quia jendese ā. Urendua beite quia jendese ā. ¹⁸ Uresose rete rei que equia jendea ra. —Taso erea, ae beite rei que se quia ra. Pablo rei se. Satanás que ureriquisā quisā ño nguia ra. ¹⁹⁻²⁰ Jesucristo ra tu si nyebi nanderea. Seya tuchi aico eraar̄o ar̄o a. J̄e nguia uremombia mbia beite nguiā ūquī. J̄ech̄i Jesús quiato. Nyebe ra ureya jendese Jesús tube mose. Ure Jesús cheē nenei nenei mose que j̄eisi turā nda. Nyebe ra Jesús ia tuchi urerese eru mose.

3

¹ —Tairandu tuchi rā erese, ure tuchi que equia j̄eni nda. Urendua ndua tuchi que equia jendese ra. Nyebe ure ae ureico nguiā Atenas. ² Nyebe que Timoteo amondo rei nguiā jendea. Jirandu sacuā jendese. Dios rimba tuchi

que ae ra. Nanderesenda tuchi que ra. Cristo cheẽ turã nenei neneisa que ae ra. Ae que uremondo jendea jemundua ndua sacua Jesús rese ra. ³ Timoteo que amondo jendea ra. † nda jẽhui eã Dios cheẽ si mbia icua mose jẽje. Mbia icua tuchi que eriqui jẽje ra. Nande je ja que eicuãte riqui ra. Jesús icuasate quia nande re. Nyebe mbia icuãte riqui nguiã nande je. ⁴ Ureico que equia jendese nyii, aque mose que ureico rei ñee jẽje resẽ. —Mbia icua tuchi ra eriqui nande je, ure rei que equia jẽje nyii resẽ. ¡Sã ngasẽ cote jẽ! ¡Sã mbia icua icua nande je cote jẽ! ⁵ Nyebe seiranduse beite riqui nguiã jendese. Nyebe Timoteo amondo rei nguiã jendea. Ureirandu sacua. —¡Quiatu Jesús quiato rea jẽ! Siqui bei rei equia Jesús rui reae. Aba mbĩĩĩ irĩsa embĩĩĩcua eã ndei reae. Dios cheẽ nandesenei ñooño eã ndei ee reae, ae que Timoteo mondo jendea ra.

⁶ Ae que Timoteo tu jẽsi cote ra. Ñee turãte que u jeni nda. —Hue que echi Dios icua tuchi ra. Hue que echi nyesecua tuchi Dios rese ra. Nande abe rese que echi nduate huee ra. Eyayãte eriqui rei nanderese, i que Timoteo u urembiirandu jeni nda. Ure abe ureyayãte riqui jendese ã. ⁷ —Hue que echi Dios icua tuchi ra, i mose que ureya tuchi ra. Mbia icuãte raque ure je. Seresenda, jẽ urembiate quia ũqui. ⁸ Ureya tuchite jendese, jẽingo bei mose nandererecua rese. ⁹ Dios urembia tuchite quia jendese co. Nyebe ureico nguiã gracias i ee co. ¹⁰ Dios je que ureico ñee mbei ra. Nyaashĩ mosechõ eã. Itondaru abe. —Paba, urererao rã mbia rea, ure bei que equia Dios je jeni nda. † nda jembaaquiatu ji jẽingo tuchi Dios rese.

¹¹ Dios rei nanderu. Jesucristo rei nandererecua. ũqui je ureico ñee tuchi ã. Urererao sacua jendea. ¹² Sã nandererecua jembuchsecua tuchi jenyiese. Mbia ja rese. Sã ureico nyesecua tuchi jendese no. Eĩ jenyee si chõ nguia nyesecua mbia rese jẽ abe no. ¹³ † nda Cristo uquirãcua mee jẽje. † nda Cristo jemingo icue umbaerã tuchi. † nda jemingo turã mbei Dios rese. Jesucristo tu mose chee ibate si. Mbia ra ñee icua aroneate jeni cote. Ñee icua aroneate ra Dios je jeni. Jesucristo tu mose ra Dios mae jeturã ndese. Jesucristo ra tube uquiato ja rese.

4

Jẽingo turã, i Dios mbia je

¹ Seresenda, tacheẽ tuchi jẽje. Jesús cheẽ ngue uresenei senei tuchi quia jẽje ra. ũqui ndui chõ jẽingo turã ndei nguiã ũqui. Jẽingo i i tuchi quiatu erui jẽ. † nda Dios ia tuchi jendese. Secheẽ ae eã ño ã nde. Jesucristo cheẽ ño ñene. ² Nandererecua tuchi chõ Jesús re. Ae chõ urembucheẽ nguiã jẽje. Ae cheẽ si jẽingo tesareĩ ãte ũqui. ³ Dios jemingo sete quia icue umbaerã co. ¡Emo ninisi rese ra jẽingochĩ jẽ! ¡Eru eã mo ndese abe ra jẽingochĩ jẽ! ⁴ ¡Jeninisi ae rese chõ jẽingo! Jeninisi jendeco turã ño nguia. ⁵ Dios icuasa reã ño mbia ninisi oseĩ oseĩ nguiã ũqui. ¡Eĩ jenyechĩ nda jẽ jẽ! ⁶ ¡Jenongue ra jembĩĩĩ irĩchĩ eninisi rese jẽ! ũqui naa naa mose ra Dios jembasi tuchi. Nyebe urecheẽ nguiã jẽje nyii. ⁷ —Jẽingo turã icue sembaerã, i que Dios nande je ra jẽ. —Jẽingo icua icua, iã equia nande je co. ⁸ ¡Urecheẽ jẽisi turã ño nguia jẽ! Jẽ urecheẽ isiã mose, eĩ jenyee chõ nguiã Dios ucuayã. Urecheẽ achõ eã ño uresenei senei nguiã jẽje. Dios cheẽ ño ñene. Dios sí que Espiritu Turã mondo nande je ra.

⁹ —Jenyesequa jenyiese, aeã nda jẽje cote. ¿Mbaerã nda acheẽ jẽje re? Dios que ñee jẽje no. Nyebe jẽingo nguiã nyesecua jenongue rese ũqui cote.

¹⁰ Macedonia jenda rese jẽingo nyesecea ũquiĩ. Jesũs quiato rese. Jenyesecea i i tuchi jiri erese jẽ. ¹¹ jẽingo turã ño nguia jẽ! jẽñimbecoteã ño nguia jembae rese jẽ! jẽquieĩ quieĩ bei equia jẽ! Ũquiĩ ngue urecheẽ jẽje nyii resẽ. ¹² Ũquiĩ naa mose ra Jesũs icuasa reã ñee turã turã jẽje. Ũquiĩ naa mose ra mbae tiã eã jẽje no.

Jesũs ra tu nyebi íbii

¹³ Mbia raaque rese taembiirandu rã. † nda jẽyayã eã mbia raaque rese. Jesũs icuasa reã ngue eyayã tuchite riqui mbia raaque rese ra. —Quera si na nye. Nandemae si na erese re, i eã ño Jesũs icuasa reã nguia mbia raaque je ũquiĩ. ¹⁴ Jesũs que mano ndei nguia nyii. Quera si que ra. Nyebe ra Jesũs icuasa raaque abe quera si. Sañi Jesũs quera si no. Eĩ si ra Jesũs icuasa raaque quera si no. Dios ra embuquera si. Jesũs rese ra ecuaẽ. Ũquiĩ nandeicuate quia ã. ¹⁵ Nandererecia Jesũs cheẽ uresenei senei nguia jẽje ã. Jesũs ra tube íbii. Aque mose ra mano je rane nyoĩ erea. Ae nandereco nandeico ã nae, ũquiĩ abe ra nyoĩ erui cote. ¹⁶ Cristo ra tu nguichi ibei si. Ererecia rã nda eru ñee mbia je. Angel nderecia ibatenda ra ñeemombo. Corneta abe ra pu i Dios mbae. Cristo nguichi mose íbii. Aque mose tuchi ra Cristo icuasa mano je quera si. Ũquiĩ nane nda quera si. ¹⁷ Aquere ra nandereco rerao ũquiĩ ndese cote. Ibeishĩ ni nda nandererao ja. Huee ra nandemae tuchi Cristo rese cote. Nandeico bei ra erese cote. ¹⁸ ã ndei Dios cheẽ ã. Jeñimundua ndua bei quia erese. † nda jẽya tuchi erese.

5

Jẽquiche je na Jesũs ru chã

¹ —Aque mose ra Jesũs ru, ae eã nda jẽje, Seresenda. ² Isa chõ mbae mbuquiachãsa riqui nguia tu. Mbia ndua eã mose ra eru. Eĩ si ra Jesũs u, mbia ndua eã mose erese. ³ —Ureico turãt e quia ã ndesẽ, i ra mbia. Ajee tuchi ra Jesũs ru aque mose. Mbia mbutiã nonde cote. Sã nanĩmbae rasi riqui tu ajee no nae, eĩ si tuchi ra Jesũs u ajee. Emo nda oso chee eã. ⁴ Jẽ nguia jẽingo ãte nguia itondaru ũquiĩ, Seresenda. Jẽaquiatuã eã ño jẽ nde. Jẽ nguia ra Jesũs jembua eã u. Mbae mbuquiachãsa rã eã nda eru jẽje. ⁵ Nyaashĩ na ño jẽingo nguia jẽ ja ũquiĩ. Itondaru rã eã ño nandeico nguia nande ã. ⁶ Nyebe nandechumumba rã mbei chõ nandeico nguia tesa. Mbia ataque quiarei uque bei. ⁷ Ae uque quia, ũquiĩ ño uque nguia itondaru. Ae quiacua quiacua quia, ũquiĩ ño quiacua nguia itondaru. ⁸ Nyaashĩ jenda chõ nande re. Nyebe nandechimbaaracua bei quiatu quia nande. Dios nandeicua tuchi quia nande. Nandehesecua tuchi quia erese nande. Dios ra nanderirõ tuchi mbae icuã ja si. Ũquiĩ nandeicuate quia ã. Nyebe ra mbae icuã ocoã nanderese. ⁹ Nandembasi sacua eã ngue Dios nandeirabo ra. Nanderirõ sacua eicuã si chõ ngue nandeirabo nguia. Jesucristo rĩĩ nda nanderirõ eicuã si. Jesucristo rei nandererecia. ¹⁰ Ae que mano nande je ra. Nandeico sacua erese. Tu ra nandererao siqui sacua erese. Nandereco siqui mose ra nandererao. Nanderaaque chi mose ra nandererao no. Eĩ ja chõ ñene. ¹¹ ã ndei Dios cheẽ ã. Jẽ ño jeñimundua ndua nguia erese ũquiĩ. ¡Ũquiĩ jẽsaã saã mbei quia jẽ!

Pablo embaaquiatu

¹² Jesús icuasa rerecua cheẽ nda jemumbachĩ, Seresenda. Jenderecuarã ño Dios emingo nguiã. Jembaaquiatsu quiatuchĩ equia ùqui. ¹³ Nyebe jẽingo turã ño nguia ee. Jenyesequa tuchi quia erese. Jembaaquiatsu quiatu sacua ño ùqui nde. jẽingo turã ño nguia jenyue! ¹⁴ Emo tomei mo siqui mose jendese, jemingo mbae mo ndese. Ae hui serĩ serĩte quia Dios cheẽ si nae, ùqui jemingobe erese. Ae equirãcuã neate, ùqui jembirãcuã. Jẽingo mingue chõ nguia mbia ja je. ¹⁵ Mbua icuã mose jẽje jẽicuã eã ño ee jẽ! jẽingo turã ño jenyue jẽ! jẽingo turã ño mbia ja je no jẽ! ¹⁶ Jẽya bei jẽingo. ¹⁷ jẽnee ñee mbei quia Dios je jẽ! ¹⁸ Gracias, jenyue quia Dios je mbae ja riĩ. Ebi tuchi quiarei ùqui. Jesucristo icuasa chõ jẽ nde. ¹⁹ Espĩritu Turã nda jẽsiquisãchĩ jẽ. ²⁰ Dios cheẽ mbuchecuasa cheẽ jeñandu turã ño nguia jẽ. ²¹ —Ma ñee ñooñoa, jenyue tuchi quiatu eicua jẽ. Ñee ñooño eã mose, erui jẽingo. ²² jmbae icuã ja rese ra jẽingochĩ jẽ!

²³ Aba mombiasa chõ Dios riqui nguiã co. Sã ae si jemingo icuẽ umbaerã tuchi. Sã ae jemingo turã mbei. Jesucristo tu chee mose ibate si. Mbua ra ñee icuã aroneate jeni cote. ²⁴ Ùqui nda Dios saã ja jẽje. Ae quiarei ichõĩñosa reã tuchi.

Pablo ñee hui bei

²⁵ Jẽnee mbei quia Dios je urerĩ, Seresenda. ²⁶ Mbua nanderesenda jẽquiaam a ama ja ure je hue jenda. ²⁷ ã sechimbesa jẽsenei ja rã nandenongue hue jenda je. —Jẽsenei na, i Cristo quia jẽje co. ²⁸ Jesucristo rei nandererecua. Sã ae riqui siqui turã mbei jendese. Amén.

SEGUNDA CARTA DEL APOSTOL SAN PABLO A LOS TESALONICENSES

Pablo chimbesa

¹ Pablo rei se. Silas riqui serese a. Timoteo abe no. Ureico ã mbesa jêje a, Tesalónica jenda. Jê nguia jeñumunua mbeite nguia Jesús je ùquĩ. Jesucristo icuasa chõ jêingo nguia ùquĩ. Dios rei nanderu. Jesucristo rei nandererecua.

² Sã ùquĩ turã ndiqui jêje. Sã ùquĩ ndiqui jemombia bei.

Dios ra mbia icuã mbasi

³ Gracias, ure beite quia Dios je jeniã ã. Coche ureico nguia ñee Dios je jeniã. Jê nguia jêingo nguia Dios icua tuchite ùquĩ. Jê nguia jêingo nguia nyesequa tuchite jenyiese ùquĩ. ⁴ Nyebe ureico nguia ñee turãt e jeniã ã. Ae ñumunua nua nguia Dios je, ùquĩ ja urembiirandu turã nguia jendese ã. Jêingo mingquete quia mbia icuã je ùquĩ. Jêingo Dios icua tuchite ùquĩ. Mbia icuãte riqui raque jêje. Mbia icuã mose jêje, jê jêturãte riqui ee ùquĩ.

⁵ Sã Dios turã tuchi riqui no jê. Sã mbia mbuchecha turã no. Ae ra ñimbirãcuãte quia mbia icuã icuã mose Jesús rii ee nae, ùquĩ je ra mbae turã mondo. Mbae ra emondo mbia chisaã turã ndibishorõ. Mbia chisaã icuã abe ribishorõ no. ⁶ Ae jembasi mbasi quia nae, Dios ra ùquĩ mbasi tuchi cote. ⁷ Jesucristo ra tu ibate si. I ra eu quia nyecua. Angel cuabẽ ndese ra eru. Jesús ra ángel quirãcuã tuchi queru. Tata rendi rã nda Jesús ru. Eru mose ra mbia icuã icuã eã nande je cote. ⁸ Jesús tu mose ra Dios icuasa reã mbasi mbasi cote. Echeẽ turã mumba mumbasa ra embasi Dios cheẽ turã Jesucristo rii. ⁹ Jesús ra ucheẽ mumba mumbasa mbasi tuchi. Jesús ra emombo isho. Echeẽ mumba mumbasa ra siquã mbei Dios rese cote. Dios quirãcuã ndese abe ra eriquã no. ¹⁰ Ùquĩ nda Jesús saã ucheẽ mumba mumbasa je tu mose. Echirabo quia ra ñee turã turã mbei erii eru mose. Eicuasa ra ñee turã turã mbei erii eru mose. Jê abe ra jêingo erese. Ure Dios cheẽ nenei mose, jêisi que ra. Nyebe ra jê abe jêingo erese eru mose. ¹¹ Nyebe ureico nguia ñee ñee mbei Dios je jeniã ã. Ae Dios bite nae, i nda ùquĩ jêsaã saã mbei quia. Ùquĩ je que Dios “jenyu” i jêje ra. Mbae turã jêsaã saãse rete quia ùquĩ. Sã Dios uquirãcuã mee jêje. Mbae turã naa naa nonde cote. Jesús icuasa chõ jengu nguia huee. ¹² Jê mbae turã naa naa mose, mbia ra ñee turã turã Jesucristo rii. Jê abe rii nda Jesucristo mbia mbucheẽ turã turã. Dios quia eturãte riqui nguia nande je. Jesucristo abe eturãte nande je. Ae rei nandererecua.

2

Dios ucuãyãsa

¹ Jesucristo rei nandererecua. Ae ra tu nandemunua mbucha uchiese. Ùquĩ ño asenei senei nguia jêje. ² —“Co Jesús ru quia co”, i que Pablo ra, ichõiño nda mbia serii jêje. Jeñanduchõ ño ùquĩ mose. —Co Jesús ru quia co, ae eã se quia embesa jêje a. Mbia mo nda ñee ñooño jêje. —Jesús ra tu cote. Dios que sembiirandu ra, ichõiño nda jêje. Ùquĩ jeñanduchõ ño. ³ ¡Mbia ra ñee ñooño chĩ jembiiĩ iĩ jê! Jesús rane nda tuã nguia. Mbia rane nda hui hui Dios si. Dios ucuãyãsa rane nda tu Jesús si. —Emo mose aque tambutiã, i que Dios aque rii

nda. ⁴ Aque ra Dios resenda ucuãyã tuchi. Dios abe ucuãyã tuchi rae. Dios chuchúaa ra eñi ngoi mbia mbĩrĩ irĩ. —Se rei Dios, ichõĩño nda huĩ mbia mbĩrĩ irĩ. ⁵ Seico mose jendese que asenei ja jėje ra. ¿Jêtesareiã ndei equia secheẽ si re? ⁶ Dios ucuãyãsa ra tu emo mose. Eriquisã ji ae riqui nguiã aque. Eriquisã iriã mose ra eru. Eriquisãsa jêicua quia ũqui. ⁷ Mbua Dios cheẽ mumba tuchi quia ã cote. Dios ucuãyãsa ra tuchõ eã. Eriquisãsa iriã mose quia ra eru cote. ⁸ Nyecua tuchi ra u mbia je cote. Jesús ra tu erĩcharã cote. Jesús nininya tuchi ra tu. Aque mose ra Dios ucuãyãsa iquua. ⁹ Satanás nda uquirãcuã mondo Dios ucuãyãsa je. Dios ucuãyãsa mbuquirãcuã sacua. Mbae icua chumumbara tuchi ra equeru. Ñee ñooño nda u mbia je. Mbua mae sayã nda esaã saã u mbia mbĩrĩ irĩ sacua. ¹⁰ Dios ucuãyãsa icua tuchi ra Jesús quiatoã je. Jesús quiatoã mbĩrĩ irĩ tuchi ra u. Jesús quiatoã nyesequa eã ngua Dios rese resẽ. Nyebe ra Dios ũqui ndiroã eicua si. Dios ra uquiatoã mbutiã tuchi. ¹¹ Dios rese eriqui nyesequa eãte ã. Nyebe Dios aba mbĩrĩ irĩsa mondo nguiã ee. Nyebe eriqui nguiã “ae beite”, i aba mbĩrĩ irĩsa je. ¹² Nyebe ra Dios ñee tuchi Jesús icuasa reã je. Ae mbae icua saã sete quia, ũqui je. —Jêso tata cuásuu, i ra Dios ee.

Dios chiirabo rei jê

¹³ Seresenda, Jesubite jêingo ũqui. Gracias, ure bei quia Dios je jeni a. Dios que jêirabo cose nyii ra. Jendirõ sacua jêicua si. Espiritu Turã jemingo sacua icue. Jê ichõĩñosa reã jêicua sacua. Ũqui je chõ ngue Dios jêirabo nguiã. ¹⁴ Jesús cheẽ ngue uresenei senei ngua jėje huee ra. Aque mose que Dios “jenyu” i jėje ra. Jembuquirãcuã sacua Jesucristo quirãcuã je. ¹⁵ Seresenda, jêhui jêhuichĩ nda esi jê! ¡Urecheẽ ndui jêingo bei jê! ¡Urechimbasa abe rui jêingo jê! ¹⁶ Dios rei nanderu. Ae quia rei eturã tuchi nande je. Ae quia rei nyesequa tuchi nanderese. Ae quia rei nandemombia mbiasa. Nandeya tuchi nandeico Jesús raarõ arõ ã. Tube ra nyebi uquiato rea. ¹⁷ Sa Jesucristo riqui jemombia mbia bei. Dios abe no. Sã ũqui ndiqui tuchi jendese. Jêhui eã sacua echeẽ si. † nda jeñee turã mbei quia querabe. † nda jêingo bei mbae turã ndese querabe.

3

Jeñee Dios je

¹ Seresenda, jeñee mbei quia Dios je ure rii. † nda isho ishonda Dios cheẽ andu ja. † nda eandu chooño eã. † nda eisi turã jê na si. ² † nda Dios mbua icua ndiquisã ure si. Mbua m# m# ño Dios icua nguiã ã. Mbua ja eã. ³ Nandererequa ñee ñooño eã nguiã co. Uquirãcuã nda emee jėje ucheẽ nguire. Mbae icua nda esiquisã jêsi. ⁴ Urecheẽ ndui si chõ jêingo nguiã ũqui. Ae uresenei senei ngua jėje, ũqui ndese ra Dios jemingo tuchi. Ũqui ño icua nguiã ã. ⁵ jã nandererequa siqui tuchi jendese jê! Jêirandu sacua Dios nyesequa rese nanderese. Jê abe jêingo mingue sacua Jesucristo rã si.

¡Jêtoimeite ra jêingochĩ jê!

⁶ Jesucristo cheẽ tuchi chõ ã nde, Seresenda. Jesús quiato mo tomei mose, jêhui chõ esi. Jesús quiato siqui sereã mose mbae mo ndese, jêhui chõ esi no. Jesús cheẽ tuchi chõ ã nde. ⁷ Ure rã si chõ jêingo. Uretomei ngue uresaã saã eãte quia jėje ra. ⁸ Jê mo ngue urembuquiaru chooño eãte quia resẽ. Mbae mo ño ngue uremondo mondo quia urechĩurã ndibishorõ ndesẽ. Urequei quei

beite que equia resẽ. Itondaru mose abe. Jẽ mbae mondochõ eã sacuaã ure je. ⁹—Mbae mo embu se, ureã mbei que equia jẽje resẽ. Etureãte raque ãquĩ. Urequeie quieie chõ ngue equia urembaerã ndesẽ. Jembaaquiatu sacuaã. Ure rã si jẽingo sacuaã quieie quieie. ¹⁰ Ureico mose jendese que jaembiirandu rei resẽ. Ae quieie quieie sereãte quia, ãquĩ nda quiaruã. ¹¹ Ureirandu que jendese ra. Jẽataque nda quieie quieie eã tuchi quia ra. Siqui choõnose tuchi nda equia ra. Uchuru mondo choõno ñee emo je. ¹² Sã ãquĩ ae riqui quieie quieie uchiurã ao sacuaã. Jesucristo cheẽ tuchi chõ ã nde. Nandererecuã tuchi chõ a e re. ¹³ Seresenda, jmbae turã ndese chõ jẽingo bei jẽ! jẽhuichĩ nda esi jẽ!

¹⁴ A urecu urecheẽ mbesa mbesa emondo sacuaã jẽje a. Jẽ mo urecheẽ mumba mumba mose, ãquĩ ndese jemaie tuchi. Jẽhui chõ ãquĩ si. ¶ nda ireĩ ireĩ jiri urecheẽ mumbare. ¹⁵ jũquĩ nda jẽucuãyã cuãyãchĩ jẽ! jẽñee turã ño equia ee jẽ! jjembaaquiatu quiatu turã ño jẽ! Jendesenda chõ ñene. Urecheẽ mumba mumbate raque.

Hui bei

¹⁶ Cristo rei aba mombiasa. jSã ae riqui jemombia bei jẽ! Jẽingo mose jenyuchúaa. Jengatásaa abe no. jSã eriqui bei jendese jẽ! ¹⁷ Pablo rei se. Se ae chõ ã ambesa nguiã hui bei a. Sechimbese ae chõ ã nde. Sechimbese jẽicuate quia ãquĩ ndesẽ. Sembae letras. Se bei que ambesa quia hui bei ra. ¹⁸ Sã Jesucristo turã ndiqui bei jẽ ja je.

PRIMERA CARTA DEL APOSTOL SAN PABLO A TIMOTEO

Pablo embesa Timoteo je

¹ Pablo rei se. Jesucristo chimbaaquiatu, Jesucristo chimondo. Dios abe chimondo. Dios ae nanderirō nguiā nandeicua si. Jesucristo chō nandesaarō arō nguiā ā. ² Aico ā mbesa ndeje a, Timoteo. Secheē nguire chō ereico nguiā Jesús icua aque. Nyebe aico nguiā seriirī i ndeje co. Dios rei nanderu. Jesucristo rei nandererecua. Sā ũquī turā mbei riqui ndeje. Sā ũquī ia eā mbei riqui nderese. Sā ũquī nembia tuchi.

Emo ndiqui mbia mbaaquiatu icuā icuā ā, i Pablo

³ Sā acheē ndeje seso mose Macedonia no. “Efeso eico” ae que ndeje, huee bei chō eico. Ae ñee ñooño nguia mbia mbaaquiatu icuā icuā hue nae, ũquī ñee embutiba. ⁴ ũquī siqui bei quia mbia cheē ima nenei nenei mbia je ũquī. ũquī siqui bei quia amei cose ndare nenei mbia je ũquī no. ũquī ñee embutiba. ũquī ñee icuā icuāte quia ũquī. ũquī ñee ño mbia mbicua icuā nguiā nyue. ũquī ñee nda aba mbaaquiatuā Dios rī. ũquī mose Dios icua aroneate. ⁵ Sā hue jenda turā mbei riqui Dios je jē. Sā hue jenda riqui ndua turā mbei jē. Sā hue jenda riqui Dios icua tuchi jē. Nyesequa tuchi nda nyiese cote chā. ⁶ Mbia hue jend a mo ndiqui tesarei Dios cheē si ũquī. Dios cheē abi abi. Ñee ñooño mbei equia nyue ũquī. ⁷ Moisés cheē ndese mbia tambaaquiatu, i raque equia ũquī. Moisés cheē icua rocoī. Eaquiatu rocoī. Echeeño ño ñene.

⁸ Dios que Moisés mbucheē turā mbia je ra. Mbia icuā je que embucheē nda. Mbia mundua sacua huiacuā ndese. ⁹ Mbia turā je eā ngue Dios Moisés mbucheē nguiā. Mbia turā je eā ngue Dios ley mii nguiā. Dios cheē mumbasa je chō ngue emii nguiā. Mbia icuā je. Dios quiatoā je. Mbia teā teā je. Usi ucuâyāsa je. Ngu abe ucuâyāsa je. Mbia iquiasa je. ¹⁰ Ucheē mumbasa je chō ngue Dios ley mii nguiā. Ae siqui quia emo ninisi rese, ũquī je. Ae eninisirā saā saā nguia nguesenda mo je, ũquī je. Mbia rirōsa je abe no. Ñeeñoñosa je abe no. Ae eicuā icuāte riqui Dios cheē turā je, ũquī je abe no. ũquī ja je chō ngue Dios ley mii nguiā. ¹¹ Dios que ñee ucheē turā nii seje ra. —Secheē esenei senei mbia je, i que Dios seje ra.

Dios que uturā teacquia seje ra, i Pablo

¹² “Coche ñene” ae se quia Jesucristo je co. Ae que seirabo ra. Ae que sembuquirācuā nda. Ae que semondo ucheē nenei nenei sacua mbia je ra. ¹³ Seicuā tuchi raque ee nyii. Acheē icuā icuā ndei que se quia ee nyii ra. Equiato je abe que seicuā icuā ndiqui nyii ra. Se Jesús icuayā mose. Seaquiatuā mose. Nyebe Dios ia eāte riqui nguiā serese. Nyebe Dios seicuā mbutiā nguiā sesi cote. ¹⁴ Uturā ngue eteacquia seje ra. Nguiirī ngue embuchecua seje ra. Nyebe aico nguiā Jesucristo icua co cote. Nyebe aico nguiā nyesequa Jesucristo rese co cote. ¹⁵ Jesucristo que tu ibii ra. Mbia icuā mbitirō sacua. Emingo bei nonde. Ichōiñoa tuchi chō ā nde. Sā mbia “ae beite” i ja ā je. Seicuāte raque se quiatu mbia ja si. ¹⁶ Dios ia eāte que eriqui serese ra. Erosei nguiatu tuchi que eriqui seje ra. Nyebe mbia riqui nguiā jirandu ja Dios rosei nguiatu rese. Sā Dios semingo bei se abe, i chee ra emo abe ñee ñee. Dios rosei nguiatu rese jirandu mose. ¹⁷ Sā mbia riqui ñee turā

mbei Dios je. Ae mii ño mbia rerecua tuchi re. Ae mii ño siqui bei tuchi nguiã co. Ae mii ño ererecua nandemae sayã nde. Ae mii ño mbae icua tuchi nguiã. Amén. ¹⁸ Timoteo, seriiri na tuchi chõ nde re. Dios cheẽ mbuchecuasa que sembiirandu nderese nyii ra. Nyebe aico nguiã ñee tuchi ndeje ũqui ñee na si. Mbae icuã esiquisã quisã mbei chõ nguia Jesús quiato si jẽ. ¹⁹ Dios eicua tuchi quia jẽ. Erendua ata atate chi nda jẽ. Mbae turã ndese chõ eico. Emo emogue ndua choõno mbei quia ra. Mbae turã naa naa ndocoi. Nyebe eriqui nguiã siqui icuã icuã mbeite. Nyebe tesarei nguiã Dios cheẽ si cote. ²⁰ Eĩ ngue Himeneo nda. Alejandro abe no. Nyebe ngue amondo nguiã Satanás je. Ndua ndua sacua. Ñee icuã icuã eã sacua Dios riĩ.

2

Sã mbia ñee turã ja Dios je, i Pablo

¹ ã tacheẽ Jesús quiato ja je: Mbia ja riĩ jẽingo bei ñee Dios je. ¹ nda Dios uturã mee mbia je. Gracias jenye bei quia Dios je mbia ja riĩ. ² Ae ererecua nae, ũqui ja riĩ abe jẽingo ñee mbei Dios je. Dios uturã mee sacua ee. Ũqui mose ra nandeico turã ja cote. Ũqui mose ra nandeya bei nandeico cote. Ũqui mose ra nandeico tuchi Dios rese cote. ³ Ũqui mose ra Dios abe ia tuchi nanderese. Eicuã si mbia rirõsa chõ ae re. ⁴ Dios mbia rirõ ja sete quia eicuã si co. Dios mbia mbaaquiato quiatu sete quia co no. ⁵ Dios mii ño siqui nguiã co. Mbia que icha icha jate esi ra. Jesucristo mii ño siqui nguiã mbite re co. Mbia mbucha sacua Dios rese. Mbia sí chõ ae re. ⁶ Jesucristo que mano mbia icuã ndiquicharõ sacua nda. Ũqui ndese que Dios mbia mbiirandu cote ra. ⁷ Ũqui nii ngue Dios seirabo ra. Semondo que judíos eã je embaaquiato quiatu sacua nda. Ũqui Dios icua sacua ngue Dios cheẽ asenei senei ee ra. Ae bei. Acheẽ ñooñoa ño nguiã co.

⁸ Sã mbia ja riqui ñee mbei Dios je. Sã o mumbate ñee Dios je. Sã eriqui turã ja. Sã paama iã mbei nyue. ⁹ Sã cuña abe riqui siqui mingue. Sã eriqui ndua tuchi eã jiri huirao rese. Uachu riinda hui rese abe. Ua rese abe no. Lujo rese abe no. ¹⁰ Sã eriqui quiatu ndua Dios rese. Sã eriqui mbae turã naa naa mbia je. ¹¹ Sã cuña quiriri chõ nguia mbia ñumunua mose. Sã eriqui nyiisaquia turã. Sã eriqui mingue. ¹² Mbia ñumunua nua mose, cuña mbia mbaaquiato quiatu aroneate. Sã cuña mo ererecua raã naa eã ngu je. Sã eriqui chõ nguia quiriri. ¹³ Adán nane nguiatu ngue Dios chao nguiã. Aquere quiatu ngue Eva ao nguiã cote. ¹⁴ Adán nane eã ngue Satanás mbirĩ irĩ nda. Eva rane nguiatu ngue re. Eva rane ngue mbae icuã saã nyii ra. ¹⁵ Dios ra paama i bei eã cuña je. Nguiirĩ nderequia turã mose. Dios icua mose. Siqui tuchi mose Dios rese. Nyesecua mose mbia rese.

3

Sã Jesús quiato rerecua siqui turã

¹ Acheẽ ñooño eã ño se re. Jesús quiato reaquiato sacua ño taico se, i mose emo, eturãte ũqui. ² Sã Jesús quiato rerecua riqui siqui turã mbei. Mbia ñee eã sacua ee. Sã nguinisi mii ño nderequia. Sã eriqui ndua turã turã mbei. Sã earaca tuchi riqui. Sã eriqui mbia isi turã mbia mo oso mose echuchúaa. Sã eriqui mbia mbaaquiato quiatu aracua. ³ Sã eriqui quiacuayã. Sã eicuã icuã eã mbei riqui emo je. Sã eriqui oo tuchiã mbae isiquia rese. Sã eriqui ico mingue. ⁴ Sã eriqui mbia uchuchua jenda rerequia turã. Sã eriqui

nguiirĩ mbaaquiatu quiatu turã. Aba cheẽ mumbayã sacua. † nda eriirĩ eĩ ñooño eã mbia je. ⁵ Nguiirĩ ndea chooño mose, Dios quiato reaquiato turã aroneate. ⁶ Ae Jesús icua ramote nae, Jesús quiato rerecua aroneate ũqui. Ũqui mose ucuasu raã naa arõte. Eicuã arõte cote. Sã Satanás abe ucuasu raã naa ñimb#cuã nonde no. ⁷ Sã Jesús quiato rerecua riqui siqui turã mbei Jesús quiatoã abe je. † nda diablo emb#irĩ irĩ eã emb#cuã. † nda Jesús quiatoã ñee turã mbei erĩ.

Sã diáconos siqui turã

⁸ Diáconos je abe tacheẽ. Sã diáconos abe siqui turã. Sã eriqui ucheẽ mbuchebiã mbae raã nonde. Sã eriqui quiacuayã. Sã eriqui oo tuchiã mbae isiquia rese. ⁹ Sã diáconos siqui eã tuchi mbae icuã mo ndese. Sã Dios mii ndese quiatu eriqui bei. Sã Dios icua tuchi. ¹⁰ Ae ra diácono nae, sã mbia mae na nguiatu erese nyii. Eturã mose mbia je, sã diácono ae cote. ¹¹ Sã diácono ninisi abe riqui siqui turã mbia je. Sã mbia mbucheẽ ñee eã emo nii. Sã eriqui quiacuayã. Sã eriqui ucheẽ mbuchebiã mbae raã nonde. ¹² Sã diácono ngüinisi mii ño nderequia. Sã eriqui nguiirĩ nderequia turã. Uchuchua jenda ja abe no. ¹³ Diáconos mbae raã turã turã mbei mose, mbia ra eicua tuchi cote. Dios abe ra embuquirãcuã tuchi Jesucristo renei nenei sacua mbia je.

Ae Dios saã nande je, ũqui aba icua ja aroneate raque

¹⁴ Seso jeise rete raque nderea. Seso eã moi ño aico nguiã co mbesa ndeje a. ¹⁵ Nde Jesús quiato rerecuarã irabo aquiato sacua ño aico nguiã ã mbesa ndeje a. Iglesia jenda rerecua irabo sacua. Dios reco mbae rei iglesia. Iglesia quia rei Dios cheẽ nderequia tuchi mbia ja je. ¹⁶ Ae Dios saã nguia nande je nae, ũqui aba icua ja aroneate raque:
Dios que tu mbiarã ibii ra. Jesús, i equia ee.
“Eturã tuchi?” i que Espiritu Turã erĩ nda.
Angeles abe que mae erese ra.
Ae Jesús quiato nae, ũqui ngue esenei senei mbia ataque je ra.
Mbia mangue chooñoa jenda ja que eicua ra.
Aquere que Dios equeraobe ibate cote ra.

4

Mbia ra hui hui Dios cheẽ si

¹ Espiritu Turã ndiqui ñee co: Mbae ua ja nonde ra mbia hui hui tuchi Dios si. Aba mbiirĩ irisa rese ra mbia riqui tuchi. Ũqui nda mbia mbaaquiatu icuã icuã aba checuayã icuã na. ² Ae uturã saã saã nguia nae, ũqui ndui rui ra mbia riqui. Ae ñee ñooño nguia nae, ũqui ndui rui ra mbia riqui no. Ũqui siqui beite mbae icuã ndese ũqui. Nyebe eriqui nguiã mbae turã icuayãte chee cote. ³ Ũqui nda mbia mbaaquiatu icuã icuã. Jeninisirã nda jendecoã. Jendurã abe ra jendecoã no, i ra equia ñee mbia je. —Mbae ra jëu chooñochĩ jë, i ra equia mbia mbaaquiatu icuã icuã. Dios mbae chao ja raque mbia chiurã. — Sã sequiato mbae ja u, gracias ire seje, i que Dios ra. ⁴ Dios chiao mbae turã ja. Mbae nandeisi teã teã eã ño nguia echiao. Mbae nandeu turã ja chõ nguia. Gracias nande bei chõ nguia Dios je. ⁵ Dios cheẽ nguire mbae turã ja riqui nandechiurã ã. Nande “gracias” i mose Dios je, mbae turã ja chõ eriqui nguiã nande je.

Jesús quiato rerecua turã

⁶ ã secheẽ esenei senei mbei quia Dios quiato je, Timoteo. Nde mbia mbaaquiato turã turã mose. Dios rimba turã tuchi ra nde cote. Jesús cheẽ ndui ra ereico tuchi cote. Dios ra ereicua tuchi cote. Sã ereico beite erese co no. ⁷ Mbia cheẽ ñooño je cheẽ ndese ra erechiisaquiachĩ jẽ. Echimbirãcuã tuchi quiatu quia siqui Dios rese jẽ. ⁸ Nanderete quirãcuã mose, eturãte raque. Nandeico mose Jesús rese, ùquĩ nguiatu eturã tuchi nanderete quirãcuã si re. Aachõ eã nandeico Jesús rese. Ibate abe quiatu nandeico erese. ⁹ Acheẽ ñooño eã ño se re. Sã mbia “ae beite” i ja secheẽ je. Dios cheẽ ño ñene. ¹⁰ Dios cheẽ ñii ño ureico nguiã quicoi coi ã. Dios cheẽ ñii ño ureico nguiã ñimbirãcuã mbae ja rese ã. Dios reco quiatu ureicuate nguiã ã. Ae que mano mbia ja je ra. Ae eicuate quia nae, ùquĩ nda emingo bei.

¹¹ ã esenei senei mbei quia mbia je. Mbia Dios cheẽ mumbayã sacuã. ¹² Sã mbia ndecheẽ andu turã. Amei eã ndaque nde. Mbae turã esaã saã nguia Jesús quiato résaa. Ûquĩ siqui turã sacuã nde rã si. Echeẽ turã mbei quia mbia je. Eico turã mbei quia mbae turã ndese. Echesequa tuchi quia mbia rese. Dios eicua tuchi quia. Mbae icuã ndese ra eremae mae jirichĩ. ¹³ Mbia embaaquiato quiatu bei quia seso mose chee nderea. Dios cheẽ esenei senei mbei quia leer i ee. ¹⁴ Jesús quiato rerecua o chono mose ndearõ, aque mose que Dios nembraacua tuchi ra. —Ã esaã, i que ndeje ra. Ûquĩ si ra eretesareichĩ. ¹⁵ Ûquĩ ndese eico bei. Endua ndua bei quia erese. Ûquĩ mose ra Dios ereicua i i tuchi. Mbia ra jirandu ja nderese. ¹⁶ Emae ño nguia nde ae ndechiese. Echicuasẽ cuasẽ ño nguia mbae icuã si. Ae eresenei senei nguia mbia je Dios cheẽ nae, ùquĩ emumbayã ño nguia nde abe. Ûquĩ mose ra Dios nemingo turã tuchi. Ndecheẽ andusa abe ra emingo turã tuchi.

5

Jesús quiato siqui turã sacuã

¹ Erecheẽ icuã icuãchĩ nda amei je nde embaaquiato quiatu mose jẽ. Amei embaaquiato turã turã ño nguia jẽ. Nderu esaã ño nguia siqui turã ee. Ndenongue rã ño eico mbia yasu je no.

² Ndesi esaã ño nguia ari je jẽ. Ndenongue esaã ño nguia ubichõ nyucuaaque rese jẽ. Endua icuã icuã eã ño nguia eriĩ jẽ. ³ Eru cheecha mo mbae eã mose, sã Jesús quiato riqui mbae mo mee mee ee. ⁴ Eriirĩ tiarõ mose, sã aque chõ mbae mee mee mbei quia usi je. Eriirĩ nducucha mose, sã aque chõ mbae mee mee ee no. Ngu abe je. Umumbososa je. Ûquĩ Dios bite. ⁵ Sã eru cheecha mo ae riqui no. Sã embae eãte riqui no. Ae ndua ndua bei mose Dios rese, ñee mbei mose Dios je, sã Dios quiato riqui mbae mee mee mbei ee. ⁶ Ae ebite nae, ùquĩ ndese achõ eru cheecha mo siqui mose, eicuãte ùquĩ. Eraaque rã ño aque riqui nguiã. Eresco siqui raque. ⁷ ã esenei senei nguia mbia Jesús quiato hue jenda je. I nda mbia ñee icuã eã eriĩ. ⁸ Emo ndua eã mose usi rese, ngu abe rese, eicuãte ùquĩ. Mbae mee mee eã mose ee, eicuãte ùquĩ. Ûquĩ siqui ãte quia Dios rese ùquĩ. Eicuã tuchi chõ ùquĩ Dios quiatoã si re.

⁹ Ari eru cheecha je inscribir jenyẽ rã mámbii. Ae sesenta años eãte nae, ùquĩ je inscribir jenyẽ eã. Ae eru ata nyii nae, ùquĩ je inscribir jenyẽ eã no. Ae eru mii nyii nae, ùquĩ mii je chõ inscribir jenyẽ. ¹⁰ Ae ari turã aba chũcuate nae, ùquĩ achõ je chõ inscribir jenyẽ. Ae ari nguiirĩ mbutiarõ turã mbeite quia nae. Ae ari mbia isi turãte quia uchuchúaa nae. Ae ari mbae turã saã saã mbeite quia Jesús quiato je nae. Ae ari erasi teaquiato turã

mbeite quia nae. Ae ari siqui beite quia mbae turã ndese nae. Ûqui ari je chõ inscribir jenye. ¹¹ Eru cheecha ari eã mose, ùqui je inscribir jenye eã. Ûqui nyao arondete Cristo si. Ae ebite, ùqui achõ ndese ndua mose. —Serurã mo tateabe, i ra cote. ¹² Ûqui mose ra Dios paama i ee. Ucheẽ mbuchebi chõ nguiã ngu rea mose cote. ¹³ Eru cheecha ari eã mose, siqui eã arõte mbae mo ndese. Tuchua embuchesea sea chooño arõte. Mbia mbucheẽ ñee ñooño arõte emo nii. Uchuru rerequia chooño eã arõte. ¹⁴ Nyebe aico nguiã ñee eru cheecha, ae ari eãte, ùqui je. Sã ngurã mo ndea. Sã tiiri. Sã eriqui mbae turã naa naa mbei uchuchúaa. Ûqui mose ra Jesús quiatoã ñee eã ee cote. ¹⁵ Emo emo ngue nyao Dios si cote ra. Satanás ndese eriqui ã cote. ¹⁶ Sã Jesús quiato riqui mbae mee mee uchari eru cheecha je. Usi abe je eru cheecha mose. Iglesia mbae mee mee eã sacua ee. Ae eru cheecha eriiriãte nae, ùqui je quiatu iglesia mbae mee mee.

¹⁷ Jesús quiato rerecua mbae saã turã turã mbei mose, sã mbia ia tuchi riqui erese. Dios cheẽ nenei nenei turã mose, sã Jesús quiato riqui mbae mee mee mbei ee. ¹⁸ Sã embesa ji riqui ñee no: “Emo nimba ticuasú mbae usi raã mose, echuru ra jenyatichĩ mbae mo je jẽ. Sã ae ae si quia quiaru quiaru”, i que embesa ji ra. “Ae quiei quiei quia emo je nae, sã echa mbae isiquia mo mee ee”, i que embesa ji ra. ¹⁹ —Jesús quiato rerecua que mbae icuã saã nda, i mose emo, echeẽ nda jeñanduchĩ, ae mii ñee mose. Nyeremo ñee mose, ùqui ñee ñooñoa arõte cote. ²⁰ Jesús quiato rerecua mo siqui siqui bei mose mbae icuã ndese, echeẽ asi asi ee Jesús quiato ataque résaa. † nda ùqui abe siquiche mbae icuã naa naa eã. ²¹ Eĩ ere chõ Jesús quiato rerecua je, siqui mose mbae icuã ndese. Ndequiatote raque. Echeẽ asi ee. Aico ñee ndeje Diosa a. Jesucristo sa abe no. Angeles Dios rimba sa abe no. ²² Jesús quiato rerecuarã nda eremii jeichĩ jẽ. Emae nguiatu turã na erese nyii. Emii jei mose, eicuã arõte emo mose. —Eremii jeichĩ ngue nyii ra, i ra mbia ñee ndeje cote. Mbae turã ndese chõ eico nde abe.

²³ I achõ nda erembeichĩ jẽ. Uva rique rasi ñetẽ abe embei mbei quia nderie rasi mose jẽ.

²⁴ Emo emo nyisaã mbae icuã nyecuate riqui nande je ã. Emo nyisaã icuã ndese quia nandeico nguiã mae ãte namo. Dios eicuã mbasi mose, aque mose ramo nda nandemae ùqui nyisaã icuã ndese cote. ²⁵ Eĩ si chõ mbia chisaã turã no nde. Emo emo nyisaã mbae turã nyecuate riqui nande je ã. Emo nyisaã turã ndese quia nandeico nguiã mae ãte raque ã no. Echisaã turã nda nyecua ja chee nande je cote.

6

¹ Ae Jesús quiato ererecua rimba mo nae, sã ùqui ndiqui nguerecua cheẽ mumbayã tuchi. Sã eriqui turã nguerecua je. Eĩ mose ra mbia ñee icuã eã Dios cheẽ nii cote. ² Timoteo, mbia rimba embaaquiatu quiatu quia. ã echeẽ ee. —Jenderecua Jesús quiato mose, echeẽ jemumbayã ño nguiã mbae raã turã turã ee. “Jesús rimba ja chõ nande re” jenyechĩ nda jenderecua ucuãyã cuãyã jẽ. Jenderecua Jesús quiato mose, mbae jesaã turã tuchi quiatu quia ee. Jẽingo turã tuchi chõ nguiã ee, ere ererecua rimba je ñee.

Nandendua tuchiã jiri quiatu quia mbae isiquia rese

³ ã ndei Jesucristo cheẽ tuchi ã. Emo siqui mose ã ndui, siqui turã nda Dios rã si. Emo mbia mbaaquiatu quiatu mose ã abi, Dios cheẽ ndui eã ño ùqui ndiqui nguiã. ⁴ Ucuasu raã naa ño nguiã ùqui. Ñee tuchi beite equia

ũquiĩ. Eaquiату rocoĩ. Mbia mbiꞑcuã icuãte equia ũquiĩ. Mbia mbucheẽ icuã icuãte equia nyue ũquiĩ. Mbia mumae icuã icuãte equia nyiese ũquiĩ. ⁵ Ndua icuã icuã mbeite equia ñee turã ndocoĩ ũquiĩ. Eicuã icuã mbeite riqui emo je ũquiĩ. —Mbia ra mbae isiquia mee seje, se Dios cheẽ nenei nenei mose ee, i beite equia ũquiĩ. Ũquiĩ ndese eicoã tuchi, Timoteo. ⁶ Nandeico mose Dios rui, ae ae ra nandembia nandembae mii ndese. ⁷ Mbae mo ngue nanderuãte nandechaacuaquia mose ra. Eĩ nande si ra nandemano mose mbae mo nderao eã no. ⁸ Nandechiurã nandereco mose, nandeirao abe nandereco mose, nandeya chõ nandeico ũquiĩ ndese. ⁹ Ae “mbaecha tuchi ra se” i beiquia ndua ndua, ũquiĩ nda nimbirãcuã eã mbae icuã si. Mbae icuã tã i mose ee, mbae icuã nda esaã jei. Mbae Isiquia quiatu ebi tuchite riqui nguia. Echioseisei icuã nda equerao chee tata cuãsuu. ¹⁰ Ae ndua beite quia mbae isiquia rese, ũquiĩ mbae icuã saã ja arondete. Emo emo ndiqui ndua tuchi mbae isiquia rese ã. Nyebe eriqui nguia hui Dios si ã. Nyebe eya eã ndasi tuchi riqui nguia ã.

Dios eicua tuchi, i Pablo ñee Timoteo je

¹¹ Eĩ erechĩ nda nde, Timoteo. Dios rimba tuchi chõ nde re. Mbae turã ndese bei eico. Dios rã mbei chõ eico. Dios eicua bei chõ nguia. Echesequa bei chõ nguia mbia rese. Eico mingue chõ nguia. Ndecuasu ra eresaã saãchĩ nguia jẽ. ¹² Echimbirãcuã tuchi quiatu quia Dios cheẽ ndese jẽ. Aba mingo beisa rese quia eico tuchi jẽ. Ae quia ngue ndeirabo nguia nyii. Sã erecheẽ turãte mbia resaa nyii no. —Dios riqui semingo beite co, ere que equia nyii. Ũquiĩ ndese bei chõ eico. ¹³ Dios ae chõ mbae mingo ja nguia co. Erésaa tacheẽ ndeje. Jesucristo resaa abe tacheẽ ndeje. Sã Jesucristo siquicheã ñee Poncio Pilato je no. ¹⁴ Ae riĩ Dios ñee ndeje nae, ũquiĩ emumbayã ja chõ nguia eraã turã. Jesucristo tu mose chee eico echeẽ mumbayã mbei. † nda emo ñee eã ndeje. ¹⁵ Dios quia rei equirãcuã tuchi mbia mo si. Ae quia ererecua tuchi mbia mo si re. Emo mose ra Dios “Jesucristo tamondo ibii mbia rea” i. Aque mose ra Jesucristo nyecua tuchi mbia je. ¹⁶ Dios mii nda manoa. Ae mii ño siqui bei nguia nyaashĩ na co. Mbia mo nda esiichã eã. Mbia mo mae eãte erese emo mose. Emo nda mae eã mbei erese. Sã mbia ñee turã mbei quia erĩ. Sã eriqui ñee turã mbei equirãcuã nii. Amén.

¹⁷ Ae mbaechate nae, ũquiĩ je echeẽ. Sã ucuasu raã naa eã. Sã eya siquiã umbae mii ndese. Embae ra ua emo mose. Sã Dios rese quiatu eya riqui. Ae mii ño mbae mee nguia nande je. ¹⁸ Echeẽ mbaecha je. —Mbae turã jẽsaã saã mbei quia jembae je jẽ. Jẽingo turã jiri quia mbaecha reã je. Abei chiãte ra jẽingochĩ jẽ, ere mbaecha mbaaquiату quiatu. ¹⁹ Ũquiĩ naa naa mose ra Dios mbae mee tuchi ee ibate. Ũquiĩ naa naa mose ra siqui turã tuchi no.

Pablo ñee hui bei Timoteo je

²⁰ Timoteo, ae riĩ Dios ñee ndeje, ũquiĩ emumbayã mbei quia. Mbia ñee ñooño mose nyue, nde abe ra erecheechĩ. Ũquiĩ ñee aba mundua turã eã ño nguia. Uaquiату raã naasa chõ ũquiĩ nde. ²¹ Dios cheẽ abi chõ eriqui nguia ũquiĩ naa naa ũuuuuu uuuquiĩ. Dios icuasa reã ño ũquiĩ nde. Sã Dios turã ndiqui bei ndeje. mén.

SEGUNDA CARTA DEL APOSTOL SAN PABLO A TIMOTEO

Pablo embesa Timoteo je

¹ Pablu rei se. Jesucristo chimbaaquiatu rei se. Dios que semondo mbia mbaaquiatu quiatu sacua nda. —Jesucristo icuasa ra siqui bei, i sacua ngue Dios semondo mbia je ra. ² Aico a mbesa ndeje a, Timoteo. Sechee nguire cho ereico nguia Jesus icua aque. Nyebe aico nguia seriiri i ndeje co. Dios rei nanderu. Jesucristo rei nandererecu. Sa uqui turã mbei riqui ndeje. Sa uqui ia eã mbei riqui nderese. Sa uqui nembia tuchi.

Pablo Dios osei uquia Timoteo je

³ Gracias, ae bei se quia nderi Dios je co. Aico turãte quia Dios je co. Seramei ja rã si. Senduasa tuchi Dios riqui co. Nderi aico ñee mbeite Dios je co. Nyaashi mose. Isa abe. ⁴ Anduate quia nderese co. Achimbiate rã nda mae nderese chã. Erecheseote que nandechao ramo mose nandechesi ra. ⁵ Ereico Dios icua tuchite aque. Ndesi rã si Eunice. Ndechari abe rã si Loida. Uqui ngue Dios icua tuchite quia ra. Ei ere si quia Dios icua tuchite nde abe aque. ⁶ Nyebe aico nguia ñee ndeje a. Seo achono nguia ndearo nae, aque mose que Dios nembraarua tuchi ra. Ndearua eico bei Dios chee ndese. Dios chee nenei nenei mbia je. ⁷ Dios siquia nguia nandembu siquiche mbia si a. Dios nandembiracuãte quia a. Dios nandembucheseacuate quia mbia rese a no. Dios nandembraarua quia a no.

⁸ Dios quiracuã ndese eico bei. Uqui mose ra ereirei irei eã Jesus renei nenei mbia je. Uqui mose ra ereirei irei eã setarõ ji si. A setarõ ji ñi Jesus rã a. Mbia icua icua mose ndeje Jesus rã, echimbiracuã ño. Dios ra nembiracuã. Sa sembiracuã no. ⁹ Dios quiatu ngue nanderirõ nguia nandecua si. Dios que nandembuturã mingo icue umbaerã nda. Nandeturã je eã ngue nandemingo nguia icue umbaerã. Nduate quiatu nguia nanderese. Mbae ao ja nonde que nduate nanderese ra. Jesucristo rã ño ngue Dios riqui nguia nyesequa nanderese. ¹⁰ Nyebe Jesucristo mondo nguia nanderirõ sacua nandecua si. Nyebe nandeco nguia ñee: —Dios nyeseacuate nanderese, i cote. Jesucristo que nandembusiquichea u nandemano si ra. Ae riqui nandemingo bei co. Ae riqui uchee isiquia mingo bei co. Jesucristo tu mose que nandembiirandu ja uqui ndese ra. ¹¹ Uchee turã nenei nenei sacua ngue Dios seirabo ra. Semondo que mbia mbaaquiatu quiatu ra. Mbiamangue choofoa jenda ja mbaaquiatu quiatu. ¹² Uqui je cho mbia riqui nguia mbae rasi raanguquia tuchi seje co. Airei irei eãte quia Dios si co. Dios aicuate quia co. Sereco que amee tuchi ee ra. Ae ra sereco teaquiatu bei seje. Jesucristo tube chee mose. ¹³ Arembaaquiatu turãte que se, uqui ndui eico bei. Dios eicua bei quia Jesucristo rã. Mbiamrese echesequa bei quia Jesucristo rã. ¹⁴ Ae rã Dios ñee ndeje nae, nembraarua equia nae, uqui ndese eico tuchi. Espiritu Turã nda nembesari eã. Eriqui tuchite nandechiangui re co.

¹⁵ Ereirandu que Asia jenda serecha rese ra. Figelo. Hermógenes. Uqui ngue hui ja sesi ra. ¹⁶ Onesiforo quiatu que tuutu quia serea sembia ra. Irei irei eãte que equia setarõ ji si ra. Sa Dios turã mbeite riqui ee. Echuchua jenda ja abe je. ¹⁷ Tu mose aa Rómaa que serequia tuchi ra. Ngasẽ nyee que seje ra.

¹⁸ Efeso seico mose abe que eriqui tuchi te serese ra. Serese que eriqui Dios cheẽ nenei nenei nda. Ǻ ereicuate quia aque. Sã Dios mbae turã tuchi mondo ee Jesús tu mose.

2

Mbae esaã saã tuchi quia Jesús je, i Pablo Timoteo je

¹ Seririĩ naate nde, Timoteo. Jesucristo quirãcuã ndese eico ñimbucha tuchi. ² Arembaaquiatu quiatu que se mbia résaa, ũquí esenei senei tuchi quia mbia je. Mbia ndua je secheẽ esenei senei. Ũquí nda esenei senei emo je no ña. ³ Mbae rasi tu mose ndeje, echimbirãcuã ño. Soldado rã ño eico ñimbirãcuã. Jesús rimba turã ño eico. ⁴ Jesús rimba chõ nde re. Echeẽ emumbayã mbei chõ nguia. Mbae no ndese raarendua nduachĩ. Ndererecua mii ndese endua bei. ⁵ Sã deporte no. Emo nda ganar i eã, nguerecua cheẽ mumba mose. ⁶ Sã emo ndiqui quieĩ quieĩ tuchi úcoo no. Aque mbae tubiriã tuchi rae. Eĩ ere si quiatu mbae raã naa tuchi Jesús je. ⁷ Ae ambesa mbesa quia ndeje ã, ã ndese endua tuchi. Dios ra embuchecua tuchi ndeje.

⁸ Endua tuchi quia Jesucristo rese. Quera si que manonde ra. Mbiate raque. David rucucha raque. Quera si que manonde ra. Ũquí asenei senei nguia mbia je co. ⁹ Ũquí je chõ mbia riqui nguia mbae rasi raanguquia tuchi seje ã. Ũquí nii ño setarõ mii nguia a. Se mbia iquiare rocoĩ nyii setarõ tarõ. Se chõ setarõ ndaque. Dios cheẽ nguia etarõ aroneate re. ¹⁰ Coche mbia icuã ndiqui nguia seje. Ǻ nda Dios chiirabo Dios cheẽ isi bei cote. Ǻ nda Dios emingo bei cote. Ǻ nda ũquí siqui bei ibate Jesucristo rese cote. ¹¹ Ñee ñooñoa tuchi chõ mbia cheẽ ã nde: Nandemano ngue Jesucristo rese ra. Nyebe ra nandeico bei erese cote.

¹² Cristo rĩ mbae rasi nandesaã saã mose, Cristo ra nandemii ererecuarã, ererecua tuchi mose ae. “Cristo aicuayãte” nande i mose, Cristo abe ra ñee nande je. “Se abe jaẽicuayãte” i ra nande je.

¹³ Nandechẽe iru raque ra nande, Dios quia ra ñee iru eã mbei. Dios quia ra ucheẽ mbuchebi aroneate nande je, i que embesa ji ra.

Ndeico tuchi mose Dios rese, ereireĩ ireĩ eã ndae

¹⁴ Ǻ ndese mbia hue jenda embaaquiatu quiatu tuchi. Diósaa embaaquiatu quiatu tuchi. Ñee icuã icuã eã nda nyue chã. Ñee icuã icuã mose, emingo turã eã nyiese chõ ũquí nde. Mbae turã si embui chõ ũquí no nde. ¹⁵ Equieĩ quieĩ tuchi chõ nguia Dios je jẽ. Ǻ nda Dios “coche ñene” i ndeje. Sã emo ndiqui quieĩ quieĩ turãte nguerecua je no. Eireĩ nguia te ra nguerecua si cote. Eĩ ere si chõ nguia Dios cheẽ nenei nenei mbia je. Dios cheẽ abi abiã. ¹⁶ Ae uchuru mondo chooñote quia nae, ũquí ndese eicoã. Ũquí ndiqui isho i ite Dios si ũquí. ¹⁷ Ũquí ñee mbuchei i ite echoi quia qui. Sã mbae rasi riqui oso i ite no. Eĩ si chõ Himeneo nguia ũquí. Fileto rese. ¹⁸ Ũquí ndiqui ñee Dios cheẽ abi abi tuchi ũquí. — Mbia rete raaque ra quera si eã, i chõĩño mbei equia ũquí. Nyebe eriqui nguia mbia mbui mbuite Dios si ũquí. ¹⁹ Sita cuasu mo na ndei Dios cheẽ. Embuquiata aronea. Aque ñi mbei chõ nda echi. Eĩ si chõ Dios cheẽ nande je no nde. Dios cheẽ ño ã nde: “Dios riqui nguimba icua jate ã,” i que

ra. Co abe rei Dios cheẽ co: “Ae ‘Dios rimba rei se’ i quia nae, sã ùquĩ ndiqui nyao ja mbae icuã si”, i que ra.

²⁰ Sã mbae riru chumubarate riqui mbaecha mo nyuchúaa no. Sã oro ao ji riqui emo no. Sã plata ao ji emo no. Sã ira ao ji emo no. Sã tuchu ao ji emo no. Emo emo ndei iti mombo sacuã no. Emo emo mbae turã ndirurã no. ²¹ Sã Jesús quiato riqui mbae turã ndirurã na. Sã eriqui icúe bei Dios mbaerã. Sã nyao tuchi mbae icuã si. Ûquĩ mose ra Jesús ia tuchi erese. ²² Ae icuã acuanindu chosei chosei quia nae, ùquĩ si ehui chõ jẽ. Eico turã ño Dios icha rui jẽ. Dios eicua tuchi chõ nguia jẽ. Echesequa tuchi chõ nguia mbia rese jẽ. Echimbua chõ nguia mbia rese jẽ. Eĩ ño Jesús quiato nguia siqui turã nyiese ã, echã quishĩ ja mose. ²³ Mbia uchuru mondo chooño mose ñee nyue, nde abechĩ nda jẽ. Mbia mbicuã sacuã ño ùquĩ nde. ²⁴ Dios rimba quia mbia mbicuã aroneate re. Eturã tuchite quia mbia ja je re. Mbia mbaaquiato quiato turãte quia ñene. Siqui minguete quia mbia je re. ²⁵ Ae Dios cheẽ isi teã teã, ùquĩ nda embaaquiato quiato mingue quia. Ûquĩ ñi nda ñee ñee Dios je. Dios emundua si sacuã. Dios cheẽ isi turã sacuã. ²⁶ I nda echoi oso chee uchã diablo si, ndua si mose Dios cheẽ ndese. Diablo quia eisite nguia co. —Ã esaã jẽ, i beite diablo quia ee co.

3

Mbia ireĩ nguĩate ra mbae icuã naa i i

¹ Jesús quiato ra mbae rasi saã tuchi Jesús tu serĩ mose. Ûquĩ eicua quiatu tuchi, Timoteo. ² Umbae ae ae rese ra mbia ndua cote. Mbae isiquia mii ndese chõ nda mbia riqui ndua ndua cote. Mbia ra ucuasu saã saã tuchi. Ñee icuã icuã mbei ra equia emo ñi. Mbia ra ngu cheẽ mumba mumba tuchi. Usi cheẽ abe no. Mbia ra gracias iã tuchi nyue aque mose. Siqui sereã tuchi ra Dios rese. ³ Mbia ia eã eã nda emo ndese. Ñimbuturã sereã tuchi ra emo je. Emo nda embuqueta queta bei quia. Hui aroneate ra mbae icuã si. Nyaba nyaba reã tuchi rae. Mbae turã nda eucuayã tuchi. ⁴ Mbia ra embucheẽ ñee ngõngue rii. Mbia ra mbae i ñooño. Mbia ra uaquiato saã ñooño. Ubi achõ ndese ra eriqui. Siqui rocoĩ Dios bi rese. ⁵ Dios quiato ra mbia saã ñooño. Dios quirãcuã icua rocoĩ. Ûquĩ mbia icuã si echao tuchi, Timoteo. ⁶ Ûquĩ mo ndiqui ique ique emo nyuchua ã. Cuña aquiatuã mbiĩrĩ irĩ. Ae ndua ndua beite quia huicuã ndese cuña nae, ùquĩ mbiĩrĩ irĩ. Ûquĩ cuña ndiqui uchioseĩ raã naa mbei mbae icuã ùquĩ. ⁷ Ûquĩ cuña ndiqui “tachimbaaquiato” i beite raque ùquĩ. Ñimbaaquiato aroneate Dios cheẽ ndese. ⁸ Sã brujos Moisés cheẽ mumba no. Janes, i equia ee. Jambres abe no. Eĩ si chõ cuña mbiĩrĩ irĩsa nguia Dios cheẽ mumba mumba ùquĩ. Ndua aquiatuã je chõ ùquĩ nde. Ûquĩ ndiqui emo mingo aroneate Dios cheẽ ndese ùquĩ. ⁹ Mbia ra siqui eã ùquĩ ñee ndui cote. Mbia ra “eaquiatuã” i chee erii. Sã “eaquiatuã” i chee Moisés cheẽ mumbasa rii brujos no.

Jesús quiato ra mbae rasi saã, i Pablo

¹⁰ Ereico turãte que se rã si ra, Timoteo. Dios cheẽ ngue eresenei senei nguia se rã si ra. Ae asaã saã nguia Dios je nae, ùquĩ ngue eresaã saã nguia nde abe ra. Ae “tasaã Jesús je” ae quia co nae, nde abe eresaã saã turã nguia aque. Dios ereicua tuchite se rã si. Ereico minguete equia aque. Erechesequate equia mbia rese aque. ¹¹ Ereico turãte que equia mbia icuã icuã mose ndeje

ra. Sã mbia icuãte riqui seje Antioquíaa no. Icónioo abe. Lístraa abe. Sã ñi aico mbae rasi raã tuchi huee no. Dios que sereaquiato ùquí si ra. ¹² Ae siquise rete quia Jesucristo rese nae, ùquí nda mbae rasi saã tuchi. Mbia icuã icuã tuchi ra ee. ¹³ Ae icuã icuãte riqui Dios je nae, ùquí nguia ra eicuã i i tuchi cote. Ae mbia mbiiĩ irĩ nguia nae, ùquí ngui a ra mbia mbiiĩ i i tuchi cote. Ñimbiiĩ i i tuchi ra equia no. ¹⁴ Nde chõ eico tuchi Dios cheẽ ndese. Ae rese erechimbaaquiato nae, ùquí ndese eico tuchi. —Ichoiñoa tuchi que ã nda, erete equia eicua aque. Nembaaquiatusa abe ereicuate quia aque. ¹⁵ Ndeñetẽ mosenda bei chõ ereico nguiã Dios cheẽ icua aque. Dios cheẽ nembaaracuate quia aque. Nyebe ereico Jesucristo icuate aque. Nyebe Dios nderirõ nguiã ndeicua si. ¹⁶ Dios cheẽ turã ja chõ ñene. Dios chimondo ja chõ ñene. Dios cheẽ nguia rei mbia mbaaquiato. Dios cheẽ ngui a rei mbia icuã mbuchecua ee. Dios cheẽ nguia rei “eĩ jenyẽ” i tuchi nande je. Dios cheẽ nguia rei aba mingo Dios bi rese. ¹⁷ I nda Dios quiato siqui turã tuchi. I nda eaqiatio mbae turã naa naa ja.

4

¹ Aico ñee ndeje Dios nonde a, Timoteo. Jesucristo nonde abe no. Ae r a tube mae ja mbia rese. Mbia reco rese. Mbia mano je rese abe. Ae nonde aico ñee ndeje a. ² Dios cheẽ esenei senei tuchi quia mbia je, Timoteo. Mbia eanduse mose. Mbia eandu sereã mose abe no. Embaaquiato quiato mingue bei chõ nguia. Embuti mbuti bei quiato quia Dios cuti. “Eĩ jenyẽ” ere bei quiato quia mbia je. ³ Namõ jiri quiato ra mbia Dios cheẽ turã andu sereã cote. Ubi achõ ndese chõ nda huiisa rerequita tuchi cote. Nyebe ra Dios cheẽ andu sereã. Ae mbia mbaaquiato icuã icuãte quia Dios cheẽ ndui eã nae, ùquí ndui chõ nda mbia riqui tuchi cote. ⁴ Nyiisaquia tuchi chõ nda equia mbia ñee ñooño je rese cote. Ñee ñooño eã je rese nyiisaquia rocoĩ. ⁵ Cochee chõ eico nde, Timoteo. Nderoseĩ nguiãtu chõ eico mbia icuã icuã mose ndeje. Equiei quiei tuchi chõ nguia Dios je. Dios cheẽ esenei senei tuchi chõ nguia mbia je.

⁶ Achuruchate ucua quia co cote. Aico mano utate co cote. ⁷ Mbae que asaã saã tuchi quia Dios je ra. Ae je Dios riqui ñee seje nae, ùquí ngue asaã jate quia ee ra. Ahui eã mbeite que se quia esi ra. ⁸ Dios que sechiã mbuturã nda. Ùquinde que aico ngata turã nda. Nyebe eriqui nguiã premio nderecoquiato seje pe. Jesucristo tu mose ra Dios mae ja mbia rese cote. Aque mose quia ra premio mee seje cote. Se mii je eã ndae. Ae Jesucristo ru choseite quia nae, ùquí ja je abe ra premio mee.

Echu serea, i Pablo Timoteo je

⁹ Echu jei chõ serea, Timoteo. ¹⁰ Demas quiato ngue serecha nguiã. Ibi jenda achõ ndese chõ eriqui nguiã ndua. Ubi mii ndese chõ eriqui nguiã ndua. Nyebe esi nguiã serecha Tesalónicaa. Crescente quiato que oso Galáciaa ra. Tito quiato que oso Dalmáciaa no nda. ¹¹ Lucas mii ño siqui nguiã serese co cote. Marcos abe eru bei seje. Ae nda quiei quiei jiri nguiã serese aa. ¹² Tiquico quiato que amondo Efésõõ ra. ¹³ Ae asecha saco sembae nae, eru bei seje ndechu mose. Asecha que Troas ra. Carpo chuchua. Libros abe eru bei seje. Sechimbesa papeles si ra eretesareichĩ. Eru bei seje. ¹⁴ Alejandro el herrero que mbae icuã saã saã tuchi quia seje ra. Dios ra mbae icuã mee ee eicuã ndibishorõ. ¹⁵ Echiteaquiato quia esi jẽ. Nande Dios cheẽ nenei nenei mose, ebiãte eriqui co. ¹⁶ Mbia sererao mose ererecua je, emo ngue nyaroã tuchi serese ra. Serecha ja chõ ngue ra. Dios nda paama i eã ee ùquí mii ña.

¹⁷ Jesús m̄i ngue serecha eã nda. Ae m̄i ngue sembirãcuã nda. Se echeẽ turã nenei nenei tuchi sacuã. Ae judíos eã nae, ũquĩ Jesús cheẽ turã andu tuchi sacuã. Nyebe Jesús sembuĩ mondo nguiã mbia icuã si. ¹⁸ Ae ra sereaquiato bei quia mbae icuã si. Sererao chee mose ibate nyiese. Sã mbia riqui ñee turã mbei erĩ. Amén.

Pablo hui mbae mbesa mbesare

¹⁹ Saludar ere rã Prisca je. Aquila abe je. Onesíforo chuchua jenda ja je abe. ²⁰ Erasto que siquichõ Coríntoo ra. Trófimo ndasi que asecha Milétoo ra. ²¹ Nyiiseĩ tuutu nonde chõ echu. Eubulo saludos mondo quia ndeje aque. Pudente abe no. Lino abe no. Claudia abe no. Jesús quiato ja a jenda abe no. ²² Sã Jesucristo riqui bei nderese. Sã Dios turã ndiqui bei jendese. Amén.

CARTA DEL APOSTOL SAN PABLO A TITO

Pablo embesa mondo Tito je

¹ Pablo rei se. Dios rimba. Jesucristo chimbaaquiatu. Dios que semondo ñee ñee sacua ūchiirabo je ra. Ūqui Dios icua tuchi sacua ngue semondo ra. Siqui turā sacua Dios rā si. ²—Sechiirabo ra amingo bei, i que Dios cose ra. Ñee ñooño eā ndae. Ūqui ndese embiirandu sacua ño ngue semondo nguiā. ³ Dios rei nanderirōsa mbae icua si. Ae que seirabo ucheē nenei nenei nguiā mbia je ra. Eī ngue Dios ucheē mbuchecua mbia je cote ra. ⁴ Aico ā mbesa ndeje a, Tito. Ereico Jesús icuate se rā si aque. Nyebe aico nguiā “seriirī” i ndeje co. Nanderu chō Dios re. Sā nanderu turā ndiqui bei ndeje. Sā Jesucristo abe turā ndiqui ndeje. Sā ūqui ia eā tuchi riqui nderese. Sā ūqui ndiqui nembia turā tuchi.

Sā Jesús quiato rerecua riqui turā

⁵ Ae nandesaā ja eā huee nae, ūqui esaā ja rā nguiā nde huee. Amei mo eirabo rabo Jesús quiato rerecuarā. Mbia recua ja ja jenda. Secheende ndeje eirabo rabo ino huee. Nyebe arereacha nguiā huee Crétaa. ⁶ Amei turā ño eirabo rabo Jesús quiato rerecuarā. Eninisi mii nderecua chō eirabo. Ae riirī Jesús icua quia nae, ūqui mii ño eirabo rabo. Ae eriirī seteāte riqui nae, ūqui ño eirabo rabo. Ae eriirī teā eāte nae, ūqui ño eirabo rabo. Jesús quiato rerecuarā. ⁷ Jesús quiato rerecua quia Jesús quiato teaquiatu quiatu quia. Ūqui siqui icua aroneate. Ucuasu abe raā naa aroneate. Erosee nguiā aroneate. Quiacua aroneate. O rerequia chooñoa aroneate. Mbia mo mbae osei osei aroneate no. ⁸ Mbia nyo i mose echuchūaa, isi turā ndae. Siqui turā ndae. Ndua ndua ra mbae ao nonde. Siqui eā nda mbae icua ndese. Dios rā si chō nda eriqui. Echiichati eā ndae. Jesús quiato rerecua ra eī mbei quia. ⁹ Sā eriqui bei Dios cheē ndese nandechē nguire. Ūqui mose ra ūqui abe mbia mbaaquiatu quiatu turā. Jesús osei uquia ee. Mbia icua ñee nda embutiba Dios si. Ūqui ño eirabo rabo Jesús quiato rerecuarā, Tito. ¹⁰ Mbia teā teā je tubiriāte riqui ā. Judíos teā teā je abe tubiriāte no. Ñee ñooño tuchite equia ā. ¹¹ Ūqui nyuru esiquisā tuchi. Mbia mbaaquia tu icua icuate quiatu nguiā ūqui. Eru mbiirī irī. Eninisi abe mbiirī irī. Eriirī ja abe no. —Mbia ra umbae mee mee nande je, i chō nguiā ā. ¹² Hue jenda mo ngue ñee nda. —Ñee ñooño je chō ure re, Creta jenda re. Ureicua mbei chō ure re. Nyacua icua na ño ure re. Uretomei ño ure re. Mbae mburireāsa chō ure no nde, i que Creta jenda mo nda. ¹³ Ichōño tuchi chō ñene. Nyebe echeē asi tuchi ūqui je, Tito. † nda eriqui tuchi Jesús rese. ¹⁴ † nda eriqui eā judíos icua ñee ndese. Mbia tubiriā Dios cheē isi teā teāte quia ūqui. —Ūqui ñee nda jemumbayāchī jē, ere chō mbia hue jenda je. ¹⁵ Echiā mbuturā ji je chō mbae turā ja riqui nguiā ā. Echiā mbuturā jiriā je quiatu mbae mo turā eāte re. Dios icua rea je mbae mo turā eāte. Ndua turā eā mbei. —Eicuā eā, i chōchī nguiā mbae icua ndese siqui siqui. ¹⁶ —Dios ureicuate quia ā, ichōño equia ūqui. Echisaā nguiā eicuate re. Nyebe nandeco nguiā eicuate, Dios rese siquiā mose. Aba biā tuchi chō ūqui nde. Aba cheē mumbasa. Siqui aroneate mbae turā mo ndese.

2

Mbia embaaquiату turā, i Pablo ñee Tito je

¹ Nde quia mbia embaaquiату quiату turā jē. Dios cheē ndui si embaaquiату quiату. ² Amei embaaquiату quiату. Enyere chō ñee ee: — Jēquiacua quiacuachī nda jē. Jengata turā mbei chō nguia jē. Jēaracua bei chō nguia jē. Dios jēicua tuchi chō nguia jē. Jenyesecua tuchi quia mbia rese jē. Jēingo tochi chō nguia no jē, ere chō amei mbaaquiату quiату, Tito. ³ Ari abe embaaquiату quiату. Enyere chō ñee ee: — Jengata turā mbei quia Dios resa rae. Jeñee icuā icuā techī nda mbia mo nī jē. Jēquiacua quiacuachī nda jē. Mbae jēsaā turā ño nguia mbia resa ráee jē, ere chō ari mbaaquiату quiату, Tito. ⁴ Sā ari acuanī mbaaquiату quiату. † nda acuanī nyesecua jaaja ngu rese. † nda nyesecua jaaja nguiriā abe rese. ⁵ † nda acuanī aracua ja ja. † nda ndua ndua ja mbae turā ndese. † nda uchuchua jenda abe mbuturā turā ino no. † nda eturā mbia je. † nda ngu cheē abe mumbayā no. Sā ari eī acuanī mbaaquiату quiату. Ūquī mose mbia ñee icuā icuā aroneate Dios cheē nīi. ⁶ Acuanīndu abe embaaquiату quiату quia no. † nda earacua racua ja. ⁷ Nde abe ecuata turā mbei, Tito. Mbae turā esaā uquia mbia je. Ndeico mose mbia mbaaquiату quiату, cochee chō eico. Echimbirātā tuchi chō nguia. ⁸ Ndeico mose mbia mbaaquiату quiату, echeē turā turā ño nguia ee. † nda mbia ñee icuā eā ndecheē mose. † nda Dios cheē ndesenda reā ireī ireī ndecheē si. † nda ñee icuā eā jēje. ⁹ Mbia rimba abe embaaquiату quiату. Enyere chō ñee ee: — Jenderecua cheē nda jemumba mumba techī nguia jē. Echeē nguire jēingo bei chō mbae turā ndese jē. Jeñeechī nda echeē ndibishorō jē. ¹⁰ Mbae mo nda jembuquia chāchī jē. Jēseteā ño jēingo mbae turā ndese jē. Eī jenje mose ra mbia ñee turā Dios cheē nīi, jenje chō nguia mbia rimba je.

¹¹ Dios que uturā teacuquia mbia je cote ra. Mbia rirō ja nonde mbae icuā si. ¹² Mbae ja rīī Dios rīqui nandembaaquiату quiату co. Ae echosei chiāte quia nae, ūquī nandesecha ja sacuā. Ae icuā nandebite rīqui nae, ūquī ndecha ja sacuā no. Nandearacua sacuā abe no. Nandeico sacuā mbae turā ndese no. Nandendua bei sacuā Dios rese abe no. Eī nande bei quiату quia nande namo. ¹³ Jesucristo ra tu ībii ucheē nguire. Enininya tuchi ra tu. Nandeico eraarō arō ā. Ae ra nandembiate u. Ae rei Dios tuchi. Nanderirōsa mbae icuā si. ¹⁴ Ae que tu mano nande je ra. Nandeicūā ndibishorō ngue mano nda. Nandechīā mbuquishī ngue u umbaerā nda. Nandeico tuchi sacuā mbae turā ndese. ¹⁵ Enyere chō mbia mbaaquiату quiату, Tito. Ererecua rā ño eico embaaquiату quiату. Echeē asi asi jiri quia ee. Sā emo ndiqui ndecheē andu sereā nea eā.

3

Dios uturā teacuquia nande je

¹ Echeē mbia je, Tito. — Ererecua cheē nda jemumba mumba techī nguia jē. Ererecua cheē jeñandu quiату quiату quia jē. Jeñimbirātā tuchi quiату mbae turā naa naa nonde jē. ² Jeñee icuā icuāchī nda emo nīi jē. Jeñee icuā icuāchī nda jenje je. Jeseteā ño jēingo jē. Jenguasu ra jēsaā saāchī emo je jē, ere chō mbia je, Tito. ³ Nandearacuayā techī nande abe nyii. Nandeteā teā techī equia nyii. Nandembirī irī ji raanguiate nandeicochī nyii. Ae nandechosei chosei quia mbae icuā nyii nae, ūquī achō ndesete nandeicochī nyii. Mbae icuā ndese nandeico techī nguia nyii. Mbia mbae nandechosei chosei techī nguia nyii. Mbia mae icuā icuā techī nguia nanderese nyii. Nande abe

nandemae icuã icuã techĩ nguia nandechiese nyii no. ⁴ Dios ia eãte que mbia rese aque mose ra. Uya eã ngue eteacuquia nande je ra. Uturã abe que eteacuquia nande je no nda. ⁵ Aque mose que nanderirõ mbae icuã si ra. Eya eãte quiatu ngue eriqui nguia nanderese. Nyebe nanderirõ nguia mbae icuã si. Nandeturã nã eã ngue re. Nandechiã ngue eirei mbiasu ra. Espiritu Turã je que nandechiã mbiasu ra. ⁶ Dios que Espiritu Turã mondo tuchi nande je ra. Jesucristo rĩ ngue emondo nande je ra. Jesucristo rei nanderirõsa tuchi nande icuã si. ⁷ Dios que Espiritu Turã mondo nande je ra. Uturã je nandembitirõ sacuã. Nandemingo bei tuchi sacuã no. —Nandemingo bei tuchi rae, sã nandeico i ã no. ⁸ I chõĩñoa tuchi chõ ã nde. ã esenei senei tuchi quia mbia je. ¶ nda mbia emumbayã. ¶ nda Dios icuasa siqui ja mbae turã ndese. Ae rĩ aico ñee jêje nae, sã mbia ùqui ñee mumbayã ja quiatu. Aba bite ùqui. ⁹ Mbia ñee asi asi je si ehui chõ. Mbia ñee mbei mose ngãmei ndaque rĩ, ùqui abe si ehui chõ. Mbia ñee icuã icuã mose nyue, ùqui abe si ehui chõ. Ae Dios senei senei nquia judíos je cose nae, ùqui nã mbia ñee icuã mose nyue, ùqui abe si ehui chõ no. Aba biãte ùqui ñee. Aba mbaaquiato ãte ùqui. ¹⁰ Emo Jesús quiato mbuqueta queta mose embiicuã nonde uchue, ùqui abe si ehui chõ. Eicuãte ùqui, ere ee. Ndecheẽ andu eã mose, echeembe ee. Aquere ehui chõ esi. ¹¹ Aba chiicuate ùqui icuã. Ùqui siqui turã aroneate quia ùqui. Huicuã eicuate quia ùqui.

Pablo embesa hui bei

¹² Artemas nda amondo nderea reae. Ae oso eã mose, Tíquico ra amondo ndeje. Ùqui mo ngasẽ mose huee, echu serea Nicápolis cote. Huee taico bei ama mose, ae que se ra. ¹³ Apolos embucuata turã mondo. Zenas ndese. Zenas ndei embesasa. Jesús quiatote ùqui. Mbae mo emondo ee. ¶ nda echoi turã. ¶ nda mbae tiã eã ee. ¹⁴ Sã nanderesenda riqui mbae turã naa naa mbei ñimbaaquiato. Emo mbae ua mose, sã mbae mo mee mee ee. Ùqui naa naa mose, siqui turã ño nguia ùqui cote. ¹⁵ Ae chi ja serese a nae, ùqui saludos mondo quia ndeje aque. Ae Jesús quiato nyesecuate quia urerese hue jenda nae, ùqui je saludar ere ure je. Sã Dios turã ndiqui tuchi jẽ ja rese. Amén.

LA CARTA DEL APOSTOL SAN PABLO A FILEMÓN

Pablo embesa Filemón je

¹ Se rei Pablo. Setarō ji aĩ a. Mbia que setarō Jesucristo rĩĩ nda. Timoteo rese aico ã mbesa mbesa ndeje a, Filemón. Ureresenda tuchi chō nde re. Jesucristo rimba. ² Ae Jesús quiato ñumunua nua mbei quia ndechuchúaa nae, ũquí je abe ureico ã mbesa mbesa a. Apia je abe ureico embesa mbesa a. Arquipo abe je no. Ae que siqui bei ureresese ra. Mbia icuã icuã mose ure je Jesús cheẽ ñĩ. ³ Sã Dios riqui turã mbei jẽje. Sã jeya bei riqui erese. Jesucristo rese abe no.

Filemón Jesús quiato tuchi

⁴ Secheẽ mose Dios je, “gracias” ae bei se quia Dios je nderĩĩ co. ⁵ Mbia que sembiirandu randu nderese ra. —Filemón ndiqui Jesús icua tuchi co. Co eriqui nyesequa tuchite Jesús rese co. Dios quiato ja rese abe no, i que equia sembiirandu randu nderese ra. ⁶ Aico ñee mbeite Dios je nderĩĩ co. Ae je ereico Jesús nenei nenei nae, ĩ nda ũquí abe Jesús icua tuchi nde rã si. ⁷ Aque ereico nyesequa tuchi Jesús quiato ja rese aque. Nyebe seya beite riqui nguiã nderese co. Nde que Jesús erechousei uquia quia Jesús quiato je ra.

Onésimo eisi turã, i Pablo ñee

⁸ Cristo chimbaaquiato aico raque co. Sã ererequa riqui ñee ngũimba je no. Uquí asaã arõte raque ndeje. Asaã eã nda se. ⁹ Tacheẽ mingue chō ndeje. —Mbae esaã seje, tae turã ño ndeje. Ameite se cote. Setarō ji aĩ Jesús rĩĩ a no. Se rei Pablo. ¹⁰ Mbae mo esaã Onésimo je. Seico mose aa cárcel que aico Onésimo mbaaquiato quiato Jesús rĩĩ nda. Jesús quiato riqui co cote. Seriiĩ tuchi rã ño eriqui nguiã co cote. Jesús icua mose co cote. ¹¹ Nderimbachō ño ngue eriqui nguiã nyii. Erequeteã eã jiri que equia erese nyii ra. Aqueteãte quia erese co cote. Nde abe ra erequeteãte erese cote. Siqui turãte ra nande je cote. ¹² Aque amondo quia ndeje aque. Eisi turã mámbĩ. Sã ereico seisi turãte no. Uquí esaã si ee. ¹³ Amondo sereãte raque. Siquichō ndei nda serese aa chã. Mbae mee mee sacuã setarō ji je ndecutiã. A setarō ji ñĩ Jesús cheẽ turã ñĩ a. ¹⁴ Aisi eã nda mingo serese a, nde “eno” iã mose seje. “Eĩ ere chō”, ae eã nda ndeje. Nde ae chō eisi turã. Nde ae chō echeẽ turã ee. Se ae ra arembuchee turã eã ee.

¹⁵ Uchã ndei que ndesi nyii ra. Siqui bei ra nderese cote reae. ¹⁶ Nderimbachō eã nda cote. Ndequiato chō nda cote. Nderesenda chō nda cote. Co aico nyesequate erese co. Nde quiato ra erechesequa tuchi erese cote. Cristo resenda chō siqui nguiã co cote. Nderese. ¹⁷ Ndequiato tuchi chō se re. Sã ñĩ ereico seisi turã turãte no. Eĩ ere si chō Onésimo isi turã se rã si. ¹⁸ Onésimo deber i mose ndeje, cobrar erechĩ nda ee. Seje quiato cobrar ere. ¹⁹ Pablo chō se re. Seo je chō aico nguiã co mbesa ndeje a. Onésimo deber i mose ndeje, asibishorō nda mbae mee ndeje. Mbae que asaã tuchite rei quia ndeje ra. Dios cheẽ ngue asenei tuchite quia ndeje ra. Dios nemingo bei sacuã. Nyebe deber ere tuchite raque seje. ²⁰ Nyebe Onésimo eisi turã na seje. ĩ nda seya tuchi jiri nderese. Dios abe ra eyate nderese.

²¹ —Filemón nda secheẽ mumba eã. Secheẽ ndui si tuchi ra Onésimo isi turã, ae tuchi se quia nderĩĩ co. ²² Seruacuã jendecoquiato ino mámbii. Dios ra sembusẽ mondo, jeñee mbei mose ee reae. Uquĩ mose ra aso jendea.

Pablo ñee hui bei

²³ Epafras saludos mondo quia ndeje aque. Ae tarõ ji ñi serese a. Jesucristo cheẽ ñi. ²⁴ Marcos abe saludos mondo quia ndeje aque. Aristarco abe. Demas abe no. Lucas abe no. Ñ ndiqui Dios cheẽ nenei nenei serese ã. ²⁵ Sã Jesucristo riqui uturã ndeacuquia bei jêje. Amén.

LA CARTA A LOS HEBREOS

Jesucristo m̄i ño Dios cheẽ mbuchecua nguiã

¹ Dios que ucheẽ mbiasa asa tuchi quia mbia nandei ñiinda je cose ra. Hue r̄i ji eã ngue eriqui ucheẽ mbiasa asa ee ra. Dios cheẽ mbuchecua checuasa atate que aque mose ra. ² Eĩ eã ño namo nde. Jesucristo m̄i ño Dios cheẽ mbuchecua checua nguiã nande je co cote. Dios nguiir̄ite mbucheẽ nande je cote. Ae m̄i ndese chõ ngue Dios ibi ao nyii ra. Dios que em̄i mbae ja rerecuarã nda. ³ Dios nininya rã si tuchi chõ Jesucristo nininya re. Dios rã si tuchi chõ ae re. Ae chõ mbae mingo ja nguiã ucheẽ quirãcuã je co. Ae que mano nandecuã mbutiã sacua nda. Aquere eñi ngoi bei ngu rese ibate pe cote.

Jesús quia rei i tuchi ángeles si

⁴ Jesucristo quia rei i tuchi ángeles si. “Seriir̄i tuchi” i chõ Dios nguiã ee. ⁵ Ñ ngue Dios ñee áte ángeles mo je ra:

Seriir̄i ño nde re.

Ndereco que amee ndeje ra,

i áte que Dios ángeles mo je ra.

Nderu chõ se re.

Seriir̄i ño nde re,

i áte que Dios ángeles mo je ra. ⁶ Dios nguiir̄i mbu mose íbii que ñee nda:

Sã ángeles riqui adorar i ja seriir̄i je,

i que ra. ⁷ Ñ ngue Dios ñee ángeles r̄i nda:

Quirir̄iã tu asi rã tuchi chõ ángeles re.

Serimba chõ ángeles re.

Tata rendi rã tuchi,

i que Dios ñee ángeles r̄i nda. ⁸ Nguiir̄i je quiatu que ñee ã nda:

Nde rei Dios. Ererecuarã mbei ra nde.

Ererecuã turã tuchi ereico nde co.

⁹ Mbae turã eresaã sete quia co.

Mbae icuã nguia erechosei chiãte nguiã.

Nyebe Dios riqui nguiã nembia tuchi nderesenda mo si.

¹⁰ Nde que mbae erechao ja tuchi ibi jenda nyii ra.

Nde je que ibei erechao no nda.

¹¹ Ñquiã nda ua ja chee.

Nde quia ra ereico bei.

Tiru ima na ja chee ra ñquiã.

¹² Sã mbia riqui tiru ima mombo no.

Eyasu rerequia erendaque re.

Eĩ si ra ibi cote. Ibei abe no.

Nde quia ra eĩ mbei ereico.

Eremanoa mbei ra nde quiatu,

i que Dios ñee Jesucristo je ra. ¹³ Ñ ngue Dios ñee áte ángeles mo je ra:

Ecoi sejii. Nde abe ra ererecuã serese.

Ae ndeucuãyãte quia nae, ñquiã je ra ndequirãcuã atecuquia tuchi.

Ndequirãcuã tuchi chee ra ñquiã si,

i ãte que Dios ángeles mo je ra. Jesús mii je que ñee ùquĩ nda. ¹⁴ Dios ririĩ eã ño ángeles re. Dios rimba chõ ñene. Ae ra Dios mingo bei, ùquĩ ndaarõ sacua ño ngue Dios ángeles mii nguiã.

2

Nandeichayã sacua Dios icha si

¹ Ae nandechandu quia Dios cheẽ nae, ùquĩ ndese nandeico ndua tuchi. ¹ nda nandeichayã mbei Dios icha si. ² Ae riĩ ángeles riqui ñee mbia je cose nae, ñee ñooñoa tuchi chõ ñene. Ae ùquĩ ñee mumba nae, mbae rasi que esaã cote ra. ³ Jesucristo sí que ñee nda. —Mbia tamingo bei, i que ra. Mbia que echeẽ senei senei mbiasa nande je cote ra. Nande echeẽ mumba mose ra mbae rasi nandesaã tuchi nande quiatu cote. ⁴ —Jesucristo ñee ñooñoa ño nguia re, i sacua mbia que Dios mbia mae sayã naa naa nda. Milagros tubiriã. — Jesucristo ñee ñooñoa ño nguia re, i sacua mbia que Dios Espiritu Turã mondo mbia je no nda. Ae je Dios Espiritu Turã mondo mondo sete nae, ùquĩ je chõ ngue Espiritu Turã mondo ra.

Mbia rã ngue Jesucristo ru nyii ra

⁵ Ae ra nandeso emo mose nae, hue jenda rerecua eã nda ángeles. ⁶ Sã embesa ji ñi ñee ã no:

¿Mbaerã ereico nduate mbia rese re, Dios?

¿Mbaerã ereico eraarõ tuchi re?

⁷ Angeles que eremingo turã tuchi rei mbia si aque mose ra.

Ûquinde ereico bei mbia mingo turã tuchi ángeles si co cote.

Mbia que eremii mbae abe ja rerecuarã cote no nda.

Ndechiao rerecuarã tuchi cote.

⁸ Mbae que eremii ja mbia mbaerã nda,

i embesa ji huĩ ñee a. —Mbae rerecuarã ja ra mbia, i mose Dios, mbae ja riĩ ño ñee nguiã. Mbae mbia cheẽ mumbate raque quia ã. ⁹ Jesús mii ndese chõ nandeico nguiã mae ã. Ae je Dios mbae rasi saanguquia tuchi nae. Ae que ererecua eã tuchi ángeles si aque mose ra. Dios que mbia mingo bei sete ra. Nyebe “emano mbia riĩ” i nguiã Jesús je. Emanonde que Dios emii mbia rerecuarã tuchi cote ra. ¹⁰ Dios que mbae chao ja tuchi umbaerã nda. Nyebe mbae rasi raanguquia tuchi nguiã Jesús je cote. Mbia tubiriã mingo bei sacua ño ùquĩ nde. Jesús mbae rasi raã mose, ererecua turã tuchi sacua ño ùquĩ nde.

¹¹ Jesús que nandembitorõ uturã na sí ra. Nyebe eru riqui nguiã nanderu ja co cote. Nyebe Jesús riqui nguiã “senongue” i ireĩ nguiã nande je. ¹² Sã Jesús cheẽ ñi embesa ji rese a no:

Paba ibatenda tasenei senongue je.

Senongue rese tairasei rasei ee,

i que Jesús cheẽ mbesa ji huĩ nda.

¹³ Dios taicua tuchi,

i abe que Jesús cheẽ huĩ nda.

A aico seriiri Dios chimondo rese a,

i abe que Jesús cheẽ huĩ nda. ¹⁴ Mbiate quiatu ngue nande re. Nyebe Jesús abe mbiarã no nde. Mano sacua nande je. Mano mose nande je que diablo quirãcuã mbutiã cote ra. Diablo quiarei equirãcuã tuchi aba iquia sacuaã.

¹⁵ Ae siquiche beite quia umano si nae, mbae icua nimba raanguia chõ ùquĩ nde. Ûquĩ siquiche eã sacua ño ngue Jesús mano nguiã. ¹⁶ Angel sacua eã ngue Jesús ru ra. Mbiarã ño ngue eru nguiã. Judiorã ño ngue eru nguiã.

Mbia mbitirõ sacua. ¹⁷ Nyebe Jesús ru nguiã mbiarã nande rã. Ñee turã sacua Dios je nande riã. Dios nandembasi eã sacua nandeicua nã. Jesús siqui mose mbiarã ngue mano mbia icua nã nda. Mbia icua mbutiã sacua esi. ¹⁸ Mbae icua ngue tã i tuchi rei Jesús je ra. Nyebe ra eriqui tuchi nanderese uquirãcua mee nande je, mbae icua tã i mose nande je.

3

Jesús quia rei i tuchi Moisés si

¹ Seresenda, Dios que jemã icúe umbaerã tuchi ra. Nyebe aico nguiã ñee tuchi Jesucristo riã jêje co. Secheẽ ndese jenyiisaquia tuchi quiatu quia. Jesucristo rei nandererecua tuchi cote. Sacerdote rerecua rã tuchi nande je cote. ² Jesucristo que Dios cheẽ mumbayã tuchi quia mbae raã ja echeẽ nguire ra. Sã Moisés abe mbae raã ja Dios cheẽ nguire no. ³ Jesús quia rei i tuchi Moisés si. Ae que Moisés chao ra. Sã emo ndiqui tuchia ao no. Tuchia aosa quia rei i tuchi tuchia uchiao si. ⁴ Mbia mo tuchia chao arondete raque. Dios mã nguia rei mbae ao ja tuchi. ⁵ Moisés que Dios cheẽ mumba eãte rei quia ra. Erimbachõ ño ngue ae ra. —Ñ nda Dios saã je mbia je, i chõ ngue Moisés quia ra. ⁶ Cristo quia rei i tuchi Moisés si. Ae quia rei Dios riirã tuchi. Dios chuchua rerecua tuchi chõ ae re. Nande rei Dios chuchua. Ae quia siqui nguiã nandechiangui re co. Nandeico bei mose ndua erese. Nandeya bei nandeico mose abe erese.

Dios quiato ra uquenea ucua nyoï Dios récuua

⁷ Jesús quia i tuchi re. Nyebe Espiritu Turã ndiqui nguiã ñee nande je ã: Dios cheẽ jeñandu rã namo.

⁸ Jeñia átãte ra jëingochi jë.

Sã cose ndare chiaã átã mbeite riqui Dios cheẽ andu sereã turúquiaa eico mose no.

Ûqui icuãte que eriqui Dios je ra.

Dios que ñimbirãcua ñote quia ee ra.

⁹ Dios que siqui mingüete quia ùqui mbia je ra.

Cuarenta años chee que ra.

Mbia mae sayã ngue esaã saã mbei quia ee ra.

“Ma Dios siqui mingüete nande je”, i rei que mbia jenamei nguia cose ra.

¹⁰ Nyebe Dios paama i nguiã ñee ee.

“Siqui icuã mbeite equia uchiangui re ã. Siqui sereãte equia seicha rui ã.

¹¹ Aico paama ite ee co.

Uquenea nda eucua eã mbei nyoï serécuua”, i tuchi que Dios erã nda,

i que Espiritu Turã ñee embesa ji huï nda. ¹² Cochee chõ jëingo, Seresenda.

Jëicha eã sacua Dios reco si jeñiangui re. Dios jëicua bei sacua jeñiangui re no. ¹³ —Nandeico i i tuchi quiatu quia Dios rese, jenyenye bei quiatu quia jenyue. Jendeco mose íbii. Ñ nda mbae icua jembirã irã eã. Ñ nda jêteã teã eã

Dios cheẽ je no. ¹⁴ Sã nande Cristo nandeicua raque nyii no, eã nande bei chõ

nguia eicua i i. Ûqui mose ra Cristo resenda tuchi nande cote. ¹⁵ Sã embesa ji riqui ñee ã no:

Dios cheẽ jeñandu rã namo.

Jeñia átãte ra jëingochi jë.

Sã cose ndare chiaã átã mbeite riqui Dios cheẽ andu sereã turúquiaa eico mose

no,

i que embesa ji ra. ¹⁶ ¿Aba chõ Dios cheẽ ñandu sereã eandure cose chã? Ae Moisés querao Egipto si nae, ùqui ño ngue resẽ. ¹⁷ ¿Aba je chõ Dios paama i cuarenta años cose chã? Ae mbae icuã saã saã nae, ùqui ño ngue resẽ. Nyebe mano mano nguiã turúquiaa. ¹⁸ ¿Aba je chõ Dios ñee tuchi chã? —Jenguenea nda jëucuyã mbei oso serécuaa, i chã. Ae echeẽ mumba quia nae, ùqui je chõ ngue re. ¹⁹ Nyebe ngasẽ eã nguiã Dios récuua. Dios icua eãte quiatu ngue re.

4

¹—Ae seicua quia nae, ùqui nda nyoï serécuaa, i chõte Dios quia nande je co. Nyebe nandeico cohee. Cohee jëingo eã mose, jemo jengasẽ eã arõte Dios récuua. ² Nande abe je chõ Dios riqui nguiã ñee co. —Ae seicua quia nae, ùqui nda nyoï serécuaa, i. Moisés reco mosenda achõ je eã ño ngue ñee nguiã. Ùqui ngue Dios chandu iru chooño nda. Dios icua rocoï. ³ Ae Dios icua quia nae, ùqui achõ ño nda nyoï ngasẽ Dios récuua. Uquenea ucua sacua huee. Dios que ñee tuchi ucheẽ andu sereãsa je cose ra: Aico paama ite ee co.

Uqueneã nda eucua eã mbei nyoï serécuaa, i que ra. —Ma siqui serese, i bei rei que equia eraarõ arõ nda. Ibi ao mosenda bei. ⁴ A mbesa ji que chí nda:

Dios mbae ao jare que uqueneã ucua séptimo día ra, i que embesa ji ra. ⁵ A abe que chí embesa ji rese ra:

Uquenea nda eucua eã mbei nyoï serécuaa, i que embesa ji huï no nda. ⁶ Emo emo abe ra Dios icua. Siqui sacua érecuaa. Ae Dios cheẽ ñandu nyii nae, ùqui ngue Dios icua eãte ra. Nyebe ngasẽ eãte nguiã Dios récuua. Dios cheẽ nguiatu ngue emumbate nguiã. ⁷ Nyebe Dios riqui nguiã ñee nande je quiatu co. Nandeico sacua érese namo. Ùqui echeẽ mumbare nyii. Sá David Dios cheẽ mbesa no:

Dios cheẽ jeñandu rã namo.

Jeñia átãte ra jëingochí, i que Dios ra,

i que David embesa ra. ⁸ Josué que mbia isrealitas mi aroneate Dios récuua ra. Uqueneã ucua sacua. I nda Dios ñee áte rei. —Taemingo serécuaa jenguenea ucua sacua, i áte rei. ⁹ Nyebe ra Dios quiato nyoï ngasẽ Dios récuua. Huee ra uqueneã ucua tuchi huee cote. ¹⁰ Ae ra ngasẽ Dios récuua nae, ùqui nda uqueneã ucua tuchi. Sá Dios uqueneã ucua tuchi mbae ao jare no.

¹¹ Nandechimbirãcuã tuchi oso nonde Dios récuua. Nandequenea ucua sacua. Ae Dios icuayãte quia cose nae, ùqui na nda nandeicochí nande mo namo jẽ. ¹² Dios cheẽ nguia rei ereco tuchi. Equirãcuã tuchi. Ique tuchi aba chianguï re. Sá tiquise rimbe riqui ique chõte oso no. Eï si chõ Dios cheẽ nde. Ique tuchi aba ndua nduasa rĩ. Aba ndua nduasa mbuchecua tuchi aba je. Aba chioseï oseï abe mbuchecua tuchi aba je no. ¹³ Mbae mo ndese Dios riqui jirandu eã eãte co. Mbae mo nandesaã nyecuayã cuayã aroneate quia esi ã.

Jesús ñee turã mbei Dios je nande rñ

¹⁴ Jesús rei Dios riiñ tuchi. Sacerdote rerecua tuchi chõ eriqui nguiã nande je co. Oso que ibate Dios rea ñee ñee sacua nanderñ nda. Eriqui ñee ñee mbei Dios je nanderñ co. Nyebe nandeico tuchi quiatu quia erese. ¹⁵ Diablo tã i mose nande je, Jesús riqui ico tochi tuchi nande je co. Ae rane je quiatu ngue diablo tã i tuchi nguiã nyii. “Ma Jesús mbae icuã naa” i nguiã. Mbae icuã ngue Jesús saã eã mbei chõ nda. ¹⁶ Nyebe nandesiquicheã nguiatu quia Dios rñchã.

Nyesequate quiatu nguiã nanderese co. Nandesiquicheã nguiatu quia ñee ñee ee. Eya eã sacua nanderese. Uquiracua mee sacua nande je, diablo ta i mose nande je.

5

¹ Sacerdote rerecua judío mbae rei mbia chõ. Ae chõ ñee turã mbei nguiã mbia riñ Dios je. Ae chõ mbae quishĩ ji mondo mondo nguiã Dios je. Dios mbia chisaã saã icua mbutiã sacua esi. ² Sã sacerdote rerecua abe riqui mbia nande rã si no. Nyebe eriqui nguiã siqui tochte mbia quiracua nea je. Mbiam aquiatuã je abe. Mbiam icha icha je abe no. ³ Sã sacerdote abe riqui Dios cheẽ mumba no. Sã eriqui mbae quishĩ ji mondo mondo Dios je no. Dios eicua mbutiã sacua esi. Mbiam chisaã icua abe mbutiã sacua esi no. ⁴ “Sacerdote rerecua se” i aroneate emo, Dios eirabo eã mose. Dios ae que sacerdote miñ miñ nda. Sã Aarón miñ cose no. ⁵ Eĩ si que Cristo ra. “Sacerdote rerecua se” iã ngue ae ae ra. Dios quiatu ngue emiñ nguiã. Sã Dios cheẽ mbesa ji riqui ñee no:

Seriirĩ ño nde re.

Ndere co que amee ndeje ra,

sã Dios i ñe e ee no. ⁶ Sã embesa j i mo ndiqui ñee no:

Sacerdote bei rei nde.

Melquisedec na tuchi ereico nde co,

sã embesa ji riqui i no. ⁷ Jesús siqui mose a fbii, eya eã tuchi que emo mose ra. Ñee tuchi que Dios je aque mose ra. Nyeseo tuchi que equia Dios je ra. Dios emano ndiquisã sacua esi. Dios que echeẽ ñandu ra. Jesús quiatu que Dios cheẽ mumba sereã mbeite quia ra. ⁸ Dios ririite raque Cristo. Mbae rasi que esaã tuchi ra. Ñimbaaquiato chõ ngue equia ũqui ndese Dios cheẽ mumbayã nda. ⁹ Jesús que Dios cheẽ mumbayã tuchi mbae rasi raã tuchi ra. Aquere Jesús riqui mbiam mingo bei co. Ae echeẽ mumbayã nguia nae, ũqui emingo bei quia co. ¹⁰ Dios quiatu ngue emiñ nguiã sacerdote rerecuarã. Melquisedec na si no.

Jeñimbaaquiato mbei chõchĩ equia Cristo rese ã

¹¹ —Mbae tasenei tuchi Jesucristo riñ jẽje, ae rei que se ra. Jẽ nguia secheẽ jeñandu sereãte nguiã. Nyebe aico nguiã embiasa asa aroneate jẽje co. ¹² Cosete que jẽingo rei Jesús icua resẽ. ¿Mbaerã jẽingo ñimbaaquiato mbeite re? I nguia nda jẽingo nguiã emo mbaaquiato quiatu chã. Jẽaquiato mbei chõchĩ. Dios cheẽ aba chũcua jẽicuayã mbei chõchĩ. Ñquẽ na ño jẽingochĩ ã. Sã ñquẽ ndiqui usi quiandi achõ mbei no. Soo quiatu eu aroneate nguiã. ¹³ Ñquẽ na jẽingo bei mose, jẽaquiatoate siqui mbae turã ndese. ¹⁴ Ae ñimbaaquiato quiatu tuchi quia Cristo riñ nae, ũqui nguia rei mbae turã icua tuchi, mbae icua icua rocoi. Mbiam cuasu rã ño ũqui nde.

6

¹⁻² Ae rese jeñimbaaquiato nyii nae, aba chũcuate ũqui. Ũqui miite rese jẽingochĩ nguiã. Mbae aba chũcuayã mo abe jẽicua jiri Jesús riñ ae. Ñ aba chũcua que asenei ja jẽje nyii ra: —Jenyisaã mbae icua si jẽhui, ae que jẽje nyii ra. —Dios jẽicua, ae que jẽje nyii no nda. Bautismo abe que asenei jẽje nyii ra. —Jẽo jeñono Jesús quiato arõ, ae que jẽje nyii no nda. —Mbiam raque ra quera si, ae que jẽje nyii ra. —Mbiam Dios quiatoã nda mbae rasi saã tuchi tata cuasuu, ae que jẽje nyii no nda. ³ Ũqui aba chũcuate riqui ã ndesẽ. Aba

chũcuayã tasenei jêje cote, Dios “eno” i mose. ⁴Emo emo ngue siqui rei Dios quiatorã nyii ra. Dios chĩmee icua raque nyii. Espíritu Turã abe icua raque nyii no. ⁵Dios cheẽ turã abe icua raque nyii. Dios quirãcuã abe icua raque nyii no. ⁶Ûquĩ hui mose Dios si, uba si aroneate erese cote. Jesús mbucha si chõ nguiã ira rese ùquĩ. Iquia icua chõ nguiã Jesús je mbia résaa ùquĩ. ⁷Sã Dios riqui ama mbuchaaqui ibi ja rese no. Eĩ si chõ ndaque equia ucheẽ mbuchecua raque mbia ja je co no. Sã mbia riqui mbae tiquia ibi ia mose no. Suri turã mose, echa iate ra cote. ⁸Ñui achõ suri mose huee, eicuãte ùquĩ. Eĩ si chõ mbia Dios cheẽ andu chooñosa no nde. Eicuãte ùquĩ. Ûquĩ nda Dios mombo chõ tata cuásuu.

Dios ra ucheẽ mbuchebiã mbei

⁹Jenĩ aico nguiã ñee eã, Seresenda. Dios cheẽ jeñandu chooño eã nguia jẽ ndeae. Jesús jẽicuate quia ùquĩ. Nyebe jẽingo tuchi quia erese ùquĩ ndeae. ¹⁰Dios turãte eriqui co. Tesareiaã nda jenyisaã turã si. Jendua ndua mose Dios quiato ataque rese. Mbae jemondo mondo mose ee. Mbae jemondo mondo bei quia ee ùquĩ. ¹¹Eĩ jenyee bei quiatu equia nyesecua bei emo ndese. †nda Dios mbae mee tuchi je jêje. ¹²Jeñimbirãta mbei chõ nguia mbae raã jẽ. Sã Dios quiato cose ndare no. Sã eriqui Dios icua tuchi no. Sã siqui mingue tuchi ee no. Nyebe Dios ucheẽ mbuchebi jiri jiriã tuchi nguiã ee. Eriqui beite mbae mee mee ee co.

¹³⁻¹⁴Sã Dios ñee Abraham je cose no: —Taico turã mbei ndeje. Nderiirĩ nducucha tubiriã ndae, sã i Dios Abraham je no. Ûquĩ mose que Dios jurar i umbae nombre riĩ nda. ¹⁵—Dios ra seriirina mee seje ucheẽ nguire, i que Abraham nguia eraarõ arõ mingue ra. Dios que eririĩ mondo chee ee ucheẽ nguire cote ra. ¹⁶Mbia jurar i mose, Dios riĩ ño eriqui nguiã jurar i. —Ûquĩ nda asaã eã, i aroneate cote, jurar ire nyii. ¹⁷—Nderiirĩ nducucha tubiriã nda ambu, i mose Dios Abraham je, jurar i que ee aque mose ra. ¿Mbaerã ño jurar i chã? —Dios ra ucheẽ mbuchebiã, i sacuaã mbia chõ ñene. —Dios ra ucheẽ nyabi i eã, nande i sacuaã ño ñene. ¹⁸Dios “mbae tasaã jêje” i mose, ñee ñooñoa ño ñene. Dios jurar i mose, jurar i chooñoa ño eno nde. Nyebe eriqui nguiã nanderaarõ turãte nandeso mose erichã. —Taemingo bei, i mose Dios nande je, ucheẽ nda embuchebiã. ¹⁹—Dios ra semingo bei ibate ucheẽ nguire, nande equia ã. Nande ùquĩ icua mose, nandequirãcuãte ra cote. Dios ra nandemingo tuchi uchiese cote. Sã sacerdote si quia Lugar Santísimo Dios riichã sacua no. Eĩ nande chõ nguia nande abe Dios riichã, nande eicua mose. ²⁰Jesús rane ngue oso ibate ñeenda mombe nande je ra. Pe eriqui ñee turã mbei Dios je nanderiĩ pe. Sã sacerdote riqui ñee turã mbei Dios je mbia riĩ no. Sacerdote rerecua tuchi chõ Jesús nande je re. Melquisedec na si tuchi Jesús riqui co.

7

Jesús i tuchi sacerdotes ataque si

¹Melquisedec ndei Salem jenda rerecua. Dios mbae sacerdote abe que ae ra. Abraham tu mose mbia rerecua icua icuare, Melquisedec que esobeishĩ oso ra. Melquisedec que bendecir i ee ra. ²Abraham ngue el décimo mee Melquisedec je ra. “Ererecua Turã” i chõ nguiã “Melquisedec” i mose. “Mbia mingo turãsa nyiese” i abe chõ nguiã “Melquisedec” i mose no. “Mbia siqui turã nyiese” i chõ nguiã “Salem” i mose no. ³Melquisedec si eãte que ra. Eru

eã abe no. Eramei mo eã abe no. Mano eã mbei que ra. Nyebe eriqui nguiã Jesucristo rã mbei co. Sã Jesucristo riqui beite sacerdoterã co no.

⁴ Melquisedec quia rei i tuchi Abraham si. Abraham quiatu ngue el décimo mee nguiã ee. Ae emee ee décimo sacua nda. ⁵ Abraham ndesenda eã ndaque Melquisedec. Aquere que Dios ñee judíos je ra. —El décimo jeme mee ño nguiã sacerdote jendesenda je, i que Dios judíos je ra. Judíos que emee mee sacerdoter je ra. Leví ririĩ ndaque sacerdoter. Judíos sí raque sacerdoter. Abraham ndiriĩ ja raque judíos no. ⁶ Melquisedec que el décimo isi Abraham sí ra. Leví ririĩ eã ndaque Melquisedec. —Judíos i tuchi ra nde, i raque Dios Abraham je. Nyebe que Melquisedec bendecir i Abraham je ra. ⁷ Ae bendecir i nae, aque quia rei i tuchi bendecir i ji si. ⁸ Ae mbia décimo isi isi quia uataque si ã nae, mbiachõ ño ùqui nde. Ùqui mano arondete. Melquisedec quiatu que mano eã mbei ra. ⁹ Abraham décimo mee mose Melquisedec je, erucucha ririĩ décimo mee naanguia chõ ngue ee re. Leví décimo mee naanguia chõ ngue ee re. Sacerdoter Leví ririĩ décimo mee naanguia chõ ngue ee re. Ùqui décimo isi isi raque nguesenda si. ¹⁰ Abraham ngue ùqui i ja ra. Eriiriã ndaque nyii, décimo mee mose Melquisedec je.

¹¹ Sacerdoter riqui mose que Dios ucheẽ mondo rei judíos je ra. Sacerdoter mbia mingo turã aroneate Dios rese. f nda Jesús tu ãte rei. Ae quia ñi tu nguiã sacerdote bei nonde cote. Melquisedec na sí. Aarón na eã. ¹² —Sacerdoter ra nyuuru uru eã ngõngue rendaque re cote, i que Dios aque mose cote ra. —Jesús mii nda siqui sacerdoterã mbei cote, i que Dios cote ra. ¹³⁻¹⁴ Leví ririĩ nducucha eã ndaque Jesús. Judá ririĩ nducucha raque quia ñene. Judá ririĩ nducucha mo siquiã ndaque sacerdoterã cose. —Ùqui mo sacerdoterã aroneate, i rei que Moisés nyii ra.

¹⁵ Sacerdoter cose ndare rã eã ño Dios Jesús mii nguiã sacerdoterã cote. Jesús quia ra siqui bei sacerdoterã. Melquisedec na si ra eriqui bei. ¹⁶ Moisés chimbesa rui si eã ño Jesús riqui nguiã sacerdoterã co. Leví ririĩ nducucha eã ño ae re. Ae quiatu siqui beite nguiã co. Nyebe eriqui nguiã sacerdote beite co. ¹⁷ Sã Dios ñee ee embesa ji rese no: Nde quiatu ereico bei nguiã sacerdoterã mbei co. Melquisedec na si,

sã Dios i ñee ee no. ¹⁸ —Sacerdoter ra nyuuru uru eã ngõngue rendaque re cote, i que Dios aque mose cote ra. Ùqui nguiatu ngue mbia mingo aroneate nguiã Dios rese. ¹⁹ Moisés chimbesa quia mbia mingo aroneate nguiã Dios rese. Ae rese nandeico quia namo co cote, aque quia aba mingo arondete nguiã Dios rese co cote. ²⁰⁻²¹ —Sacerdoterã nde, i mose emo je nyii, emo ngue jurar i ãte quia ra. Dios Jesús mii mose sacerdoterã, jurar i que aque mose cote ra. Sã embesa ji riqui no:

Dios que jurar i ra. Ucheẽ nda embuchebiã mbei.
“Nde quiatu ereico bei nguiã sacerdoterã mbei co.
Melquisedec na si”,

i que Dios cheẽ huĩ embesa ji rese ra. ²² Ae contrato Dios saã mbia je nyii nae, ùqui contrato que mbia mingo eã Dios rese ra. Ae contrato Dios saã Jesús rii namo nae, ùqui nguiã rei eturã tuchi nande je namo cote.

²³ Sacerdote ñiinda atate que eriqui nyii ra. Nyuuru uru que equia ngõngue mano mose ra. ²⁴ Jesús quia siqui nguiã sacerdoterã mbei co cote. Emo nda chí eã mbei euru erendaque re emo mose cote. ²⁵ Ae ra Dios siichã Jesús rii

nae, ũquĩ nda Jesús mingo bei tuchi. Jesús quia siqui beite nguiã co, ñee turã sacua Dios je ũquĩ nii.

²⁶ Ae chõ sacerdote turã tuchi riqui nguiã nande je co cote. Dios rã tuchite quia ae re. Eicuã jiri jiriãte quia ñene. Mbae turã achõ ndese chõ eriqui nguiã. Mbae icuã ngue embiãcuã aronea tuchi quia ra. Ae quia ibatenda rerecua tuchi riqui nguiã namo co. ²⁷ Jesús quia rei sacerdote rerecua ataque rã eã tuchi. Ũquĩ nguiatu ticuasu quishĩ quishĩ mbeite nguiã sacrificio raã naa. Dios eicuã mbutiã sacua esi. Mbia abe icuã mbutiã sacua esi. Jesús quiatu ngue ticuasu mo quishĩ eãte nguiã sacrificio raã emo mose. Ae sí chõ ngue mano nguiã sacrificio raã sacua. Mbia icuã mbutiã ja sacua ño ngue mano nguiã aque mose. ²⁸ Mbiachõ ño ngue sacerdote rerecua ja ñiinda ra. Ũquĩ ngue mbae turã saã mbei aroneate quia ra. Dios quiatu que Jesús mĩ sacerdoterã mbei cote ra. Ae quia mbae icuã saã jiri jiriã tuchi nguiã.

8

Dios contrato yasu saã Jesús rĩ

¹ Ababi tuchi quia rei Jesús siqui mose sacerdoterã. Sacerdote turã tuchi quia rei ae nandẽ je. Hue eñi ngoi Dios Ibatenda ribisho quiti nande je huee.

² Hue eriqui mbae raã naa Dio s chuchua ibatẽndaa huee. Dios ae chisaã tuchi chõ hue tuchia re. Mbia mo nyisaã eã ño ñene. Nyebe Dios chuchua tuchi chõ hue re. ³ Sacerdote rerecua ja chõ sacrificio raã naa sacua nde. Nyebe Cristo abe sacrificio saã nguiã umano mose. ⁴ Ae sacrificio Cristo saã nae, ũquĩ nguia eturã tuchi sacerdote chisaã si re. Cristo siqui mose ibii, eĩ nda sacerdote eãte rei ae. Moisés chimbesa cheẽ ndui achõ ño sacerdotes ibi jenda riqui nguiã sacrificio raã naa ã. ⁵ Ae sacerdotes ibi jenda saã saã nguia mbae nae, ibei jenda rese aba mundua sacua ño ñene. Sã Dios ñee Moisés je Dios chuchua ao nonde no. —Ndeico mose ibi ibátee que sechuchua ibei jenda atacuquia ndeje, ũquĩ na si chõ sechucharã ibi jenda esaã, i que Dios ñee Moisés je ra. ⁶ Ae contrato Dios saã mbia je nyii nae, mbaranquiataũte que ũquĩ nda. Ae contrato Dios saã nande je namo Jesús rĩ nae, eturã tuchi chõ ũquĩ cote re. —Ã tasaã jẽje. Ã abe tasaã jẽje no, i tuchi Dios quia contrato namonda rĩ nande je co. ⁷ Contrato ñiinda mbia mingo bei mose Dios rese, i nda contrato yasu raã eãte rei nande je. ⁸ Dios ia eãte que eriqui mbia aque mosenda rese ra. Sã embesa ji riqui no:

Ã ño ngue Dios ñee nguiã: Contrato yasu ra asaã je Israel jenda je.

Judá jenda je abe no.

⁹ Contrato asaã nguia ũquĩ namei je nyii nae, ũquĩ contrato rã eã nda eyasu asaã cote.

Mbia arao quia Egipto si nae, ũquĩ mosenda rã eã nda contrato asaã je mbia namondo je.

Mbia cose ndare chõ ngue contrato saã iru seje resẽ. Contrato raande que secheẽ mumba mumba chõ nda.

Nyebe ũquĩ asecha chõ nguiã, i que Dios ra.

¹⁰ Ae contrato ra asaã je Israel jenda je, ã ndei e ã:

Secheẽ nda amii tuchi eãquĩ ndese.

Secheẽ nda amondo tuchi echiangui re.

Se ra ererecua turã tuchi ee.

Serimba tuchi ra ũquĩ.

¹¹ Seicua ja tuchi rae. Mbia cuasu ja.

Eñetē abe ja chee.

Seicua ja mose, ũquĩ mose emo uataque mbaaquiatsu quiatsu aroneate serĩ cote.

Seicua ja tuchi quiatsu ra aque mose.

¹² Ũquĩ icuã nda ambutiã ja esi.

Atesarei bei ra eicuã si,

i que Dios cheē huĩ embesa ji rese ra. ¹³—Contrato yasu tasaã, i que Dios cote ra. Contrato ñiinda imate quiatsu ngue ee re. Mbae ima nda ua ja cote.

9

Cristo rei sacerdote tuchi cote; sacerdotes ñiinda rã eã

¹—Eĩ jenye jenye bei chõ nguia mbae raã naa mose sechuchua, i que Dios sacerdote je ra. Contrato ñiinda raã mose. Uchuchua ibi jenda rĩ ño eriqui nguĩã ñee, “sechuchua” i mose. ² Dios chuchua que cuartos nyeremo ñi nda. Eiquesa jii que cuarto nongue ñi nda. Lugar Santo, i que hue cuarto je ra. Candelero oro ao ji que chĩ huee ra. Mesa abe que chĩ huee ra. Mbichae Dios chuchua jenda abe que chĩ huee no nda. ³ Cortina mbucheseco ji que siqui tuchua ite rĩ nda. Aque quitera quti que cuarto nongue ñi nda. Lugar Santísimo, i que hue cuarto je ra. ⁴ Huee que altar mo ñi oro ao ji ra. Mbae shĩmbu turã ndei sacua. Ira ao ji mbae riru mo abe que chĩ huee ra. Oro quti ji resebe que ra. Contrato Dios cheē mbesa ji que chĩ aque mbae riru imi ye ra. Oro ao ji ñio abe que chĩ mbae riru imi ye ra. Mbichae resebe que eñi nda. Maná i equia ee. Aarón chĩtochoquia ruri abe que chĩ mbae riru imi ye no nda. ⁵ Angeles raanguia ao ji que chĩ ibate mbae riru arõ nda. Querubines, i que ũquĩ je ra. Ujeo que embiitee u mbae riru arõ nda. Sacrificio renda rei mbae riru. Ũquĩ cuartos nyeremo jenda asenei ja aroneate jēje namo.

⁶ Aque mose que sacerdotes riqui ique ique bei cuarto eiquesa ji ra. Mbae raã naa sacua Dios je. ⁷ Cuarto cortina quitera quitinda quiarei mbia mo ique aronea tuchi. Sacerdote rerecua mĩ ño ngue i que quia huee ra. Ique chĩbe ibeã ngue equia huee ra. Una vez al año ño ngue eriqui ique huee ra. Mbae ruqui que esii sii quia huĩque mose huee ra. Dios eicuã mbutiã sacua. Mbia icuã abe mbutiã sacua. ⁸ Aque mose bei que mbia mo ndiqui ique aroneate Lugar Santísimo nda. Dios rĩchã tuchi sacua. Ũquĩ ndese Espíritu Turã ndiqui urembiirandute ã. ⁹ Sacerdotes que ticuas u quia iquia tuchi rei quia aque mose ra. Ũquĩ ngue mbia chiã mbitirõ eã mbei chõ nda. Mbia mundua ndua sacua Cristo ruqui rese chõ ngue ũquĩ nda. Ũquĩ nandeicuate quia ã cote. ¹⁰ Contrato ñiinda que mbia mingo turã aroneate quia ra. Mbae rĩ achõ ño ngue eriqui nguĩã ñee. Mbaeiae rĩ. Mbia chi u rĩ. Mbia chimbei rĩ. Mbia choita rĩ. Ũquĩ ñi ja. Ũquĩ ñee nduĩ sí chõ ngue mbia riqui rei nguĩã nyii. Cristo tu nonde.

¹¹ Cristo tu mose que contrato ñiinda mbutiã ja cote ra. Contrato yasu que esaã nande je cote ra. Ae mĩ ño sacerdote namo cote re. Dios chuchua ibi jenda jie eriqui eã ndaque aa. Ibatenda ye chõ eriqui nguĩã mbae raã naa nande je pe. ¹² Cristo quiatsu ngue ticuas ruqui sii sii eã u nguĩã nande je. Chivo ruqui abe. Nguqui ae je chõ ngue nandeicua mbutiã nguĩã. Mano mĩ ngue mbia ja je ra. Mbia mingo bei sacua cote. ¹³ Ticuas ruqui que mbia mbitirõ tirõ ndei quia sacerdote je ra. Chivo ruqui abe. Ticuas rĩrĩ ndaque rei ji cusubu abe no. ¹⁴ Cristo ruqui quia rei equirãcuã tuchi ũquĩ mbae ruqui si. Cristo ruqui mĩ nguia rei nandendua nduasa mbitirõ tuchi. Ae ruqui mĩ

nguia rei nandemingo turã Dios reco rese. —Se ae tamano mbia icuã mbitirõ sacuã. Mbia mbae turã naa naa sacuã Dios je cote, i que Cristo mano nda. Mbae icuã mo ngue esaã jiri jiriã tuchi ra. Espiritu Turã ngue siqui tuchi erese emano mose ra.

¹⁵ Cristo que contrato yasu saã nande je cote ra. Dios chiirabo erichã tuchi sacuã cote. Dios chiirabo siqui tuchi sacuã erese Dios cheẽ nguire. Sã Dios ñee ee nyii no. —Jẽingo bei ra serese, i ee no. Ae je Dios contrato saã ndei quia nyii nae, ùqui icuã nã ngue Cristo mano nda. ¹⁶ Ae contrato Cristo saã nande je nae, testamento chõ ùquiã nde. Sã emo testamento mbesa no. Testamento raãsa mano mose, aque ramo mose chõ testamento valer i nguiã cote. ¹⁷ Testamento raãsa manoa mose, testamento chõoño ño aque mose re. ¹⁸ Dios contrato ñiinda raã namo mose que ticuasú icuã uquia mbia je ra. ¹⁹ Moisés contrato ñiinda raã mose, Dios cheẽ ngue embuchecua ja mbia je ra. Aquere que ticuasú ruqui isi chivo ruqui rese ra. I je que emombara ra. Eruqui je que Dios cheẽ mbesa ji rii rii cote ra. Mbia ja abe rii rii que ra. Mbae ribichu mbia ji je chõ ngue erii rii nguiã. Ovejara irei je. Ira rãquiã ñetẽ je abe no. ²⁰ Aquere que Moisés ñee mbia je ra. —Ã mbae ruqui ã ndesẽ. Ticuasú que mano nda. Mbae ruqui rei Dios mbae testamento valer i sacuã jẽje, i que Moisés ñee mbia je erii rii cote ra. ²¹ Aquere que Dios chuchua abe rii rii cote ra. Dios chuchua teiqui renda abe que esii sii no nda. ²² Contrato ñiinda mose, mbae ruqui achõ je chõ ngue Dios riqui nguiã mbia icuã mbutiã esi. Dios que mbia icuã mbutiã chooño eã nda. Mbae quishĩ mose bei quiatu ngue eriqui nguiã mbia icuã mbutiã mbei esi.

Cristo m̃i aba icuã mbutiã

²³ Dios chuchua ibi jenda quia rei echuchua ibatenda raanguia. Ibatenda quia rei eturã tuchi ibi jenda si. Ibi jenda que Moisés sii sii mbae ruqui je embitorõ sacuã nda. Ibatenda quiatu que embitorõ eã mbae ruqui je ra. Cristo ruqui m̃i je quiatu que ra. ²⁴ Dios chuchua ibi jenda que Cristo icueã oso quera si mose ra. Dios chuchua ibatenda quiatu ngue esi nguiã icue cote. Hue eriqui ñee turã mbei Dios je nanderĩ huee. ²⁵ Sacerdote icue icue beite quia Lugar Santísimo co. Una vez al año ño eriqui nguiã icue icue bei huee. Mbae rii rii sacuã mbae ruqui je. Nguqui j e eã ño ñene. Cristo quiatu que mano m̃i nda. Nguqui que eichusẽ tuchi nande je ra. ²⁶ Cristo que tu m̃i ibi ra. Mano m̃i sacuã nande je. Nande icuã mbutiã sacuã. Mbae ua serĩ mose que eru mano aa ra. Mano nyĩbei ibei eã equia co. ²⁷ Sã mbia riqui mano m̃i no. Sã Dios riqui ecuata mee aquere no. ²⁸ Eĩ si que Cristo mano aque m̃i no nda. Mbia icuã ja mbutiã sacuã esi. Cristo ra tu si ibii emo mose. Aque mose ra manoa mbia icuã ndiquicharõ cote. Uquiato mingo bei sacuã nguiatu ra eru. Ae esaarõ arõ nguiã nae, ùqui mingo bei sacuã.

10

¹ Moisés chimbese que mbia mingo turã eã ndaque ra. Mbia mundua ndua sacuã Dios ririĩ mano ndese chõ ngue re. Ticuasú mbia quishĩ nyĩbei ibei rei quia nae, ùquiã nduqui que mbia mingo turã eã no nda. ² Ùquiã mbia chiã mbitirõ mbei mose, eĩ nda sacerdotes equishĩ nyĩbei ibei ãte rei. Eĩ nda ticuasú m̃i quishĩ ndei mbia mbitirõ ja sacuã. Eĩ nda mbia tesarei rei huicua si. ³ Mbia ticuasú quishĩ nyĩbei ibei mose, ùquiã ngue mbutesareĩate huicua si ra. Munduate quiatu que huicua ndese ra. ⁴ Ticuasú ruqui ra mbia icuã mbutiã eã mbei. Chivo ruqui abe no.

⁵ Cristo ruqui m̄i nguiatu mbia icuã mbutiã nguiã esi co. Sã Cristo ñee Dios je siqui mose ibii no:

Ticuasú ruqui mbia mbitirõ eã mbeite quia ndeje co.

Nyebe que serete ereme seje ra.

Se mano sacua mbia icua n̄i.

⁶ Mbae raaque rei ji abe ndebiãte.

Ticuasú mbia quish̄i quish̄i nguia huicua n̄i nae, ũqui abe ndebiãte no.

⁷ Nyebe ngue acheẽ nguiã ndeje: “Ae ndebite nae, ũqui ndese seico sacua ño ngue achu nguiã.

Sã embesa ji riqui ñee serĩ no, ũqui ñee nguire que achu ra”, ae que ndeje ra, i que Cristo ngu je ra. ⁸ Nyebe Dios biãte riqui nguiã sacrificios. Mbia ticuasú quish̄i quish̄i mose huicua n̄i. Mbae raaque rei ji abe ebiãte no. —Ũqui j̄esaã saã, i raque Moisés chimbesa huĩ. ⁹ —Ae ndebite nae, ũqui ndese seico sacua ño ngue achu nguiã, sã Cristo i Dios je no. Mbia mbui sacua sacrificios raã naa si chõ ngue eru nguiã. Sacrificio m̄i tuchi que esaã u mano mbia icua n̄i nda. Cristo ruqui m̄i ño mbia icua mbitirõ mbei nguiã co cote. Sacrificio raã i i rocoĩ. ¹⁰ Ae Dios bite nae, ũqui ngue Jesucristo saã tuchi u ra. Mano mose mbia ja icua n̄i. Mano m̄i tuchi que u ra. Nanderirõ mbei que nandecuã si cote ra. ¹¹ Sacerdotes riqui beite raque Dios chuchua ã. Ticuasú equish̄i nyiibe i beite raque quia mbia icua mbutiã sacua ã. Ũqui nda mbia icua mbutiã eã mbei. ¹² Jesucristo quiatu que mano m̄i aque mose bei ra. Mbia icua ndiquicharõ sacua ño ngue re. Aquere eñi ngoi bei Dios ribisho quiti nande je hue. ¹³ Pe eñi ngoi beite Dios jii pee. Ererecua tuchi ra Dios rese cote. Uquirãcuã nda eteacucua tuchi chee uquiatoã je cote. ¹⁴ Sacrificio m̄i ngue esaã nda. Aque m̄i sacrificio je que uquiato chiã mbitirõ ja bei ra. ¹⁵ Sã Espiritu Turã abe riqui ñee ũqui no:

¹⁶ Ae contrato ra asaã je judiõs je nae, ã ndei e ã:

Secheẽ nda am̄i tuchi echiangui re.

Secheẽ nda am̄i tuchi eãqui ndese no.

¹⁷ Atesarei bei ra eicuã si,

i que Espiritu Turã nda. ¹⁸ Dios nandecuã mbutiã mose, mbae mo nandeq-uish̄i aroneate quia nandecuã ndiquicharõ ã cote.

Dios nandesichã na

¹⁹ Nande abe quiatu Dios nandesichã tuchi quia cote, Seresenda. Sã sacerdote ique Lugar Santísimo no. Eĩ nande si quiatu quia siquicheã ique Diósaa. Jesucristo ruqui r̄i nandequi Diósaa. ²⁰ Cristo rete rei cortina mbucheseco ji rã. Cristo rete mano mose, cortina abe que embui ra. Nyebe nandeico ique arõte Dios rea Lugar Santísimo ã cote. Cose ndare rã eã tuchi chõ cote re. ²¹ Jesucristo m̄i ndei sacerdote tuchi nande je cote. Dios quiato ja je cote. ²² Diósaa ra nandesiquicheã ique oso cote. Nandechiã turã ño nandeico oso Dios r̄ichã. —Dios ra nandesi turã, nande chõ nguia nandechiangui re. Cristo quiatu ngue nanderii rii nguiã nguqui je nyii. Nandecuã mbutiã sacua nande si. I turã je que nanderei ra. ²³ —Taemingo bei, i que Dios nande je ra. Ñeende ũqui nda ucheẽ mbuchebiã. Nyebe nandeico quiatu quia ñee: —Dios ra nandemingo bei ucheẽ nguire, i. ²⁴ Sã Cristo mbae raã ja tuchi nande je no. Eĩ nande sí chõ nguia siqui turã nyue. Nandenongue nandembuchesecua turã nguiatu quia nyiese. Mbae turã nandesaa quia bei quiatu quia nandenongue je. ²⁵ Cristo quiato ñumunua nua mose, nandetesareia mbei quiatu quia ñumunua nua. Sã emo

emo ndiqui ñumunua nua eāte no. Cristo nandechosei uquia uquia bei quia nanderesenda je. Achite quiatu Cristo ñi nguiã tu a.

²⁶ —Mbae icuã tasaã, nande i i mose Jesucristo icuare, emo nda manoa nande icuã ndiquicharõ cote. ²⁷ Ũquĩ mose, mbae icuã nda nandesaa tuchi. Ũquĩ mose, nandeso chee ra tata cuásuu no. Huee ra Dios ucuã yãsa nyoĩ ja. ²⁸ Sã mbia Moisés cheẽ mumbasa iquia iquia cose no. —Uremae ngue echeẽ mumbasa rese ra, i mose mbia nyeremo, echeẽ mumbasa que mbia iquia cote ra. Mbiam que etiisu isu eã tuchi eiquia ra. ²⁹ Dios riirĩ ucuã yãsa quia ra mbae rasi saã tuchi ũquĩ si. Cristo ruqui ucuã yãsa abe no. Ae Espĩritu Turã isiteã teãte quia nae, ũquĩ abe no. Cristo ruqui je quiatu ngue Dios ũquĩ mii ndei nguiã icũe. ³⁰ Sã Dios ñee no: —Se ra mbia icuã asibishorõ mbae rasi je, sã i no. —Dios sí ra mbae rasi saanguquia ngũimba je, erimba icuã mose ee, i abe que embesa ji huĩ nda. ³¹ Ae ra Dios mbasi eicuã ñi nae, mbasi tochi eã ndae. Aba mbusiquiche tuchi chõ ũquĩ nde.

³² Jẽ Jesucristo icua ramo mose que mbia mbae rasi saanguquia tuchi rei jẽje ra. Jẽingo turã mbei chõ ngue equia Dios rese ra. Jeñimbrãcuã mingue que equia aque mose ra. Ũquĩ ndese jendua jiri ae. ³³ Mbiam que ñee icuã icuã tuchitẽ quia jemo je ra. Mbiam que mbae rasi saanguquia tuchi quia jemo je no nda. Mbiam tubiriã ndesaa. Jẽataque abe ia eã ndasi tuchi que eriqui erese ra. Jẽingo tochi tuchi que equia aque mose ra. ³⁴ Jẽya eãte que eriqui mbiam tarõ ji rese ra. Mbiam jembae rirõ ndrõ mose abe chee que jẽyate riqui Dios rese ra. Jẽirandute quiatu que equia jembae turã ibatenda rese ra. Jembae ibatenda quiatu ra ua eã mbei. ³⁵ Dios jẽicua bei quiatu quia aque mosenda rã mbei. Ũquĩ mose ra Dios mbae turã tuchi mee jẽje. ³⁶ Ae Dios bite nae, ũquĩ ndese bei chõ jẽingo. Ae mbae turã nda Dios mee jẽje nae, ũquĩ jẽsaarõ arõ mingue chõ nguiã cote. ³⁷ Achite Jesucristo ñi tu a. ³⁸ Ae chiã Dios mbitirõ nae, Dios icuate quiatu que equia ra. Nyebe ra siqui bei Dios rese. Ae ra hui Dios si nae, Dios ia eã tuchi ra erese. ³⁹ Nande quia ra nandehui eã mbei esi. Ae ra hui esi nae, ũquĩ nda Dios mbutiã. Nande quiatu Dios nandeicua tuchite nguiã ã. Nyebe ra nandemingo bei.

11

Ae Dios icua

¹ Emo Dios icua mose, ¿mbae chõ ũquĩ ña? Ae Dios icua nae, ũquĩ nda ñee. —Ucheẽ nguire ra Dios mbae mondo seje, i rae. —Ae asaarõ arõ nguiã nae, ũquĩ nda emondo seje ucheẽ nguire no, i ra eno. Mae eã ndaque erese. ² Dios quiato cose ndare que Dios icua tuchi quia ra. Nyebe mbiam riqui nguiã jirandu jate erese. ³ Dios que mbae chao ja cose mbae eã mose ra. Mbae mo je eã ngue mbae ao ra. Ucheẽ achõ je chõ ngue mbae ao ra. Nande Dios icua mose, ã abe nandeicuate quia ã. Nandemae ãte raque erese.

⁴ Abel que Dios icua ra. Nyebe que Dios eisi turã nda. Ofrenda turã ngue emondo Dios je ra. Embae ofrenda que eturã tuchi Caĩn mbae si ra. Nyebe Dios embae ofrenda isĩ turã nguiã. —Co eturãte riqui seje co, nyebe Dios i nguiã Abel ñi. Nyebe mbiam riqui nguiã jirandu jate Abel rese. ⁵ Enoc que Dios icua ra. Nyebe Dios ererao nguiã ibate emano mose rocoĩ. Mbiam mbuate que eoreã cote ra. Dios equerao quiatu quia ibate reaẽ. —Co eturãte riqui seje co, i quia Dios quia Enoc ñi nyii reaẽ. ⁶ Emo Dios icua eã mose, ũquĩ nda Dios isĩ turã eã mbei. —Co Dios reco riqui co, sã i quiatu nyii. —Emo Dios riichã mose, Dios turãte ra ee, sã i quiatu no. Aquere quiatu ra Dios eisi turã cote.

⁷Noé que Dios icua ra. —Ama nda uchi, mbae ati ja chee, i mose Dios, “eno” i que Noé Dios cheẽ mose ra. Mae eã ndaque erese aque mose. Arca que esaã Dios cheẽ nguire ra. Nguiri mingue sacua eye. Mbia ataque que Dios icua eãte quia ra. Noé mii ño ngue eicua quia ra. Nyebe Dios Noé isi turã nguiã.

⁸Abraham ngue Dios icua ra. Nyebe Dios cheẽ mumbayã nguiã. Dios que ñee ee ra. —Eso rã a si. Ibi mo tamee ndeje mámbii, i que Dios ee ra. Abraham ngue Dios cheẽ mumbayã oso ra. Ae quiti esi nae, jiranuate raque erese nyii.

⁹—Ibi mo tamondo ndeje, i Dios quia Abraham je nae, huee que eriqui huee cote ra. Ibimo tuchi que ee hue ra. Tei ñetẽ quire chõ ngue eriqui riqui bei huce ra. Nguiri ndese. Isaac. Jacob abe no. Ūquí je abe que Dios ñee nda. —A ibi tamondo jẽ abe je, i. ¹⁰Abraham quiatu que Dios icua tuchi quia ra. Nyebe ñee nguiã. —Aico chee ra sucha tubiriã turaã. Hue ra ua eã mbei, i que Abraham ndua ndua Dios recua rese ra. ¹¹Abraham ninisi abe que Dios icua ra. Sara, i equia ee. Nyebe que nguiri ndea Dios cheẽ nguire ra. Ari tuchite rei que ae ra. —Dios ra seriirina mee seje ucheẽ nguire, i quiatu que equia Dios icua ra. ¹²Amei tuchi raque Abraham, Dios eriirina mee mose ee. Mbia tubiriã i tuchi chõ ae cote re. Contar i ja aronea tuchi chõ erucucha je cote re. Sã nyasitata tubiriãte riqui no. Sã ibi quishĩ tubiriãte riqui no.

¹³Ūquí ngue mano ja Dios mbae mondo ja eã mose ee ra. Ae je “co tamondo jẽje” i Dios ee nae, ūquí ndurubi quã ño ngue mano nda. —Dios ra emondo ure je uremanonde, i que eyate quia ndua ndua ūquí ndese ra. Ūquí nguiatu que Dios icuate quia ra. —Nandeico mbiri ndaque equia ibii ã. Ibatenda chõ nande re, ite que equia eicua ra. ¹⁴Emo ñee mose ūquí, siqui sete quiatu nguiã Dios récuua. ¹⁵Ūquí ndua ndua mose nguercua rese nda nyoi si nyebi re chã ae. ¹⁶—Nanderecua turã nguiatu nandetea, ite que equia ra. Dios recua je chõ ngue eriqui nguiã ñee. Nyebe Dios ireĩ ireĩ eã nguiã esi. Dios bite “Paba” i mose ee. Dios ūquí ndecua turana quereco co.

¹⁷—Ma Abraham secheẽ mumbayã, i que Dios Abraham nii nda. —Nderiiri eiquia rã sacrificiorã, i que Dios ee ra. Abraham ngue Dios icua tuchi ra. Nyebe ngue “Isaac taiquia” i rei nguiã nguiri mii nii. ¹⁸—Isaac nda tiiri tuchi ndeje, i rei que Dios ee nyii ra. ¹⁹Abraham ngue Dios icua tuchite quia ra. —Dios seriiri mbuquera arondete se eiquia mose nyii, i que ndua ndua uchiangi re ra. Abraham nguiri iquia seri mose que Dios eo isi ra. Abraham Dios cheẽ mumbayã mose, nguiri iquia raanguia chõ ngue re. Dios embuquera si raanguia chõ ngue eno nde. ²⁰Isaac que Dios icua ra. Nyebe ñee nguiã nguiri je. —Dios ra mbae turã saã jẽje, i que Jacob je ra. Esaú abe je. ²¹Jacob que Dios icua ra. Nyebe ñee nguiã José riiri ja je umano seri mose. —Dios ra mbae turã saã jẽje, i que ee ra. Uchitochoquia rese que nyeco rei nyibi ñee turã Dios je ra. ²²José que Dios icua ra. Nyebe ñee nguiã israelitas je umano seri mose. —Dios ra jenderao a Egipto si. Sequiangua abe jendao a si, i que israelitas je ra.

²³Moisés ru que Dios icua ra. Esi abe. Moisés ñetẽ mose que esi embuchemi tres meses ra. Ererecua eiquia eã sacua. Moisés itãquieĩ turãte quia ee re. Nyebe eru riqui nguiã siquicheãte ererecua si. Esi abe. ²⁴Moisés s abe que Dios icua quia aquere cote ra. Nyebe “Egipto jenda rerecua riiri nducucha eã se” i nguiã. ²⁵“Dios quiato rese taico se. Mbia icuã icuã ndaque ra seje. Dios quiatoã ndese ra aicoã”, i que Moisés ucuasu mose cote ra. Mbae icuã ndese aba oote raque. Aba mbia mbiri ño ñene. ²⁶—Taico chõ Dios rimba rese. Mbia ra sembasi mbasi raque Cristo riĩ, i que Moisés ra. Nyebe eriquiã

nguiã Egípto jenda rerecua rese. Mbaecha tuchi raque ae. —Dios ra mbae turã mee seje, ite quiatu que Moisés ra. ²⁷ Moisés que Dios icua ra. Nyebe esi nguiã Egípto si. Siquiche âte ererecua paama i si. Nimbirãcuã turã mbeite que equia ra. Dios rese mae naanguia. Emo mae aroneate raque Dios rese. ²⁸ Moisés que Dios icua quia ra. Nyebe pascua raã nguiã. Aque ramo ngue pascua ra. —Oveja ruqui je jêiquesa ja jêsii sii. I nda ángel jendiirĩ i iquia eã, i que Moisés ñee mbia je ra. Ángel que israelita ririĩ mo iquia eã tuchi cote ra.

²⁹ Israelitas que Dios icuate quia ra. Nyebe echoi nguiã Ama Ndisha Ireĩ ndasa. Ama iru raanguia que etasa nyoĩ sobei ra. —Nande abe nandeso iasa emombita, i rei que Egípto jenda abe ra. I que tuchõ eati eiquia ja ra.

³⁰ Israelitas que Dios icua quia Josué reco mose ra. Nyebe echoi nguiã sucha cuaso Jericó mama mama siete días. Nyebe Dios etaronda mbucoi nguiã ee. Muros i equia ee. ³¹ Rahab abe que Dios icua ra. Ae ngu saã saã jate quia mbia je nyii nae, aque. Dios icua tuchi que cote ra. Nyebe manoa nguiã mbia uataque rese. Ae Dios cheẽ mumba mumba quia nae, ùqui ndese. Rahab que Dios quiato isi turã nda. Mbuchemi ngue ererecua icuã si ra.

³² ¿Aba rĩĩ abe ra aba ñee jêje re? Dios quiato tubiriãte quiatu ñene. Ûqui asenei ja aroneate jêje. Gedeón. Barac. Sansón. Jefté. David. Samuel. Dios cheẽ mbuchecuaa ja rĩĩ. ³³ Ûqui ngue Dios icuate quia ra. Nyebe eriqui nguiã Dios cheẽ nguire mbia mbuti tuchi guerra mose. Siqui turã ngue equia Dios cheẽ nguire ra. Dios que siqui eres e ucheẽ nguire ra. Dios que etequiatu quiatu bei quia nyacua mbaba mose abe ee ra. ³⁴ Ûqui ngue Dios icuate quia ra. Nyebe tata rendi erei eã nguiã. Tata sendi cao caote raque. Mbia tiquise rerequia requia mose erese, Dios que etequiatu quia ùqui mose no nda. Dios que uquirãcuã mee equirãcuã nea je ra. Dios que embuquirãcuã mbei guerra mose abe ra. Ganar i sacuã. ³⁵ Cuña abe que Dios icuate quia ra. Nyebe Dios eririĩ ndaque mbuquera si nguiã ee. Emo emo abe que mbae rasi saãte quia Jesús rĩĩ nda. Hui sereãte quiatu que equia esi ra. —Sã seiquia rei. Dios ra sembuquera si nguiã. Serete mbuchiicuabo turã ndae, i que equia ra. ³⁶ Emo emo ngue nimbirãcuã nguia mbia iquia iquia chooño mose ee ra. Mbia eiruã nua mose abe no. O cuaacua mose abe no. Utarõ tarõ mose abe no. Hui eã mbei chõ ngue Dios si ra. ³⁷ Emo emo ngue mbia iquia iquia rei sita je no nda. Tiquise je abe que eriqui rei eiquia iquia ra. Emo emõ ngue echisiamo tuchi ra. Mbae rasi je que eriqui nimbirãcuã tuchi ra. Eirao eã ndei que ra. Mbae ire achõ ño ngue eirao riqui ra. Hue jechõ ngue eriqui aronea tuchi ra. Mbaecha reã ndei que ra. Mbia que mbae rasi saanguia tuchi rei quia ee ra. Hui eã mbei que equia Dios si ra. ³⁸ Ûqui ngue eturã tuchi mbia ataque si ra. Hue jechõ ngue eriqui aronea tuchi ra. Mbaecua re que eriqui uque uque ra. Emo emo mose que eriqui sita ibate no nda. Emo emo mose que eriqui turuquia rĩ no nda.

³⁹ Ûqui ngue Dios icua tuchite rei quia ra. —Mbae turã tamondo jêje, i rei Dios quia ee nyii nae, mee jei eã ngue ee ra. Mee je quia ra ee cote. ⁴⁰ Ûqui mii je eã nda Dios mbae turã mee. Nanderese abe chõ eriqui nguiã ndua ndua. Mbae turã nda emondo nande ja je cote, ùqui ndese.

12

Jesús mii ndese nandendua ndua

¹ Sã Dios icuasa tubiriãte cose no. Ûqui na ño nandeico nande abe Dios icua tuchi. Ae nandembuti mbuti quia Dios si nae, ùqui si nandehui. Ae mbae icuã

aba mbuchishĩ arõte quia nae, ùquĩ si nandechi#cuasẽ ño. Jesús mii ndui chõ nandeico ngata. Nandechimbirãcuã ño nguia siqui erese. ² Jesús mii ndese nandendua ndua. Ae riqui Dios icua uquia nande je co. Ae ra mbae saã ja nande je ucheẽ nguire. Mbae rasi que esaã tuchi ira rese ra. Emo mbucha mose i quia ira rese, aba ireite raque uqui. —Mbae rasi raande ra seyate cote, i que Jesús quia ra. Mbae rasi raande eñi ngoi bei Dios jii pe cote.

³ Jeñimondochote chĩ nda siqui mose Dios rese jẽ. Sã Jesús no. Mbia icuã icuã mose ee, ñimbirãcuã mbei que equia ra. Ñimondochote eã ngue ra. ⁴ Jesús mii ngue mano mbae icuã ndiquisã quisã sacua mbia si ra. Jẽingo mose mbae icuã ndiquisã quisã, aba mo ngue jẽiquia eãte jẽ nguiatu ra. ⁵ ¿Embesa ji si jêtesarei chõ nde? —Seriirite quia jẽ nde, ite Dios quia jẽje co. Sã embesa ji riqui ñee ã no:

Seriirĩ, Dios mbae rasi saanguquia mose ndeicuã nii, ereisiteã teãchĩ nda jẽ. Dios ñee mose ndeje ndeicuã nii, echeẽ eisi turã ño.

⁶ Ae rese Dios nyesequa nae, mbae rasi ra esaanguquia ee eicuã mose.

Ae Dios isi nguiirina nae, ùquĩ je ra ñee eicuã nii,

i que embesa ji huĩ ñee nda. ⁷ Dios “seriirĩ” i tuchi quia jẽje co. Nyebe eriqui nguiã mbae rasi raanguquia jẽje jẽicuã mose co. Sã mbia ja riqui nguiirĩ iruã eicuã mose no. ⁸ Dios mbae rasi raanguquia eã mose jẽje, eriiriã nguiatu rei jẽ. ⁹ Sã nanderu ibi jenda riqui nandeuruã nua nandenetẽ mose no. Nandembaaquiatu sacua. Sã nandeico echeẽ mumbayã cote no. Eĩ nande sí chõ Paba ibatenda je. Ae cheẽ nguiatu nandemumbayã tuchi. Ùquĩ mose ra nandereco siqui turã tuchi. ¹⁰ Sã nanderu ibi jenda riqui nandembaaquiatu jua raque no. Nandeico turã sacua aa íbii. Dios quiatu nandembaaquiatu turã tuchi nguiã nanderu ibi jenda si co. Nandechiã mbitirõ sacua ae rã si. ¹¹ Dios mbae rasi saanguquia mose nande je, nandehosei chiãte raque. Erasite quia ñene. Aquere quiatu ra nandechimbitirõ cote. Aque mose quiatu ra nandeya cote.

Dios cheẽ nda jẽisiteã teãchĩ jẽ

¹² Jẽo tomei jembirãtã jiri ae. Jẽtima abe jembirãtã jiri siqui sacua Dios rese no ae. Jeñimondochõ jiri quia siqui Dios rese ae. ¹³ Jẽingo tuchi quiatu quia erese. Ae ndua ata atate quia nae, i nda ùquĩ abe siqui tuchi chee erese chã. ¹⁴ Jẽingo turã mbia ja rese. Dios rã si chõ jẽingo. Dios rã si nandeicoã mose, nandemae eã mbei ra erese. ¹⁵ Jenyiteaquiatu turã ño nguia. I nda jemo Dios turã isiteã eã. Emo mbae icuã naa mose jẽje, jêtesarei chõ esi. Jendua icuã icuãchĩ nda jenongue rii jẽ. Ùquĩ mose ra jeñimbuã jate. ¹⁶ Jeninisi ae rese chõ jẽingo. Jemo nda siquichĩ emo ninisi rese jẽ. Dios mbae ra jẽisiteã teãchĩ jẽ. Sã Esaú no. Aque que umbae herencia mondo ja chõ soo ñetẽ ndibishorõ nda. ¹⁷ Aquere que “sembae herencia taisibe” i rei nyeseo tuchi ra. “Bendecir ere rã seje”, i rei que ngu je ra. Eru que teã teã ño ee echeẽ mose ra. Nyebe Esaú nyeseo tuchi nguiã cote.

¹⁸ Dios turã tuchi riqui jẽje namo co. Mbia Moisés mosenda je si. Aque mose que mbia riqui titi titi i tuchi siquiche Dios si ra. Aque mose abe que sita ibate sendi ee ra. Itondarute que eriqui ee ra. Ama ngue pirirã pirirã i tuchi quia ee aque mose ra. ¹⁹ Trompeta que nyuihuui ee no nda. Dios que ñee ee cote ra. Mbia que Dios cheẽ ñandu sereãte ra. ²⁰ Dios quiatu ngue ñee nguiã nyii: —Emo oco mose sita ibate rese, ùquĩ jẽiquia. Mbae quiaa riinda abe oco mose erese, ùquĩ abe jẽiquia no. Sita je jẽiquia. Jeñio no ae, i quiatu que

Dios ee nyii ra. ²¹ Aba mbusiquiche tuchi que mae mose ũquí ndese ra. — Aico titi titi i tuchi esi co, i chee que Moisés abe ra. ²² Eĩ jenyee eã ño jẽ nde. Dios jembusiquiche áte quia jẽ co. Dios recua jẽsichã tuchi quia jẽ ã. Dios reco chuchua. Jerusalén naanguia ibatenda jẽsichã tuchi quia jẽ ã. Angeles tubiriã abe jẽsichã tuchi quia ã no. ²³ Dios icuasa ñiinda abe jẽsichã nguia ã no. Ũquí mbae nombres mbesa ji chi ibate pe. Dios abe jẽsichã nguia ã no. Ae ra Jesús quiatoã icuã tea ja emo mose. Mbasi ja rae. Jesús quiato mano je abe chõ jẽsichã ichã nguia ã no. Ũquí ngue Dios mbuturã tuchi cote ra. Eicuã jiri jiriã tuchi chõ cote re. ²⁴ Jesús abe chee jẽsichãte quia ã no. Ae ruqui rĩ ngue Dios contrato yasu raã nande je ra. Ae ruqui rii rii ji jẽsichã nguia ã. Ae ruqui quia rei eturã tuchi Abel ruqui si.

²⁵ Dios riqui ñee jẽje co. Echeẽ nda jẽsiteã teãchĩ jẽ. Dios que mbae rasi saanguquia mbia je cose ra. Echeẽ nenei neneisa andu sereã mose a íbii. Ibatenda riqui ñee nande je co. Ae cheẽ nandechandu sereã mose, mbae rasi ra esaanguquia tuchi nande je cote. ²⁶ Dios cheẽ mose que ibi nyere nyere aque mose coose ra. —Namo nda ibi ambuchere si no. Ibi mii ño eã nda ambuchere. Ibei abe ra ambuchere no. Aque mii nda ambuchere cote, i Dios quia co. ²⁷ —Aque mii nda mbae ambuchere ja, i Dios quia co. Aque mose ra mbae ua ja Dios chiao. Ae ra siqui bei, ũquí achõ nda ua eã. Mbae ataque ra ua ja aque mose. ²⁸ Dios rimba rei nande. Nyebe ra nande nandetiã aroneate. Gracias nande tuchi quiatu quia Dios je. Nandeico mingue chõ nguia ee. Ũquí mose ra eya tuchi nanderese. ²⁹ Mbia Dios cheẽ mumb a mose, Dios ra paama i tuchi ee. Tata rã tuchi chõ Dios re.

13

Jenyesequa jenyiese

¹ Jenyesequa quia jenyiese jẽ. Nyiesenda chõ jẽ nde. ² Mbia ngaẽ mose jenyuchúaa, jëisi turã ño nguia. Emo ngue ángeles mo isi turã uchuchúaa ra. Iranua ndaque erese. Mbia mo eriqui rei nguia ee. ³ Etarõ ji rese jëingo ndua. Mbae turã jesaã saã ño nguia ee. Jëtarõ ji raanguia chõ jẽ abe erese re. Ae je mbia icuã icuã ndiqui nae, ũquí je jëingo turã ño. Sã jẽ abe jendete riqui no. Sã jẽ abe jëiruã nua arõte no. ⁴ Emo siqui mose ngüinisi rese, ũquí Dios bite. Sã emo ngüinisi resechõ ño siqui. Sã eriquiã emo ndese. Emo siqui mose emo ninisi rese, Dios ra paama i tuchi ũquí je. Ae ninisi áte riqui nae, siqui mose emo ndese, Dios ra paama i tuchi ee no. ⁵ Mbae isiquia rese ra jendua nduachĩ jẽ. Jembae mii ndese chõ jëya. —Jaendechayã mbei ra se, i quiatu Dios nguia co. ⁶ Ae bei jẽ. Dios ra nanderechayã mbei. Nyebe nandeico nguia ñee:

Dios riqui beite serese co.
Mbia mo si ra asiquicheã,
nyebe nandeico nguia i ã.

⁷ Jenderequa rese jëingo ndua. Ũquí ño ngue Dios cheẽ senei senei jëje ra. Ũquí ndiqui Dios icuate ũquí. Eĩ jenyee Dios icua jẽ abe ũquí na si. Ũquí nguia siqui turãte nguia Dios rese ũquí. ⁸ Eĩ mbei chõ Jesucristo re. Cose mosenda bei. Namo abe chee. Eĩ mbei ra ae quia. ⁹ Mbia jembaaquiata ata ata mose, echeẽ si jëhuĩ chõ. Mbia jembaaquiatu choõno mose, echeẽ si jëhuĩ chõ no. Ae je mbia riqui mbaeiaie i nande je nae, ũquí si nandehui mose, ũquí abe ra nandechiã mbuquiracuã eã no. Nandechiu abe ra nandechiã mbuquiracuã eã no. Dios turã ae chõ nandechiã mbuquiracuã nguia. ¹⁰ Jesús mii ngue

mano nande je ra. Sacrificio rei ae m̄i nande je. Cose ndare rã eã namo cote re. Ticuasú ra mano eã nandeicuã mbutiã sacua cote. Jesús ruqui m̄i ño nandeicuã mbutiã nguiã co cote. ¹¹ Sacerdote rerecua riqui ticuasú ruqui rerao rao Lugar Santísimo aque. Dios mbia icuã mbutiã sacua esi. Isho jiri sucha cuasu si echoi quia ticuasú roo rei rei aque. ¹² Jesús abe que mbae rasi saã isho jiri sucha cuasu si ra. Mano tuchi que mbia mbitirõ sacua nguqui je ra. ¹³ Jesús que aba ireingua saã tuchi ra. Nande abe nandesiquicheã nguiatu quia aba ireingua raã erese. ¹⁴ Nanderecua ibi jenda ra ua chõ. Dios ra nanderecuarã mee nande je ibate. Ũqui ngua ra ua eã mbei. ¹⁵ Jesús que mano nande je ra. Nyebe nandechẽ turã mbei quia Dios je. Sã nandechuru riqui ñee turã mbei eri. ¹⁶ Jẽingo turã ño ngua mbia je. Jembae jemee mee ngua emo je. Ũqui Dios bite.

¹⁷ Jẽingo turã jenderecua je. Echeẽ jemumbayã. Jenderecua riqui jendeaquiatu quiatu Dios je ũqui. —¿Jeteaquiatu turãte equia re? i chee ra Dios ee. Jenderecua cheẽ jemumbayã mose, eyate ra ũqui mose. Echeẽ jemumba mose, eya eãte ra jendese. Jẽ abe ra jeya eãte no.

¹⁸ Jeñee mbei quia Dios je urerĩ. Ureico turã sete equia mbia ja je ã. Ureico ndua icuã icuã eãte emo nĩ ã no. ¹⁹ Jeñee tuchi quiatu quia serĩ Dios je. † nda Dios semondo jei jendea.

Echeẽ hui bei

²⁰ Dios ae aba mombia nguiã. Dios ae que Jesús raaque mbuquera si ra. Jesús ruqui rĩ ngue Dios ucheẽ yasu mee nande je ra. Jesús ruqui rĩ ngue Dios embuquera no nda. Jesús rei oveja raarõsa rã. Nanderaarõ arõ mbei equia co. ²¹ Sã Dios riqui jembuquirãcuã tuchi. † nda jẽingo bei ae Dios bite ũqui ndese. Sã ae riqui tuchi nandechiangui re. Nandemingo tuchi sacua ae ebite ũqui ndese. Jesucristo quiatote quiatu nande re. Sã mbia ñee turã mbei quiatu quia eri. Amén.

²² Seresenda, aico co mbesa juate jembiiirandu sacua a. Secheẽ jem̄i tuchi rã jẽaquĩ ndese. ²³ Aico jembiiirandu Timoteo rese a. Etarõ iriã ndiqui namo co cote. Tu jei mose serea, ae abe ra arao seso mose jendea. ²⁴ Saludos amondo quia jenderequiasa je aque. Jesús quiato ja je saludos amondo quia aque. A Italia jenda saludos mondo quia jẽje aque. ²⁵ Sã Dios siqui turã jẽ ja je. Amén.

LA CARTA DE SANTIAGO

Mbia icúe cúe jenda je Santiago ucheẽ mbesa mondo

¹ Santiago chõ se re. Dios rimba chõ se re. Jesucristo rimba abe chõ se re. Judíos Jesús quiato je chõ aico nguiã ã mbesa mbesa. Judíos isúe cúe jenda je. Saludar ae chõ nguiã ã mbesa jêje.

Dios mii ño aba mbaaquiatu nguiã

² Mbae icuã tã i mose jêje, jêya bei chõ nguia, Seresenda. ³—Ma Dios icua tuchite, i mose mbae mo tã i jêje, jêingo tuchi chõ nguia Dios rese ùqui mose. Jeñimbirãcuã aqiatu sacuã. ⁴ Jeñimbirãcuã mbei chõ nguia Dios icua. ¶ nda Dios riqui jembitorõ tirõ mbei jembuchicucabo mingo. Ùqui mose ra jêturã tuchi cote.

⁵ Jêingo turã aqiatuã mose, jeñee ño Dios je. Jeñimbirãcuã aqiatuã mose, jeñee ño Dios je no. Ae ra jembaaqiatu. Ae ñee nguia Dios je nae, ùqui ja je ra mbae mondo tuchi. Ñee asi asi eã nda ee no. ⁶ Jê ache i mose Dios je, “Dios quia ñene”, jentye tuchi quiatu quia. —Dios ra emee ãte rei seje, i mose jemo, eicuaete ùqui. Ama ndebera rã ño ùqui nde. Sã quirirã ndiqui ama ndebera rerao turã eã no. Sã eriqui embuchebi chebite no. ⁷ Ama ndebera rã emo siqui mose, Dios ra mbae mee eã ùqui je. ⁸ Emo ndua ata ata mose, mbae mii mo ndese eriqui aroneate.

⁹ Jesús quiato mo embae eã mose, sã eya tuchi chõ siqui. Sequiatote ite quia Dios nguiã ee aque. ¹⁰ Sã Jesús quiato mbae cha ia bei chõ siqui, mbae icuã tã i mose ee. Sã eya riquiã umbae tubiriã ndese. Sã Dios rese quiatu eya riqui. Embae ua mose, sã eya riqui ùqui mose abe no. Mbae cha mbae ra siqui bei eã. Sã quiata uti riqui soõ jeite no. ¹¹ Tenda rasi mose ee, quiata ra ñimama. Euti abe ra uqui. Eturã eã mbei ra cote. Eĩ si ra mbae cha. Umbae tubiriã nyabe chõ nda mano.

Mbae icuã tã i mose nande je

¹²—Ã esaã icuã, i mose emo jêje, tjêsaãchĩ nda jê! Jêingo mingue chõ nguia ñimbirãcuã. Jeñimbirãcuã mose ra Dios mbae turã mee jêje. Jemingo bei rae. —Ae nyesecha quia serese nae, ùqui nda amingo bei, i que Dios cose ra. ¹³—Ã esaã icuã, i mose emo jêje, Dios eã ño ñee nguiã jêje ùqui. —Dios que “ã esaã icuã” i seje ra, jenyechĩ nda jê. —Ã esaã icuã, i eã nda Dios emo je. Dios abe ra mbae icuã saã eã emo ñee mose ee. ¹⁴ Aba chiangui renda icuã nguiarei mbae icuã osei quia aba je. Dios eã ñene. ¹⁵ Emo mbae icuã osei mose, mbae icuã naa arondete cote. Mbae icuã naa naa mbei mose ra Dios embasi cote.

¹⁶—Mbae icuã esaã, i mose emo jêje, Dios ñee eã nguiã jêje. —Dios chõ ñee nguiã, jenyechĩ nda jê. ¹⁷ Ae mbae turã tuutu beite quia nande je nae, Dios chimondo chõ ùqui nde. Dios quiarei eturã mbei tuchi. Eicua jiri jiriã emo mose. Sã Dios tenda ao no. Nyasi abe no. Ùqui nguia nyiabi abi jiri nguiã. Dios quiarei nyiabi mbei emo mose. Eturã mbei tuchi eriqui co. ¹⁸ Sã Dios riqui seriirĩ i nande je no. Nande echeẽ icua mose nandechiangui re. —Jê nane je aico seriirĩ i co, i que Dios nane je ra. Dios riirĩ tubiriã tuchi ra ngaẽ nanderui cote.

Dios cheẽ jemumbayã ño nguia eandu mose

¹⁹ Dios quiarei eturã tuchi. Nyebe echeẽ jeñanduse tuchi quiatu quia jẽ. Jendua quiatu quia ñee nonde. Paama jenyẽ jei jei techĩ nguiã emo je. ²⁰ Ae Dios bite riqui mbae nae, ùquĩ nandesã aroneate nande paama i mose. ²¹ Ae Dios ucheẽ mondo quia jeñiangui re nae, ùquĩ jẽisi tuchi quiatu quia. Jẽingo mingue chõ nguia Dios cheẽ je jẽ. Aba mingo beisa chõ Dios cheẽ nde. Ae mbae icuã ndese mbia riqui nae, ùquĩ icuã tubiriãte eriqui raque. Ùquĩ si jẽhui tuchi. Mbae icuã ja si jẽhui tuchi.

²² Dios cheẽ nda jeñandu chooñoĩ jẽ. Echeẽ jemumbayã tuchi quiatu jẽ. Emo Dios cheẽ andu chooño mose, ae sí chõ ñimbĩrĩ irĩ nguiã aq̃ue. ²³⁻²⁴ Sã emo ndiqui mae ñooño nguba rese espejo je no. Sã eriqui tesarei jei chõ nguba si no. Eĩ si chõ Dios cheẽ andu chooñoosa re. Tesarei jei chõ nguiã Dios cheẽ si. Echeẽ mumbayã ndocoĩ. ²⁵ Dios cheẽ nguiarei aba mbui tuchi mbae icuã si. Ae siqui tuchite quia Dios cheẽ ndese nae, ùquĩ ndese ra Dios riqui tuchi echeẽ mumbayã mose. Ùquĩ Dios cheẽ ñandu chooñoate quiatu nguiã. Echeẽ emumbayãte quiatu nguiã.

²⁶ —Dios quiato chõ se re, i raque emo. Uchuru rerequia chooñoa mose, Dios quiato raã ñooño ño ùquĩ nde. Ae sí chõ ñimbĩrĩ irĩ nguiã ùquĩ. ²⁷ Ae Dios quiato chooñoa tuchi nae, ùquĩ ndiqui mbae turã naa naa ùquĩ. Ùquĩ ndiqui esi cheecha reaquiature ùquĩ. Ùquĩ ndiqui eru cheecha reaquiature ùquĩ no. Mbae eã mose eru cheecha mbae. Ùquĩ ndiqui ñimbĩcuã icuã eãte mbae icuã mo je ùquĩ.

2

Mbia nandeisi turã ja chõ nguia nyiabiã

¹ Jesucristo quiato chõ jẽ nde. Jenderecua tuchi chõ ae re. Nyebe mbia jẽisi turã ja chõ nguia nyiabiã. ² Sã mbaecha mo ndiqui ngasẽ jeñimunua mose jẽje no. Huiĩrao turã ndesebe. Eo cuasa turã ndesebe oro. Sã mbaecha reã mo abe riqui ngasẽ jeñimunua mose no. ³ Sã jẽingo mbaecha isi turã no. Sã jẽingo embucoi erenda turã tose no. Sã jẽingo mbaecha reã mbucoi turã eã no. ⁴ Eĩ jenyẽ mose, jẽisi turã ja eã ño nguiã ùquĩ. Jembuchiabi chõ nguiã ùquĩ. Hue rĩ ja eã ño jẽingo nguiã mbia cuata mee ùquĩ. Jendua turã eã ñochĩ nguiã ùquĩ. ⁵ Secheẽ jeñandu rã, Seresenda. Mbia mbaecha reã ngue Dios irabo ra. Dios icua tuchi sacua. Ùquĩ ndese quiarei Dios o tuchi mbaecha mo si. —Ùquĩ nda siqui tuchi serese se ererecua tuchi mose, i que Dios ñee nyii ra. ⁶ Jẽ ngue mbia mbaecha reã jenguirirõ tuchi ra. Eicuã eãte ùquĩ ndiqui raque jẽje. Mbaecha quiatu eicuãte riqui nguiã jẽje. Jembĩrĩ irĩ ño nguiã. Jenderao rao chõ nguiã ererecua je, jẽ mbae mo mee sacua ee. ⁷ Mbaecha chõ ñee icuã icuã nguiã Cristo rĩ. Nandererecua chõ Cristo resẽ.

⁸ —Sã ereico nyesequa ndechiese no. Eĩ ere si chõ nyesequa emo ndese, i que Dios mbia je cose ra. Dios cheẽ i tuchi chõ ùquĩ nde. Nande ùquĩ ñee mumbayã mose, nandeico turã ndae. ⁹ Nande mbia mo isi turã mose, emo isi icuã mose, eicuãte ùquĩ. Nande mbia isi chiabi abi mose, Dios cheẽ nandemumba chõ nguiã ùquĩ. ¹⁰ Dios cheẽ tubiriãte raque nande je echeẽ mumbayã sacua. Nande echeẽ mi mo mumba mose, echeẽ ja mumba raanguia chõ ùquĩ nde. Echeẽ ataque mumbayã ndaque. ¹¹ Dios cheẽ tubiriãte. —Jẽingochĩ nda emo ninisi rese, i que ra. —Mbia mo nda jẽiquiachĩ, i que ae si ñee nda. Nande emo iquia mose, echeẽ nandemumba chõ nguiã

ũquĩ. Nandeicoã ndaque emo ninisi rese. ¹² Dios cheẽ ngue nandembui mbae icuã si cote ra. Nandechesecua sacua mbia rese. Nyebe nandeico turã mbei chõ nguia mbia je. Dios quiatu ra nandecuata mee tuchi emo mose cote. ¹³ Aeya eã eãte riqui emo ndese nae, ũquĩ ndese ra Dios ia eã eã nandecuata mee mose. Nandeya eã mose emo ndese, ũquĩ mose ra Dios nandembasiã.

Nande Dios icua mose, mbae turã abe nandesaã ño nguia

¹⁴ Sã emo ndiqui ñee no. —Dios aicuate quia co, i. Ũquĩ mbae turã naa eã mose, ũquĩ nda Dios sirõ eã mbae icuã si. Dios icua chooño ño ñene. ¹⁵ Sã Jesús quiato mbaecha reã mo ndiqui ngasẽ jêje no. Sã eirao eã ndiqui no. Sã echiturã mo eã ndiqui no. ¹⁶ Sã jemo ndiqui ñeeño ee no. —Nde ae chõ ndechiurã etea. Nde ae chõ ndeiraorã etea. Eso turã ño, i jemo ee. Mbae mo mee ndocoi ee. Jeñee iru chooño ño nguiã ee ũquĩ. ¹⁷ Jẽingo turã eã mose emo je, Dios jêicua chooño ño nguiã ũquĩ. Jẽ Dios jêicua mose, mbae turã jêsaã jiri ae.

¹⁸ Sã emo ndiqui ñee no. —Dios aicuate quia co, i. Sã emo ndiqui ñee no. —Mbae turã asaã saã nguia co. Dios aicua chooño eã nguia co, sã emo ndiqui i no. Jẽ Dios icua mose ¿mañi ae ra jêicua mbae turã naa naa eã mose re? Se quiatu mbae turã asaã saã nguiã co. Nyebe ra mbia “eriqui Jesús icuate co”, i serĩ. ¹⁹ —Dios mĩ ño siqui nguiã co, jenyẽ chõ nguiã ũquĩ. Eturãte raque ũquĩ. Aba checuayã abe riqui ñee ndaque Dios mĩ nĩ co no. Siquichete esi ñee ndaque eriĩ. ²⁰ ¿Mbaerã jêaracuayã tuchi riqui re? Emo mbae turã naa naa eã mose, Dios icua chooño ño nguiã ũquĩ. ²¹ Sã nandei Abraham no. —Nderiirĩ emee seje, i mose Dios, Abraham ngue echeẽ mumba eã nda. Nyebe Dios Abraham isi turã mbei nguiã. ²² Abraham ngue Dios icua chooño eã nda. Mbae turã ngue esaã saã mbei quia Dios icua mose ra. Dios cheẽ ngue emumba eã nda. Nyebe nandeico nguiã ñee. “Abraham Dios icuate”, i. ²³ Sã embesa ji riqui ñee no:

Abraham ngue Dios icua ra.

Nyebe que Dios eisi turã mbei ra,

i que embesa ji ra. Ũquĩ ngue ique tuchi cote ra. Nyebe “Dios Quiato” i nguiã Abraham je. ²⁴ Emo Dios icua chooño mose, Dios ra eisi turã eã. Emo Dios icua tuchi mose, sã mbae turã abe raã naa. —Dios icuasa, i nda mbia ee cote chã. ²⁵ Sã Rahab cose no. Cuña icuã. Siqui ata ata bei mbia rese. Aque que Josué chimondo isi turã nda. Mbuchimi turã ngue mondo mbia icuã si ra. Nyebe Dios Rahab isi turã nguiã. ²⁶ Sã nanderete no. Umi umi eã mose, “eraaque” i chõ mbia nguiã ũquĩ je. Ũquĩ na ño mbia mo ndiqui nguiã ã. Mbae turã naa eã. Nyebe nandeico nguiã “Dios icuayãte” i ee ã.

3

Cochee chõ nandechuru nandereco

¹ —Mbia mbaaquiato quiatu sacua se, jjenye jaaja techĩ nda equia jê! Emo emo mĩ ño. Mbia ra mae tuchi urerese. Urecuata ra emee tuchi. Mbia mbaaquiato quiatusate quia ure re. ² Dios cheẽ nandechabi chabi chõ nguiã nande ja ã. Emo uchuru rerequia turã mose, nguete ja abe rerequia turã ño nguiã ũquĩ. ³ Sã nandeico freno mĩ ticuasú churu rese no. Nandechẽ mumbayã sacua ño ũquĩ nde. Sã freno ñetẽ je chõ nandeico ticuasú rete rurucuata nandenduasa quiti no. Ticuasú rete cuasute raque. ⁴ Sã lancha cuasute raque no. Sã quirĩriã quirãcuãte riqui raque ee no. Ira ñetẽ je chõ echa riqui nguiã embucuata turã unduasa quiti. ⁵ Eĩ ño nandechuru nguiã.

Nandechuru mbae saã ata ata chõ nguiã. Eñetëte raque. Sã tata ñetëte raque no. Mbae ra esei ja tuchi oso quia.

⁶ Tata rã ño nandechuru re. Nandechuru quiarei mbae icuã ñumumbara raã uquia tuchi nande je. Nandechuru icuã na eãte nanderete resenda mo. Nandechuru chõ nanderete mbeicuã ja nguiã. Nandechuru chõ nandereco rerequia icuã mbei nguiã. Aba checuayã ño nandechuru rerequia icuã nguiã no. ⁷ Sã nandeico quiaa riñda mo mbuseteã arõte raque no. Ae mbebe quia nae, ùqui abe nande mbuseteã arõte raque. Mbei abe nandembuseteã arõte raque. Ae siqui ama ñi nae, ùqui abe nandembuseteã arõte raque no. Ùqui ja que mbia mbuseteã emo mose ra. ⁸ Nandechuru quiatu nandembuseteã aroneate nguiã. Nandechuru icuã nguiatu nandembuquiriri aroneate nguiã. Mbei tasi je rã tuchi chõ nandechuru riqui nguiã nande je ã. ⁹ Nandechuru je nandeico ñee turã ndaque nanderu Dios je. Nandechuru sí je chõ nandeico nguiã ñee icuã mbia Dios chiao je cote. Ae rã sí raque Dios mbia ao. ¹⁰ Nandechuru sí je nandeico ñee turã ndaque. Ñee icuã abe no. Ùqui Dios biãte, Seresenda. ¹¹ Sã icua riqui no. I turã mose, eturã ja bei chõ ñene. I reë mose, ereë ja bei chõ eno nde. I chumumbara chõ aroneate icua mii ye. ¹² Sã isio riqui ia eã ira a mo no. Isio a bei chõ nda ia nguiã. Ira mo nda ia eã enongue a no. Ea sí chõ nda ia nguiã no. Sã nandeico i turã ndea eã i reë mberõ no. Hue icua mii ye ra eñi ja eã. Eñi si chõ nandechuru no nde. Nandechuẽ ñumumbara mose, eicuãte ùqui.

Ae je Dios uaquiato mee nae

¹³ Jemo aqiuatu mose, sã eriqui mbae turã naa naa mbei. Sã eriqui tochi bei no. ¹⁴ —Paama jeny checuayã mose jenyue, jëaquiato jësaã ñooño ño nguiã ùqui no. Jeñee ñooño ño nguiã ùqui. Dios cheë ndui eã tuchi chõ ùqui nde. ¹⁵ Eñi jenyue eã nda cote, Dios uaquiato mee mose jëje. Paama jeny checuayã mose jenyue, Dios rã eã ño jë nde. Dios quiatoã nyisaã na ño ùqui nde. Aba checuayã nyisaã na ño ùqui no nde. ¹⁶ Mbia ndua eã mose emo ndese, eicuãte ùqui. Mbia paama i checuayã mose nyue, eicuãte ùqui no. Ùqui mose ra mbia siqui turãya nyue. Mbae icuã icuã mbei ra ee. ¹⁷ Dios uaquiato mee mose nande je, nandechiã turãte ra cote. Nandechiã nda ngoite cote. Cocheete ra nandeico cote. Emo ñee nda nandemumba eãte cote. Nandeya eã nda mbia rese cote. Mbae ra nandesã turã mbei quia cote. Nandendua ata ata eã nda cote. Nandechuẽ nyecuare ra eriqui mbia je cote. ¹⁸ Nande mbia nandemingo turã mose nyiese, nandechiã turã nda nandeico cote.

4

Ae mbae icuã quiatote nae, Dios quiatoã ño ùqui nde

¹ ¿Mbaerã ño jëingo nyao nyao nyiese chã? ¿Mbaerã ño jëingo ico icuã icuãte nyue chã? Jeñiangui renda icuã ñi ño ñene. “Se chõ jë”, jenyue jaaja quiatu nguiã mbae icuã oseï oseï. ² Jembae eã jenyoseï choseichí nguiã ã. Jë ererequiayã mbei mose, mbia jëiquia arõ ñochí nguiã ã. Mbae jenyoseï choseï chõchí nguiã ã. Nyebe jëicuã icuã mbeite riqui nguiã jenyue ã. “Embu seje”, jenyue ãte quiatu nguiã Dios je. Nyebe jëingo nguiã eisiã. ³ “Embu seje”, jenyue mose Dios je, “embu seje” jenyue icuã icuã ño nguiã ee ã. Mbae mumba chooño sacua ño jëingo nguiã “embu seje” i Dios je ã. Nyebe Dios riqui nguiã emee eã jëje. ⁴ Sã cuña mo ndiqui hui ngu si no. Eñi jenyue si chõchí nguiã hui hui Dios

si ã. Ae Dios biãte nae, jẽ ùquĩ oseĩ oseĩ mose, Dios quiato aronea ño jẽ cote re. ¿Mañi jenyẽ quia ùquĩ icuayãte re? ⁵ Sã embesa ji riqui ñee ñooño ãte no: Espĩritu Turã Dios mee nguia nandechiangui re nae, aque riqui ngueteãte nanderese co.

Nandeico sacua Dios miĩ ndese, i que embesa ji ra. ⁶ Dios turã i ite riqui nande je co. Sã embesa ji riqui ñee no: Ae ucuasu saã saã nguia nae, Dios riqui ùquĩ ndiquisãte co. Ae siqui tochte quia nae, ùquĩ je quiatu Dios turã i ite riqui nguia co, i que embesa ji ra. ⁷ Jẽingo tochi chõ nguia Dios je. Aba checuayã jẽsiquisã ño nguia jenyesei. Ùquĩ mose ra uchã jẽsi cote. ⁸ Dios jẽsiichã tuchi quiatu quia. Ùquĩ mose ra Dios abe jendichã tuchi. Jẽingo mose mbae icuã ndese, jẽhui chõ esi. Jendua ata ata mose, jẽnia jembirõ ño. ⁹ ¿Mbaerã jẽingo iquia iquia mbae icuã naa mose re? ¿Mbaerã jẽyate riqui mbae icuã naa mose re no? Jenyeseo quiatu quia jẽicuã niĩ. Jẽya eã nguiatu quia jẽicuã ndese no ae. ¹⁰ Jẽingo tochi chõ nguia Cristo je. Aquere quia ra ae jẽturã mbuchecua mbia je cote.

Nandechẽ icuã eã emo niĩ

¹¹ Jẽnee icuãchĩ nda emo niĩ, Seresenda. Dios cheẽ mumba chõ ùquĩ nde. —Jenyeseo chõ nguia jenyese, i que Dios ra. Jẽ Dios cheẽ mumba mose, “Dios cheẽ icuã” i raanguia chõ ùquĩ nde. “Dios cheẽ icuã” jenyechĩ nda echeẽ mumbayã ndocoĩ jẽ. ¹² Dios ae chõ mbia cuata mee nguia co. Dios miĩ ño ucheẽ mondo nguia nande je. Nande echeẽ mumbayã sacua. Dios ae chõ aba rirõ nguia aba icuã si. Dios ae chõ nda aba mondo tata cuásuu no. Nande quiarei emo cuata nandemee aroneate.

Mbae mo tasaã isamami, nande aroneate

¹³ Sã nandemo ndiqui ñee no. —Taso mbae mo naa naa pee. Taico are tuchi pee. Mbae mo isi sacua icua. Tenda nongue mose ra achube, i no. Ndua rane eã Dios rese. ¹⁴ Ùquĩ Dios biãte. Nandeiruanate mbae mo ndese. Mbae mo tu arondete tã i nande je. Isamami nandemano arondete. Shimbo rã ño nande re. Sã shimbo riqui quiachã jeite no. ¹⁵ —Mbae mo tasaã, nandechĩ nda nande ae ndua mose rocoĩ Dios rese jẽ. —Dios eno i mose seje, ùquĩ mose quiatu mbae tasaã, nande quiatu quia. ¹⁶ ¿Mbaerã jẽingo tesareĩ Dios si re? ¿Mbaerã jẽingo “se ae mbae tasaã” i re? Jenguasu jẽsaã saã ño nguia ùquĩ. Eicuãte ùquĩ. ¹⁷ Ae mbae turã icuate quia nae, sã ùquĩ ndiqui mbae turã naa mbei. Mbae turã naa eã mose, eicuãte ùquĩ cote. Dios biãte ùquĩ cote.

5

Santiago ñee asi mbaecha je

¹ Tacheẽ mbaecha je cote. Jẽya eã ndasi ra jẽsaã tuchi cote, mbaecha. Jenyeseo tuchi quiatu quia. ² Jembae ra ua ja tuchi cote. Chicuaquiariĩ nda jẽirao ua tuchi. ³ Jembae mbae isiquia ra quiachã ja cote. Jembae mbae isiquia rã nda jẽ abe jẽquiachã tuchi cote. Mbae isiquia rese chõ jẽingo nguia ndua. Dios rese ndua rocoĩ. Mbae isiquia jemunua nua tuchi chõ nguia Dios jembasi sacua ã cote. ⁴ Mbia que quieĩ quieĩ rei quia jẽje resẽ. Mbae que jemondo turã turãya nguia jembae ishao shaosa je resẽ. Ùquĩ Dios mbiirandu raanguia chõ nguia jeniĩ. Nyebe ra Dios jembasi uquirãcuã je. ⁵ Sã ticuasu riqui quiaru bei ñimbuquira no. Eiquia nonde. Eĩ ño jẽ nde, mbaecha. Jembi rese chõ ngue jẽingo bei quia ra. Jẽquiaru chooño mbei que equia ra. Siqui rocoĩ Dios rese. Nyebe ra Dios jembasi cote. ⁶ Jẽ ngue mbia turã jembasi

mbasi quia ra. Jē ngue mbia turã jêiquia iquia quia no nda. Mbae icuã mo esaã eãte raque jêje. Nyebe ra Dios paama i tuchi jêje, mbaecha.

Jesucristo jêsaarõ arõ mingue chõ nguia

⁷ Jesucristo ra tube íbii, Seresenda. Jêsaarõ arõ mingue chõ nguia. Sã mbia riqui ama nyaaqui raarõ arõ mingue no. Mbae tiquia nonde no. Aquere ra eriqui minguebe umbae raarõ arõ no. Eucua ucua nonde. ⁸ Eĩ jenyê chõ nguia Jesucristo raarõ arõ mingue jê abe. Jeñimbirãcuã ño nguia Jesucristo raarõ arõ. Achite eñi tu a cote. ⁹ Jeñee icuã icuãchĩ nda jenyue, Seresenda. Ũquĩ mose ra Dios jembasi. Namojiri ra Dios mbia icuã mbasi. ¹⁰ Jeñimbirãcuã mingue chõ nguia. Sã Dios cheẽ mbuchecuasa mbia cose ndare no. Sã ñimbirãcuã mingue mbia icuã mose ee no. ¹¹ Ae ñimbirãcuã mingue quia nae, ũquĩ je chõ Dios turã ndiqui nguia. Sã Job cose no. Ñimbirãcuã mingue tuchi que equia ra. Aquere que Dios turã tuchi riqui ee cote ra. Ũquĩ jêicuate quia ã. Eĩ si chõ Dios turã tuchi nguia mbia je co.

¹² ã abe jeñandu tuchi. Jeñee ñooñochĩ nda jê. Jurar jenyechĩ nda emo mose jê. Ibatenda rĩi. Ibi jenda mo ñii abe no. Mbae ja mo ñii nda jurar jenyê jirichĩ jê. Eno jenyê mose, ũquĩ mĩi mbei chõ jeñee. Tei jenyê mose, ũquĩ mĩi mbei chõ jeñee no. Eĩ jenyê mose ra Dios ñee asiã jêje.

¹³ Jemo ia eã mose, sã ñee Dios je. Jemo ia mose, sã irasei rasei Dios je no. ¹⁴ Jemo ndasi mose, sã “jenyu” i Jesús quiato rerecua je. Sã ũquĩ ñee Dios je erasi rĩi cote. Sã mbae quira mo quiti erasi ãquĩ ndese Jesús rĩi. ¹⁵ — Jesús ra embucherõ, i mose uchiangui re ñee mose Jesús je, mbucherõ ndae. Erasi mbae icuã naa mose nyii, ũquĩ nda embutiã esi no. ¹⁶ — Mbae icuã ngue asaã eã nda, jenyechĩ nda jê. — Mbae icuã ngue asaã nda, jenyê quiatu quia jenyue. Jeñee quiatu quia Dios je jenongue rĩi. Ũquĩ mose ra Dios jembucherõ. Emo turã mo ñee tuchi mose Dios je, Dios ra mbae turã saã tuchi ee. ¹⁷ Sã Elías no. Nande rã si chõ ndaque Elías. Sã ñee tuchi Dios je ama mbuchaaqui eã nonde no. Nyaaqui eã mbei que cote ra. Tres años y medio chee que ra. ¹⁸ Aquere que Elías ñee Dios je cote ra. Ama mbuchaaqui sacua cote. Aque mose que nyaaqui cote ra. Mbae que suri ja cote ra. Mbae ia ja chee no.

¹⁹ Emo icha mose Dios si, sã enongue embuchebibe mingo Dios rui sí. ²⁰ Nde mbia mo mbui mose huiicuã si, eresiquisã quisã ño nguia eso eã sacua tata cuásuu ũquĩ. Dios ra eicuã mbutiã esi cote.

PRIMERA CARTA DEL APOSTOL SAN PEDRO

Pedro ucheẽ mbesa mondo Jesú quiato ishonda jaaja je

¹ Pedro chõ se re. Jesucristo chimbaaquiatu chõ se re. Aico ã mbesa jêje a. Isho isho jendeco mose jendecua si. Ponto jenda je. Galacia jenda je. Capadocia jenda je. Asia jenda je. Bitinia jenda je. Jê ja je aico ã mbesa a. ² Dios que jêirabo umbaerã nyii jeã mose ra. Espíritu Turã ngue jem̃i icúe Dios mbaerã cote ra. Jê echeẽ mumbayã sacua. Jesucristo ruqui jembitirõ sacua abe jêicuã si no. Sã Dios riqui turã i i tuchi jendese. Sã eriqui jembia i i tuchi no.

Dios ra mbae turã mee ja nande je

³ Nandechẽ turã mbei quia Dios rĩ. Jesu cristo rute quia ae re. Ae que eya eãte riqui nanderese ra. Nyebe nandeisi nguiã mbiasu nguiirina cote. Dios Jesucristo raaque mbuquera mose, aqumose que nandembiasu nande abe ra. Nyebe nandeico nguiã ñee ã. “Dios cheẽ nda io turã ja nande je”, i ã. ⁴ Dios ra nandemingo bei. Eriirĩte quia nande re. Nyebe ra mbae mee ja nande je nandeico mose ibate. Mbae icuã ndese ra nandemae eã tuchi aqumose cote. ⁵ Jêingo Dios icuate ũquí. Nyebe ae riqui nguiã jendeaquiatu tuchi uquirãcuã je co. Dios que mbae mbuquiche ja nande je ra. Nandererao sacua ibate. Mbae ua ja mose ra nandererao ja ibate cote. Co eriqui raã nguiã nanderaaquiatu co. ⁶ Nyebe jêyate riqui nguiã ũquí. Mbae rasi tu mbiĩĩ arõte raque jêje. ⁷ Sã mbia riqui oro mbuchi no. Equia rirõ sacua esi. Eĩ ño Dios nguiã jêje co no. Jê Dios icua tuchi sacua ño mbae rasi riqui re. Nyebe Dios jêicua. Mbae rasi raã naa ndaque. Eaturã tuchi chõ ũquí oro si re. Oro quia ra ua emo mose. Jê nguia ra jêhua eã mbei Dios icua mose. Jesucristo tu mose nda Dios ñee turã tuchi jenĩ ña. ⁸ Jêingo nyesequate Jesucristo rese ũquí. Jema eãte raque quia erese ũquí. Jêingo eicuate jeñiangui re ũquí. Jêya tuchite riqui erese ũquí. ⁹ Jêingo Jesucristo icuate ũquí. Nyebe ra Dios jêã mingo turã mbei cote.

¹⁰ Sã Dios cheẽ mbuchecuaasa ñee cose no. —Mbia ra mae jee Dios turã ndese, i que ñee nda. Nanderĩ ño ngue eriqui nguiã ñee. —Mañi nda Dios quia reaẽ. Uturã je ra mbia mingo bei reaẽ, i que Dios cheẽ mbuchecuaasa ndua ndua cose ra. ¹¹ Espíritu Turã ngue siqui quia Dios cheẽ mbuchecuaasa chiangui re ra. Mbiirandu randu que equia Cristo rĩ nda. —Cristo ra mbae rasi saã tuchi. Aquere ra equirãcuã tuchi mbia rerecua mose ae cote, i que Espíritu Turã Dios cheẽ mbuchecuaasa mbiirandu nyii ra. —Manosete ra ũquí ndeae. Aba rĩ eriqui “Cristo” i remi, i tuchi que Dios cheẽ mbuchecuaasa quia ndua ndua ra.

Dios que jem̃i icúe umbaerã nda

¹² Dios que embiirandu ra. —Jê jêtiamba quiatu ra Cristo mbae rasi saã mbia mingo bei sacua. Jêtiamba quiatu ra Cristo mbae rasi saã mbia namonda je. Mbia emo mosenda je, i que Dios ra. Nanderĩ ño ngue eriqui nguiã “namonda” i. Nyebe mbia riqui nguiã ũquí ja renei nenei jêje Cristo rĩ cote. Espíritu Turã abe riqui erenei nenei jêje co cote. Angeles abe ũquí icua sete raque quia Cristo rĩ ũquí. ¹³ Jendua tuchi rã nguia mbae raã nonde. Jêtesa bei quiatu quia. Jesucristo tu mose, eturã tuchi ra ae jêje aqumose. ũquí

ndese quia jëingo bei tesa eraarõ. ¹⁴ Ae jenyosei chosei quia nyii nae, Dios icuayã mose nyii nae, ùquĩ ndese jëingo ndua eã cote. Dios cheẽ jemumba eã ño nguia cote. ¹⁵ Dios quiarei jemingo icúe umbaerã tuchi. Nyebe jëingo turã tuchi ae rã si. ¹⁶ Sã Dios cheẽ mbesa ji riqui no: —Jeturã ño jëingo se rã si, i ñi embesa ji re. ¹⁷ Ûquĩ jëingo “Paba” i Dios je ùquĩ. Nyebe jëingo ireĩ ireĩ jiri esi jëingo mose ìbii. Dios ra mae nandechiao ja ja rese. Emo chiao rese ra mae eã eã. ¹⁸ Nandei ñiinda que siqui chooño nguia cose ra. Dios rese siqui rocoĩ. Eĩ nande que equia nande abe nyii no nda. Dios que nanderirõ ùquĩ si cote ra. Dios que mbae isiquia mondo eã nanderirõ sacua nandecuã si ra. Oro que emondo eã no nda. Plata abe no. ¹⁹ Cristo ruqui quiatu ngue nanderirõ nguiã nandecuã si. Aba queteamba tuchi chõ Cristo ruqui re. Cristo mano mose nande je que eruquĩ uchẽ tuchi ra. Sã sacerdote oveja turã ño iquia no. ²⁰ —Cristo ra mano mbia icuã ndiquicharõ, i que Dios nyii mbae ao nonde ra. Namõ ño ùquĩ io nguiã jëje cote. Namõ ño Cristo mano nguiã jëje cote. ²¹ Cristo chõ Dios icua uquia nguiã jëje ùquĩ. Dios chõ ngue Cristo raaque mbuquera nguiã. Dios chõ uquiracuã mee nguiã Cristo je. Nyebe jëingo nguiã Dios icua ùquĩ cote. Nyebe jëingo nguiã ñee. “Dios ra nandemingo bei ibate” i ùquĩ.

²² Dios cheẽ jëisi turã mingo ùquĩ cote. Nyebe jeñia mbitorõ nguiã mbushĩ cote. Nyebe jëingo nguiã nyesequa arõte mbia rese cote. Jenyesequa tuchi quiatu quia jenyiese jë. Nandechiangui re chõ nandeco nyesequa tuchi mbia rese jë. ²³ Nyaacuquia si je raanguia chõ jë cote re. Nandechaacuquia que equia nyii nae, mbia chõ ngue nanderu nyii ra. Nandechaacuquia sire, Dios que nanderu tuchi cote ra. Dios cheẽ ño nandembuchaacuquia si nguiã. Echeẽ nda ua eã bei. Siqui bei rae. ²⁴ Sã embesa ji riqui ñee no: Quiata rã tuchi chõ mbia ja riqui nguiã ã.

Sã quiata riqui mano jeite no.
Quiata uti rã ño mbia riqui nguiã ã no.

Eturã mbirĩ ño chĩ ndaque nyii.
Aquere chõ ñimama cote. Mano cote.

²⁵ Dios cheẽ nguia ra ua eã mbei,

i que embesa ji ra. Dios cheẽ sí chõ ngue jeñandu nguiã Jesucristo rĩ. Jemingo bei sacua.

2

Jëo tuchi chõ nguia Dios cheẽ ndese

¹ Nyebe jëhui mbae icua ja si. Jë nda mbia jemburĩ irĩchĩ nguia jë. Jenguasu ra jësaã saachĩ. Emo mbae ra jenyosei choseichĩ nguia jë. Jeñee icua icuachĩ nda equia emo ñi jë. ² Sã ãquẽ itãqueĩ ndiqui uchũ achã asite no. Eĩ jenyee bei chõ nguia oo Dios cheẽ ndese. Eĩ nda jëquiracuã tuchi riqui Dios rese. Sã ãquẽ quiracuã ndiqui quiambure no. ³ Dios turã ngue jësaã ndei resẽ.

Sita turã na ño Cristo re

⁴ Jesucristo ra siqui bei. Jesucristo rei sita turã na. Sã mbia riqui sita mo ndirirõ no. Eĩ si chõ mbia nguiã Jesucristo ririrõ ndei ã. Dios queteamba tuchi quiatu Jesucristo re. Dios chiirabo tuchi chõ ae re. Jesucristo jësihã i tuchi quiatu quia jë. ⁵ Sita turã na ño jëingo nguiã jë abe ùquĩ. Sã Dios chuchua ao ji sita turã je no. Dios chuchua ao ji rã ño jë no nde. Jeñee turã mbei quiatu quia Dios je. Jë sí chõ jendete jemondo quia ee. Jëingo bei quiatu quia icúe embaerã. Ûquĩ mose ra Dios jëisi turã mbei Jesucristo rĩ cote. ⁶ Nyebe Dios cheẽ mbesa ji riqui nguiã ñee:

Jesucristo ra amii Zión.

Tuchua i turã na tuchi chõ Jesucristo re.

Sechiirabo tuchi chõ ae re.

Aba quieteamba tuchi chõ ae re.

Ae Jesucristo icuate quia nae, ùquĩ mo nda ñee eã.

“Jesucristo rui aico jirichĩ co”, iã nda emo,

i que embesa ji ra. ⁷ Sã mbia mo tuchua ao sita turã je no. Ûquĩ sita turã na ño Jesucristo riqui nguiã co. Ûquĩ jëingo Jesucristo icuate ùquĩ. Nyebe jengueteamba tuchi ae riqui nguiã co. Ae Jesucristo icua eãte quia nae, ùquĩ je ra embesa ji cheẽ io tuchi cote. ã ndei embesa ji cheẽ ã:

Ae tuchua aosa quirirõ sita nae, aque quia ra tuchua i turã tuchi cote,

i que embesa ji ra. ⁸ Sã embesa ji riqui ñee no:

Sã sita riqui pãtã i emo cúi je no jẽ.

Embucoi no jẽ,

i que embesa ji ra. Eĩ si chõ nda mbia pãtã i raanguia Jesucristo cheẽ je. Jesucristo cheẽ mumbayã sereãte quia ñene. “Echeẽ mumbasa ra pãtã i raanguia”, i que Dios ñiinda mosenda bei ra.

Dios mbaerã tuchi chõ jẽ nde

⁹ Dios que jëirabo umbaerã tuchi ra. Sacerdotes rã ño jëingo nguiã Dios je ùquĩ. Dios que jemingo icúe umbaerã nda. Jẽ mbia mbiirandu randu bei sacua Dios chiao turã nii. Ae quiatu que jendirõ itondaru si ra. Jëingo sacua nyaashĩ Dios rese cote. ¹⁰ Mbia chibutereãte que jẽ nyii ra. Dios quiato tuchi chõ namo jẽ cote re. Emo ngue ndua eãte quia jendese nyii ra. Dios quia ndua tuchi nguiã jendese co cote.

Dios rimba chõ jẽ nde; nyebe jëingo turã

¹¹ Achesequa tuchi te quia jendese co. Isho ishote jëingo jendecua si ùquĩ. Ae mbia chosei chosei quia mbae icua nae, ùquĩ ndese ra jemaie maechĩ. Eicuãte riqui nandeaĩ je ùquĩ. ¹² Ae Dios icua eãte quia nae, ùquĩ ndésaa jëingo turã ño nguia. Ûquĩ ndiqui ñee icua icuãte raque jeni ùquĩ. Jëicuã mose rocoĩ. Ûquĩ nda mae jee jëturã ndese. Ñee turã jee ra Dios riĩ, Jesús tu mose.

¹³ Mbia rerecua ja cheẽ jemumbayã ño nguia Dios je. Ae ererecua tuchi ererecua ja si nae, aque cheẽ abe jemumbayã ño nguia no. ¹⁴ Sã ererecua tuchi riqui mbia rerecuarã mii jaaja no. Mbia icua mbasi mbasi sacua. Mbia turã ndequiatu sacua abe no. Ûquĩ ñee abe jemumbayã ño nguia no. ¹⁵ Jëingo turã ño nguia jẽ. Jëingo turã mose ra mbia aquiatuã ñee icua aroneate jëje. Dios bite ùquĩ. ¹⁶ Jesucristo que jembui mbae ja si cote ra. Jenderecua eãte raque mbae mo cote. —Mbae icua tasaã. Sererecua eãte rei ñene, jenyechĩ ndae. Dios rimba chõ jëingo. ¹⁷ Jëingo turã ño nguia mbia ja je. Jenyesequa chõ nguia jendesenda Jesús quiato rese. Jëireĩ ireĩ jiri Dios si. Mbia rerecua cheẽ nda jemumba mumbachĩ jẽ.

Cristo rã si chõ jëingo ñimbirãcuã turã mbae rasi je

¹⁸ Mbia rimba je tacheẽ cote. Jenderecua cheẽ jemumbayã ño nguia jẽ. Jëireĩ ireĩ jiri quia esi jẽ. Jenderecua icua mose abe chõ echeẽ jemumbayã nguia. “Jenderecua turã mose achõ ño echeẽ jemumbayã”, ae eã nguiã jëje co. ¹⁹ Mbia icua icua ñooño mose nande je, nanderoseĩ nguiãtu chõ nandeco. Dios bite ùquĩ. Dios riĩ nanderoseĩ nguiãtu mose, ebite ùquĩ. ²⁰ Mbae turã jësaa saã mbei chõ nguia. Mbia jëiruã nua mose jëturã nii, jendoseĩ nguiãtu

chõ jëingo. Ûquĩ mose ra Dios ia tuchi jendese. Mbae icuã mo nda jësaãchĩ. Jë mbae icuã naa mose, Dios biãte ùquĩ. Mbia jëirua nua mose jëicuã nii, jendoseĩ nguiátu raque rae, Dios biãte ùquĩ. Jëicuã nii ño ñene. ²¹ Nyebe Dios “jëingo serui”, i nguiã nande je. Sã Cristo roseĩ nguiátu tuchi mbae rasi raã mose nande je no. Nande abe nanderoseĩ nguiátu sacuaã eraã si. ²² Cristo que mbae icuã mo saã eã tuchi ra. Mbia mo ngue embũĩrĩ iriã tuchi quia ra. ²³ Mbia ñee icuã mose Cristo je, ae que ñee icuã eã mbei mbia cheẽ ndibishorõ nda. Mbia Cristo mbaasi asi mose, “tasaã se”, iã tuchi que equia ra. “Dios quiarei”, i chõ ngue equia ra. ²⁴ Jesús mano mose ira mbuchicuandasa ji rese, nandeicuã ndiquicharõ ño ngue mano nguiã. Eraaque rã nandeico sacuaã mbae icuã je chõ ngue re. Nandeico sacuaã mbae turã ndese chõ ngue re. Cristo mbae rasi raã mose, jembitorõ sacuaã ño ùquĩ nde. ²⁵ Ovejas quiachã je rã ño ngue jëingo nguiã nyii. Jenyebi que oso ngasẽ Cristo rea cote ra. Ovejas raarõsa rã ño ae riqui nguiã jëje co cote. Ae chõ jendeaquiatu nguiã co.

3

Jendu cheẽ jemumbayã ño nguia, i cuña je

¹ Mbia ninisi je tacheẽ cote. Jendu cheẽ nda jemumbachĩ jë. Jesús quiatoã ndaque jendu. Echeẽ jemumbayã ño. Jendu nda Jesús icua chee cote chã. Jëingo turã mose ee. Jë Jesús cheẽ neneĩ neneĩnde rocoĩ ee. Jesús nda eicua cote chã. ² Jëingo turã ndese ra jendu mae nyee. Echeẽ jemumbayã mose. ³— Mbae je nda serete ambarõ na ña, jenyechĩ nda ndua ndua jë. Jëo resenda rese. Jëhui rese abe no. Tiru turã ndese abe no. Jëa uma ji turã ndese abe no. Ûquĩ mii ndese chõ nda jëingochĩ ndua beite jë. ⁴ Jeñiangui re quiatu jëingo turã. Jëingo tochi chõ nguia. † nda jëturã ua eã mbei jësi. Ûquĩ nguiatu Dios bite re. ⁵ Sã cuña mo no. Dios quiato cose no. Ûquĩ nguiatu que eturãte riqui uchiangui re quiatu ra. Ngu cheẽ abe mumbayã no. Ndua rocoĩ nguete resenda umbarõsa rese. ⁶ Sã Sara Abraham ñee mumbayã no. Sererecua i ee. Jëingo turã mose, Sara rã nda jë cote. Mbae mo si ra jësiquichechĩ cote jë.

Jëingo turã ño nguia jeninisi je

⁷ Tacheẽ eninisi rerecua je cote. Jëaquiatu chõ jëingo turã jeninisi je. Jeninisi jemingo turã. Jëingo tochi chõ nguia ee. Jë nguia jeatã jiri esi re. Dios quia eturãte jë ja je re. Jeninisi rese. Dios que jendeco mingo nyiese ra. Jeninisi rese. Nyebe jëingo nguiã siqui turã jeninisi je. Ûquĩ mose ra Dios jeñee andu bei, jeñee mose ee.

Mbia icuã icuã mose jëje jëturã mose, jëya chõ jëingo

⁸ Jëingo turã ja chõ nguia jenyue no. Jëya eã jiri jëingo jenyiese no. Hue rĩ ja chõ jëingo ndua ja. Jenyesequa ja chõ nguia nyiese. Jëseteã ño jëingo nyue. ⁹ Mbia icuã mose jëje, jëicuãchĩ nda jë abe ee. Mbia ñee icuã mose jëje, jeñee icuãchĩ nda jë abe ee. Jeñee turã nguiatu quia ee jë. Jëingo serui, i chõ ngue Dios jëje re. Dios ñee turã mbei sacuaã jeni ño ngue re. ¹⁰ Sã embesa ji riqui ñee no:

Jëingo turãse mose, jeñee icuã eã emo nii.
Jëingo chooño sereã mose, jeñee ñooño eã emo je no.

¹¹ Jenycuasẽ ño nguia mbae icuã si.
Mbae turã ño jësaã nguia.

Jëturã ño nguia mbia ja je jë.

¹² Ae siqui turã nguia nae, ùquĩ Dios teaquiutu bei quia co.

Ūquĩ ñee Dios chandu turã mbei quia co.

Ae siqui quia mbae icuã ndese nae, Dios biã tuchi chõ ũquĩ nde, i que embesa ji ra.

¹³ Jëingo turã mose çmañi nda emo mbae icuã naa jêje re? ¹⁴ Mbia icuã icuã mose jêje mbae turã naa mose, jêya tuchi chõ ũquĩ mose re. —Mbae icuã nda asaã ndeje jê, i mose jêje, jêsiquicheã ño esi. ¹⁵ Jesucristo jemingo tuchi chõ nguia jeñiangui re jenderecuarã. Emo ñee mose jêje, jeñee aquiatu chõ ee. —çMbaerã ereico Jesucristo rese re? i mose emo jêje, jeñee aquiatu chõ ee. Jëingo mingue chõ ee. ¹⁶ Jëingo turã mbei. Diosbi rese jëingo bei. † nda jêya bei riqui. † nda “mbae turã asaã eã ñochi”, jenyee eã. Ae ñee icuã icuã nguia jeni nae, ũquĩ nda ireĩ ireite quia chee icuã si cote. Ireĩ ireĩ nda jëingo turã mose Cristo rese. ¹⁷ Mbae rasi jësaã mose jêturã nii, ũquĩ nguiarei Diosbi tuchi. Mbae rasi jësaã mose jëicuã nii, ũquĩ nguiarei Dios biã tuchi. Mbae icuã niite quia ñene. ¹⁸ Cristo abe que mbae rasi saã nande je ra. Mbae icuã naande rocoĩ. Ae raque eturã. Mbae rasi que esaã nandeicuã ndiquicharõ nda. Nandemingo sacuã Dios rese. Cristo rete que mano nda. Espiritu Turã ngue embuquera si ra. ¹⁹ Aque mose que Cristo si Dios chee nenei nenei mbia aĩ tarõ ji je ra. ²⁰ Ūquĩ ngue Dios chee mumba mumba quia nyii ra. Noé Dios chee nenei nenei mose ee. Dios roseĩ nguiátu tuchi que eriqui mbia riisu isu aque mose ra. Noé siqui bei mose arca raã naa. Aquere que mbia miite ique arca ye ra. Ocho que mbia ra. Siqui bei sacuã ama ndicuasú mose. ²¹ Sã ama Noé mumbebi mingó no. Eĩ si chõ bautismo co no. Nandei mbuchasu mose, aque quia ra nandemingo eã Dios rese. Nandechiã mbitorõ ji mose, aque mose quia ra Dios nandemingo bei cote. Bautismo tuchi chõ ũquĩ nde. ²² Jesucristo quera sire que esi ibate ra. Hue eriqui beite Dios jii hue cote. Mbae ja rerecuá tuchi chõ ae cote re. Angeles rerecuá. Ibatenda rerecuá ja.

4

Mbae jësaã turã ja

¹ Sã Cristo mbae rasi saã tuchi siqui mose ibii no. Eĩ jenyee si chõ nguia ñimbirãcuã nguiátu mbae rasi raã mose. Ae mbae rasi saã tuchi quia nae, ũquĩ nda mbae icuã saã eã mbei cote. ² Ae Dios bite nae, ũquĩ ndese ra eriqui bei cote. Ae echeseite quia nae, ũquĩ naa ndocoĩ. ³ Mbia ataque rá tuchi que nandeico nyii ra. Nandeicuã tuchite que eriqui nyii ra. Ae nandehosei quia nae, ũquĩ ndese achõ ño ngue nandeico nyii ra. Nandequiacua quiacua que equia nyii ra. Nandechimbusarei chooño mbei que equia nyii ra. Dios abareã ndese que nandeico ndua tuchi nyii ra. Huee chõ cote. Nandehui que ũquĩ ja si cote ra. ⁴ —çMbaerã jëingo bei eã mbae icuã naa naa urerese re? i nanderesenda ñiinda quia nande je ã. Nyebe eriqui nguiã ñee icuã icuãte nande je ã. ⁵ —çMbaerã ũquĩ jësaã nde? i chee ra Dios ũquĩ je cote. Dios mae mose mbia chisaã saã ja rese. Aque mose ra Dios mbia mano je abe chisaã ndea ja. Mbia reco abe chisaã ndea ja. ⁶ Ae mano mbia nyii nae, ũquĩ je que Jesucristo Dios chee nenei nenei nda. Eaĩ siqui turã sacuã Dios rá si. Erete mano ndaque huicuaã je.

⁷ Achite mbae ñi ua ja a cote. Nyebe jëingo mbae turã naa naa ja bei. Nyebe jëingo ñee ñee mbei Dios je. ⁸ Jenyesequa tuchi quiatu quia jenyiese. Ūquĩ mose ra jêtesarei jenongue icuã si. ⁹ Jenongue jëisi turã ño nguia nyoĩ mose jenyuchua. Jêya chõ jëingo eisi mose. ¹⁰ Dios que nandechisaã saana mee

nande ae ae je ra. Ũquí jěsaã turã turã ño nguia jěataque je. Dios uaquiatu mee mose jěje mbae mo naa sacua, ũquí jěsaã turã turã ño nguia jěataque je. ¹¹ Emo Dios cheẽ nenei nenei mose, sã Dios cheẽ tuchi chõ esenei senei nguia. Jemo mbae turã naa naa mose uataque je, sã erigui eraã turã Dios quirãcuã nii. Ae jěsaã saã nguia mbae nae, Dios je chõ jěsaã. † nda mbia ñee turã mbei Dios riĩ. Jesucristo riĩ abe no. Sã mbia ñee turã mbei Dios riĩ. Amén.

Mbae icuã tuutu mose jěje, jěya cho jěingo

¹² Mbae icuã tuutu mose jěje, “¿mbaerã erigui seje re?” jenyechĩ nda nyuruirate, Seresenda. Eĩ mbei chõ mbae icuã nguiaã tuutu Jesús quiato je. ¹³ Mbae icuã tuutu mose jěje, jěya chõ jěingo. “Cristo rã si chõ nandeico nguiaã mbae rasi raã”, jenyechõ nguia ñimbria. Cristo nininya tu mose, aque mose abe nda jěya tuchi chã. ¹⁴ Mbia ñee icuã icuã mose jěje Cristo riĩ, coche ñene. Jěya chõ jěingo. Espiritu Turã ño jěichu ichu nguiaã ũquí. ¹⁵ Mbia jembaasi asi chooño mose Cristo riĩ, jěya chõ jěingo. Jěicuã nii mbia jembaasi asi mose, ũquí nguiatu aba ireĩte re. Jě mbia mo iquia mose. Jě mbae mo mbuquiachã mose. Jě mbia mo mbupaama i mose. Jě ũquí icuã mo naa mose, aba ireĩte ũquí. ¹⁶ Mbia jembaasi asi mose Cristo riĩ, jěireĩ ireĩchĩ nda ũquí mose. Cristo resendate quia jě nde. Nyebe jěya chõ jěingo. ¹⁷ Dios ra mae ja chee mbia chisaã ja rese. Achite Dios ñi mae uquiato chisaã ndese a. Nandechisaã ndese chee ra Dios mae. Uquiato chisaã ndese chee. Mañi nda uquiatoã nyisaã je remi. Ũquí nguiatu ra embasi tuchi nandesi quiatu. Dios cheẽ turã nguiatu ngue eisiãchĩ nguiaã. ¹⁸ Dios quiato riqui ñimbirãcuãyã arõ arõte mbae icuã tuutu bei mose ee ã. Dios quiatote raque. Dios quiatoã nguiatu ra ñimbirãcuãyã tuchi mbae icuã si. Dios ra emondo chee tata cuasu. ¹⁹ “Mbae rasi jěsaã”, i mose Dios nande je, nandesaã turã ño nguia ee. Mbae turã nandesaã i i chõ nguia ee. Nandereco nandemee tuchi nandeaosa Dios je. Ae ra ucheẽ mbuchebiã mbei nande je.

5

Jesús quiato jěteaquiatu turã ño nguia

¹ Jeñimunua je rerecua ja je tacheẽ cote. Cristo quiato rerecua chõ se no nde. Cristo mbae rasi raã ndese que amae se ra. Cristo nininya nyecua mose, se abe ra aico bei erese cote. ² Ae Jesús quiato siqui quia jendese nae, ũquí jěteaquiatu turã nguia. Sã ovejas raarõsa riqui ovejas raarõ turã no. Eĩ jenyechõ nguia Jesús quiato raarõ. Jěteã teã eã ño nguia mbia mbaaquiato quiatu. Jendua ndua eã ño nguia mbae isiquia rese. ³ Jěingo tochi chõ nguia Jesús quiato chimunua nua je. Mbiacha ra jěsaã saã techĩ ee jě. Jěingo turã ño nguia eresa rae. † nda jě na sí erigui. ⁴ Jesucristo quiarei mbia reaquiatusa tuchi nande si. Ae tu mose, mbae turã tuchi mo nda emee jěje premio. ũquí nda ua eã mbei. ⁵ Acuanindu je tacheẽ cote. Amei ñee jemumbayã ño nguia jě. Jě ja jěataque cheẽ jemumbayã ño nguia jě. Jěingo tochi ja chõ nguia jenyue jě. Sã embesa ji riqui ñee no:

Ae ucuasu saã saã nguia nae, Dios biã tuchi chõ ũquí nde.

Ae siqui tochi quia nae, ũquí je quiatu ra Dios turã mbei riqui, i que embesa jí ra.

⁶ Jěingo tochi chõ nguia Dios je jě. Equirãcuã tuchi chõ ae re. Ae ra mbia mumae turã nyee jendese emo mose cote. ⁷ Jendua ndua ia eã si jěhui chõ. Jemee ño Dios je. Ae riqui ndua beite jendese co. Jendeaquiato beite quia co.

⁸ Jeñimbaaracua chõ nguia jẽ. Jẽtesa bei chõ nguia jẽ. Aba checuayã nderecua riqui ngata beite co jẽ. “Mbia tambiiacuã icuã”, i beite equia co. Sã nyacua no. Sã nyacua risha riqui ureĩ mbocheite “mbae tau” i no. ⁹ Aba checuayã nderecua jẽsiquisã ño nguia jenyese. Dios jẽicua tuchi chõ nguia jeñiangui re. Sã jendesenda ishonda ja riqui mbae rasi raã tuchi no. Jẽ na si no. ¹⁰ Sã Dios turãte riqui nande je no. Mbae rasi ra jẽsaã ndaque nyii. Aquere ra Dios jembitorõ cote. Jembirãcuã tuchi cote. Dios sí chõ ngue ñee nguiã nande je. “Taemingo bei serese ibate Jesucristo rĩ”, i nguiã nande je. ¹¹ Dios quiarei equirãcuã mbei. Eturã mbei. Amén.

Pedro ñee hui bei sacua cote

¹² Co ambesa quia jẽje co. Jemingo i i sacua Dios rese. Jembaaquiato sacua Dios turã ñi. Jẽingo bei chõ nguia erese. Co ambesa mondo quia jẽje aque. Silvano ndese aque. Jesús quiato turã tuchi chõ Silvano nde. Nanderesenda re. ¹³ Jesús quiato Babilonia jenda saludos mondo quia jẽje aque. Dios chiirabo chõ ã nde. Jẽ na si. Marcos abe saludos mondo quia jẽje aque no. Seriirĩ na ño aico nguiã ee co. ¹⁴ Saludar jenyete turã turã ño jenyete mambi. Jenongue ritii abe jẽsiite ite chõ nguia mambi. Jesucristo quiato jate quia jẽ nde. Sã jẽya beite riqui. Amén.

SEGUNDA CARTA DEL APOSTOL SAN PEDRO

Pedro ucheẽ mbesa mondo Jesús quiato je

¹ Simón Pedro chõ se re. Jesucristo rimba chõ se re. Jesucristo chimbaaquiatu chõ se re. Aico co mbesa mbesa jêje co. Ure rã si chõ jêingo nguiã Jesucristo icua ùqui. Nandebi tuchi Jesucristo icua mose. Dios turã tuchi nandemingo mose Jesucristo rese. ² Sã Dios turã ndiqui tuchi jendese. Sã Dios jembia tuchi mingo. Jesucristo jêicua i i tuchi bei oso quia.

Jeñimbaaquiatu i i tuchi Dios rã

³ Jesucristo nandêicuate quia ã. Nyebe Dios riqui nguiã mbae raã ja tuchi nande je co. Nandemingo bei sacua. Nandêico sacua erã sí. Uquirãcuã je eriqui mbae raã ja tuchi nande je co. Uturã ngue emee nande je ra. ⁴ Dios que ucheẽ turã mee nande je ra: —Co tasaã jêje. ã tasaã jêje. Co abe, i tuchi que equia nande je ra. Ûqui ngue esaã ja nande je cote ra. Jesucristo rã si que nanderaã nda. Ae mbae icua mbia chosei chosei quia nae, ùqui si eriqui nanderiquisã quisã co. ⁵ Jêingo Dios icuate ùqui. Jêingo turã ño nguia jê. Jeñimbaaquiatu i i tuchi quiato quia Dios rã jê. ⁶ Jendeco jêingo turã ño nguia i co jê. Jêingo mingue chõ nguia jê. Dios rã si chõ jêingo jê. ⁷ Jêingo turã ño nguia jenyue. Jenyesequa chõ nguia jenyese no. ⁸ Eĩ jenyese mose, eturãte ùqui. Eĩ jenyese i i tuchi chõ nguia jê. Ûqui mose ra Jesucristo jêicua chooño eã. Mbae ra jêsaã saã tuchi quia ee. ⁹ Eĩ jenyese eã mose, mbia resayã na ño jêingo nguiã ùqui. Eĩ jenyese eã mose, jêtesarei chõ ndei equia jeña irei ji si ùqui. Jesús jêicua cose ndare mbutiã mose. ¹⁰ Ûqui jesaã saã tuchi chõ nguia jê. Jê ùqui naa mose, jê sí chõ nda jenyêicua quia. “Dios chiirabo chõ nande re”, jenyese tuchi ra equia. Jêhui eã mbei ra equia Dios si cote. ¹¹ Dios ra jêisi tuchi mingo Jesús récuua cote. Huee ra jêingo bei erese.

¹² Nyebe ra aico bei jemundua ndua ùqui ndese. Jêicuate raque. Jêingo turãte raque Dios cheẽ ndese. ¹³ Coche aico rei jemundua ndua ùqui ndese a. Sereco siqui mose a ra aico jemundua ndua bei ùqui ndese. ¹⁴ Jesucristo que ñee seje ra: —Ereico arete eã nda íbii, i que sembiirandu ra. ¹⁵ Taemundua ndua bei erese. I nda jêtesareiã mbei esi semanonde abe.

Se sí amae Jesucristo rese, i Pedro

¹⁶ Jesucristo quirãcuã ngue uresenei senei tuchi quia jêje ra. —Jesucristo ra tube íbii, ure tuchi que equia jêje ra. Ichoiñosa reã ñeetuchi chõ ùqui nde. Mbua ñee ñooño je eã tuchi chõ ùqui nde. Se sí chõ ngue amae Jesucristo nininya rese ra. ¹⁷⁻¹⁸ Dios que unininya mee ee síta íbátee ereco mose ra. Se abe reco mose huee que ra. Serésaa que Dios unininya mee Jesucristo je ra. —Seriirĩ ño co re. Sechesequa chõ co re. Seyate erese, i que Ibatenda ñee aque mose ra. Echeẽ ngue achandu se abe ra. ¹⁹ Eĩ sí tuchi que Dios cheẽ mbuchecuasa chimbesa nyii ra. Echeẽ mbesa ji chooño eã ño ùqui nde. Jêingo tuchi quia echeẽ mbesa ji rese. Mbae resaesa tuchi chõ echeẽ mbesa ji re. Sã tata rendi riqui itondaru resaete nyaashĩ nyee no. Jêingo tuchi mose echeẽ mbesa ji rese, Cristo ra jendique tesae tuchi quia jêje. Sã nyasitata riqui nanderesae no. ²⁰⁻²¹ Dios cheẽ mbuchecuasa mo ngue ñee ñooño eãte quia emo mose ra.

Ucheẽ ae que embesa mbesa eãte quia ra. Espíritu Turã ño ngue embucheẽ nguia ra. Espíritu Turã ño ngue Dios cheẽ mbesa mbesa uquia quia ee ra.

2

Ae mbia mbĩĩĩ irĩĩ nguia embaaquiату quiату mose

¹ Mbia mo ngue Dios cheẽ mbuchecuasa saã ñooñote quia cose ra. Espíritu Turã ae que embucheẽ eã nda. Eĩ sí ra emo jembĩĩĩ irĩĩ ñooño name. Ñee ñooño nda equia Dios rĩĩ jėje. Hui huíte chõ nda equia Jesucristo si. Ae mano nguia erĩĩ. Nyebe ra Dios ũquĩ mbutiã asi. ² Mbia ra siqui tuchi mbae icuã ndese ũquĩ ñee nguire. Mbia ra siqui chooño ño cuña mo ndese ũquĩ ñee nguire. Nyebe ra mbia ñee icuã icuã Jesús cheẽ turã nĩĩ. ³ Ũquĩ nda mbae isiquia choosei oseĩ tuchi chõ nguia jembae. Nyebe ra jembaaquiату icuã icuã. Dios que ñee ũquĩ nĩĩ coose ra. —Ũquĩ nda ambasi tuchi je, i que ra. Achite ũquĩ ñĩ a cote.

⁴ Angeles mbae icuã naa mose, ũquĩ nyee que Dios tiisu isu ate quia ra. Ecua ji que emombo tata cuásuu ra. Itondáruu que emombo ra. Siqui bei sacuã huee, Jesús tu chee mae eicuã ndese. ⁵ Mbia cose ndare abe que Dios tiisu isu ate quia ra. Noé mosenda. Ũquĩ ngue eicuãte riqui ee ra. Nyebe que Dios ama mbuchaaqui tuchi ee ra. Ama mbicuasuu mbia iquia ja sacuã. Noé mĩĩ ngue Dios iquia eã nda. Mbia siete rese. Dios cheẽ nenei neneisate quiату ngue Noé nde. ⁶ Sodoma jenda abe que Dios tiisu isu ate quia ra. Gomorra jenda abe no. Mbia icuã tuchite quiату ngue re. Nyebe Dios ũquĩ nde ja nguĩ tata je. Echuchua ja resebe. —Eichĩ nda nande abe je re, nandeico eã mose erese, i sacuã mbia icuã. ⁷ Lot mĩĩ ngue Dios iquia eã nda. Eaturãte quiату ngue eriqui nguĩ Dios je. Eya eãte que eriqui mbia hue jenda mbae icuã naa naa mose ra. ⁸ Mbia mbae icuã naa naa mbei mose que Lot ia eã mbeite riqui ra. Ae mĩĩ ño ngue echĩã turã Dios je ra. Nyebe Dios ae mĩĩ iquia eã nguĩã. ⁹ Ae siqui beite quia Dios rese nae, Dios riqui ũquĩ ndeaquiату beite co. Mbae icuã jea je esi tã i mose ee. Ae mbae icuã saã nguia nae, ũquĩ nda Dios mbasi tuchi. Jesucristo ra tu chee mae eicuã ndese. ¹⁰ Ae siqui quia mbae icuã ndese ubi nae, ũquĩ nda Dios mbasi tuchi. Ae aba cheẽ mumba quia, ũquĩ abe ra Dios mbasi no. Ae eĩ ñooñote quia mbia je nae, ũquĩ. Ae ñee ñooñote quia mbae ibatenda je nae, ũquĩ abe no. ¹¹ Mbae ibatenda rĩĩ ngue ángeles ñee icuã eãte quia Dios je ra. Angeles quirãcuãte raque mbia si. ¹² ã mbia quiarei mbae quiaa rĩĩnda rã tuchi. Ndua turã eã mbae rese. Siqui chooño. Ñee icuã ñooño mbae icua rocoĩ. Mbae quiaa rĩĩnda rã ño nda ã mano cote. Dios ra eiquia tuchi. ¹³ ã nda mbae rasi saã tuchi quia cote. Ubi icuã mĩĩ ndese chõ eriqui nguĩ ndua ã. Jembĩĩĩ irĩĩ ño nguĩã ã. Quiaru chooño ño nguĩã jendese ã. Jesús quiato raã ñooño jėje. Aba irenguia tuchi chõ ũquĩ nde. ¹⁴ Maeño aronea cuña mo ndese. Hui aroneate equia mbae icuã si ã. Ubichõ aroneate equia cuña iquia iquia chooño je rese ã. Mbae oseĩ oseĩ jate equia ã. Dios ra embasi tuchi cote. ¹⁵ Ishote eriqui Dios si ã. Nyĩcuasẽ equia Dios si ã. Sã Balaam ndiqui nyĩcuasẽte esi no. Beor riĩĩ. Sã mbae icuã naa mbae isiquia isi nonde no jē. ¹⁶ Sã burra ñee asite ee no. “Mbae icuã tasaã”, i mose ndua ndua. Sã mbae icuã naa eã burra ñeende ee cote no.

¹⁷ Icuia iru rã ño ã mbia re. Sã quirĩĩã ndiqui ibeishĩ mbucuatate no. Eĩ si chõ ã mbia re. Hue bei eã chí. Nyebe ra Dios emombo bei itondáruu.

¹⁸ Uchisaã mbae icuã nĩĩ ñee ñee ja mbia je. Ucuasu raã naate equia ã. Mbia

mbĩĩrĩ irĩ mbeite equia mbae icuã je ã. Ae hui ramo ndei mbae icuã si nae, ũquĩ abe mbĩĩrĩ irĩte equia mbae icuã je ã. ¹⁹—Jẽingo mose urerese, jẽingo turã ndae, i bei rei equia mbia je ã. Mbae icuã nimba sí chõ ñee ñee nguiã ee ũquĩ. Ae rui nandeico quia nae, ũquĩ nimba quiatu nande re. ²⁰ Sã emo Jesucristo icua raque nyii no. Sã mbae icuã naa eã ndaque ee aque mose no. Mbae icuã embĩĩrĩ irĩ mose ũquinde, eicuã tuchi ra cote. Mbae icuã nimba tuchi ra ae cote. Ñiinda si. ²¹ Dios quia nda ũquĩ icuayã mbei nyii re chã. Dios icuare quiatu ngue hui nguiã echeẽ si. ²² Siqui mbĩĩrĩ ndaque Jesús rese. Hui esi aquere cote. Sã ñooño ndiqui ñemo ndaque no. Sã oso raque ucúẽ ndecha no. Nyebi jei chõ u ucúẽ u cote. Sã teasu socoi mo ndiqui raque nyasu no. Aquere ñimoo moo ño utuchu je cote. Eĩ ño mbia re, ae siqui juate quia Jesús rese. Aquere siqui jei chõ mbae icuã ndese.

3

Jesucristo ra tube

¹ A aico segunda carta mbesa jẽje a. Jemundua turã sacua ño ũquĩ nde. Ae acheẽ jẽje nyii nae, ũquĩ ndese jemundua sacua ño aico nguiã ã mbesa jẽje a. ² Ae Dios quiato senei senei mbia je nyii nae, ũquĩ ndese jendua. Ae Jesús chimbaaquiato ñee mbia je nae, ũquĩ ñee jemumbayã ño. ³ ã ndese jendua: Jesucristo tu nonde ra mbia riqui iquia chooño Dios je. Ñee icuã icuã nda equia Dios je. Ae ebite mbae icuã nae, ũquĩ achõ ndese chõ nda eriqui. ⁴ ũquĩ nda ñee jẽje: —Sã Jesús tu ãte no jẽ. Sã ucheẽ mbuchebi chõ jẽ. Sã eĩ mbei chõ Dios chĩsaã ima jẽ, i ra ũquĩ ñee icuã icuã jẽje. ⁵ Cose ndare rese nduayã. Dios que ibei chao ucheẽ je chõ cose ra. Ibi abe que echao i ite re ra. ⁶ Aquere que Dios ama mbicuasú ra. Mbae iquia ja nonde cote. ⁷ Dios riqui ibei rerecoquiato co. Ibi abe no. ã nandeico irõ erese ã nae, Dios ra emendi cote. Aque mose ra mbia Jesús quiatoã oquei ja.

⁸ Co abe rese jendua, Seresenda: Nyaashĩ mĩ na ño mil años Dios je re. Mil años na ño nyaashĩ mĩ Dios je no nde. ⁹ —Jesús ra tu ãte rei no. Ucheẽ embuchebi rei quia mambi, i raque emo emo nguia Jesús rĩĩ ã. Ico mingüete equia mbia je pe. —Emo nda quiachãyã Dios si chã. Siqui ja nda erese chã, i equia erĩisu isu pe no. Nyebe eriqui nguiã tu jei eãte. ¹⁰ Mbia mbuaté ra Jesús ru. Sã mbae mbuquiachãsa riqui tu itondiite mose no. Eĩ si ra Jesús u mbia mbua. ũquĩ mose ra ibei ua cote. Mbae rieu ra aba mundi tuchi. Nyasitata ra membe. Ibi abe ra oquieĩ tuchi. Mbae ja ra oquieĩ ibi jenda.

¹¹ Nyebe Dios nandesiichã tuchi quiatu quia. Dios rã si quiatu nandeico mbae turã ndese. ¹² Jesucristo ru jenyosei quiatu quia. Ae Dios bite nae, ũquĩ ndese quiatu jẽingo. ĩ nda Jesucristo ru jei. ũquĩ mose ra ibei oquieĩ ja. Nyasitata abe ra membe tata je. ¹³ Aquere ra Dios ibei mbiasu cote. Ibi abe ra embiasu ucheẽ nguire no. ũquĩ ño nandesaarõ arõ nguiã ã. ũquĩ mose ra mbae turã achõ cote.

¹⁴ Nyebe jẽingo turã ño Dios rese. Mbae icuã je ra jeñĩmbũcuãchĩ jẽ. Jeñĩmbũcuã eã mose ra Dios iate jendese eru mose chã. ¹⁵ Dios siqui mingüete quia mbia je co. Mbia rirõ sacua eicuã si chõ ũquĩ nde. Eĩ si chõ ngue Pablo abe embesa nguiã jẽje no. Ae Dios ñee Pablo je nae, ũquĩ sí que Pablo mbesa jẽje ra. Nanderesenda tuchi chõ Pablo re. Nandechesecua chõ nguiã erese ã. ¹⁶ Pablo carta mbesa mbesa bei mose, mbia mundua ndua

sacuã ã ndese chõ ñene. Aba ch#cuayãte raque Pablo chimbesa emo emo. Ae eaquiãte Dios rese nae, ãquĩ Pablo cheẽ nyabi chabi chõ nguiã. Sã embesa ji ataque abi abi no. Nyebe ãquĩ sí chõ ñimb#cuã icuã nguiã ãquĩ. ¹⁷ Sehesecua, a aico jembiiirandu jei a. Mbia icuã jembui eã sacuã Dios si. Mbia icuã nda jembiiirĩ irĩchĩ jẽ. Jẽingoquiãtu tuchi quiãtu jẽ. Huee jẽingo turãte Dios rese namo hue. ¹⁸ Jesucristo rei nandererecua tuchi. Jẽicua i i tuchi quiãtu jẽ. Jenyesecua i i tuchi quiãtu erese jẽ. Ae que nanderirõ mbae icuã si ra. Etura mbeite que eriqui nande je ra. Sã mbia ñee turã mbei quia erĩ. Amén.

PRIMERA CARTA DEL APOSTOL SAN JUAN

Mbia mingosa

¹ Ae siqui quia mbae tiã mose nyii nae, aque tasenei jêje. Ae riqui beite namo co no. Ae cheẽ ngue urechandu chandu bei quia ra. Uremae mae mbei que equia erese ra. Ureoco oco que equia eresẽ no nda. Jesucristo, i equia ee. Dios cheẽ, i abe equia ee. Mbia mingosa, i abe equia ee no. ² Mbia mingosa que siqui ngu rese nyii ra. Tu que nyecua ure je ibii cote ra. Uremae ngue equia erese ra. Uresenei senei equia jêje ã. ³ Ae rese uremae nae, aque uresenei senei nguia jêje ã. Ae urechandu nae, uqui abe uresenei senei nguia jêje ã. Jê abe nda jêingo ureresẽ chã. Sã ureico Dios rese ure no. Jesucristo abe rese. ⁴ Jêya tuchi sacua ño ureico nguiã ã mbesa jêje ã.

Dios rei nyaashĩ na

⁵ Jesucristo que urembiirandu Dios rese nyii ra. Uqui si chõ uresaã saã nguiã jembiiirandu sacua ã: Dios rei nyaashĩ na. Itondaru rã jiri jiriã tuchi chõ ae re. ⁶ “Dios resenda rei se” nandechĩ nda nandeico eã mose erui jê. Nande i mose, nandechẽ ñooño ño nguiã uqui. Nande i mose, mbia mbiri irĩsa chõ nande re. ⁷ Dios rã nandeico mose nyaashĩ, nandeico turã ño nguiã nandechiese uqui. Dios rã nandeico mose nyaashĩ, Jesús ruqui nandeicua mbutiã ja quia nandesi ã no. ⁸ “Mbae icua asaã eãte rese” nande i mose, nandechimbiri irĩ ño nguiã uqui. Nande i mose, ñee ñooñoosa tuchi chõ nande re. ⁹ Nandeicua nandesenei mose Dios je, ae ra eturã nande je. Nandeicua nda embutiã ja nandesi ucheẽ nguire. ¹⁰ “Mbae icua asaã eãte resẽ” nande i mose, “Dios ñee ñooñoosa” nandesã ño nguiã ee. Nande i mose, Dios cheẽ iqueã ño nguiã nandechiangui re uqui.

2

Jesús ñee turã Dios je nanderĩ

¹ Mbae icua jesaã eã sacua ño aico nguiã co mbesa jêje co, seriiri. Jemo mbae icua naa mose, Jesucristo ra ñee turã Dios je aque riĩ. Eicua mbutiã sacua esi. Jesucristo quia rei eturã mbei. ² Jesucristo riĩ ño Dios nandeicua mbutiã nguiã nandesi. Ae rei nandeicua ndibishoronda. Nande mĩ icua ndibishoronda eã ño ñene. Mbia ja icua ndibishoronda chõ ñene. ³ Nande Dios cheẽ mumba eã mose, “Dios aicuate quia co” nande ra nandechiangui re cote. ⁴ “Dios aicuate quia co” i mose emo, Dios cheẽ mumba mose, ñee ñooño je chõ uqui nde. ⁵ Ae Dios cheẽ mumba eãte nae, uqui nguiatu nyesecuate nguiã Dios rese uqui. ⁶ Ae “aico tuchi Dios rese co” i quia nae, sã uqui siqui tuchi quiatu quia Jesús rã.

Dios cheẽ yasu

⁷ Dios cheẽ yasu eã ño ambesa nguiã jêje co, Sechesequa. Dios cheẽ ñiinda sí chõ ambesa mbesa nguiã jêje a. Jê echeẽ mumbayã sacua. Ae jeñandu nyii nae, uqui. ⁸ Jêingo Jesucristo icuate ã cote. Nyebe yasu raãte eriqui nguiã jêje. Jesucristo que nyesequa mbia rese ra. Jê abe jêingo nyesequa jenyiese ã cote. Itondaru eãte riqui jêje ã cote. Nyaashĩ ja chõ jêje cote re. ⁹ Nyaashĩ aico

co, i mose emo, nguesenda ucuãyã cuãyã mose, itondaru bei chõ siqui nguiã ùqui je aque. ¹⁰ Ae nyesequate quia nguesenda rese nae, ùqui ndiqui nyaashĩ mbei ùqui. Ùqui nda siqui icuã eã. ¹¹ Ae nguesenda ucuãyãte quia nae, ùqui ndiqui itondaru bei ùqui. Itondaru eresa chati chõ nguiã ùqui. Nyebe eriqui nguiã nguico icuayãte ùqui.

¹² Jesucristo riĩ ngue Dios jêicuã mbutiã jêsi ra, Seriirĩ. Nyebe aico nguiã co mbesa mbesa jêje a. ¹³ Ae siqui beite quia nyii nae, aque jêicuate quia ùqui, Mbiaru. Nyebe aico nguiã co mbesa jêje a. Jêingo mbia mbĩrĩ irĩsa riquisã quisã ùqui, Acuanindu. Nyebe aico nguiã co mbesa jêje a. Nanderu jêicuate quia ùqui, Echo. Nyebe aico nguiã co mbesa jêje a. ¹⁴ Ae siqui beite quia nyii nae, aque jêicuate quia ùqui, Mbiaru. Nyebe aico nguiã co mbesa jêje a. Jêirãtãte jêingo jeñiangui re ùqui, Acuanindu. Dios cheẽ ngue jêisi turãte jeñiangui re ra. Jêingo mbia mbĩrĩ irĩsa riquisã quisãte ùqui. Nyebe aico nguiã co mbesa jêje a.

¹⁵ Jenyesequate chĩ nda mbae ibi jenda ja rese jê. Mbae ibi jenda ja rese jenyesequa mose, jenyesequa eãte ra Dios rese. ¹⁶ Ibi jenda icuã ja chõ ñene. Nanderesa mbae icuã osei ose mose, eicuãte ùqui. Nanderete abe mbae icuã osei ose mose, eicuãte ùqui no. Nandecuasus abe nandesãã saã mose, eicuãte ùqui no. Ibi jendachõ ño ùqui nde. ¹⁷ Mbae icuã nda ua ja ibi jenda. Ae mbia chosei chosei quia ibi jenda nae, ùqui abe ra ua no. Ae Dios cheẽ mumba eãte quia nae, ùqui nguiã ra siqui bei.

Cristo ucuãyãsa

¹⁸ Achite mbae ñi ua ja a, Seriirĩ. Cristo ucuãyãsa ra tu mbia mbĩrĩ irĩ, i que jeñandu nyii, ngaẽ ngaẽte que cote ra. Nyebe ureico nguiã ñee, “mbae ra ua ja cote” i. ¹⁹ Cristo ucuãyãsa tubiriãte riqui ã. Nanderesenda rei que nyii ra. Nanderesenda choõño ño ngue ra. Nanderesenda tuchi mose, eĩ nda hui ãte rei nandesĩ. Hui chõ ngue echoi uresi ra. “Eresenda eã ño eriqui re” i sacuã mbia. ²⁰ Jêje quiatu que Cristo Espiritu Turã mondo nguiã. Nyebe jêingo nguiã mbae icua jate ùqui. ²¹ Ae bei, jenyẽ eã ño nguiã ichõĩñosa je ùqui. Dios quia ichõĩñosa reã tuchi re. Dios cheẽ jêicuate quia ùqui. Nyebe aico nguiã ã mbesa mbesa jêaquiatu je a. Eaquiãtuã je eã aico nguiã ã mbesa mbesa a. ²² ¿Aba chõ ichõĩñosa chã? “Dios chimondo eã ndei Jesús” ae i quia nae, ùqui ño ñene. Ae siqui sereãte quia Paba rui nae, Jesús abe rui nae, Cristo ucuãyãsa chõ ùqui nde. ²³ Ae siqui sereãte quia Dios riirĩ ndui nae, Dios abe rui eriqui ãte ùqui. Ae Jesús isi turã nguiã nae, eru abe eisi turã ño nguiã no. ²⁴ Ae rese jêingo jirandu beite nyii nae, ùqui ndese jêingo bei. Ùqui ique tuchi mose jeñiangui re, jêingo bei ra Dios riirĩ ndese. Eru rese abe no. ²⁵ Taemingo bei, i que nande je ra.

²⁶ Ae jembĩrĩ irĩ serĩte quia nae, ùqui nii ño aico nguiã ã mbesa mbesa jêje. Jembĩrandu sacuã. ²⁷ “¿Aba quiatu ra nandembaaquiãtu quiãtu re?” jenyẽ aroneate quia ùqui. Espiritu Turã ndiqui tuchi jeñiangui re jembaaquiãtu quiãtu ùqui. Jesucristo que emondo jêje ra. Ae chõ jembaaquiãtu quiãtu nguiã mbae ja riĩ ùqui. Ñee ñoõnoa tuchi chõ ñene. Cristo rese jêi ngo bei, Espiritu Turã ñee nguire.

²⁸ Seriirĩ, jêingo bei equia erese jê. Nandesiquicheã nda esi eru mose chã. Nandeireĩ nguiã nda eru mose no ña. ²⁹ Jesucristo quia rei eturã tuchi. Mbae raã turã ja bei. Ae mbae saã turã mbei quia nae, eriirĩ ño ùqui nde.

3

Seriirĩ, i Dios nande je

¹ Dios que nyesecua tuchi nanderese ra. Seriirĩ i tuchi que nande je ra. Nyebe mbia Dios quiatoã ndiqui nandeicua eãte ã. Dios abe icua eãte equia ã.

² Dios riirĩ ndei nande, Sechesequa. Dios ra nandembuturã tuchi core. Ũquĩ nandeicua eãte raque quia ã. Jesucristo tu mose, nandemae tuchi ra erese cote. Erã si ra nandeico tuchi cote. ³ “Jesucristo ra tu sembuturã” ae i icuate quia uchiangui re nae, ũquĩ ndiqui siqui turã tuchi ũquĩ. Jesucristo rã sí.

⁴ Mbae icuã naa naasa rei Dios cheẽ mumbasa. Eicuãte Dios cheẽ mumba.

⁵ Jesucristo que tu mo nandeicuã mbutiã nandesĩ ra. Mbae icuã ngue esaã jiri jiriã tuchi quia ra. Ũquĩ jẽicuate quia ã. ⁶ Ae siqui quia Jesucristo rese nae, ũquĩ nda mbae icuã mo saã eã. Ae siqui quia mbae icuã ndese, ũquĩ nguia eicua eãte nguia. ⁷ Seriirĩ, emo nda jembĩrĩ irĩchĩ ñee ñoõño jẽje jẽ. Ae mbae turã saã saã nguia, eturã ño ũquĩ nde. Jesucristo rã sí chõ ũquĩ nde. ⁸ Ae mbae icuã saã saã nguia, diablo rimba chõ ũquĩ nde. Diablo riqui mbae icuã naa naa mbei co. Cose ndare bei. Diablo chiao mbuquiachã sacua ño ngue Dios riirĩ ndu ra. ⁹ Nande Dios riirĩ mose, mbae icuã nandesã aroneate. Dios quiatu ngue ngueco mee nguia nande je. Nyebe nandeico nguia mbae icuã naa aroneate ã. Eriirĩte quia nande re. ¹⁰ Ae Dios riirĩ nae, ae Dios riirĩ ño nae, ũquĩ abe aba chiicuate. Emo nyesecua eã mose ngõngue rese, diablo riirĩ ño ũquĩ nde. Emo mbae turã naa naa eã mose, diablo riirĩ ño ũquĩ nde.

Nandechesequa chõ nguia nandechiese

¹¹ Cose ndare bei que jẽingo ã andu ra: nandechesequa bei chõ nguia nandechiese. ¹² Cain na nda jẽingochĩ jẽ. Diablo resenda chõ ae re. Nyebe ngõngue icua nguia. ¿Mbaerã ño ngõngue icua chã? Echisaã saã icuãte quiatu ngue eriqui nguia. Enongue chisaã nguiatu ngue eturãte riqui nguia. ¹³ Jesús quiatoã jẽucuãyã mose, jenyuruirate chĩ nda mae erese jẽ. ¹⁴ Nanderaaque rã eã ño nandeico nguia ã cote. Dios nandereco mingo tuchi quia co cote. Nandenongue rese nandeico nyesecua ã cote. Nyebe nandeico nguia “nanderaaque rã eã ño nandeico nguia ã cote,” i. Ae nyesecua eãte quia ngõngue rese, eraaque rã mbei tuchi chõ ũquĩ ndiqui nguia ũquĩ. ¹⁵ Emo ngõngue ucuãyã mose, mbia iquiasa rã tuchi chõ ũquĩ nde. Dios ra aba iquiasa mingo bei eã. ¹⁶ Jesús que mano nande je ra. Nyebe nandeico nguia “Jesús riqui nyesecuate nanderese co” i. Eĩ nande quiatu quia nyesecua nandenongue rese. Nandeteã teã eã ño mano sacua nandenongue rĩ. ¹⁷ Nandequeteã tuchi aroneate nandembae rese mbaecha reã mo je. Emo ia eã eã mose mbaecha reã mo ndese, ¿mañi ño nda equia nyesecua Dios rese uchiangui re? ¹⁸ “Aico nyesecuate mbia rese co” nande choõnochĩ nda equia jẽ. Mbae turã quiatu nandesã saã tuchi quia ee.

Nandeireĩ ireĩ eãte equia ñee Dios je ã

¹⁹ Nandechesequa mose mbia rese, Dios resenda quia nande re. Nandechiã ngoi turãte. ²⁰ Nandechiangui renda nandemundua ndua mose nandeicuã ndese, Dios quia rei equirãcuã tuchi ũquĩ sí. Ae quia mbae icua jate nguia. ²¹ Nandechiangui renda nandemundua eã mose nandeicuã mo ndese, nandeireĩ ireĩ eãte quia ñee Dios je ã. ²² “Mbae mo embu seje” nande mose Dios je, mondo ra nande je. Echeẽ nguia nandemumbayãte nguia ã. Nyebe ra emondo nande je. ²³ Æ ndei Dios cheẽ ã, nande emumbayã sacua

ã: “Serucucha jêicua Jesucristo jê. Jenyesequa chõ jenyiese Jesucristo cheê nguire jê”, i Dios quia nande je co. ²⁴Nande echeê mumbayã mose, nandeico beite quia erese ã. Ae abe riqui beite nanderese co. Espiritu Turã Dios mondo quia nande je nae, aque chõ nandembiirandu nguiã ùquĩ ndese. —Dios riqui beite jeñiangui re co, i Espiritu Turã nguia nande je co.

4

Eĩ nande ra Dios quiato icuã; Dios quiatoã abe icua

1—Aico Dios cheê nenei nenei co, i ja jate raque mbia quia ã. Ñee ñooñote quiatu nguiã ã. Ûquĩ ñee nda jêisi chooñochĩ nguia jê. —¿Ma Dios cheê nenei neneisa tuchi ma nde? jenye tuchi rã eicua nyii. ²“Jesucristo que tu ibate si mbiarã nda” i mose ùquĩ, Espiritu Turã ndiqui erese ùquĩ cote. Eĩ jenye ra eicua. ³“Jesucristo que tu mbiarã nda” i eã mose, Espiritu Turã siqui eã tuchi chõ nguiã erese. Cristo ucuayãsa chõ ùquĩ nde. Se rei Cristo, ichõĩño ño nguiã ã. Cristo ucuayãsa ra tu, i jeñandu quia nyii nae, aque riqui a cote. ⁴Dios resenda rei jê, Seririĩ. Ae siqui jeñiangui re co nae, ae quia rei equirãcuã tuchi ibi jenda si. Ae Dios cheê senei ñooño nguia nae, jê quiatu que jêquirãcuã tuchi ùquĩ si ra. ⁵Dios quiatoã ño ùquĩ nde. Ibi jendachõ ño ùquĩ nde. Ibi jendachõ ñi ño eriqui nguiã ñee mbia je. Mbia ibi jenda achõ ño echeê ñandu nguiã. ⁶Nande quiatu Dios resenda tuchi re. Ae Dios icua quia nae, ùquĩ ndiqui nandechêe andu ùquĩ. Ae Dios icua eãte quia nae, ùquĩ nguiatu nandechêe andu sereãte nguiã ùquĩ. Eĩ nande ra Dios quiato icua. Dios quiatoã abe icua.

Dios nyesequa tuchi mbia rese

⁷Sechesequa, nandechesequa ja chõ nandechiese jê. Dios chõ nandembuchesequa nguiã nandechiese. Nandechesequa mose nandechiese, Dios ririĩ ño nande re. Ûquĩ mose chõ nandeico nguiã Dios icua ã. ⁸Nandechesequa eã mose nandechiese, ã nguia nandeico nguiã Dios icua eãte ã. Dios quia siqui nguiã nyesequate nanderese co. ⁹Dios que nguiĩrĩ m̃ mbu ibii ra. Nandemingo bei tuchi sacua erĩ. Nyebe nandeico nguiã “Dios riqui nyesequate nanderese co” i. ¹⁰Dios ae nyesequa aquiature. Nande rane nguia nandechesequa eãte nguiã erese. Ae rane nguiatu ngue nyesequa nguiã nanderese. Nyebe nguiĩrĩ mondo nguiã nandechiese ndiquicharõ sacua. ¹¹Sechesequa, Dios nyesequa tuchite quia nanderese co resê. Nyebe nande abe quiatu nandechesequa nandechiese. ¹²Nandechesequa mose nandechiese, Dios riqui tuchi nandechiangui re co. Dios riqui nandembuchesequa tuchi nandechiese co. Aba mo mae eã ndaque erese.

¹³Ã nandeico tuchi Dios rese ã. Ae abe siqui tuchi quia nandechiangui re co. Espiritu Turã ngue Dios mondo nande je, ae chõ nandembiirandu nguiã ùquĩ ndese co. ¹⁴Dios que nguiĩrĩ mondo mbia rirõ ja sacua huicua si ra. Uremae ngue erese ra. Á ureico erenei nenei ja mbia je ã. ¹⁵“Jesús rei Dio s ririĩrĩ” nande i mose, Dios riqui tuchi nandechiangui re co. Ûquĩ mose nande abe nandeico tuchi erese ã. ¹⁶Dios riqui nyesequa tuchite nanderese co. Ûquĩ nandechiese tuchi quia ã cote. Nandechesequa bei mose Dios rese, ã nandeico tuchi erese ã. Ae abe riqui tuchi nandechiangui re co. ¹⁷Nandeico mose Dios rese, ae riqui nandembuchesequa uchiese co. Nandechesequa tuchi mose erese, nandeico siquicheate esi ã. Nandesiquiche ãte ra esi mbia icua mbasi mose. Nandembasi ãte ra mbia chabe. Jesucristo raate quiatu nandeico nguiã nande ã. ¹⁸Nandesiquiche mose Dios si, nandechesequa

tuchi ãte quiatu nguiã erese nandechiangui re ã. Nandechesecua tuchi mose erese, nandesiquicheã nda esi. Nandesiquiche mose Dios si, nandesiquiche chõ nda nandembasi. ¹⁹ Dios rane ngue nyeseccua nanderese nyii ra. Nyebe nande abe nandeico nguiã nyeseccua erese ã cote. ²⁰ “Acheseccua quia Dios rese co” i mose emo, ngõngue ucuãyã mose, ñee ñooño je chõ ùquĩ nde. Nandechesecua eã mose nandenongue rese, Dios abe rese chõ nandeico nguiã nyeseccua eã no. Dios rese quia nandeico nguiã mae aroneate. ²¹ ã i que ñee nande je ra: Ae nyeseccua quia Dios rese nae, sã nyeseccua ngõngue abe rese.

5

Jesús quiato “qui jẽ” i mbae icuã je

¹ “Dios chĩmondo rei Jesús” nande i mose, Dios riirĩ ño nande re. Emo ndese nandechesecua mose, eririĩ abe rese ra nandechesecua. ² Nandechesecua mose Dios rese, echeẽ nandemumba eã mose, Dios riirĩ ja rese abe chõ nandeico nguiã nyeseccua ã. ³ Dios rese nandechesecua mose, echeẽ nandemumbayãte quia ã. Echeẽ mbaranguiatuã eãte rigui nande je co. ⁴ Dios riirĩ mose nandẽ, ibi jenda icuã nandesiquisã quisã ño nguiã nandechesi ã. Nandeico Jesucristo icuate ã. Nyebe nandeico nguiã “qui jẽ” i mbae icuã ibi jenda je. ⁵ Jesús icuasa achõ nda “qui jẽ” i mbae icuã ibi jenda je. —Dios chĩmondo rei Jesús, i je ra “qui jẽ” i ibi jenda icuã je no.

Dios siqui ñee mbei Jesús quiato chiangu re

⁶ Jesucristo que tu ibii ra. I je que Juan bautizar i ee ra. Eruqui que uchẽ emano mose ra. Ûquĩ Espĩritu Turã senei senei nguia nande je ã. Ae ñee ñooño eãte quia co. ⁷⁻⁸ Tres rigui nandembiirandu randu Jesús rĩ ã. Espĩritu Turã nane. I abe no. Jesús ruqui abe no. Ûquĩ ja rigui nandembiirandu randu Jesús rĩ ã. Hue rĩ ja chõ ùquĩ tres rigui nguiã ñee. ⁹ Eĩ sí que Dios ñee Jesús rĩ nande je ra. “Ae bei”, nande chõ nguia ee. Sã nandeico mbia chee mo isi turã no. Dios chee nguiatu nandeisi turã tuchi. ¹⁰ Ae Dios riirĩ icua quia nae, ùquĩ je quia Dios rigui nguiã ñee mbei echiangu re Jesús rĩ. Ae “eno” i ãte quia Dios chee je nae, “ichõĩñosa chõ Dios chee nde”, isa chõ ùquĩ nde. “Eno” i ãte quiatu nguiã Dios ñee mose Jesús rĩ. ¹¹ Dios nandemingo bei quia co. Nguiirĩ nĩ ño eriqui nguiã nandemingo bei co. Ûquĩ nĩ ño Dios rigui nguiã ñee nande je. ¹² Ae chiangu re Dios riirĩ ndiqui nae, ùquĩ nda Dios mingo bei. Ae chiangu re eriqui eãte nae, ùquĩ nguiatu ra emingo bei eã.

Juan embesa hui bei

¹³ A aico ã mbesa jẽje a. Dios riirĩ icuasa je a. “Dios ra semingo bei” jenje sacua eicua jeñiangui re. ¹⁴ Nandesiquicheã nguia ñee Dios je ã. “Mbae mo embu seje”, i mose ee, mondo ra nande je. Nandendua mose ae rã sí, mondo ra nande je. ¹⁵ Nande ache i mose ee ra nandeandu. “Aque embu seje”, i mose ra emondo nande je. Nandeico ùquĩ icuate ã. ¹⁶ Nandemae mose nandenongue rese mbae icuã naa naa mose, nandechẽ Dios je erĩ. Dios ra emingo turã cote. Aque mĩ mbae icuã ndiqui mbia mbuquiachã icuã mbei co. Emo aque icuã naa mose, “jeñee Dios je erĩ”, ae ãte quia jẽje co. Ûquĩ nda quiachã mbei chõ. ¹⁷ Mbae icuã naa naa mose rei eicuã tuchi. Aque mĩ mbae icuã nguiarei mbia mbuquiachã mbei mondo tata cuãsuu.

¹⁸ Dios riirĩ mose nande, nandeico ãte quia mbae icuã ndese ã. Jesús riqui nanderaarõ mbeite mbae icuã si co. Satanás nandembĩcuã eã sacuã.

¹⁹ Nande rei Dios resenda. Ũquĩ nandeicuate quia ã. Mbia ataque quiarei Satanás ndesenda tuchi. Eicuã ndesenda tuchi. ²⁰ Dios riirĩ ngue tu nandembaaquiato sacuã Dios rĩĩ nda. Dios ichõĩñosa reã nĩi. Ichõĩñosa reã ño eririĩ abe no nde. Ae rese nandeico tuchit e quia ã. Aba mingo beisa chõ ae re.

²¹ Seririĩ, Dios aba reã ndese ra jẽingochĩ. Amén.

SEGUNDA CARTA DEL APOSTOL SAN JUAN

Achesequate jendese, i Juan

¹ Juan ndei se. Ameite se. A aico ã mbesa mbesa ndeje a, Ari. Dios chiirabo tuchi chõ nde re. Nderiirĩ je abe aico ã mbesa mbesa a. Co aico nyesequa tuchi jendese co. Dios rese quia jẽingo tuchite nguiã ùqui. Nyebe Dios quiato riqui nguiã nyesequa jate jendese ùqui. ² Achesequa tuchite quia jendese co. Dios cheẽ nguiatu siqui beite quia nandechiangui re co.

³ Dios rei nanderu. Jesucristo rei eririĩ. Sã ùqui ndiqui turã jendese. Sã ùqui ia eã tuchi riqui jendese. Sã ùqui ndiqui jembia bei tuchi. Ùqui ndiqui nyesequa tuchi jendese ùqui. Ùqui ñee ñooño eã tuchi quia ùqui.

⁴ Nderiirĩ mo ngue chi tuchi Dios cheẽ ndese seje ra. Seya tuchi que ùqui mose ra. ⁵ Nandechesequa ja chõ nguia nandechiese. Dios cheẽ yasu eã ño ã nde. Dios cheẽ ñiinda bei chõ ñene. ⁶ Nandechesequa mose nandechiese, nandeico Dios cheẽ ndui sí ã. —Jenyesequa chõ jenyiese, i quiatu ngue Dios nande je re. Cose ndare bei chõ jẽingo nguiã ùqui andu ã.

Aba mbiriĩ irĩsa

⁷ Mbia tubiriã ndiqui aba mbiriĩ irĩte ã cote. Jesucristo que tu ibate si mbiarã nda, i sereã nea. Cristo ucuayãsa, i chõ ùqui je re. Aba mbiriĩ irĩsa, i abe que ùqui je ra. ⁸ Cochee chõ jẽingo. Mbae jẽsaã iru iru eã sacua Dios je. Ùqui mose ra Dios jenyisaã sibishorõ turã tuchi jẽje. ⁹ Emo icha mose Cristo cheẽ si, Dios resenda eã ño ùqui nde. Emo siqui bei mose Cristo cheẽ ndese, Dios resenda tuchi chõ ùqui nde. Cristo resenda abe no. ¹⁰ Emo mbia mbaaquiato quiato mose Cristo cheẽ ndui si eã, ùqui jẽisi turã eã ño nguia jenyuchúaa. Jeñee turã turã aroneate ee. ¹¹ Ae ñee turã nguia ee ùqui ñi nae, ae abe chõ eicuã ndiqui nguiã erã sí.

Juan embesa hui bei

¹² Mbae tasenei ja tuchi jẽje, ae rei que se ra. Ambesa oco sereãte mondo jẽje. Tambuchecua tuchi chõ oso ñee jẽje, ae que se ra. Nandeya tuchi sacua nandechiese.

¹³ Dios chiirabo tuchi chõ ndenongue re. Eriirĩ ja saludos mundo quia ndeje aque. Amén.

TERCERA CARTA DEL APOSTOL SAN JUAN

Gayo turâte que eriqui Dios je ra

¹ Juan ndei se. Ameite se. A aico ã mbesa mbesa ndeje a, Gayo. Aico nyesequa tuchite nderese co. ² Sechesequa, acheẽ mbeite quia Dios je nderĩ co. Dios nemingo turã sacua. Nderete abe mingo turã sacua no. Sã ereico siqui tuchite Dios rese no. ³ Seya tuchi que jirandu mose nderese ra. Nanderesenda mo ngue ngaẽ sembiirandu nderese ra. —Gayo riqui tuchi Dios rese aque, i que sembiirandu ra. ⁴ —Nderiirĩ nyi tuchi Dios rese pee, i mose seje, sembia beite equia co. Ûqui nguiatu sembia tuchi nguiã mbae mo si co.

⁵ Sechesequa, ereico turã tuchi nanderesenda je huee. Ishonda je abe no. Mbae turã eresaã saã mbeite quia ee huee. ⁶ Urechumunua mose que Dios quiato mo urembiirandu ndeturã ndese ra. —Nyesequa tuchi que urere ra, i que euaẽ ñee ure je ra. Mbae turã emondo mondo bei ee, embucuata turã sacua. Eĩ mose ra Dios ia tuchi nderese. ⁷ Jesús rĩ nguiatu ùqui ndiqui nguiã ngata mbia mbaaquiato quiatu. Mbae mo nda eisi chooño eã Jesús icuasa reã mo si. ⁸ Nyebe nande chõ mbae nandemee mee ee. Dios cheẽ nenei neneisate quia ùqui nde.

Diótreres ucuasu raã ñooño

⁹ Papel jua que ambesa rei mondo jeñumunua ji je ra. Diótreres quiatu seosei chiãte nguiã. —Se miĩ ño ererecuarã, ite. ¹⁰ Huee seso mose ra Diótreres icua asenei jẽ ja je. Ae icua esaã ure je nae, ùqui. Nanderesenda abe isi teã teã nyee. Emo eisi turã sete mose, ñee asi asi chõ nguiã aque abe je no. Mombo chõ nguiã hue si no. ¹¹ Sechesequa, ereicochĩ nda eicua mo ndui. Eturã ndui chõ eico. Eturã nduinda quiarei Dios resenda. Ae siqui quia eicua ndui, ùqui ndei Dios resenda eã.

Eturã tuchi, i Demetrio je

¹² Demetrio quiarei eturã tuchi. Co eriqui tuchi Dios rese co. Mbia ja abe ñee turâte quia erĩ ùqui. Se abe acheẽ turâte quia erĩ co. Acheẽ ñooño ate que se quia jẽje resẽ.

Juan embesa hui bei

¹³ Mbae tasenei ja tuchi ndeje, ae rei que se ra. Ambesa oco sereãte mondo ndeje. ¹⁴ Namó jiri ra amae nderese reae. Aque mose ra nandechẽ tuchi nandechue. ¹⁵ Sã Dios nembia turã mbei mingo. Nandequiato a jenda ja saludos mundo quia ndeje aque. Saludar ere sequiato hue jenda ja je.

LA CARTA DEL APOSTOL SAN JUDAS

Judas embesa Dios chiirabo je

¹ Judas rei se. Jesucristo rimba. Jacobo nongue rei se. Ñ ambesa quia jêje a. Dios chiirabo je. Dios que jêirabo ñno icúe umbaerã nda. Dios riqui nyesecua tuchi jendese co. Dios riqui jenderecoquiato bei Jesucristo mbaerã co. ² Sã Dios riqui ndua bei jendese. Sã eriqui jembia bei. Sã eriqui nyesecua bei jendese.

Ae Jesús quiato saã ññoõ nguia

³ Jesucristo nandemingo beisa riñ ngue ambesa seese rei nguiã jejê. Ae mbia mbaa tambesa jêje. Jêingo eã nonde erese. Ûquĩ ñee icuã icuã mose Dios cheê ñii, echeê jêsibishorô. —Dios cheê tuchi chõ ñene, jenyê tuchi quiato quia Dios cheê ndiquisã quisã mbia icuã si. Dios quiato ngue ucheê mondo ja nguiã nguesenda ja je. ⁴ Dios quiato raã naasa mo ndiqui mbia mbaaquiato icuã icuãte ùquĩ. Ûquĩ siquĩã tuchi chõ nguiã Dios rese ùquĩ. —Sã Dios riqui aba icuã mbutiã uturã je c o no jê. Nyebe mbae icuã nandesã i i chõ jê, i chõchĩ nguiã ùquĩ. Jesucristo cheê ndui eã tuchi chõ ùquĩ nde. Nandererecua cheê ndui eã. Cosete que Dios ùquĩ mbicúe embasi sacua nda. Mbasì mbasì bei ra equia cote.

⁵ Mbae tasenei na jêje. Jêicuate raque. Taemunduabe erese. Dios ngue judíos sirô ja rei nguiã Egipto si cose. Mbia hue jenda icuã icuã mose ee. Ûquinde que siqui sereã Dios rese cote ra. Nyebe Dios eiquia nguiã. ⁶ Sã ángeles mo je Dios ñee ndei no jê. “Aa jêingo aa”, sã i rei ee no jê. Sã Dios cheê mumba chõ no jê. Sã Dios riqui etarõi nderequia itondaruqui re co no. Embasi mbasi bei sacua cote. ⁷ Sã Sodoma jenda no. Sã Gomorra jenda no. Sã ùquĩ ndurubinda ja no. Siqui choõño eã. Mbae icuã naamba amba. Siqui siqui emo ninisi rese. Eruã mo ndese abe no. Nyebe que Dios ùquĩ mombo tata cuásuu ra. Mbae rasi ra esaã mbei u huee cote. Mbia mundua ndua sacua ñno ùquĩ nde.

⁸ Ae Dios quiato saã saã nguia nae, ùquĩ ndiqui ndua icuã icuã mbei ùquĩ. Nyebe eriqui nguiã nguete mbicua ùquĩ. Aba cheê mumba. Ñee icuã ángeles ibatenda abe riñ no. ⁹ Sã Miguel ángel rerecua no. Sã ñee asi asi nyue diablo rese no. Moisés rete riñ. —Mbae icuã tasaã ndeje, i eã ngue diablo je ra. —Dios quiato ra mbae rasi saanguquia ndeje, i chõ ngue ñee diablo je ra. ¹⁰ Ae Dios quiato saã saã nguia nae, ùquĩ ndiqui ñee ññoõ mbae uchicuaayã ñi ã. Ae eicuate quia mbae nae, ùquĩ ndese siqui turã eã. Siqui choõño eã ùquĩ ndese. Nyebe ra Dios embasi tuchi cote. Quiaa rinda quia mbae icua jiri nguiã ùquĩ si. ¹¹ Aba mbia eã tuchi chõ ùquĩ nde. Caín na tuchi chõ eriqui nguiã mbae icuã naa naa ùquĩ. Balaam abe rã si chõ eriqui nguiã icha icha Dios si ùquĩ. Mbae isiquia achõ ndese siqui sacua. Aba cheê mumba mumba bei chõ nguiã Coré rã ùquĩ. Nyebe ra Dios mbae rasi saanguquia ee Coré rã si. ¹² Ae Jesús quiato saã saã nguia nae, aba irenguia tuchi chõ ùquĩ nde. Jeñumunua nua mose quiaru sacua nyiese, ùquĩ ndiqui quiaru choõño ñno ùquĩ. Mbae abe mbei choõño. Ico choõñoa abe mbia mo je. Mbia reaquiatusa mo na eã. Nguete mii ñno ùquĩ teaquiato nguiã ùquĩ. Sã ibei rondei riqui raque pã

i mose no. Sã eriqui nyyaaquíã no jẽ. Sã quiririã ndiqui ibei rondei rerao no jẽ. Ũquí na ño Dios quiato raã naasa riqui nguiã ã. Mbae iabae je rã abe chõ eriqui nguiã ã. Ira shii rã abe no. Ira riqui ji rã abe no. ¹³ Ama ndebera rã abe chõ ũquí ndiqui nguiã ũquí. Mbia mbaaquiato quiatu mose, i richoi rã ño ũquí nde. Sã nyasitata riqui oso ngũenda recha no. Eĩ si chõ ũquí nguiã ũquí. Nyebe ra mbae rasi raã tuchi itondaruqui re.

¹⁴ Enoc abe que ñee ũquí icuã nii nda. Adán ndiirĩ nducucha rei ae. Eĩ ngue ñee nda: “Dios ra tu ngũimba tubiriã ndese. ¹⁵ Mbia icuã mbasi ja ra eu. Ae icuã mbia saã saã nguia nae, ũquí ndese ra mae ja. ‘Mbae icuã asaã ãte resẽ’, i aroneate ra ũquí cote. Ae ñee icuã nguia Dios riĩ nae, Dios ra echeẽ icuã senei a e sí je cote. ‘Eĩ ere que equia ñee icuã serĩ nda’, i ra Dios ee. Echisaã icuã tuchi chõ ũquí nde”, i que Enoc ñee cose ra. ¹⁶ Echiichati tuchi chõ ũquí nde. Ñee icuã mbei equia emo nii ũquí. Ae rese eriqui sete nae, ũquí mii ndese chõ eriqui nguiã ndua ũquí. Ucuasu raã ñooño. Uchuru mondo chooño. Ñee turã abareã nea emo je. Mbĩrĩ irĩ ño nguiã ñee turã abareã nea ee.

Ã jẽsaã saã, i Judas Jesús quiato je

¹⁷ Jẽ nguia rei Jesús quiato tuchi. Jesús chimbaaquiato cheẽ si jẽtesarei eã. Ã ndei echeẽ ã: ¹⁸ “Mbae ua ja nonde ra mbia iquia iquia Dios cheẽ je. Ae icuã ndese eriqui sete nae, ũquí mii ndese chõ nda eriqui nguiã ndua”, i que Jesús chimbaaquiato ñee cose ra. ¹⁹ Mbia mbuqueta quetasa tuchi chõ ũquí nde. Ae ebite mbae icuã nae, ũquí ndese achõ ño eriqui nguiã ndua. Espiritu Turã siqui ãte echiangui re. ²⁰ Jẽ nguia jeñimbirãcuã tuchi quia Dios rui. Dios jẽicua tuchi. Jeñee mbei Dios je. Sã Espiritu Turã ndiqui jembucheẽ mbei Dios je. ²¹ Jẽingo bei quia Dios rese. † nda jeñee. —Nyesecua tuchi chõ equia nanderese re, i. Jesucristo ia eã tuchi que nanderese ra. Nyebe ra nandemingo bei tu mose. Ũquí jẽsaarõ mbei quia. ²² Ae Dios tiisu isu quia nae, ũquí jembuti mbuti quiato quia Dios cuti. ²³ Mbia icuã mo abe jemingo Dios rese. Tata si erirõ naanguia jemingo Dios rese. Eicuã tuchi raque. Jẽingo tuchi quiato quia Dios rese. Ũquí icuã uba eã sacua jendese.

Judas ñee turã Dios riĩ

²⁴ Dios mii ño jendeaquiato bei nguiã jembucha eã sacua. Dios mii ño jeñiangui renda icuã mbuchicuabo nguiã jemingo sacua uchiese. Dios mii ño jembia bei nguiã no. ²⁵ Dios mii ño mbae icua ja nguiã. Dios mii ño nandemingo bei nguiã Jesucristo riĩ no. Ae je ra mbia ñee turã mbei quia. Ae rei eturã tuchi. Ae rei ererecua tuchi. Ae rei equirãcuã tuchi. Eĩ mbei chõ ae re. Amén.

APOCALIPSIS O REVELACIÓN A SAN JUAN

Jesucristo mbae mbuchecua

¹ Juan ño se re. Mbae tasenei jêje. Ae ra nyecua namo nae, ùquĩ tasenei jêje. Dios rane ngue embuchecua Jesucristo je ra. Jesucristo que ángel mbu sembiirandu sacua ere se cote ra. Se jembiiirandu sacua ere se cote. ² Nyebe aico nguiã Dios cheẽ mbuchecua checua jêje co. Ae Jesucristo senei senei nguia seje nae, ùquĩ ño asenei senei nguiã jêje co. Ae rese semumae nae, ùquĩ abe chõ asenei senei nguiã jêje co. ³ Ae ra mae mae nguia sechimbese rese nae, Dios turã tuchi ra eriqui ùquĩ je. Ae ra nyiisaquia turã sechimbese rese nae, Dios turã tuchi ra eriqui ùquĩ je no. Achite secheẽ ñi ique a cote.

Juan ucheẽ mbesa mondo siete iglesias je

⁴ Se rei Juan. Jê siete iglesias Asia jenda je aico ã mbesa a. Sã Dios riqui uturã ndeacuquia cuquia jêje. Sã Dios riqui jembia bei mingo. Ae chõ siqui bei nguiã co. Ae siqui beite quia nyii no. Ae ra tu emo mose no. Sã Espiritu Turã abe riqui uturã ndeacuquia cuquia jêje. Ae chõ siqui nguiã mangue chooñoa ja co. Mbae raã naa Dios je. ⁵ Sã Jesucristo abe uturã mee jêje. Ae que nandembiirandu turã tuchi Dios rese ra. Ae rane ngue quera si manonde ra. Ae quia rei equirãcuã tuchi mbia rerecua mo si. Ae riqui nyesequa tuchite nanderese co. Ae que nandembui nandeicuã si nguqui je ra. ⁶ Ae que nandemingo bei ngu res e erimbarã nda. Nande mbae raã naa sacua Dios je. Sã mbia riqui ñee turã turã mbei Jesucristo je. Ae ra ererecua bei. Amén. ⁷ Jesucristo ra tu ibei si. Mbiamae ra mae ja tuchi equichi rese. Mangue jenda chooñoa tuchi ra mae ja ere se. Ae Jesús iquia nyii nae, ùquĩ abe ra mae ere se no. Mbiamae ra siquichete nyeseo mae mose ere se. Ae bei. Amén.

⁸—Co aico beite querabe co. Mbae eã mose que aico se rane nyii ra. Mbae ua ja mose abe ra aico bei querabe no, i que Dios ra. Equirãcuã mbeite riqui co. Ae chõ siqui bei nguiã co. Ae siqui beite quia nyii. Ae ra tu sí emo mose.

Juan mae Jesús rese cuu

⁹ Se rei Juan. Jendesenda chõ se re. Nandeico ñimbirãcuã jate mbiamae icuã icuã mose nande je ã. Jesucristo riĩ. Ae sí chõ nandembiirãcuã nguiã co. Ae sí chõ nandererecua ja riqui nguiã co no. Ama ndisha joõ ngue mbiamae sereru aa ra. Aa semingo isho mbiamae si a. Se Dios cheẽ nenei nenei eã sacua. Mbiamae mbiirandu eã sacua Jesucristo rese. Patmos, i que a ejoõ acua je ra. ¹⁰ Aa serese mose que Espiritu Turã mbae reacuquia seje cuu ra. Domingo mo mose. Emo ngue ñeemombo seje sequite quiti cuu ra. Echeẽ ngue serasate ra. ¹¹—Se ae que aico bei mbae eã mose nyii resẽ. Mbae ua ja mose abe ra aico bei no, i que seje ra. —Ae ra eretea cuu nae, ùquĩ embesa papel rese. Ndechimbese emondo rã siete iglesias Asia jenda je. Efeso, Esmirna, Pérgamo, Tiatira, Sardis, Filadelfia, Laodicea. Ùquĩ jenda ja je ndechimbese emondo, i que ñee seje cuu ra.

¹²—¿Aba ñee nguia seje re? ae que uba mae nda. Siete candeleros oro ao ji rese que amae nda. ¹³ Ùquĩ ite re que mbiamae raanguia mo ñi juã nda. Dios riirĩ ño eriqui reaẽ. Huirao oco que ecunua nda. Eichuã ati tuchi que eirao ra. Oro ao ji chõ ngue eishia cuasa ra. ¹⁴ Eashĩ tuchi que ra. Tata rendi rã tuchi

que eresa ra. ¹⁵ Ei nininyate que ra. Bronce rã. Ama ndieu rã ño ngue echeẽ nda. ¹⁶ Nyasitata siete que equereco oo ra. Uquiatocuti que ererequia ra. Espada que equereco uchúruu ra. Erimbe tuchi que ra. Erimbe chobei que ra. Eruba nininya tuchi que ra. Sã tenda nininyate riqui nandeite re mose no.

¹⁷ Semae mose erese que sesiquiche tuchi ra. Mbia raaque rã ngue aso ngoi ejii ra. Oco que serese oo uquiatocutinda je ra. Ñee ngue seje ra. — Eresiquichechĩ nguiã sesi. Ae siqui beite quia querabe nae, ae chõ se re. ¹⁸ Seraaque rei que nyii ra. Aico bei querab e co cote. Mbia mingo beisa chõ se re. Secheẽ mose ra mbia mano. Secheẽ mose ra mbia riqui bei querabe no. ¹⁹ Ae rese eremae nae, ùqui embesa rã. Ae atecuquia cuquia quia ndeje namo nae, ùqui abe embesa no. Ae ra nyecua nyecua emo mose nae, ùqui nonde embesa jei rã. ²⁰ Siete candeleros rese que eremae namo, siete iglesias rã ño ùqui nde. Siete nyasitata rese que eremae séoo, siete iglesias rerecua rã ño ùqui no nde. Jesús quiato rerecua rã ño ùqui nde, i que ñee seje ra.

2

Cristo ucheẽ mondo uquiato Efeso jenda je

¹ Jesús que ñeembe seje ra. — Dios quiato rerecua Efeso jenda je ã embesa rã. ã embesa rã mondo ee: “Cristo que ñee jêje ra. Ae siete nyasitata quereco oo nae, aque. Ae ngata quia siete candelero ite rĩ nae, aque sí chõ ñee nguiã jêje aque. ² ã ngue Cristo ñee jêje ra: ‘Jenyisaã turã aicuate quia co. ã jêingo quiei quiei tuchite seje ã. Jeñimbirãcuã tuchite quia mbae icuã sí ã. ã jêingo jiri jiriãte mbia icuã ndese ã. Ae sequiatio rerecua saã ñooño nguia nae, jê ngue ùqui jêisiã nda. “Ma Jesús quiatote”, jenyje turã tuchi que ra. “Ichõĩñosa chõ ñene” jenyje chõ ngue eriã nda. ³ Jeñimbirãcuã turãte que equia ra. Mbae rasi que jêsaã nguia serĩ nda. Jêquiei quiei tuchite que seje ra. Jêhui eã mbeite equia sesi ã. ùqui jêsaã turã jate rei nguiã ã. ⁴ ã nguiatu sembia eãte nguiã ã. Jenyesequa eã jirichĩ equia serese jê nguiatu ã cote. Seicua ramo mose que jêote serese nyii. Jenyesequate que equia serese nyii. Eĩ jenyje eã ñochĩ equia ã cote. ⁵ Jendua rã ùqui ndese ae. Jenyesequabe jiri serese ae. Jemba eã mose serese, jaembutiã nda u. Sequiatio eã nda jê cote, jemba eã mose serese. ⁶ ã abe sembiante quia jendese ã. Ae siqui quia Nicolás rese nae, ùqui nyisaã jêcuãyãtequia ùqui. Se abe aucuãyãte quia co no. ùqui nyisaã icuãte riqui ùqui. ⁷ Jêisa mose, Espíritu Turã ñee jeñandu rã. Ae Espíritu Turã ndiqui ñee iglesias je nae, ùqui jeñandu rã: Ae “qui jê” i beite quia Satanás quirãcuã je nae, ùqui nda amingo turã mbei ibate Dios rese’, i que Cristo jêje ra”, ere chõ embesa mondo sequiatio Efeso jenda je.

Cristo ucheẽ mondo uquiato Esmirna jenda je

⁸ Dios quiato rerecua Esmirna jenda je ã embesa rã. ã embesa rã mondo ee: “Cristo que ñee jêje ra. Ae rane ño ngue siqui bei mbae eã mose nyii ra. Mbae ua ja mose abe ra eriqui bei no. Ae que mano ndei nyii ra. Manonde eriqui beit e co no. Aque sí chõ ñee nguiã jêje co. ⁹ ã ngue Cristo ñee e jêje ra: ‘Jenyisaã turã aicuate quia co. Mbia icuã icuãte riqui jêje serĩ ùqui. Mbaecha reãte jêingo ùqui. Dios quiatu siqui tuchite nguiã jendese co. Ae Dios chiirabo saã ñooño nguia nae, ùqui ndiqui ñee icuã mbeite jeni ùqui. Satanás chiirabochõ ño ùqui nde. ¹⁰ Ae ra jêsaã saã mbae rasi nae, ùqui mo

si ra jēsiquichechĩ jē. Satanás nda jemo tarō mii. “Ma nyao Dios si”, i sacua ño ũquí nde. Diez días ra jēingo mbae rasi raã naa. Ũquí mose, jēingo bei Dios rese. Mbia ra jēiquia serĩ. Ũquí mose nda jaemingo bei Dios rese cote chã. ¹¹ Jēisa mose, Espiritu Turã ñee jeñandu rã. Ae Espiritu Turã ndiqui ñee iglesias je nae, ũquí jeñandu rã: Ae “qui jē” i beite quia Satanás quirãcuã je nae, ũquí nda Dios mondo eã tata cuásuu’, i que Cristo jēje ra”, ere chõ embesa mondo sequiato Esmirna jenda je.

Cristo ucheẽ mondo uquiato Pérgamo jenda je

¹² Dios quiato rerecua Pérgamo jenda je ã embesa rã. ã embesa rã mondo ee: “Cristo que ñee jēje ra. Ae espada rimbe chobei queroco nae, aque sí chõ ñee nguiã jēje co. ¹³ ã ngue Cristo ñee jēje ra: ‘Sucha tubiriã jendecua aicuate quia co. Mbia hue jenda siqui tuchite quia Satanás ndese ũquí. Jē ae chõ jēingo nguiã serese ũquí. Jēhui eãte equia sesi ũquí. Mbia icuã sequiato iquia raque huee jendécuaa. Antipas, i rei ngue aque sequiato je re. ¹⁴ ã nguiatu sembia eãte nguiã ã. Balaam na tuchi chõ jemo jemo ndiqui nguiã ũquí. Balaam nguiarei Balac mbaaquiato icuã icuã nyii. Balac Israel jenda mbũcuã icuã nonde. Nyebe Israel jenda riqui nguiã siqui tuchi cuña icuã ndese. Dios abareã ndese abe no. Jemo abe chõ mbia jembũcuã icuã nguiã ũquí. ¹⁵ Ae siqui quia Nicolás rese nae, ũquí mo siqui chõchĩ nguiã jendese ũquí. Ũquí ñee aucuãya tuchi quia co. ¹⁶ Jendua si rã jēicuã ndese. Nicolás resendanda jemombo chõ. Jemombo eã mose ra achu icuãte ee. Co espada arco sechúruu co nae, aque ra arco reco tuchi erese. ¹⁷ Jēisa mose, Espiritu Turã ñee jeñandu rã. Ae Espiritu Turã ndiqui ñee iglesias je nae, ũquí jeñandu rã: Ae “qui jē” i beite quia Satanás quirãcuã je nae, ũquí nda amingo tuchi Dios cheẽ ndese. Dios cheẽ nda ũquí mingo bei. Ũquí je ra sitashĩ ñetē mo amee. Sita ñetē ndese ra nombre yasu ambesa mii. Eme sacua ee. Emo nda sechimbesa icuayãte nombre yasu. Ae je ra amee, ũquí achõ nda eicua’, i que Cristo jēje ra”, ere chõ embesa mondo sequiato Pérgamo jenda je.

Cristo ucheẽ mondo uquiato Tiatira jenda je

¹⁸ Dios quiato rerecua Tiatira jenda je ã embesa rã. ã embesa rã mondo ee: “Dios rucucha que ñee jēje ra. Ae resa tata rendi saãte quia nae, aque. Ae i nininyate eriqui bronce rã nae, aque sí chõ ñee nguiã jēje co. ¹⁹ ã ngue Cristo ñee jēje ra: ‘Jenyisaã turã aicuate quia co. Jenyesequate quia mbia rese ũquí. Mbae jēsaã saã turãte quia Dios je ũquí. Ũquí jēingo Dios icua tuchite ũquí. Jēñimbirãcuã turãte equia mbae icuã si ũquí no. Jenyisaã turã tuchite riqui cose ndare si ũquí. ²⁰ ã nguiatu sembia eãte nguiã ã. Jezabel naanguia siqui chõchĩ nguiã jendese ũquí. ¿Mbaerã aque cuña jēteachõ nde? Emombo rocoĩ jenyese. Dios cheẽ esenei senei ñooño ño nguiã aque. Sequiato mbaaquiato icuã icuã ño nguiã aque. Sequiato mingo chooño ño nguiã cuña icuã ndese aque. Sequiato mingo chooño ño nguiã dios aba reã ndese aque no. ²¹ Jezabel naanguia que atiisu isu chõ nyii ra. “Sã ndua sí huũcuã ndese. Sã eriqui chooñoa mbia rese”, ae rei que se nyii ra. Hui eã mbei chõ equia ũquí si aque re. ²² Nyebe ra ambasi tuchi cote. Ae siqui siqui quia erese nae, ũquí abe ra mbae rasi saã tuchi cote, ndua si eã mose huũcuã ndese. ²³ Ae siqui Jezabel icuã ndui nae, ũquí abe ra aiquia. Ũquí mose ra sequiato jirandu ja sequirãcuã ndese. “Jesús mbia chiangui renda icua ja chõ nguia re. Mbia ndua ndua

eicua ja chõ nguia re”, i ra sequiato serĩĩ cote. Jẽingo bei mose mbae icuã ndese, se abe ra mbae icuã amee jẽje. ²⁴ Ae siqui eã nguia Jezabel cheẽ ndui jemo nae, ùquĩ je chõ tacheẽ cote. Jẽ nguiatu que jeñĩmee àte Satanás je ra. Nyebe ra acheẽ tuchiã jẽje. “Mbae mo ndese ra jẽingochĩ jẽ”, ae eã nda jẽje mbae mo nũĩ cote. ²⁵ Ae jẽicuate quia serĩĩ nae, ùquĩ ndese jẽingo bei querabe. Achu chee nda jẽje chã. ²⁶⁻²⁷ Sã seru uquirãcuã me e seje no. Ae ra secheẽ mumbayã mbeite quia nae, ae ra “qui jẽ” i beite quia Satanás quirãcuã je nae, ùquĩ je ra sequirãcuã amee tuchi. Ùquĩ nda mbia rerecurã cote. Ùquĩ nda mbia icuã mbasi mbasi tuchi quia cote. Sã emo ñio iquia iquia ira je no. ²⁸ Nyasitata turã na nda aico ùquĩ je. ²⁹ Jẽisa mose, Espĩritu Turã ñee jeñandu rã. Ae Espĩritu Turã ndiqui ñee iglesias je nae, ùquĩ jeñandu rã’, i que Cristo jẽje ra”, ere chõ embesa mondo sequiato Tiatira jenda je.

3

Cristo ucheẽ mondo uquiato Sardis jenda je

¹ Dios quiato rerecua Sardis jenda je ã embesa rã. ã embesa rã mondo ee: “Cristo que ñee jẽje ra. Ae siete nyasitata quereco oo nae, aque. Ae rese Espĩritu Turã ndiqui nae, aque. ã ngue Cristo ñee jẽje ra:

Jenyisaã aicuate quia co. Mbia raaque raãte chõ jẽingochĩ nguia ùquĩ. Siqui eã Dios rese. Jẽingo arõte raque equia Dios rese mbia je ùquĩ. ² Secheẽ ndese jenyiisaquia rã. Jeñĩmbirãcuã ño nguia siqui i Dios rese. Jẽhui serĩ serĩte chõchĩ nguia Dios si ùquĩ. Jenyisaã ndese aico mae maete co. Jenyisaã saã icuãte riqui Dios je ùquĩ. ³ Jendua jiri mbae rese ae. Ae rese jeñĩmbaaquiato nae, ùquĩ ndui jẽingo tuchi jiri ae. Jẽicua si jẽhui tuchi jiri ae. Jẽ secheẽ mumba mose, jaembuate ra ngasẽ jẽje. Jendua eã mose ra asochĩ jẽje re. Sã mbae mbuquiachãsa riqui aba mbuate no. ⁴ Jemo mũĩ mũĩ mbae icuã saã saã eãte quia ùquĩ. Ùquĩ ño nda siqui bei serese. Eiraoshĩ nda amee ùquĩ je. Mbae icuã ndese quiatu que eriqui oco oco àte ra. ⁵ Ae “qui jẽ” i beite quia Satanás quirãcuã je nae, ùquĩ nda huĩraoshĩ quereco quia serese. Ùquĩ nda siqui bei serese ibate. Ùquĩ mbae nombres ra achusi eã mbei. “ã ndei sequiato tuchi ã”, ae ra Paba je. Angeles abe je. ⁶ Jẽisa mose, Espĩritu Turã ñee jeñandu rã. Ae Espĩritu Turã ndiqui ñee iglesias je nae, ùquĩ jeñandu rã’, i que Cristo jẽje ra”, ere chõ embesa mondo sequiato Sardis jenda je.

Cristo ucheẽ mondo uquiato Filadelfia jenda je

⁷ Dios quiato rerecua Filadelfia jenda je ã embesa rã. ã embesa rã mondo ee: “Cristo que ñee jẽje ra. Ae ñee ñooño eãte quia querabe nae. Ae mbae icuã saã eã mbeite quia nae. Ae ererecua tuchi riqui David rã si nae. Cristo eiquesa mbuquiata mose, emo ematã aroneate. Cristo ematã mose, emo embuquiata aroneate no. ⁸ ã ngue Cristo ñee jẽje ra. Jenyisaã aicuate quia co. Jẽquirãcuã mũite jẽingo raque ùquĩ. Seisi teã eãte que equia ra. Ùquĩ jẽingo secheẽ mumbayãte ùquĩ. Nyebe que mbae ambuquiata mũĩ eiquesa rã jẽje ra. Jẽingo tuchi sacua serese. Emo nda ematã eã. ⁹ Judĩos ñee ñooño je ra amumae turã nyee jendese. Ùquĩ ndiqui Dios chiirabo raã ñooñote ùquĩ. Ùquĩ eriqui tuchite Satanás rese ùquĩ. Ùquĩ nda ñee turã nyee seje jeniĩ. “Dios nyesequa tuchi chõ nguia ã ndese re. Judĩos eã ndaque”, i chee ra jeniĩ. Ngoi turã nyee ra jendese ñee seje. ¹⁰ Jeñĩmbirãcuã turãte equia secheẽ nguire ùquĩ. Nyebe ra jaendeaquiato turãte serequia. Mbia mangue chooñoa jenda mbae rasi raã

ja mose ra jaendeaquiatu tuchi serequia. ¹¹ Achu jei ra se. Ae jêicuate quia serĩ nae, ũquí ndese jêingo bei querabe. † nda emo jembui eã Cristo si. ¹² Ae “qui jê” i beite quia Satanás quirãcuã je nae, ũquí nda amingo bei Dios recuaa. Sembae marca ra amii tuchi ũquí ndese. “Dios quiato” i tuchi ra mbia quia ũquí je. “Dios recua jenda” i tuchi ra mbia quia ũquí je no. “Jerusalén yasu”, i chõ nguiã Dios recua je ã. Jerusalén yasu ra nguichi u ibate si. ¹³ Jêisa mose, Espiritu Turã ñee jeñandu rã. Ae Espiritu Turã ndiqui ñee iglesias je nae, ũquí jeñandu rã’, i que Cristo jêje ra”, ere chõ embesa mondo sequiato Filadelfia jenda je.

Cristo ucheẽ mondo uquiato Laodicea jenda je

¹⁴ Dios quiato rerecua Laodicea jenda je ã embesa rã. ã embesa rã mundo ee: “Cristo que ñee jêje ra. Ae ñee ñooño eãte quia querabe nae. Ae rane siqui quia mbae eã mose nyii nae. Ae ucheẽ mbuchebiã mbeite quia nae. ¹⁵ ã ngue Cristo ñee jêje ra: ‘Jenyisaã aicuate quia co. Seya eãte aico jendese co. Jêhui tuchi ãte raque equia sesi ũquí. Jêingo tuchi eã ñochĩ equia serese ũquí no. Eĩ jenyete chõchĩ equia ũquí. I ribebe rã ño jêingochĩ ũquí. ¹⁶ Sã emo ndiqui i ribebe mbei aroneate no. Mombo chõ nda uchuru si. Eĩ ae ra jemombo sechuru si no. ¹⁷ “ã ureico tuchite Dios rese ã”, jenyee chooño ñochĩ equia ñimbĩrĩ irĩ ũquí. Aba mbia eã tuchi chõ jêingo nguiã ũquí. Mbaecha reã na ño jêingochĩ nguiã Dios je ũquí. Eresayã na ño jêingochĩ nguiã Dios je ũquí. Jêirao eã na ño jêingochĩ nguiã Dios je ũquí no. ¹⁸ Jêingo chõ nguia serese ae. † nda oro turã naanguia amee jêje. † nda mbae amee tuchi jêje. † nda tirushĩ naanguia amee tuchi jêje. † nda jêireĩ nguiãte jêirao eã si. † nda Dios cheẽ ambuchecua tuchi jêje. ¹⁹ Ae rese aico nyesequate nae, ũquí icuã icuã mose chõ aico nguiã eiruã nua. Emundua si sacuã mbae turã ndese. Jêicua si jêhui. Jendua sí Dios rese. ²⁰ Aico jêiquesa mbuu mbuu a. Jemo seandu mose, huĩquesa mbuquiata mose seje, aique ra ee. Aico bei ra erese cote. Aqiaru quiaru ra se quia erese cote. ũquí abe ra quiaru quiaru quia serese cote no. ²¹ Ae “qui jê” i bei quia Satanás quirãcuã je nae, ũquí nda siqui bei serese se ererecua tuchi mose. ũquí abe ra amii mbia rerecuarã. Sã ñi aico “qui jê” i beite Satanás quirãcuã je nyii no. Sã ñi Paba semii mbia rerecuarã no. ²² Jêisa mose, Espiritu Turã ñee jeñandu rã. Ae Espiritu Turã ndiqui ñee iglesias je nae, ũquí jeñandu rã’, i que Cristo jêje ra”, ere chõ embesa mondo sequiato Laodicea jenda je, i que Cristo ñee seje ra.

4

Mbia ibatenda ñee turã ja Dios rĩ

¹ Aquere que amae ibate quiti ra. Eiquesa raanguia que nyeequia mii seje ibei ra. Ae ñeemombo sequite quiti serasate nyii nae, aque que ñee si seje cote ra. —Echu rã ibate. Mbae tateacuquia ndeje. Ae ra jei jei mbia je nae, ũquí tateacuquia rã ndeje, i que seje ra. ² Aque mose tuchi que Espiritu Turã mbae teacuquia seje cuu ra. Dios rese que amae cuu ra. Huee que eñi ngoi trono tose ibate ra. ³ Enininya tuchi que seje ra. Sita rendi rã jaspe rã. Cornalina na abe no. Ibei asa que chĩ trono mama nda. Ibei asa nininya tuchite que chĩ nda. Esmeralda rã. ⁴ Veinticuatro tronos que chi Dios mama nda. Veinticuatro amei ngue chi tronos tose ja ja ra. Huĩraoshĩ ngue ecunui ja ja ra. Coronas oro ao ji que chĩchi ja eãquĩ ndese ra. ⁵ Ama ngue sieu tuchi

Dios mbae trónoo nda. Ama ngue ñee tuchi trónoo nda. Pirirã pirirã i tuchi que equia trónoo nda. Siete tata rendi que chi Dios ruba quti ra. Ûqui ndei Espiritu Turã na ùqui. ⁶ Ama ndisa raanguia que chi Dios ruba quti no nda. Eibera tuchi que ra. Mbae reco cuatro que chi Dios mama nda. Eresa ata atate que ùqui nda. Eruba quti que eresa ra. Equite quti abe que eresa no nda. ⁷ Nyacua rã tuchi que ùqui mo nda. Ticuasú riri na ngue enongue no nda. Mbia ruba rã ngue enongue no nda. Ngaira risha rã ngue enongue no nda. Aque que mbebe quia ra. ⁸ Seis ja ja que ùqui jeo ra. Eresa ata ata tuchi que ejeo rese ra. Ûqui cuatro que ñee turã mbeite quia Dios rii nda. Isa abe que eriqui ñee turãte Dios rii nda. Eñ ngue equia ñe e nda: Ndeturãte. Ndeturãte. Ndequirãcuãte ereico co, Dios.

Co ereico beite co.

Nyii que ereico beite no nda.

Mbae ua ja mose abe ra ereico beite no,

i que ùqui nguia ñee ñee Dios je ra. ⁹ Ûqui ndeco cuatro que ñee turã mbeite quia Dios je ra. Ae siqui beite quia co, aque je. ¹⁰ Amei veinticuatro abe que ngoi ngoi quia ngüiã ndese ra. Ñee turã turã Dios je. Umbae coronas que echono chono ja Dios jii ra. ¹¹ Eñ ngue equia ñee ñee Dios je ra: Urererecua turãt e ereico co, Dios.

Nyebe ureico nguia ñee turã mbeite ndeje ã.

Mbae que erechao jate nembraerã nda.

Erendua turãt e que mbae ao nonde nyii no nda,

i que ùqui nguia ñee turã turãte Dios je ra.

5

Emo libro equia aronea

¹ Dios que libro quereco quia oo cuu ra. Uquiatocuti que enunui trono tose ra. Libro mbesa ji. Equitera quti abe que embesa ji ra. Siete sellos je que ematã ji ra. ² Angel quirãcuã mo ngue ñee nda. —¿Aba ra sellos ndoso libro equia re? i que ángel ñeemombo ra. ³ Mbia mo ngue sellos ndoso aroneate ra. Ibatenda. Ibi jenda. Ibiqui rinda. Ûqui mo ngue sellos ndoso aroneate cuu ra. Nyebe mbia riqui nguia mae aroneate libro rese. ⁴ Nyebe que acheseo tuchi cuu ra. Mbia ja libro equia aronea mose. Mbia ja mae aronea mose erese. ⁵ Ûqui amei mo ngue ñee seje ra. —Erecheseochi nguia. Jesucristo ra libro equia. Ae quia equirãcuãte re. Ae quia Dios chiirabo rerecua tuchi re. David riri tuchi chõ ae re. Ae quiatu que mbae rasi saã tuchi mbia icuã ndiquicharõ nda. Ae quia ra sellos ndoso. Ae quia ra libro equia, i que amei ñee seje cuu ra. ⁶ Jesucristo que chi huee cuu ra. Oveja iquia ji rã ngue eñi seje huee cuu ra. Siete que erambashi nda. Siete que eresa no nda. Siete eresa rei Espiritu Turã. Sã Espiritu Turã mae mbae ja rese no. Jesucristo que chi Dios ruba quti ra. Mbae reco cuatro joõ ngue eñi nda. Amei abe joõ ngue eñi no nda. ⁷ Dios que libro mondo Jesucristo oo cote ra. Dios chi mose trono tose. ⁸ Jesucristo libro isi mose que ùqui mbae cuatro ngoi ngüiã ndese ejii ra. Amei veinticuatro rese. Arpas que amei quereco reco ja ra. Mbae riru oro ao ji abe no. Incienso resebe. Incienso, i que mbae mbushimbusa oquiei mose ra. Dios quiato ñee mose Dios je, eñi sí chõ incienso ee re. ⁹ Ûqui amei ngue irasei rasei canto yasu mo je ra. Á ño ngue irasei rasei nguia: Nd e que mbia ndeiquia ra. Nde que mbia mangue choõña jenda ereisi Dios mbaerã nda.

Mbia cheemo ja ja eriqui nae, ũquí abe que ereisi ja Dios mbaerã no nda.
Mbia mbuae ja abe no.

Nyebe nde mii ño libro ereisi arõte nguiã co.

Nde mii ño sellos erendoso arõte nguiã co.

Libro rese mae sacua.

¹⁰ Nde que uremii Dios rimbarã nda.

Ure mbae raã naa sacua Dios je.

Mbia ibi jenda rerecuarã nda ureico cote,

i que amei irasei rasei Jesucristo je ra. ¹¹ Angeles cheẽ ngue achandu cot e

ra. Angeles que chi ũquí mama tuchi cuu ra. Dios mama. Mbae reco cuatro

abe mama. Amei veinticuatro abe mama no. Angeles tubiriã tuchi que ra.

Millones y millones tuchi que ángeles ra. ¹² Ũquí ngue ñee nyecuate Jesucristo

je re:

Oveja riiri na ño ereico nguiã nde.

Mbia que ndeiquia mbae icua ndiquicharõ nda.

Nyebe mbia riqui nguiã ñee turãte ndeje co cote.

Nyebe mbia riqui nguiã ñee turãte nderii co cote no.

Ndequirãcuã nii. Ndeaquiato rii abe no,

i que ángeles ñee turã Jesucristo je cuu ra. ¹³ Mbae que ñee turã jate quia

Jesucristo rii cuu ra. Ibatenda ñee turã ja eri. Ibi jenda abe no. Ibiqiri rinda

abe no. Ama ndisha rinda abe no. Eĩ ngue ũquí nguia ñee turã jate Jesucristo

je ra. Dios abe je:

Jẽquirãcuã jẽingo beite ã.

Mbia rerecuã jẽingo beite ã no.

Mbae jenyiao ra ñee turã mbeite quia jẽje,

i que Dios chiao quia ñee jate ee cuu ra. ¹⁴ Ae beite, i que mbae reco cuatro ra.

Amei veinticuatro abe que ngoi ja nguiã ndese ñee turã Dios je ra. Ae ereco

siqui beite quia co, aque je.

6

Jesucristo sellos ndoso

¹ Jesucristo que chi oveja riiri na cuu ra. Ae que sello mo ndoso libro si

cote ra. Ae mbae reco cuatro chi nae, ũquí mo ngue ñee cote ra. —Echu, i

que ñeemombo ra. Ama ndieu rã ngue echeẽ nda. ² Caballo shi mo ndese que

amae cote ra. Ae chi eátoo nae, nguiraa mo ngue ecunui oo ra. Corona abe

que emo mee ee ra. Oso que guerra raã naa cote ra. Equirãcuãte que eriqui

mbia mo si ra.

³ Jesucristo que segundo sello ndoso cote ra. Ae mbae reco cuatro chi nae,

ũquí mo ngue ñee endoso mose cote ra. —Echu, i que ra. ⁴ Caballo nongue

gue usẽ u seje cote ra. Era irei tuchi que aque ra. Ae chi eátoo nae, aque je

que emo espada cuasu mee nda. Aque que mbia mbicua icua jate nyue ra.

Nyebe mbia riqui nguiã nyiquia iquia.

⁵ Jesucristo que sello nongue ndoso cote ra. Tercer sello. Ae mbae reco

cuatro chi nae, ũquí mo ngue ñee endoso mose cote ra. —Echu, i que ra.

Caballo rondei que usẽ u seje cote ra. Ae chi eátoo nae, aque que balanza

mo cunui oo ra. Mbae mbuchehasa. ⁶ Emo ngue chi ũquí mbae reco cuatro

ite re ra. Aque que ñee nda: —Mbia chiu ra ua jiri. Un kilo de trigo rei una

jornada. Três kilos quiata a rei una jornada no. Mbae quira quiatu ra ua eã.

Vino ndese, i que ra.

⁷ Jesucristo que sello nongue ndoso cote ra. Cuarto sello. Ae mbae reco cuatro chi nae, ũquí mo ngue ñee nda: —Echu, i que ra. ⁸ Caballo nongue que usê u seje cote ra. Eracho que aque ra. Ae chí éatoo nae, ERAAQUE i que aque je ra. Emo ngue oso erui no nda. ERAAQUE TÁSA i que aque je no nda. Ũquí ngue mbia ibi jenda mbutiã tuchi la cuarta parte ra. Mbia iquia iquia tuchi que equia guerra je ra. Mbae rasi je. Eriãcuã je. Quiaa rinda icuã je abe no.

⁹ Jesucristo que sello nongue ndoso cote ra. Quinto sello. Mbae rese que amae altar qui re cote ra. Mbia chi iquia iquia aingue rese que amae nda. Ae mbia iquia iquia Dios cheê nã nyii nae, ũquí aingue rese que amae nda. Ũquí ñimbirãcuã tuchi chõ nguia mbae rasi je Jesucristo rii nyii reaê. ¹⁰ Ũquí ngue tasê tasê ñee Dios je ra: —Mbae eresaã turã jate quia nde co, Dios. Mbae ja rerecua chõ nde re. ¿Manosete ra ureri chare erembasi re no, Dios? i que ñee ja Dios je ra. ¹¹ Dios que tirushĩ mee mee ũquí ja je cote ra. Ñee ngue ee cote ra: —Mbarandiri. Mbia icuã nda jêataque abe iquia. Sã jêiquia nyii no. Ũquí sacuã jêingo chombe jiri, i que Dios ñee e e ra.

¹² Jesucristo que sello nongue ndoso cote ra. Sexto sello. Ibi que nyere nyere tuchi aque mose cote ra. Tenda que ñimoo tuchi cote ra. Mbae ruqui rã tuchi que nyasi no nda. ¹³ Nyasitata que ngoi ngoi ngaê ibii cote ra. Sã ira a riqui uqui quiririã ñimbuqui no. ¹⁴ Ibei abe que ua cote ra. Sã emo ndiqui papel acua acua no. Sita ibate abe que siri siri ja nyesi ra. Ama ndisha joõ abe que echoi siri siri ja ra. ¹⁵ Mbia que ñimi ñimi ja ibicua ye ra. Sita imi ye abe. Mbia rerecua. Mbia rimba abe. Mbaecha abe. Soldados rerecua abe. Mbia que ñimi ñimi jate cuu ra. Esiquichete quia ñene. ¹⁶ Mbia siquiche mose que ñee ñee jate sita ibate je cuu ra: —Jenyu ngoi urearõ ureiquia. I nda Dios mbae rasi saanguquia eã ure je. I nda Jesucristo mbae rasi saanguquia eã ure je no. ¹⁷ Dios riqui mbae rasi raanguquia uquiato eã je co. Aba quia ra ñimbirãcuã ã je, i que mbia quia siquichete cuu ra.

7

Angeles Dios mbae marca mii mii mbia je

¹ Aquere que cuatro ángeles atea cuu ra. Emo ngue chí juã tenda chuisa quti ra. Enongue que tenda sosa quti no nda. Enongue que sur quti no nda. Enongue que norte quti no nda. Ũquí ngue quiririã isi tuchi quia ra. I chu eã sacuã. Mangue jenda choõña quitinda abe ichu eã sacuã. Ama ndisha quti abe. I nda quiririã ira rãquiã mo ichu eã tuchi. ² Angel nongue mo ndese abe que amae no nda. Tenda chuisa quti que eru quia ra. Dios mbae marca que equereco ra. Ñeemombo que ũquí ángeles cuatro je ra. ³ —Mbae rasi ra jemondo jeichĩ ibi je jê. Ama ndisha abe je. Ira abe je. Dios rimba ruba rese Dios mbae marca uremii mii na nyii, i que ñeemombo ángeles cuatro je ra. ⁴ Ciento cuarenta y cuatro mil ndese que Dios mbae marca mii nda. Judíos chumumbara ja que ra.

⁵ Judá riirĩ ndei doce mil.

Rubén ndiirĩ ndei doce mil.

Gad ndiirĩ ndei doce mil.

⁶ Aser riirĩ ndei doce mil.

Neftalí riirĩ ndei doce mil.

Manasés riirĩ ndei doce mil.

⁷ Simeón ndiirĩ ndei doce mil.

Leví riirĩ ndei doce mil.

Isacar ndiirĩ ndei doce mil.

⁸ Zabolón ndiirĩ ndei doce mil.

José riirĩ ndei doce mil.

Benjamín ndiirĩ ndei doce mil.

Ũquí ja rese que ángeles Dios mbae marca mii mii nda.

Mbia tubiriã iraoshĩ

⁹ Aquere que mbia cuabête atea cuu ra. Contar i ja aroneate que ee cuu ra. Ecuabête quiatu ngue re. Mbia chumumbarate que ra. Mangu chooñoa jenda abe tubiriãte que ra. Echeê ñumumarate que ra. Dios ruba quti que ũquí chi jate juã nda. Cristo ruba quti abe no. Eiraoshĩ ja que chi ra. Sindo que equeru ja oo ra. ¹⁰ Ũquí ngue tasê tasête u ñee Dios je ra. Cristo abe je. Ā i chō ngue equia ñee nda:

Nde ae ereico nguiã mbia rirō eicuã si co.

Nde ereico trono tose mbia rerecuarã co.

Jesucristo rese chō ereico nguiã mbia rirō ndirō eicuã si co,

i que ũquí ja ñee Dios je ra. ¹¹ Angeles que ñumbui jate u Dios mama cuu ra.

Mbae reco cuatro abe mama. Ae amei veinticuatro chi nae, ũquí abe mama

no. Ũquí ángeles que ngoi jate ngũã ndese Dios ruba quti ra. Ngũã ndese que echĩ ñee turã jate Dio s je ra:

¹² Dios turã tuchite riqui mbia je co.

Sã mbia riqui ñee turã mbei erĩ.

Dios aquiatu tuchite riqui co.

Sã mbia riqui “gracias” i bei ee.

Dios quirãcuã tuchite riqui co,

i jate que ñee turã Dios je ra. ¹³ Ũquí amei mo ngue ñee seje cote ra: —¿Aba ã nde? Ae eiraoshĩ chi a. ¿Ma si ecuaẽ a re no? i que ñee seje cuu ra. ¹⁴ —

Ereicuate nde resê, Amei, ae que ee ra. Ae que eicuã seje cote ra. —Ā ngue

mbae rasi saã tuchi quia resê. Tiru irei ji rã ño ã ñia ndiqui nguiã ã cote.

Jesucristo echĩã mbitirō nguqui je resê. ¹⁵ Nyebe eriqui beite nguiã Dios

rese ã. Nyebe eriqui nguiã mbae raã naa mbei Dios je echuchúaa ã. Dios ra

siqui bei erese. Teaquiatu bei ra mingo. ¹⁶ Ũquí nda ngũãcuã irara eã mbei.

Huĩisei abe ra eirara eã no. Tenda abe ra eiro eã. Huĩiriei abe ra eucuyã eã

cote. ¹⁷ Jesucristo quia ra eteaquiato bei mingo. Sã oveja raarõsa riqui oveja

reaquiato no. Sã eriqui oveja rerao rao mbiu no. Eĩ si ra Jesucristo ũquí

ndeaquiato mingo. Dios ra echeseo mbutiba bei cote, i que amei ñee seje ra.

8

Mbae rei ji shimbu turã ndetashĩ ngasê oso Dios je

¹ Jesucristo que sello nongue ndoso libro si cote ra. Séptimo sello. Mbae

ibatenda que quiriri tuchi sello ndoso mose ra. Quiriri arete que ra. Media

hora chee. ² Siete ángeles chi quia Dios ruba quti nae, ũquí ndese que

amaembe cuu ra. Emo ngue trompeta mee ja ja ũquí je ra. Siete que

trompetas ra. ³ Angel mo ngue tu incienso riru mo nderu ra. Oro ao ji. Tiba

que uã altar jii ra. Emo ngue incienso tubiriã mondo ee cuu ra. Altar mo ngue

chĩ oro ao ji ra. Aque arō ngue ángel incienso ñono nda. Dios ruba quti. Ae

Dios quiato ñee ñee nguia Dios je nae, ũquí ñee ngue ngasê nguia Dios je ra.

Incienso rei jí shimbu turã ndese. ⁴ Incienso retashĩ ngue nyui oso quia ángel

o si ra. Dios quiato cheẽ mbirō ngue eriqui oso ngasê Dios je ra. ⁵ Angel que

incienso riru mombisê tata reteĩ je ra. Altar jenda je. Ichusê ngue ibi quti

cuu ra. Ama ngue sieu tuchi cote ra. Pirirã pirirã i tuchi que ra. Ibi abe que nyere cuu no nda.

Angeles trompetas mbucheẽ

⁶ Ae siete ángeles trompetas quereco nae, ùquĩ ngue icoquiату cote ra. Trompeta mbucheẽ sacua.

⁷ Emo ngue trompeta mbucheẽ cote ra. Iquitã ngue ngoi ngoi tuchi íbii cote ra. Tata abe que ngoi ngoi ra. I ireĩ tuchi que cote ra. Mbae ruqui rã. Ibi tercera parte que oquieĩ tuchi ra. Ira tercera parte abe que oquieĩ ra. Mbae ruri abe que oquieĩ ja no nda.

⁸ Segundo ángel que trompeta mbucheẽ cote no nda. Aque mose tuchi que mbae mo ndu ngoi ama ndisha ye ra. Ecuasu tuchi que ra. Sita ibate rã. Sendi que u ama ndisha ite re ra. Ama ndisha tercera parte ireĩ tuchi que cote ra. Mbae ruqui rã. ⁹ Ama ndisha riinda tercera parte que mano ja ra. Ae ngata quia ama ndisha rui barcos nae, ùquĩ tercera parte abe que ñiimi imi ja no nda.

¹⁰ Tercer ángel que trompeta mbucheẽ cote no nda. Aque mose que nyasitata cuasu mo ndu ngoi íbii ra. Tata rendi rã ngue erendi ra. Ngoi que ama tercera parte ye ra. Eriecua tercera parte ye ja abe que ngoi no nda. I mbucua tuchi que ra. ¹¹ Etei, i que equia aque nyasitata je ra. Nyasitata que ama tercera parte mbotei tuchi ra. Ifei tuchi que cot e ra. Nyebe e mbia riqui nguia mano mano tuchi iu mose cuu.

¹² Cuarto ángel que trompeta mbucheẽ cote no nda. Aque mose que mbae mo tenda mbuchecuayãte tercera parte ra. Nyasi tercera parte abe. Nyasitata tercera parte abe no. Nyebe mbae checuayã tuchi riqui nguia mbia je nyaashĩ mose tercera parte. Isa mose abe nyasi mbae tesae eã tercera parte. Nyasitata abe no.

¹³ Nguira risha rese que amae cuu cote ra. Mbebe que equia ibate tuchi searõ nda. Ñeemombo mombo que equia ra: —Aba mbia eã tuchi mbia ibi jenda. Mbae rasi ra esaã tuchi cote. Angeles ataque nyuihuĩ mose. Angeles tres trompetas mbucheẽ mose, mbia ra mbae rasi saã tuchi cote, i que nguira risha ñee nda.

9

¹ Quinto ángel que trompeta mbucheẽ cote no nda. Aque mose que nyasitata mo ngoi u íbii seje cuu ra. Mbia raãte que aque nyasitata ra. Nyasitata que ibicua atiquia jea ra. Abismo, i que hue ibicua je ra. ² Equia mose que tatashĩ usẽ tuchi ra. Sã tata riqui nyuuta rosot e tetashĩ no. Tatashĩ ngue tenda choote ra. Mbae mbuchecuayã jate que ra. ³ Tatashĩ si que tucu mbuae ngaẽ tuchi usẽ cote ra. Tucu mbuae que ibi mboo ja tuchi nyoi mangue chooñoa nda. Mbia i i tuchi que equia ra. Quiraẽ ndasi rã tuchi que eriqui mbia je ra. ⁴ Emo ngue ñee tucu mbuae je ra: —Ira mo nda jẽuchĩ jẽ. Ira ruri ja abe. Mbae ruri ja abe no. Quiata abe no. Mbia Dios quiatoã achõ ño jembasi mbasi quia. Ae Dios mbae marca quereco eã nguia nguba rese nae, ùquĩ. ⁵ Ùquĩ je mbae rasi jẽsaanguquia tuchi cinco meses. Jẽiquia eã ño, i que ñee tucu mbuae je ra. Quiraẽ ndasi rã tuchi que tucu rasi riqui mbia je ra. ⁶ Aque mose ra mbia “nandemano” i tuchi rei nguia nyue. Mano aroneate rae.

⁷ Caballo rã tuchi que tucu mbuae ra. Sã caballo riqui icoquiату guerra raã naa sacua no. Corona naanguia que siqui tucu mbuae aqũ ndese ja ja ra. Oro ao ji ereae. Mbia ruba raãte que tucu mbuae ruba ra. ⁸ Cuña a raãte

que ea ra. Nyacuareĩ naate que ereĩ nda. ⁹ Eishia ãtã tuchi que ra. Hierro rã. Mbia eiõ aronea. Guerra ndieu rã tuchi que ebebe mose ra. ¹⁰ Sã quiraẽ ndiqui mbia i ngocoi je no. Eĩ si que equia mbia i i ngocoi je ra. Mbia mbasi mbasi que equia cinco meses ra. ¹¹ Angel icuã mo ngue tucu mbuae rerecua ra. Ae ibicua atiquia jea nae, aque que ererecua ra. Abadón, i que hebreo cheẽ nguia ee ra. Apolión, i que griego cheẽ nguia ee no nda. —Mbia iquiasa, i chõ nguia embae nombres je.

¹² Tucu mbuae que ua chee cote ra. Mbae rasi ñiinda chõ ñquĩ nde. Mbae rasi nyeremo tasenei jêje cote.

¹³ Sexto ángel que trompeta mbucheẽ cote no nda. Aque mose que emo ñee altar jii Dios mbae ra. Oro ao ji rei altar. ¹⁴ Ñee ngue ángel je ra. Ae trompeta mbucheẽ namo nae, aque je. —Cuatro ángeles embui rã mondo. Aecua jí chi Ama Eufrates nae, ñquĩ embui rã mondo, i que ee ra. ¹⁵ Cuatro ángeles que embui mondo cote ra. Aque mose sacua ngue Dios ñquĩ nderecoquiata ra. Ñquĩ ngue mbia iquia iquia tuchi tercera parte cuu ra. ¹⁶ Soldados tubiriã tuchi que ñquĩ ángeles nimba cuu ra. Doscientos millones tuchi que ra, i que achandu ra. ¹⁷ Caballo átoo que soldados chi ja ra. Eishia riquisã ja ja que mbae ãtã ñi nda. Eishia aosa mbiitã jí que ra. Eireĩ. Erubi. Echo. Nyacua ãquĩ na ngue caballos seje cuu ra. Tata que emombo mombo ja quia uchuru rĩ nda. Tatashĩ abe. Azufre abe no. ¹⁸ Ñquĩ tres que mbae rasi tuchi ra. Tata. Tatashĩ. Azufre. Ae caballos mombo mombo quia uchuru rĩ nae, ñquĩ. Ñquĩ ngue mbia iquia iquia tuchi quia tercera parte ra. ¹⁹ Ngocoi je que eriqui mbia mbasi mbasi tuchi ra. Mbei tasi je rã tuchi que erocoi ra. Uchuru je abe que eriqui mbia mbasi mbasi tuchi ra.

²⁰⁻²¹ Nyebe mbia riqui nguia mano mano tuchi ñquĩ ndasi je. Mbia ataque quiatu que siqui beite quia huicua ndese ra. Eicuã icuã mbei nyue. Nyiquia iquia. Brujería raã naa mbei. Siqui icuã icuã cuña mo ndese. Mbae mbuquiachã quiachã mbei. Uchisaã icuã si hui eã mbei. Siqui beite que equia aba checuayã ndese ra. Uchiao Dios abareã ndese abe no. Oro ao ji. Plata ao ji. Bronce ao ji. Sita ao ji. Ira ao ji abe no. Ñquĩ ja rese chõ ngue eriqui ra. Ñquĩ mae aroneate raque Dios abareã. Mbae andu aroneate raque. Ngata aroneate raque no.

10

Angel libro mo quereco

¹ Angel mo ngue nguichi ibei si seje cuu ra. Equirãcuãte que ra. Ibeishĩ ngue equeru huiraorã nda. Ibei asa que chĩ eãquĩ mama nda. Eruba nininyate que tenda rã sí ra. Etima abe nininyate que ra. Sã tata nininyate riqui no. ² Libro ñetẽ mo ngue equereco oo ra. Equia ji que equereco ra. Última ndibisho que emũ ama ndisha ye ra. Última ndibisho que emũ ibii no nda. ³ Tasẽ tuchi que ra. Sã nyacua riqui curu curu no. Erasẽ mose que ama ñee siete veces ra. ⁴ —Ae rese ama ndieu sembiirandu nae, aque tambesa rã, ae rei que se cote ra. Ibatenda mo ngue ñee ño seje ra. —Ae ama ñee erechandu nae, ñquĩ nda erembesachĩ. Eresenei seneichĩ nda emo je. Echeẽ emocoño ño, i que seje ra. ⁵ Ae ángel tima ndibisho chĩ ama ndisha ye nae, aque que oo uquiaticutinda mee ibate quiti ra. ⁶ Ñee ngue cote ra: —Dios que sembu ra. Ae siqu i beite quia co nae. Ae ibei chao nae. Ae ibi chao nae. Ae ama ndisha chao nae. Ae mbae chao ja tuchite nae. Aque que sembu

co renei nenei sacua nda. Achite mbae ja ñi ua a cote. ⁷ Séptimo ángel nda nyuihuí cote. Trompeta mbucheé. Dios cheé ique ja mose r a nyuihuí cote. Ae Dios ñee uquiato ñiinda je nae, ũquí nda ique ja echeé cote. Mbia rerecuará tuchi ra Jesús cote, i que ángel quiracuá ñee seje cuu ra.

⁸ Ae cheé achandu ibatenda nyii nae, aque que ñeembe seje ra. —Eso rá libro ñetê isi. Ae tima chí ama ndisha ye nae, ae tima ndibisho chí íbii nae, aque si libro ñetê eisi rá. Eequia ji eisi, i que seje ra. ⁹ Ae aso nguiá ñee ángel je. —Libro ñetê emee na seje, ae que ee ra. Ae emee nguiá ñee seje cote. —Co libro ñetê jê. Eu ja. Irao raáte raque ra eachã namo mose. Etei tuchite quiatu ra nderie je cote, i que seje ra. ¹⁰ Angel que libro ñetê mee seje cote ra. Au que se ra. Etura tuchi que sechuru je ra. Irao rá. Se eu tuchi mose quiatu que eteite serie je cote ra. ¹¹ Emo ngue ñee seje cote ra. —Dios cheé nda eresenei senei sí mbia ja je. “Co ra Dios saã. Á nda Dios saã no”, ere ra mbia je. Ishonda abe je. Mangue choñoa jenda abe je. Mbia cheé ñumumbara abe je. Mbia rerecuá jate abe je, i que seje cuu ra.

11

Dios quiato nyeremo Dios cheé senei senei

¹ Dios que uu mo mundo séoo cuu ra. Ñee ngue seje ra. —Eso Dios chuchua mbuchecha checha. Altar abe embuchecha. Ae mbia chí huee ñee ñee Dios je nae, ũquí abe je contar ere rá. ² Itaicuee ra erembuchechachí jê. Patio ra erembuchechachí jê. Ũquí ngue amee mbia sequiatoã je ra. Sequiatoã nda irõ irõ Jerusalén ndese cuarenta y dos meses chee. ³ Sequiato nyeremo je ra sequiracuá amee. Ũquí nda secheé senei senei tuchi quia mbia je 1,260 días chee. Tiru rondei ra ũquí queroco quia, i que seje ra.

⁴ Dios quiato nyeremo ndei olivos i nyeremo na sí. Candeleros nyeremo na sí no. Sã Dios mbae reaquiato ja no. Uquiato nyeremo abe ra eteaquiato no. ⁵ Dios ra uquiracuá mee ũquí nyeremo je. Emo embasi serí mose, tata ra embu embu uchuru si. Ucuâyãsa mbasi tuchi sacua. Eí nda mbia mano mano, ũquí Dios quiato nyeremo ucuâyã mose. ⁶ Ũquí Dios quiato nyeremo ama mbuchaquí eã arõte, Dios cheé nenei nenei mbei mose mbia je. Mbae ruqui rá nda ama naa. Mbia ra embasi mbasi arõte uquiracuá je. Ibi jenda mbasise mose, mbasi tuchi rae. ⁷ Ũquí Dios quiato nyeremo Dios cheé nenei nenei ja mose mbia ja je, icuã nda tu icuâte ee cote. Ibicua yenda. Icuã nda Dios quiato nyeremo iquia cote. ⁸⁻⁹ Emo ũquí Dios quiato raque nyati aroneate. Erete tiquia iriã nda chichõ itaicuee rí. Mbia mangue choñoa jenda abe tuchi r a mae ja eraaque rese. Tres días y medio chee rae. Jerusalén ndei ra ũquí. Ae mbia Jesucristo mbucha ira rese nae, huee. Hue jenda quiarei eicuã tuchi mbia. Sodoma jenda rá. Egipto jenda rá abe no. ¹⁰ Ae mbia siqui quia ibi rí nae, ũquí ia tuchi rae. Dios quiato nyeremo mano mose. —Ae nandechiao icuã siquisã quisã nguia nae, ũquí ngue mano cote ra, i r a eyate ñee nyue. Nyebe ra eriqui mbae mondo mondo tuchi nyue. ¹¹ Dios quiato nyeremo ndaque que chí tres días y medio cuu ra. Aquere que Dios embuquera sí seque re cuu ra. Júã ngue cuu ra. Mbia que siquiche ja tuchi mae erese ra. ¹² Ibatenda que ñee nyecua ũquí Dios quiato nyeremo je cote ra. —Jenyu aa quiatu ibate, i que Dios ñee ee ra. Nyoí que ibate ibei ye cuu ra. Eucuyãsa que mae mbeite u echui rese ra. ¹³ Aque mose tuchi que ibi nyere icuã nda. Sucha tubiriã ndibisho que ngoi ngoi jate ra. Mbia tubiriãte que mano nda.

Siete mil que mbia mano nda. Mbia ataque que siquichete ra. Ñee turã turãte que equia Dios ibatenda je cote ra. ¹⁴ Segundo mbae rasi chõ ã nde. Tercero quia tasenei jêje cote.

Séptima trompeta mbucheẽ cote

¹⁵ Séptimo ángel que trompeta mbucheẽ cote no nda. Ūquĩ mose que mbia ñeemombo ja ja ibatenda ra. Eĩ ngue tasẽ tasẽ nda: Mbia mo ibi jenda mo nda siquiã ererecuarã cote. Dios ae chõ nda siqui ererecuarã cote. Nguiĩ ndese. Ae ae chõ nda siqui ererecuarã mbei cote, i que ibatenda tasẽ tasẽ cuu ra.

¹⁶ Ae amei veinticuatro siqui beite quia Dios jii nae, ūquĩ ngue ngoi ngũã ndese ñee Dios je cuu ra. Eĩ ño ngue ñee nguiã:

¹⁷ Gracias ure tuchi quia ndeje co, Dios.

Ndequirãcuã mbae saã ja arõte quia co.

Ereico beite que equia nyii ra. Namo abe no. Ereico beite ra eno.

Ereico ndequirãcuã naanguquiate mbia je co cote.

Ereico mbia rerecuarã tuchi co cote.

¹⁸ Mbia rerecuã que paama ite ndeje ra.

Co mose ra ndequiatoã erembasi cote.

Ndequiatoã mano je abe ra erembasi cote.

Ndequiato abe ra erembuquera cote.

Mbae turã mee mee sacuaã ee.

Ae ndecheẽ senei senei mbeite quia mbia je nae.

Ae ñee turã turã nguia ndeje nae.

Ndequiato cuasu je. Ndequiato ñetẽ je abe no.

Ndequiato ja je ra mbae turã eremeẽ mee cote.

Ae mbia mbicuaã icuaã nguia nae, ūquĩ nda erembutiã co mose cote,

i que veinticuatro amei ñee turã Dios je cuu ra. ¹⁹ Dios chuchua ibatenda iquesa que quiata seje cuu ra. Caja Dios chuchua jenda que nyecua seje cuu ra. Aque rei contrato riru Dios mbae aque. Aque que ama pirirã pirirã i ra. Ama ngue sieute ra. Ama ngue ñeete ra. Ibi que nyere ra. Iquitã abe que ngoi ngoi chee ra.

12

Dragón icuaã icuaã cuña je

¹ Mbia mae sayã mo ndese que amae ibate cuu ra. Cuña nguasu tuchi mo ngue ra. Tenda que eirao ra. Nyasi que chí ei quiti ra. Corona ngue equereco uãquĩ ndese ra. Nyasitata doce que chí corona ndese ra. ² Nañimbae que cuña nda. Tasẽ tasẽ tuchi que equia nguiĩ ndasi je ra. ³ Aque que amae mbia mae sayã mo ndese ibate no nda. Dragón ireĩ mo ndese que amae nda. Mbie que aque dragón ãquĩ cuu ra. Diez que erambashĩ nda. Corona ngue chí eãquĩ ja rese ra. ⁴ Dragón ngue nyasitata tubiriã siichã tuchi imbu íbii ngocoĩ je ra. Cuña ji que eñi eraarõ cote ra. —Sã nyaacuquia. Eriĩ tau, i que huĩ ejii ra. ⁵ Nyaacuquia que cote ra. Erãcoẽ ngue ra. Mbia ja rerecuarã tuchi ra aque. Emo ngue eriĩ isi ra. Querao que Dios je íbatee ra. ⁶ Cuña ngue uchã oso turuquia ñi nda. Dios echuchua saã ño nguia huee reaẽ. Huee que eriqui 1,260 días ra. Huee que emo ndiqui embuquiaru quiaru ra.

⁷ Amae ngue guerra rese ibate cuu ra. Dragón icuaã icuaãte que ángeles je ra. Miguel nimba ángeles abe que ucu ucu a dragón nimba ángeles rese no nda. Nyiiquia serĩ jate que cuu ra. ⁸ Dragón ngue ganar i aroneate umbae ángeles

rese ra. Nyebe eriqui aroneate nguiã ibate cote. ⁹ Dios que dragón mombo bei ibate si cote ra. Mbei ima ndei dragón. Diablo. Satanás, i abe que ee ra. Ae chõ mbia mangue chooñoa jenda mbiĩrĩ irĩ mbeite nguiã co. Dios que ae mombo íbii cuu ra. Ngũimba rese. ¹⁰ Ibatenda ia tuchi que Dios emombo mose ra. Ibatenda mo ñee ngue achandu cuu ra: —Coche ñene. Dios riqui mbia rirõ mbei huũcuã si co cote. Namu tuchi mbia riqui mae Dios quĩrãcuã ndese co. Cristo riqui mbia rerecua tuchi co cote. Dios quiatu que diablo mombo nguiã. Ae Dios mbuqueta queta beite quia equiato rĩ nyii. ¹¹ Ũquĩ Dios quiato que diablo siquisãte quia Jesús ruqui je ra. Jesús cheẽ je abe no. Ae ũquĩ senei mbeite quia mbia je Jesús cheẽ nae, ũquĩ je chõ eriqui nguiã eriquisã quisã. Ũquĩ Dios quiato que siquicheãte quia umano si ra. “Tamano ndei Dios je”, i jate que equia ra. ¹² Mbia ibatenda ia tuchite cote. Mbia ibi jenda quiatuchĩ eya eãte. Mbia ama ndisha yenda abe no. Diablo quiatu que nguichichĩ u nguiã jẽje, ibi jenda. Paama i tuchite equia co. Achite quiatu Dios ñi nguiã embasi a cote, i que ibatenda mo ñee cuu ra.

¹³ Dios dragón mombo mose íbii, dragón icuã icuã ngue cuña je cote ra. Ae eriĩrĩ nacue nyaacuquia nae, aque cuña je que dragón icuã icuã cote ra. ¹⁴ Emo ngue mbae jeo nyeremo mondo cuña je ejeorã nda. Nguira risha jeo raanguia. Cuña mbebe sacuaã. Eso chee sacuaã turuquia rĩ. Ae Dios saã echucharã turúquiaa nyii nae, huee ee chee sacuaã diablo si. Mbei si. Emo embuquiaru sacuaã tres años y medio huee. ¹⁵ Mbei que i mombo tuchi uchuru rĩ nda. Iãcuana. Cuña iquia sacuaã ndaque chõ ũquĩ iãcuã nde. ¹⁶ Ibi ia eãte que cuña ndese ra. Nyebe ibi nyiequia nguiã i mocõ ja dragón nyuru jenda. ¹⁷⁻¹⁸ Nyebe dragón paama i tuchi nguiã cuña je. Eicuã icuã mbeite que eriqui cuña ndiĩrĩ ataque ja je cote ra. Ae Dios cheẽ mumba eãte quia nae, ũquĩ je chõ eriqui nguiã cuña ndiĩrĩ i. Ae siqui beite quia Jesús cheẽ ndui nae, ũquĩ je dragón icuã icuã mbeite riqui co.

13

Icuã nyeremo

¹ Ama ndisha rimia ndese que aĩ juã cuu ra. Mbae mo ndese abe que amae huee ra. Icuã mo ngue usẽ u quia ama ndisha si seje cuu ra. Siete que eãquĩ nda. Diez que erambashĩ nda. Corona ngue chĩ erambashĩ ndese ja ra. Eãquĩ ndese que nombre mo mbesa ji ñi nda. Aque nombre icuãte que Dios je ra. ² Nyacua risha rã ngue icuã nda. Oso i rã tuchi que ei ra. Echuru que nyacua churu rã nda. Dragón ngue uquirãcuã mee tuchi icuã je ra. —Ererecuarã nde, i tuchi que dragón icuã je ra. ³ Icuã ãquĩ mo sia ji tuchi rei ngue re. Manombi chõ ndei ngue re. Nyerõ ñochĩ ngue re. Nyebe mbia mangu e chooñoa jenda nyuruira jate nguiã mae erese cote. Mbia que siqui jate erui cote ra. ⁴ Mbia que ñee turã turãte quia dragón je ra. Uquirãcuã mee mose icuã je. Icuã je abe que eriqui ñee turã turãte ra: —Co icuã turã na eãte mbia mo. Ae mĩ ño equirãcuã ndiqui nguiã mbia si co, i jate que mbia quia ee ra.

⁵ Icuã ngue ucuasu saã saã tuchi quia Dios je ra. —Dios tuchi chõ se re, i tuchi que equia mbia je ra. Dragón ngue emii mbia rerecuarã cuarenta y dos meses ra. ⁶ Aque mose bei que eriqui ñee icuã icuã Dios rĩ nda. Echuchua rĩ abe no. Dios rimba ibatenda rĩ abe no. ⁷ Dragón ngue uquirãcuã mee tuchi icuã je ra. Icuã icuã icuãte que eriqui Dios quiato je cote ra. Dios quiato iquia iquia cheete que equia ra. Icuã ngue mbia mangue chooñoa jenda rerecua tuchi cote ra. Mbia cheemo abe rerecua tuchi que cote ra. ⁸ Mbia Dios quiatoã

ja tuchi que siqui icuã ndese ra. Ae embae nombre mbesa iriãte riqui Jesús mbae libro rese nae, ùquĩ ngue siqui jate icuã ndese ra. Dios quiato mbae nombre que Jesús mbesa mbae ao ja nond e coose ra. Jesús mano nonde eriĩ. ⁹ Jëisa mose, secheẽ jeñandu rã. ¹⁰ Dios mbae icua ja chõ nguiã, mbae tã i nonde equiato je. —Co sequiato ra mbia icua tiquise je, i mose Dios, mbia ra equia tiquise je. —Co sequiato ra mbia tarõ, i mose Dios, mbia ra etarõ no. Sã Jesucristo rimba ñimbirãcuã ño. Sã Jesucristo icua tuchi. Icuã icuã icuã mose ee. ¹¹ Aquere que amae icuã mo ndese no nda. Ibi si qu e co icuã ndu ra. Erambashĩ nyeremo ngue ra. Cordero nambashĩ na si que ra. Dragón ñee na si que echeẽ no nda. ¹² Equirãcuã tuchi que ra. Icuã ñiinda rã sí. —Icuã ñiinda rimbarã ño jëingo, i tuchi que equia mbia mingo ja icuã ñiinda rese ra. Ae ãquĩ sia ji nyerõ nguia nae, aque. ¹³ Mbua mae sayã ngue esaã saã tuchi quia ra. Tata que embucoi ibei si mbia resa rae ra. ¹⁴ Mbua mae sayã ngue esaã saã tuchi icuã ñiinda rese eico mose ra. Eĩ ngue equia mbia mbũrĩ irĩ tuchi ra. —Icuã ñiinda raanguia mo mbae mo jenyao jë, i que ñee mbia je ra. Mbua que echao ra. Ae ãquĩ sia ji tiquise je nae, ae nyerõ nguia nae, aque raanguia que mbia chao ra. ¹⁵ Icuã ngue ereco mee mbae ao ji je ra. Mbucua que ra. Mbucheẽ ngue ra. Mbua rã ngue eriqui cote ra. Ae ngoi sereãte quia ngũã ndese mbae ao ji résaa nae, mbae ao ji que ùquĩ icua cote ra. ¹⁶ Icuã ngue umbae marca mũ jate mbia rese ra. Mbua ruba rese. Mbua o rese equiatocutinda. Mbua ririĩ ndese. Mbua cuasu rese. Mbaecha rese. Mbaecha reã abe rese. Mbua rimba rese. Mbua rimba eã ndese abe no. Icuã ngue marcar i ja mbia ja je cuu ra. ¹⁷ Mbua mo marcar iriã mose, ùquĩ mbae mo isi aroneate. Mbae mo je vender i aroneate no. Icuã mbae marca nderequia eã mose. Icuã mbae número abe rerequia eã mose no. ¹⁸ Ae ndua tuchi eãte quia nae, ùquĩ nda ã icua eã. Ae mbae icuate quia nae, sã ùquĩ icuã mbae número icua. Mbua mo ñi ño ñene. Embae número rei 666.

14

Mbia 144,000 irasei rasei Dios je

¹ Mbae mo ndese abe que amae cuu ra. Jesucristo que chí juã Ibi Ibate Siõn seje cuu ra. Ae je eriqui Cordero i. Mbua cuabẽ tuchi que chí erese ra, 144-000 que mbia chí erese ra. Ùquĩ nduba rese ja ja que Jesucristo mbae nombre mbesa ji ñi nda. Dios mbae nombre mbesa ji abe no. ² Mbae rieu que achandu bei quia ibatenda ra. Tororomba ata ata rieu raãte que ra. Ama ndieu abe raãte que ra. Sã mbua tubiriãte riqui arpas mbucheẽ ñee no jë, ùquĩ naate que erieu riqui ra. ³ Ùquĩ mbua cuabẽte que irasei rasei quia Dios résaa ra. Mbae reco cuatro résaa abe no. Amei veiticuatro résaa abe que eriqui irasei rasei no nda. Eirasei rasei yasu que ra. Mbua mo ngue ñimbaaquiatu aroneate quia eirasei rasei yasu je ra. Mbua 144,000 achõ ño ngue ñimbaaquiatu aque irasei rasei yasu je ra. Dios ùquĩ sirõ nguiatu quia mbae icuã si reaẽ. ⁴ Ùquĩ ngue ñimbuãcuã eãte quia mbae icuã je ra. Ñimbuãcuã eã siqui cuã mo ndese no. Siqui turã mbei equia Jesucristo rese ùquĩ. Dios que esirõ mbei mbia ibi jenda si ra. Ofrenda turã na tuchi chõ ùquĩ Dios je re. Jesucristo abe je. ⁵ Ùquĩ nguiarei ñee ñoõño eã tuchi ùquĩ. Ùquĩ turã tuchite eriqui Dios je ã.

Tres ángeles ñee mbia je

⁶ Amae ngue ángel nongue rese cuu ra. Mbebe mbebe que equia ibei rĩ cuu ra. Dios cheẽ turã ua eã je que equereco quia ra. Erenei nenei sacua mbia ja je. Manguie chooñoa jenda ja je. Mbia cheẽ ñumumbara abe ja je. ⁷ Aque ángel que ñee nda: —Jẽireĩ ireĩ jiri Dios si. Jeñee turã turã jiri quia ee. Achite Dios ñi mae ja mbia rese a. Uquiatoã mbasi nonde. Dios quiatu ngue mbae chao ja nguiã. Ibei. Ibi. Ama ndisha. Ama ndiicoĩ. Nyebe ra mbia ñee turã ee, i que ángel ñee cuu ra.

⁸ Angel nongue abe que siqui seje cuu ra. Aque que ñee cote ra: —Sucha tubiriã Babilonia ngue quiachãte cote ra. Babilonia nda mbia mbicuã eã cote. Mbia mbicuã tuchichĩ equia nyii, i que aque ángel ñee cuu ra.

⁹ Angel nongue abe rese que amae no nda. Ñee asite que ra: —Icuã ndese chõ nda jẽingochĩ jẽ. Icuã naanguia mbae ao ji rese abe chõ nda jẽingochĩ jẽ. Icuã mbae marca ra jemichĩ jenduba rese jẽ. Jẽo abe rese ra jemichĩ jẽ.

¹⁰ Emo emii mose, Dios ra paama i tuchi ee. Emo emii mose, Dios ra embasi tuchi. Dios ra ũquĩ mbasi bei tata je. Azufre je abe no. Mbasi bei ra ángeles resa rae. Jesucristo resa rae abe no. ¹¹ Ũquĩ nda Dios mbasi bei. Mbae rasi ra eucua mbirĩ jiriã. Siqui quiatu que equia icuã ndui mbaerã nda. Icuã naanguia ao ji abe rese quiatu que eriqui ra. Icuã mbae marca abe rese quiatu que eriqui mbaerã no nda.

¹² Dios quiato tuchi ra ũquĩ saã eã. Sã eriqui beite Dios cheẽ ndui. Sã eriqui ñimbirãcuã mbeite, i que ángel ñee cuu ra.

¹³ Ibatenda mo ngue ñee seje cuu ra: —Ã embesa rã: “Jesús quiato mo mano mose, eyate riqui co”, ere chõ mi embesa. Espiritu Turã ñee abe chõ ũquĩ nde. Jesús quiato mo mano mose, uquenea nda eucua cote. Ae mbae turã esaã saã nguia nyii nae, ũquĩ si ra Dios tesareia mbei, i que ibatenda ñee seje ra.

Dios uquiatoã mbasi mose, mbae a riami ami na ño nda esaã ee

¹⁴ Ibeishĩ ndese que amae cuu cote ra. Emo ngue chĩ ngoi ibeishĩ tose ra. Jesucristo rã tuchi que ra. Corona ngue chĩ eãquĩ ndese oro ao ji ra. Tiquise raanguia rimbete que equereco oo ra. Quiata a ucua ucua sacua. ¹⁵ Angel mo ngue tu usẽ Dios chuchua si ra. Ñeemombo que Jesucristo raanguia je ra. —Mbae eucua ucua tiquise raanguia je cote. Mbae a quiche jate manguie chooñoa jenda ja, i que ee ra. ¹⁶ Ae chĩ ibeishĩ tose nae, aque que tiquise raanguia mee ibi quiti ra. Aque mose tuchi chõ ngue mbae a ibi jenda ishao ja tuchi cote ra.

¹⁷ Angel mo abe que usẽ u Dios chuchua ibatenda si ra. Tiquise raanguia rimbete que equereco no nda. Uvas ucua ucua sacua. ¹⁸ Angel mo ngue tu altar si cot e ra. Tata raarõsa altar jend a rei aque ángel. Ñeemombo que tiquise raanguia rerequiasa je ra: —Uvas eucua ucua tiquise raanguia je cote. Manguie chooñoa jenda ja eucua ucua. Equiche jate, i que ra. ¹⁹ Angel que tiquise raanguia mee ibi arõ cote ra. Aque mose tuchi chõ ngue uvas ibi jenda ishao ja tuchi ra. Uvas ishao ji que emondo ja tuchua mo nda. Eriami ami sacua. Dios uquiatoã mbasi mose, mbae a riami ami na ño ũquĩ nde. ²⁰ Isho jiri que eriqui uvas riami ami sucha tubiriã si ra. Dios uquiatoã mbasi mose, uvas riami ami na ño ũquĩ nde. Eruqui riquiraa tuchi que ra. Caballo mbuchechea tuchi que eruqui riquiraa ra. Trescientos kilómetros tuchi que eruqui seje cuu ra.

15

Angeles mbae rasi siete quereco ja eriru ye

¹ Aba siquichesa mo ndese que amae ibei rĩ cuu ra. Mbia mbiirandu sacuaã. Siete angeles rese que amae nda. Mbae rasi chumumbarate que ecurucuaẽ cuaẽ nguia íbii ra. Siete que mbae rasi ra. Mbae rasi tuchi. Ũquĩ siete mbae rasi ua mose, Dios ra mbae rasi mbu si eã cote.

² Ama ndisha icoi mo ndese que amae nda. Enininya tuchi que ra. Vidrio raanguia. Tata abe raanguia. Ae siquĩã mbei icuaã ndui Jesús quiato nae, ũquĩ ndese que amae no nda. Icuã naanguia rese abe siquĩã. Icuã mbae número abe que equerecoã nda. Ũquĩ ndese que amae ama ndisha arõ nda. Arpas Dios mbae je que echi tocar i ra. ³ Ae Moisés irasei rasei nyii nae, ũquĩ sí je que echi irasei rasei ra. Ae mbia irasei rasei Jesús je nae, ũquĩ sí je que echi irasei rasei ra. Ñngue irasei rasei ra:

Ndechiao turã tuchite, Dios.

Ndequirãcuã tuchite ereico co.

Mbia erembuchiabi jiri jiriãte quia co.

Erecheẽ iru iru eãte quia co.

Mbia rerecua jate ereico co.

⁴ Mbia ra ireĩ ireĩ ja ndesi mae mose ndechiao rese.

Ñee turã ja ra nderĩ.

Nde mii ño ererecua tuchi re.

Mbia ra ngaẽ ja tuchi nderea. Ñee turã sacuaã ndeje.

Ndechiao turã ndese quiatu ngue mbia mae nguĩã,

i que mbia irasei rasei ama ndisha arõ cuu ra.

⁵ Aquerẽ que mbae mo abe atea cuu ra. Dios chuchua ibatenda eiquesa que quiata seje cuu ra. ⁶ Siete ángeles mbae rasi quereco quia nae, ũquĩ ngue usẽ nyoi Dios chuchua si cote ra. Eiraoshĩ tuchi que nyoi usẽ nda. Oro que equereco huishia ati ra. ⁷ Ae rese ama e mbae reco cuatro nyii nae, ũquĩ m o ngue mbae riru mee mee ja ũquĩ ángeles siete je ra. Oro ao ji rei mbae riru. Mbae rasi mbisẽte que chi eriru ja ye ra. Dios mbia mbasi tuchi sacuaã. ⁸ Dios nininya tuchi que seje cuu ra. Equirãcuã tuchi que ra. Nyebe que tatashĩ Dios chuchua mboo ja tuchi ra. Mbia mo ngue ique aroneate rã huee ra. Ũquĩ ángeles mbae rasi icherẽ cherẽ ja eã mose.

16

Angeles mbae rasi icherẽ cherẽ ja

¹ Dios chuchua jenda mo ngue ñee asite ũquĩ ángeles je cuu ra. —Jẽso mbae rasi icherẽ cherẽ ibi jenda ja rese. Dios embasi sacuaã, i que ñee siete ángeles je ra.

² Angel ñiinda que oso umbae mbae riru yenda icherẽ íbii ja ra. Ae siqui quia icuaã ndese nae, ae ngoi coi quia nguĩã ndese icuaã naanguia je nae, ũquĩ ire rasi rasi que cote ra. Mbae asi tubirãã ngue erese cote ra. Nyerõ aroneate que ra.

³ Segundo ángel que umbae mbae riru yenda icherẽ ama ndisha ja ye ra. Mbia raaque ruqui rã ngue ama ndisha cote ra. Ama ndisha rĩnda que mano ja tuchi mbae cote ra.

⁴ Tercer ángel que umbae mbae riru yenda icherẽ ama ñi nda. Ama ndiicoĩ ñi abe que eicherẽ no nda. Mbae ruqui rã tuchi que ama ja cote ra. ⁵ Angel ama ndaarõsa que ñee Dios je cuu ra. —Coche rei mbia icuaã erembasi. Dios

turã tuchi chõ nde re. Ndeturã mbeite que eriqui ra. ⁶ Ûqui mbia icuã nguiatu ngue ndequiato iquia iquiate nguiã nyii. Ndecheẽ nenei neneisa abe iquia iquia. Coche rei mbae rasi eresaanguquia ùqui je cote. Coche rei mbae ruqui eresaanguquia ee, i que ángel ñee turã Dios je ra. ⁷ Altar jenda mo abe que ñee Dios je cuu ra. —Ae bei. Coche mbia icuã erembasi nguiã cote. Ndeturã mbeite chõ ereico nguiã nde, i que Dios je ra.

⁸ Cuarto ángel que umbae mbae riru yenda icherẽ tenda rese ra. Nyebe tenda riqui nguiã mbia rei ja ngacu je cote. ⁹ Tenda que mbia sei tuchi quia embasi ra. Ûqui mose abe que mbia riqui ñee turã eãte Dios je ra. Dios embasi raque. Mbia que uba eã mbei Dios rese ra. Ñee icuã icuã mbei chõ ngue equia erii nda.

¹⁰ Quinto ángel que umbae mbae riru yenda icherẽ icuã nenda rese ra. Itondaru tuchi que icuã nimba ja je mbia cote ra. Mbia que hueecõ shiu shiu tuchi quia mbae rasi mose ee ra. ¹¹ Ûqui mose abe que mbia uba eã Dios rese ra. Huiicuã ngue esecha eãte quia ra. Ñee icuã mbeite que equia Dios rii nda. Ngasi rerequia mose abe que eriqui ñee icuã mbeite Dios rii nda.

¹² Sexto ángel que umbae mbae riru yenda icherẽ Río Eufrates ye ra. Ama nguasu tuchi que aque ra. Aque ama ngu e iru cot e ra. Tenda chuisa quitinda soldados iasa sacuã. ¹³ Aba checuayã icuã tres rese que amae nda. Emo ngue tu usẽ dragón nyuru si ra. Enongue que tu usẽ icuã nyuru si ra. Enongue que tu usẽ Dios cheẽ nenei ñooñosa churu si no nda. Nyui rá tuchi que ùqui aba checuayã icuã nda. ¹⁴ Ûqui aba checuayã icuã ngue mbia mae sayã saã saã tuchi quia milagros ra. Ñee ja que mbia rerecua ja je ra. Ñumunua ja sacuã pelear i sacuã Dios rese. ¹⁵ Sã Jesús ñee no: “Mbia ndua eã mose serese ra achu. Jëtesa tesa bei equia serese jë. Jëingoquiatu bei equia jë. † nda jëirei nguiã sechu mose”, sã Jesús i no. ¹⁶ Aba checuayã icuã ngue mbia rerecua munua ja huee ra. Pelear i sacuã Dios rese. Armagedón, i que hebreo cheẽ hue je ra.

¹⁷ Séptimo ángel que umbae mbae riru yenda icherẽ quiririãsa ra. Aque mose que Dios ñeemombo uchuchua ibatenda si ra. —Mbae rasi icherẽ ji jate cote, i que Dios ñeemombo ra. ¹⁸ Ama ngue pirirã pirirã i tuchite cote ra. Ama ngue sieu tuchi quia no nda. Ibei que ñee tuchi quia ra. Ibi abe que nyere tuchi quia no nda. Emo mose rá eã tuchi que ra. ¹⁹ Sucha tubiriã Babilonia ngue obo obo nyibite rii nda. Tres partes. Hue jenda tuchua que ngoi ja tuchi ra. Mbia chuchua que ngoi ngoi ja mangue chooñoa jenda aque mose ra. Dios quiatu ngue tesareiate nguiã Babilonia jenda chisaã icuã si. Nyebe eriqui nguiã paama i tuchi ee cote. Embasi mbasi uquirãcuã je cote. ²⁰ Islas abe que quiachã quiachã ja ama jenda ra. Ibi ibate abe que quiachamba chamba ja no nda. ²¹ Iquitã nguasu que ngoi ngoi quia mbia iquia iquia ra. Cuarenta kilos ja ja que ùqui iquitã nda. Iquitã ngue mbia iquia iquia tuchi quia ra. Nyebe mbia riqui nguiã ñee icuã icuã tuchi Dios rii. Ñee turã ndocoí ee.

17

Cuã icuã mbae rasi saã tuchi

¹ Ae mbae riru quereco ángeles nae, ùqui mo ngue tu ñee seje ra. —Nyao serese. Mbae tateacuquia ndeje. Babilonia jenda ra mbae rasi saã tuchi cote. Ae cuã siqui chooñote quia mbia ja rese nae, aque ra mbae rasi saã tuchi cote. Ama ndisha jie eñi ngoi mar hue. ² Mbia rerecua que siqui siqui jate

quia erese ra. Mbia ataque abe no. Ae que mbia mb̄icuā jate quia ra, i que ángel ñee seje cuu ra. ³ Angel que sererao turuquia r̄i cuu ra. Huee que amae cuña icuā ndese ra. Icuā irei átoo que eñi nda. Embesa ji tubiriâte que chí icuā ndese ra. Nombres mbesa ji icuā tuchi que ũquí Dios je ra. Icuā āquī atate que ra. Siete que eāquī nda. Diez que erambashī no nda. ⁴ Mbia rerecua irao raâte que cuña icuā irao ra. Eirao irei turâte que ra. Oro tubiriâte que equereco adorno nda. Perlas abe no. Sita ñetē aba quetamba abe no. Mbae riru abe que equereco oo ra. Oro ao ji. Huñcuā ngue equereco ja quia aque mbae riru ye cuu ra. ⁵ Embesa ji que chí eruba rese ra. Aba chícuayā tuchi que ra. Ā i chō ngue huñ nguiā: “Babilonia ño co re. Sucha tubiriā icuā ño co re. Cuña icuā nderecua ja chō co re. Mbae icuā nderecua ja chō co re”, i chō ngue embesa ji huñ nguiā eruba rese. ⁶ Quiacuate quia cuña icuā ndiqui reaē. Jesús quiato uninya ruqui quia embei quia quiacua nonde reaē. Achuruira tuchi que mae erese cuu ra.

⁷ Angel que ñee seje cote ra. —¿Mbaerā ereico nyuruirate mae erese re? Tarembiirandu cuña icuā ndese. Ae átoo eñi nae, aque rese abe tarembiirandu. Ae siete eāquī ndiqui nae. Ae erambashī diez riqui nae. ⁸ Ae rese eremae icuā cuu nae, aque ngue siqui rei nguiā cose. Emoate namo cote. Siquibe rae. Usē nda ibicua si. Aque icuā quera si mose, Jesús quiatoā nda nyuruira tuchi mae erese. Ae embae nombre mbesa ji eāte Jesús mbae libro rese nae, ũquí. Icuā nda oso mbae rasi raā tuchi tata cuasu cote. ⁹ Earacua achō nda ā secheē icua: Eāquī siete rā sí rei ibi ibate siete. Cuña icuā ñi ngoi ibi ibate siete tose hue. ¹⁰ Eāquī siete rā sí rei mbia rerecua siete no. Cinco que mano nda. Aque m̄i ndiqui namo co. Emo m̄i nda siqui emo mose cote. Aque ra siqui mb̄ir̄i ño mbia rerecuarā. ¹¹ Ũquí siete mo ndei icuā irei mo. Siqui que equia nyii ra. Emoate namo cote. Siqui i ra ũquí siete ua mose cote no. Mbia rerecua octavo ra ae cote. Ae ra oso bei tata cuasu aquere cote. ¹² Ae erambashī ndese eremae diez nae, mbia rerecua diez rā sí chō ũquí nde. Mbia rerecua eā ño ũquí namo nde. Emo mose quia ra mbia rerecua cote. Ererecua mb̄ir̄i ño ndae. Icuā ndese quiatu ra ererecua. ¹³ Hue r̄i sí tuchi ra ũquí ererecua ndua ndua. —Ererecuarā ño icuā jē, i ja ra ũquí ererecua. Uquirācuā nda emee ja icuā je. ¹⁴ Ũquí nda pelear i ja Cristo rese cote. Cristo quia ra i tuchi ũquí ja si. Ae quia mbia rerecua tuchi re. Ae quia equirācuā tuchi mbia mo si re. Ae siqui Cristo rese nae, Cristo chiirabo chō ũquí nde. Eturā tuchi chō ũquí Cristo je re, i que ángel seje cuu ra.

¹⁵ Ñee si que seje ra. —Ae ama ndisha rese eremae mar nae, ae ji cuña icuā ñi ngoi nae, mbia chumumbara rā sí chō ũquí nde. Mangue chooñoa jenda ja rā ño ũquí nde. Sucha tubiriā jenda ja rā ño ũquí nde. ¹⁶ Erambashī diez rese que eremae nae, mbia rerecua diez na sí chō ũquí nde. Ũquí nda cuña icuā ucuâyâte cote. Ũquí nda cuña icuā secha icuā cote. Erete checua ra esecha cote. Eroo ra eu. Erete ra esei tata je cote. ¹⁷ Dios que ñee nyii ra. —Mbia rerecua icuā tuchi ra cuña icuā je, i que Dios nyii ra. Echeē ndui sí ra eicuā icuā cuña icuā je cote. Dios que eicua nyii ra. Hue r̄i sí ra ũquí ererecua diez ndua. Umbae ra emondo ja icuā je. Icuā m̄i nda mbia rerecuarā ja cote. Aque mose ra Dios cheē ique. ¹⁸ Cuña icuā ndese ereico mae nae, sucha tubiriā na sí chō aque cuña nde. Hue sucha rei ererecua tuchi sucha ataque si. Mangue chooñoa jenda rerecua ja rei hue sucha, i que ángel seje ra.

18

Babilonia jenda ra mbae rasi saã tuchi

¹ Aquere que amae ángel mo ndese ra. Nguichi que u quia ibei si ra. Equirãcuã tuchi que ra. Enininya tuchi que ra. Ibi resae tuchi qu e eu quia ra. ² Angel que ñeemombo mombo tuchi ra. —Sucha tubiriã Babilonia jenda que ngoi ja cote ra. Mbia tiãte que huee cote ra. Aba checuayã icuã achõ ño chi nguiã hue cote. ³ Hue sucha tubiriã Babilonia jenda que mbia mbũcuã jate quia ra. Mbia mbui mbui tuchi que equia Dios si ra. Ubi icuã achõ ndese chõ ngue eriqui ndua tuchi ra. “Ûqui na nda se chã” i ja ja que equia mbae ja je ra, i que ángel ñee cuu ra. ⁴ Ibatenda mo ngue ñee cuu ra. —Ae serimba jemo nae, hue si jenyao. ¹ nda hue jenda chisaã icuã jësaã eã jë abe. ¹ nda mbae rasi jësaã eã jë, hue jenda mbae rasi raã mose. ⁵ Hue jenda que mbae icuã saã saã tuchite quia ra. Dios tesareiãte quia hue jenda icuã si co. ⁶ Hue jenda que mbia ataque mbasi mbasi tuchi quia ra. Ûqui sí ra mbae rasi saã tuchi cote. Dios ra mbae rasi saanguquia i i tuchi quia ee cote. ⁷ Hue jenda que ucuasu saã saã tuchi quia ra. Ubi achõ ndese chõ ngue eriqui ndua ra. “Co ai aico turãte co. Mbae rasi tu aroneate seje”, i ja jate rei que equia ra. Nyebe ra Dios mbae rasi saanguquia tuchi ee cote. ⁸ Aque mose tuchi ra mbae icuã tu tuchi ùqui mbua cote. Mbae rasi icuã nda esaã tuchi. Eriãcuã ndasi tuchi ra cote. Echuchua ra oquie ja. Mbia ra mano ja. Dios quiatu ra mbae icuã saanguquia tuchi mbia je eicuã ñii cote. Dios quiarei equirãcuã tuchi, i que ángel ñee cuu ra. ⁹ Ae ererecua mbae icuã saã nguia Babilonia jenda rese nae, ùqui ia eã tuchi ra erese cote. Nyeseo tuchi ra erese mbae rasi raã tuchi mose. Echuchua oquie rese mae mose. ¹⁰ I sho chõ nda echi mae mbae rasi raã ndese. Esiquichete quia ñene. Ñee nda ee mbae rasi raã mose. —Ureya eãte riqui jendese ã. Babilonia sucha tubiriã jenda rei ngue jë nyii re. Sucha eã tuchite que jenyuchu a cote ra. Mbae rasi tu asi chõchõ nguia jëje ã, i ra maesa erese ñee ee. ¹¹ Comerciantes mangue chooñoa jenda ja abe ra eya eãte, Babilonia jenda mbae rasi raã mose. Nyeseo tuchi ra erese. Mbia quia nda embae isi eãte nguiã cote. Nyebe ra eya eãte cote. ¹² ã je nda vender i nguiã ña:

oro
 plata
 sita ñetē aba queteamba huirã
 perlas
 tiru turã tuchi
 tiru irei
 tiru seda
 ira simbu turã mo
 marfil ao ji
 ira turã ao ji
 bronce ao ji
 hierro ao ji
 sitashĩ ao ji
¹³ canela
 aba mbushimbusa
 perfumes
 tuchua mbusimbusa
 vino
 mbae quira
 mbae cui

trigo
ovejas
caballos
ira nambacua
mbia nimba

Ūquĩ ja je nda vender i nguiã ee chã.

¹⁴ Mbia ra ñee Babilonia jenda je cote. —Ae mbae jenyoseite quia nae, ūquĩ mo nda tu âte jêje cote. Jembae tubiriãte riqui nyii nae, ūquĩ mo nda jendecoã cote, i ra mbia ee cote. ¹⁵ Ae ã mondo mondo quia vender i Babilonia jenda je nyii nae, ūquĩ abe ra chi mae isho erese no. Esiquichete ra chi mae mbae rasi raã ndese. Nyeseo ra erese. ¹⁶ Ñee nda Babilonia jenda je. —Ureya eãte riqui jendese ã. Babilonia sucha tubiriã jenda rei ngue jê nyii re. Sucha eã tuchite jenyuchua cote. Jêirao turã tubiriãt e rei ngue nyii re. Oro ao ji tubiriãte rei ngue adornos jembae nyii no nde.

¹⁷ Jembae ua asi chõchĩ jê mbae rasi raã mose, i ra ee. Ae comerciantes nyoĩ choi quia canoa ye nae, ae nyoĩ choi quia barco ye nae, ūquĩ nda chi isho mae Babilonia jenda mbae rasi raã ndese. ¹⁸ Babilonia sucha tubiriã oquieĩ mose ra ūquĩ nyi isho mae erese. —Sucha tubiriã tuchichĩ Babilonia. Babilonia na eãte emo, i ra nyeseo sucha tubiriã oquieĩ mose Babilonia jenda. ¹⁹ Ibi tuba ra emombo mombo uãquĩ ndese. Nyeseo tuchi rae. Sucha tubiriã oquieĩ mose Babilonia jenda. Ñeemombo mombo ra Babilonia jenda je. —Ureya eãte riqui jendese ã. Mbaechate que jêingochĩ nyii ra. Ure abe que mbaechate ureico jenii nyii no nda. Mbae ua asi tuchi chõchĩ co mose cote, i ra ñee Babilonia jenda je. ²⁰ Babilonia sucha tubiriã ua mose ra ibatenda iate cote. Jesús chimbaaquiatu abe ra eya cote. Ae Dios cheẽ senei senei quia nae, ūquĩ abe ra eyate cote. Dios quia ra mbae rasi mondo tuchi Babilonia jenda je uquiato riĩ.

²¹ Angel quirãcuã mo ndese que amae cuu ra. Sita cuasu mo ngue esui mombo ama ndisha ye cuu ra. Ñee ngue cote ra. —Eĩ nda Dios sucha tubiriã Babilonia mombo. Sã sita amombo ama ndisha ye no. Sucha tubiriã eã mbei ra Babilonia cote. ²² Nyebe ra mbia música saã eã mbei huee cote. Mbia ra irasei rasei eã mbei huee cote no. Mbia ra nyuao eã mbei mbae rese huee cote. Mbia ra mbua tocho eã mbei huee cote no. ²³ Lamparina mo nda mbae tesae eã huĩ huee cote. Emo nda ngũinisirã isiã mbei huee cote. Mbia mbaecha hue jenda que aba chũcuate riqui nyii ra. Hue jenda que mbia ataque mbĩrĩ i rĩ jate rei quia brujerĩ je nyii no nda. ²⁴ Hue jenda que Dios quiato iquia iquia bei quia ra. Dios cheẽ mbuchecuasa que eiquia iquia tuchi quia ra. Nyebe ra Dios mbae rasi raanguquia tuchi hue jenda je cote.

19

¹ Aquere que mbia cheẽ tubiriãte achandu ibate cuu ra. Ñeemombo mombo que ñee turã Dios je ra.

Dios turã tuchite riqui mbia je co.

Dios ae riqui mbia rirõ eicuã si co.

Dios ae chõ equirãcuã ndiqui nguiã co.

² Ae siqui sereãte quia Dios rese nae, ūquĩ nda Dios mbasi.

Mae tuchi ra erese embasi nonde.

Sã Dios mbae rasi saanguquia cuña icuã je namo no.

Aque que siqui siqui jate quia mbia rese ra. Mbia mbũcuã icuã ja.

Ae que Dios quiato iquia iquia quia no nda. Nyebe Dios embasi nguiã cote,

i que ibatenda cheẽ tubiriãte cuu ra.

³ Aquere que ñee si ra. —Dios turã tuchi riqui mbia je co. Cuña icuã ndiqui oquiei beite hue, i que ñee nda. ⁴ Aquere que veinticuatro ameĩ ñee turãte Dios je cote ra. Mbae reco cuatro rese. Ngoi que ngũĩã ndese Dios nonde ra. Dios chĩ mose ngoi umbae trono tose. Ñee turã ngue Dios je ra. —Amén. Dios turã tuchi riqui mbia je co, i que ñee turã Dios je ra. ⁵ Emo ñee ngue achandu ibate ra. —Ae Dios quiato jẽ nae, jeñee turã ja erĩ. Ae Dios cheẽ jemumba eãte quia jẽ nae, jeñee turã ja erĩ no. Ae ecuasa nae, ae eñetẽ nae, jeñee turã ja chõ nguia erĩ, i que ibatenda mo ñee cuu ra.

Jesús quiato ra quiaru erese ibate

⁶ Mbae mo ndieu que achandu cote ra. Iãcuã ndieu rã. Ama sieu rã. Mbia tubiriã ñee ño ndei ngue re. Æ ño ngue mbia ñee nguia:
Dios turã tuchi riqui mbia je co.
Equirãcuã tuchite riqui co.
Ae riqui mbia rerecua tuchi co cote.

⁷ Nandechĩmbia tuchi quia erese jẽ.

Nandechẽ turã ño nguia erĩ jẽ.

Jesús ra uquiato isi bei cote.

Sã emo ndiqui ngũinisirã isi bei no.

Sã eninisi icoquiato ngurã ndaarõ arõ no.

⁸ Sã eninisi tirushĩ turã mingue eru eisi bei nonde no.

Eĩ si ra Jesús uquiato isi cote, eru ngũinisirã isi rã,

i que ibatenda ñee cuu ra. Tirushĩ turã ndei Jesús quiato reco turã na.

⁹ Angel que ñee seje cote ra. —Co embesa rã: “Jesús ngũinisirã isi raanguia chõ nda esaã uquiato je ibate cote. Ae je ra ñee ‘jenyu serese quiaru’ i aque mose nae, Dios turã tuchi ra ũquĩ je”, ere embesa mi, i que ángel seje ra. —Dios cheẽ tuchi chõ ũquĩ nde, i que ángel seje ra. ¹⁰ Senia ndese que acoi rei ángel ndésaa ra. Adorar i sacua ee. Angel que ñee ño seje ra. —Adorar erechĩ nda seje jẽ. Dios rimba chõ se re. Nde rã sí. Ndequiato rã sí. Ae siqui tuchi quia Jesús rui nae, ũquĩ mo na ño se re. Dios mũi je chõ adorar ere. Ae Dios cheẽ senei senei nguia mbia je nae, Jesús mbuchecua sacua mbia je chõ ũquĩ nde, i que ángel seje ra.

Ae siqui caballoshĩ átoo

¹¹ Ibei que obo seje cuu ra. Caballoshĩ mo ndese que amae huee ra. Emo ngue chĩ eátoo ra. “Ñee ñoõfosa reã” i que aque je ra. Ererecua turãte que ae ra. Ae que guerra saã saã nguia mbae turã ndiquisã quisã nda. ¹² Tata rã tuchi que eresa ra. Corona tubiriãte que eãquĩ ndese ra. Embae nombre mbesa ji que chĩ ndei ra. Mbia mo ngue embae nombre icua eãte quia ra. ¹³ Eirao mondo ji eruqui ye que equereco ra. “Dios cheẽ” i que embae nombre ra. Jesús chõ eriqui reaẽ. ¹⁴ Ejército ibatenda que nyoĩ jate erui ra. Eiraoshĩ turã achõte que nyoĩ erui ra. Caballo átoo que echoi quia erui ra. ¹⁵ Ae rui ejército nyoĩ nae, aque que tiquise mo nguereco uchúruu ra. Ae teã teã nguia Dios je nae, ũquĩ mbasi sacua ño tiquise rerequia nguia uchúruu aque. Ae ra mbae rasi saanguquia tuchi Dios quiato eã je cote. Dios ra paama i tuchi mbia je aque mose. Mbia quia siqui sereãte nguia Dios quirãcuã ndese. ¹⁶ Ae chĩ caballo átoo nae, aque irao rese que embesa ji ñi nda. Eu rese abe que embesa ji ñi nda. ERERECUA TUCHI i que embesa ji huĩ nda.

¹⁷ Angel mo ngue chí juã tenda re cuu ra. Urubu je que eñi ñeemombo mombo ra. Ae mbebe ja quia. —Jenyu ja quiaru. Dios ra jembuquiaru ja tuchi cote. ¹⁸ Mbia chumumbara roo ra jêu cote. Mbia rerecua roo. Soldados rerecua roo. Mbia quirãcuã ndoo. Caballo roo abe no. Caballo ato jenda roo abe no. Mbia cuasu roo abe no. Mbia riiri ndoo abe no. Ae ererecua riqui nae, ùqui ndoo abe no. Ae ererecua eã ndiqui nae, ùqui ndoo abe no. Ùqui ndoo ra jêu ja cote, i que ángel urubu je ra. ¹⁹ Icuã ndese que amae cote ra. Mbia rerecua tubiriã ndese uquiato rese. Ejército tubiriãte que chirese ra. Ùqui ñumunu a ño nguia eicuã icuã nonde Jesús je reaë. Ae siqui caballosi átoo, aque je. Jesús rimba soldados je abe no. ²⁰ Jesús que icuã isi tarõ nda. Dios cheë nenei ñooñosa abe no. Aque chõ mbia mae sayã saã saã ño nguia icuã ndeco mose nyii reaë. Aque chõ mbia mbiriã iri nguia reaë. Ae mbia marca quereco quia icuã mbae nae, ùqui mbiriã iri ño equia reaë. Ae adorar i quia icuã naanguia mbae ao ji je nae, ùqui mbiriã iri ño equia reaë. Nyebe Jesús icuã mombo nguia tata cuásuu cote. Dios cheë nenei ñooñosa rese. Azufre rese eriqui sendi hue. ²¹ Jesús que icuã nimba iquia ja cote ra. Ae equereco quia tiguise uchúruu nae, aque je que eiquia ja cuu ra. Urubu ja que eroo u tuchi quia ra.

20

Dios ra Satanás tarõ mi mil años

¹ Aquere que amae ángel mo ndese cuu ra. Nguichi que u quia ibate si ra. Cadena cuasu que equereco ra. Llave abe que equereco ibicua mbuquiata sacua nda. Abismo i equia hue ibicua je. ² Angel que dragón isi nyucua ra. Satanás, i que equia dragón je ra. Mbei ima, i abe que equia ee ra. Diablo, i abe que equia ee no nda. Aque que ángel nyucua mil años cuu ra. ³ Angel que dragón mombo ibicua ye ra. Tarõ ngue llave je hue ibicua ye ra. Eiquesa que emata nda. I nda dragón mbia mangue chooñoa jenda mbiriã iri si eã. Mil años ua mose, ángel nda embui mbiriã na mondo.

⁴ Jesús quiato iquia ji rese que amae nda. Ae ãqui mbia nyisia sia quia Jesús riã. Mbia rerecuarã tuchi que ùqui cuu ra. Siqui eãte quiatu ngue icuã ndese re. Icuã naanguia mbae ao ji je abe que eriqui adorar i ãte ra. Icuã mbae marca abe que equerecoãte quia nguba rese no nda. O abe rese. Ùqui ndaaque que quera si cuu ra. Cristo que emi ererecuarã mil años nda. ⁵ Ùqui ndei mbia quera je rane ùqui. Mbia raaque ataque que quera eã aque mose ra. —Mil años ua mose ra Dios mbia ataque mbuquera cote, i que seje cuu ra. ⁶ Ae rane nda Dios mbuquera nyii nae, ùqui ia tuchi rae. Dios quiato tuchi chõ ùqui nde. Ùqui nda nyo i eã mbei tata cuasu. Siqui bei ra Dios rese. Cristo abe rese. Ererecuarã mbei ra eriqui Cristo rese mil años.

⁷ Mil años ua mose, Dios ra Satanás mbui sí mondo ibicua si. ⁸ Satanás nda mbia mangue chooñoa jenda mbiriã iri ja quia cote. Gog abe mbiriã iri. Magog abe mbiriã iri no. Dios quiatoã ja mbiriã iri. Etubiriã tuchite ùqui. Satanás nda ùqui munua nua ja quia. Guerra raã naa sacua Dios je. ⁹ Mbia tubiriã tuchi ra Satanás munua nua nguia ibi jenda ja cote. Ùqui nda Jesús quiato mama tuchi cote. Jerusalén ab e mama tuchi rae. (Dios nduasa tuchi chõ Jerusalén nde.) Dios ra tata mbu ibei si cote. Tata ra ùqui sei ja cote. ¹⁰ Diablo quiatu nda mbia mbiriã irite nguia. Nyebe ra Dios emombo tata cuásuu cote. Ae eriqui icuã mombo. Ae eriqui icuã naanguia mbae ao ji abe mombo. Ùqui nda siqui

bei huee tata cuásuu. Tata sendi quia azufre mumbara. Mbae rasi ra esaã saã mbei huee. Nyaashĩ mose. Isa abe chee. Usẽ eã mbei ra hue si.

Dios mbia uquiatoã mbasi mose

¹¹ Mbae mo ndese abe que amae cuu ra. Dios que chí ngoi trono tose ra. Trono cuasu tuchi que ra. Eshĩ ngue ra. Mbae que uchã ja Dios si aque mose ra. Ibi jenda. Ibei jenda abe no. —Tachimi Dios si, i rei que mbae ja ra. ¹² Amae ngue mbia raaque rese ra, ae mano ndei quia nyii. Mbía cuasu rese. Mbía riiri abe rese. Chi ja que júã Dios resa rae cuu ra. Emo ngue libros ata equia ra. Libro nongue abe que eequia ra. Ae mbía ra siqui bei nae, ùquĩ mbae nombres que chí aque libro rese ra. Ae mbía saã saã nguia mbae nyii nae, ùquĩ mbesa mbesa ji qu e chí ùquĩ libros rese ra. Dios que mbía chisaã mbuchechea checha cote ra. Embasi sacua. ¹³ Ae mbía mano ama ñi nae, ùquĩ ja que chí ra. Ae mbía mano íbii no nae, ùquĩ abe que chí ja no nda. Ae mano mano mangu e chooñoa jenda nae, ùquĩ abe que chí ja no nda. Dios que ùquĩ nyisaã mbuchechea checha ja cuu ra. Embasi sacua. ¹⁴ Aquere ra mbía mano eã mbei cote. Dios quiatoã nda siqui bei tata cuásuu no. ¹⁵ Ae embae nombre mbesa iriãte aque libro rese nae, ùquĩ ngue Dios mombo ja tata cuásuu seje cuu ra.

21

Dios ibi mbiasu, ibei abe

¹ Aquere que amae mbae yasu rese cuu ra. Ibei yasu rese. Ibi abe yasu rese. Ibei ñiinda quiachã ño nguia reaẽ. Ibi ñiinda abe no. Ama ndisha mo eãte que cote ra. ² Se rei Juan. Mbae que nguichi u quia ibate si seje cuu ra. Jerusalén yasu chõ nguichi u quia seje cuu reaẽ. Dios recua. Mbae mbaturã ji jate que ra. Sã emo ninisirã quiche riqu i ngurã je no. ³ Ibatenda mo ngue ñee cuu ra: —Sã jẽ. Sã Dios riqui mbía mumbara co cote jẽ. Siqui bei ra equia ere. Mbía rerecua turãte ra eriqui ee. Erimbarã tuchi ra mbía cote. ⁴ Dios ra mbía mbía tuchi cote. Mbía mo nda manoã tuchi cote. Emo ndasiã nda cote. Emo nda nyeseo eã cote. Emo ia eã eã nda cote. Cose ndare rã eã nda mbae cote, i que ibatenda ñee cuu ra.

⁵ Dios que ñee cote ra: —Sã jẽ. Sã aico mbae mbiasu jate co jẽ, i que ra. —Ã secheẽ embesa ja rã. Ae riĩ aico ñee nae, ùquĩ nda asaã ja, i que ñee seje ra. ⁶ Ñeembe que seje ra: —Ecuiche que eno. Co aico beite querabe co. Mbae eã mose abe que aico se rane nyii ra. Mbae ua ja mose abe ra aico bei querabe no. Emo isei mose, i turã nda amondo ee. I mbía mingo beisa ra amondo ee. “Mbae embu i ribishorõ”, ae eã nda ee. ⁷ Ae “qui jẽ” i quia Satanás je nae, ùquĩ je ra mbae turã ja amondo. Ùquĩ nderecua tuchi ra se. Seriri tuchi ra ùquĩ. ⁸ ã ja ra nyoĩ tata cuásuu: Esiquiche. Jesús icuasa reã. Mbía nyaba chaba reã. Mbía iquiasa. Ae siqui chooñote quia emo ninisi rese. Ae brujería saã saã nguia. Ae siqui quia Dios abareã ndese. Ae ñee ñooño nguia. Ùquĩ ja ra nyoĩ tata cuásuu. Huee ra tata rasi raã mbei. Asufre mumbara, i que ra.

Jerusalén yasu

⁹ Ae siete ángeles mbae rasi quereco mbae riru ye nae, ùquĩ mo ndese que amae cuu ra. Ñee ngue seje ra: —Quiatuchu. Mbae tateacuquia ndeje. Jesucristo ninisirã tateacuquia ndeje, i que seje cuu ra. ¹⁰ Aque ángel que sereraro ibi ibátee mo cuu ra. Huee que mbae nguichi u quia ibate si seje cuu ra. Jerusalén yasu chõ nguichi u quia seje cuu reaẽ. Dios recua. Sucha cuasu.

¹¹ Jerusalén yasu nininyate que ra. Dios nininya rã si. Sita rendi rã ño ngue eturã nda. Eibera turã ño ngue ra. ¹² Etaronda que sucha cuasu mama ja huí nda. Muralla, i que etaronda je ra. Eicoi tuchi que ra. Ibate tuchi que ra. Doce que eiquesa ra. Angel mii ngue chi eiquesa raarõ ja ja ra. Embesa mbesa ji ja que eiquesa ra. Doce tribus mbae nombre que chí jaaja eiquesa rese ra. ¹³ Eiquesa tres que chi tenda chuisa quití ra. Tenda sosa quití tres no. Norte quití tres no. Sur quití tres no. ¹⁴ Doce sita cuasu que chi muralla qui ñi nda. Etaronda irã. Doce apóstoles mbae nombres mbesa ji que chí ùquí sita rese ra.

¹⁵ Angel que uu mo nguereco oro ao ji ra. Dios recua mbuchechea sacua. Eiquesa abe mbuchechea sacua no. Efaronda abe mbuchechea sacua no. ¹⁶ Angel que Dios recua mbuchechea uu je ra. Cuadrado tuchi que Dios recua ra. Eoco que 2,200 kilómetros ra. Eicoi que 2,200 kilómetros no nda. Ibate quitinda abe que 2,200 kilómetros no nda. ¹⁷ Angel que muralla abe mbuchechea ra. Sesenta y cuatro metros que eicoi ra. Sã mbia riqui mbae mo mbuchechea no. Eí sí que ángel muralla mbuchechea no nda. ¹⁸ Oro ao ji rei sucha cuasu. Eibera tuchi que ra. Muralla rei sita ao ji. Jaspe ao ji. Aba queteamba tuchi rei jaspe. ¹⁹ Sita cuasu chi quia muralla irã nae, ùquí arõ ngue sita ñetë nininya chíchi ja ra. Embarõsa chõ ngue ùquí nde. Jaspe mbitee ji rane ngue ra. Zafiro mbitee ji que chí jaspe arõ cote ra. Agata mbitee ji que chí cote ra. Esmeralda abe no. ²⁰ Onice. Cornalina. Cristólito. Berilo. Topacio. Crisoprasa. Jacinto. Amatista. Ùquí ja sita ñetë nininya que chi ja ja sita cuasu arõ nda. ²¹ Eiquesa riquisã jate que perla ao ji chi ra. Perla mii mii ja que chí eiquesa riquisã nda. Oro ao ji que calle mbite renda ra. Oro ao ji achõ ngue ra.

²² Dios chuchua templo mo eãte que huee ra. Mbia quiatu que ñee mbei quia Dios je mangue chooñoa nda. Jesucristo abe je. ²³ Tenda eãte abe que eriqui Dios récuua seje cuu ra. Nyasi eãte abe que seje cuu ra. Dios nininya ae chõ ngue mbae tesae ja quia ra. Jesucristo nininya abe no. ²⁴ Dios nininya ra uquiato tesae ja ino huee. Mangué chooñoa jenda ja. Mbia rerecua ra ñee turã turã ja Dios recua rií cote. ²⁵ Dios recua chíquesa tarõ iriã mbei rae. Itondaru eã mbei ra huee. ²⁶ Mbia mangué chooñoa jenda ja ra ñee turã turã Dios recua rií. Mbae turã ja ra chí huee. ²⁷ Mbia icua nda iqueã mbei huee. Mbia mbiirí irísa abe ra ique eã mbei huee no. Ae embae nombre mbesa ji Jesucristo mba e libro rese nae, ùquí achõ ño nda ique Dios récuua.

22

¹ Angel que ama mo abe teacuquia seje cuu no nda. Mbia mingo beisa que aque ama nda. Ama ndiibera tuchi que ra. Dios mbae que aque ama nda. Jesucristo mbae abe no. Sucha tubiriã ite ri ngue iãcuã irãtã mo ñi nda. ² Ama nímia nguiti ja que ira ñi nda. Mbia mingo beisa que ùquí ira ra. Ùquí ngue ia beite quia doce veces en el año nda. Nyasi mbuchechea quiatu bei que eriqui ia ia bei ra. Ùquí iraro que mbia chumumbara mbucherõ cherõ tuchi quia ra. ³ Mbia rasi eã mbei ra huee cote. Dios ra siqui tuchi huee. Jesucristo rese. Cordero, i equia ee. Erimba ra ñee turã mbei quia ee huee. ⁴ Mae mae ja ra Dios ruba rese. Dios mbae nombre mbesa ji ra equereco nguba rese ja ja. ⁵ Itondaru eã mbei ra huee. Tenda aroneate huee. Tata abe aroneate huee no. Dios nininya ae chõ nda mbae tesae ja huí nguiã huee. Ererecua turã tuchi ra Dios quiato ja huee.

Achite Jesús ñi tu a cote

⁶ Angel que ñee seje ra: —Acheẽ ñooño eã ño nguiã co. Ae riĩ aico ñee nae, ũqui nda Dios saã ja. Sã Dios ucheẽ mbuchecuaa mondo mbia je cose no. Eĩ si que sembu namo no nda. Ae ra nyecua namo jiri nae, ũqui ndeacuquia sacua mbia je chõ ngue sembu nguiã. ⁷ “Se ra achu jei”, i que Jesús ra, i que ángel ñee seje ra. Ae ra ã mumba eã Dios cheẽ mbesa ji nae, ũqui ia tuchi rae.

⁸ Se rei Juan. ã ndese que amae nda. ã ngue achandu no nda. Aque ángel ã teacuquia quia seje nae, aque jii que acoi rei senia ndese ra. Adorar i sacua ee. ⁹ Ñee ngue seje ra. —i Adorar erechĩ nda seje jẽ! Dios mii je chõ adorar ere. Dios rimba chõ se re. Nde rã sí. Ndequiato rã sí. Ae Dios cheẽ mbuchecua checua quia nae, ũqui na si. Ae ã mbesa ji mumba eãte quia nae, ũqui na sí, i que ángel ñee seje ra.

¹⁰ Angel que ñee si seje no nda: —Ae erembesa co libro nae, ũqui nda erembuchecua yã cuayachĩ mbia si jẽ. Eteaquiato ee. Ae riĩ erembesa nae, achite eñi tu a cote. ¹¹ Sã mbia icua mbae icua naa naa ño na. Ae siqui quia mbae rondei rese nae, sã eriqui rã erese. Ae siqui quia mbae turã ndese nae, siqui i i tuchi ra erese cote, i que ángel seje ra.

¹² Jesús que ñee nda: —Achu jei ra se. Ae mbae turã saã saã nguia nae, ũqui je ra mbae turã aru. Echisaã na sí. ¹³ Co aico beite querabe co. Mbae eã mose que aico se rane nyii ra. Mbae ua ja mose abe ra aico bei querabe no, i que Jesús ra.

¹⁴ Ae echia irei ji Jesús ruqui je nae, ũqui ia bei ra eriqui. Eirao ituquia jí na ndei echia irei jí. ũqui nda ique Dios récuua. Siqui turã mbei ra equia huee. ¹⁵ Dios quiatoã nda iqueã huee Dios récuua. Ae brujería saã saã nguia nae. Ae siqui choõnote quia cuña mo ndese nae. Ae mbia iquia nae. Ae siqui quia dios mbuae rese nae. Idolo rese nae. Ae mbia mbiirĩ irĩ nguia nae. ũqui mo nda iqueã tuchi Dios récuua.

¹⁶ Jesús que ñee nda: —Angel serimba que amondo ra. ã nenei nenei sacua iglesias ja je. David i chõ se re. David nducucha chõ se no nde. Nyasitata nininya rã ño se re, i que Jesús ra.

¹⁷ Espíritu Turã ndiqui “quiatushu” i co. Jesús ninisirã abe riqui “quiatushu” i co no. Sã secheẽ andusa abe “quiatushu” i. Emo isei mose, sã euaẽ i mbei Jesús mbae. I mbia mingo beisa ra Jesús mondo ee. Embei mose, siqui bei rae. —Mbae embu i ribishorõ seje, i eã nda Jesús ee.

¹⁸ Ae ã ñandu quia Dios cheẽ co libro resenda nae, ũqui je tacheẽ tuchi: Emo co libro resenda mbirõ mose emo ñee je, Dio s ra ũqui mbasi tuchi. Ae mbae rasi chi ja co libro rese a nae, ũqui nda esaã ja tuchi. ¹⁹ “Dios cheẽ eã ño co re”, i mose co libro resenda je, ũqui abe ra Dios mbasi tuchi. ũqui nda Dios mingo bei eã nguécuaa.

²⁰ Jesucristo cheẽ ño ã nde: —Achu jei ra se, i equia co. Amén. Echu cote, Jesucristo.

²¹ Jesucristo rei nandererecua. Sã uturã mondo tuchi jẽje. Amén.